


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

Tí Nuevo Testamento cuènte Inchéni Jesucristo C'óna Nquìva

New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
b9b09122-b3f6-59f0-9594-749907b32b5b

Contents

SAN MATEO 1
SAN MARCOS 72
SAN LUCAS 117
SAN JUAN 192
LOS HECHOS 248
ROMANOS 314
1 CORINTIOS 341
2 CORINTIOS 369
GALATAS 386
EFESIOS 396
FILIPENSES 405
COLOSENSES 412
1 TESALONICENSES 418
2 TESALONICENSES 424
1 TIMOTEO 427
2 TIMOTEO 435
TITO 441
FILEMÓN 445
HEBREOS 447
SANTIAGO 467
1 PEDRO 474
2 PEDRO 482
1 JUAN 486
2 JUAN 493
3 JUAN 494
SAN JUDAS 495
APOCALIPSIS 497

Tí tan jína chrónka ch'ín Mateo

*Tí sín k'uaxrjenixin ch'ín Jesús
(Lc. 3.23-38)*

¹ Tíhi mé chrónka nkekro kain tí sín k'uaxrjenixin ch'ín Jesucristo. Mé jehe ch'án k'uaxrjenixin ch'án tí ch'ín David la ko tí ch'ín Abraham.

² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kain kichó ch'án.

³ Ch'ín Judá mé it'é tí ch'ín Fares la ko ch'ín Zara la tí iné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram.

⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón.

⁵ Ch'ín Salmón mé it'é tí ch'ín Booz la iné mé tjan Rahab. Ch'ín Booz mé it'é tí ch'ín Obed la iné tí ch'ín Obed mé tjan Rut. Tí ch'ín Obed mé it'é tí ch'ín Isaí.

⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko iné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa.

⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías.

⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acaz la ch'ín Acaz mé it'é tí ch'ín Ezequías.

¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías.

¹¹ Ch'ín Josías mé it'é tí ch'ín Jeconías la ko kichó ch'án. Tí sín a mé k'uéjó sín tí yaon a ntá xrinaḡya ikui tí sín Babilonia sákjuíko sín tí sín israelita kixin ts'ejóchjina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel.

¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor.

¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud.

¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob.

¹⁶ Ch'ín Jacob mé it'é tí ch'ín José la ch'ín José mé k'óna xii tjan María la jehe tjan María mé iné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrji k'uaxrjenixin tí ch'ín Abraham ntá kjuák'e ch'ín David la í jnko catorce t'áchrji k'uaxrjenixin tí ch'ín David la ntá tí sín Babilonia sákjuíko tí sín israelita chjasén sín la ntá í jnko catorce t'áchrji k'uéjó la ntá kokjihi Cristo.

*Kokjihi Jesucristo
(Lc. 2.1-7)*

¹⁸ Tí kokjihi Jesucristo mé xikihi kónhen. Tí tjan María iné ch'án mé tsotḡhe tjan ch'ín José. A ntá naḡa kuákjahya kichó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios.

¹⁹ Ch'in José mé tí nkexro ts'óna xíi tjan Maríá, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehe ch'án tjan kixin tjinkaon ch'án kixin ninkexró tsoñoehya.

²⁰ Ntá tí naxá tjenkayáxin ch'án kixin xikaha sich'e ch'án ntá kotáchríen ch'án chrónkaxín titàya k'uíkuèn ch'án ikui ijnko ángel kuènte Ìnchéni nixja, chrónka kixin:

—José jaha mé k'uaxrjeníxian David. Tóxakuanhya la ko chrakonhya chrókjuákjá tjan Maríá ts'óna ichjián kixin tí xjan tsochónta tjan la kjuachaxín kuènté Nchakuen Dios ikui mé k'óna tí xjan a.

²¹ Sinchekokjíhi tjan ijnko xjan ntoa la its'in xjan Jesús mé xikaha its'in xjan kixin jehe xjan tsjakjìn ijíe chojni —mé xikaha chrónka tí ch'ín ángel.

²² Kaín tíha kónhen kixin tsoxiteyá tí nkehe chrónka Ìnchéni k'uéniexja tí sín k'uéchrónka itén ch'án ósé. Mé ntáchro xíkíhi:

²³ Ijnko tjan naxá chóntahya chojni ntoa mé tsjak'eyá tjan la tsochónta tjan ijnko xjan,

la sinchek'in sín ch'án Emanuel,*

la tíha t'axrjéxín kixin Dios tjejókoni. Mé xikaha chrónka itén Dios.

²⁴ Ntá k'uàya ch'ín José ntá kjuínchexiteyá ch'án tí nkehe k'uətoan tí ángel kuènte Ìnchéni la kuákja ch'án tjan Maríá ts'óna ichjién ch'án.

²⁵ A ntá kjónté xikaha la naxá kójnkojíehya sín tí naxá kokjéehya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjéxín ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uətuénhen ch'án tí nación a. A ntá xrinahya iso chojni ntoa kjuixín ijnko chjasin nó tjitoxín yaon mé kjuíi sín chjasin Jerusalén. Jehe sín mé sín mago mé tónoexín sín tí konotsé.

² Ntá kjuanchankí sín kixin:

—¿Nketí tjen tí xjan tsíkókjíhi ts'óna tí rey ts'ətuénhen tí sín judío? K'uíkonxínni tí konotsé kuènte ch'án nó tjitoxín yaon na ntá ó kjuíni kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xikaha ichro sín ntá imá tóxakonhen ch'án la ko tóxakonhen kain tí sín chjasin Jerusalén.

⁴ Ntá tí ch'ín rey k'uətoan kixin síxrakoa kain tí sín nchát'á t'ətoan la kain tí sín tjako tí ley la ntá kjuanchankíhi sín ch'án nketí chrókókjéxín tí nkexro Cristo.

⁵ Ntá jehe sín kjuátehe sín kixin:

—Tsokjéxín xjan chjasin Belén estado Judea mé xikaha tsíkjin tí sín tsíchrónka itén Dios. Ntáchro xíkíhi:

⁶ Jaha chjasin Belén nonte Judá,

jaha la jehya ijnko chjasin imá ntsí;

kixin tí nonte ts'axrjéxín tí nkexro antsí t'ətoan,

la jehe ch'án ts'ayakonhen tí chjasin kuèntana mé chjasin Israel.*

Mé xikaha nixja itén Dios.

⁷ Ntá imó k'uíyehé ch'ín Herodes tí sín mago la kjuanchankíhi ch'án sín nkesá kjuankixin k'uíkon sín tí konotsé.

* 1:23 Isafas 7.14 * 2:6 Miqueas 5.2

⁸ Ntá chrónka sín ntá tuénxín k'uętoan ch'án kixin sátsji sín chjasin Belén la ntáchro ch'án kixin:

—Sátjirá ntiha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntiha tsotjahą xjan kjuasáya —mé xikaha k'uętoan ch'ín Herodes.

⁹ Ntá kuínhin tí sín mago tí nkehe k'uętoan tí ch'ín rey ntá sákjuí sín la xik'ikon sín tí konotsé ínaá la kjuítaón va ntja la ntá chréhe sín hasta kjuák'e va chrítaón tí nchia tjen tí xjan a.

¹⁰ Ntá tió k'uikon tí sín mago nketí kjuák'e tí konotsé la imá kóchéhe sín.

¹¹ La k'uixenhen sín tí nchia la k'uikon sín tí xjan kjuák'eko tí tjan María iné xjan. Ntá k'uejoxin toch'in sín la chjéhe sín kjuasáya ntá kuakitjehe sín tí nkehe kjuikao sín la kjuanjon sín chica oro la ko ihnti tsochéxin chjínco la ko xroan xraxé náxrjón.

¹² Ntá chr'éxin kotáchrién sín chrónkaxín kixin chrókjanhya sín tí tjen ch'ín Herodes. Méxra kjanxin sín í jnko ntja la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'ín José chrónkaxín titáya k'uikon ch'án ijnko ángel kuente Ìnchéni chrónka kixin:

—T'áyá sátsjioa xjan la ko iné xjan la sátsjirá chjasin Egipto la ntaoh ts'ejorá hasta tsoxrjankajia, kixin tí ch'ín Herodes xritjeyá tí xjan chrók'óyan ch'án xjan —mé xikaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko iné xjan la sákjuí sín chjasin Egipto tí tie a.

¹⁵ Ntahó k'uejó sín hasta ik'uén ch'ín Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchrónka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyahą ch'án”.†

Ch'ín Herodes mé k'uętoan its'en xjan

¹⁶ A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uętoan ch'án kixin its'en kaín tí chánjan ntoá siín chjasin Belén ó chóna iyó nánó la ko tí xjan naxą chónahya iyó nánó. Mé xikaha k'uętoan ch'án kixin ó xraxínkaon ch'án nkehe kuínhin ch'án chrónka tí sín mago.

¹⁷ Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkamą tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.‡

Mé xikaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuente Ìnchéni mé k'uikonxín ch'ín José kotáchrién ch'án tí kjuák'e ch'án chjasin Egipto mé ntáchro kixin:

²⁰ —T'áyá sátsjioa tí xjan la ko tí iné xjan la tsokjan chjasin Israel kixin ó kjuixin k'uén tí nkexro chrók'óyan tí xjan a —mé xikaha k'uętoan tí ch'ín ángel.

²¹ Ntá ch'ín José mé k'uàya ch'án la sákjuíko ch'án tí xjan la ko tí iné xjan la sákjuí sín chjasin Israel.

† 2:15 Oseas 11.1 ‡ 2:18 Jeremías 31.15

²² **A** ntá kuínhin ch'ín José kixin ch'ín Arquelao xjeen ch'ín Herodes mé k'ueṭoan ch'án tí estado Judea la ntá chrakon ch'án la sáchrókjuihya ch'án ntiha. **A** ntá kotáchrién ch'án chrónkaxín Dios kixin sáchrókjuí ch'án estado Galilea.

²³ Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uejó sín. Mé xíkaha xiteyá tí nkehe tsíchrónka tí sín k'uéniexja itén Dios senó. K'uéntáchro sín kixin jehe ch'án mé tsíkítexín sín nazareno.

3

Juan el Bautista mé kjuák'e ch'án nteje
(Mr. 1.1-8; Lc. 3.1-9, 15-17; Jn. 1.19-28)

¹ **A** ntá tí yaon a kjuák'e ch'ín Juan Bautista nteje Judea la kjuako ch'án.

² Ntáchro ch'án kixin:

—Títoghérá ijjará la tjínkirá tí nkehe tjenkayáxinrá kixin í séhya itsi kjuachaxién Dios.

³ Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuènte tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixín Inchéni.

Takitjehérá ijnko ntja ntoí.”*

⁴ Tí iké ch'ín Juan mé tsík'óna kaxrēe kocamello la ko tí nkehe chr'ínkat'óxin ch'án mé tsík'óna tjoa. **A** ntá tí nkehe kjóne ch'án mé kochjoá la ko itsjen kotsjenta tónoxín nteje.

⁵ Itsjé chojni kuixín sín chjasin Jerusalén la ko í so chjasin siín estado Judea la ko chjinaxón tí ntarío Jordán kixin tsinhin sín nkexrí tjechrónka ch'án.

⁶ Ntá chrónka sín ijje sín ntá ch'ín Juan kuikítexín ch'án sín tí ntarío Jordán.

⁷ Ntá xrínahya k'uikon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuènte Dios ó tsí?

⁸ T'ichjánxin kixin chrók'uejorá jnkojína chrókjuáqoxínrá kixin chaxín kjuítoxinhínrá tí nkehe tjenkayáxinrá.

⁹ Jahará nchehnerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro í la Dios tsjacha chrókjuich'éna ch'án chojni k'uaxrjeníxin ch'ín Abraham.

¹⁰ Tí chica hacha ó tjechónhen tsochrínjinxín tí nta. **A** ntá kaín xín nta t'ónahya to jína mé tsochrínjin kixin tsoche.

¹¹ Janhan mé ínta tikítexián chojni kixin tsjakoxín sín kixin ó kjuítoxinhin sín ntje sín. **A** ntá tí nkexro itsi chr'éxin mé tsíkítexínrá tí Nchakuen Dios la ko xrohi. Antsí tjetóxin t'ētoan ch'án a ntá janhan la kánhyó. Méxra chrókósuana sáchrókjuíkian tokaté ch'án.

¹² Jehe ch'án la ó tjehraá ch'án pala sinchetjuáxin ch'án noatrigo kixin tí ntachjiji trigo la ókjé ts'ejo ch'án a ntá tí noatrigo la tsjenájín ch'án la ts'enkächjina ch'án. **A** ntá tí ntachjiji trigo la tsjakaxín ch'án ijnko xrohi ts'ankahya jnkochríxín —mé xíkaha kjuako ch'ín Juan.

Kuikite ch'ín Jesús
(Mr. 1.9-11; Lc. 3.21-22)

* 3:3 Isaías 40.3

¹³ Ntá ch'ín Jesús kjuixin ch'án nó estado Galilea ikui ch'án tí ntario Jordán tí tjen ch'ín Juan kixin ch'ín Juan tsikite tí jehe ch'án.

¹⁴ A ntá tí saoxín chrohya ch'ín Juan chrókuikite tí ch'ín Jesús ntáchro ch'án kixin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka kixin jeheni chrókuikitia tí jaha —ichro ch'ín Juan.

¹⁵ Ntá kjuátehe ch'ín Jesús kixin:

—A ntá jie la títóhé tí xikaha tjenkayáxian kixin t'ichjánxín tsikiteni kixin sinchexiteyáni tí nkehe k'uetqan Dios.

Ntá ch'ín Juan kuítekaon ch'án la xikaha kjuich'e ch'án.

¹⁶ Ntá tió kuikite tí ch'ín Jesús la ntá xríngahya titáya xitjehe nkajní la k'uikon ch'án tí Nchakuen Dios, éxi kontóá tsjehe, k'uinkajinxin nkaya nkajní ntá kjuák'e chrítaón kja ch'ín Jesús.

¹⁷ Ntá xríngahya kuínhin sín ijnko tan kuixin nkaya nkajní ntáchro kixin:

—Tíhi mé xjanna la imá tjuahá ch'án la imá chàna kixin nchexiteyàna ch'án.

4

Ch'ín Tsochren chrókuachroe ch'ín Jesús

(Mr. 1.12-13; Lc. 4.1-13)

¹ Ntá tí Nchakuen Dios mé sákjuiko ch'ín Jesús tí nteje a ntá ch'ín Tsochren tjinkaon chrókuachroe ch'ín Jesús.

² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta.

³ Ntá ch'ín Tsochren mé kóchjinehe tí ch'ín Jesús kixin tjinkaon chrókuachaxin ch'án. Ntáchro ch'án kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ Ntá kjuátehe ch'ín Jesús ntáchro kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tán nixja Dios tjejóchónxin chojni”^{*} —ichro ch'án.

⁵ Ntá ch'ín Tsochren mé sákjuiko ch'ín Jesús tí chjasin tjóá mé chjasin Jerusalén, la sákjuiko ch'án tí chrítaón tí kja njnko a

⁶ la ntáchro ch'án kixin:

—Tí chaxín Xjeen Dios jaha la títóhé t'anótjenxian tí noi ntihi kixin ntáchro xroon itén Dios kixin:

Dios mé ts'etuenhen tí sín ángel kuente ch'án kixin ts'ayakonhan sín.

Tsotsé sín itjá

kixin tsotéhya totá ts'itja xro tí ts'anótjen[†]

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjiníhya chrókuásixián kjuaxroan kjuachaxin kuente Inchéni Dios”[‡] —ichro ch'ín Jesús.

⁸ A ntá tió kjuixixin sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín xín tí nación siín chjasintajni la ko tí nkehe t'etqan kuente.

⁹ La ntáchro ch'ín Tsochren kixin:

—Kaín tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'ín Tsochren.

* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16

¹⁰ Ntá kjuátehe ch'ín Jesús ntáchro ch'án kixin:

—Sátjia Satanás kixin xroon itén Dios ntáchro kixin: “Chrókjuikosáyehé Inchéni Dios la jehó ch'án chrókjuich'ehé xra”^S —ichro ch'ín Jesús.

¹¹ A ntá ch'ín Tsochren mé kuitóhe tí ch'ín Jesús la iso tí sín ángel ikui tsjinkitsa tí jehe ch'án.

*Ch'ín Jesús kjuankixin ch'án tí xra kuènte ch'án estado Galilea
(Mr. 1.14-15; Lc. 4.14-15)*

¹² A ntá ch'ín Jesús mé kuínhin ch'án kixin tí ch'ín Juan mé tjechjina ch'án ntóechiso a, a ntá jehe ch'án mé sákjuí ch'án estado Galilea.

¹³ Kuítóehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabulón la ko estado Neftalí.

¹⁴ Mé xíkaha kjuích'e ch'án kixin tsoxiteyá tí nkehe tsíkjin ch'ín Isaías, ijnko nkexro k'uéchrónka itén Dios. Ntáchro ch'án kixin:

¹⁵ Tí estado Zabulón la ko Neftalí tí ntja chrínta ntayaon la tí nó chók'á tjitóxin yaon tí ntario Jordán, mé tí estado Galilea tí tjejó tí sín jehya judío.

¹⁶ Mé ntiha tjejó tí sín siín tí sítié mé ts'ikon sín ijnko xrohi jíé, la tí sín éxi tsík'en xritjejó sín mé ts'inkaséyanxín ts'ejó sín.

¹⁷ Ntá kjuankixin kjuako ch'ín Jesús ntáchro ch'án kixin:

—Tjitóxínhinrá ntjará. Tsákjára ijnko ntja nixin kixin kjuachaxin kuènte Dios tjen nkaya nkajni la í séhya tsi.

*Ch'ín Jesús k'uíyehé noó chojni k'uétsé koche
(Mr. 1.16-20; Lc. 5.1-11)*

¹⁸ Ntá sákjuí ch'ín Jesús chrínta ntayaon Galilea ntá xringhya k'uíkon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehe sín mé koche xritsé sín. Ntá tinkák'e sín nchísén chrínki nta.

¹⁹ Ntá ch'ín Jesús nixjehe sín ntáchro ch'án kixin:

—Chréhéra tí janhan ntá tsotjahará xra tsjéyará chojni.

²⁰ Ntá tuénxín kuitóhe sín tí nchísén k'uétséya sín koche, ntá sákjuíko sín ch'án.

²¹ Ntá kjínhya kjuíji ch'án ntá k'uíkon ch'án ijnko yaá sín, jnkokoá kichó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabárcō la tjejójtōnōite sín tí nchísén tséya sín koche. Ntá kjaxin tí sín a k'uíyehé ch'ín Jesús.

²² La ntá tuénxín kuitóhe sín tí ntabárcō la ko tí it'é sín ntá sákjuíchréhe sín tí ch'ín Jesús.

*Kjuakohē ch'ín Jesús nchónhya chojni
(Lc. 6.17-19)*

²³ Ntá sákjuí ch'ín Jesús nkuíxín tí estado Galilea la kjuakoxin ch'án tí njnko Israel siín jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitóhe ch'án jína kaín chojni chónka kaín xín chin la ko kaín kjuatjoté.

²⁴ Ntá kaín xín tí sín tjejó tí estado Siria mé kuínhin sín kuènte Jesús la kjuikāo sín kaín xín tí sín níhi chónka kaín chin la ko tí sín imá tjotéhe sín la

ko tí sín chón̄ta nch̄akuen tí jín̄ahya la ko tí sín t'aniáte sín la ko tí sín síxénká toté sín, la ntá ch'ín Jesús mé kjuínchekitoh̄e ch'án sín jína.

²⁵ Ntá itsjé chojni kjuíchréhe tí ch'ín Jesús, mé kjuixín sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntarío Jordán.

5

Kjuakoxin ch'ín Jesús ijnko jn̄a

¹ K'uíkon ch'ín Jesús kixin k'uéjón nchónhya chojni la ntá chr̄in ch'án ijnko jn̄a la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejóntaxin sín tí tjen ch'án.

² Ntá ch'ín Jesús kjuankíxin kjuakoh̄e ch'án sín kixin:

Tí nkexro tjejó náxrjón

(Lc. 6.20-23)

³ —Náxrjón tjejó tí sín nohe kixin t'ichjánxinhin sín nkehe kuente Dios kixin ntá jehe sín mé tsochón̄ta sín tí kjuachaxin kuente Dios.

⁴ Náxrjón tjejó tí sín t'ává kixin Dios mé sinchechéhe asén sín.

⁵ Náxrjón tjejó tí sín hnkehya asén kixin jehe sín mé ts'áyéhe sín tí nonte tsjanjon Dios.

⁶ Náxrjón tjejó tí sín éxí yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkítsa sín kixin ts'áyéhe sín tí nkehe tjinkaon sín.

⁷ Náxrjón tjejó tí sín tikonóhe kichó sín kixin ntá Dios kjaxin tsikonóhe tí jehe sín.

⁸ Náxrjón tjejó tí sín kótjóá asén kixin ntá jehe sín sátsjik'ikon sín Dios.

⁹ Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

¹⁰ Náxrjón tjejó tí sín kjónté tjejótjasótexin sín kixin kjuínchexiteyéhe sín Dios kixin ntá jehe sín mé kuente sín nkaya nkajní.

¹¹ Náxrjón tjejorá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro sín kixin tinkachónkirá tí janhan.

¹² Chrókócháhará la ko kjuaxróxin chrók'uejorá kixin ntá chr'exin jahará ts'ayéherá ijnko nkehe antsí má jína nkaya nkajní. Mé xikaha kjuasóte tí sín k'uéjón óse k'uéchrónka sín tí itén Dios.

Jahará la éxí yóhe xjnta la ko éxí xrohi t'inkaséyanxín chjasintajni

(Mr. 9.50; Lc. 14.34-35)

¹³ Jahará mé yóhe éxí xjnta chjasintajni. A ntá tí chrók'uánkéhe tí jní tí xjnta la ntá xitjahya chrókójní inaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

¹⁴ A ntá jahará la mé tí xrohi t'inkaséyanxín chjasintajni. Ijnko chjasin itjen chritaón jn̄a la xitjahya tsjak'emá.

¹⁵ La ko kohya nkexro sinchek'ákjen ijnko lámpara ntá tsjak'e chrínkí ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro sín tí nchia ntíha.

¹⁶ Mé xikaha tí jahará chrókóyóhará éxí tí xrohi t'inkaséyanxín kixin ts'ikon kaín chojni tí xra jína tjejoch'erá la ntá chrókjuanchehe sín kjuasáyé It'eni tjen nkaya nkajní.

Kjuako ch'in Jesús kuènte tí ley

¹⁷ 'Jahará chróntáchrohyará kixin k'uinka kixin tsjakjían tí ley tsík'etóan ch'in Moisés la ko tí nkehe kjuako tí sín k'u'échrónka itén Dios. Náhi. Jehya xíkaha k'uinka kixin tsjakjían tíha. Náhi. K'uinka janhan kixin tsjákoxian nkehe chaxín t'axrjexín tíha.

¹⁸ Chaxín xrjanka kixin tí naxa tjen nkajní la ko chjasintajni la kohya ninkehó ley tsjinhya, mé tsjinhya nijnko punto la nijnko letra kuènté tí ley tsjixinjian tsoxiteyá kaín tí nkehe t'ichjánxin tsoxiteyá.

¹⁹ Mé xíkaha tí nkexro tsitekakonhya tí nkehe k'uetóan tí ley kjónté ijnko nkehe imá intsí, la ko chrókuako kixin xíkaha chrókuitekakonhya chojni, la jehe sín la imá tsontsí sín tí tsi tí kjuachaxin kuènte Dios. A ntá tí nkexro tsitekaon la ko tsjákohe ókjé nkexro tsitekaon sín, mé antsí imá ts'etóan sín tí tsi kjuachaxin kuènte Dios.

²⁰ Méxra tjonkará kixin t'ichjánxin kixin antsí jína ts'ejorá la tsoyóahyará tí sín tjako ley la ko tí sín fariseo kixin tí tsoyóhará sín la ntá xitjahya tsákjará tí kjuachaxin kuènte Dios tjen nkaya nkajní.

Kjuako ch'in Jesús kuènte tí kjuanínkaon (Lc. 12.57-59)

²¹ 'Jahará tsíkinhínrá kixin tí sín ósé tsík'ítuenhen sín kixin: "T'oyánhyará kichuára* kixin tí nkexro t'óyán kichó mé t'ichjánxin tsjasóte sín."

²² A ntá janhan tjonkará kixin jnkojín nkexro tsoninkakonhen kichó mé t'ichjánxin tsjasóte. A ntá tí nkexro t'ántaxínhin kichó la mé tí sín t'etóan mé sinchekítóexín ijíe ch'án. La ntá tí nkexro tsontáche kichó kixin tsixénká ch'án la tíha mé sátsji tsjasótexín tí síin xrohi.

²³ A ntá tí tsjikuehérá Dios nkehe tsochjehérá ch'án ntá tsjasánrá tí altar ntá tsoxráinkáonrá tí jnkojín kichuára kjuanjonkoará sín

²⁴ la ntá tí xíkaha la títóhérá tí nkehe tí altar la sátsjirá tsonixjehérá ch'án jnkojína kixin í tsokohya kjuanínkaon. La ntá tsjixin la ntá tsjihará tsjánjonrá tí nkehe tjinkáonrá tsjánjonrá.

²⁵ Tí síin jnkojín nkexro tjanchia jie tí jahará la tjinkaon chrókuikoará ch'án juzgado, a ntá íchá jína jnkokoá chrókjuenkayáxinrá, jehe ch'án la ko jahará, ntja ó, kixin ntá sáchrókjuihyará tí tjen ch'in juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policía kixin ts'ixenhenrá ntóechiso.

²⁶ A ntá chaxín tjonkará kixin tí ts'ikjahará sín ntóechiso la ts'axrjéxinhyará ntíha tsjixinjian tsjenkehérá sín kaín xín chichaon chontará.

Ch'in Jesús kjuako kixin chrókuasinhya sín jie, chróchóntahya sín chojni chjin ókjé

²⁷ 'Jahará tsíkinhínrá tí nkehe tsík'ítuenhen tí sín ósé ntáchro kixin: "Chrókuásinhyará jie, chróchóntahyará chojni chjin ókjé."†

²⁸ A ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

²⁹ A ntá tí ikuan chjina chrókuásixián jie la chrókuakitsjenkiá ikuan la chróchr'án ikjín kixin íchá jína ts'itjáyan it'ó cuerpo kuèntá kixin jehya kuènté cuerpo kuèntá sátsji tsjasótexín tí síin xrohi.

* 5:21 Éxodo 20.13; Deuteronomio 5.17 † 5:27 Éxodo 20.14; Deuteronomio 23.21

³⁰ A ntá tí itja chjina chrókjuásixián jię la chrókóchrínjan tí tjá a la chróchr'an ikjín kixin íchá jína ts'ítjáyán it'ò cuerpo kuèntá kixin jehya kuenté cuerpo sáchrókjui tsjasóte tí sín xrohi.

Ch'in Jesús kjuako kixin chrók'uitjéhya kichó sín
(Mt. 19.9; Mr. 10.11-12; Lc. 16.18)

³¹ 'Kjaxin tsík'ítuenhen tí sín ósé kixin tí nkekro tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'ítjéxin kichó sín.[‡]

³² A ntá janhan tjonkará kixin ijnko nkekro tsjákehe ichjién tí chróchóntahya tjan ókjé nkekro la jehe ch'án kuítóhe ch'án tjan kixin tsjasin tjan jię. A ntá tí nkekro tsotehe ijnko tjan tsíkítsinkehe la kjaxin ó kjuasin ch'án jię.

Ch'in Jesús kjuako kixin chjinthya chrók'uákjenxinni ihnié Dios

³³ 'Kjaxin tsíkinhínrá tsík'ítuenhen tí sín ósé kixin: “T'ichjánxin sìnchexiteyará tí nkehe tsintáchrórá kixin chrók'uákjenxinhyará ihnié Inchéni chjini.”[§]

³⁴ A ntá janhan mé tjonkará kixin chrók'uákjenxinhyará ihnié Dios ninkehó la ko chrók'uákjenxinhyará nkajni kixin ntaha tjen Dios t'etəan.

³⁵ La ko chrók'uákjenxinhyará chjasintajni kixin ntaha tjeókjen toté ch'án la ko chrók'uákjenxinhyará chjasin Jerusalén kixin ntiha la itjen tí Rey t'etəan.

³⁶ La tjenkayáxixinhyará ikjárá ó kixin jahará xitjahya tsjakérá ijnko kaxihi tjóá o nijnko kaxihi tié.

³⁷ Tí nkehe tsontáchrórá chaxín la chaxín la tí nkehe náhi la náhi la kohya nkehe chrókjuakét'oxinrá chróchrónkará. A ntá ichrén nkehe tjakét'oxinrá tsochrónkará la táha mé jínahya.

Ch'in Jesús tjako ch'án kuènte tí sín t'itjáyenhy ichrén kjuanínkaon
(Lc. 6.29-30)

³⁸ 'Jahará mé ó tsíkinhínrá tsík'ítuenhen tí sín ósé kixin tí takitsjenki sín ikonrá la kjaxinrá chrókuakitsjenkírá ikon sín. A ntá tí chrókuakitsjenki sín nènorá la kjaxinrá chrókuakitsjenkírá neno sín kjaxin.*

³⁹ A ntá janhan mé tjonkará kixin tí jnkojín nkekro ichrén nkehe jínahya sit'ahará la jahará ch'ehyará xikaha. Náhi. Tí chjéhe ijnko nkekro ijnko tuəan la ntá tjóka tí í jnko nànko tuəan.

⁴⁰ La tí sín jnkojín nkekro tjanchia jię la tjinkaon sín chrókuakitsjaha sín camisá la títóhé sín sátsjiko sín tí ka t'ínkayate kjaxin.

⁴¹ La tí t'etuəanhanrá sín tsámárá nkehe ijnko kilómetro la tjakét'oxinrá í yaá kilómetro.

⁴² Tí jnkojín nkekro tsjanchia nkehe la tí tjinkaon ch'án nkehe la chróntáchróhyará kixin “náhi”, chrókjuinchejnenrá ch'án.

Tjuèhérá tí sín nínkakonhanrá sín
(Lc. 6.27-28, 32-36)

⁴³ 'Kjaxin ó tsíkinhínrá tsík'ítuenhen tí sín ósé kixin: “Tjuèhérá tí nkekro choxinrá la tsonínkákonhénrá tí sín jínahya kjuít'ahará.”[†]

⁴⁴ A ntá janhan mé tjonkará kixin chrójtjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkítsará tí sín tjinkakonhya tí jahará la chrónixjehérá Dios kixin chrókjuinkítsa ch'án tí sín t'ántaxínhanrá la ko tí sín t'ahará tí jínahya.

[‡] 5:31 Deuteronomio 24.1-4 § 5:33 Números 30.2; Deuteronomio 23.21 * 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

⁴⁵ Tí xikaha sich'erá la ntá jahará chaxín xjeen It'eni tjen nkaya nkajní kixin jehe ch'án mé t'etoan ch'án tsijiton yaon ts'inkaséyehenen tí sín jínahya la ko tí sín jína la ko kjaxin t'etoan ch'án kixin ts'aniá ichrin tí sín tí sín jína la ko tí sín jínahya.

⁴⁶ Tí jehó tjuèhérá tí nkexro tjuàhará, ¿la ntá nkehe chrókjuachará? A ntá kjaxin tí sín nchekjènki la xikaha ch'e sín.

⁴⁷ La tí jehó nixjehérá tí sín kichuárá la ntá, ¿á chaxín imá jína tíha ní? Kixin tí xikaha la kjaxin tí sín chónhya Dios la xikaha ich'e sín.

⁴⁸ Kjaxinrá jahará ntoá chrók'uejorá kixin It'eni tjen nkaya nkajní la antsí má ntoá tjen ch'án.

6

Kjuako ch'in Jesús kuènté tí xraq jína

¹ Chrókjuásixínhyará kjuaxroan tí nkehe tinkachónkirá kixin tjinkáonrá chrók'uikon chojni ó. A ntá jahará tí xikaha chrókjuich'erá ntá It'eni tjen nkaya nkajní la ninkehó nkehe tsotjáhyará ch'án.

² Tí tjínkítará ijko chojni nòla la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xikaha ch'e sín t'óxroan sín nkaxenhen njnko la ko tí ntja kixin chrók'uikon chojni la chrókjuikosáyehe sín tí jehe sín kixin jína tjejóch'e sín. A ntá janhan ntáxrxjan kixin ó kjuixin k'uáyéhe sín nkehe la í ts'áyèhya sín inaá.

³ A ntá tí jahará tió chrókjuinkítará ijnko chojni chaxín nòla la íchá jína kixin chrókónoehya ninkexró kjónté ijnko nkexro tjuá jína.

⁴ A ntá jahará tí chrókjuánjonra ichrén nkehe la ninkexró chrókónoehya la ntá tí It'eni ts'ikon ch'án kixin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'in Jesús nkexrí tsonixjeheni Dios (Lc. 11.2-4)

⁵ A ntá tió nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen njnko la ko ts'ejó sín esquina calle kuènte ntasin kixin ts'ikon kaín chojni kixin tjejónixjehé sín Dios. Ntá janhan chaxín ntáxrxjan kixin jehe sín la xikaha kjuich'e sín la ó kjuixin k'uáyéhe sín nkehe la í ts'áyèhya sín inaá.

⁶ A ntá tió nixjehérá Dios la t'ixenhénra nchia ntoará la t'ikjehérá tí puerta la nixjehérá It'eni kixin ntaha tjekoará ch'án. A ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ Ntá tió chrónixjehérá Dios la chrókjateehya chrónixjará kixin chrókóyóahyará éxí tí sín chónhya Dios kixin jehe sín tjenkayáxin sín kixin nchónhya tsonixja sín, la mé xikaha mé chrókuinhin Dios, ichro sín.

⁸ A ntá jahará chrókóyóahyará éxí tí jehe sín. It'eni ó nohe ch'án nkehe t'ichjánxinhanrá kjónté naxa tjanchéhyará ch'án.

⁹ Méxra xikihí chróntáchrórá:
It'eni tjen nkaya nkajní jaha imá tjóá.

¹⁰ Chrókui tí kjuachaxin kuènta.

Chrókjuich'e tí nkehe tóxrjínhan jaha ntihi chjasintajni éxí tjech'e nkaya nkajní.

¹¹ Ijie la tsjánjuan tí niotja t'ichjánxinhinni.

12 T'oxíka tí nkehe jínahya kjuíuch'eni kíxín kjaxín jeheni ts'itjáyenhenni tí nkehe kjuíuch'eheni chojni.

13 Títóehyani kíxín xrahya chrókjuasinni jie. Nchekaáni kaín tí jínahya chrókhóhenni,

kíxín jaha mé kuéntá tí kjuachaxín kíxín ó noheni kíxín jaha tjetétəan tí kjuachaxín jnkochríxín. Amén.

14 Tí jahará ts'itjáyánhanrá tí nkexo kjuasínhanrá ichrén jie la mé kjaxín It'eni tjen nkaya nkajní mé ts'ikon ch'án kíxín xíkaha kjuíuch'erá la ntá kjaxín jehe ch'án ts'óxíka ch'án tí jie kjuásínrá.

15 A ntá tí jahará ts'itjáyánhyará tí jie kjuasínhanrá í jnko chojni la ntá kjaxín It'eni tjen nkaya nkajní ts'ikon kíxín xíkaha kjuíuch'erá k'uitjáyánhyará la ntá kjaxín jehe ch'án la ts'óxíkahya ch'án tí jie chontará.

Ch'ín Jesús kjuako kíxín chrók'óxroanhya sín kíxín kjónehya sín

16 A ntá tí jahará tí naxa kjóntehyará kíxín tjínkáonrá tsonixjehérá Dios la ntá chrók'uejohyará éxí t'avará éxí ch'e tí sín jehya jnkojínxón tjenkayáxín sín. Mé xíkaha ch'e sín kíxín tjínkaon sín ts'ikon chojni kíxín naxa kjónehya sín. Tí xíkaha ch'e sín la janhan ntáxrjan kíxín ó kjuixín k'uáyéhe sín nkehe la í ts'áyèhya sín inaá.

17 A ntá tí jahará kjónté naxa kjóntehyará kíxín tjínkáonrá tsonixjehérá Dios la t'ontirá ikonrá la tjéntoárá kjará

18 kíxín tsonoehya chojni kíxín naxa kjóntehyará. Jehó It'eni tjekoará ntiha mé jehe ch'án nohe ch'án xíkaha ntá tsjanjon ch'án nkehe ts'ayéhérá.

Tí nkehe chaxín tjete síin nkaya nkajní

(Lc. 12.33-34)

19 Jahará chrókjuásitonhyará nkehe tjete ntihi chjasintajni kíxín ntihi la ts'ín kué tí nkehe tjete sinček'itjáyánhanrá va la ko tsóchjisen tí chichaon la ko xíche ts'ixenhen tsaáhará.

20 Íchá jína tjásitonrá tí nkehe tjete nkaya nkajní kíxín ntaha kohya iko sinček'itjáyán nkehe la tsóchjisenhya tí nkehe la ko kohya xíche ts'ixenhen tseé.

21 A ntá tí nkaya nkajní tsochontará nkehe tjete la ntá tí nkehe tjenkayáxínrá la kjaxín ntaha tjen.

Tí xrohi t'inkaséyanxín cuerpo

(Lc. 11.34-36)

22 Tí ikonrá mé éxí yóhe ijnko xrohi t'inkaséyanxín tí cuerpo kuéntará. Tí jína ikonrá la ntá kjaxín kuénté tí cuerpo kuéntará mé chóna xrohi.

23 A ntá tí ikonrá la jínahya la ntá kuénté tí cuerpo kuéntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon

(Lc. 16.13)

24 Kohya ninkexo tsjacha sich'ehe xra yaá lamó. Tí xíkaha chrókjuíuch'e ch'án la ntá ijnko tsonínkakonhen ch'án la tí í jnko tsotjuèhe ch'án o ijnko la tsitekakonhen ch'án la tí í jnko la tsitekakuenhya ch'án. Méxra xitjahya chrókjuíuch'ehe chojni xra Dios tí tjínkaon sín chróhónta sín itsjé chichaon.

Dios mé t'áyakonhen tí xjeen ch'án

(Lc. 12.22-31)

25 'A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uitsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuéntará, a ntá kánhyó sínkí tí ka chrók'uitsará?

26 Xráxinkáonrá nkexrí síin tí koxroxé xritjaka. Jehé va la t'enkahya va noa la ko tjáhya va la ko chóntahya va nketí ts'inkachjinayá va tí noa, la kjánchó It'eni tjen nkaya nkajni la tjanjon ch'an nkehe sine va. A ntá jahará mé antsí tjeoan a ntá tí koxroxé la kénhyó.

27 ¿Á tjejó jnkojínrá tjenkayáxinrá kixin tí chrókóxakonhanrá imá a ntá naxa chrók'uankirá it'o metro nteoxinrá inaá?

28 '¿Nkekuénté kixin imá tóxakonhanrá ikará ó? Tsjehérá nkexrí sit'ánkí tí catsjo síin nteje. Tí itsjo la ní ch'ehya xra la ko tjonhya.

29 La tjonkará kixin kjónté ch'in rey Salomón k'uéchóna itsjé chichaon la naxa kjuíncheyóehya ch'an nkexrí náxrjón tsjehé tí tsjo a.

30 A ntá tí Dios la nchek'itsa tí ka yoa síin nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'an. ¿A ntá nkekuénté titekákonhyará ch'an?

31 Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uitsará.

32 Kaín tí nkehe la tí sín chónhya Dios mé tóxakonhen sín tíha. A ntá jahará chontará It'eni tjen nkaya nkajni la mé nohe ch'an kaín nkehe t'ichjánxinhanrá.

33 A ntá senó mé chrókjuéyará tí kjuachaxin kuénté Dios la chrókjuínchexiteyará tí nkehe jina tjinkaon ch'an, a ntá jehé ch'an mé tsjanjon ch'an kaín nkehe t'ichjánxinhanrá.

34 Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkojnko yaon tjikao kjuaxikaon kuénte.

7

Chrók'uantaxíenhyará kichuára

(Lc. 6.37-38, 41-42)

1 'Chrókuékahyará ókjé chojni jie kixin ntá Dios kjaxin chrókjuanchahya jie tí jahará.

2 A ntá Dios la tsjanchia ch'an jie tí jahará tí tsékará ókjé chojni jie. A ntá tí xikaha sích'erá la mé xikaha tsonhanrá kjaxin.

3 ¿A ntá nkekuénte tsjehé tí chjinínó ntsí tjenkánkí ikon tí kichuá tí naxa ántosán tí inta jie tjenkánkí ikuan?

4 A ntá tí chonta jaha tí nta jie tjenkánkí ikuan, ¿a ntá nkexrí kixin chróntáche tí kichuá kixin: "Títohé tsakitsjenkíni tí chjinínó ntsí tjenkánkí tí kuan?"

5 A ntá jaha la ntoáhya tjenkayáxian. Senó chrókuakitsjenkiá tí nta jie tjenkánkí ikuan kixin ntá chrók'uikuan tsakitsjenkiá chjinínó ntsí tjenkánkí ikon tí kichuá.

6 'Chróchjéehyará tí nkehe tsikótjóá tí konjá kixin jehé va tsokjan va tsonínkakonhanrá va ntá sinchekuenrá va. La ko kjaxin chróchjéehyará tí cochino tí xro perla tjeje kixin tsinkátja va la tsokuen.

Tjanchia la tjéyá la t'inka puerta

(Lc. 11.9-13; 6.31)

7 Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehé.

8 Kíxin tí nkexro tjanchia nkehe la ts'áyéhé tí nkehe la tí nkexro tjejá nkehe la ts'itja la tí nkexro t'ínka puerta la tsoxitjehé.

9 '¿Á tjejó nkójin nkexro ntihi chrókjuanjon xro chrókjóne xjeen tí chrókjuanchia xjan niotja? Kja náhi.

10 Q tí chrókjuanchia xjan ijnko coche la, ¿á chróchjéhe ch'án tí xjeen ch'án konche chrókjóne ní? Kja náhi.

11 A ntá jahará kjónte jínahará la ó nohará nkehe jína chjehérá xjaanrá. A ntá It'éni tjen nkaya nkajni kjaxin antsí tsochjéhe ch'án nkehe jína tí nkexro tsjanchia nkehe.

12 'Méxra xikaha chrókjukosáyahérá kichuárá éxi yóhe nkexrí tjinkáonrá chrókjukosáyahará sín mé xikaha k'uetqan ch'ín Moisés la ko xikaha ntáchro tí xroon kuénte tí sín k'uéchrónka itén Dios ósé.

Tí puerta tekahya (Lc. 13.24)

13 T'ixexxínrá tí puerta tekahya. Kíxin tí puerta la ko tí ntja ts'itjáyanxín chojni la imá iton la ko teka la nchónhya chojni sátsji tí ntja ntiha.

14 A ntá tí puerta la ko tí ntja sátsjixinni tí kjuachón la tekahya ntiha la ko tsjéhya chojni ts'itja tí ntja a.

Tí to mé tjátsqanxínni tí nta (Lc. 6.43-44)

15 'Méxra tóxakonhanrá tí ts'ikonrá itsi tí sín ch'ia tsontáchro sín kíxin kjaxin sín nixja sín itén Dios. Jehé sín la chrítaón ó tjoé kolélo ó, a ntá nkaya la kolobo jiehe.

16 Jahará la chrókjuaátsqanxínrá tí jehé sín kíxin tí xra ch'e sín kíxin tí ntach'j la xitjahya chrók'óna to uva la ko tí kach'j xitjahya chrók'óna to higo.

17 Méxra kaín inta jína la t'óna to jína la ntá tí nta jínahya la kjaxin tí to la jehya to jína.

18 Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína.

19 Kaínxín tí nta t'ónahya to jína mé tsochrínjin la tsoche.

20 Mé xikaha chrókjuaátsqanxínrá jahará tí sín jehya jína kíxin tí xra tjejóch'e sín.

Jehya kaín chojni ts'ixenhen tí kjuachaxién Dios tjen nkaya nkajni (Lc. 13.25-27)

21 'Kénhya chojni tsontáchro: "Ìnchéni, Ìnchéni", mé ts'ixenhen sín tí kjuachaxién Dios tjen nkaya nkajni. Náhi. Jehó tí nkexro sinchexiteyá tí nkehe tóxrjnhjn T'aná t'etqan tjen nkaya nkajni.

22 Tsjixraká tí yaon a la ntá itsjé sín tsontáchro sín kíxin: "Ìnchéni, Ìnchéni, k'uénixjaxinni ihnjá la ko tí ihnjá mé kuakitsjexinni nchakuen tí jínahya la ko kjuachaxién ihnjá kjuasixinni nchónhya kjuaxroan."

23 A ntá janhan tsjatahã kíxin: "Janhan la chonhya tí jahará. Tjtonará sátjirá kíxin jahará imá jínahyará."

Ch'ín Jesús kjuíncheyóexin ch'án kíxin yaá nchia (Lc. 6.47-49; Mr. 1.22)

²⁴ Méxra tí nkexro tinhin tí nkehe ntáxrjan la titekaon ch'án la jehe ch'án mé éxí yóhē ijnko nkexro chóna kjuaxrexinkaon jína la kjuích'éna nchia chrítaón tjo.

²⁵ A ntá xrínahya xrakoa chrin, ikui yeé ntāninche la tjan chjéhe xrínto la kjóté xíkaha la xíkaha tí nchia kíxin itjo tjekjen nchia.

²⁶ A ntá tí nkexro tinhin tí xrjan ka la titekakonhya mé jehe la éxí yóhē ijnko nkexro lontj la kjuích'éna ch'án ijnko nchia tí síin nchesen.

²⁷ La ntá xrínahya xrakoa chrin ntá antsi kóyeé ntāninche tí tsaka la ko chjéhe xrínto la ntá xika tí nchia, la ijnko kjuachrakon kónhen tíha.

²⁸ A ntá tío kjuixin nixja ch'in Jesús la ntá imá chrakon tí chojni kíxin nkexrí kjuako ch'án.

²⁹ Kíxin kjuako ch'án éxí ijnko nkexro chóna imá kjuachaxin la tóyóehya ch'án tí sín maestro kjuako tí ley.

8

Ch'in Jesús kjuínchekitohe jína ijnko chojni chóna chin lepra

(Mr. 1.40-45; Lc. 5.12-16)

¹ A ntá ch'in Jesús k'uínkajinxin ch'án tí jna la chréhe nchónhya chojni.

² La ntá kóhjina ijnko ch'in níhi chóna chin lepra la kjuak'exín toh'in ch'án nkayakon ch'in Jesús la ntáchro ch'án kíxin:

—Ínchéni tí tjínkavan la jína chrókjuínchekitohéni jína —ichro ch'án.

³ Ntá ch'in Jesús mé kjuak'etja itja ch'án chrítaón tí ch'in a la ntáchro ch'án kíxin:

—Méxra xíkaha tjínkavan. Ntá jie sintakitoha jína.

A ntá tuénxín kuitohé ch'án jína la ó kjuin tí chin k'uéchóna ch'án.

⁴ La ntá ntáchro ch'in Jesús kíxin:

—Nínkexró chenkahya ntíhi. Jehó sátjia tjákohé tí ch'in nchat'a kíxin kuitoha jína la ko sátjioa tí nkehe tsík'etqan ch'in Moisés* kíxin ntá xíkaha tsoñoexín kaín xín chojni kíxin ó kuitoha jína —mé xíkaha k'uetoqan ch'in Jesús.

Ch'in Jesús kjuínchekitohe jína ijnko nkexro ch'ehe xra ijnko capitán romano

(Lc. 7.1-10)

⁵ A ntá tío k'uixenhen ch'in Jesús chjasin Capernaum la ntá xrínahya kóhjina ijnko capitán romano la chróna ch'án

⁶ ntáchro ch'án kíxin:

—Ínchéni ntoeni itjen ijnko ch'in ch'ehe ni xra mé níhi ch'án, tjetsínka ch'án, tsík'en toté ch'án la imá tjothé ch'án —ichro ch'án.

⁷ A ntá ch'in Jesús kjuátehe ch'án ntáchro ch'án kíxin:

—¿Á sátsjia sintakitoha jína tí ch'in a? —ichro ch'án.

⁸ Ntá tí ch'in capitán kjuátehe kíxin:

—Náhi, Ínchéni, tósuehene kíxin chrók'uixenhén ntoeni kíxin jehya chojni jínani. Jehó chrókjuánjuan kjuachaxin kuéntá, ntá tí ch'in ch'ehe ni xra chrókuitohé ch'án jína.

⁹ Janhan na kjaxin chonta chojni t'etuanna la ko kjaxin janhan tétuanhan tí sín soldado. Tío tétuanhan ijnko sín sátsji sín la ntá ó sátsji sín. La kjaxin tío tétuanhan ijnko sín kíxin xrakoa sín la mé tji sín. La ko tío tétuanhan ijnko nkexro ch'ena xra kíxin sich'e xra la ich'e xra —ichro ch'án.

* 8:4 Levítico 14.1-32

¹⁰ Ntá kuínhin ch'ín Jesús ntá kóxakonhen ch'án kixin xíkaha chro tí ch'ín a, ntá nixjehe ch'án tí sín chréhe ch'án ntá chro ch'án kixin:

—Chaxín ntáxřjan kixin kuenté tí nación Israel la k'uitjahya janhan ninexró tinkáchónki xíkaha éxí tinkáchónki tí ch'ín i.

¹¹ Janhan řrxjanka kixin nchónhya chojni ókjé tǰixin tí tǰitoxin yaon la ko tí tǰjátóxin yaon la sineko sín tí ch'ín Abraham la ko Isaac la ko Jacob tí tǰen tí kjuachaxin kuènte Dios.

¹² A ntá itsjé tí sín chrók'uejó tí tǰen tí kjuachaxin kuènte Dios la ts'axrjéxin sín ntiha, sátsji sín tí sitié la ntaha tsotsjanka sín la sinetaón neno sín.

¹³ La ntá ch'ín Jesús mé nixjehe ch'án tí ch'ín capitán ntá chro ch'án kixin:

—Sátjia ntóa. Éxí kuítekáván jaha la tsoxetineyá tǰonhen tíha —ichro ch'án.

La ntá tí ch'ín ch'e xřa la o tuénxin tí hora a tsíkitohe ch'án jína.

Ch'ín Jesús kjuínchekitohe ich'ee ch'ín Pedro jína

(Mr. 1.29-31; Lc. 4.38-39)

¹⁴ A ntá sákjuí ch'ín Jesús tí ntóe ch'ín Pedro la ntaha k'uikon ch'án kixin tí ich'ee ch'ín Pedro la níhi tǰan tǰetsínka tǰan la chóna tǰan sóa.

¹⁵ Ntá itsé ch'án itja tǰan la ntá kjuínhin tǰan tí sóa la ntá k'uínkatǰen tǰan la kjuankixin yaxínhin tǰan kixin tsǰanjon tǰan nkehe sine sín.

Ch'ín Jesús kjuínchekitohe nchónhya tí sín níhi jína

(Mr. 1.32-34; Lc. 4.40-41)

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrjéxin tí nchakuen tí jínahya tí jehe sín la kǰaxin kjuínchekitohe ch'án jína kaín tí sǰnníhi.

¹⁷ Mé xíkaha kjuích'e ch'án kixin tsoxetineyá tí nkehe tsíchrónka tí ch'ín Isaías tí ch'ín k'uéchrónka itén Dios. Mé ntá chro ch'án xǰikíhi: “Jehe ch'án kuákja ch'án tí chin chónani la ko jehe ch'án kuámá ch'án tí kjuatǰoté.”† Mé xíkaha ichro itén Dios.

Tí sín tǰjinkaon tsochréhe tí ch'ín Jesús

(Lc. 9.57-62)

¹⁸ Tíó k'uikon ch'ín Jesús kixin nchónhya chojni k'uántatǰen sín ch'án la ntá k'uetóan ch'án kixin ts'átóye sín í jnko chrínta ntá.

¹⁹ La ntá ijnko tí sín maestro tǰako tí ley mé kóchjinehe ch'án tí ch'ín Jesús la ntá chro ch'án kixin:

—Maestro tǰjinkaonni chróchréheñi tí jaha kǰónté nketí tǰjinkáván sátsjia —ichro tí ch'ín a.

²⁰ La ntá kjuátehe ch'ín Jesús ntá chro ch'án kixin:

—Tí koxróntá chóna va itǰueé va la ko tí koxroxé chóna va kǰaké va. A ntá tí Xjeen Dios K'óna Chojni mé chónahya nketí ts'ók'èxin ch'án.

²¹ A ntá ijnko tí chojni k'uájiko ch'án, mé ntá chro ch'án kixin:

—Ínchéni, tǰtǰohéni senó sátsǰikǰaváni it'éni —ichro ch'án.

²² La ntá kjuátehe ch'ín Jesús ntá chro ch'án kixin:

—Náhi, chréhe tí janhan. Tǰtǰohé kixin tí chojni tsík'en la jnkokón sín tsík'en tsǰjavá kíchó sín —mé xíkaha ichro ch'ín Jesús.

Ch'ín Jesús kjuínchek'ixrata tí xřintǰo la ko tí ntá

(Mr. 4.35-41; Lc. 8.22-25)

²³ Ntá ch'ín Jesús k'uixenhen tí ntabárcǰo la k'uixenko ch'án tí sín k'uájiko ch'án.

²⁴ La ntá xrínahya imá síchrica ntá la ó chjina sítikia ntá tí ntabárcō. La kjánchó ch'ín Jesús la tjejua ch'án.

²⁵ La ntá tí sín k'uájiko ch'án kjuínchek'áya sín ch'án la ntáchro sín kixin:

—Ínchéni nchekaáni kixin tí ntabárcō la ó meró ts'aniánki ntá —ichro sín.

²⁶ Ntá kjuátehe ch'án ntáchro ch'án kixin:

—¿Nkekuènté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xikaha ntá k'uàya ch'án la k'uetuēnhen ch'án tí xrjntō la ko tí ntayaon la ntá tuénxín k'uixrata.

²⁷ La ntá imá chrakon sín la ntáchro sín kixin:

—¿Xá nkexro tíhi? Kjónté xrjntō la ko ntayaon la mé nchexiteyéhe ch'án —ichro sín.

Tí sín chóna nchakuen tí jínahya tí nonte Gadara

(Mr. 5.1-20; Lc. 8.26-39)

²⁸ Ntá tió k'uátōye ch'ín Jesús tí ntayaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrjexín tōyé chojni tsík'en la kóhjinēhe sín ch'án. Jēhe sín mé imá jēhe sín la kohya ninkexró tjacha ts'atsínka tí ntjia ntiha.

²⁹ La ntá kjuankíxin k'óyako sín ntáchro sín kixin:

—Tjiatéhya jaha tí jeheni jaha Jesús mé Xjēen Dios. ¿Á k'uinka ntíhi kixin sijnchekjasóteni kjónté naxā kjuixrakáhya tí yaon tsjasóteni? —ichro sín.

³⁰ A ntá ntiha kánhyó kjín síin itsjé cochíno xrine va.

³¹ La ntá tí nchakuen tí jínahya mé chrónóēhe tí ch'ín Jesús kixin:

—Tí tsétoan kixin sátsjini la chrókjuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kixin:

—Tí xikaha la sájtja —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajinxjín va ntiha kjuítsínkayá va tsaka, ntá kjuítsínkankí va ntá, kjuínhin va ntá.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchóna tí nchakuen tí jínahya.

³⁴ A ntá kaín tí sín chjasin ntiha sákjuítsjēhe sín ntá kjuíji sín tí tjen ch'ín Jesús ntá k'uíkon sín kixin xikaha tsíkónhen la chrónóēhe sín ch'án kixin sáchrókjuí ch'án ókjé.

9

Ch'ín Jesús kjuínchekitohe jína ijnko chojni tsík'en toté

(Mr. 2.1-12; Lc. 5.17-26)

¹ La ntá kjuixín tíha ntá ch'ín Jesús mé k'uixenhen ch'án ijnko ntabárcō la k'uátsínka ch'án íjnko lado chrínta ntá la kjuíji ch'án chjasén ch'án.

² A ntá ntiha kuíkao sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kixin chaxín tinkáchónki sín ch'án la ntá nixjēhe ch'án tí sijníhi ntáchro ch'án kixin:

—Xjēenni nchechéhé asán. Tí jje chonta la ó kjuixín kjuinhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kixin:

—Tí ch'ín i mé ncheyóhe ch'án asén ch'án Dios kixin xikaha nixja ch'án.

⁴ Ntá ch'in Jesús mé ó nohe ch'an kixin nkehe tí kjo sín asén sín ntá ntáchro ch'an kixin:

—¿Nkekuènté kixin xikaha jínahya tjenkayáxinrá?

⁵ ¿Nkehe antsí xrahya chróntátjan ch'an? ¿Á antsí xrahya chróntátjan ch'an kixin ó kjuixin kjuinhin ch'an tí jie yámá ch'an o á antsí xrahya chróntátjan ch'an kixin chrók'uínkatjen ch'an sáchrókjui ch'an?

⁶ Méxra tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjiinhin ijíé chojni.

Ntá ntáche ch'an tí sinníhi a kixin:

—Ije la t'ínkatjen tjatsiyan kaniáa na sátsjia ntõa —ichro ch'an.

⁷ Ntá tí ch'in tsík'en toté na tuénxín k'uínkatjen ch'an la sakjuí ch'an ntõe ch'an.

⁸ Ntá kaín tí sín siín ntiha k'uíkon sín kixin xikaha kónhen la imá chrakon sín la kjuanchehe sín Dios kjuasáya kixin tí nkexro imá kjuakoxin ch'an kjuachaxin kuènte Dios.

Ch'in Jesús k'uíyehé ch'an tí ch'in Mateo

(Mr. 2.13-17; Lc. 5.27-32)

⁹ A ntá ch'in Jesús sákjuixin ch'an ntiha la k'uíkon ch'an ijnko ch'in it'in Mateo tjetjaxin ch'an ntiha nchekjènkí ch'an. Ntá ntáchro ch'in Jesús kixin:

—Chrèhé tí janhan —ichro ch'an.

Ntá ch'in Mateo tuénxín k'uínkatjen ch'an chrèhé ch'an tí ch'in Jesús.

¹⁰ A ntá chr'éxin ch'in Jesús kjuák'e ch'an ntõe tí ch'in Mateo la ntaha xranjon nkehe sine ch'an la ntá itsjé tí sín nchekjènkí la ko í so sín chóna jie mé kjuíji sín la kjaxin kjóneko sín tí ch'in Jesús la ko tí sín k'uájiko ch'an.

¹¹ La ntá tí sín fariseo kjaxin k'uíkon sín xikaha la kjuanchankíhi sín tí sín k'uájiko ch'in Jesús, ntáchro sín kixin:

—¿Nkekuènté kixin tí ch'in maestro kuèntará mé neko ch'an tí sín nchekjènkí la ko tí í so sín chóna jie? —ichro sín.

¹² Ntá ch'in Jesús la kuínhin ch'an nkehe tí tjo sín la ntáchro ch'an kixin:

—Tí sín níehya la t'ichjánxjenhya sín nkexro sich'e xroan. Náhí. Jehó tí chojni níhi mé t'ichjánxinhin sín nkexro sich'ehe sín xroan.

¹³ Sátjirá la ts'ítjará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan tjínkavan kixin chrókuíkonóghérá chojni la tjínkakonhya kixin chrók'oyánrá iko chrókjuánjonrá.*” Mé xikaha ichro itén Dios. Janhan na k'uinkahya ntihi kixin chrók'uíyaha chojni jina tjejó. Náhí. K'uinka kixin ts'íyaha tí chojni chóna jie kixin chrókuítõe sín tí ijíé sín ntá chrókuínkí sín tí tjenkayáxin sín —ichro ch'an.

Kjuanchankí sín kuènte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ájiko tí ch'in Juan Bautista mé kóchjinehe sín ch'in Jesús la kjuanchankíhi sín ch'an, ntáchro sín kixin:

—Jeheni la ko tí sín fariseo la jnkoyaxon nehiani, a ntá tí sín xrikoá la, ¿nkekuènte xikahya ch'e sín? —ichro sín.

¹⁵ Ntá kjuátèhe ch'in Jesús, ntáchro ch'an kixin:

—¿Xá chrók'uává kaín tí sín tsík'íyehé sín tsóchjina tsotèhe ijnko chojni kixin naxá tjen tí ch'in tsíkótèhe tjejóko sín ntiha? A ntá tsjixraká ijnko yaon tsotsé

* 9:13 Oseas 6.6

sín tí ch'ín tsikótēhe sátsjiko sín ch'án ntá kaín tí sín tsikóchjina mé ts'ává sín la í sinehya sín.

¹⁶ 'Nijnko chojni chrókjuak'eniēhe tí ka ó ntaxin it'ō ka nixin kixin ntá chrókjuixéhē tí ka nixin chrók'uitjjan tí ka ntaxin ntá antsí má chrók'uichje.

¹⁷ La ko kjaxin éxí yóhe chrókui'kiahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'uichje tí tjuaxran ntaxin. Ntá chrók'uitjjan tí xran la ko chrók'uitjjan tí tjuaxran. Ntá tí xranvino nixin chrókui'kia ijnko tjuaxran nixin la ntá xikaha la yóí nkehe chrók'uitjjanhya.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitōhe jina ijnko tjan kuákóxin iké ch'án

(Mr. 5.21-43; Lc. 8.40-56)

¹⁸ Ntá naxa tjenixja ch'ín Jesús la ntá ikjui ijnko ch'ín t'etōan kuente tí sín judío la kjuák'exín toch'in ch'án nkayakon tí ch'ín Jesús la chrónóhe ch'án kixin:

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróchón tjan —ichro ch'án.

¹⁹ Ntá k'uínkatjen ch'ín Jesús ntá sákjuiko ch'án tí ch'ín a la ko sákjuikotoxin ch'án tí sín k'uájiko ch'án.

²⁰ A ntá itjen ijnko chojni nñhi tjan, ó teyó nánó chóna tjan ijnko chin ts'tji tjan njí. Ntá kóchjina tjan nóton tí ch'ín Jesús ntá kuákóxin tjan tí iké ch'án

²¹ kixin tjenkayáxin tjan kixin kjónté chrínta iké ch'án ó chrókúákóxin tjan, la táhó chrókúitōexín tjan jina.

²² Ntá nkátjá ch'ín Jesús la k'uikon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítóha jina kixin kuítekáván tí janhan —ichro ch'án.

Na ntá tuénxín ó kuítóhe tjan jina.

²³ Ntá tió kjuíji ch'ín Jesús ntōe tí ch'ín judío t'etōan la k'uikon ch'án kixin ó yaxínhin tí sín músico kixin ó sátsjixravá xjan. La kaín tí chojni tsikójnksé la tsjánkama sín xjan.

²⁴ La ntá ntáchro ch'ín Jesús kixin:

—Tí xjan méhe tjtōhéra, kixin tsík'enhya xjan, la tjejua xjan ó —ichro ch'án. Ntá kjuanoá sín ch'án.

²⁵ A ntá tí k'uaxrje kaín chojni la ntá ch'ín Jesús la k'uixenhen ch'án la itsé ch'án itja tí tjan a la ntá tuénxín k'uínkatjen tjan.

²⁶ Ntá kuenté chjasin ntiha la kuínhin sín kixin xikaha kónhen.

Ch'ín Jesús kjuínchekitōhe jina yaá sín t'ikonhya

²⁷ Ntá sákjuixin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyēhe sín ch'án ntáchro sín kixin:

—Tjkonóhéni jaha tsík'axrjenixian David.

²⁸ Ntá k'uixenhen ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á titekáván kixin tsjácha sít'a xikaha? —mé xikaha kjuanchankí ch'án.

Ntá kjuátēhe sín kixin:

—Jeén, ñchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xikaha kuítekáván la tsoxiteyá —mé xikaha ichro ch'án.

³⁰ La ntá tuénxín ó jina t'ikon sín. Ntá ch'ín Jesús k'uetuēhen sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuixín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jína ijnko ch'ín nósin

³² Tió sákjuí tí sín k'uék'ikonhya, a ntá iso chojni kjuikao sín ijnko ch'ín nósin ch'án la chónka ch'án nchakuen tí jínahya.

³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankíxin nixja ch'án. Ntá kaín chojni la k'uikon sín la ntáchro sín kíxin:

—Nunca t'ikonhyéni ijnko kjuaxroan xikaha kuente tí nación Israel —ichro sín.

³⁴ A ntá tí sín fariseo ntáchro sín kíxin:

—Tí nkeexo t'etuñhen tí nchakuen tí jínahya tsíkjanjon kjuachaxin mé xikaha takitsje tí ch'ín i tí nchakuen tí jínahya —mé xikaha ichro sín.

Ch'ín Jesús kuikonóhe ch'án chojni

³⁵ Ntá k'uátsínka ch'ín Jesús itsjé chjasin jié la ko chjasin ntsí la kjuakoxín ch'án jnkojnko nínko Israel. Chrónka ch'án tí tan jína nkexri tjen tí kjuachaxin kuente Dios. La ntá kjuínchekitohe ch'án jína chojni níhi chónka kaín xín chin la ko chojni chónka kjuatjoté.

³⁶ K'uikon ch'án kíxin nchónhya chojni k'uéjé sín ntá kuikonóhe ch'án sín kíxin imá tóxakonhen sín la k'uéjé sín éxi kolélo chónthaha nkeexo t'ayakonhen.

³⁷ Ntá ntáche ch'án tí sín k'uájiko ch'án kíxin:

—Chaxín ntáxrjan janhan kíxin imá tsík'óna, kjánchó chojni sich'e xra mé tsjéhya.

³⁸ Chrókjuancheherá tí Inché tí nonte kíxin chróchr'án ch'án itsjé chojni chrókjuch'e xra —mé xikaha ichro ch'ín Jesús.

10

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjón ch'án kjuachaxin tsakitsje sín kaín tí nchakuen tí jínahya t'etuñhen asén chojni la ko sinchekitohe sín jína kaín chojni chónka kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo.

³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkí la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo.

⁴ La ko kjaxin ch'ín Simón, mé kuente tí sín cananista, la ko kjaxin ch'ín Judas Iscariote, mé tí nkeexo chr'éxin kjuínchekji tí ch'ín Jesús.

Ch'ín Jesús k'uetuñhen tí teyó sín kíxin sátsjikako sín kjuachaxin kuente Dios

(Mr. 6.7-13; Lc. 9.1-6)

⁵ Ntá k'uetuñhen ch'ín Jesús tí teyó sín kíxin sátsji sín la k'uetqan ch'án kíxin:

—Tjíhyará tí tjejó tí sín jehya judío la ko t'ixeenhyará tí chjasin siín estado Samaria.

⁶ Náhí. Íchá jína sátsjirá tí tjejó tí chojni éxi kolélo kjuíchroe kuente nación Israel.

7 Sátjírá tjakohérá sín kixin kjuachaxiэн Dios tjen nkaya nkajní la í séhya tsi.

8 Sínchekitoherá jína chojni níhi la ko sínchekitoherá jína tí sín chóna chin lepra la ko sínchexechónrа chojni tsík'en la takítsjerá tí nchakuen tí jinahya. Jahará kjaxin kuitonhanrá tí kjuachaxiэн Dios, méxra chrókjuachahyará jahará kjaxin.

9 Chrókjuikuaahyará ninkehó chichaon oro la ko ninkehó chichaon plata la ko ninkehó chichaon cobre

10 la ko tí sátjírá ntja la chrókjuikuaahyará ka bolsa la chrókjuikuaahyará yaá ka chrók'uinkayaterá la ko chrókjuankahyará tokatárá la ko chrókjuikuaahyará nta tjixinrá. Tí nkexro ch'e xra la jehí siín kjuachaxin ntiha chrókjónе.

11 A ntá tió tsjasánrа ijnko chjasin jie ó ijnko chjasin ntsí la tjeýará ijnko nkexro tsjanjon kjuachaxin la ntоe sín ntahó chrókuitohará ntá tsjixin tí xra ntá sátsjirá.

12 A ntá tió t'ixenhénrа ntоe sín la nixjehérá sín tjáoxinrá jnkojína.

13 A ntá tí chaxín jína asén sín la ts'áyéhe sín tí kjuaxróxin, a ntá tí náhi la sátjikorá tí kjuaxroxin.

14 A ntá tí tsochrohya sín tsjanjon sín kjuachaxin tsitohará la tjinkakonhya sín tsinhin sín tí nkehe tsochronkará na mé t'axrjéxinrá tí ntоe sín ó tí chjasén sín la t'oxénjinrá tí inche chóna totárá.

15 A ntá chaxín tjonkará kixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchóna sín jie la kánhyó tsjasóte sín, a ntá tí sín chjasin a la antsí tsjasóte sín kixin k'uéjóróxinhya sín tí tan chrókuaáxin sín.

Ókjé sín tsonínkakonhen tí sín kuènte Cristo

16 Janhan tsochr'an tí jahará éxi yóhe chróchr'an kolélo ts'ejóyakan kolóbo. Listo chrók'uejorá éxi konche xikaha la chrók'uejorá éxi kontóá chrókójjahyará.

17 Chrókóxakonhanrá kixin itsi chojni tsotsé sín tí jahará la sátsjikoará sín tí tjejó tí sín t'etqan la ko nkaxenhen tí njnkoé sín tsjatiaxinrá sín.

18 La ntá tsjikaánrа sín tí tjejó tí sín t'etqan la ko tí siín tí sín rey kixin tinkachónkirá tí janhan. Ntá jína tsochronkará kixin tinkachónkirá tí janhan nkayakon tí jehe sín la ko nkayakon tí sín chónhya Dios.

19 A ntá tió sátsjikoará sín tí tjejó tí sín t'etqan la tóxakuanhyará nkehe tsontáchrорá ó nkexrí tsonixjará kixin tió tsjixraká tí hora la ntá Dios mé tsjinkítsará tsonixjará.

20 Kixin jehya jahará tsonixjará. Náhi. Tí Nchakuen It'eni mé tsochronka nkehe tsonixjará.

21 Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsonínkakonhen tí it'é kixin its'en.

22 Kaínxin chojni chjasintajni tsonínkakonhanrá sín kixin tinkachónkirá tí janhan. A ntá tí nkexro tsítоehya tsinkáchónki sín tí janhan hasta tsjeje chjasintajni mé tsaá.

23 Tió má chónkíhará sín ijnko chjasin la ntá sátsjirá í jnko chjasin. La ntá chaxín tspxrjanka kixin tí Xjeen Dios K'óna Chojni mé tsokjan tí naxa tjixinhya ts'atsínkará kaín tí chjasin Israel.

24 Tí nkexro xrakоhe la kánhyó tjetoan la tí maestro la antsí tjetoan, la ko kjaxin tí nkexro ch'e xra la tjetoanhya la antsí tjetoan tí lamo.

²⁵ A ntá tí nkexro xra^{kohe} chrókjuakoxin ch'án éxí tí nkexro kjuak^{ohe} ch'án la ko tí nkexro ch'e xra chrókjuakoxin ch'án éxí tí lámoé ch'án ch'ehe ch'án xra. Tí ch'in inché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

Nkexro tí chróchrakonhénrá

(Lc. 12.2-9)

²⁶ 'Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin.

²⁷ Tí nkehe tjonkará sítíé la t'ichjánxin tsochronkará tió itsi xrohi t'inkaséyanxín tí yaon. La ko tí nkehe tjonkará ijie ninkexró noehya la t'ichjánxin chronkará chrókuinhin kaín sín.

²⁸ Chróchrakuénhyará tí sín t'óyán cuérpogé chojni kixin asén chojni xitjahya ts'óyán sín. Íchá jina chróchrakonhénrá tí nkexro tsjacha sinchek'itjáyánxin cuérpogé chojni la ko asén chojni tí xrohi ts'ankahya.

²⁹ ¿Á chrókóxixinhya yaá koxroxé ntsínsi ijnko chichaon ntsí? A ntá kjónté xikaha la chrók'uánótjehya nijnko tí jehe va nonte tí chrókjuanjonhya Ít'éni kjuachaxin.

³⁰ A ntá kjónté tí kaxihí chóna ikjárá la ó nohe ch'án nkekjaín ka chontará.

³¹ A ntá jahará chróchrakonhyará kixin tóyóahyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

Tí sín tósuehya tsochronka sín kixin tinkáchónki sín Cristo nkayakon chojni
(Lc. 12.8-9)

³² 'Kaín tí chojni tsochronka kixin tinkáchónkina sín nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajní.

³³ A ntá tí nkexro sinchemána tsontáchro sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

Jnkokoáhya tsjenkayáxin chojni kixin ó kui Inchéni Jesús

(Lc. 12.51-53; 14.26-27)

³⁴ Tjenkayáxinhyará kixin k'uinkakian kjuaxróxin chjasintajni. Náhi. Janhan k'uinkakianhya kjuaxróxin. Tsjanjonko kichó chojni kixin k'uinka janhan.

³⁵ Janhan k'uinka kixin tsonínkakohen chojni it'é, la ko tí xjeen sín chjin mé tsonínkakohen iné, la ko tí tikánta tsonínkakohen ich'ée.

³⁶ Mé xikaha tí sín tsonínkakohen kichó la mé tí sín naxa kjéhya sín.

³⁷ A ntá tí nkexro antsí tjuéhe it'é sín la ko iné sín la kánhyó tjuéhe tí janhan la mé xitjahya ts'óna sín kuéntana, la ko tí nkexro antsí tjuéhe xjeen sín la kánhyó tjuana sín la mé xitjahya ts'óna sín kuéntana.

³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuéntana.

³⁹ Tí nkexro tjinkaon kixin kohya nkehe chrókónhen sín mé ts'itjáyán sín, a ntá tí nkexro chrókjuinçek'itjáyánxin asén kixin tinkáchónki sín tí janhan la mé tsaá sín.

Tí nkexro ts'áyéhe nkehe
(Mr. 9.41)

40 Tí nķexro chrókjuanjon kjuachaxin chrók'uejorá la mé éxí chrók'uáyéhe sín tí janhan la ko tí nķexro chrók'uáyéhe tí janhan la éxí yóhe chrók'uáyéhe sín tí nķexro ichr'ánna k'uinka.

41 La tí nķexro chrókjuanjon kjuachaxin tsjak'e ijnko nķexro nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nķexro kjuako. La ko tí nķexro chrókjuanjon kjuachaxin tsjak'e ijnko chojni jína kixin jína ch'án mé xikaha ts'áyéhe sín nkehe éxí ts'áyéhe tí nķexro jína.

42 A ntá tí nķexro sinčekitonhen ijnko vaso ntá kin kǰónté ijnko chojni noehya má, chréhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jína kixin xikaha kjuich'e ch'án.

11

Ch'ín Juan Bautista k'ueŧuenhen iso sín (Lc. 7.18-35)

1 Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuixin ch'án ntiha la sákjuikjako ch'án iso chjasin chjinaxón ntiha.

2 A ntá ch'ín Juan mé tjechjina ch'án ntóechiso ntá xrinahya kuínhin ch'án nkerí xrá tjech'e Cristo. La ntá k'ueŧuenhen ch'án iyó tí sín k'uék'ajiko ch'án kixin sátsajtsjehe sín tí ch'ín Jesús.

3 Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin: —¿Á jaha tí nķexro itsi ní o á naxá tsochónhenni í jnko nķexro? —ichro sín.

4 A ntá kjuátehe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uikonrá la ko tí nkehe kuínhínrá.

5 Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uéki la ó tji sín la ko tí sín k'uéchónta chin lepra la ó kótjóa sín kuítóhe sín jína la ko tí sín k'uékienhya la ó tinhin sín jie. Kǰaxín tí sín tsík'en na ó xechón sín inaá la ko kaín tí sín nòa mé síxraķohe sín tí tan jína tsaáxin sín.

6 Méxrā imá náxrjón tí nķexro kohya nkehe t'ínkákonhen tinkáchónki tí janhan.

7 Tió sákjuí sín ntá ch'ín Jesús kjuankixin nixjéhe ch'án tí sín k'uéjé la chrónka ch'án kuénte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nķexrí k'uikonrá tí jehe ch'án? ¿Á k'uikonrá ch'án éxí ijnko tji nchexrayehe xrǰntó?

8 Tí náhi, la ¿nkehe k'uikonrá? ¿Á k'uikonrá ch'án éxí ijnko nķexro tsík'itsa jína? Jahará ó nohará kixin chojni tsík'itsa jína la tjejó sín tí nchia kuénte tí sín rey.

9 ¿A ntá nkehe k'uikonrá? ¿Á ijnko nķexro chrónka itén Dios? Jehe chaxín la antsí chónka ch'án kjuachaxin la tí sín k'uéchrónta itén Dios la kánhyó.

10 Ch'ín Juan mé tí nķexro kui éxí xikaha chrónka xroon itén Dios ósé. Mé ntáchro xikihi:

Janhan mé tsochr'an ijnko nķexro tsochrónka itan kuéntana tsitónxin ntja,

kixin tsjasiyóxin ch'án ntja kuénta.*

Mé xikaha chrónka itén Dios.

11 Ntá ijnko nkehe chaxín tsotjonkará kixin kaín tí nķexro k'uéjé senó la kánhyó tjetóan sín la antsí tjetóan tí ch'ín Juan Bautista. Kǰánchó ijnko nķexro kǰónté tjetuanhya la tí ts'áyéhe sín tí kjuachaxién Dios tjen nkaya nkajní la antsí tjetóan sín la ntá jehe ch'ín Juan la kénhyó.

* 11:10 Malaquías 3.1

12 Tí ikui ch'in Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chóna kjuachaxin mé tsjacha sín.

13 Kain tí sín profeta la ko tí ley kuènte ch'in Moisés mé chrónka nkexrí tí kjuachaxin kuènte Dios hasta ikui ch'in Juan.

14 A ntá tí jahará chrókuitekáonrá tíhi; kixin ch'in Juan la mé ikui kixin tí xra kuènte ch'in Elias tsjintaxín sich'e ch'án kixin ch'in Elías la t'ichjánxin chrókui ch'án inaá.

15 Tí nkexro tjinkaon chrókuinhin la chrókuinhin.

16 '¿Nkexrí chrókuintayóaxian tí chojni tjejó ijie? Tóyóhe sín tí chánjan tjejótjaxín sín ntasin tsítán sín la t'íyehé sín kíchó sín

17 ntáchro sín kixin: "K'uánoani flauta kjánchó jahará la tēhyará. Itsjeni isón kuènte chojni tsík'en la ntá k'uaváhyará la ko tsjankahyará."

18 Kixin tí ikui ch'in Juan la k'jónehya ch'án la k'uíhya ch'án vino la jahará ntáchrorá kixin ijnko nchakuen tí jínahya mé chóna ch'án.

19 A ntá tió kui tí Xjeen Dios K'óna Chojni ntá k'jóné ch'án la ko ik'ui ch'án, ntá ntáchrorá kixin imá itsjé k'jóné ch'án la imá ik'ui ch'án la ko imá t'ito ch'án tí chojni chóna jje la ko tí sín nchekjènkí, ichrorá. A ntá tí kjuachaxin kuènte Dios mé tjakoxín tí xjeen ch'án.

Tí chjasin titekakonhya

(Lc. 10.13-15)

20 Ntá ch'in Jesús mé kjuankíxin ch'án ntáche ch'án tí sín tjejó iso tí chjasin imá kjuasixín ch'án kjuaxroan kixin kjónté xíkaha la naxá kuínkáchónkihya sín Dios.

21 Ntá ntáchro ch'án kixin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxí k'uíkonrá jahará ntá tí chrókójehe sín la tjoka chrókuínkáchónki sín Dios la tjoka chrókjuakoxín sín chrók'uinkáya sín ka tié la ko nteso chrókjuinček'ia sín asén sín.

22 Ntá ntáxrjan kixin tí yaon tsitoxén ijje chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín.

23 A ntá jahará chojni chjasin Capernaum tjenkayáxinrá kixin imá nohá a ntá sátsjírá nkaya nkajní, ichrorá, kjánchó chaxínhya. Jahará la tsjasinkajinxinrá ntiha sátsjírá tsjasótiará tí sún tí sín tsík'en. Tí chrókjuásian tí kjuaxroan tí chjasin Sodoma éxí kjuásian chjasánrá la tí chjasin la kjá naxá chrók'uixin sín naxá chrók'uítjáyanhya sín tí yaon ijie kixin tjoka chrókuitekaon sín.

24 A ntá tjonkará kixin tió sinchekitoxén Dios ijje chojni la antsí tsjasótiará la tí sín chjasin Sodoma la kénhyó tsjasóte sín.

Xrákirá tí tjeen janhan la ts'ok'áhará

(Lc. 10.21-22)

25 Ntá tí yaon a ch'in Jesús mé nixjehe ch'án It'é ch'án ntáchro ch'án kixin:

—Tjáncháha kjuasáya It'éni mé Inché nkaya nkajní la ko chjasintajni kixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kixin ts'itja tí sín noehya.

26 Mé xíkaha It'éni jaha kóxrjínhan kixin xíkaha tsonhen —ichro ch'in Jesús.

27 Ntá ntáchro ch'in Jesús kixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjejá ch'án tsochóxin sín ch'án.

²⁸ Xrákirá kaín rá tí tjén janhan tí jahará imá tsíkóxrjérá kjuich'erá xra la yamará nkehe iye la ntá janhan mé sintak'ok'áhará.

²⁹ Tákjárá tí xra kuéntana la ts'itjará kuéntana kixin janhan mé jina asenná la ntahnkehya. Ntaha mé ts'itjará ts'ok'èxin asánrá.

³⁰ Tí xra tsotjahará la xrahya la tí nkehe tsotjahará la yehya.

12

Tí sín k'uajiko ch'in Jesús mé ik'uín sín iso noatrigó ijnko yaon t'ok'éhe tí sín Israel

(Mr. 2.23-28; Lc. 6.1-5)

¹ A ntá ijnko yaon la ch'in Jesús k'uátsínka ch'án ijnko nonte siín noatrigó tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankixin sín ik'uín sín iso noatrigó a kixin sine sín.

² A ntá iso tí sín fariseo k'uikon sín kixin xikaha kjuich'e tí sín xriko ch'in Jesús la ntá ntáchro sín kixin:

—Tsjehe tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsohnen xra tí yaon i —ichro sín.

³ Ntá kjuátehe ch'in Jesús kixin:

—Jahará za kjuinchekuáxinhyará tí xroon chrónka nkehe kjuich'e ch'in David la ko tí sín k'uájiko ch'án tió k'uén sín kjinta?

⁴ A ntá jehe sín mé k'uixenhen sín tí nchia kuente Dios la kaín sín kjóne sín tí niotja tsikóyaon kuente Dios kjónté kohya kjuachaxin sine ch'án ni tí sín k'uájiko ch'án. Jehó siín kjuachaxin sine tí sín nchat'á.

⁵ Jahará za nchekuáxinhyará tí xroon tsikjin ch'in Moisés ntáchro kixin tí sín nchat'á kuente njnko mé t'ok'éhya sín tí yaon sábado la kjónté xikaha la jehya jie tíha?

⁶ Ntáxrjan kixin itjén janhan la antsí má chonta kjuachaxin la ntá tí njnko la kénhyó.

⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan Dios tjínkavan kixin chrókuiikonóghérá chojni la tjínkakonhya kixin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhyará tí janhan kixin ninkehó jie chontahya.

⁸ A ntá tí Xjeen Dios K'óna Chojni mé chóna kjuachaxin ts'etqan nkexrí tsohnen tí yaon t'ok'éheni —ichro ch'in Jesús.

Ch'in Jesús kjuinchekitóhe jina ijnko chojni tsixámá tja

(Mr. 3.1-6; Lc. 6.6-11)

⁹ Ntá ch'in Jesús mé sákjuixin ch'án ntiha la k'uixenhen ch'án ijnko njnko Israel.

¹⁰ Mé ntiha itjen ijnko ch'in tsixámá tja. Na ntá tjejontaxín iso sín fariseo a tjinkaon sín tsjanchia sín jie. La ntá kjuanchankíhi sín ch'án kixin:

—¿Á siín kjuachaxin sinchekitoheni jina ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'in Jesús ntáchro ch'án kixin:

* 12:7 Oseas 6.6

—Jnkojín tí jahará chontará ijnko kolélo chrókujuítsínkáya ijnko tòye tí yaon t'ok'éheni zá chrókujuíhyará chrókuakitsjetaónrá va tòye ní?

¹² Kjánchó tí chojni antsí má tjete sínkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

¹³ Méxra nixjehe ch'án tí ch'ín níhi a, ntáchro ch'án kixin:

—Tjéntóá tjá —ichro ch'án.

A ntá tí ch'ín níhi tja kjuentoá tja ch'án la ó kjuixin kuítóhe jína éxi tí í jnko tja ch'án xikaha.

¹⁴ Ntá tí sín fariseo kónínkaon sín k'uaxrxjén sín ntiha sákjuí sín la kjuenkayáxin sín nkexrí ts'óyan sín tí ch'ín Jesús.

Itén Dios senó chrónka kuènte ch'ín Jesús

¹⁵ A ntá ch'ín Jesús mé kónohe ch'án kixin xikaha tjenkayáxin sín la ntá sákjuíxin ch'án ntiha la itsjé sín chréhe sín ch'án. Kjuínchekitóhe ch'án jína kaín tí sinníhi

¹⁶ la k'uetóan ch'án kixin tsochrónkahya sín noxín kixin nkexro tí jehe ch'án.

¹⁷ Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsintáchro ch'án xikíhi:

¹⁸ Ntihi tjen tí nkexro ch'ena xra la janhan mé kjuéyá ch'án, janhan tjuaha ch'án la chàna kixin itjen ch'án.

Tsotjaha ch'án tí nchakuenná

la jehe ch'án mé tsochrónka ch'án nkexrí sintakitóaxián ijje chojni chjasintajni.

¹⁹ Tsonínkakuenhya ch'án chojni la chjíníhya ts'óyako ch'án, la ko kohya nkexro tsinhin itén ch'an tí ntja.

²⁰ Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe sínhchikoá.

Jehe ch'án naxa sich'e ch'án xra tsjixrakájia tí yaon ts'etóan ch'án.

²¹ La kaín xín chojni chjasintajni mé tsitekaon sín tí jehe ch'án.†

Mé xikaha chrónka itén Dios ósé.

Tí sín fariseo mé ntáchro sín kixin ch'ín Tsochren t'etuenhen asén tí ch'ín Jesús (Mr. 3.19-30; Lc. 11.14-23; 12.10)

²² Ntá iso chojni sákjuikohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. A ntá ch'ín Jesús mé kjuínchekitóhe ch'án jína la ntá jína nixja ch'án la ko jína t'ikon ch'án.

²³ Ntá kaín xín chojni la chrakon sín la tjanchankíhi kichó sín ntáchro sín kixin:

—¿Á jehya xjeen David tíhi? —ichro sín.

²⁴ Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuènte ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

²⁵ Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkojín gobierno jnkokoáhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etóanxín sín, la ko kjaxin tí sín jnkokoá chjasin ó tí sín jnkokoá nchia jnkokónhya tjenkayáxin sín la kjaxin xikaha ts'itjáyán sín.

²⁶ A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naxa chrók'uetóan.

† 12:21 12.18–21 Isaías 42.1–4

²⁷ Jahará ntáchrorá kixin janhan kuakítsjexián tí nchakuen tí jínahya kjuachaxin kuénte ch'ín Beelzebú. A ntá tí chaxín xíkaha la ntá ¿nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehé sín mé tjakoqxin sín kixin ntoáhya tjenkayáxinrá.

²⁸ A ntá janhan mé kuakítsjexián tí nchakuen tí jínahya kjuachaxin kuénte Nchakuen Dios la tíha mé chrókónoaxínrá kixin tí kjuachaxién Dios mé ó kui tí tjejorá.

²⁹ ¿Nkexrí chrók'uixenhen ijnko nkexro ijnko ntøe ijnko ch'ín jiehe la chrókuakitsjehe ch'án tí nkehe chóntha ch'án? Senó la chrókónteto ch'án kixin jína chrókueéhe sín ch'án.

³⁰ Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'ínkákonhen tí xra it'a.

³¹ Méxra xrxjanka kixin Dios tsjakjiin jnkojnko jie tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjiin ijje sín.

³² La ko xrxjanka kixin kaín nkehe t'ántaxínhínrá tí Xjeen Dios K'óna Chojni la tsjakjiin Dios. A ntá tí ts'ántaxínhínrá Nchakuen Dios la ntá mé í tsjiinhyá tí ijjará kjónté ntihi chjasintajni la ko kjónté tí chr'éxin.

Tí nta chrókuatsøanxín sín tí to jína

(Lc. 6.43-45)

³³ Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókuatsøanxínni tí to a.

³⁴ Jahará tsík'axrjenixínrá konche. ¿Nkexrí jína chróntáchrorá jahará tí jehya jínará? Tí nixja ir'vará la éxí ntáchro asánrá mé nixja ir'vará.

³⁵ Ijnko chojni jína mé jína nixja kixin jína asén ch'án. A ntá ijnko chojni jínahya mé nixja tí nkehe jínahya kixin tí asén ch'án kjaxin jínahya.

³⁶ Ntá tjonkará kixin itsi tí yaon tsjixixín tió sinchekitøexín Dios ijje chojni ntá tsonohará kaín nkehe chjini sínixjará.

³⁷ Kixin tí nkehe nixjará tsjakøxin á kjuásínrá jie ní ø náhi.

Tí sín jehya jína tjanchehe sín ch'ín Jesús kixin tsjakøxin ch'án ijnko kjuaxroan jie

(Mr. 8.12; Lc. 11.29-32)

³⁸ Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchro sín kixin:

—Maestro, tjinkaonni chrók'uikonni chrókuásian ijnko kjuaxroan náxrjón tsoøoxínni kixin nkexro jaha —ichro sín.

³⁹ Ntá kjuátehe ch'ín Jesús ntáchro ch'án kixin:

—Tí sín jínahya la ko tí sín kuítóhe Dios mé tjanchia sín chrókuásian kjuaxroan náxrjón. Kjánchó tsjakøxinhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé.

⁴⁰ Éxí yóhe kjuák'e ch'ín Jonás iní yaon la iní tie nkaxenhen tsee koche jie mé xíkaha tí Xjeen Dios K'óna Chojni tsjak'e nkaxenhen tøy tsoxravá iní yaon la iní tie.

⁴¹ A ntá tí yaon tsitøexín ijje chojni la ntá tí sín chjasin Nínive mé tsjanchia sín jie kixin tí sín tjejó jie, kixin tí sín chjasin Nínive mé kuítóhe sín ijje sín tió kuínhin sín itén Dios chrónka ch'ín Jonás. A ntá ijje itjén janhan la antsí má chonta kjuachaxin. A ntá tí ch'ín Jonás la kénhyó k'uéchóntha ch'án kjuachaxin, kjánchó jahará kuitekákonhyará tí janhan.

⁴² Kǵaxin tí yaon tsitǵoxin iǵié chojni la tí tjan reina k'uǵetǵan kǵuǵxin nó Sur mé tsjanchia tjan ǵiǵ kǵixin tí sín tǵejǵ iǵie kǵixin jehe tjan kǵuǵxin imá ikǵín kǵixin chrókuinhin tjan tí kǵuaxrexinkaon ǵína k'uǵéǵjako ch'ín Salomón. A ntá iǵie itǵén janhan la janhan aǵtsí má nõna a ntá ch'ín Salomón la kénhyó k'uǵénohe ch'án.

Tió tsokjan tí nchakuen tí ǵínahya

(Lc. 11.24-26)

⁴³ A ntá iǵnko nchakuen tí ǵínahya tsík'axrǵexin iǵnko chojni la mé ixri tí nonte xamá xritǵeyá nketí náxrǵjón ts'ok'ǵhe. A ntá k'uitǵahya nketí náxrǵjón ts'ok'ǵhe.

⁴⁴ La ntá kǵuenkǵayáxin kǵixin: “Áxri tsokjan ntǵna k'uaxrǵéxian”, ichro. A ntá tió ikjan tí nchakuen la t'ikon éxí iǵnko nchia kohya ninkexró la éxí iǵnko chojni tsík'ánǵjón ntǵe la náxrǵjón tsjehe tí nkaxenhen nchia.

⁴⁵ A ntá k'uǵikon tí ǵínahya xǵikaha tǵen nchia la ntá sákǵuǵkǵjín í ǵnko yato nchakuen tí ǵínahya aǵtsí má ǵínahya. A ntá kaín k'uǵixenhen tí ntiha. A ntá aǵtsí má ǵínahya kónhen tí ch'ín a, a ntá tí senó la kénhyó. Mé xǵikaha tsǵnhen kaín tí sín siín iǵie titekakonhya.

Tí iné la ko kǵíchó ch'ín Jesús

(Mr. 3.31-35; Lc. 8.19-21)

⁴⁶ Ntá ch'ín Jesús náxa tǵenixǵeǵ ch'án chojni la ntá xrǵnǵahya kǵuǵǵ iné ch'án la ko kǵíchó ch'án. Ntá kuitǵhe sín ntǵja ó la tǵjinkaon sín chrónixǵeǵ sín ch'ín Jesús.

⁴⁷ Ntá iǵnko nkexro ntiha sákǵuǵichénka tí ch'ín Jesús, ntáchro ch'án kǵixin:

—Iná la ko kǵichua tǵejǵ sín ntǵja la tǵjinkaon sín chrónixǵaha sín tí jaha.

⁴⁸ A ntá ch'ín Jesús kǵuátǵhe ch'án nixǵeǵ ch'án tí nkexro chrónka a, ntáchro ch'án kǵixin:

—ǵXá nkexro tí naná la ko nkexro tí kǵichiná? —ichro ch'án.

⁴⁹ Ntá kǵuǵǵoxin tǵa ch'án tí sín xriko ch'án la ntáchro ch'án kǵixin:

—Tí sín í la mé naná la ko kǵichiná.

⁵⁰ Tí ǵnkoǵjín sín í nchexiteyá nkehe tǵjinkaon T'aná tǵen nkaya nkǵjní na mé táha mé naná la ko kǵichiná mé xǵikaha t'ǵkuǵn tí jehe sín —ichro ch'án.

13

Ch'ín Jesús mé kǵuǵncheyóǵexin ch'án éxí iǵnko chojni t'enǵa nõntee

(Mr. 4.1-9; Lc. 8.4-8)

¹ A ntá tí yaon a ntá ch'ín Jesús k'uaxrǵexin ch'án nchia la sákǵuǵ ch'án kǵuǵák'etǵaxin ch'án chrǵnta ntǵyaon.

² Ntá k'uǵixikóchǵjina nchónhya chojni tí tǵen ch'án la ntá jehe ch'án mé k'ujit'ótǵen ch'án iǵnko ntabárcǵ kǵuǵák'etǵaxin ch'án la kaín sín na tí chrǵnta ntǵ ó kuitǵhe sín.

³ A ntá nchónhya nkehe kǵuako ch'án kǵuǵncheyóǵexin ch'án, ntáchro ch'án kǵixin:

—Éxí iǵnko ch'ín sákǵuǵ'enkǵ nõntee

⁴ mé xǵikaha sákǵuǵ'enkǵ ch'án iso tí noatǵigo a. Ntá iso noa la tsík'ánótǵen ntǵa ntá ikui koxroxǵ k'uǵnkǵa va noa.

⁵ A ntá iso noa na mé k'uitǵǵi chrǵk'á xrǵ tí kohya itsǵé nche ntá tǵjoka k'uayan kǵixin ntaha tǵínhya chóntha nche.

⁶ Ntá tí kǵuǵtǵon yaon la ntá tí ka la xamá kǵixin nǵnkahya chóntha nuèe.

⁷ A ntá í so noa kǵuǵítsinkak'á tí siín kach'ǵ na k'uánkí tí kach'ǵ a na ntá í xitǵahya k'uánkí tí noatǵigo a kǵixin tsíkǵate tí kach'ǵ.

⁸ A ntá tí noa tsík'itjí nche jína na ntá tió k'uáánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta.

⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuènté kjuíncheyóexin ch'ín Jesús

(Mr. 4.10-12; Lc. 8.9-10)

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuènté xíkaha nixjehé sín ncheyóexián? —ichro sín.

¹¹ A ntá ch'ín Jesús kjuátehe ch'án ntáchro ch'án kixin:

—Jahará la Dios me tsjnkítsa tsohohará tí nkehe noehya í so chojni kuènte tí kjuachaxin kuènte Dios. A ntá tí jehe sín a la náhi.

¹² Tí nkexro ó chóna nkehe la antsí ts'áyéhe sín kixin antsí má tsochóna sín. A ntá tí nkexro chónataha la kjónté tí ntsí chóna sín la ts'axrjehe sín.

¹³ Mé xíkaha kjuíntayóaxuán kjuákuaxián sín kixin jehe sín t'ikon sín la ntá kjónté tjátsqanhya sín la tjejóntinhin sín a ntá kjónté kienxínhya sín.

¹⁴ Mé xíkaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xíkíhi:

Jehe sín tsinhin sín a ntá tsiexínhya sín

la ts'ikon sín la tsjatsqanhya sín tí nkehe ts'ikon sín.

¹⁵ Imá icha asén tí sín chjasin i.

Chóna sín ntatsjon kjánchó ts'íkjehe

la chóna sín ikon sín kjánchó t'ikonhya sín,

kixin chrók'uikonhya sín

la chrókuienhya sín la ko

xitjahya kienxín sín,

kixin í tjinkakonhya sín chrókjan sín kixin janhan mé chrókuíntakitohá sín jína.*

Mé xíkaha tsíkjin ch'ín Isaías.

¹⁶ Ntá ntáchro ch'ín Jesús inaá kixin:

—A ntá jahará la imá náxrjón tjejorá kixin t'ikonrá la ko tinhínra.

¹⁷ Chaxin xrjanka kixin itsjé tí sín k'uéchrónka itén Dios la ko tí sín jína mé k'uéjtjinkaon sín chrók'uikon sín tí nkehe t'ikonrá la ntá k'uikonhya sín la ko k'uéjtjinkaon sín chrókuinhin sín tí nkehe tjejotinhínra la ntá kuienhya sín.

Ch'ín Jesús chrónkaxin nkexrí t'axrjexín tí nkexro sákjuík'enka

(Mr. 4.13-20; Lc. 8.11-15)

¹⁸ Tinhínra nkexrí t'axrjexín tí ch'ín sákjuík'enka nontge.

¹⁹ Tí nkexro kuínhin tí itén Dios chrónka nkexrí tí kjuachaxin kuènte Dios la ntá kienxínhya sín la yóhe tí noa xènjintja ntja. Ó kui ch'ín Tsochren ntá kjuínchek'itjáyan ch'án tí itan jína kuínhin sín.

²⁰ A ntá tí tje kjuítsínkak'á xro la mé t'axrjexín kixin tí chojni kuínhin itén Dios la tjoka kóxrjinhin sín la kuínkáchónki sín.

²¹ Kjánchó nínkahya chóna nuèe na ntá itsi tí kjuaxróxinhya o tsochónkihi sín chojni chrók'óyán sín kixin tí itén Dios kuítekaon sín, a ntá tsítoge sín tí tinkáchónki sín Dios.

²² A ntá tí tje kjuítsínkak'á kach'j na mé éxí yóhe ijnko chojni kuínhin itan jína kjánchó tjitoxienhya ntje sín kixin tóxakonhen sín tí xra chóna sín chjasintajni

* 13:15 13.14-15 Isaías 6.9-10

la ko tjinkaon sín tsochóna sín itsjé nkehe. Kaín tíha mé t'inkákonhen tí itén Dios kuínhin sín la ntá xíkaha xitjahya sich'ehe sín xrā Dios.

²³ **A** ntá tí tje k'uínka tí nonte chóna nche jína na mé yóhē tí chojni kuínhin tí itén Dios na ko kíenxín sín la ntá xíkaha jína ch'ehe sín Dios xrā. Na iso sín la yóhē éxí tí tje k'óna ijnko ciento neno noa la iso sín la yóhē tí k'óna sesenta neno noa la iso sín la yóhē tí k'óna treinta neno noa —mé xíkaha chrónka ch'ín Jesús.

Ch'ín Jesús kjuíncheyóexin ch'án éxí tí kajnto k'uánkikué tí noatrigó

²⁴ Ntá ch'ín Jesús kjuíncheyóexin ch'án inaá ntáchro ch'án kixin:

—Tí kjuachaxin kuènte Dios mé yóhē ijnko ch'ín k'uēnkā noa jína nontēe ch'án.

²⁵ **A** ntá tío k'uéjójua kaín sín ntá ikui ijnko nkexro nínkakonhen sín la k'uēnkā ch'án kajnto chrík'á tí noa a la ntá sákjuí ch'án.

²⁶ La ntá tí noatrigó k'uánkí la ntá ó sítintāa la ntá ntíha kjaxin kónoxíxin k'uánkí tí kajnto.

²⁷ Ntá tí sín ch'e xrā mé sákjuínixjehē sín tí lámōe sín la ntáchro sín kixin: “Tí noa k'uènkā nontāa la noa jína tíha. **A** ntá ¿nketí kjuixín tí kajnto tsík'ayan?” ichro sín kjuanchankí sín.

²⁸ Ntá kjuátēhe tí ínché tí nonte ntáchro kixin: “Kjá ijnko nkexro nínkakonna mé kjuích'e xíkaha”, ichro ch'án. Ntá tí sín ch'e xrā mé kjuanchankí sín kixin: “¿Á tjínkáván kixin sátsjini tsakítsjenkíni tí kajnto?” ichro sín.

²⁹ **A** ntá kjuátēhe ch'án kixin: “Náhi. Tí sátsjia tsakítsjenkiá tí kajnto la kjá chónte tí katrigó ts'axrjenkí.

³⁰ Íchá jína títohé kixin ts'ánkikué tsjixin tsotjájiani. Ntá ts'etueñhenni tí sín tsotjá kixin senó ts'ejo sín tí kajnto la sinchenteto sín kixin tsoche la ntá chr'éxin tsotjá sín tí noatrigó ntá ts'inkachjina tí noa a” —mé xíkaha chrónka ch'ín Jesús.

Ch'ín Jesús kjuíncheyóexin ch'án éxí tí xroān ijnko ntayoa it'in mostaza (Mr. 4.30-32; Lc. 13.18-19)

³¹ Ntá ch'ín Jesús kjaxin kjuíncheyóexin inaá ntáchro ch'án kixin:

—Tí kjuachaxin kuènte Dios mé éxí yóhē ijnko tje mostaza k'uēnkā ijnko chojni nontēe ch'án.

³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jié la tí í so nta la kánhyó. Ntá koxroxé xritjaká mé itsi va sich'éna va kāké va tí chrík'á tí chaon nta.

Ch'ín Jesús kjuíncheyóexin ch'án éxí tí xroān t'ánkíxin niotja (Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kixin:

—Tí kjuachaxin kuènte Dios mé éxí yóhē tí xroān t'ánkíxin niotja. Kjuinkíkjanxin ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesús tí nixja ch'án (Mr. 4.33-34)

³⁴ Ch'ín Jesús kjuākōhē ch'án tí chojni la kjuíncheyóexón ch'án la nixjahya ch'án nínkehó tí kohya nkehe chrókjuíncheyóexin ch'án.

³⁵ Mé xíkaha kjuako ch'án kixin tsoxiteyá tí nkehe tsíchronka ijnko nkexro k'uéchronka itén Dios ntáchro xíkíhi: Mé tsoníxjāxiān sintayóaxión nkehe

tsontáxrjan tí nkehe ninkexró noehya desde k'óna chjasintajni.†

Ch'ín Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjehe ch'ín Jesús tí sín a ntá sákjuí sín kaín sín la jehe ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kixin:

—Chrónkaxián nkexrí t'axrjexín tí kajnto k'uánkíkué tí noa trigo tí nonte —ichro sín.

³⁷ Ntá ch'ín Jesús kjuátehe ch'án ntáchro ch'án kixin:

—Tí nkexro k'uenká tí noa jína mé tí Xjeen Dios K'óna Chojni.

³⁸ A ntá tí nonte mé chjasintajni tíha. Tí noa jína mé éxi yóhe tí chojni kuákja kjuachaxin kuente Dios. La ntá tí kajnto mé éxi yóhe tí chojni t'etuenhen Tsochren.

³⁹ Tí nkexro nínkakhenni mé k'uenká tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel.

⁴⁰ Éxi xrenájín tí kajnto la tsoche mé xíkaha tsonhen tió tsjixixín tsjeje chjasintajni.

⁴¹ Tí Xjeen Dios K'óna Chojni mé ts'etuenhen tí sín ángel kixin tsakitsjexín sín tí tjet'etqan Dios kaín tí chojni tjachroe í so chojni la ko tí sín ch'e tí nkehe jínahya.

⁴² La tsochr'án sín sátsji sín tí tja siín xrohi la ntaha tsotsjánka sín la sinetaón neno sín.

⁴³ Ntá kaín xín tí sín nchexiteyá tí nkehe tjinkaon Dios mé éxi tí yaon xíkaha tsotsjehe sín tí tjet'etqan It'éni Dios. Tí nkexro tjinkaon chrókuinhin la chrókuinhin —mé xíkaha ichro ch'ín Jesús.

Ch'ín Jesús kjuíncheyóexin ch'án éxi ijnko nkehe tjete tjemá

⁴⁴ Tí kjuachaxin kuente Dios mé éxi yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'ema ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

Ch'ín Jesús kjuíncheyóexin éxi ijnko xro perla tjete

⁴⁵ Ntá ntáchro ch'ín Jesús kixin:

—Kjaxin tí kjuachaxin kuente Dios mé éxi yóhe ijnko nkexro tjejá xro perla náxrjón.

⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxi ijnko nchísén tséya sín koche

⁴⁷ Ntáchro ch'ín Jesús kixin:

—Kjaxin tí kjuachaxin kuente Dios mé éxi yóhe ijnko nchísén tséya chojni koche t'enkí sín tí ntayaon la ntá tsotsé nchónhya clase koche.

⁴⁸ Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntá la ntaha ts'ejótjaxin sín la tsíchéhe sín koche jína la t'enká sín ntaxra. La ntá tí jehya koche jína la it'e sín.

⁴⁹ Mé xíkaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsitqhe tí chojni jína.

⁵⁰ La tsochr'án sín tí sín jínahya sátsji sín tí tjen tja tí siín xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjete ntaxin

⁵¹ Ntá ch'in Jesús mé kjuanchankí ch'an kixin:

—¿Á tiénxinrá jahará kaín tí nkehe ní? —ichro ch'an.

Ntá kjuátehe sín kixin:

—Jeén, Ìnchéni, ó kíenxinni —ichro sín.

⁵² Ntá ntáchro ch'in Jesús kixin:

—Ijnko maestro nohe tí nkehe kuènte ley la ntá ó nohe ch'an kuènte tí kjuachaxin kuènte Dios la jehe ch'an la éxí yóhẹ ijnko ìnché nchia chóna itsjé nkehe tjete tjejóhjinna la ntá nohe ch'an tsakitsje tí nkehe tjete nixin la tí nkehe tjete ntaxin —mé xikaha ichro ch'in Jesús.

Ch'in Jesús kjuák'e ch'an chjasin Nazaret

(Mr. 6.1-6; Lc. 4.16-30)

⁵³ Ntá kjuixin nixja ch'in Jesús kjuíncheyóexin ch'an tíha na ntá sákjuixin ch'an ntiha.

⁵⁴ La ntá sákjuí ch'an chjasén ch'an Nazaret. Ntaha kjuankixin kjuakoxin ch'an tí ninko Israel. Ntá itsjé sín la kóxakonhen sín kuínhin sín tí tjako ch'an la ntáchro sín kixin:

—Tí ch'in i la, ¿nketí tsíxrakohẹ ch'an kixin imá nohe ch'an la ko nkexrí kixin tjasin ch'an kjuaxroan?

⁵⁵ ¿Á jehya tíhi xjén tí ch'in carpintero la ìné ch'an mé María? La ko chóxinni tí kíchó ch'an a mé ch'in Jacobo la ko ch'in José la ko ch'in Simón la ko ch'in Judas.

⁵⁶ Kjaxin tí sín chjin kíchó ch'an na ntihi tjejó sín. Méxra ¿nkexrí nohe ch'an kaín tí nkehe? —ichro sín.

⁵⁷ Mé xikaha chrohya sín tsitekakonhen sín ch'an. Ntá ntáchro ch'in Jesús kixin:

—Nkuixin tjikosáyehé chojni ijnko nkexro chrónka itén Dios. A ntá tí sín chjasén ch'an la ko kaín tí sín ntọe ch'an mé tjikosáyehya sín ch'an —ichro ch'an.

⁵⁸ A ntá tsjéhya kjuaxroan kjuasin ch'an ntiha kixin kuítekakuenhya sín ch'an.

14

Ik'uén ch'in Juan Bautista

(Mr. 6.14-29; Lc. 9.7-9)

¹ A ntá tí yaon a ntá tí ch'in Herodes mé tí nkexro k'uetọan tí estado Galilea mé kuínhin ch'an nkexrí ichro ch'in Jesús.

² Ntá nixjehe ch'an tí sín ch'ehe ch'an xra, ntáchro ch'an kixin:

—Kjá tíha la ch'in Juan Bautista ó tsíxechón ch'an inaá. Mé xikaha chóna ch'an kjuachaxin tjasin ch'an kjuaxroan —ichro ch'in Herodes.

³ Méxra tí ch'in Herodes mé tsík'etọan kixin ch'in Juan tsontetoxin cadena la ko tsjak'echjina ch'an. Mé xikaha kjuích'e ch'an kixin xikaha tsíkjanhia tí tjan Herodías, tí tjan ichjién tí ch'in Felipe, kíchó ch'an.

⁴ Tí ch'in Juan tsintáche ch'an tí ch'in Herodes kixin:

—Jehya jina tsochonta tí ichjién tí kichuá —mé xikaha tsintáchro ch'an.

⁵ Ntá ch'in Herodes tjinkaon ch'an chrók'óyán ch'an tí ch'in Juan kjánchó chrakonhen ch'an tí chojni kixin kaín sín ntáchro sín kixin ch'in Juan mé nixja itén Dios, ichro sín.

⁶ A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehé ch'án. A ntá imá kóxrjínhin ch'ín Herodes nkexrí ité tjan.

⁷ La ntá nixjehe ch'án tjan k'uákjenxin ch'án ihnié Dios ntáchro ch'án kixin tsochjehe ch'án tjan kjónté jnkójin nkehe tsjanchia tjan, ichro ch'án.

⁸ Ntá jehe tjan la senó kjuíkjanchankíhi tjan iné tjan ntá iné tjan tsíntachro kixin ikja ch'ín Juan mé tsjanchia tjan ntá jehe tjan mé nixjehe tjan tí ch'ín Herodes inaá ntáchro tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kixin xikaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichren nkehe tsjanchia tjan tsjanjon ch'án.

¹⁰ Méxra k'uetqan ch'án kixin ts'óchrínjin sín ikja ch'ín Juan tí tjen ch'án ntoechiso.

¹¹ Ntá kjuíkqao sín kjuíkoyá sín tí kja ch'ín Juan ijnko plato la chjehe sín tí tjan tjarisoá ntá jehe tjan la sákjuikénhen tjan iné tjan.

¹² Ntá tí sín k'uék'ajiko ch'án a mé sákjuikakitsje sín tí cuérpoé ch'án la sákjuikjává sín. La ntá chr'exin la sákjuí sín sákjuíchénka sín tí ch'ín Jesús kixin xikaha tsíkónhen ntiha.

Ch'ín Jesús kjuínchekjine ch'án in'ó mil chojni

(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'ín Jesús kixin xikaha tsíkónhen la ntá jehó ch'án sákjuí ch'án k'ujit'ótjen ch'án ijnko ntabárqo la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjen ch'án la ntá k'uaxrjexín sín chjasén sín la ntá totó sín sákjuichréhe sín ch'án.

¹⁴ A ntá k'uaxrjexin ch'ín Jesús tí ntabárqo a, a ntá k'uikon ch'án kixin nchónhya chojni siín ntiha ntá kujkonóehé ch'án tí jehe sín na ntá kjuínchekitohe ch'án jna tí sín níhi tsíkjikqao sín.

¹⁵ La ntá ó k'uúxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuénhén sín kixin sátsji sín tí chjasin ntsí chjinaxón tsjik'ena sín nkehe sine sín —ichro sín.

¹⁶ Ntá kjuátehe ch'ín Jesús, ntáchro ch'án kixin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷ Ntá kjuátehe sín kixin:

—Chóntahyani itsjé nkehe. Jehó in'ó niotja la ko yaá koche chóntani —ichro sín.

¹⁸ Ntá ntáchro ch'ín Jesús kixin:

—Xrakoanará tí nkehe méhe ntihi —ichro ch'án.

¹⁹ Ntá k'uetqan ch'án kixin kaín xin sín ts'ixitjaxin sín tí chrítaón kaxi a. Ntá kuákja ch'án tí in'ó niotja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'q ch'án tí niotja chjehe ch'án tí sín k'uájiko ch'án la jehe sín mé k'óxikayehé sín chjehe sín tí chojni siín a.

²⁰ Ntá kaín sín kjuixin kjóne sín kókjehe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxèhe sín la mé teyó ntaxra kaón.

²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

Ch'ín Jesús mé tjetjitaón ch'án ntq
(Mr. 6.45-52; Jn. 6.16-21)

²² Ntá kjuixin tíha ntá k'uetuēnhen ch'ín Jesús tí sín k'uájiko ch'án kixin ts'it'ótjen sín tí ntabárcō ts'atòye sín í jnko nánko ntayaon. Ntá jehe ch'án naxa kuítóhe ch'án nixjēhe ch'án tí sín siín ntiha.

²³ Ntá kjuixin xíkayehe sín na ntá jehó ch'án chrìn ch'án ijnko jnā tsonixjēhe ch'án It'é ch'án tjen nkaya nkajní. Na ntá ó k'uúxin tie la jehó ch'ín Jesús itjen ch'án ntiha.

²⁴ La ntá tí ntabárcō na mé tjenkátaón ntā jnkosiné ntayaon. Ntá imá chjéhe ntā tí ntabárcō kixin tí xr̄into la chjéhe la xitjahya sátsji ntabárcō.

²⁵ Na ntá las tres nantóye a mé sákjuíchrēhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín.

²⁶ Na ntá tí sín k'uájiko ch'án mé k'uikon sín kixin tjetjitaón ch'án tí ntayaon na ntá imá chrakon sín la k'óyako sín. Ntáchro sín kixin kjuacha sín ichro sín, chrakon sín.

²⁷ Na ntá nixjēhe ch'ín Jesús tí jehe sín ntá ntáchro ch'án kixin:

—Nchefuerte asánrá, chrakonhyará. Janhan kjuihá —ichro ch'án.

²⁸ Ntá ch'ín Pedro mé nixjēhe ch'án Ìnchéni, ntáchro ch'án kixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí ntā tsjjini tí tjen jaha —ichro ch'án.

²⁹ Ntá ntáchro ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabárcō la kjuankixin ch'án tjetjitaón ch'án ntā sákjuíchrēhe ch'án tí tjen ch'ín Jesús.

³⁰ A ntá xr̄ināhya ntá kónohe ch'án kixin imá chjéhe xr̄into chr̄itaón ntā, ntá chrakon ch'án la kjuankixin tinkák'aniánki ch'án ntā, ntá k'uèya ch'án ntáchro ch'án kixin:

—Ìnchéni, nchekaáni —ichro ch'án.

³¹ A ntá tuénxín ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuénté títekákonhya? —ichro ch'án.

³² Na ntá tió k'ujt'ótjen sín yói sín tí ntabárcō la ntá tuénxín k'uixratá tí xr̄into.

³³ Ntá kaín xín tí sín tjejóxēnhen tí ntabárcō mé k'uéjóxin tochr'in sín nkayakon ch'ín Jesús la ntáchro sín kixin:

—Jaha mé chaxín Xjēen Dios —ichro sín.

Ch'ín Jesús mé kjuínchekitōhe jína tí chojni níhi nonte Genesaret
(Mr. 6.53-56)

³⁴ Ntá tió k'uátòye sín tí ntayaon ntá kjuíji sín tí nonte Genesaret.

³⁵ Ntá tí sín siín ntiha tjoka kjuátsoan sín kixin jehe ch'ín Jesús tíha, ntá kuínhin tí sín chjasin chjinaxón ntiha la ntá kuíkao sín kaín tí sín níhi tí tjen ch'án.

³⁶ Na ntá chrónóēhe sín ch'án kixin chrókúitōhe ch'án kixin kjónté chr̄rinta iké ch'án chrókúákóxin sín, la ntá kaín tí sín kuákóxin iké ch'án mé kuítóhe sín jína.

¹ **A** ntá chjasin Jerusalén kjuixín iso sín fariseo la ko iso tí sín maestro tjako tí ley la kjuichréhe sín tí ch'ín Jesús. Ntá kjuanchankíhi sín ch'án kixin:

² —¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntihya sín itja sín ntá kjónté ine sín? —ichro tí sín fariseo a.

³ **A** ntá kjuanchankí ch'ín Jesús kixin:

—¿Nkekuènté jahará kjaxin títékákonhyará nkehe tsík'etöan Dios? **A** ntá jahará tjinkáonrá naxa chrókuinkachónkirá tí nkehe kuinkáchónki tí sín tsík'axrjeníxinnrá.

⁴ Ntáchro Dios kixin: “Tsochontehérá kjuasáya it'ará la ko inará”, la ko ntáchro ch'án kixin: “Tí nkexro t'ántaxínhin it'é la ko iné la chrók'uen.”*

⁵ **A** ntá jahará tsintáchrorá kixin ó nchoxon kixin ijnko nkexro tsochéna it'é la ko iné kixin: “It'éni, inéni, chrokjuahya tsjinkítsani tí jaha kixin kaín nkehe chóntani la ó chjéheni Dios.”

⁶ **A** ntá jnkojín nkexro tsontáchro ch'án túhi ntá í t'ichjánxinhya tsjinkítsa tí it'é la ko tí iné, mé xikaha tsixrorá. Mé xikaha jahará kuítóherá tí nkehe k'uetoan Dios kixin tjinkáonrá chrókjuich'erá éxí kjuich'e tí sín tsík'axrjeníxinnrá.

⁷ Jahará la jehya jnkojínxón tjenkayáxinrá. Ntoá tsintáchro tí ch'ín Isaías, tí nkexro k'uéchrónka itén Dios ósé. Mé chrónka ch'án kixin nkexrí tjeorá la xikaha tsikjin ch'án kixin:

⁸ Tí chojni tí chjasin i ir'va ó xraxinkakonxín sín tí janhan a ntá tí asén sín la ikjín kuítóhe sín tí janhan.

⁹ Méxra ó chónko tóchjina sín xraxinkaon sín tí janhan kixin tí nkehe tjako sín la tí nkehe tsík'etöan chojni ó.†
Mé xikaha ichro itén Dios.

¹⁰ Ntá k'uíyehé ch'ín Jesús tí chojni inaá la ntáchro ch'án kixin:

—Chrókuinhínnrá la ko chrókuíenxinnrá.

¹¹ Kaín nkehe ine chojni la ó nchoxon, jehya jie. Tí jie la tí nkehe t'axrjexín ir'va chojni —mé xikaha ichro ch'ín Jesús.

¹² **A** ntá tí sín k'uájiko ch'ín Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

¹³ Ntá kjuátehe ch'án ntáchro ch'án kixin:

—Kaín tí ka jehya T'aná tjen nkaya nkajní k'uenkaxin la mé ts'axrjenkixin nuè.

¹⁴ Nté títóhé sín. Tí jehe sín la ntakótán sín la t'etuénhen sín í so sín ntakótán. **A** ntá tió ijnko chojni ntakótán tjitaón ntja la ntá yóí sín ts'anótyenyá sín ichrén tòye —ichro ch'án.

¹⁵ Ntá ntáchro ch'ín Pedro kixin:

—Chrónka nkexrí t'axrjexín tíha —ichro ch'án.

¹⁶ Ntá kjuátehe ch'ín Jesús ntáchro ch'án kixin:

—¿Á kjaxinnrá jahará tiénxinhýará?

¹⁷ ¿Á tiénxinhýará kixin kaín tí nkehe ineni na sátti nkaya tseeni na ko xík'axrjexín tí cuérpoeni inaá?

¹⁸ **A** ntá tí nkehe t'axrjexín ir'va chojni la t'axrjeníxin asén chojni la tíha la mé tí jie tjasixín chojni.

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

19 Kaín tíha mé t'axrjeníxin asén chojni, mé tí jínahya tjenkayáxin sín la ko tí t'óyán kichó sín la ko tí tjachehe kichó sín la ko tí chóna sín í jnko chojni chjin ókjé la ko teé sín la ko tí kjuach'ia la ko tí t'ántaxinhin kichó sín.

20 Tí nkehe a mé tjasixín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xíkaha ichro ch'in Jesús.

*Jnko tjan jehya sín israelita mé kuinkáchónki tí ch'in Jesús
(Mr. 7.24-30)*

21 Ntá ch'in Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón.

22 Ntá ikuí ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'in Jesús la k'uèya tjan ntáchro tjan kixin:

—Inchéni, Xjeen David, tikonóhéni kixin tí xjeenni chjin la mé níhi tjan chóna tjan ijnko nchakuen tí jínahya —ichro ti tjan a.

23 A ntá ch'in Jesús la ninkehó kjuátēheya ch'án. A ntá tí sín k'uájiko ch'án na kóchjina sín la ntáche sín ch'án kixin:

—Tétuēhén tjan sátsji tjan kixin tinkák'óyako tjan chréhe tjan tí jeheni —ichro sín.

24 Ntá ntáchro ch'in Jesús kixin:

—Dios mé ichr'ánna tsjéyá jehó tí kolélo kjuíchro kuènte nació Israel —ichro ch'án.

25 A ntá tí tjan a kóchjina la kjuák'exín toch'in tjan nkayakon tí ch'in Jesús la ntáchro tjan kixin:

—Inchéni, tjínkítsani —ichro tjan.

26 A ntá ch'in Jesús kjuátēhe ch'án ntáchro ch'án kixin:

—Jehya tí jina chrókuakitsjahá niotja tí xjan ntá chrótjahá konja chrókjóne va —ichro ch'án.

27 A ntá jehe tjan la ntáchro tjan kixin:

—Chaxín xíkaha, inchéni. Kjánchó kjónté tí konja na tí nkehe tsjixènjinnkí mesa kuènte inché la ine va —ichro tjan.

28 Ntá ntáchro ch'in Jesús kixin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jína.

Ch'in Jesús mé kjuínchekitohe jína nchónhya chojni níhi

29 Ntá ch'in Jesús mé sákjuíxin ch'án ntiha la kjuíji ch'án chrínta ntayaon Galilea. Ntá chriin ch'án ijnko jnā la ntiha kjuák'etjāxin ch'án.

30 Ntá kójnkotsé itsjé chojni tí tjan ch'án la kjuíkao sín tí sijníhi, mé tí sín xitjahya tji la ko tí sín t'ikonhya la ko tí sín nixjahya la ko tí sín tsixénká la kaín xín tí í so sijníhi. K'uejo sín tí sijníhi toté tí ch'in Jesús kixin jehe ch'án mé sinchekitohe ch'án sín jína.

31 Kaín chojni la imá chrakon sín kixin k'uíkon sín kixin tí sín k'uénixjahya la ó nixja sín la tí sín tsixénká la tsíkitohe sín jína la tí sín xitjahya tji la ó tji sín la ko tí sín k'uék'ikonhya la ó t'ikon sín. Méxra kjuanchehe sín kjuasáyé tí Dios kuènte tí sín Israel.

*Ch'in Jesús mé kjuínchekjine noó mil chojni
(Mr. 8.1-10)*

32 Ntá k'uíyehé ch'in Jesús tí sín k'uájiko ch'án la ntáchro ch'án kixin:

—Imá tikonóahā kaín tí chojni kixin ó ní yaon tjejókoni sín ntá kjuèhe sín nkehe sine sín. Tjinkaonhya chrókuétuanhan sín sáchrókui sín ntøe sín kixin naḡa nehya sín la ntja ó tsøtjēnxín sín kjinta —ichro ch'án.

³³ Ntá ntáchro tí sín k'uájiko ch'án kixin:

—Ntá jaha la ó noha kixin nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'an kixin:

—¿Nkekjaín niøtja chontará? —ichro ch'án.

Ntá ntáchro sín kixin:

—Yato niøtja chótani la ko iso koche ntsíntsí —ichro sín.

³⁵ Ntá ch'ín Jesús k'ueḡoan ch'án kixin kaín xín sín ts'ixitjaxín sín nonte, ichro ch'án.

³⁶ Ntá kuákja ch'án tí yato niøtja la ko tí koche ntsíntsí la kjuanchehe ch'án kjuasáyé Dios. Ntá kóchrít'ø ch'án tí niøtja a la ntá k'ueḡuēnhen ch'án tí sín k'uájiko ch'án kixin ts'óxikayēhe sín tí niøtja la ko tí koche kaín xín tí sín síin a, sine sín.

³⁷ Na mé kaín xín sín kjóne sín na kókjehe sín ntá kjuenájín sín yato ntaxra tot'ø tí nkehe naḡa tsíxehe.

³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a.

³⁹ Ntá ch'ín Jesús mé nixjēhe ch'án sín sákjuí sín la ntá k'uit'ótjen ch'án ntabárcø la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókujaḡaxín sín ch'án la kjuanchehe sín ch'án kixin chrókujaḡoxín ch'án ijnko kjuaxroan kixin á chaxín jehe ch'án tsíkixín ch'án tí tjen Dios.

² A ntá ch'ín Jesús na kjuátehe ch'án, ntáchro ch'án kixin:

—Jahará ntáchrórá kixin ijie ntá kónjín ó tsi ijnko yaon jína kixin kjátse nkajní.

³ La ntá nchítjen ntáchrórá kixin ijie la náxrjónhya kixin kjátse nkajní la tjenkáya tjuí. Méxra jahará ntoáhya tjenkayáxinrá. Ó nohará tjátsoanrá tí nkajní, a ntá tjátsoanhyará tí kjuaxroan sitónhen jie.

⁴ Tí sín jínahya la tí sín titekakonhya la tjanchia sín ijnko kjuaxroan jié. A ntá ts'ikonhyará í jnko kjuaxroan, jehó tí kjuaxroan kuēnte ch'ín Jonás mé ts'ikonrá —mé xíkaha ichro ch'ín Jesús.

Ntá kuítøhe ch'án sín la sákjuí ch'án.

Ch'ín Jesús ntáchro kixin chrókuitekakonhya sín tí nkehe tjako tí sín fariseo

(Mr. 8.14-21)

⁵ Ntá tí sín k'uájiko ch'ín Jesús mé k'uátøye sín ntayaon la ntá k'uitjáyēnhen sín tsíkikohya sín niøtja.

⁶ Ntá ntáchro ch'ín Jesús kixin:

—Chróóxakohanrá kixin tí xroan ts'ánkixin niøtjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kíchó sín ntachro sín kixin:

—Mé xíkaha ichro ch'án kixin tsíkikohyani niøtja —ichro sín.

⁸ Ntá kónohe ch'in Jesús kixin nkehe tí kjo sín kichó sín, ntá ntáchro ch'án kixin:

—¿Nkekuènté tjóra kixin chontahyará niotja? Jahará la intsíkoá tinchachónkirá tí janhan.

⁹ Jahará zá naxa tiénxinhyará la ko á xráxinkákonhyará tí in'ó niotja k'óxikayeheni kjóne tí in'ó mil chojni la ko á xráxinkákonhyará nkekjaín ntaxra kjuenájinrá tí nkehe tsíxehe?

¹⁰ La ko zá xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájinrá tí nkehe tsíxehe?

¹¹ A ntá ¿nkekuènté kixin kuiénxinhyará kixin janhan la jehya kuènte niotja tjénixja tió ntáxrjan kixin chróóxakonhanrá kixin tí xroan ts'ánkixin niotjé tí sín fariseo la ko tí sín saduceo? —mé xíkaha ichro ch'in Jesús.

¹² Na ntá kuiénxín sín kixin nixjahya ch'án kuènte tí xroan t'ánkixin niotja. Náhi. Tjenixja ch'án kixin chróóxakonhen sín kixin tí nkehe tjako tí sín fariseo la ko tí sín saduceo.

Chrónka ch'in Pedro kixin ch'in Jesús mé tí nkexro Cristo

(Mr. 8.27-30; Lc. 9.18-21)

¹³ Kjuíji ch'in Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elias, ichro sín. A ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'in Jesús kixin:

—¿A ntá jahará nkechrórá kixin nkexro tí janhan? —ichro ch'án.

¹⁶ A ntá ch'in Simón Pedro kjuátehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'in Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha.

¹⁸ Méxra ntáxrjan kixin jaha mé Pedro mé t'axrjexín kixin ijnko xro la chritaón tí xro mé sít'ána njnko la kjónté tí kjuachaxin kuènte kjuach'én la tsjachahya sinchek'itjáyan.

¹⁹ Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní síin kjuachaxin.

²⁰ Ntá ch'in Jesús mé k'uétuènen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

Ch'in Jesús chrónka ch'án kixin its'en ch'án

(Mr. 8.31—9.1; Lc. 9.22-27)

²¹ Ntá ch'in Jesús kjuankixin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etoan kuènte njnko la tí sín nchat'á tjetoan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyán sín ch'án kjánchó tí nixin yaon mé tsoxechón ch'án inaá.

²² Ntá ch'in Pedro mé kuakitsjenta ch'án tí ch'in Jesús la kjuankixin nixjehe ch'án ntáchro ch'án kixin:

—Kjá Dios tsjanjonhya kjuachaxin xikaha tsonhan Ìnchéni kixin jaha la xitjahya tsjasóte xikaha —ichro ch'ín Pedro.

²³ A ntá ch'ín Jesús mé kuinkátjá ch'án la nixjehe ch'án tí ch'ín Pedro, ntáchro ch'án kixin:

—Sátjia ntáha, Sátanas. Tjia téhya tí jaha tí nkehe tsonna. Jaha chrók'uinkakonhén tí nkehe tjinkaon Dios. Jaha tjenkayáxinhya éxi tjinkaon Dios. Náhi. Tjenkayáxian éxi tjenkayáxin chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntáchro ch'án kixin:

—Jnkojínrá tjinkáonrá tsochréhérá tí janhan la t'ichjánxin tsitohérá kaín tí nkehe tjaké asánrá, ntá sámará tí ntacruz kuéntará, a ntá tsochréhérá tí janhan.

²⁵ A ntá tí nkexro tjinkaon jehó sinchekaá asén la ts'itjáyan. A ntá tí nkexro chrókjuinçek'itjáyanxín asén kixin tinkáchónki sín tí janhan la tsaá.

²⁶ ¿A ntá nkehe tsonhen tí chrókjuacha ijnko chojni chróchónta kaín nkehe síin chjasintajni a ntá tí kjuachón chrókjuinçek'itjáyan? ¿Nkehe chrókjuenka chojni kixin chróchónta tí kjuachón?

²⁷ Tí Xjeen Dios K'óna Chojni tsikao ch'án tí kjuachaxin jié kuénte It'é ch'án tjen nkaya nkajni la kaín tí sín ángel tsikao ch'án na ntá tsjenkehe ch'án jnkojnko chojni nkexrí tí xra kjuich'e jnkojnko tí jehe sín.

²⁸ Chaxín xrjana kixin isorá tjeorá ntihi la naxa ts'énhyará naxa ts'ikonjiará kixin nkexrí tí kjuachaxin tsochónta tí Xjeen Dios K'óna Chojni tí tsikao ch'án kjuachaxin jié —ichro ch'ín Jesús.

17

*Ch'ín Jesús mé k'uixitóxin nkexrí tsjehe ch'án
(Mr. 9.2-13; Lc. 9.28-36)*

¹ Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'ujit'ótjen sín ijnko jna imá noi.

² Ntá ntiha tjejó sín ntá xríñahya k'uikon sín kixin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjákini tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan.

³ Na ntá xríñahya k'uikon sín itjen ch'ín Moisés la ko tí ch'ín Elías tjejóto sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kixin:

—Ìnchéni, jina kixin tjejóni ntihi. Tí tjinkávan la chrókjuich'énani iní nchia la mé ijnko kuéntá jaha la ijnko kuénte ch'ín Moisés la í jnko kuénte ch'ín Elías —ichro ch'án.

⁵ Ntá naxa tjenixja ch'ín Pedro na ntá xríñahya ikui ijnko tjuí imá t'inkaséyan kjuák'etja chrítaón tí jna tjejó sín. Ntá xríñahya chrikjan tí tjuí kuínhin sín itén ijnko nkexro nixja na mé ntáchro kixin:

—Tíhi mé xjanna. Imá tjuaha ch'án la ko chàna kixin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xikaha la ntá kjuítsínka sín nonte kixin imá chrakon sín.

⁷ Na ntá ch'ín Jesús mé kóchjina tí tjejó sín la kuákóxin sín ch'án la ntáchro ch'án kixin:

—T'áya chrakonhyará —ichro ch'án.

⁸ Na ntá xríñahya k'uikon sín kixin kohya ninkexró. Jehó ch'ín Jesús mé tjen.

⁹ Na ntá tí k'uúinkajinxín sín tí jnā ntá k'uetōan ch'ín Jesús, ntáchro ch'án k'ixin:

—Ninkexró chenkahyará tí nkehe k'uúkonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín k'ixin:

—¿Nkekuénté ntáchro tí sín maestro tjako tí ley k'ixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án k'ixin:

—Chaxín senó itsi ch'ín Elías k'ixin tsjasíyóxin ch'án kaín nkehe.

¹² Kjánchó ó xrjanka k'ixin chaxín ó kuí ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxi kóxrjinhín sín. Mé xíkaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xíkaha ichro ch'ín Jesús.

¹³ Ntá tí sín k'uájiko ch'án mé kónohe sín k'ixin ch'ín Jesús la nixja ch'án kuénte Juan Bautista.

Ch'ín Jesús mé kjuínchekitohe jína ijnko xjan t'aniáte

(Mr. 9.14-29; Lc. 9.37-43)

¹⁴ Ntá tió k'uúji sín tí síin nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'in ch'án nkayakon ch'án. La ntáchro ch'án k'ixin:

¹⁵ —Ínchéni, tikonóhéni k'ixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án ntā.

¹⁶ Ntá kjuíkəoni ch'án ntihi la tí sín xrikoá la kjuachahya sín kjuínchekitohe ch'án jína.

¹⁷ A ntá kjuátehe ch'ín Jesús ntáchro ch'án k'ixin:

—Jahará la chaxínhya tinkachónkirá tí janhan la imá tjásinrá jje. ¿Xá hasta nkesá tjínkaonrá naxā ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uetuēnhen ch'án tí nchakuen tí jínahya la ntá k'uaxrjexín tí nchakuen tí jínahya tí chánjan la tuénxín kuítóhe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín k'ixin:

—¿Nkekuénté k'ixin kjuachahyani kuakitsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús k'ixin:

—Jahará la kjuachahyará kuakítsjerá nchakuen tí jínahya k'ixin intsíkoá tinkachónkirá tí janhan. Chaxín xrjanka k'ixin tí chrókuinkachónkirá kaín asánrá kjónté intsíkoá éxi ijnko tje mostaza intsí la ntá chróntácherá tí jnā k'ixin: “Sátjixian ntihi la sátsjia ókjé”, chróchorá chróntácherá tí jnā la ntá tí jnā sáchrókjuixin ntiha. Mé xíkaha kaín nkehe chrókjuachará chrókjuich'erá tí chaxín tinkachónkirá tí janhan.

²¹ A ntá tí tsakítsjerá ijnko nchakuen tí jínahya la t'ichjánxin tsonixjehérá Dios la ko sintehyará.

Ch'ín Jesús chrónka ch'án inaá k'ixin its'en ch'án

(Mr. 9.30-32; Lc. 9.43-45)

²² Naxā k'uék'aji sín jnkokoá tí estado Galilea la ntáchro ch'ín Jesús k'ixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí síin chojni t'etōan sinchekjasóte sín ch'án

²³ la ts'óyán sín ch'án. A ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'in Jesús kjuenkā ch'án tí nkehe kjuanchia tí sín kuènte nínko

²⁴ Ntá tió kjuíji ch'in Jesús la ko tí sín k'uájiko ch'án tí chjasin Capernaum la ntá tí sín nchekjènkí kuènte nínko mé sákjuítsjehe sín tí ch'in Pedro la kjuanchankí sín kixin:

—Tí maestro kuèntá la, ¿a tjenkəhya ch'án tí nkehe tjanchia tí sín nchekjènkí kuènte nínko? —ichro sín.

²⁵ Ntá kjuátehe ch'in Pedro, ntáchro ch'án kixin:

—Kjá tjenkə ch'án —ichro ch'án.

Ntá k'uixenhen ch'in Pedro tí nchia la ch'in Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenkā tí nkehe tjanchia tí sín t'etəan chjasintajni, á tí sín kuènte ntiho ó á tí sín tsíkjixin ókjé? —ichro ch'in Jesús.

²⁶ Ntá kjuátehe ch'in Pedro, ntáchro ch'án kixin:

—Tí sín tsíkjixin ókjé mé tjenkə sín —ichro ch'án.

Ntá ntáchro ch'in Jesús kixin:

—A ntá tí sín chjasén sín la t'ichjánxinhya chrókjuenkā sín.

²⁷ Kjánchó tjínkəkonhya tsonínkaon ninkexró ntihi. La ntá sátsjia tí ntayaon sátsjikoá tí ichjən chóna gancho tséxin sín koche la ntaha itsé tí chjən chrínki ntayaon. Ntá tsákjé tí koche saxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenkə kain tí tjásikáha sín la ko tí tjásikehé sín jaha. Táha mé sátsjikoá tjènka —ichro ch'in Jesús.

18

¿Nkexro tí imá ts'etəan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'in Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etəan tí kjuachaxin kuènte nkaya nkajni? —ichro sín.

² Ntá ch'in Jesús mé k'uíyehə ch'án ijnko chánjan la kjuak'e jnkosiné tí tjejó tí jehe sín

³ la ntáchro ch'án kixin:

—Chaxín xrjanca kixin tí ts'ónahyará éxi ijnko xjan ntsí ntá xitjahya tsákjárá tí kjuachaxin kuènte Dios.

⁴ Tí jnkójín nkexro ts'óna éxi tí chánjan ihnkehya la mé antsí tjeətan ntiha.

⁵ A ntá tí nkexro ts'áyehə ijnko chánjan kixin tinkáchónki sín tí janhan la mé xikaha éxi chrók'uáyehə sín tí janhan —mé xikaha ichro ch'in Jesús.

Tí chojni tjasin jje mé tsjasóte sín

(Mr. 9.42-48; Lc. 17.1-2)

⁶ Tí jnkójín nkexro chrókjuachroe ijnko chánjan ntsí tinkáchónki tí janhan la íchá jina chrókjuincheteyá sín ch'án ijnko xro tsík'óna xrochre ntá chrókjuíakánki ch'án ntayaon nínka.

⁷ Imá náxrjónhya tjejó tí sín chjasintajni kixin siín nkehe tjasixín chojni jje. Xraxín la jehí siín, a ntá nòda tí nkexro tjasin tí nkehe tsjasixín chojni jje.

⁸ Tí itjá ó totá tjásixián jje na chrókójina chrókochrínjan chróchr'an ikjín kixin íchá jina chróchonta kjuachón kjónté it'oo itjá ó it'oo totá. Á ntá tí yóí itjá ó yóí totá chróchonta tsjásixián jje la tíha mé sátsjixián tí siche xrohi jnkochrín.

⁹ La ko kjaxin tí ikuan tjásixian jìe na chrókójina chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yóí ikuan chróchonta tsjásixián jìe la tíha mé sátsjixián tí síche xrohi jnkochríxín.

Kjuíncheyóexin ch'ín Jesús éxí ijnko kolélo tsík'itjáyán
(Lc. 15.3-7)

¹⁰ Chrókókjoniéhyará nijnko tí chánjan ntsínsí. Tjonkará kixin nkaya nkajní la tí sín ángel kuénte tí xjanntsí la xráxín tjejó sín tí tjen T'aná nkaya nkajní.

¹¹ Tí Xjeen Dios K'óna Chojni la mé ikuí kixin chrókjuinchekaá tí chojni xrichroe.

¹² 'Jahará nkechrorá? Ijnko chojni chóna ijnko ciento kolélo ntá chrók'uitjáyán ijnko va na zá chrókuítóehya ch'án tí noventa y nueve va tí jná ó a ntá á chrókjuikjeyáhya ch'án tí ijnko tí ko k'uitjáyán ní?

¹³ A ntá tí tsjacha ch'án ts'itja ch'án va ntá ántsí tsóchéhe ch'án kixin tí kolélo k'uitja ch'án la ntá kánhyó tsóchéhe ch'án kixin tjejó tí noventa y nueve ko tsík'itjáyánhya va.

¹⁴ Mé xikaha kjaxin It'éni tjen nkaya nkajní la tjinkakonhya ch'án kixin chrók'uitjáyán ninkexró kjónté ijnko chojni kánhyó tjetoan.

Chrók'uitjáyánhanrá tí jìe kjuasinhanrá kíchuárá
(Lc. 17.3)

¹⁵ Tí kíchuá tí chrókjuít'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jìe kjuasin ch'án. A ntá tí kjuacha nixjehé tí kíchuá la í kohya kjuanínkaon.

¹⁶ A ntá tí tahya ch'án kuentá nkechrua la ntá ntáche á jnko o yaá chojni sáttjikoá kixin tsinhin sín á chaxín titekakonhya ch'án.

¹⁷ A ntá tí kjónté xikaha naxá titekakuenhya ch'án sín la ntá chenka tí sín tsíkójnkotsé nkehe tí jìe kjuasin ch'án la ntá tí naxá titekakuenhya ch'án tí sín tsíkójnkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjènkí.

¹⁸ Chaxín ntáxrjan kixin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajní tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihi chjasintajni la kjaxin ntaha nkaya nkajní tsjanjon Dios kjuachaxin.

¹⁹ Kjaxin ntáxrjan kixin tí tjejó yaará ntihi chjasintajni la tí jnkokoá tjejótjenkayáxinrá chrókjuancheherá Dios ijnko nkehe tjinkáonrá la ntá jehe ch'án mé tsotjáhará ch'án.

²⁰ Kixin tí tjejó yaá o iy'á chojni tjejó jnkokoá t'ákjenxin sín níná la janhan koína tjéntaxian tí tjejó sín ntiha.

²¹ Ntá kóchjina ch'ín Pedro mé kjuanchankí ch'án ntáchro ch'án kixin:

—Ínchéni, ¿nkejaín veces chrók'uitjáyénhenni tí jìe kjuasin kíchó ní? ¿Á yato veces ó ní? —íchro ch'án.

²² Ntá kjuátéhe ch'ín Jesús, ntáchro ch'án kixin:

—Náhi, jehya yato veces ó. Náhi, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uitjáyénhya ch'án ijíé kíchó ch'án

²³ Tí kjuachaxin kuénte Dios la éxí yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra.

²⁴ Ntá kjuankíxín ch'án tsítsínkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon.

²⁵ Tí ch'ín a mé chónthahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetōan ch'án kixin tí nkexro a mé tsoxi ch'án la koí tí ichjién ch'án la ko xjeen ch'án la ko kaín nkehe kuènte ch'án kixin ntá xikaha mé tsoxenka kaín tí síká ch'án.

²⁶ A ntá tí nkexro ch'e xra mé kjuák'exín toch'in ch'án nkayakon tí rey la chrónóehē ch'án, ntáchro ch'án kixin: “Jaha Inchéni tikonóehéni la kjónté kjaxón tsjenkahani kaín tí síkáhani”, ichro ch'án.

²⁷ A ntá tí ch'ín rey kujikonóehē ch'án tí ch'ín a kjónté itsjé síká ch'án, ntá kuitōhe ch'án sákjuí.

²⁸ A ntá tí sákjuí tí ch'ín a ntá xrínahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: “¡Tsjénkana tí nkehe tjasíkana ní o náhí!” ichro ch'án.

²⁹ A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóehē ch'án ntáchro ch'án kixin: “Tikonóehéni ijie la kjónté kjaxón tsjenkahani kaín tí nkehe síkáhani”, ichro ch'án.

³⁰ A ntá jehe ch'án la kujikonóehya ch'án. K'uetōan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án.

³¹ Ntá tí í so sín ch'exón xra mé k'uíkon sín la ntá imá kóxakonhen sín la sákjuíchénka sín tí lámoé sín nkexrí kaá kónhen tí ch'ín síká.

³² A ntá tí lamo mé k'uetōan tsjik'íyehē sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuíntak'itjáyadhan tí nkehe tjasíkana kixin jaha chrónóana.

³³ A ntá jaha mé kjaxín chrókujikonóehé tí nkexro choxian éxí janhan kujikonóaha tí jaha”, ichro tí ch'ín lamo.

³⁴ A ntá imá kónínkaon tí lamo a la k'uetōan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

³⁵ A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajní xikaha sit'ahará jahará tí jehya kaín asánrá ts'itjáyadhanrá tí jje chóna kíchuará —ichro ch'ín Jesús.

19

Tjako ch'ín Jesús kuènte tí sín t'itjhi kíchó
(Mr. 10.1-12; Lc. 16.18)

¹ A ntá kjuixin nixja ch'ín Jesús kaín tíha, ntá sákjuixin ch'án estado Galilea la kjuíji ch'án estado Judea nó tóhe tí ntário Jordán.

² Ntá nchónhya chojni kjuíjichréhe sín ch'án ntá ntíha mé kjuínchekitohe ch'án jina tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á síin kjuachaxin tsjákehē jnkojín chojni ichjién kjónté kohya jje jíé? —Mé xikaha kjuanchankí sín.

⁴ Ntá kjuátehe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'ena kaín chojni síin chjasintajni tí xrankíxixín, la tí nkexro mé “kjuích'ena ch'án chojni ntoa ko chojni chjin”?*

* 19:4 19.4: Génesis 1.27; 5.2

⁵ La ko ntáchro kixin: “Mé xikaha tí chojni ntoa la tsítóhe sín it'é sín la ko iné sín la tsakja sín ichjién sín la yóí sín la éxí ó jnko chojni xikaha ts'óna sín.”†

⁶ Mé xikaha la í jehya yaá chojni tí jehe sín. Náhi. Ó jnko chojni k'óna tí jehe sín la mé Dios kjuanjon kjuachaxin kixin kuákja kichó sín, la í xitjahya ts'itjihi kichó sín.

⁷ Ntá tí sín fariseo mé kjuanchankíhi sín ch'an kixin:

—¿Ntá nkexrí kixin tí ch'in Moisés k'uetóan kixin ts'óna ijnko xroon tsakja tí ichjién kixin tsjákeexín kichó sín?‡ —ichro tí sín fariseo.

⁸ Ntá ntáchro ch'in Jesús kixin:

—A ntá jahará titekákonhyará. Méxra ch'in Moisés kjuanjon ch'an kjuachaxin kixin ts'óna tí xroon ts'itjéxín kichuárá. Kjánchó tí xrankixín la xikaha kónhen.

⁹ Méxra ntáxrjan kixin jnkojín sín tjákehe ichjién tí kjuasinhya jie, chóntahya tjan í jnko chojni, ntá kjuákehe ch'an tjan ntá tsakja ch'an í jnko chjin mé xikaha la ó jie tíha. La ko kjaxin tí ijnko chojni chjin tsikítsinkehe ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'in Jesús ntáchro sín kixin:

—Tí xikaha tjanjonko kichó sín chrók'uitjihi kichó sín la íchá jína chrókóteehya sín.

¹¹ Ntá ntáchro ch'in Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín.

¹² Siín iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuich'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'an xra. Tí sín tsjacha sich'e tíha la chrókjuich'e sín xikaha.

Ch'in Jesús mé kjuíncheyao ch'an chánjan

(Mr. 10.13-16; Lc. 18.15-17)

¹³ Ntá ikjui chojni kjuikao sín iso xjan kixin tjinkaon sín tsjak'etja tja ch'in Jesús chrítaón tí chánjan la sincheyao ch'an sín. Ntá tí sín k'uájiko ch'an mé kónínkakonhen sín tí sín kjuikao tí xjan.

¹⁴ A ntá ntáchro ch'in Jesús kixin:

—Nté tjtóherá tsoxrakoa xjan tí tjén janhan la t'inkakuènyará xjan kixin tí sín kuènte kjuachaxin nkaya nkajní la mé tóyóhé éxí tí jehe xjan —ichro ch'an.

¹⁵ Ntá kjuak'etja tja ch'an chrítaón tí xjan la ntá kjuixin ntá sákjuí ch'an ókjé.

Ijnko ch'in ntasoá rico mé kjuínixjehé ch'an tí ch'in Jesús

(Mr. 10.17-31; Lc. 18.18-30)

¹⁶ A ntá ijnko ch'in ntasoá sákjuítsjehe ch'an tí ch'in Jesús la kjuanchankíhi ch'an kixin:

—Jaha la ijnko Maestro jína. La ntá ¿nkehe jína chrókjuich'eni kixin chróhóntani kjuachón jnkochrixin? —ichro ch'an.

¹⁷ Ntá ch'in Jesús kjuátehe ch'an, ntáchro ch'an kixin:

—¿Nkekuénté ntáchrua kixin jína tí janhan? Jehó jnkokoqá nkexro la mé jína la tíha mé Dios. A ntá tí tjinkávan tsochonta kjuachón jnkochrixin la titekávan tí nkehe k'uetóan Dios —ichro ch'in Jesús.

¹⁸ Ntá ntáchro tí ch'in ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuènte ókjé chojni

¹⁹ la ko chrókjuikosáyehé it'á la ko iná la ko chrótjuéhé kichuá éxi tjuèxian asán.Š —mé xikaha ichro ch'ín Jesús.

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyan? —ichro ch'án.

²¹ Ntá ntáchro ch'ín Jesús kixin:

—Tí tjínkávan antsí ntoá sijnchexiteyá la sátjia sijnchekjia kaín tí nkehe chonta la sijnchekitqnhén tí sín nòda. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xikaha ntá t'ává ch'án sákjuí ch'án kixin imá itsjé nkehe chonta ch'án.

²³ Ntá ch'ín Jesús mé nixjehé ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chónta imá itsjé nkehe na imá xra ts'áyéhe sín tí kjuachaxin kuènte nkaya nkajní.

²⁴ Kjatée xrjanka kixin antsí xrahya chrók'uatsínka ijnko kocamello ijnko tjar'i ntachica tjexrja. A ntá antsí xra kixin tí sín chónta itsjé nkehe chrók'uáyéhe tí kjuachaxin kuènte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la ¿xá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'ín Jesús.

²⁷ Ntá ntáchro ch'ín Pedro kixin:

—Ínchéni, jeheni kaín ni la kuítqheni kaín nkehe chóntani kixin tsochréheni tí jaha. A ntá ¿nkehe ts'áyéheni? —ichro ch'án.

²⁸ Ntá kjuátehe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochónta kjuachaxin jié la ntá kjaxinrá jahará chréhérá tí janhan la ts'ejorá teyó trono sijnchekitqexínrá ijíe kaín tí sín tsik'axrjenixin tí teyó xjeen ch'ín Israel.

²⁹ La ko kaín tí sín kuítóhe sín ntqes sín la ko kuítóhe sín tí kichó sín la ko kuítóhe sín it'é sín o iné sín la ko kuítóhe sín ichjién sín la ko xjeen sín la ko nontee sín kixin tinkáchónki sín tí janhan, na ntá antsí má tsochónta sín la ko kjaxin tsochónta sín kjuachón jnkochrín.

³⁰ A ntá nchónhya tí sín t'etqan ijie, mé tsjixixín tsochréhe sín. A ntá nchónhya tí sín t'ituenhen ijie la tí sín a mé ts'etqan sín tí ntiha.

20

Ch'ín Jesús kjuíncheyóexin ch'án éxi tí sín ch'e xra

¹ Tí kjuachaxin kuènte Dios la éxi yóhe ijnko chojni chónta xra nontee ch'án la ntá ijnko yaon imá nchítjen sákjuikjeyá ch'án chojni tsotjéhe ch'án to uva.

2 Ntá tí k'uitja ch'án tí sín sich'ehe ch'án xṛa ntá ikjo ch'án sín kixin ijnko denario tsjenkehe ch'án sín tí xṛa sich'e sín nontee ch'án tí yaon a.

3 Ntá chr'éxin como las nueve nchítjen ntá sákjuí ch'án ntasin la k'uíkon ch'án í so sín tjejó ntasin chóntahya sín xṛa.

4 Ntá nixjehe ch'án sín ntáchro ch'án kixin: “Kjaxinrá sáchrókjuirá chrókjuich'erá xṛa nonteeni la jína chrókjuénkahaṛá”, ichro ch'án. La ntá jehe sín sákjuí sín.

5 A ntá tí inché nonte la sákjuí ch'án inaá chonkixin naṛa xik'itja ch'án í so sín ch'ehe ch'án xṛa la nta tí las tres kónjin la xikaha naṛa xik'itja ch'án í so sín inaá.

6 A ntá las cinco kónjin sákiki ch'án ntasin inaá la k'uitja ch'án í so chojni ntaha chóntahya sín xṛa la ntá kjuanchankíhi ch'án sín kixin: “¿Nkekuénté tjejórá ntíhi ch'ehyará xṛa kuenté yaon? —ichro ch'án.

7 Ntá ntáchro sín kixin: “Kohya nkexro kjuanjon xṛa chrókjuich'eni”, ichro sín. Ntá ntáchro ch'án kixin: “Kjaxinrá chrókjuirá chrókjuich'erá xṛa nonteeni la jína chrókjuénkahaṛá”, ichro ch'án.

8 A ntá ó kóntó ntá tí inché nonte mé nixjehe ch'án tí ch'ín t'etean sítónhen xṛa nontee ch'án la ntáchro ch'án kixin: “T'iyehé kaín tí sín kjuich'e xṛa tjenkehé sín. Tjankixian tjenkehé tí chojni kjuixixín k'uixenhen xṛa la chr'éxin tjenkehé tí sín saoxín k'uixenhen xṛa”, ichro ch'án.

9 A ntá kóchjina kaín tí sín k'uixenhen xṛa las cinco kónjin la jnkojnko sín k'uáyehé sín jnkojnko denario.

10 Ntá chr'éxin, tió kóchjina tí sín k'uixenhen xṛa nchítjen la ntá kjuenkayáxin sín kixin antsí itsjé chichaon chrókjuacha sín, ichro sín. Kjánchó kjaxin sín k'uáyehé sín jnkojnko denario ó.

11 A ntá tí kjuachahya sín tjete ntá kjuankixin sín kónínkakohen sín tí inché nonte

12 la ntáchro sín kixin: “Tí sín ikui kjuixixín la kjuich'e sín xṛa jnkokoá hora la ntá kjaxin kjuénkehé sín jnkokón éxi kjuacha tí jeheni. La ntá jeheni kjuich'eni xṛa kjónté sóa la kuenté yaon kjuich'eni xṛa”, ichro sín.

13 A ntá kjuátēhe tí inché nonte nixjehe ch'án ijnko tí jehe sín, ntáchro ch'án kixin: “Janhan la kjuít'ayahyará ninkehó. Ó kuitōexínni kixin ijnko denario tsjénkahaṛá tí yaon.

14 Ntá tsákjá chichakoan la sátjia. Janhan tjínkavan tsjénkaha tí sín k'uixenhen kjuixixín éxi tí kjuénkaha jaha.

15 ¿Á chontahya janhan kjuachaxin xikaha chrókjuénkaha sín kixin tíha la chichakonna? ¿Nkekuénté tóchjinoxínhan jaha kixin xikaha kjuénkaha sín?” ichro ch'án.

16 Mé xikaha iso tí sín tsjixixín chréhe sín la tí sín a senóxin ntíha la ntá itsjé tí sín senó la mé tsjixixín tsochréhe sín ntíha kixin nchónhya sín k'uíyaha kjánchó tsjéhya sín k'uitja —ichro ch'ín Jesús.

Chrónka ch'ín Jesús inaá kixin its'en ch'án

(Mr. 10.32-34; Lc. 18.31-34)

17 Ntá ch'ín Jesús sákjuí ch'án ntíja nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

18 —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí sín tí sín nchat'a t'etean la ko tí sín maestro tí tjako ley. Ntá jehe sín ts'etean sín kixin its'en ch'án.

¹⁹ Ntá tsjikaán sín ch'án tí síin chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkanı sín ch'án ijnko ntacruz kjánchó yaon níxin mé tsoxechón ch'án inaá —mé xikaha chrónka ch'ín Jesús.

Tí nkehe kjuanchia tí iné ch'ín Jacobo la ko ch'ín Juan
(Mr. 10.35-45)

²⁰ A ntá tí iné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóehé tjan ch'án.

²¹ Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátehe tjan ntáchro tjan kixin:

—Tió tsétoanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'án.

Ntá kjuátehe sín, ntáchro sín kixin:

—Kja tsjachani —ichro sín.

²³ Ntá ntáchro ch'ín Jesús kixin:

—Chaxín kjónté chrókjuachará chrók'uirá éxi tí nkehe itsjá its'ia la ko chrókuikiterá éxi tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajní mé nohe kixin nkexor tsikjeyá ch'án ts'áyéhe tíha —ichro ch'ín Jesús.

²⁴ Ntá kuínhin tí ite sín kixin xikaha tsikjanchia tí sín a ntá kónínkakohen sín tí yaá a.

²⁵ A ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'etóan chjasintajni la imá t'etúenhen sín kaín chojni la tí sín t'etóan imá nchehnkehe asén sín kixin ihyé sín t'etóan sín.

²⁶ Kjánchó jahará la xikahya chrókjuich'erá. Náhí. Tí jnkójnra tjinkáonra chrókuétoanra la chrókjuinkitsará tí í so sín.

²⁷ A ntá tí jnkójnra tjinkáonra chrókuétoanra mé t'ichjánxin senó chrókjuákoxinra chrókjuich'eherá kichuára xra.

²⁸ Mé xikaha tí Xjeen Dios K'óna Chojni mé kuihya kixin chojni chrókjuich'ehe xra. Náhí. Ikuí ch'án kixin sich'ehe ch'án sín xra la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitohe jína yaá chojni t'ikonhya
(Mr. 10.46-52; Lc. 18.35-43)

²⁹ Ntá k'uaxrjéxin sín chjasin Jericó la nchónhya chojni chréhe tí ch'ín Jesús.

³⁰ Ntá ntaha chrínta ntja tjejótxajin yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuankixin t'íyehé sín ch'án ntáchro sín kixin:

—Ínchéni, jaha tsík'axrjeníxian David, tikonóhéni —ichro sín.

³¹ Ntá nchónhya chojni mé ntáche sín tí sín t'ikonhya kixin:

—Tánírá tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

—Ínchéni, jaha tsík'axrjeníxian David, tikonóhéni —ichro sín.

³² Ntá ch'ín Jesús kjuák'echónhen ch'án ntá k'uíyehē ch'án tí sín t'ikonhya la kjuanchankíhi ch'án sín ntáchro ch'án kixin:

—¿Xá nkehe tí tjinkáonrá chrókjuít'ahará? —ichro ch'án.

³³ Ntá jehe sín kjuátehe sín ntáchro sín kixin:

—Jaha Ínchéni, tjinkaonni chrókjuínchek'ikuanni —ichro sín.

³⁴ Ntá ch'ín Jesús mé kuíkonóehē ch'án tí jehe sín la kjuínchekuákóxin tja ch'án tí ikon tí sín t'ikonhya. Ntá tuénxín k'uikon sín la chréhe sín tí ch'ín Jesús.

21

*K'uixenhen ch'ín Jesús chjasin Jerusalén
(Mr. 11.1-11; Lc. 19.28-40; Jn. 12.12-19)*

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jnā Olivo. Ntá ch'ín Jesús k'uetuenhen ch'án iyó tí sín k'uájiko ch'án

² ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehéra va ntá tsjúkuanará va ntihi.

³ A ntá tí jnkójin nkekro tsjanchankíhará nkekuénté tjasintankehéra va la ntá tsontáchorá kixin “Ínchéni t'ichjánxínhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjeherá ó kui tí ch'ín Rey kuéntará.

Ihnkehya ch'án la ijnko kolócho ó tjejken ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetōan ch'ín Jesús.

⁷ Ntá kjuíkao sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús.

⁸ Ntá itsjé chojni kuakitsje sín ka titsáte sín na kjuentoá sín ka tinkák'íkjinxín sín ka tí ntja ts'atsinkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntja a.

⁹ Ntá iso sín tsítaón ntja la ko í so sín chréhe iton ch'án mé kjuankixin sín itsje sín kixin:

—Tjancheheni kjuasáyé tí nkekro k'uaxrjenixin tí rey David. Jína tí nkekro kjuixín kjuachaxién ihnié Ínchéni. Tjancheheni kjuasáyé Dios —ichro sín itsje sín.

¹⁰ Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

—¿Xá nkekro tíhi? —ichro sín.

¹¹ La ntá nchónhya sín kjuátehe sín ntáchro sín kixin:

—Tíhi mé tí nkekro Jesús chrónka itén Dios kjuixín ch'án chjasin Nazaret estado Galilea —ichro sín.

*Ch'ín Jesús kjuínchetjóá tí nínko
(Mr. 11.15-19; Lc. 19.45-48; Jn. 2.13-22)*

* 21:5 Isaías 62.11; Zacarías 9.9

12 **A** ntá ch'ín Jesús mé k'uixenhen ch'án tí n̄nko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixin sín chichaon la ko tí silla tjejókjen tí sín nchekji kontóá.

13 La ntá ntáchro ch'án kixin:

—Tí xroon itén Dios tsikjin sín ósé mé ntáchro kixin: “Tí ntona imé it'in nchia tsonixjanaxian sín.” **A** ntá jahará tí nchia i tsikjich'énará itjueé xíchee† —mé xikaha ichro ch'ín Jesús.

14 Ntaha nkaxenhen n̄nko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jina.

15 **A** ntá tí sín nchat'á tjetóan la ko tí sín maestro tjako tí ley mé k'uikon sín kaín tí kjuaxroan kjuíuch'e ch'án la ko kuínhin sín kixin iso chánjan mé itsje sín nkaxenhen n̄nko ntáchro sín kixin: “Chjéheni kjuasáyé tí nkexro k'uaxrjenixin rey David”, ichro sín. Ntá kuínhin tí sín a xikaha ntá kónínkaon sín

16 la nixjehe sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchanki sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios?

La xikíhi chro:

Jaha kjuánjuan kjuachaxin kixin tí sín chánjan hyé la ko chánjan naxa tjejótaki mé tsotsje sín‡

—mé xikaha ichro ch'ín Jesús.

17 Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ok'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr. 11.12-14, 20-26)

18 **A** ntá tí kóyaon nchítjen ntá kjan sín chjasin Jerusalén ínaá la ikui sín ntja ntá ch'ín Jesús mé ik'uén ch'án kjinta.

19 Ntá k'uikon ch'án itjen ijnko nta t'óna to higo chjino ntja. La ntá sákjuitsjehe ch'án tí nta, ntá k'uikon ch'án kixin jehó ka itsa tí nta, naxa k'ónahya to. **A** ntá jehe ch'án mé nixjehe ch'án tí nta, ntáchro ch'án kixin:

—Í nunca ts'ónahya to ínaá —ichro ch'án.

Ntá tí nta t'óna to higo mé tuénxín xamá.

20 Ntá tí sín k'uájiko ch'ín Jesús mé k'uikon sín kixin xikaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkekuénté kixin tí nta t'óna to higo tuénxín xamá? —ichro sín.

21 Ntá kjuátehe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxin chrónixjehará tí jna i kixin: “Sátjixian ntíhi sátjijiankiá ntayaon”, la mé xikaha tsonhen.

22 Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin chónta ch'ín Jesús

(Mr. 11.27-33; Lc. 20.1-8)

23 Ntá kjuixin ntá ch'ín Jesús mé k'uixenhen ch'án tí n̄nko ntiha. Ntá tió tjetjako ch'án ntá kóchjina iso tí sín nchat'a t'etqan la ko tí sín táda judío t'etqan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátehe ch'ín Jesús ntáchro ch'án kixin:

—Ntá kjaxian janhan tsjánehánkíhará ijnko nkehe siná tsjateherá ntá janhan tsotjonkará nkehe tí kjuachaxin chonta tjét'a tí xrá i.

²⁵ ¿A ntá nkexro k'uetuēnhen ch'ín Juan kixin tsjikite ch'án chojni? ¿Á Dios ní ó á chojni ó? —mé kjuanchankí ch'ín Jesús.

Ntá jehe sín itjo sín kichó sín kixin:

—A ntá tí tsontáchroni kixin Dios tsík'etuēnhen tí ch'ín Juan ntá tsjanchankí tí ch'ín a kixin nkekuènté kuítekakuenhyani ch'án.

²⁶ A ntá tí tsontáchroni kixin chojni ó tsík'etuēnhen ch'án la ntá chrakōhēnni tí chojni kixin kaín sín kuítekaon sín kixin ch'ín Juan la nixja ch'án itén Dios —ichro sín.

²⁷ A ntá kjuátehe sín ntáche sín tí ch'ín Jesús kixin:

—Náhi, noehyani —ichro sín.

Ntá ntáchro ch'án kixin:

—La ko kjaxin janhan tsōxrjankahya nkexro kjuanjon kjuachaxin kixin tjét'a tí xrá —ichro ch'án.

Ch'ín Jesús mé kjuíncheyóexin ch'án kixin éxí yaá xjan

²⁸ Ntá ntáchro ch'ín Jesús kixin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehe ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nontēni”, ichro ch'án.

²⁹ Ntá kjuátehe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uixitoxin tí kjuenkayáxin ch'án la sákjuikjich'e ch'án tí xrá a.

³⁰ A ntá tí it'é xjan a mé kjuínixjehe ch'án tí í jnko xjan la jnkokón k'uetuēnhen ch'án la kjuátehe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uetuēnhen it'é? —ichro ch'án.

Ntá kjuátehe sín kixin:

—Tí xjan saó —ichro sín.

Ntá ntáchro ch'ín Jesús kixin:

—Méxrá chaxín tjōnkará kixin tí sín nchekjènkj la ko tí chojni chjin ch'iyehē nchónhya chojni ntoa la saoxín ts'ixenhen sín tí kjuachaxin t'etōan Dios la ntá jahará la náhi.

³² Kixin ch'ín Juan Bautista mé ikui ch'án kjuakōhará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjènkj la ko tí chojni chjin ch'iyehē nchónhya chojni ntoa mé kuítekaon sín. A ntá jahará kjónté xikaha k'uikonrá la kjuitoxiēnhyará tí tjenkayáxinrá la ko kuítekákōnhyará —ichro ch'ín Jesús.

Ch'ín Jesús kjuíncheyóexin ch'án kixin éxí chojni ch'e xrá la jínahya asén sín (Mr. 12.1-12; Lc. 20.9-19)

³³ Ntá ch'ín Jesús ntáchro ch'án kixin:

—Tsinhínrá ijnko nkehe sjntayóaxian. Éxí ijnko ch'ín k'uēnkaxin ch'án itsjé ntanoa t'óna to uva nontēe ch'án. Ntá kjuich'éna ch'án ijnko corral. La ko

ijnko tjo kjuich'ena ch'an tøyé kixin ts'énya sín ìnté to uva. La ko kjuich'ena ch'an ijnko tjat'o noi kixin ts'it'ótjen ch'an tsotsjehe ch'an nkuíxín.[§]

'A nta kjuínchekjen ch'an tí nontee ch'an iso tí sín ch'e xrā ntá kjuixin ntá sákjuí ch'an imá ikjín.

³⁴ A ntá tí kjuixraká tí yaon k'óna nkehe ntá jehe ch'an mé ichr'an ch'an iso tí chojni ch'ehe ch'an xrā kixin tsjikjanchehe sín tí sín ch'e xrā nontee ch'an kixin tsjanjon sín tí nkehe tsakja ch'an.

³⁵ A ntá tí sín t'ayakonhen tí nonte mé itse sín tí sín kjuíkjanchia tí nkehe la kjuate sín iso la ko í so la k'óyán sín la í so la ixro k'uichexín sín.

³⁶ A ntá tí ìché nonte a xích'an ch'an iso chojni ch'ehe ch'an xrā ínaá, a ntá tí sín ch'e xrā la kjaxin xikahó kjuich'ehe sín tí sín kjuíji.

³⁷ 'A ntá xikaha tsikónhen ntá kjuenkayáxin ch'an ichr'an ch'an tí xjeen ch'an, la kjá chróchóntehe sín kjuasáyé tí xjeen ch'an, ichro ch'an.

³⁸ A ntá tí k'uíkon tí sín ch'e xrā tí xjeen ch'an la ntá jehó sín kjuenkayáxin sín kixin: "Tí ch'in í mé ts'áyéhe ch'an kaín nkehe. Ts'óyánni ch'an kixin ntá tsitokoni kaín tí nkehe kuènte ch'an", ichro sín.

³⁹ Ntá itse sín tí xjeen ch'an ntá kuakitsjexín sín ch'an tí nonte ntaha ntá k'óyán sín ch'an —mé xikaha kjuako ch'in Jesús.

⁴⁰ Ntá kjuanchankíhi ch'in Jesús tí sín kóchjina, ntáchro ch'an kixin:

—Tió itsi tí ìché tí nonte a la, ¿nkehe sich'ehe ch'an tí sín ch'e xrā? —ichro ch'in Jesús.

⁴¹ Ntá kjuátehe sín kixin:

—Mé tsjiji ch'an la tsikonóehya ch'an tí sín jínahya la ts'óyán ch'an sín la tsjeyá ch'an ókjé chojni sinchekjen ch'an tí nonte a. Tsjeyá ch'an chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntáchro ch'in Jesús kixin:

—¿Á nunca kjuínchekuáxinhyará tí xroon itén Dios tsikjin sín ósé? Mé ntáchro xíkíhi:

Tí xro náxrjónhya kuítóenta tí sín ch'éna tjat'o,

a ntá mé jie k'óna tí xro tjetóan.

Mé xikaha kjuich'e Ìchéni Dios,

na ntá tíha mé ijnko nkehe kjuachrakon k'uíkonni.*

Mé xikaha ichro itén Dios.

⁴³ Ntá ntáchro ch'in Jesús kixin:

—Tjonkará kixin Dios tsakitsjahará tí kjuachaxin kuènte ch'an la ntá sinchek'áyéhe ch'an tí sín ch'e xrā jína.

⁴⁴ A ntá jnkojin nkexro tsjitsínka chrítaón tí xro í mé tsokuen ch'an la tí ts'ánótjen tí xro tsoxratja ijnko chojni la jehe sín ts'óna ìnche —mé xikaha ichro ch'in Jesús.

⁴⁵ Ntá tí sín nchát'á tjetóan la ko tí sín fariseo mé kuínhin xikaha kjuíncheyóexin ch'in Jesús ntá kienxín sín kixin kaín tí ntáchro ch'an kjuíncheyóexin ch'an kixin tí jehe sín xikaha tsónhen sín.

⁴⁶ La ntá tjinkaon sín chrókjuínchekjasóte sín ch'an kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'in Jesús la kuènte Dios.

22

Ch'in Jesús kjuíncheyóexin éxi ijnko kia kótehe sín

1 Ntá ch'in Jesús mé kjuankíxin nixja ch'án inaá la kjuíncheyóexin ch'án ntáchro ch'án kíxin:

2 —Tí kjuachaxin kuente Dios mé éxi yóhe ijnko ch'in rey kjuasin ch'án ijnko kia kíxin tsotehe xjeen ch'án.

3 K'uetuēnhen ch'án tí sín ch'ehe ch'án xṛa kíxin tsjik'íyehē sín tí sín kjueyá ch'án, kjánchó jehe sín mé tjinkakonhya sín tsochjina sín.

4 A ntá k'uetuēnhen ch'án inaá í so tí sín ch'ehe ch'án xṛa ntáchro ch'án kíxin: “Chenka tí sín ó k'uíyaha kíxin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanká la kaín nkehe la ó síchónhen. A ntá chróxrakoa sín tí síin kia”, mé xikaha k'uetōan ch'án.

5 A ntá tí sín tsík'íyehē ch'án mé ántosén sín. Ijnko sín la sákjuí nontēe la í jnko la sákjuí ch'án í jnko xṛa chóna ch'án.

6 La í so tí sín a mé tsísé sín tí sín tsík'etueñhen tí ch'in rey la k'óka tí sín a hasta ik'uén tí jehe sín.

7 Ntá tí ch'in rey mé kónínkaon ch'án ntá k'uetuēnhen ch'án tí sín soldado kíxin its'en tí sín kjuáya la ko tsoche tí chjasén sín.

8 Ntá nixjehe ch'án tí sín ch'ehe ch'án xṛa inaá ntáchro ch'án kíxin: “Kaín nkehe la ó síchónhen kíxin tí nkexro tsotehe la ntá tí sín k'uíyaha kuítekakonhya sín la kjuihya sín.

9 Méxṛa sátsjirá tí esquina tí ntja jíe la t'iyehérá kaín tí sín tsoxetará kíxin itsji sin tí kia”, ichro ch'án.

10 Ntá tí sín ch'e xṛa mé sákjuí sín la k'uíyehē sín kaín tí sín t'átsínka tí ntja ntíha, mé chojni jina la ko chojni jínaha hasta k'uixikaón chojni tí nchia ntíha.

11 Ntá tí ch'in rey mé kuitsjehe kaín tí sín tsík'íyehē ch'án la ntá k'uíkon ch'án ijnko ch'in ntíha chónahya ka jina kuente tí kia a.

12 La ntá nixjehe ch'án, ntáchro ch'án kíxin: “Amigo, ¿nkexrí k'uixenhen kíxin tsík'ítsahya kuente kié chojni tsotehe?” ichro ch'án. Ntá tí ch'in a kjuáteheya ch'án ninkehó.

13 A ntá tí ch'in rey mé k'uíyehē ch'án tí sín ch'ehe ch'án xṛa la ntáchro ch'án kíxin: “Sínchenteto toté la ko itja tí ch'in a la ité ntója sítié la nta ntíha a mé tsotsjánka ch'án la sinetaón ch'án neno ch'án.”

14 Ntá ntáchro ch'in Jesús kíxin:

—Nchónhya sín k'uíyaha la séhya sín k'uitja —mé xikaha kjuako ch'án Jesús.

*Ch'in Jesús ntáchro ch'án kíxin ó nchoxon tsjenkehe sín gobierno
(Mr. 12.13-17; Lc. 20.20-26)*

15 Ntá tí sín fariseo mé sákjuí sín ókjé la jnkokoá kjuenkayáxin sín kíxin tsjachaxín sín tí ch'in Jesús kíxin ách'e ichrén jie tsjasin ch'án la ntá tsjanchia sín jie.

16 Ntá ichr'án sín iso tí sín ch'ehe sín xṛa la iso tí sín ch'ehe tí ch'in Herodes xṛa kíxin tsjachaxín sín tí ch'in Jesús. Ntá tí sín a nixjehe sín ch'án ntáchro sín kíxin:

—Maestro, ó noheni kíxin tí nkehe ntáchrúa jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kíxin á jina sín.

17 A ntá jaha chronka nkehe tjenkayáxian. ¿Á jina chrókjuenkehēni tí gobierno romano o náhi? —ichro sín kjuanchankí sín.

18 Ntá ch'in Jesús kónohe ch'án kíxin ntoáhya tjenkayáxin sín ntá ntáchro ch'án kíxin:

—Jahará ntoáhya tjenkayáxinrá. ¿Nkekuènte chrókjuáchaxinráni?

¹⁹ Tjákonará tí chichaon tjenkehérá sín méhe —mé xíkaha k'uetōan ch'ín Jesús.

Ntá kjuikohe sín ch'án tí chichaon a.

²⁰ Ntá k'uikon ch'ín Jesús ntá kjuanchankí ch'án kixin:

—¿Nkexro tí tsík'axrxéjin tjenkáni tí chichaon méhe la ko nkexro ihnié chónhta? —ichro ch'án.

²¹ Ntá kjuátehe sín kixin:

—Tí ch'ín t'etōan mé tjenkáni ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobiernu t'etōan tí nkehe kuènte ch'án la kjaxin tí nkehe kuènte Dios la chróchjehérá Dios —mé xíkaha chro ch'ín Jesús.

²² Ntá tí kuínhin sín xíkaha la chrakon sín la komá sín ch'án ntá sákjuí sín.

Kjuanchankí sín kixin á tsoxechón chojni

(Mr. 12.18-27; Lc. 20.27-40)

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xíkaha chrókjuáchaxin sín ch'ín Jesús. Ntáchro sín kixin:

²⁴ —Maestro, tsintáchro ch'ín Moisés kixin tí its'en ijnko chojni la naḡa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxi xjeen tí ch'ín saó tsík'en.

²⁵ Ntá ntíhi k'uejó yato sín jnkokóá kichó sín. Ntá tí ch'ín saó kótehe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo.

²⁶ A ntá tí ch'ín yóxin ik'uén kjaxin la tí ch'ín nixin kuákja ch'án tjan la ntá xíkaha kónhen inaá. La kayatoé tí sín k'uéchónta sín tjan xíkaha kónhen sín káin sín ik'uén sín.

²⁷ A ntá kjuixixín ntá kjaxin tjan ik'uén tjan.

²⁸ Ntá tíó tsoxechón káin xín chojni tsík'en, ¿ntá nkexro ts'óna xii tí jehe tjan kixin kayatoé sín kótehe tjan? —mé xíkaha kjuanchankíhi sín tí ch'ín Jesús.

²⁹ Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios.

³⁰ A ntá tí chojni tsík'en tíó tsoxechón la tsóteehya sín la ko tsóteehya tí xjeen sín kixin tí sín tsík'en la éxi tí sín ángel kuènte Dios ts'ejó sín nkaya nkajní.

³¹ A ntá tí káin tí sín tsík'en tsoxechón, ¿á kjuinchekuáxinhyará nkehe ntáchro Dios? Jehe ch'án xíkíhi chro ch'án:

³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóhón —mé xíkaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjeotan

(Mr. 12.28-34)

³⁴ Ntá tí sín fariseo mé tsikójnkotsé sín tíó kónohe sín kixin nkehe chro ch'ín Jesús la ninkehó kjuátehehya tí sín saduceo.

* 22:32 Éxodo 3.6

³⁵ La ijnko tí sín maestro tjako tí ley mé tjinkaon ch'án chrókjuachaxín ch'án tí ch'ín Jesús. Ntá kjuanchankí ch'án kixin:

³⁶ —Maestro, ¿nkexéhe tí nkehe imá tjettoan kuènte tí ley? —ichro ch'án.

³⁷ Ntá ntáchro ch'ín Jesús kixin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuèntará.”†

³⁸ Mé tíha mé tí ley imá tjettoan la ko saoxín k'uettoan Dios tíha.

³⁹ A ntá tí nkehe yóxin la tóyóhe la mé ntáchro xíkíhi: “Chrótjuèhérá kíchuará éxí tjuèxinrá asánrá.”‡

⁴⁰ Tí iyó nkehe i la mé antsí tjettoan kuènte tí ley tsík'ettoan Moisés la ko tí nkehe kjuako tí sín k'uéchrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokoa tjejó sín

⁴² la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xíkíhi:

⁴⁴ Ìnchéni Dios ntáche tí Ìnchéni kixin:

“Tjak'e tjaná chjina ntíhó tséttoan,

tsjixinjian kaín xín tí sín nínkakonhan la tsjachahya sín ts'ettoan sín kixin jahvá mé tséttoan.”§

Mé xíkaha chro itén Dios.

⁴⁵ A ntá ¿xá nkexrí kixin Cristo chrók'óna xjeen David a ntá jehe ch'ín David kújkítexín ch'án Ìnché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuátéhe sín ninkehó la desde tí yaon a chrakon sín la í nínkehó kjuanchankíehya sín ch'án.

23

Ch'ín Jesús tjanchia jie tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés.

³ Méxra chrókjuínchexiteyéhérá kaín tí nkehe t'ettoan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín.

⁴ T'etuenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkítsa sín tí nkehe imá ye yamá chojni.

⁵ Ich'e sín kaín xín nkehe ḱixin tsotsjehe chojni. Tóxrjínjin sín tsjak'enkáni totjen sín la ko itja sín ijnko xroon ḱijnjin iton ts'ínixín itén Dios la tjinkaon sín iké sín síxinkáni nkehe tjákini.

⁶ Tjinkaon sín tsochóna sín silla jína ts'ejókjen sín sine sín tió sátsji sín tí síin kia la ko xritjeyá sín tí silla ąntsi náxrjón chrók'uejóya sín nkaxenhen njnko.

⁷ La ko tjinkaon sín ḱixin chojni chrókjuikosáyehe sín tsoxelata sín tí ntja la ko tjinkaon sín ḱixin tsontácho chojni ḱixin maestro tí jehe sín.

⁸ 'A ntá jahará la tjtóéhyará ḱixin tsontácho sín ḱixin maestro tí jahará ḱixin jehe sín la ko jahará la ó jnkokónrá, la jahará chontará jnkokoą Maestro la mé Cristo tíha.

⁹ La ntá chróntáchohyará ḱixin ninkexró mé it'ará ntihi chjasintajni ḱixin jahará la chontará jnkokoą It'ará mé itjen nkaya nkajni.

¹⁰ La ko jehe sín chróntáchohya sín ḱixin jefe tí jahará ḱixin jehó Cristo mé jefe.

¹¹ Tí nkexro ąntsi tsjinkjtsa iso chojni la jehe ch'án mé ąntsi t'etóan ch'án.

¹² Ḱixin tí nkexro ntácho ḱixin imá ijie la mé imá tsontsi. 'A ntá tí nkexro nchehnkehya la ąntsi tsojje.

¹³ 'Nòará tí jahará maestro tjàkorá tí ley la ko tí jahará chojni fariseo. Jahará la jnkójínxónhya tjenkayáxinrá. Jahará la t'ikjéherá tí puerta ts'ixenxín chojni tí kjuachaxin kuénte Dios ḱixin tjtóéhyará ts'ixenhen ókjé chojni. 'A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

¹⁴ 'Nòará tí jahará maestro tjàkorá tí ley la ko chojni fariseo. Jnkójínxónhya tjenkayáxinrá. Jahará takitsjeherá ntóe tí chojni tsikók'án la ntá isé nixjehérá Dios ḱixin ch'iyexínrá chojni ḱixin jína tí jahará. 'A ntá xikaha kjuich'erá jahará la ąntsi tsjasótiará.

¹⁵ 'Nòará tí jahará maestro tjàkorá tí ley la ko chojni fariseo. Jahará la jnkójínxónhya tjenkayáxinrá. Jahará sátjirá nonte la chrítaón ntayaon ḱixin tsjákohérá ijnko chojni tsinkáchónki xikaha tí tinkachónkirá la ntá tió kjuachará kjuachroerá sín la ntá jehe sín ąntsi má tsjasótéxin sín tí xrohi la kánhyó jahará.

¹⁶ 'Nòará tí jahará ḱixin tétóanrá ḱjánchó ntakótánrá. Ntáchorá ḱixin tí jnkójín chojni tsontácho ḱixin sinchexiteyá sín nkehe la t'ákjenxin sín tí njnko la ntá t'ichjánxinhya sinchexiteyá sín. 'A ntá tí tsontácho sín ḱixin sinchexiteyá sín nkehe la t'ákjenxin sín tí chica oro síin nkaxenhen njnko la ntá t'ichjánxin sinchexiteyá sín.

¹⁷ Imá lontjirá la ko ntakótánrá. ¿Á imá tjetoan tí chica oro o á imá tjetoan tí njnko ḱixin tí njnko mé kótjuáxin tí chica oro?

¹⁸ Kjaxin ntáchorá ḱixin: "Tí jnkójín chojni tsontácho sín ḱixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. 'A ntá tí tsontácho sín ḱixin sinchexiteyá sín nkehe la t'ákjenxin sín tí nkehe tjókehe sín Dios chrítaón tí altar la ntá t'ichjánxin sinchexiteyá sín tí nkehe tsintácho sín."

¹⁹ Imá lontjirá la ko ntakótánrá. ¿Á imá tjetoan tí nkehe tsochjehérá Dios o á imá tjetoan tí altar ḱixin tí altar mé tótjuáxin tí nkehe tsjánjonrá?

²⁰ Ḱixin tí nkexro tsontácho ḱixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhí. Kjaxin t'ákjenxin ch'án kaín tí nkehe síin chrítaón ntiha.

11 A ntá tí nkexro tsonáchro kixin sinchexiteyá ch'án nkehe la t'ákjenxin tí nínko la jehya t'ákjenxin ch'án nínko ó. Náhi. Kjaxin t'ákjenxin ch'án tí Dios itjen ntiha.

12 A ntá tí nkexro t'ákjenxin nkaya nkajni la ntá kjaxin t'ákjenxin sín tí trono kuente Dios la ko tí nkexro tjet'etqan ntiha.

13 'Nòará jahará maestro tjàkorá ley la ko jahará chojni fariseo. Jahará jnkójínxónhya tjenkayáxinrá. Jahará la chjehérá Dios ijnko ite parte kain tí kaxroan tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá tjetean kuente tí ley. Mé ntoá chrókjuenkayáxinrá la ko chrókjuikonóghérá kichuárá la ko chrókuinkachónkirá Dios. Tíhi la antsí tjetean chrókjuinchexiteyárá la kjaxin chrókuitoéhyará chrokujuich'erá tí í so nkehe.

14 Jahará la tétqanrá kjánchó ntakótánrá. Jahará la nchek'ankihirá kjónté ijnko kochjisen intsí chóna tí nkehe its'irá, a ntá ijnko kocamello kjónté ijie va la t'ínkará.

15 'Nòará tí jahará maestro tjàkorá ley la ko jahará fariseorá. Jahará la jnkójínxónhya tjenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsikaón kjuachee la ko jahórá tjinkáonrá chróchontará itsjé nkehe.

16 Jahará chojni fariseorá imá ntakótán jahará. Saoxín chrókjuinchetjóará tí nkehe nkaxenhen tí vaso la ko tí plato la ntá ó chrókótjóá tí chrítaón kjaxin.

17 'Nòará jahará maestro tjàkorá tí ley la ko chojni fariseorá. Jnkójínxónhya tjenkayáxinrá. Jahará la éxi yóhe ijnko tòye tsíxravá chojni, imá náxrjón tsjehe ntója, a ntá nkaxenhen mé tsikaón huéseó chojni tsík'en la ko kain nkehe tjuahya.

18 Mé xikaha tí jahará la tsjehe éxi chojni jína xikaha, a ntá jnkójínxónhya tjenkayáxinrá la ko jínahyará.

19 'Nòará tí jahará maestro tjàkorá ley la ko chojni fariseorá. Jahará la jnkójínxónhya tjenkayáxinrá. Jahará la kjuich'énará tjet'o náxrjón chrítaón tí tòye tsíxravá tí sín k'uékjako itén Dios ósé la ko nchek'ítsará tjet'o chrítaón tòye kuente tí sín jina asen.

20 La ntá ntáchrórá kixin tí chrók'uejorá tí k'uéjé tí sín tsík'axrjeníxinrá la ntá chrókjuínkítsahyará chrók'uén tí sín kjuako itén Dios.

21 Méxra xikaha jahórá ntáchrórá kixin chaxín tsík'axrjeníxinrá tí sín k'óyan tí sín k'uékjako itén Dios.

22 Méxra ijie la tjinkáonrá tsjixinhanrá tí xra kjuich'e tí sín tsík'axrjeníxinrá.

23 'Jahará la tsík'axrjeníxinrá konche. ¿Ntá nkexrí chrókuaárá kixin itsi tí tsjasótíará?

24 Méxra janhan mé tsétuanhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen nínko la ko tsochonkíhirá sín chjasin la chjasin.

25 Méxra jahará la yamárá tí jie kixin tí sín jína k'uitjixín ijnié senó. Méxra tsmará tí jie kixin ik'uén ch'in Abel, tí nkexro jína, la ko kain tí í so sín hasta ik'uén ch'in Zacarías, xjeen Berequías, tí nkexro k'oyáxinrá chjino tí altar.

26 Chaxín tjonkará kixin kain tí jie a mé yámá tí chojni síin ijie.

*Tsjánka ch'in Jesús
(Lc. 13.34-35)*

27 Ntá ntáchro ch'in Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuinkĩtsará. Nchónhya veces tjínkavan chrókójnkotsérá la chrók'uáyakonhánrá éxi ijnko cochiká mé t'ayakonhen xjeen va chrínki kanengee va mé xikaha tjínkavan chrók'uáyakonhánrá tí jahará. Kjánchó jahará la tjínkákonhyará xikaha.

³⁸ Ntá jie la Dios la tsítóhe tí jahará.

³⁹ Ntáxrjan kixin í ts'ikonhyará tí janhan inaá tsjixrakájia tí yaon tsontáchorá kixin: “Imá jína tí nkexro kuixin kjuachaxién ihnié ñchéni” —mé xikaha ichro ch'ín Jesús.

24

Chrónka ch'ín Jesús kixin ts'itjáyan tí nínko

(Mr. 13.1-2; Lc. 21.5-6)

¹ Ntá ch'ín Jesús k'uaxrxjén ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin ch'án chrótsjehe ch'án kixin náxrjón tsík'óna tí nínko a.

² A ntá ch'ín Jesús mé kjuátéhe ch'án kixin:

—Jahará zá tjejtsjehérá kaín tíha? Chaxín tjonkará kixin tsjixraká tí yaon ts'oya kuenté nínko. Nijnko xro ts'ejókjehya kichó kixin kaín tíha la tsqxíka —ichro ch'án.

Tí nkehe tsonhen tió tsjixixín

(Mr. 13.3-23; Lc. 21.7-24; 17.22-24)

³ Ntá sákjuí sín chrítaón tí jna Olivo la ch'ín Jesús kjuák'etjaxin ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsochronka nkesá tsonhen tíha. ¿Nkexrí tsoñoexínni tió ts'inka tí jaha la ko nkexrí tsoñoexínni tí itsi tí tsjixixín chjasintajni? —ichro sín.

⁴ Kjuátéhe ch'ín Jesús kixin:

—Tóxakonhanrá tjtóéhyará kixin ninkexró chrókjuít'áyahará.

⁵ Nchónhya chojni itsi sich'iyaxin ñina tsontácho kixin: “Janhan mé tí Cristo” tsixro sín, la sich'iyehé sín nchónhya chojni.

⁶ A ntá tió tsinhínrá tsontácho chojni kixin ó síin kjuanínkaon la ko ts'ixin kjuachrakon kixin tsjanjonko kichó sín la kjónté xikaha tsonhen la chrakonhyará. Ó jehí tsonhen tíha tí naxá ts'itjáyanyha chjasintajni.

⁷ Ijnko nación tsjanjonko í jnko nación la tsjanjonxin sín tí xra ts'etoan sín. La ko itsjé chjasin na tsqkjinta la ko tsoníhi chojni la ko ntihi la ntaha tsinki nonte.

⁸ Kaín tíha la ntá tsoxrankixixón tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjejó tí síxregé kixin sinchekjasótiará sín la ntá ts'oyánrá sín. La ko kaín xín chojni síin chjasintajni tsonínkakonhanrá sín kixin tinkachónkirá tí janhan.

¹⁰ Ntá tí yaon a la itsjé sín la tsítóhe sín tsinkáchónkihya sín tí janhan la ko tsonínkakonhen sín kichó sín la ko sinchekji kichó sín.

¹¹ Ntá itsi nchónhya chojni ntoáhya tsjako la ntá sich'iyehé sín nchónhya chojni.

¹² La ts'ixin nchónhya jie jínahya la ntá ts'ixin itsjé chojni tsotjuéhya sín kichó sín.

¹³ A ntá tí nkexro naxá tjejótinkáchónki tí janhan hasta tí tsjixixín la mé tsaá.

14 La ko tí itán jína chrónka nkexrí tjen tí kjuachaxin kuènte Dios la t'ichjánxìn tsinhin sìn kuenté chjasintajni, la tió tsjixin tsinhin sìn kuenté chjasintajni la ntá ó ts'ítjáyan chjasintajni.

15 'Ch'ín Daniel k'uéchrónka itén Dios mé tsíkjin ch'án kixin tsjixraká ijnko yaon tsjak'e ijnko nkehe jínahya nkaxenhen nínko tjóá.* Ntá jahará ts'ikonrá tíha. A ntá tí nkexro nchekuáxin mé tsiénxín nkehe tíha.

16 Ntá kaín tí sìn tjejó estado Judea tsochrin sìn jna sátsj sìn.

17 A ntá tí sìn tjejó chrítaón nchia ntóé sìn la í xitjahya tsakitsje sìn ninkehó.

18 Ntá tí tjejóch'e sìn xrá nontee sìn la kjá í tsokjanhya sìn tsjikakja sìn iké sìn.

19 Ntá nòa tí chojni chjin tjejóyá sìn la ko nòa tí sìn nchekakí xjan tí yaon a.

20 Chrókjuancheherá Dios kixin tí tsonhen tíha la chrókójehya nchakuen kin la ko chrókójehya tí yaon t'ók'éhe chojni.

21 Kixin tíha mé ijnko kjuachrakon imá ijíé la desde tí xrankíxixín chjasintajni la nunca xikahya kónhen.

22 Ntá tí chrók'uetóanhya Dios kixin tjoka ts'atsínka tíha ntá chrókuaáhya ninkexró. Ntá ts'etóan ch'án kixin tjoka ts'atsínka tí kjuachrakon jíé kixin jehe ch'án mé imá tjuèhe ch'án tí sìn tsíkjeýá ch'án.

23 Ntá tí tsontácho chojni kixin: “Tsjehé ntihi itjen Cristo”, o “Tsjehé ntiha itjen ch'án”, la ntá chrókuítekákuénhyará sìn.

24 Kixin ntá itsi iso sìn tsontácho sìn kixin Cristo tí jehe sìn la ko kjaxin itsi í so sìn ntoáhya tsjako la ko tsjasin sìn kjuaxroan jíé kixin tjinkaon sìn chrókjuich'iyehé sìn chojni kjónté tí sìn tsíkjeýá Dios.

25 Ó xrjanka senó nkehe tsonhen kixin tsonohará.

26 Méxra tí chróntácho sìn kixin: “Tsjeherá tí nteje ntiha tjen ch'án”, la ntá tsjihyará nó ntiha. Q tí chróntácho sìn kixin: “Tsjeherá ntihi tí cuarto mé tjen ch'án”, la chrókuítekákonhyará.

27 Méxra éxí tsjonkíxín la t'ikon chojni t'inkaséyanxín tí tjitoxin yaon hasta tsjatóxin yaon mé xikaha ts'ikon chojni tió itsi tí Xjeen Dios K'óna Chojni.

28 Mé éxí yóhé tí tjen ijnko cuerpo tsík'en la ntiha tsojnkotsé tí kontexjuen.

Tsokjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

29 'A ntá séhyó tí tsjixixín tí kjuachrakon jíé la ntá tí yaon la tsotie a ntá tí nitjó la í ts'inkaséyanxínhya. La ko tí konotsé la tsoxénjinxín nkajní la kjaxin kaín nkehe siín nkaya nkajní la sinkí.

30 La ntá ts'ikon chojni kixin nkajní tsjixín tí Xjeen Dios K'óna Chojni. La ntá kaín chojni chjasintajni tsochrakon sìn la tsotsjánka sìn la ts'ikon sìn kixin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsikáo tí kjuachaxin jíé.

31 Ntá tsochr'án Dios tí sìn ángel kixin ts'ánoa sìn tí trompeta itsen kixin tsqchjina kaín tí nkexro kjueyá Dios tsjixín kanqé lado chjasintajni.

32 'Chrók'uitjará nkexrí sjntayóaxian kuènte ijnko nta to higo. Éxí yóhé tió chóna tnahnté la ko ts'ixin kayoa la nta tsoñoaxínrá kixin í séhya tsokjan ichrin.

33 Mé xikaha tí ts'ikonrá ts'atsínka kaín tíha la ntá xikaha tsoñoaxínrá kixin í séhya itsi Ìnchéni.

* 24:15 Daniel 9.27

34 Ntá tjonkará chaxín kixin kaín tíha senó tsonhen tí naxá ts'enhya tí chojni síin jie.

35 A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la nunca ts'itjáyanhya tsoxiteyá tíha.

36 Á ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajní noehya sín la ko ni tí Xjeen Dios noehya. Ó jehó tí It'é mé nohe.

37 Éxí yóhe tí nkehe kónhen tí yaon k'uekjak'e ch'ín Noé mé xikaha tsonhen tí tsokjan tí Xjeen Dios K'óna Chojni.

38 Tí naxá titjiéhya sín ntá la kaín chojni la jína k'uejó sín la kjóne sín la ko ik'uí sín la ko sítótehe sín kjuixrakája tí yaon k'uixenhen ch'ín Noé ntabarco.†

39 A ntá jehe sín mé kienxínhya sín hasta kuijia tí k'uániá chrin ntá ikui ntá la k'uátjoá kaín sín. Mé xikaha tsonhen tió itsi tí Xjeen Dios K'óna Chojni.

40 A ntá yaá chojni ntoa tjejóch'e sín xra nonte la ntá ijnko la sátsji la í jnko la tsitóhe.

41 La ko yaá chojni chjin mé tjejó't'o sín la ijnko la sátsji la í jnko la tsitóhe.

42 Chrók'uejotsjehérá kixin noahyará nkehora la ko nkesá ts'inka janhan.

43 Chrókónohará tíhi: tí chrókónohe ijnko ìché nchia nkehora tie chrókjui ijnko nkexro tseé la ntá chrókjuak'echónhen tí ìché tí nchia ntá xitjahya ts'ixenhen tí nkexro tjinkaon chrókueé.

44 Méxra jahará la jína chrók'uejorá kixin tí Xjeen Dios K'óna Chojni me titàya itsi.

Tí nkexro jina ch'e xra la tí nkexro ch'ehya xra jina

(Lc. 12.41-48)

45 Tí nkexro chaxín ch'e xra jina la ko imá nohe la ntá tí lámoe ch'án ts'etuenhen kixin ts'ayakonhen ch'án tí sín síin ntøe ch'án la ko tsjanjon ch'án nkehe sine sín chintji tí hora a.

46 Náxrjón tjen tí nkexro ch'e xra tió itsi tí lamo la ts'ikon kixin xikaha tjenchexiteyá ch'án tí xra k'uítuenhen ch'án.

47 Chaxín tí lamo la tsjanjon ch'án kaín tí xra chóna ch'án ts'etøan tí ch'ín a.

48 A ntá ijnko chojni ch'ehya xra jina la ntá tsjenkayáxin ch'án kixin kjá tjokahya tsokjan tí lámoe ch'án

49 la ntá tsjankíxin ch'án tsjanjonko ch'án tí í so sín ch'e xra la ko tsjankíxin sineko ch'án la ko its'ikao ch'án kaín tí sín sítókoan.

50 Ntá xrinahya tsokjan tí lamo ijnko yaon la ko ijnko hora noehya tí nkexro ch'e xra.

51 La ntá jehe ch'án la sinchekjasóte tí ch'ín kuitóhehe xra kjuínchexiteyáhya la ts'etøan ch'án kixin tsjasóte tí ch'ín a éxí tí sín jnkojínxónhya tjenkayáxin. Ntá ntiha la tsotsjánga ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

1 Ntáchro ch'ín Jesús kixin:

—Tí kjuachaxin kuènte Dios mé éxí yóhe ite sín tjarisoá sátsji tí tsotøe chojni chuénko linterna tjía aceite la sákjuíchónhen sín tí ch'ín tsíkótehe.

2 In'ó sín la tsikóyaxienhya sín la in'ó sín ó tsikóyaxínhin sín.

³ Tí sín tsíkóyaxíenhya na kjaxin la tsíkijjiko sin linterna kjánchó tsíkijjikohya sín aceite tsíkja inaá.

⁴ A ntá tí sín tsíkóyaxínhin la sátsíkjiko sín xr_o tjia aceite la ko tí linterna kuente sín.

⁵ A ntá tí ch'ín tsíkótehe la tjokahya kui ch'an la ntá jehe sín mé tsíkhi sín kotáchrín la tsík'ejójuu sín kaín sín.

⁶ A ntá kuichjina k'áxrótjen la kuínhin sín t'eya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'an”, ichro ch'an.

⁷ A ntá kaín tí sín tjarisoá la k'uàya sín la kjuasiyóxin sín tí linterna kuente sín.

⁸ A ntá tí in'ó sín tsíkóyaxíenhya la nixjehe sín tí sín in'ó tsíkóyaxínhin ntáchro sín kixin: “Chjehéni intsi aceite kuentará kixin ó k'uànká aceite tjia linternéni”, ichro sín.

⁹ A ntá tí sín tsíkóyaxínhin mé ntáchro sín kixin: “Náhi, tí aceite tí xikaha tsjanjonni intsi jahará la antsí jeheni la tsjachahya. Íchá jína sáttjik'énará tí sítoxín ntiha”, ichro sín.

¹⁰ Ntá tí in'ó tí sín kóyaxíenhya mé sákjuik'ena sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuiko sín ch'an tí kia tsíkótehe sín la ntá ó tuéxín k'uikjéhe tí puerta.

¹¹ Ntá chr'éxin ikui tí in'ó sín tjarisoá tsíkóyaxíenhya la t'ínka sín puerta ntáchro sín kixin: “Ó kuini takitjehé nchia.”

¹² A nta jehe ch'an kjuátehe ch'an ntáchro ch'an kixin: “Chaxín tí jahará la ní chonhyará”, ichro ch'an.

¹³ Ntá ntáchro ch'ín Jesús inaá kixin:

—Méxr_a xikaha tí jahará chrók'uejótsehérá kixin noahyará nkeyaon la nkehora itsi tí Xjeen Dios K'óna Chojni —ichro ch'an.

Ch'ín Jesús kjuíncheyóexin ch'an kuente chichaon

¹⁴ Ntá ntáchro ch'ín Jesús kixin:

—Tí kjuachaxin kuente Dios la yóhe ijnko chojni tjinkaon sáchrókjui ch'an í jnko nación la ntá k'uúyehé ch'an tí sín ch'ehe ch'an xr_a la ntá chjéhe ch'an sín tí chichaon a kixin ts'ayakonhen sín.

¹⁵ Ijnko ch'an la k'uáyéhe ch'an in'ó mil chichaon, la í jnko la k'uáyéhe ch'an iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'an nkexro tí tsjacha sich'e jnkojnko xr_a. Ntá jehe ch'an tió kjuixín kjuanjon ch'an la ntá sakjuí ch'an ikjín.

¹⁶ Ntá tí nkexro k'uáyéhe in'ó mil chichaon la kjuích'eko ch'an xr_a tí chichaon kuákja ch'an la kjuacha ch'an í jnko in'ó mil.

¹⁷ Kjaxin tí nkexro k'uáyéhe iyó mil chichaon mé xíkja ch'an í jnko iyó mil.

¹⁸ A ntá tí nkexro k'uáyéhe ijnko mil chichaon mé sákjuí ch'an la kjuích'ena ch'an ijnko tòye kjuavá ch'an tí chichaon kuente lámogé ch'an.

¹⁹ A ntá nchónhya nánó k'uátsínka la ntá ikjan tí lámogé sín kixin ntá tsjen-toáko sín ch'an cuenta.

²⁰ Saoxín kui tí nkexro k'uáyéhe tí in'ó mil la chjéhe ch'an tí lamo í jnko in'ó mil la ntáchro ch'an kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'an.

²¹ Ntá tí lamo mé ntáchro kixin: “Nchoxon tí xikaha. Jaha la ijnko chojni jína ch'e xr_a. La ó kjuínchexiteyá jína. Kjónté jehya xr_a jíé la kjuínchexiteyá jína la ntá tsotjaha ijnko xr_a antsí jíé la tjak'e tsöchéheni.”

22 Ntá chr'éxín ikui tí nkexro k'uáyéhe iyó mil la ntáchro ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án.

23 La ntá tí lamo ntáchro kixin: “Nchoxon jaha mé ijnko nkexro jína ch'e xra la ó kjuínchexiteyá. Kjonté jehya xra jíé la kjuínchexiteyá jína la ntá tsotjaha í jnko xra antsí jíé. Tjak'e tsochéhèni”, ichro ch'án.

24 A ntá ikui tí ch'in k'uáyéhe ijnko mil la ntáchro ch'án kixin: “Ó nòna kixin ijnko chojni imá jiehe tí jaha la ítjaa tí nonte jehya jaha k'uénkaxian la tsákjá nkehe kjónté k'uénkahya.

25 Méxra chrakonni la sákjuikjak'emáni tí chichaon chrínki nche. Tákjá chjchakqan tjinhin”, ichro ch'án.

26 A ntá kjuátehe tí lamo kixin: “Jaha ijnko chojni jínahya la ko séhe. Jaha la ó noha kixin chrótjaa tí nonte k'uénkahya la chrókuákjaa tí nkehe k'uénkahya.

27 A ntá tí chichaon chróchr'an banco. Ntiha chrókjuich'exín xra ntá tí ikjan janhan ntá chrók'uayáha antsí itsjé chichaon chrókjuacha kichó chica”, ichro tí lamo.

28 A ntá nixjehe ch'án tí í so sín tjejó la ntáchro ch'án kixin: “Takitsjehérá tí mil chóna ch'án la chjehérá tí nkexro chóna tí ite mil chichaon

29 kixin tí nkexro kjónté itsjé chóna la mé ts'áyéhe antsí la ntá tí nkexro chónahya la kjónté tí intsi chóna la ts'axrjehe.

30 A ntá tí nkexro ch'ehya xra la tsétuènhén sátsji ch'án tí sítie ntója la ntá ntiha la tsotsjánka ch'án la ko sinetaón ch'án neno ch'án.”

Tsitqéxín ijíé chojni chjasintajni

31 A ntá tí tsi tí Xjeen Dios K'óna Chojni la tsikao ch'án kjuachaxièn jíé éxi ijnko Réy la ko tsikao ch'án kaín xín tí sín ángel ntá ntaha tsjak'etjaxin ch'án tí trono ts'etqanxín tí kjuachaxièn jíé.

32 Ntiha kaín xín tí chojni tsikjixin nkuixín nación tsochjina tí tjen ch'án la jehe ch'án tsakitsjekjan ch'án ijnko la í jnko. Éxi ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí kotèntso la ókjé ts'ixin.

33 Méxra ts'etqan ch'án kixin tí kolélo la ts'ixin nó tja ch'án chjina, a ntá tí kotèntso la nó tí tja ch'án kjon.

34 Ntá tí Rey tsonixjehe tí sín tjejó tja ch'án chjina tsontáchro kixin: “Xrákirá jahará tí tjen kjuachaxin kuènte T'aná kixin T'aná ó kjuíncheyaonrá ch'án. Tí naxa kjuích'enahya Dios chjasintajni la xráxín kjuenkayáxín ch'án xikaha tsonhen.

35 Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uia, la k'uájia éxi ijnko chojni kjuixin ikjín la jahará kjuánjonrá nketí k'ok'ána.

36 La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjeherá tí janhan, la kjuak'échjina la ntá jahará kjuasántsjeherá tí janhan.”

37 A ntá tí sín jína la tsjanchankí sín kixin: “Ínchéni, ¿nkesá k'uíkoni kixin ik'uén kjinta ntá kjuanjoni nkehe kjónte? ¿La nkesá k'uíkoni kixin ik'uén ntá la kjuanjoni nkehe ik'uia?

38 ¿La ko nkesá k'uíkoni kixin ikjín kjuixian ntá kjuanjoni nketí k'ok'áha? ¿La ko nkesá k'uíkoni kixin chontahya iká la kjuanjoni ika k'uítsa?

39 ¿La nkesá k'uíkonní kixin kóniha o kjuák'echjina la ntá kjuíjitsjeheni tí jaha?" mé xíkaha tsjanchankíhi sín ch'án.

40 A ntá tí Rey tsontáchro kixin: "Tió kjuínkĩtsará ijnko kichó ni kjónté ijnko chojni nóé la mé yóhē kixin tí janhan chrókjuínkĩtsará."

41 A ntá tí Rey t'etōan mé tsonixjehē tí sín tjejó nó tja ch'án kjon tsontáchro kixin: "Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuènte ch'án.

42 Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uaia.

43 K'uájia éxí ijnko nkexro kjuixín kjín la jahará kjuánjonhyará nketí k'ók'ána la ko k'uéchontahya kaná la jahará kjuánjonhyará ka chrók'uitsa la ko k'uénina la kjuak'échjina la jahará kjuasántsjeahará tí janhan."

44 Ntá tí jehé sín la tsjanchankí sín kixin: "Ínchéni, ¿nkesá k'uíkonní kixin ik'uén kjinta la ik'uén ntá la ko kjuixian kjín la ko chontahya iká la ko níha la ko kjuák'echjina? ¿Mé nkesá k'uíkonní xíkaha la ntá kjuínkĩtsahyani tí jaha?" tsixro sín.

45 La ntá tí Rey tsjatēhe ch'án tsontáchro ch'án kixin: "Tí xíkaha kaín tíha kjuínkĩtsahyará ijnko chojni imá nóé la éxí xíkaha kjuínkĩtsahyará tí janhan."

46 A ntá tí sín jínahya xíkaha kjuich'e la mé sátsjixin sín ntíhi tsjasóte sín jnkochrín. A ntá tí sín jína la sátsji sín ts'áyēhe sín kjuachón jnkochrín —mé xíkaha chrónka ch'ín Jesús.

26

Tí sín nínkakonhen ch'ín Jesús tjenkayáxin sín kixin nkexrí ts'óyán sín ch'án (Mr. 14.1-2; Lc. 22.1-2; Jn. 11.45-53)

1 Ntá kjuixin chrónka ch'ín Jesús kaín tíha, ntá nixjehē ch'án tí sín k'uájiko ch'án, ntáchro ch'án kixin:

2 —Jahará ó nohará kixin t'itjáyán iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etōan ntá tsjak'enkani sín ch'án ijnko ntacruz —ichro ch'ín Jesús.

3 Ntá tí sín nchát'á t'etōan la ko tí sín maestro tjako tí ley la ko tí sín táda kuènte tí sín judío mé kójnkotsé sín tí ntásin kuènte tí nchia kjuák'e ch'ín Caifás tí ch'ín nchát'á t'etōan.

4 Ntaha tjenkayáxin sín kixin nkexrí tsotsé sín ch'ín Jesús la ts'óyán sín ch'án.

5 A ntá ntáchro sín kixin:

—Tí siín kia la chrótséhyaní ch'án kixin imá tsónínkaon tí chojni —ichro sín.

Ijnko tjan kjuikao aceite xraxé kuikite tjan ikja ch'ín Jesús (Mr. 14.3-9; Jn. 12.1-8)

6 Ch'ín Jesús tjen chjasin Betania ntōe ch'ín Simón tí ch'ín k'uéchónta chinlepra.

7 Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuikaón aceite xraxé náxrjón la imá tjete k'uíte. A ntá tí tjene ch'ín Jesús ntá tí tjan a mé kuikite aceite ikja ch'án.

8 A ntá tí sín k'uájiko ch'ín Jesús mé k'uíkón sín xíkaha ntá kónínkaon sín la ntáchro sín kixin:

—¿Nkekuènté kóxénhen tí xroan a?

9 Íchá jína chrókóxixin itsjé chichaon tí xroan ntá tí chichaon a chrókjuinkĩtsa tí sín nóé a —ichro sín.

10 Ntá kuínhin ch'ín Jesús tí nkehe tjo sín, ntá ntáchro ch'án kixin:

—¿Nkekuènté t'antaxínhínrá tí tjan i? Ó nchoxon ijnko nkehe jína kjuíuch'e tjan.

11 Tí sín nóè la ó xráxín ts'ejókoará sín, a ntá janhan la jnkochríxínhya ts'ejóni.

12 Tí nkehe kjuíuch'e tjan mé kjuíncheka tjan aceite xraxé tí cuerpo kuèntana la mé xikaha kjuáqoxín tjan kixin xikaha tsoxravána.

13 Ntá chaxín tjonkará kixin kuenté chjasintajni tió tsjako sín tí tán jína tsaáxin sín ntá tsochrónka sín kixin xikaha kjuíuch'e tjan ntá tsoxraxinkakonxín sín kixin nkehe tí kjuíuch'e tjan —ichro ch'ín Jesús.

Ch'ín Judas kjuínchekeji tí ch'ín Jesús

(Mr. 14.10-11; Lc. 22.3-6)

14 A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehé ch'án tí sín nchat'á t'etóan

15 la ntáchro ch'án kixin:

—¿Nkekjaín tsochjinará tsoxrjanka nketí tjen tí ch'ín Jesús? —mé xikaha chro tí ch'ín Judas.

Ntá tí sín nchat'á t'etóan kjuenkehe sín ch'án treinta chichaon plata.

16 Ntá tuénxín tí hora tí ch'ín Judas mé xritjeyá ch'án nkexrí tsochéntka ch'án sín nketí tjen tí ch'ín Jesús.

Kjuixixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

17 Ntá ikui tí yaon xrankixixín kia sine sín niotja tsíkjhohya tí xroan t'ánkixin niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kixin:

—¿Ínchéni, nketí tjinkávan sincheyaxíxinni tí sineni tí kia pascua? —ichro sín.

18 Ntá ntáchro ch'án kixin:

—Sátsjirá Jerusalén la tsjasánrá ntóe ijnko ch'ín la nixjehérá ch'án tsochtáchorá kixin: “Ntáchro Maestro kuènténi kixin í séhya naxa tsjak'e ch'án la ntá ijie ntóa ntihi tsoyaxíxin kixin sineko ch'án tí sín xriko ch'án tí kia pascua”, tsixrorá —mé xikaha ichro ch'ín Jesús.

19 A ntá tí sín k'uájiko ch'ín Jesús mé kjuínchexiteyá sín la kjuíncheyaxíxin sín ntiha tí nkehe sine sín kia pascua.

20 Tió ntá kóntó la ntá ch'ín Jesús k'uéjóko tí teyó sín k'uájiko ch'án kjóne sín.

21 La ntá tió naxa tjejóne sín la ntáchro ch'ín Jesús kixin:

—Chaxín tjonkará kixin jnkojínrá tjejórá ntihi mé sinchekjirána —ichro ch'án.

22 Ntá kaín sín la kjuankíxin kóxakonhen sín k'uává sín la ntá kjuankíxin sín jnkojnko sín kjuanchankíhi sín tí ch'ín Jesús kixin:

—Ínchéni, ¿á jeheni ní? —ichro sín.

23 Ntá kjuátehe ch'ín Jesús kixin:

—Tí nkexro tsochr'ánkíkian niotja tí plato a mé tí nkexro a mé sinchekjina ch'án.

24 Tí Xjeen Dios K'óna Chojni xikaha tsjasóte ch'án éxí nixja xroon itén Dios, a ntá nóa tí ch'ín sinchekji ch'án. Íchá jína chrókokjéhya ch'án —mé xikaha ichro ch'ín Jesús.

25 Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'ín Jesús kixin:

—Méxra xikaha tsintáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'ó ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tihí mé cuerpo kuéntana —ichro ch'án.

²⁷ Na ntá kuákja ch'án ijnko vaso tjia ínté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá

²⁸ Kixin tihí mé jnina mé chrónkaxín ijnko nkehe nixin tsonhen. Mé tí jnina ts'tjiti na mé tsjacha tsjinkitsa nchónhya chojni kixin ts'ljmáxin ijje sín.

²⁹ Tjonkará kixin ts'íhya janhan tí ínté to uva ínaá tsjixrakájia tí yaon ts'ayàjia kjuachaxin kuente T'aná ntá xik'ini ínté to uva ínaá —mé xikaha ichro ch'ín Jesús.

Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuí sín tí jna Olivo.

³¹ Ntá ntáchro ch'ín Jesús kixin:

—Jahará tsítónaráni kaín rá ijje tie kixin ntáchro tí xroon itén Dios kixin: “Its'en tí nkexro Pastor t'ayakonhen kolélo ntá kaín tí ko mé tsjichroe va.”*

³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátéhe ch'ín Pedro ntáchro ch'án kixin:

—Kjonté kaín sín tsítóha sín ntá janhan la náhi —ichro ch'án.

³⁴ Ntá ntáchro ch'ín Jesús kixin:

—Chaxín tsoxrjanka kixin tí tie i naxa tsotsjehya kochínto a la ó sinchemána níya —ichro ch'án.

³⁵ Ntá ntáchro ch'ín Pedro kixin:

—Kjonté koína its'én la sintamáhya tí jaha —ichro ch'án.

La ntá kaín tí sín k'uájiko ch'án na xikaha ichro sín kaín sín.

Ch'ín Jesús chrónóge ch'án It'é ch'án tí tjen ch'án tí Huerto Getsemani

(Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemani. Ntá jehe ch'án mé ntáchro ch'án kixin:

—Tjejorá ntiho ntá janhan sátsjia tsonixjaha T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankixin kóxakonhen ch'án la ko k'uává ch'án.

³⁸ Ntá ntáche ch'án tí iy'á sín kixin:

—Imá t'ává asenná éxi its'én ntá ts'axrje asenná. Ntá jahará ntiho tsitohará ts'ejotsjehekoarána —ichro ch'án.

³⁹ Ntá sákjuí ch'án antsí kjinxin ntá kjuák'exín toch'in ch'án k'uísén ch'án hasta caxin kja ch'án nonte ntá chrónóge ch'án It'é ch'án tjen nkaya nkajni, ntáchro ch'án kixin:

* 26:31 Zacarías 13.7

—It'eni, tí tjinkávan chrókjuínchekaáni kixin chrók'uihyani tí nkehe tsjá tjía tí copa i. Kjánchó jehya éxí tjinkaonni jeheni. Náhi. Éxí tjinkávan jaha —ichro ch'án.

⁴⁰ Ntá ikjan ch'án tí kuitōhe sín la ó k'uikon ch'án kixin tjejóua sín. Ntá nixjehē ch'án tí ch'ín Pedro ntáchro ch'án kixin:

—Xá xitjahya chrók'uejósjehekoarána ijnko hora.

⁴¹ Titohará tjejtsjehérá la nixjehérá Dios kixin tsjinkitsará ch'án kixin chrókjuachroehyará ch'ín Tsochren. Asánrá tóxrjínhín kjánchó tí cuerpo chon-tará la imá ntá —mé xikaha ichro ch'ín Jesús.

⁴² Ntá sákjuí ch'án yóxin inaá chrónóehē ch'án It'é ch'án, ntáchro ch'án kixin:

—Jaha It'eni tí xitjahya tsjakjýan tí nkehe tsjasótexinni la ntá tjinkaonni éxí jaha tjinkávan —mé xikaha ichro ch'án.

⁴³ Ntá ikjan ch'án la k'uikon ch'án tjejóua tí sín k'uájiko ch'án inaá kixin tjiehya sín kotáchrin.

⁴⁴ Ntá kuitōhe ch'án sín inaá la nixin sáxíkji ch'án ntá ó xikahó xínixa ch'án inaá.

⁴⁵ Ntá kjan ch'án tí k'uejó sín la ntáchro ch'án kixin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án.

⁴⁶ Ntá ijie t'inkatjenrá sátsjini kixin ó kjuí tí ch'ín sinchekjina —ichro ch'án.

Sákjuiko sín tí ch'ín Jesús tsjak'echjina ch'án ntōechiso

(Mr. 14.43-50; Lc. 22.47-53; Jn. 18.2-11)

⁴⁷ Ntá naxā tjenixa ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuikao ch'án nchónhya chojni kjuíjiko sín chica espada la ko inta. Na mé kjuachaxién tí sín nchat'á t'etōan la ko tí sín táda kuente tí sín judío mé kui sín.

⁴⁸ Ntá ch'ín Judas, tí ch'ín kjuínchekji, mé tsíntáchro ch'án kixin:

—Tí ch'ín tsakíha tuēen ch'án na mé tsoñoaxínrá kixin jehe ch'án. Ntá itserá ch'án —mé xikaha tsíntáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehē ch'án ntáchro ch'án kixin:

—¿Á jina tjen, Maestro? —ichro ch'án.

Ntá kjóneko ch'án kochíto.

⁵⁰ Ntá kjuátehe ch'ín Jesús, ntáchro ch'án kixin:

—Amigo, á ó k'uinka tí xra tjinkávan s'ich'e?

Ntá xikaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án tatsjon ijnko tí sín ch'ehe tí nchat'á t'etōan xra.

⁵² Ntá ntáchro ch'ín Jesús kixin:

—Chr'axenhén tje chica espada méhe. Kaínxín tí sín tjāyaxín chica espada la xikaha ts'enxín sín.

⁵³ ¿Á noahyará kixin janhan jina chrókjuáncháha T'aná la ntá tuénxín chróchr'án ch'án teyó ejército sín ángel?

⁵⁴ Kjánchó tí xikaha chrókónhen la chróxitēyáhya éxí nixja xroon itén Dios kixin itén Dios mé chrónka kixin t'ichjánxín ó jehí xikaha tsoñhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsotserána éxi chrótsérá ijnko síchee xikaha. A ntá kaín yaon kjuak'é nkaxenhen nínko kjuákua ¿na ntá nkexrí ntiha mé tsexinhyarána?

⁵⁶ Kjánchó Jehí kaín tíha tsonhen kixin tsoxiteyá tí chrónka tí sín tsíkjin xroon itén Dios ósé —ichro ch'án.

Mé xikaha ntá kaín tí sín k'uájiko ch'in Jesús na mé kuitqhe sín ch'án, ntá sákjuí sín.

Ch'in Jesús kóchjina ch'án tí síxré t'etoan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'in Jesús la sákjuíko sín ch'án ntqe ch'in Caifás, tí nchat'á t'etoan. Ntaha mé tsikójnkotsé kaín tí sín maestro tjako tí ley la ko tí sín t'etoan kuente nínko.

⁵⁸ Ntá ch'in Pedro ikjín tinkáchréhe ch'án ntá kjuíji ch'án tí ntasin ntqe tí nchat'á t'etoan la kjaxin k'uixenhen ch'án tí ntasin la kjuák'eko ch'án tí sín policia kuente nínko kixin tsotsjehe ch'án nkerí tsonhen.

⁵⁹ Ntá tí sín nchat'á t'etoan la ko tí sín táda la ko kaín tí sín t'etoan mé kjueya sín nkexrí ts'eka sín jie tí ch'in Jesús kixin jina chrók'óyan sín ch'án.

⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó testigo ntoáhya chrónka sín

⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuente Dios la ntá iní yaon koá la ó tsjaké inaá”† —mé xikaha chro sín.

⁶² Ntá tí nchat'á t'etoan k'uínkatjen la kjuanchankíhi ch'án tí ch'in Jesús, ntáchro ch'án kixin:

—¿Nkekuenté tjáteéhya ninkehó? ¿Á chaxín xikaha tsintáchrua éxi xikaha ichro sín? —ichro ch'án.

⁶³ Ntá ch'in Jesús la táníkoá ch'án nixjahya ch'án. Ntá ntáchro tí nchat'á t'etoan kixin:

—Kjuachaxiéni ihnié tí Dios tjechón t'akjénxian chroonka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátqhe ch'in Jesús ntáchro ch'án kixin:

—Éxi tí ntáchrua jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chóna kaín xín kjuachaxin la ko ts'ikuan itjuí mé tsixin ch'án nkaya nkajíní —ichro ch'in Jesús.

⁶⁵ Ntá kuínhin tí nchat'á t'etoan la ntá imá kónínkaon ch'án ntá kótséchej ch'án tí iké ch'án la ntáchro ch'án kixin:

—Tí ch'in a k'uántaxínhin ch'án Dios kixin xikaha nixja ch'án. Méxra t'ichjánxinhya í so chojni tsochrónka. La ntá jahará la ó kuínhínrá kixin nkexrí nixja ch'án.

⁶⁶ ¿A ntá jahará la, ¿nkechorá? —mé ichro tí nchat'á a.

Ntá kjuátqhe sín ntáchro sín kixin:

—Chóna ch'án jie la chrók'uen ch'án —ichro sín.

⁶⁷ Ntá iso sín la kuíkite sín ntqte sín nkayakon ch'án na í so sín na kjuate sín ch'án la í so la chjéhe sín ikon ch'án.

⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

† 26:61 Juan 2.19

Ch'in Pedro kjuínchemá ch'án kixin chónhya ch'án tí ch'in Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'in Pedro naxa tjetjaxin ch'án tí ntasin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xrikoa tí ch'in Jesús tsikjixin estado Galilea —ichro tjan.

⁷⁰ A ntá ch'in Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrúa —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uikon tí jehe ch'án la nixjehe tjan kaín sín tjejóntaxín, la ntáchro tjan kixin:

—Tí ch'in i la kjaxin k'uájiko ch'án tí ch'in Jesús tsikjixin chjasin Nazaret —ichro tjan.

⁷² Ntá ch'in Pedro kjuínchemá ch'án inaá, k'uákjenxin ch'án ihnié Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'éxin tí sín k'uejóntaxín kóchjinehe sín ch'in Pedro la ntáchro sín kixin:

—Chaxín jaha kjaxin jnkojín tí sín a kixin tjátsoanxínni tí nixja jaha —ichro sín.

⁷⁴ Ntá k'uákjenxin ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xrínahya itsje kochíntoa.

⁷⁵ Ntá ch'in Pedro mé xraxinkaon ch'án kixin nkexrí chrónka ch'in Jesús senó kixin: “Naxa tsotsjehya kochíntoa mé ó tsjixin sijnchemána nía kixin chonhyana.”[‡] Ntá xíkaha xraxinkaon ch'in Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

27

Kjuikénhen sín ch'in Jesús tí ch'in Pilato

(Mr. 15.1; Lc. 23.1-2; Jn. 18.28-32)

¹ Ntá tí kóyaon k'uínkaséyan ntá kaín sín nchat'á t'etoan la ko tí sín t'etoan kuènte tí sín judío kjuenkayáxin sín nkexrí ts'óyán sín tí ch'in Jesús.

² Ntá tjechronteto ch'án sákjuiko sín ch'án tí tjen tí ch'in Poncio Pilato, tí ch'in gobernador romano.

Ik'uén ch'in Judas

³ Ntá tí ch'in Judas, tsíkjinchekji ch'in Jesús, mé k'uikon ch'án kixin ts'óyán sín tí ch'in Jesús. La ntá xraxinkaon ch'án tí jie kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjehe ch'án tí sín nchat'á t'etoan la ko tí sín táda.

⁴ La ntá ntáchro ch'án kixin:

—Ó kjuasinni jie kixin kjuínchekjini ijnko nkexro tjóá —ichro ch'án.

A ntá jehe sín kjuátehe sín kixin:

—Ntá janhanna la nonahyana tíha. Tíha la ó jie kuènta —ichro sín.

⁵ Ntá ch'in Judas mé sákjuík'e tí chichaon nkaxenhen nínko ntá sákjuí ch'án kjuísik'á isin ch'án nta.

⁶ Ntá tí sín nchat'á t'etoan kjuenájin sín tí chichaon la ntáchro sín kixin:

—Tí chichaon la kóxixín ijníe chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'énaxín sín ijnko nonte it'in Nontee Tí Ch'in Ch'éna Nchésen kixin tsochónta sín nketí tsoxravá tí chojni tsikjixín ikjín.

⁸ Mé xikaha kjuínchek'in sín tí nonte mé Campo Kuènte Jní la hasta ijie la naxa xikaha nchek'in sín.

⁹ Mé xikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'in a),

¹⁰ la k'ueñaxín sín tí nonte kuènte tí ch'in ch'éna nchésen kixin xikaha kjuínchexiteyá sín tí nkehe k'ueñaxína Ìnchéni.”*

Ch'in Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'in Jesús sákjuiko sín ch'án nkayakon tí ch'in gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'in Jesús, ntáchro ch'án kixin:

—Éxí ntáchrua jaha —ichro ch'án.

¹² Na ntá tí sín nchát'á t'etóan la ko tí sín táda t'etóan t'eka sín jie tí ch'in Jesús kjánchó la ch'in Jesús la ninkehó kjuáteheya.

¹³ A ntá ch'in Pilato kjuanchankí ch'án kixin:

—¿Á kiénhya kaín tí jie t'eka sín tí jaha? —ichro ch'án.

¹⁴ Kjánchó ch'in Jesús la ninkehó kjuáteheya ch'án. Ntá tí ch'in gobernador la chrakon ch'án.

K'uetóan sín kixin its'en ch'in Jesús

(Mr. 15.6-20; Lc. 23.13-25; Jn. 18.38—19.16)

¹⁵ A ntá tí kié pascua mé kuènten tí ch'in gobernador kixin jnkojnko nánó taksjéxin ch'án nteochiso ijnko chojni tjechjina. Ntá tí chojni mé tsjanchia sín nkexro tí tsitóhe ch'án sátsji.

¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás.

¹⁷ Ntá itsjé chojni kójkotsé la ntá ch'in Pilato mé kjuanchankí ch'án kixin:

—¿Nkexro tjinkáonrá ts'atjánta, á tí ch'in Barrabás o á tí ch'in Jesús nchek'in sín Cristo? —ichro ch'án.

¹⁸ Kixin tí ch'in Pilato la ó nohe ch'án kixin kjuachjínqxínhin chóna tí sín kjuíkaán tí ch'in Jesús.

¹⁹ Ntá jehe ch'án naxa tjetjixin ch'án tí nchekitoexixin ch'án ijie chojni la ntá tí ichjién ch'án mé k'ueñenhen tjan ijnko chojni tsjíchénka ch'án kixin tsjiatéheya ch'án tí nkexro jina kixin kóntó náxrxónhya k'uíkonxín tjan kotáchién tjan kixin tí jehe ch'án.

²⁰ A ntá tí sín nchát'á t'etóan la ko tí sín táda t'etóan a mé nixjehe kaín tí chojni tsikóchjina kixin chrókjuanchia sín kixin chrókuítóhe ch'án tí ch'in Barrabás sáchrókjui, a ntá ch'in Jesús mé chrók'uen.

²¹ A ntá tí ch'in gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

* 27:10 Zacarias 11.12-13

Ntá kjuátēhe sín ntáchro sín kixin:

—Ch'in Barrabás mé chrók'uatjánta ch'án —ichro sín.

²² A ntá ch'in Pilato mé kjuanchankí ch'án kixin:

—¿A ntá nkehe sít'ahá tí ch'in Jesús tí ch'in nchek'inrá Cristo? —ichro ch'án.

Ntá kaín sín kjuátēhe sín kixin:

—¡Tsjak'enkáni ch'án ntacruz! —ichro sín.

²³ Ntá ch'in Pilato kjuanchankí ch'án ntáchro ch'án kixin:

—¿Xá nkehe tí kjuích'e tí ch'in i kixin? —ichro ch'án.

Ntá antsí má itsen k'uixite sín, k'óyako sín, ntáchro sín kixin:

—¡Tsjak'enkáni ch'án ntacruz! —ichro sín.

²⁴ Ntá ch'in Pilato k'uikon ch'án kixin í kohya tsjitóxinhin sín tsjenkayáxin sín la antsí má k'uixité sín, nínkaon sín, la ntá kjuanchia ch'án xrakao sín inta, la nkayakon kaín tí sín tsikójnksé ntaha k'onti ch'án tja ch'án. La ntáchro ch'án kixin:

—Janhan tsámáhya jie tí its'en tí nkexro í chóntahya jie. Jahará xikaha tjinkáonrá tsonhen —ichro ch'án.

²⁵ Ntá kaín sín kjuátēhe sín kixin:

—Jeheni la ko xjeenni mé yámáni tí jie tí its'en tí nkexro í —ichro sín.

²⁶ Ntá ch'in Pilato kuitōhe ch'án kixin sáchrókui tí ch'in Barrabás. Ntá tuénxín k'uetōan ch'án kixin tsjate sín tí ch'in Jesús la ntá kjuínchek'áyéhe ch'án tí sín tsjak'enkáni sín ch'án ntacruz.

²⁷ A ntá tí sín soldado a mé sákjuiko sín tí ch'in Jesús tí palacio kuente tí ch'in gobernador. Ntaha kójnkséxin kaín tí sín soldado romano la k'uántatjen sín tí jehe ch'án.

²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié.

²⁹ La kjuak'enkaya sín kja ch'án ijnko corona tsíkijch'éna sín ntach'í la ko kjuanjon sín ijnko nta vara kixin tjenkáya tja ch'án chjina. La ntá k'uéjóxin toh'in sín nkayakon ch'án la kjuanoá sín ch'án, ntáchro sín kixin:

—Jnkochrín tsjak'é tsétuēhén tí sín judío —ichro sín.

³⁰ La ko kjaxin ntaté sín kuikite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án.

³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxin. Ntá sákjuiko sín ch'án kixin tsjak'enkáni sín ch'án ntacruz.

Kjuák'enkáni ch'in Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuixin sín ntiha la xéta sín ijnko ch'in kjuixín ch'án chjasin Cirene, mé it'in ch'án Simón. Ntá k'uetuēnhen sín ch'án kixin tsámá ch'án tí ntacruz tsjak'enkáni ch'in Jesús.

³³ Ntá kjuíji sín ijnko tjo it'in Gólgota na mé nkívee sín t'axrjéxin Nta Hueso Kja Chojni Tsík'en.

³⁴ Ntá chjéhe sín ch'in Jesús xranvino tsík'ixinkíjkanxín xroan tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkáni sín ch'án tí ntacruz ntá tí iké ch'án kjuich'exín sín suerte kixin nkexro tsakja. Mé xikaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuich'exín sín tí kaná.”†

† 27:35 Salmo 22.18

³⁶ Ntá tí sín soldado ntaha k'u'éjóna sín t'ayakonhen sín ch'án.

³⁷ Ntá kjuak'enkanı sín tí ikja tí ntacruz ijnko ntachiso ntáchro kíxin: “Ch'ín Jesús mé tí ch'ín Rey t'etuēnhen tí sín judío.”

³⁸ Kjaxin yaá tí síchee k'u'éjóyáni sín ntacruz ijnko la nó tja chjina la í jnko la nó tja kjon.

³⁹ Ntá tí sín tinkák'atsínka mé kjuanoá sín ch'án tinkátjá kja sín

⁴⁰ la ntáchro sín kíxin:

—Jaha ntáchrua kíxin chrók'oxíka tí nínko a ntá íní koá yaon la ó chrókjuixin chrókjuich'ena inaá,‡ ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxíán tí ntacruz méhe —ichro sín.

⁴¹ La ntá kjaxin tí sín nchat'á t'etōan la ko tí sín maestro tjako tí ley la ko tí sín fariseo la ko tí sín k'uetōan kuēnte nínko kjuanoá sín ch'án, ikjo sín kíchó sín kíxin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuēnte Israel ntá jehó ch'án chrókjuinkajinxín ch'án asén ch'án tí ntacruz kíxin ntá kjaxinni chrókuitekaonni tí jehe ch'án.

⁴³ Jehe ch'án tsíntáchro ch'án kíxin Dios tjinkítsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kíxin tsíntáchro ch'án kíxin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxínhín sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkíxin hasta las tres kónjín mé k'uíxin tie chjasintajni.

⁴⁶ Ntá tí hora a ch'ín Jesús itsen k'uèya ch'án, ntáchro ch'án kíxin:

—Elí, Elí, ¿lama sabactani? —mé tíhi t'axrjexín kíxin: It'éni, It'éni, ¿nkekuénté kuitohéni?§ —mé xíkaha ichro ch'án.

⁴⁷ Ntá iso sín tjejóntaxín kuínhín sín ntá ntáchro sín kíxin:

—Tí ch'ín a mé t'íyehē tí ch'ín profeta Elías —ichro sín.

⁴⁸ Ntá ijnko ch'ín kuínká ch'án sákjuikakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjinjin ntá kjuínchechrìn ch'án kíxin chrók'ui ch'ín Jesús.

⁴⁹ Ntá í so sín ntáchro sín kíxin:

—Nté títōhé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án inaá, ntá kjuixin ik'uén ch'án.

⁵¹ Mé ntá tuénxín k'uíchje tí ka tjenkákúenxín nkaxenhen nínko. Mé k'uíchje tí ka k'óna yaá tí kjuankíxín noi hasta nonte. La ko kuínkí nonte la ko tí tjo la kjaxin xitjehe.

⁵² La ko ó xitjehe tí tòye tsíxravá chojni la ko ó xechón itsjé tí sín k'uékinkáchónki Dios.

⁵³ Kaín tí sín a mé k'uaxrjexín sín tí tòye, la tíó kjuixin xechón ch'ín Jesús ntá k'uíxehen sín tí chjasin tjóá mé chjasin Jerusalén la ntaha itsjé chojni k'uíkon kíxin xíxechón tí sín a.

⁵⁴ Ntá tí ch'ín capitán la ko tí sín k'u'éjóko ch'án, mé tí sín t'ayakonhen ch'ín Jesús, na ntá k'uíkon sín kuínkí nonte la kaín tí í so nkehe la ntá imá chrakon sín, la ntáchro sín kíxin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ikjín tjejó sín, tjejótsjehe sín. Jehe sín k'uékinkáchréhe sín ch'ín Jesús tí kjuixín ch'án estado Galilea kixin mé ntiha kjuankixín sín k'uékjinkitsa sín ch'án.

⁵⁶ Ntaha kjaxin tjen tjan María Magdalena la ko tjan María, iné tí ch'ín Jacobo, la ko ch'ín José la ko tí iné tí xjeen tí ch'ín Zebedeo.

Ntá xrává ch'ín Jesús

(Mr. 15.42-47; Lc. 23.50-56; Jn. 19.38-42)

⁵⁷ Ntá tí ó ntá kóntó ikui ijnko ch'ín it'ín José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús.

⁵⁸ Ntá tí ch'ín José sákjuítsjehe ch'án ch'ín Pilato kjuíkjanchia ch'án tí cuerpeé tí nkexro Jesús. Ntá ch'ín Pilato mé kjuanjon ch'án kjuachaxin.

⁵⁹ Ntá ch'ín José mé kuákja ch'án tí cuerpo ntá kjuínchek'isimá ch'án ijnko ka tjóá.

⁶⁰ Na ntá kjuak'enkaya ch'án ijnko tòye nixin kuènte ch'án kixin senó tsíkjh'éna ch'án. Ntá ijnko xro jié k'uíkjèxin ch'án tí ntója tí tjo, ntá kjuixin ntá sákjuí ch'án.

⁶¹ Ntaha kjuák'e tí tjan María Magdalena la ko í jnko tjan María tjejótxajin sín ntoí chok'èxin tjen tòye.

Tí sín soldado k'uáyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín ncha'tá t'etóan la ko tí sín fariseo sákjuítsjehe sín tí ch'ín Pilato

⁶³ la ntá ntáchro sín kixin:

—Ó xraxinkaonni kixin tió naxa kjuák'echón tí nkexro kjuích'ia la tsintáchro ch'án kixin ts'atsínka iní yaon ntá tsoxechón ch'án inaá, tsíchro ch'án.

⁶⁴ Méxra tsétuènhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhi, la kjá tie itsi tí sín k'uájiko ch'án la tseé sín tí cuerpo kuènte ch'án la ntá chr'èxin tsochénska sín chojni kixin ó xíxechón tí nkexro a, mé xikaha sich'ia sín. La ntá tí xikaha sich'e sín antsí má sich'ia sín que tí xrankixín —mé xikaha ichro sín.

⁶⁵ Ntá ntáchro ch'ín Pilato kixin:

—Ntíhi tjejó soldado. Sátsjirá la ts'ayakonhenrá jina tí tòye éxi tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkèxin tí tòye la kuitóhe sín tí sín soldado ntahó kixin ts'ayakonhen sín.

28

Ó xechón ch'ín Jesús

(Mr. 16.1-8; Lc. 24.1-12; Jn. 20.1-10)

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankixín semana, la ntá tjan María Magdalena la ko tí í jnko tjan María sákjuítsjehe sín tí tsíkixravá Jesús.

² Ntá xrínahya kuínki nonte imá tjian kixin ijnko ángel kuènte Ìnchéni k'uínkajinxín nkaya nkajni la kjuíji ch'án tí tsíxravá Jesús la kjuakjiin ch'án tí xro a tjejkèxin tòye la ntá chrítaón tí xro a kjuák'ekjen ch'án.

³ Tí ángel la imá tjákini tsjehe éxi ijnko xrohi la tí iké ch'án la imá tjóá tsjehe éxi chrinta.

⁴ Tí sín soldado mé k'uíkon sín xikaha la ntá síxranka sín chakon sín la éxi tsík'en sín xikaha k'uéjéj sín.

⁵ La ntá tí ángel mé ntáche ch'án tí chojni chjin k'ixin:

—Chrakonhyará. Janhan ó nòna k'ixin xritjéyará tí nkexro Jesús mé tí nkexro tsíjak'enkání ntacruz.

⁶ Kjánchó í kohya ch'án ntihi ó tsíxechón ch'án inaá éxí chrónka ch'án senó. Xrákirá tsjehérá tí tsíjak'e sín ch'án, í kohya ch'án.

⁷ Ntá sájtírá tjoka tjíchenkará tí sín k'uájiko ch'án k'ixin: “Tí nkexro la ó tsíxechón. Ó kuítónxin ch'án ntja sátsji ch'án estado Galilea. Ntiha ts'ikonrá ch'án”, mé xíkaha tsochronkará. Kaín tíha mé tjonkará —mé xíkaha chrónka tí ch'ín ángel.

⁸ A ntá tí chojni chjin tjoka sákjuíxin sín tí tsíxravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús.

⁹ Ntá xrinahya titàya k'uíkuèn sín k'ixin itjen tí ch'ín Jesús la nixjehé sín ch'án. Ntá kóchjinehe sín ch'án la kjóa sín toté ch'án, kuítekaon sín ch'án.

¹⁰ La ntáchro ch'án k'ixin:

—Chrakonhyará sájtírá tjíchenkará tí sín k'ichó ní k'ixin sáchrókjui sín estado Galilea la ntaha ts'ikon sín tí janhan —mé xíkaha ichro ch'ín Jesús.

Tí nkehe chrónka tí sín soldado

¹¹ Tíó sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchát'á t'etöan kaín tí nkehe tsikónhen tí k'uéjío sín ntiha.

¹² Ntá tí sín nchát'a t'etöan kjuínixjehé sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado.

¹³ La ntáchro sín k'ixin:

—Chronkará k'ixin tí tie naxa tjeochrinrá ikui tí sín k'uék'ajiko tí nkexro Jesús, mé kueé sín cuerpo kuénte ch'án, ichrorá.

¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án k'ixin tsonínkakuanhyará ch'án —mé xíkaha ichro tí sín nchát'á.

¹⁵ La ntá tí sín soldado k'uáyéhe sín tí chichaon la sákjuí sín la xíkaha kjuích'e sín éxí k'uítuenhen sín. La mé xíkaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

Ch'ín Jesús k'uetuenhen ch'án tí sín k'uék'ajiko ch'án tí xraq sich'e sín

(Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sín k'uék'ajiko ch'ín Jesús sákjuí sín ijnko jnā estado Galilea k'ixin xíkaha tsík'etöan ch'ín Jesús.

¹⁷ Ntá k'uíkon sín ch'ín Jesús la ntá kuinkáchónki sín ch'án kjónté iso sín naxa kjuenkayáxin á chaxín jehe ch'án q náhi.

¹⁸ Ntá ch'ín Jesús kóchjinehe tí jehe sín la ntáchro ch'án k'ixin:

—Dios mé chjina kaín xín kjuachaxin nkaya nkajní la ko chjasintajni.

¹⁹ Méxra sájtírá kaín xín nación la tjákohérá chojni k'ixin tsitekaon sín tí janhan. Tíkítexínrá sín kjuachaxién ihnjé It'éni la ko ihnjé tí Xjeen la ko Nchakuèn Dios.

²⁰ Tjákohérá sín k'ixin sinchexiteyá sín kaín xín nkehe kuétuānhanrá. Ijie la ó nohará k'ixin tsjak'é ts'ejokoará jnkochrín hasta tsjeje chjasintajni. Mé xíkaha tsonhen. Amén —ichro ch'ín Jesús.

Tí tan jína chrónka ch'ín Marcos

Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)

¹ Xíkíhi mé xrankíxixin tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin: Janhan tsochr'an ijnko nkexro tsochrónka tan kuèntana tsitónxin ntja, kixin tsjasiyóxin ch'án ntja kuèntá.*

³ Ntá tsinhin sín itén ijnko nkexro tsjak'e nteje ts'eya tsonáchro kixin:

“Tóxakonhanrá ncheyóxinrá ntja tsixin Ìnchéni, takitjehérá ijnko ntja ntoí.”†

⁴ Tíha mé xítéyá ikui ch'ín Juan Bautista, mé xíkaha kjuák'e ch'án nteje kuikite ch'án chojni. Kjuakohe ch'án chojni ntiha kixin chrókjuinkí sín tí nkehe tjenkayáxin sín chrókuitohe sín tí ijíé sín ntá chrókuite sín kixin xíkaha mé chrókjuin ijíé sín.

⁵ Itsjé chojni kuixin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jie yámá sín ntá ch'ín Juan mé kuikite sín ch'án ntário Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxin nteje.

⁷ Mé kjuák'ekjakohe ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuana chrókjuasintanka tí correa tí tokaté ch'án.

⁸ Janhan mé ìntá ó kuikite sín. Ntá jehe ch'án mé tsík'ite sín ch'án tí Nchakuen Dios —ichro ch'ín Juan.

Ch'ín Juan kuikite ch'án tí ch'ín Jesús
(Mt. 3.13-17; Lc. 3.21-22)

⁹ Ntá tí yəon a ch'ín Jesús, k'uaxrjéxin ch'án chjasin Nazaret estado Galilea. Na ntá ch'ín Juan mé kuikite sín ch'án tí ntário Jordán.

¹⁰ Tió k'uaxrjenkixin ch'ín Jesús tí ìntá, ntá xrinahya titàya k'uúkuèn ch'án na ó xitjehe nkajní la ntá tí Nchakuen Dios éxi kontóá k'uínkajinxin ntiha ntá kjuák'e chrítaón kja ch'án.

¹¹ Ntá xrinahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xíkaha kuínhin sín.

Ch'ín Tsochren chrókjuachroe tí ch'ín Jesús kixin chrókjuasin ch'án jie
(Mt. 4.1-11; Lc. 4.1-13)

¹² Ntá tí Nchakuen Dios mé sákjuiko tí ch'ín Jesús nteje.

¹³ Kjuák'e ch'án cuarenta yəon tí nteje la ko ntiha mé k'uúxin ko jiehe ntá ch'ín Tsochren a na mé tjinkaon chrókjuachroe ch'án. La ntá tí sín àngel kui k'uàyakonhen tí jehe ch'án.

* 1:2 Malaquías 3.1 † 1:3 Isaías 40.3

Ch'in Jesús kjuankíxín kjuako ch'an estado Galilea

(Mt. 4.12-17; Lc. 4.14-15)

¹⁴ Kjuixin kjuák'echjina ch'in Juan ntqechiso ntá ch'in Jesús na mé sákjuí ch'án nó estado Galilea sákjuíkjakohé ch'án tí sín ntiha tí tan jína kuente Dios.

¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuente Dios ts'etqan ch'án. Chrókuítqohérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xíkaha kjuako ch'in Jesús.

Ch'in Jesús k'uíyehé noó tí sín itsé koche

(Mt. 4.18-22; Lc. 5.1-11)

¹⁶ Ch'in Jesús tjetji ch'án chrínta ntayaon Galilea ntá xrínahya k'uíkon ch'án tí ch'in Simón la ko tí kíchó ch'án mé it'in Andrés, mé koche xrisé sín, ntá tinkák'e sín tí nchísén chrínki ntá.

¹⁷ Ntá ntáchro tí ch'in Jesús kixin:

—Chréhérá tí janhan, ntá tsotjahará xra tsjéyará chojni —ichro ch'án.

¹⁸ Ntá tuénxín kuítqhe sín tí nchísén k'uétséya sín koche ntá sákjuíko sín ch'án.

¹⁹ Ntá kínihya kjuíji ch'in Jesús ntá k'uíkon ch'án tí yaá xjeen ch'in Zebedeo. Ijnko mé it'in Jacobo. A ntá tí í jnko la mé it'in Juan. Jehe sín la ko tí it'é sín tjejóxenhén sín tí ntabárcq tjejójtjonité sín tí nchísén tséya sín tí koche.

²⁰ Na ntá ch'in Jesús mé k'uíyehé tí jehe sín kixin kjaxin tsochréhe sín ch'án. A ntá tuénxín kuítqhe sín tí it'é sín ch'in Zebedeo kuítqeko ch'an tí ntabárcq la ko tí sín tjinkítsa ch'án ch'e xra. A ntá jehe sín sákjuíko sín ch'in Jesús.

Ijnko chojni chóna injno nchakuen tí jínahya

(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uixenhén ch'in Jesús tí njnko Israel. Na ntá ntaha mé kjuankíxín ch'án kjuako ch'án.

²² A ntá tí chojni sín ntiha mé chrakon sín kuínhin sín tí nkehe kjuako ch'án kixin kjuakoxin ch'án kixin chóna ch'án kjuachaxin, la jehya éxí tí sín maestro tjako tí ley, ichro sín.

²³ Ntá tí njnko Israel chjasin ntiha itjen injno chojni chóna injno nchakuen tí jínahya k'uíyato ntáchro kixin:

²⁴ —¿Nkeuènté tjtáté tí jeheni kaín ni? Jaha Jesús kjuíxian Nazaret. ¿Á k'uinka kixin sijnchek'itjáyanni? Janhan mé ó kjuátsqan tí jaha, la ko nõna kixin jaha tí nkexro tjóá kuente Dios —mé xíkaha ichro tí nchakuen tí jínahya.

²⁵ Ntá ch'in Jesús mé k'uétuénhen tí nchakuen tí jínahya ntáchro ch'án kixin: —Tániá, t'axrjéxian tí jehe ch'án —mé xíkaha ichro ch'in Jesús.

²⁶ A ntá tí nchakuen tí jínahya mé kjuínchek'aniáte tí ch'in a la ko k'uíyatoxin tsen ntá k'uaxrjéxín tí ch'in a.

²⁷ A ntá kaín sín chrakon sín ntá kjuanchankíhi sín kíchó sín, ntáchro sín kixin:

—¿Xá nkexro tíha kixin tjako ch'án nkehe njxin? Jehe ch'án chóna kjuachaxin kixin t'etuénhen ch'án tí nchakuen tí jínahya la titekakonhen —mé xíkaha ichro sín.

²⁸ A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'in Jesús a.

Ch'in Jesús kjuínchekitohe jína tí ich'ee tí ch'in Simón Pedro

(Mt. 8.14-15; Lc. 4.38-39)

²⁹ Ntá tí ch'in Jesús mé k'uaxrjexín ch'án tí n̄nko, a ntá tuénxín sákjuiko ch'án ch'in Jacobo la ko ch'in Juan, sákjuí sin nt̄e ch'in Simón la ko ch'in Andrés.

³⁰ Ntá tí ich'ee ch'in Simón na tjetsínka tjan, níhi tjan kixin chón̄ta tjan sóa. Ntá chénka sín tí ch'in Jesús.

³¹ Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuíinhin tjan tí sóa chón̄ta tjan. Ntá kjuanjon tjan nkehe sine sín.

Ch'in Jesús kjuínchekitohe jína nchón̄hya chojni níhi
(Mt. 8.16-17; Lc. 4.40-41)

³² A ntá tió kjuíataón yaon tió k'uúxin tie kuík̄ohe sín tí ch'in Jesús kaín tí sín níhi la ko tí sín chón̄ta nch̄akuen jínahya;

³³ na ntá kuenté chjasin kójnkotsé sín k'uúxintankí sín ntója tí nchia a.

³⁴ Ntá kjuínchekitohe ch'án jína kaín tí chojni níhi chón̄ta nchón̄hya clase chin la ko kuakitsje ch'án kaín tí nch̄akuen tí jínahya. Na í kjuanjonhya ch'án kjuachaxin kixin tsonixja tí nch̄akuen tí jínahya kixin ó kjuáts̄oan tíha nkexro tí jehe ch'án.

Ch'in Jesús mé kjuako ch'án estado Galilea
(Lc. 4.42-44)

³⁵ Ntá naḡa sítie k'uàya ch'in Jesús k'uaxrjexín ch'án tí chjasin a sákjuí ch'án nteje kixin ntiha nijxeexín ch'án It'é ch'án tjen nkaya nkajní.

³⁶ Ntá ch'in Simón la ko tí sín xriko ch'án mé sákjuík̄jeyá sín ch'án.

³⁷ Ntá k'uitja sín ch'án ntá chénka sín kixin:

—Kaín sín xritjeyá sín tí jaha —ichro sín.

³⁸ Ntá ntáchro ch'in Jesús kixin:

—Sátsjini ókjé chjasin chjinaxón kixin ntaha kjaxin tsják̄oḡa sín tí tan jína, kixin x̄ikaha mé tí k'uaxrjexian chjasin ntiha.

³⁹ Ntá nkuúxín estado Galilea sákjuí ch'án kuinkák̄jako ch'án jnkojnko n̄nko la ko kuakitsje ch'án tí nch̄akuen tí jínahya chón̄ta sín.

Ch'in Jesús kjuínchekitohe jína ijnko ch'in chón̄ta chinlepra
(Mt. 8.1-4; Lc. 5.12-16)

⁴⁰ Ntá kui ijnko ch'in chón̄ta chinlepra kjuák'exín toch'in ch'án nkayakon ch'in Jesús ntá chrón̄oḡe ch'án ntáchro ch'án kixin:

—Tí tjínkávan jaha la jína chrók̄juínchekit̄ohéni jína —ichro ch'án.

⁴¹ Ntá ch'in Jesús na imá kuikonóḡe ch'án tí ch'in a na ntá kjuentoá tja ch'án kjuak'e tja ch'án chrítaón tí ch'in níhi a ntá ntáchro ch'án kixin:

—Méxra x̄ikaha tjínkavan. Ntá jie s̄intakit̄oḡa jína —ichro ch'án.

⁴² A ntá x̄ikaha ntáchro ch'án ntá tuénxín kjuín tí chinlepra ntá kuít̄ohe ch'án jína.

⁴³ Ntá k'ueṭuēnhen ch'in Jesús tí ch'in a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sáttja tják̄ohé tí ch'in nch̄at'á kixin ó kjuíinhin tí chinlepra la ko tjánjuan tí nkehe tsík'etoan ch'in Moisés‡ kixin t̄soñoexín kaín xín chojni kixin ó kuít̄oḡa jína —ichro ch'án.

⁴⁵ A ntá tí ch'in tsík̄itohe jína, a ntá sákjuí ch'án kjuank̄ixin ch'án chénka ch'án kaín xín chojni kixin nkexri kuít̄ohe ch'án jína. Méxra xitjahya ts'ixenhen ch'in Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuúxin sín nkuúxín chjasin.

‡ 1:44 Levítico 14.1-32

2

Ch'ín Jesús mé kjuínchekitōhe jína ijnko chojni tsík'en toté
(Mt. 9.1-8; Lc. 5.17-26)

1 Ntá ó k'uaátsínka iso yaon ntá ch'ín Jesús mé xíkjan ch'án chjasin Capernaum. Ntá k'uixikónohe chojni kixin ijnko nchia ntiha kjuák'e ch'án.

2 Ntá tuénxín nchónhya chojni kóchjina ntá kjuachahya tí nchia k'uixixenhen sín la ko kjaxin kjuachahya tí ntója nchia chrók'uixintankí sín. A ntá ch'ín Jesús kjuako tí tan jína kuènte Dios.

3 Ntá kui noó sín tinkátsénki sín ijnko ch'ín tsík'en toté ch'án.

4 Kjánchó xitjahya kóchjina sín tí tjen ch'ín Jesús kixin nchónhya chojni síin. La ntá k'ujt'ótjen sín tí chrítaón nchia a ntá k'óxrat'ō sín. Na ntá ijnko hno kjuak'ete sín tí kania tjenkáya tí sǐnníhi a ntá kjuinkajin sín ntoí tí tjen ch'ín Jesús a.

5 Tió k'uíkon ch'ín Jesús tí nkehe kjuích'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjehe ch'án tí sǐnníhi ntáche ch'án kixin:

—Xjeenni, ó kjuixin kjuinhan tí jje chonta —mé xíkaha ichro ch'án.

6 Na ntá iso tí sín maestro tjako tí ley tjejótjaxin sín ntiha na ntá jehó sín mé kjo sín asén sín kixin:

7 “¿Nkekuènté xíkaha nixja tí ch'ín i ncheyóhe ch'án asén ch'án Dios? Kixin ninkexró xitjahya tsjatsin ijje kixin jehó Dios mé chóna kjuachaxin tsjatsen ijje chojni”, mé xíkaha ikjo sín asén sín.

8 Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xíkaha tjenkayáxinrá?

9 ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuinhan ch'án tí jje yámá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaníe ch'án ntá sáchrókjuí ch'án?

10 Méxra jie tsjácoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjlinhin ijje chojni —ichro ch'án.

Ntá ntáche ch'án tí ch'ín xitjahya tji kixin:

11 —Jaha tétuanhan t'inkatjen, tjenájían kaníaa na sátjia ntōa —ichro ch'án.

12 A ntá tí sǐnníhi na tuénxín k'uínkatjen ch'án kjuák'exín toté ch'án na kjuenájín ch'án kaníe ch'án na kuámá ch'án k'uaxrxéxin ch'án nchia sákjuí ch'án. Na ntá kaín tí sín síin a tsjehe sín nkexrí kónhen na chakon sín la ko kjuanchehe sín Dios kjuasáyé. Ntá ntáchro sín kixin:

—K'uíkonhyéni tí nkehe i —ichro sín.

Ch'ín Jesús k'uíyehé ch'ín Leví
(Mt. 9.9-13; Lc. 5.27-32)

13 A ntá chr'exín ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án.

14 Ntá k'uaátsínka ch'án k'uíkon ch'án tí ch'ín Leví xjeen ch'ín Alfeo tjetjaxin ch'án tjenchekjénki ch'án. Ntá ch'ín Jesús mé k'uíyehé ch'án, ntáchro ch'án kixin:

—Chréhé tí janhan —ichro ch'án.

Ntá ch'ín Leví mé tuénxín k'uínkatjen ch'án chréhé ch'án tí ch'ín Jesús.

15 A ntá ch'ín Jesús kjuák'e ch'án ntøe tí ch'ín Leví, la ntá kjuanjon sín nkehe sine ch'án la ko kjaxin k'uéjò nchónhya tí sín nchekjènkì la ko kjaxin í so chojni chóna jìe. Mé kaín tí sín a mé tjejótxajin sín tjejóneko tí ch'ín Jesús la ko tí sín k'uájiko ch'án, káxin nchónhya chojni chréhe sín tí jehe ch'án.

16 Na ntá tí sín maestro tjako tí ley la ko tí sín fariseo k'uikon sín káxin ch'ín Jesús tjejóneko kaín tí sín nchekjènkì la ko tí í so sín chóna jìe, a ntá ntáche sín tí sín k'uájiko ch'án káxin:

—¿Nkekuènté káxin tí maestro kuèntará neko ch'án la ko t'ikao ch'án tí sín nchekjènkì la ko tí í so sín chóna jìe? —ichro sín.

17 Na ntá ch'ín Jesús kuínhin ch'án nkehe tí tjo sín a. Ntá nixjehè ch'án tí sín a ntáchro ch'án káxin:

—Tí sín níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. Janhan na k'uinkahya ntihi káxin chrók'uíyaha chojni jína tjejó sín. Náhí. K'uinka káxin ts'íyaha chojni chóna jìe —ichro ch'án.

Tjanchankíhi sín tí ch'ín Jesús káxin á chrókjónehya sín tió tsonixjehè sín Dios (Mt. 9.14-17; Lc. 5.33-39)

18 Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuénté yaon káxin mé xíkaha ts'áyehè sín kjuaxróxin, ichro sín. A ntá kui iso chojni nixjehè sín tí ch'ín Jesús ntáchro sín káxin:

—¿Nkekuènté káxin tí sín k'uék'ajiko sín tí ch'ín Juan la ko tí sín fariseo la nehya sín jìe, a ntá tí sín xrikoa la íne sín? —ichro sín.

19 Ntá kjuátehe ch'ín Jesús ntáchro ch'án káxin:

—¿Xá chrókjónehya tí chojni tsík'íyehè sín kóchjina ijnko kia tsòtehe chojni tí naxa tjejóko sín tí nkexro tsòtehe? Tí naxa tjen tí nkexro tsòtehe la xitjahya káxin chrókjónehya sín.

20 A ntá itsi ijnko yaon itsi chojni sátsjiko sín tí ch'ín tsíkótehe, ntá tí yaon la chaxín sinehya sín.

21 Ninkexró chrókjua k'enièhe ijnko ka ó ntaxin it'ò ka nixin káxin ntá chrókjuixéhe tí ka nixin ntá antsí má chrók'uichje tí ka ntaxin a.

22 La ko kjaxin ninkexró chrókuikía xran vino nixin ijnko tjuaxran ó ntaxin; káxin tí xran vino nixin la chrókótséchje tí tjuaxran ntaxin ntá chrók'uitjáyan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xíkaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigó ijnko yaon t'ok'éhe sín

(Mt. 12.1-8; Lc. 6.1-5)

23 Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte síin noatrigó. Na ntá tí sín k'uájiko ch'án kjuankáxin sín ik'uín sín iso noatrigó.

24 Na ntá iso tí sín fariseo kjuanchankíhi sín tí ch'ín Jesús a káxin:

—¿Nkekuènté káxin tí sín xrikoa tjejóch'e sín xra ijìe? Na mé kohya kjuachaxin tsonhen xra tí yaon t'ok'éheni —ichro sín.

25 Ntá kjuátehe ch'án ntáchro ch'án káxin:

—¿Á kjuínchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta?

26 A ntá jehe ch'án k'uixenhen ch'án ntøe Dios tió kjuák'e nchat'á Abiatar k'uetøan, a ntá kjóne ch'án tí niotja tsíkóyaon kjónté jehó tí sín nchat'á mé

k'uéchonta kjuachaxin sine sín la kjaxin chjéhe ch'án tí sín k'uájiko ch'án*
—ichro ch'ín Jesús.

²⁷ Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin t'ichjánxin sín, la jehya kixin chrókjuikosáyehe tí yaon a.

²⁸ A ntá tí Xjeen Dios K'óna Chojni mé chóna kjuachaxin ts'etöan nkehe tsoñhen tí yaon t'ok'éheni —ichro ch'án.

3

Ijnko chojni tsixámá tja (Mt. 12.9-14; Lc. 6.6-11)

¹ Ntá ch'ín Jesús k'uixenhen ch'án injko nijnko Israel ínaá. Na mé ntiha tjen injko ch'ín tsixámá injko tja ch'án.

² Na ntá kóchjina iso chojni tsáyehe sín ch'ín Jesús ts'ikon sín kixin á sinchekitohe ch'án jína tí ch'ín tsixámá tja tí yaon t'ok'éhe sín kixin mé jína tsjanchia sín jie, ichro sín.

³ Ntá ch'ín Jesús mé ntáche ch'án tí ch'ín tsixámá tja a kixin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín síin ntiha kixin:

—¿Nkehe síin kjuachaxin tsoñhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitoheni chojni jína ní o á chrók'óyánni chojni? —ichro ch'án.

A ntá jehe sín la tánikoá sín.

⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóhehe sín chojni. Na ntá k'uetuñhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuitöhe tja ch'án jína.

⁶ Na ntá tí sín fariseo a k'uaxrjexín sín nijnko sákjuí sín k'uúto sín tí sín kuènte ch'ín Herodes ntá kjuenkayáxinko kichó sín kixin nkexrí chrók'óyán sín tí ch'ín Jesús.

Nchónhya chojni síin chrínta ntayaoon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaoon a. A ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea

⁸ la ko chjasin Jerusalén la ko estado Idumea la ko ikjé sín kuixín sín nó tóhe ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jie kjuasin ch'ín Jesús ntá kuichréhe sín ch'án kixin chrók'uikon sín tíha kjaxin.

⁹ Ntá k'uetuñhen ch'án tí sín k'uájiko ch'án a kixin ntahó chrókjuak'eçonhen sín injko ntabárcö. A ntá tí imá chrók'uixítja sín ch'án ntá chrók'uixenhen ch'án tí ntabárcö, a ntá ntiha chrókjuak'e ch'án tsochrónka ch'án.

¹⁰ Kixin itsjé chojni tsíkjinchekitohe ch'án jína, na ntá kaín xín tí sín níhi k'uixítja sín ch'án kixin tjinkaon sín chrókuákóxin sín ch'án.

* 2:26 1 Samuel 21.1-6; Levítico 24.5-9

11 Kjaxin tí sín chón̄ta nch̄akuen tí jínahya na mé tió k'uúikon sín tí ch'ín Jesús ntá k'uéjoxin sín toch'in sín nkayakon ch'án. Ntá k'óyako tí nch̄akuen tí jínahya a ntáchro kixin:

—Jaha mé tí Xjeen Dios.

12 A ntá ch'ín Jesús ntáche ch'án tí nch̄akuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án
(Mt. 10.1-4; Lc. 6.12-16)

13 A ntá chr'éxin chr̄iin ch'ín Jesús ijnko jna, a ntá ntiha k'uúiyeh̄e ch'án tí sín tjinkaon ch'án chrók'uajiko ch'án ntá kóchjinehe sín ch'án.

14 Ntá kjueyá ch'án teyó tí sín ts'ajiko ch'án kixin ts'etueñhen ch'án sín sátsji sín tsjako sín tí tan jína.

15 Kjuanjon ch'án kjuachaxin sinchekitohe sín chojni níhi jína la ko tsakitsje sín nch̄akuen tí jínahya chón̄ta chojni.

16 A ntá tí sín í mé tí teyó sín tsíkjeýá ch'án mé it'in sín xíkíhi: Simón na mé kjuínchek'in ch'án Pedro;

17 la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta.

18 La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuènte tí sín cananista,

19 la ko Judas Iscariote, mé kjuínchekji tí ch'ín Jesús chr'éxin.

Ntáchro sín kixin ch'ín Jesús chón̄ta kjuachaxin kuènte tí Jínahya
(Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia.

20 A ntá inaá kójnkotsé nchónhya chojni, a ntá xitjahya sine sín.

21 Ntá kónohe tí sín nax̄a kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

22 Kjaxin tí sín tjako tí ley kujixin sín Jerusalén, ntáchro sín kixin:

—Tí ch'ín í chón̄ta ch'án tí ch'ín Beelzebú, mé ch'ín Tsochren, mé tí nkexro t'etueñhen kaín tí nch̄akuen tí jínahya ntá xíkaha tjacha ch'án takitsje ch'án nch̄akuen tí jínahya a —ichro sín.

23 Ntá ch'ín Jesús k'uúiyeh̄e ch'án tí sín ntá kjuíncheyóexin ch'án ntáchro ch'án kixin:

—¿Nkexri kixin jnkokón ch'ín Tsochren chrókuakitsje asén?

24 A ntá tí sín t'etōan ijnko nación tjanjonko kichó la tsjachahya ts'etōan.

25 La ko kjaxin tí sín jnkokoá ntōe jnkokoáhya tjenkayáxin sín ntá xitjahya ts'ejóko kichó sín.

26 A ntá tí chaxin ch'ín Tsochren jnkokónhya tjenkayáxin tjanjonko kichó la ntá ts'itjāyan kjuachaxin kuènte.

27 'Ninkexró tsjacha ts'ixenhen ntōe ijnko chojni jieh̄e kixin ts'axrjehe tí nkehe chón̄ta ch'án. Náhi. T'ichjānxin saoxín sinchenteto ch'án tí ch'ín jieh̄e kixin jína tseéhe ch'án nkehe chón̄ta tí ch'ín a.

28 'Ijnko nkehe chaxin tsotjonkará kixin tió tsoxraxinkaon ijnko chojni tí jie chón̄ta la ko tsochronóeh̄e Dios la ntá tsjakjñihin ch'án kaín tí jie la ko kaín tí nkehe jínahya tsíntáchro sín.

29 A ntá tí nkexro ts'ántaxínhin tí Nch̄akuen Dios na mé xitjahya tsjlin tí jie na mé jnkochr̄ixín tsochón̄ta sín tí jie a —ichro ch'án.

³⁰ Mé xikaha ichro ch'án kixin tí sín a tsintáchro sín kixin ijnko nchakuen tí jínahya mé chóntha tí jehe ch'án.

*Tí iné la ko kichó ch'in Jesús
(Mt. 12.46-50; Lc. 8.19-21)*

³¹ A ntá kui iné ch'in Jesús la ko kichó ch'án tjejó sín ntója ó na ntá k'uetuēnhen sín ijnko chojni tsjik'íyehē ch'án.

³² A ntá tí sín tjejótxajin tí tjen ch'in Jesús ntiha chénka sín ch'án kixin:

—Iná la ko kichuá tjejó sín ntója xritjeyá sín ti jaha. —ichro sín.

³³ Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejótxajin tí tjen ch'án ntá ntáchro ch'án kixin:

—Jahará mé nana la ko kichiná.

³⁵ Kain tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

4

*Kjuíncheyóexin ch'án éxi ijnko chojni t'enka nonte
(Mt. 13.1-9; Lc. 8.4-8)*

¹ Ch'in Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabárcō tjenkátaón ntá k'uit'ótjen ch'án, a ntá ntaha kjuák'e ch'án kjuakoxin ch'án. Ntá kain tí sín tsikójnkotsé mé kuitōhe sín chrínta ntayaon k'uejókínhin sín.

² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuik'enka nontēe.

⁴ Mé xikaha sákjuik'enka ch'án iso tí noatrigō a. Ntá iso noa la tsik'ánotjen ntja ntá kui koxroxē k'uinkā va tí noa.

⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin tjínhya chóntha nche.

⁶ A ntá tió kjuiton yaon la ntá tí ka la chján; la ko chóntahya nuèe a ntá xamá.

⁷ A ntá í so noa kjuítsínkak'á tí síin kach'í la ntá tí kach'í k'uánkí la ntá tí noa í k'ónahya kixin síta tí kach'í.

⁸ A ntá iso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

*Ch'in Jesús chronkaxín nkexri t'axrjexín tí nkehe ntáchro ch'án
(Mt. 13.10-17; Lc. 8.9-10)*

¹⁰ A ntá chr'éxin, tió kuitōhe ch'in Jesús jehó ch'án, a ntá tí sín tjejó chjínaxón tí tjen ch'án la ko tí teyo sín k'uájiko ch'án mé kjuanchankíhi sín ch'án kixin nkexri t'axrjexín tí nkehe kjuíncheyóexin ch'án.

¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuíntayóaxuán kain nkehe kuínhin sín.

¹² Kixin kjónté ts'ikón sín la éxi k'uúkonhya sín, la ko kjónté tsinhin sín la tsienxinhya sín kixin ntá chrók'uixitoxinhya tí tjenkayáxin sín a la ko chrókjuinhya tí ijjé sín* —ichro ch'án.

Ch'ín Jesús chrónkaxín nkexrí t'axrjexín tí nkexro sákjuik'enka
(Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiéxinhýará jahará nkexrí t'axrjexín tí nkehe kjuúntayóaxian ní? ¿Á ntá nkexrí chrókiéxínrá tí í so nkehe náxa sintayóaxian?

¹⁴ Á ntá tí nkexro sákjuik'enka tí tje a mé yóhé ijnko nkexro sákjuikjako itén Dios.

¹⁵ Á ntá iso chojni la éxi tí tje kjuútsínka ntá; kixin kuínhin sín itén Dios, ntá chr'éxin ó kui ch'ín Tsochren kjuúnchek'itjáyán ch'án tí tan jína kuínhin sín.

¹⁶ Á ntá í so chojni la éxi yóhé tí tje kjuútsínka k'á xró: mé kuínhin sín itén Dios ntá tjoka kóxrjínhin sín kuítekaon sín.

¹⁷ Kjánchó njnkahya chóna nuè, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios.

¹⁸ Á ntá í so chojni la éxi yóhé tí tje k'uúinka chrik'á kach'í na mé kuínhin sín itén Dios

¹⁹ kjánchó tóxakonhen sín tí nkehe síin chjasintajni la ko tí nkehe tjete tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xra Dios.

²⁰ Á ntá í so chojni kuínhin tí itén Dios na kuinkáchónki sín la ntá xíkaha jína ch'ehe sín Dios xra. La iso sín la éxi yóhé tí tje k'uúinka tí nonte jína k'óna treinta neno noa la ko iso sín la yóhé tí tje k'óna sesenta neno noa la ko iso sín la yóhé tí tje k'óna ciento neno noa —mé xíkaha ichro ch'ín Jesús.

Ch'ín Jesús mé kjuúncheyóexín éxi ijnko xrohi tjeche
(Lc. 8.16-18)

²¹ Kjaxin ntáchro ch'ín Jesús kixin:

—¿Á chrókuijkaonni xrohi tjeche chrókjuak'emá chrínki ntacajón o chrínki cama? Kjá náhi. Tí xrohi la noi chrókjuak'e ts'inkaséyanxín.

²² Mé xíkaha kaín tí nkehe tjejomá jie tsonoxín chr'éxin la ko kaín tí nkehe ninkexro noehya jie la tsonoxín chr'éxin.

²³ Á ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókjuenkayáxinrá jína tí nkehe tjejótinhinrá. Tí nkehe tjáchoyará jahará la Dios la kjaxin tíha tsjáchoyá ch'án tí nkehe ts'ayéhérahá jahará, a ntá antsí má ts'ayéhérahá tí jahará tjejontinhinrá.

²⁵ Á ntá tí nkexro chóna nkehe la antsí má ts'ayéhe sín. Á ntá tí nkexro chóntahya la kjónté tí ntá chóna la ts'axrjehe —ichro ch'án.

Ch'ín Jesús mé kjuúncheyóexín ch'án éxi ijnko tje ts'ayan ts'ánki

²⁶ Kjaxin ntáchro ch'ín Jesús kixin:

—Tí kjuachaxin t'etqan Dios tóyóhé ijnko chojni sátsjik'enka nonte.

²⁷ Ntá sákjuik'ajua ch'án tí tie la ko k'uàya ch'án tí nchítjen. Á ntá xíkahó k'uátsínka iso yaon la ko iso tie, a ntá tí tje la k'uayan la k'uánkí. Á ntá tí nkexro k'uénka la noehya ch'án nkexrí kónhen tíha.

* 4:12 Isaías 6.9-10

²⁸ **A** ntá tí nche mé kjuich'e xrā jehó. Senó k'uayan tí chaon tí ka, ā ntá kjuintāa, ā ntá chr'éxin icha tí noa tsjinjin;

²⁹ ā ntá tió tsícha tí noa, ā ntá tsakjinjin sín tí noa kíxin ó kjuixraká tí yaon tsojtá sín.

Ch'in Jesús kjuíncheyóexin ch'án éxi ijnko tje it'in mostaza

(Mt. 13.31-32; Lc. 13.18-19)

³⁰ Kjaxin ntáchro ch'in Jesús kíxin:

—¿Nkehe chrókóyóhe tí kjuachaxin t'etōan Dios, nkehe chrókóyóexin tíha?

³¹ Mé éxi yóhe tí tje it'in mostaza tsik'inka nonte. Tíha mé ijnko tje imá ntsí, ā ntá tí í so tje síin chjasintajni la kénhyó.

³² **A** ntá jnkonaá tsik'inka tí tje la tsik'ayan tsik'ánki imá ihyé, ā ntá tí í so nta la kánhyó. **A** ntá kjaxin tí chaon tí nta tsik'ánki imá ihyé, ā ntá kjónté koxroxé xritjaka la jína ts'ok'éhe va chrínki tí ts'van chaon tí nta.

Nkehe tí xrā kjuich'e tí nkehe kjuíncheyóexin ch'in Jesús

(Mt. 13.34-35)

³³ Mé xikaha ch'in Jesús kjuakóhe ch'án tí jehe sín, kjuíncheyóexin ch'án nchónhya nkehe éxi tí nkehe a kíxin chrókjuacha chrókiénxin sín tíha.

³⁴ Kainxin nkehe kjuakóhe ch'án tí jehe sín la kjuíncheyóexin ch'án. **A** ntá jehó tí sín k'uájiko ch'án la chrónka ch'án nkexri t'axrxéxin kain tí nkehe kjuíncheyóexin ch'án.

Ch'in Jesús k'uetuenhen ch'án tí xrjntō la ko tí ntā síchrica kíxin ts'ixita

(Mt. 8.23-27; Lc. 8.22-25)

³⁵ **A** ntá tí yaon a la ntá ó kóntó ntá ntáche ch'in Jesús tí sín k'uájiko ch'án a kíxin:

—Sátsjini tóhe tí ntayaon —ichro ch'án.

³⁶ Ntá kuitóhe sín kain tí chojni a ntá sákjuiko sín tí ch'in Jesús nāxā tjenkáya ch'án tí ntabárcō la ko kjaxin í so ntabárcō sákjuí koí.

³⁷ Ntá xrinahya tjian chjéhe xrjntō la ntá síchrica ntā t'ixenhen tí ntabárcō, ó mero tsokaón ntā tí ntabárcō.

³⁸ **A** ntá ch'in Jesús na mé tjejua ch'án tí tjar'i nóton tí tjejó sín nkaxenhen tí ntabárcō a tjejkón ch'án ijnko ka. Na ntá kjuínchekjāya sín ch'án ntáchro sín kíxin:

—¡Maestro! ¿Á ntōsán kíxin ts'itjáyanni, ts'aniánkíni ntā ní? —ichro sín.

³⁹ **A** ntá ch'in Jesús k'uàya ch'án, k'uetuenhen ch'án tí xrjntō la ko tí ntā kíxin ts'ixita, ntáchro ch'án kíxin:

—Tániá, tjak'eta —ichro ch'án.

Na ntá tí xrjntō la ko tí ntā k'uixratá.

⁴⁰ Ntá kjuanchankihi ch'án tí sín k'uájiko ch'án ntáchro ch'án kíxin:

—¿Nkekuènté kíxin imá chrakonrá? ¿Á nāxā tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kichó sín kíxin:

—¿Xá nkexro tíhi? Kjónté xrjntō la ko ntayaon la mé kjuínchexiteyéhe ch'án —ichro sín.

5

Ijnko chojni chóna nchónhya nchakuen tí jínahya nonte Gadara

(Mt. 8.28-34; Lc. 8.26-39)

¹ Ntá tió k'uatóyē sín tí ntayaon, ā ntá kjuíji sín tí nonte Gadara.

² Ntá k'uínkajinxin ch'ín Jesús tí ntabárcɔ a. Ntá xrínahya xeta ch'án ijnko ch'ín kuixin nó tsíkji_xravá chojni mé chóna ch'án ijnko nchakuen tí jínahya.

³ Tí ch'ín a mé kjuák'e ch'án tí tsíkji_xravá chojni. Ninke_xró tjachahya sinchenteto ch'án kjónté cadena tjachahya.

⁴ Nchónhya veces kjuínchentetoxin sín ch'án cadena toté ch'án la ko itja ch'án, la kjónté kóchrítón ch'án kjuínchekuen ch'án tí cadena. Kohya ninkexro tjacha ts'etuenhen tí jehe ch'án.

⁵ K'uék'aji ch'án nchakotjin la ko tie t'íyato ch'án nó jnɔ la ko tí tsíkji_xravá chojni la ko chjéhe asén ch'án xro.

⁶ Na ntá k'uíkon ch'án kixin kui ch'ín Jesús kjónté ikjín la kuinká ch'án kjuíji ch'án kjuák'exin toch'in ch'án nkayakon ch'ín Jesús a

⁷ k'óyako ch'án ntáchro ch'án kixin:

—¿Nkekuénté tjiaté jaha tí jeheni, jaha Jesús Xjeen Dios tjen nkaya nkajní? Dios nchenoheni kixin xrjanóaha nchekjasótehyani —ichro ch'án.

⁸ Mé xikaha ichro ch'án kixin tsintáchro ch'ín Jesús kixin:

—Jaha nchakuen tí jínahya, tjtóhé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátéhe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónóhe ch'án tí ch'ín Jesús kixin tsochr'ánhya ch'án ókjé tí nchakuen tí jínahya.

¹¹ Na ntá síin nchónhya cochíno xrine va chjinaxón tí jnɔ ntiha.

¹² A ntá chrónòɔa tí nchakuen tí jínahya ntáchro kixin:

—Tétuénhenni sátsjini tí síin tí cochíno, tjtóhé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexin tí ch'ín a sákjuí kjuík'ixenhen tí cochíno a. Na ntá kaín xín tí ko a mé chjina iyó mil va síin va xrine va. Na mé kaín xín va k'uínkajinxin va ntiha kjuítsinkayá va tsaka ntá kjuítsinkankí va ntayaon ntá kjuínhin va ntɔ.

¹⁴ Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nontee chojni. Na ntá itsjé chojni mé kuitsjehe sín nkehe tí tsíónhen ntiha.

¹⁵ Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchóna tí nchónhya nchakuen tí jínahya senó la ó jína tjen ch'án tjetjaxin ch'án tjenkáya ch'án iké ch'án, na ntá chrakon sín.

¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchóna tí nchakuen tí jínahya la ko nkexrí kónhen tí cochíno a.

¹⁷ Ntá kjuankixin sín chrónóhe sín tí ch'ín Jesús a kixin sáchrókjuixin ch'án ntiha.

¹⁸ A ntá ó ts'it'ótjen ch'ín Jesús tí ntabárcɔ na ntá tí ch'ín k'uéchóna nchakuen tí jínahya na mé chrónòa ch'án kixin kjaxin ch'án sáchrókjuiko sín ch'án, ichro ch'án.

¹⁹ Ntá ch'ín Jesús kjuanjonhya ch'án kjuachaxin sátsjiko sín ch'án. Náhi. K'uetɔan ch'án kixin:

—Sátjia ntɔɔa tjičenka tí sín naxa kjéhya tí jaha kixin nkexrí kaín tí kjuaxroan jie kjuasin Dios kjuínchekitɔha jína kjuíkonóaha ch'án tí jaha —ichro ch'án.

20 Na ntá tí ch'ín a sákjuj ch'án kjuankíxin chrónka ch'án kaín tí chjasin kuènte Decápolis kixin nkexrí kaín tí nkehe kjuích'e ch'ín Jesús kjuínchekitòhe ch'án jína. A ntá kaín tí sín kuínhin na chrakon sín.

*Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Lc. 8.40-56)*

21 Ntá tió xíkjanqo ch'ín Jesús tí ntabárcq tóhe tí ntayaon ínaá ntá kóchjina nchónhya chojni ntá ntaó chrínta ntá kuítóhe ch'án ínaá.

22 Na ntá ikui ijnko ch'ín t'etqan kuènte njnko mé it'in ch'án Jairo. A ntá tió k'uikon ch'án kixin itjen ch'ín Jesús ntá kjuák'exín toch'in ch'án chrínkí tóté ch'ín Jesús a

23 imá chrónóghē ch'án kixin:

—Tí ijnko xjanna chjin ó tjet'en xjan. Xrjanógha chrókujuini chrókuak'étja itjá chrítaón kja xjan ntá chrókuítóhe xjan jína —ichro ch'án.

24 Ntá ch'ín Jesús sákjujko tí ch'ín a. Na nchónhya chojni chréhe sín tinkák'ixitja sín ch'án ínaá.

25 A ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni.

26 Imá tjote tjan kixin nchónhya chojni kjuanjon xroqan kónhen tjan na ó kjuixin kjuéhe tjan kaín xín nkehe k'uéchóna tjan. Ó jehí titòghya tjan jína la íchá ntsí tinkákótao tjan.

27 A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án,

28 ntácho tjan kixin kjónté iké ch'án ó chrókuakóxin tjan na ó tíhó mé chrókuítóhe tjan jína, ichro tjan.

29 Ntá tuénxín tí jni na mé ó kjuixié tjan la ko kónohe tjan kixin ó kjuixin kuítóhe tjan jína tí chín k'uéchóna tjan.

30 Ntá ch'ín Jesús na ó kónohe ch'án kixin kjuachaxiēn ch'án mé kuítóexín ijnko chojni jína ntá kuinkátjía ch'án kjuanchankíhi ch'án tí chojni síin a kixin:
—¿Nkexro kuákóxin tí kaná? —ichro ch'án.

31 Ntá kjuátēhe tí sín k'uajiko ch'án a ntácho sín kixin:

—Ó noha kixin nchónhya chojni sítja, ¿ntá nkekuénté kixin naxa tjanchankía kixin nkexro tí kuákóxian? —ichro sín.

32 Ntá kuinkátjía ch'án tsjehe ch'án nkuixín kixin tsonohe ch'án nkexro tí kuákóxin tí ké ch'án.

33 Ntá tí tjan a na mé chrakon tjan síxranka tjan ó nohe tjan kixin ó kuítóhe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan.

34 Ntá ntácho ch'ín Jesús kixin:

—Xjeenni, kaín asán kuinkachónkia tí janhan ntá kuítóha jína. Ijie la kjuaxróxin sátsjia ntqo la ó kuítóha jína a —ichro ch'án.

35 Na ntá naxa tjenixja ch'án ntá ó kui chojni kujxin sín ntqo tí ch'ín t'etqan tí njnko. Ntá chénka sín ch'án kixin:

—Xjaan na ó kjuixin k'uén. ¿Nkekuénté naxa chjehé xrā tí Maestro a? —ichro sín.

36 Ntá ch'ín Jesús na ántosēn ch'án tí chrónka sín ntá nixjehē ch'án tí ch'ín t'etqan tí njnko ntácho ch'án kixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín.

³⁸ Na ntá tió kjujji sín tí ntøe tí ch'ín t'etøan tí n̄nko na k'uikon sín kixin imá sítjité sín tsjankãma sín tí xjan a.

³⁹ Ntá k'uixenhen ch'ín Jesús nchia kjuanchankí ch'án kixin:

—¿Nkekuënté ánta tjasitérá tsjankãmará tí xjan a? Tí xjan na tsík'enhya xjan na tjeua xjan —ichro ch'án.

⁴⁰ A ntá kjuanoá sín ch'án. Ntá k'uetøan ch'án kixin kaín sín sátsji sín ntója. Ntá kjuiko ch'án tí it'e la ko tí iné xjan la ko tí iy'á sín xriko ch'án ntá k'uixenko sín ch'án tí tjen tí xjan a.

⁴¹ Itsé ch'án tja xjan ntá nkívøe xjan mé nixjèexin ch'án ntáchro ch'án kixin:

—Talita, cumi —mé t'axrjexin kixin: Lonchí, tétuãghan kixin t'áya.

⁴² A ntá tí xjan a ó chóna tjan teyó nánó na mé tuénxin k'uínkatjen tjan ó jina tji tjan. Ntá kaín tí chojni s̄in ntiha la chrakon sín k'uikon sín x̄ikaha.

⁴³ Ntá fuerte k'uetøan ch'ín Jesús kixin chróchenkahya sín ninkexró. La kjaxin k'uetøan ch'án kixin tsjanjon sín nkehe sine tjan.

6

Ch'ín Jesús kjuák'e ch'án chjasin Nazaret

(Mt. 13.53-58; Lc. 4.16-30)

¹ A ntá chr'éxin k'uaxrjexin ch'án chjasin ntiha. Ntá jehe ch'án la ko tí sín k'uájiko ch'án na mé sájuí sín Nazaret tí chjasin tsík'ánkixin ch'án.

² Na ntá tió kui tí yaon t'ok'éhe sín ntá kjuankixin ch'án kjuakoxin ch'án tí n̄nko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxrakohe tí ch'ín i kaín tíhi? ¿Nketí kuixin tí kjuaxrexinkaon chóna ch'án la ko tí kjuaxroan tjasin ch'án?

³ ¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxra tahya sín kuentá nkerí ch'e ch'án.

⁴ Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntøe ch'án na mé tjikosáyehya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaon ikja iso chojni níhi kjuínchekitohe ch'án sín jina.

⁶ Ntá chrakon ch'án kixin x̄ikaha kuítekakuenhya sín ch'án. Na ntá k'uáji ch'án tí chjasin ntsínsi chjinaxón ntiha kjuako ch'án.

Ch'ín Jesús mé ichr'án tí teyó sín kixin sátsji sín tsjikjako sín itén Dios

(Mt. 10.5-15; Lc. 9.1-6)

⁷ Na ntá k'uíyehé ch'ín Jesús tí teyó sín k'uajiko ch'án a. Ntá kjuankixin k'uetuenhen ch'án kixin yóyó yóyó sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jinhya chóna chojni.

⁸ La ko k'uetøan ch'án kixin ninkehó tsjikohya sín kuente ntja. Jehó tí nta tjixin sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon.

⁹ Na ko toqatè ó tsjanka sín la ko tsjiko sín jehó tí ka tjejóya sín ó.

10 Kǵaxin ntáchro ch'án kixin:

—A ntá tí ts'ixenhénrǵa ijnko nchia a ntá ntaha tsjanjon sín kjuachaxin na ntahó chókuitohará. A ntá tsjixinjian tí xra ntá sátsjixinrá ntiha.

11 Na ntá tí tsjasánrǵa ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókǵuákoherǵa sín na ntá t'axrǵéxinrá tí chjasin a ntá ts'oxénjinrá tí nche chóna tǵtǵará kixin xǵkaha tsǵákoxinrá kixin ntoáhya kǵuich'e tí jehe sín. A ntá chaxín ntáxrjan kixin tí yaon tsitǵexín ijǵé chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

12 Na ntá sǵkǵuǵa sín kuinkǵkǵakohe sín tí chojni a kixin mé chrókǵuitóxinhin sín ntǵe sín.

13 La ko kǵaxin kuakitsje sín itsǵé tí nchǵkuen tí jínahya chóna chojni. Na ko aceite mé kuǵkǵite sín itsǵé chojni níhi a la ntá kuitǵe sín jina.

Ik'uéen ch'ín Juan Bautista
(Mt. 14.1-12; Lc. 9.7-9)

14 Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kǵá tí ch'ín Juan Bautista mé ó tsíxechón ch'án inaá kixin xǵkaha tí kjuachaxin chóna tí ch'ín a —ichro ch'ín Herodes a.

15 A ntá iso sín ntáchro sín kixin:

—Kǵá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kǵá ijnko nkexro yóhe tí sín k'uékjako itén Dios ósé —ichro sín.

16 Ntá kuínhin ch'ín Herodes tíha ntá ntáchro ch'án kixin:

—Kǵá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

17 Méxra tí ch'ín Herodes mé tsík'etǵoan ch'án kixin tsontetoxín tí ch'ín Juan cadena tsjak'echjina ch'án kixin xǵkaha tsíkjanhia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuǵkǵa tí tjan a kixin ts'óna ichjién ch'án.

18 A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kǵchuá —ichro ch'án.

19 Mé xǵkaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kǵánchó xitjahya

20 kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jina la ko tǵóá asén la méxra kuitǵehya ch'án kixin jehe tjan chrók'óyán tjan ch'án. A ntá kénhyó kienxín ch'án la kǵjonté kóxrjínhin ch'án tí nkehe kuínhin ch'án kjuako ch'ín Juan.

21 A ntá tí tjan Herodías mé kjuacha tjan tí yaon kia tsíkǵitoxinhin nánó tí ch'ín Herodes a kixin tsík'iyehǵe ch'án tí síxreé la ko tí sín k'uéǵuǵenhen tí sín soldado la ko tí sín t'etǵoan estado Galilea kixin itsi sín ntǵe ch'án kixin síin kia.

22 A ntá tí xjeen tí tjan Herodías mé k'uúixenhen tí tǵejó sín, a ntá ité tjan, la kóxrjínhin ch'ín Herodes la ko kǵin tí sín tǵejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsǵǵahǵa —ichro ch'án.

23 Ntá kǵuínchenohe ch'án Dios ntáchro ch'án kixin tsjanjon ch'án tí nkehe tsjanhia tjan kǵjonté jnkosiné tí chjasin t'etǵoan ch'án.

24 Ntá jehe tjan na mé kuínhin tjan ntá sákjuí tjan chénka tjan ìné tjan kixin tsintáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí ìné tjan mé ntáchro kixin:

—Ijie la itjia tjanchia tí kja tí ch'ín Juan Bautista, ichrúa —ichro tjan.

25 **A** ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kixin:

—**A** ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

26 Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsíkinchenohe ch'án Dios la ko tsíkinhin kaín tí sín tsík'íyehé ch'án, la ntá xitjahya tsontáchro ch'án “Náhi” tí nkehe kjuanchia tjan.

27 Na ntá tuénxin k'uētuenhen ch'án ijnko ch'ín soldado kixin tsjikao ch'án tí kja ch'ín Juan a.

28 Ntá tí ch'ín soldado mé sákjuí ntqechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuikénhen tjan ìné tjan.

29 Na ntá kuínhin kaín tí sín k'uék'ajiko ch'ín Juan kixin xikaha tsíkonhen. Na ntá sákjuikakja sín tí cuérpoe ch'án ntá kjuikao sín ntá sákjuikjává sín.

*Ch'ín Jesús mé kjuanjon nkehe kjóne in'ó mil chojni
(Mt. 14.13-21; Lc. 9.10-17; Jn. 6.1-14)*

30 **A** ntá chr'éxin tí sín k'uájiko ch'ín Jesús a na mé ó kjan sín tí tjen ch'án ínaá, chrónka sín nkexrí tí xra kjuich'e sín na ko nkexrí kjuako sín.

31 **A** ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásitji la ko síti nchónhya chojni na ntá xrankahya ts'ejó sín sine sín.

32 Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárcq sákjuí sín ijnko nonte jehó tjan.

33 Na ntá itsjé chojni k'uikon sín kixin sákjuí sín la ko kjuátsoan sín kixin ch'ín Jesús. Ntá xrákuaxin sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús.

34 Ntá k'uínkajinxin ch'án tí ntabárcq, a ntá k'uikon ch'án kixin nchónhya chojni síin ntiha ntá kujikonóhéhé ch'án tí jehe sín na mé éxi yóhé kolélo tjejó sín chóntahya va nkexro ts'ayakonhen va. Ntá kjuankixin ch'án kjuakohé ch'án sín nchónhya nkehe a.

35 Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kixin:

—Ntá ó kóntó la kohya ninkexró tjejó ntihí

36 na ntá jaha chrókuítóhé sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

37 **A** ntá ch'ín Jesús kjuátéhe ch'án ntáchro ch'án kixin:

—Chjehé sín nkehe sine sín —ichro ch'án.

Ntá kjuátéhe sín ntáchro sín kixin:

—¿Á tsjik'enani iyó ciento denario niqtja tsochjeheni sin sine sín ní? —ichro sín.

38 Ntá ch'ín Jesús mé kjuanchankíhi ch'án sín kixin:
—¿Nkejain niotja chontará? Sátjitsjehérá —ichro ch'án.

Ntá sákjuitsjehe sín na ntá chrónka sín kixin:

—In'ó niotja la ko yaá koche mé siín —ichro sín.

39 Na ntá k'uetöan ch'án kixin kaín xín sín chrók'uixitjaxin sín tí chrítaón tí ka yo a.

40 Na ntá xikaha kójnkojié sín ciento sín la ko cincuenta sín k'uixitjaxin sín.

41 Na ntá ch'ín Jesús kuákja ch'án tí in'ó niotja na ko tí yaá koche ntá konta ch'án nkajni ntá kjuanchia ch'án kjuasáyé Dios. Na ntá kóchrít'o ch'án tot'o tí niotja a ntá chjéhe ch'án tí sín k'uájiko ch'án kixin ts'ókikayehe sín sine tí sín siín a la ko kjaxin kóchrít'o ch'án tí yaá koche ntá k'ókikayehe sín kixin sine sín kaín sín.

42 Ntá kaín xín sín kjóne sín kókjehe sín.

43 A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'o tí niotja la ko tí koche tsixehe.

44 A ntá tí sín kjóne na mé in'ó mil chojni ntoa.

*Ch'ín Jesús mé tjitaón ntayaon
(Mt. 14.22-27; Jn. 6.16-21)*

45 A ntá tuénxin k'uetuenhen ch'ín Jesús tí sín k'uájiko ch'án kixin ts'it'ótjen sín tí ntabárcö a ts'atöye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuítöhe ch'án nixjehe ch'án kaín tí sín siín a.

46 Kjuixin nixjehe ch'án sín na ntá jehe ch'án chrin ch'án ijnko jna tsonixjeexin ch'án Dios.

47 A ntá tió k'uixin tie ntá tí ntabárcö na mé ó kjuíji jnkösiné ntayaon, a ntá jehe ch'án jehó ch'án kjuíji ch'án chrínta ntayaon.

48 Ntá kotohe ch'án k'uikon ch'án kixin imá xra tjiko sín tí ntabárcö a kixin tí xrintö imá chjéhe. Nantöye a mé sákjuichréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjuí ch'án.

49 A ntá tí k'uikon sín kjuítaón ch'án nta, ntá kjuenkayáxin sín kixin kjuacha sín, ichro sín, ntá k'óyako sín

50 kixin kaín sín k'uikon sín ch'án la chrakon sín. Na ntá jehe ch'án mé tuénxin nixja ch'án ntáchro ch'án kixin:

—Chrakonhyará. Janhan tíhi —ichro ch'án.

51 Ntá k'ujt'ótjen ch'án tí ntabárcö tí tjejó sín, a ntá tí xrintö la ó k'uixratá. Ntá imá chrakon sín kixin xikaha kónhen

52 kixin kienxínhya sín tí kjuaxroan kjuích'e ch'án kuente tí niotja kixin naxa kénhya asén sín kuinkáchónki sín ch'án.

*Ch'ín Jesús mé kjuínchekitöhe jina tí chojni níhi tí nonte Genesaret
(Mt. 14.34-36)*

53 Ntá tió k'uátöye sín tí ntayaon ntá kjuíji sín tí nonte Genesaret ntá kjuak'echroé sín tí ntabárcö a tí chrínta nta.

54 Na ntá tió k'uínkajinxin sín tí ntabárcö, a ntá tí sín siín ntiha tjoka kjuátsöan sín tí ch'ín Jesús.

55 Ntá sákjuí sín nkuixin chjinaxón ntiha kjuankixin sín kjuíkaó sín tí şinníhi tinkátsénki sín kjuíkaó sín tí tjen ch'ín Jesús.

56 La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí şinníhi a chrínta ntja. Na ntá chrónóhehe sín tí ch'ín Jesús

kixin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jína.

7

Tí nkehe nchekjita qsen chojni

(Mt. 15.1-20)

¹ A ntá iso sín fariseo la ko iso tí sín tjako tí ley kujxin sín chjasin Jerusalén ntá kóhchinehe sín tí ch'ín Jesús.

² Tí sín a, tió k'uúkon sín kixin iso tí sín k'uújiko ch'ín Jesús mé k'óntihya sín tja sín na kjónté ine sín mé t'axrjexín kixin kjuínchexiteyáhya sín tí ley, ntá kjonta tí sín a.

³ (Mé xikaha kjuích'e sín kixin tí sín fariseo la ko kaín tí sín judío mé kuinkáchónki sín éxi k'uékjich'e tí sín táda ósé kixin ná t'òntó itja sín ntá sine sín.

⁴ Na ko tí tsokjanxin sín ntasin ná t'ónti sín ntá sine sín. Na ko kjaxin itsjé í so nkehe tinkáchónki sín, éxi tjonemá sín tí vaso t'iyá sín nkehe la ko tí nchésen la ko tí chj chjányan nkehe ne sín la ko tí kámé sín nchetjóá sín.)

⁵ Méxra tí sín fariseo la ko tí sín maestro tjako tí ley a na mé kjuanchankihi sín tí ch'ín Jesús kixin:

—¿Nkeuènté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjío ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátéhe ch'ín Jesús ntáchro ch'án kixin:

—Ntoá tsíchronka ch'ín Isaías ósé k'uéchrónka iten Dios tsíntáchro ch'án kixin ntoáhya tsjenkayáxinrá tí jahará kixin xikihi tsíkjin ch'án ntáchro ch'án kixin: Tí chojni tí chjasin í ir'va ó xraxinkakonxín sín tí janhan, a ntá tí qsen sín ikjin kuítóhe sín tí janhan

⁷ Méxra ó chónkó tóhchina sín xraxinkaon sín tí janhan, kixin tí nkehe tjako sín la tí nkehe tsík'etqan chojni ó.*

Mé xikaha ichro itén Dios.

⁸ Ntá jahará kuítóhérá tí nkehe tsík'etqan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'íará nkehe, la ko kjaxin í so nkehe yóhe tinkachónkirá —ichro ch'án.

⁹ Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xikaha títóhérá ntáha tí nkehe tsík'etqan Dios.

¹⁰ Tsíntáchro ch'ín Moisés kixin: “Tsochonteherá kjuasáyé it'ará la ko inará”, la ko “A ntá tí nkexro t'ántaxínhin it'é o ñé la chrók'óyán sín.”†

¹¹ A ntá jahará ntáchrórá kixin ó nchoxon kixin ijnko nkexro tsochénka it'é la ko ñé kixin: “It'eni, ñéni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios).

¹² A ntá xikaha jnkójín nkexro tsontáchro ch'án tíhi ntá jahará tsontáchrórá kixin í t'ichjánxinhya tsjinkitsa ch'án tí it'é ch'án la ko tí ñé ch'án.

¹³ A ntá tí xikaha la títóhérá tí nkehe tsík'etqan Dios éxi sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhe tíha —ichro ch'ín Jesús.

¹⁴ Na ntá k'uúyehé ch'ín Jesús tí chojni ínaá ntáchro ch'án kixin:

* 7:7 Isaías 29.13 † 7:10 Éxodo 20.12; 21.17

—Tinhínrǎ kǎin rá tí nkehe ntáxrjan la ko tiénxinrá.

¹⁵ Tí nkehe ine chojni la jehya jie tíha. Tí nkehe t'axrjeníxin asén chojni mé jie tíha.

¹⁶ Tí tjinkáonrá chrókuinhínrǎ la chrókuinhínrǎ —ichro ch'án.

¹⁷ A ntá tió kuitohe ch'án kǎin tí sín tsíkóchjina a na ntá jehe ch'án la ko tí sín k'uájiko ch'án mé k'uixenhen sín nchia. Na ntá kjuanchankíhi sín ch'án kíxin nkexrí t'axrjénin tí nkehe kjuako ch'án a.

¹⁸ Na ntá ntáchro ch'ín Jesús kíxin:

—ǎ kjaxínrǎ tiénxinhyará? ǎ noahyarǎ kíxin tí nkehe ineni na jehya jie

¹⁹ kíxin jehya asénni sátsji? Tí nkehe ineni na sátji nkaya tseeni na ko xik'axrje inaá —ichro ch'án.

Mé t'axrjénin kíxin tí nkehe sineni la jehya jie.

²⁰ Ntá ntáchro ch'ín Jesús kíxin:

—ǎ ntá tí nkehe t'axrjeníxin chojni na mé jie táha.

²¹ Nkaya asánrǎ mé t'axrjeníxin tí jínahya tjenkáyáxinrǎ, la ko tí tjachehe kíchuárǎ, la ko tí tjinkáonrá tsochontará chojni chjin ókjé, la ko tí t'oyán kíchuárǎ

²² la ko tí chrókugerǎ, la ko tí tjaké asánrǎ tí nkehe chóna ókjé sín, la ko tí jínahya ch'ehérǎ kíchuárǎ, la ko tí kjuach'ia xríkoarǎ la ko tí jínahya tjenkáyáxinrǎ, la ko tí chjinoxínhanrǎ, la ko tí ch'énarǎ kjuach'ia, la ko tí kjuahnke chontará, na kó ti chontahyarǎ kjuaxrexinkaon jína.

²³ Kǎin tí nkehe jínahya a mé t'axrjeníxin chojni, la mé tjasixín sín jie.

*Ijnko tjan tsíkjixin kjín mé kútekaon tjan tí ch'ín Jesús
(Mt. 15.21-28)*

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án injko nchia kíxin tjinkakonhya ch'án kíxin chrókónohe chojni kíxin ntaha tjen ch'án. Kjánchó xitjahya kjuák'emǎ ch'án ntiha.

²⁵ Na ntá injko iné injko tjan tjarisoá chóna injko nchakuen tí jínahya mé kuínhin nkehe tí xrǎ ch'e ch'ín Jesús kíxin tjasin ch'án kjuaxroan, ntá tuénxín kui tjan kjuák'exín toch'in tjan chrínki toté ch'ín Jesús.

²⁶ Na mé jehe tjan tsíkjixin kjín, na mé tsíkjixin tjan nó nació n Sirofenicia. Na ntá jehe tjan a mé kui tjan chrónóhehe tjan tí ch'ín Jesús kíxin chrókuakitsje ch'án tí nchakuen tí jínahya chóna xjeen tjan.

²⁷ Ntá ntáchro ch'ín Jesús kjuátéhe ch'án kíxin:

—Títóhé senó chrókjóne tí xjan. Jehya tí jína chrókuakítsjahǎ xjan tí niótja ntá chrótjahǎ konjǎ chrókjóne va —ichro ch'án.

²⁸ Ntá jehe tjan kjuátéhe tjan ntáchro tjan kíxin:

—Chaxín xíkaha, Ìnchéni. Kjánchó kjónté tí konjǎ tjejoyánkí mesa ine tí tot'o niótja tóxènjín tí chánjan —ichro tjan.

²⁹ Na ntá ntáchro ch'ín Jesús kíxin:

—Táha la chaxín ntoá ntáchrua. Sátjia kíxin tí nchakuen tí jínahya ó k'uaxrjénin tí xjaan —ichro ch'án.

³⁰ ǎ ntá tió kjuíji tjan ntóe tjan, na ntá k'uíkón tjan kíxin tí xjeen tjan na mé ó ntoá tjetsínkaták'ǎ xjan tí cama kíxin ó tsik'axrje tí nchakuen tí jínahya a.

Ch'ín Jesús mé kjuínchekitóhe jína injko ch'ín tienhya la ko nixjahya

³¹ Ntá ch'ín Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea.

³² Ntá kuikao sín ijnko ch'ín tienhya na ko ntoáhya nixja ch'án. Ntá chrónóhehē sín tí ch'ín Jesús a kixin tsjak'etja tja ch'án chrhtaón kja tí ch'ín a kixin tsitóhe ch'án jina.

³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhén ch'ín Jesús tatsjon tí ch'ín tienhya. La ko kjaxin tí dedo tja ch'án mé kuikite ch'án ntaté ch'án ntá kjuínchekákóxin ch'án nejen tí ch'ín nixjahya a.

³⁴ Ntá konta ch'án nkajní k'uáváxin ch'án na ntá nixjehē ch'án tí ch'ín tienhya a, ntáchro ch'án kixin:

—Efata —mé t'axrjexín nkívee sín kixin: ¡Tsoxitjehē!

³⁵ Na ntá tuénxín xítjehē tatsjon tí ch'ín tienhya ntá kuínhin ch'án la ko kuitóhe jina tí nejen ch'án, ntá jina nixja ch'án.

³⁶ Ntá ch'ín Jesús k'uetóan ch'án kixin ninkexró tsochenkahya sín. Ntá kjónté imá k'uetóan ch'án ntá ántosén sín kjónté íchá xrichronka sín.

³⁷ Na mé imá chrakon sín ntá ntáchro sín kixin:

—Kaín nkehe ch'e ch'án la jina. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjón nkehe kjóne noó mil chojni (Mt. 15.32-39)

¹ A ntá ijnko yaon nchónhya chojni k'uixikóchjina inaá. A ntá chóntahya sín nkehe sine sín. Na ntá ch'ín Jesús mé k'uíyehē ch'án tí sín k'uájiko ch'án, a ntá ntáchro ch'án kixin:

² —Imá tikonógha kaín tí sín i kixin ó ní yaon tjékian sín ntihi ntá chóntahya sín nkehe sine sín.

³ Ntá chrókuétuánhya sín sáchrókjui sín ntóe sín tí naxa nehya sín kixin ntja ó chrókótiénxin sín kixin iso sín la imá kjín tsíkijxin sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjóne kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'ín Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uetuénhen ch'án kaín xín sín kixin ts'ixitjaxin sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'o ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayehē sín tsakja kaín xín tí sín siín a.

⁷ Na ko iso koche ntsínsí chóna sín. Ntá ch'ín Jesús kjuanchia ch'án kjuasáya ntá k'uetóan ch'án ts'óxíkayehē sín kjaxin.

⁸ Na mé kaín xín sín kjóne sín na kókjehē sín. Ntá chr'éxin naxa kjuínchekaon sín yato ntaxra tí tot'o tí nkehe tsíxehē.

⁹ Na mé chjina noó mil chojni kjóne sín. Ntá ch'ín Jesús mé nixjehē ch'án sín sákjuí sín

10 ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabárc̣o a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jié
(Mt. 16.1-4; Lc. 12.54-56)

11 Na ntá kui iso sín fariseo kjuankíxin sín tjo sín tí ch'ín Jesús kjuanchehe sín ch'án kíxin chrókjuakoxín ch'án ijnko kjuaxroan jié kuente nkaya nkajní kíxin tjinkaon sín chrókjuachaxín sín ch'án.

12 A ntá ch'ín Jesús na mé k'uáváxin ch'án ikjín kjanxín asén ch'án ntá ntáchro ch'án kíxin:

—¿Nkekuénté kíxin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxínhya —ichro ch'án.

13 Na ntá kuitóhe ch'án tí sín a, ntá xík'it'ótjen ch'án tí ntabárc̣o ntá sákjuí ch'án í jnko tóhe ntayaaon inaá.

Tí xroan nchek'ánki tí niotjé tí sín fariseo
(Mt. 16.5-12)

14 Ntá k'uitjāyehen sín tsíkjikohya sín nkehe sine sín. Jehó jnkokoá niotja chóna sín nkaxenhen tí ntabárc̣o a.

15 Ntá ch'ín Jesús k'uetuēnhen ch'án tí jehe sín kíxin:

—Chrókóxakonhanrá kíxin tí xroan nchek'ánki niotjé tí sín fariseo la ko niotjé tí ch'ín Herodes a —ichro ch'án.

16 Ntá tí sín xriko ch'án mé kjo sín kíchó sín kíxin:

—Mé xíkaha ichro ch'án kíxin tsíkjikohyani niotja.

17 Ntá kónohe ch'ín Jesús kíxin nkehe tí kjo sín kíchó sín ntá ntáchro ch'án kíxin:

—¿Nkekuénté tjórá kíxin chontahyará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios?

18 ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará?

19 Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'o niotja naxa kjuenájinnrá? —ichro ch'án.

Ntá jehe sín kjuátēhe sín ntáchro sín kíxin:

—Teyó ntaxra tí nkehe kjuenájinni —ichro sín.

20 Xíntáchro ch'ín Jesús inaá kíxin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'o niotja kjuenájinnrá? —ichro ch'ín Jesús.

Ntá ntáchro sín kíxin:

—Yato ntaxra —ichro sín.

21 Ntá ch'ín Jesús ntáchro ch'án kíxin:

—Kjónté xíkaha la, ¿á naxa tiénxinhyará? —ichro ch'án.

Ch'ín Jesús mé kjuínchekitohe jína ijnko ch'ín t'ikonhya tí chjasin Betsaida

22 A ntá chr'éxin kjuíji sín chjasin Betsaida, a ntá ikui iso sín kujukao ijnko ch'ín t'ikonhya. Ntá chrónóhē sín tí ch'ín Jesús kíxin chrókjuinchekitóhe ch'án jína tí ch'ín a.

23 Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kujukitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kíxin:

—¿Á ó t'ikuan ntsí? —ichro ch'án.

24 Ntá ntáchro tí ch'ín t'ikonhya kíxin:

—T'ikonna chojni, kjánchó éxí nta tsjehe itji —ichro ch'án.

²⁵ Ntá ch'ín Jesús mé xíkjak'etja tja ch'án inaá tí kon tí ch'ín t'ikonhya a. A ntá tí ch'ín k'uikonyha kuítõhe ch'án jína la jína t'ikon ch'án kaín nkehe.

²⁶ Na ntá ch'ín Jesús mé k'uetuñhen ch'án tí ch'ín k'uék'ikonhya kixin sátsji ch'án ntõe ch'án ntáchro ch'án kixin:

—Chrók'uixenhya chjasin la ko ninkexró chróchenkahya ntiha —ichro ch'án.

Ch'ín Pedro chrónka ch'án kixin ch'ín Jesús mé tí nkexro Cristo

(Mt. 16.13-20; Lc. 9.18-21)

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipino. A ntá tí ntja mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

²⁸ Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín inaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuátõhe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

³⁰ Ntá k'uetõan ch'ín Jesús kixin tsochenkahya sín ninkexró.

Ch'ín Jesús chrónka ch'án kixin ts'en ch'án

(Mt. 16.21-28; Lc. 9.22-27)

³¹ Na ntá kjuankixin kjuako ch'ín Jesús kixin tí Xjeñ Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuente njnko la ko tí sín t'etõan kuente tí sín nchát'á la ko tí sín maestro tjako tí ley. A ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án inaá.

³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án.

³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxí tjenkayáxin Dios. Náhi. Jaha tjenkayáxian éxí tjenkayáxin chojni ó —ichro ch'án.

³⁴ Ntá ch'ín Jesús mé k'uíyehẽ ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkójnra tjkáonra tsochréhéra tí janhan na t'ichjánxin tsitõhéra kaín tí nkehe tjaké asanra na ntá tsamará tí ntacruz kuentára, a ntá tsochréhéra tí janhan.

³⁵ A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsáa.

³⁶ ¿A ntá nkehe tsonhen tí chrókjuacha ijnko chojni chróchóna kaín nkehe síin chjasintajni, a ntá kjuachón chrókjuinchek'itjáyan?

³⁷ ¿Nkehe chrókjuenka chojni kixin chróchóna tí kjuachón?

³⁸ A ntá jnkójn nkexro tsõsuehẽ kixin tinkáchónki tí janhan la ko tí tan kuentana nkayakon tí chojni jínahya chóna jie la kjaxin tí Xjeñ Dios K'óna

Chojni tsoqsuèhe ch'án tsonáchro ch'án kixin chóxin ch'án tí jehe sín tió tsokjan ch'án tsikao ch'án tí kjuachaxin jié kuènte It'é la ko tsikao tí sín ángel.

9

¹ Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naḡa ts'énhyará ts'ikonjjará itsi tí kjuachaxin ts'etqan Dios —ichro ch'án.

*Ch'ín Jesús mé k'uixitoxin nkexrí tsjehe ch'án
(Mt. 17.1-13; Lc. 9.28-36)*

² Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuí sín jehó sín ijnko jna noi. Ntá ntiha mé xringhya k'uixitoxin óké nkexrí tsjehe ch'án k'uikon tí jehe sín.

³ A ntá iké ch'án tsík'óna imá tjákiní la ko imá tjóá éxi chrinta tsjehe, a ntá ntihi chjasintajni kohya ninkexró chrókjuen tí ka chrókuitohe imá tjóá xikaha.

⁴ Na ntá titáya k'uikuèn sín ntiha itjen tí ch'ín Elías la ko tí ch'ín Moisés tjejtójo sín tí ch'ín Jesús.

⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jina kixin tjejóni ntihi. Chrókuich'énani iní nchia la mé ijnko kuèntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án.

⁷ Na ntá xringhya ikui ijnko tjuj kjuák'etja chrítaón kaín xín tí tjejó sín. Na ntá chrikjan tí tjuj kuínhin sín itén ijnko nkexro nixja na mé ntáchro kixin:

—Tí nkexro í mé xjanna. Imá tjuahá ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxin sín tí jna ntá k'uetqan ch'ín Jesús kixin tsochenkahya sín ninkexró tí nkehe k'uikon sín hasta tsoxechónjian tí Xjeen Dios K'óna Chojni.

¹⁰ Ntá ninkexró chenkahya sín tí nkehe k'uikon sín. Na ntá jehó sín mé tjejtójo sín kixin nkehe t'axrxjén tí nkehe chrónka ch'án kixin tsoxechón ch'án inaá.

¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxin tsjasóte la ko tsojtinkakonhya sín.

¹³ Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxi kóxrjnhin sín éxi nixja tí xroon itén Dios kixin xikaha tsonhen —mé xikaha chrónka ch'ín Jesús.

*Ch'ín Jesús mé kjuínchekitohe jina ijnko xjan chóna ijnko nchakuen tí jínahya
(Mt. 17.14-21; Lc. 9.37-43)*

¹⁴ A ntá tió ikjan sín tí kuitohe tí í so sín k'uájiko ch'án ntá k'uikon sín kixin nchónhya chojni tsík'antatjen tí jehe sín. Kjaxin ntaha siín tí sín tjako tí ley ikjo tí jehe sín.

15 **A** ntá tuénxín tió k'uúikon sín tí ch'ín Jesús na ntá kaín sín kóchéhe sín tinká sín sákuíchréhe sín ch'án, tsonixjehe sín ch'án.

16 Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín í? —ichro ch'án.

17 Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan.

18 Kjónté nkerí tjen xjan la tí nchakuen tí jínahya mé tjáka xjan nonte, ntá ntalóxrjo sítixín ir'va xjan na netaón xjan neno xjan na méxra tjeheya xjan. Ntá xrjanóhā tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

19 Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákoahará? Xráqará ntihi tí xjan méhe —ichro ch'án.

20 Ntá kóchjinako sín tí xjan a. Na ntá tí nchakuen tí jínahya mé k'uúikon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntalóxrjo ir'va xjan.

21 Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xíkaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsí xjan.

22 **A** ntá jnkoyaxón tí nchakuen tí jínahya a mé tjákate xjan xrohi la ko tjákánki xjan intá kixin tjinkaon chrók'óyán tí xjan a. **A** ntá jaha zá tsjácha tsjínkítsani? La tikonóhéni tsjínkítsani —ichro ch'án.

23 Ntá ntáchro ch'ín Jesús kixin:

—¿Nkekuénté tjanchankina kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

24 Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

25 Ntá k'uúikon ch'ín Jesús kixin itsjé chojni kóchjina. Ntá nixjehe ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekiénhya chojni. Ijie la tétuanhan kixin t'axrjéxian tí xjan na ko tsitohé xjan la í tsokjanhya inaá —ichro ch'án.

26 Ntá tí nchakuen tí jínahya a na mé k'óyato la ko kjuínchek'aniáte tí xjan a inaá, ntá k'uaxrjéxín ntiha. Na éxi tsík'en xjan xíkaha tsjehe xjan. Ntá itsjé sín ntáchro sín kixin ó tsíkjixin tsík'en xjan, ichro sín.

27 Na ntá ch'ín Jesús mé tséhe tja tí xjan kjuínchek'inkatjen ch'án xjan.

28 Ntá ch'ín Jesús la ko tí sín k'uájiko ch'án k'uixenhen sín ijnko nchia. Ntá jehe sín kjuanchankíhi sín ch'án kixin:

—¿Nkekuénté kixin kjuachahyani kuakitsjeni tí nchakuen tí jínahya a? —ichro sín.

29 Ntá ntáchro ch'án kixin:

—Tíhi la t'ichjánxin kixin nchónhya tsochronóhéhé T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án

(Mt. 17.22-23; Lc. 9.43-45)

³⁰ A ntá tió sákjuixin sín ntíha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntíha tsonohé sín

³¹ kixin tinkákjakohe ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon nixin na ó tsoxechón ch'án inaá —ichro ch'án.

³² Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjexín tíha.

¿Nkexro tí imá tjetoan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntíha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kichuárá tí kuini ntíja? —ichro ch'án.

³⁴ Ntá jehe sín la táníkoá sín kixin tí ntíja kui sín tinkákjo kichó sín kixin nkexro tí imá ts'etqan.

³⁵ Ntá ch'ín Jesús mé kjuák'etjaxín ch'án ntá k'uíyehé ch'án tí teyó sín k'uájiko ch'án, a ntá ntáche ch'án sín kixin:

—Tí jnkojínrá tjinkáonrá chrókuétqanrá má ntá t'ichjánxin kixin tsjixixín tsochréhérá kaín sín, ts'ítuanhanrá la ko tsjínkítsará kaín xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkojín nkexro chrók'uáyéhe ijnko chánjan kixin tinkáchónki sín tí janhan la mé xíkaha chrók'uáyéhe sín tí janhan la ko kjaxín éxí chrók'uáyéhe sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjinkítsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:

—Maestro, k'uíkonní ijnko chojni na mé kjuachaxin ihnjá mé takitsjexín ch'án nchakuen tí jínahya chóna chojni. Ntá k'uētuenhenni ch'án kixin xíkaha chrókjuich'e ch'án kixin xrikoxyani ch'án —ichro ch'án.

³⁹ Ntá ntáchro ch'ín Jesús kixin:

—Nté tjtóhé ch'án kixin ninkexró tjasixín kjuaxroan kjuachaxin njina la tuénxín chrókjuacha chrók'uántaxína sín.

⁴⁰ Tí nkexro nínkakuenhyani la mé tjinkítsa tí jeheni.

⁴¹ A ntá jnkojín nkexro tsotjáhará kjónté ijnko vaso intá tsjanjonxín sín njina kixin jahará la tinkáchónkirá Cristo, ntáxrjan kixin chaxín ts'áyéhe sín nkehe.

Tí chojni tjasin jię mé tsjasóte sín

(Mt. 18.6-9; Lc. 17.1-2)

⁴² A ntá jnkojín nkexro chrókjuachroe ijnko xjan kixin chrókjuasin xjan jię tió tinkáchónki xjan tí janhan la íchá jína chrókjuincheteyá sín ch'án ijnko xro jię tsík'óna xrochre la chrókjuikákánki sín ch'án ntayaon.

⁴³ A ntá tí itjá tjasixián jię na mé íchá chrókójina chrókochrínjan kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuixian tí síin xrohi xitjahya ts'anaka,

⁴⁴ tí síin kosjntó t'enhya la ko síche xrohi ts'ankahya.

45 A ntá kǵaxin tí totá tǵásixián jǵe na íchá jína chrókochrínjian kǵixin kǵjonté jnkokoá totá mé tsochontaxián kǵjuachón. A ntá tí yóí totá la tíha sáchrókǵjuíxian tí siín xrohi xitjahya ts'anka,

46 tí siín kosǵnto t'enhya la ko síche xrohi ts'ankahya.

47 A ntá tí ikuan tǵásixián jǵe na íchá jína chrókuakitsjenkiá tí kuan a kǵixin kǵjonté jnkokoá kuan mé sáchrókǵjua tí tǵen Dios t'etǵoan. A ntá tí yóí kuan la tíha mé sáchrókǵjuíxian tí síche xrohi

48 tí siín kosǵnto t'enhya la ko siín xrohi ts'ankahya.

49 A ntá kaín nkexro t'ichǵjánxin tsǵasóte. A ntá kaín nkehe ts'áyéhe Dios chóna xǵjnta.

50 Tí xǵjnta la jína. A ntá tí chrók'uankehe tí jní la ntá xitjahya chrókóǵjní inaá. Jahará mé chrókóyóhará éxí xǵjnta kǵixin kǵjuaxróxin chrók'uejokoará kǵichuárá —ichro ch'án.

10

*Tjako ch'in Jesús kǵixin chrókǵjuákehya kǵichó sín
(Mt. 19.1-12; Lc. 16.18)*

1 Na ntá ch'in Jesús mé k'uaxrǵjén ch'án chǵasin Capernaum sáǵjuí ch'án nó estado Judea la ko nó tóhe ntario Jordán. Ntá nchónhya chojni kǵjnkotsé sín tí tǵen ch'án ntiha. Ntá kǵjuakǵhe ch'án tí jehe sín kǵixin xǵikaha kuènnen ch'án.

2 Ntá iso sín fariseo mé kóchǵinehe sín ch'án kǵjuanchankǵíhi sín ch'án nkehe, chrókǵuachǵxin sín ch'án. Ntáchro sín kǵixin:

—ǵÁ siín kǵjuachǵxin tsǵákehe chojni ntoa ichǵién? —ichro sín.

3 Ntá kǵjuátehe ch'án ntáchro ch'án kǵixin:

—ǵNkehe tí k'uetǵanhanrá tí ch'in Moisés? —ichro ch'án.

4 Ntá ntáchro sín kǵixin:

—Ch'in Moisés kǵuanjon ch'án kǵjuachǵxin kǵixin ts'óna iǵnko xroon tsakja tí ichǵién kǵixin ts'itǵjéxín kǵichó sín —ichro sín.

5 Ntá ch'in Jesús ntáchro ch'án kǵixin:

—Ntá jahará icha asánrá tǵitekǵonhyará ntá k'uetǵoan ch'án ts'óna tí xroon a.

6 Kǵjánchó tí xrankǵixín tió kǵjuích'éna Dios kaín xín nkehe la kǵjuích'éna ch'án iǵnko chojni ntoa la ko iǵnko chojni chǵjin.*

7 Méxra tí chojni ntoa tsǵtohe ch'án tí it'é ch'án la ko iné ch'án kǵixin tsakja ch'án ichǵién ch'án

8 ntá yóí sín ts'óna sín éxí jnkokoá chojni. Méxra jehya yaá chojni. Náhi, jnkokoá.†

9 Na mé xǵikaha tí kǵjuachǵxin kuènte Dios kǵjnkǵojéxín sín ntá jehe sín chrók'uitǵjéhya kǵichó sín —ichro ch'án.

10 A ntá tǵejó sín nchia ntá tí sín k'uájiko ch'án a mé kǵjuanchankǵíhi sín ch'án inaá kǵixin á xitjahya ts'itǵjíhi kǵichó sín.

11 Na ntá ntáchro ch'in Jesús kǵixin:

—Tí jnkǵjín nkexro tsǵákehe ichǵién ntá tsakja ch'án í jnko chǵjin na mé xǵikaha tsǵachehe ch'án tí tǵan tsíkótehe ch'án saoxín.

12 La ko kǵaxin tí chojni chǵjin tsǵkǵákehe xǵi tsakja tǵan í jnko chojni ntoa na mé xǵikaha kǵaxin tǵan tǵasin tǵan jǵe —ichro ch'án.

* 10:6 Génesis 1.27; 5.2 † 10:8 Génesis 2.24

*Ch'in Jesús kjuíncheyaon ch'án xjan**(Mt. 19.13-15; Lc. 18.15-17)*

13 Ntá kjuíkao sín xjan kixin tjinkaon sín tsjak'etja tja ch'in Jesús tí xjan a. Ntá tí sín k'uájiko ch'án mé kóninkakonhen sín tí sín kjuíkao xjan.

14 Ntá k'uíkon ch'in Jesús ntá kóninkaon ch'án ntáχρο ch'án kixin:

—Nté tjtóhéra tí xjan tsoxrakoa tí tén janhan la t'inkakuènhyará xjan kixin tí sín kuènte kjuachaxin kuènte Dios la mé tóyóhē éxí tí xjan a.

15 Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etóan Dios tí kjuachaxin kuènte ch'án —ichro ch'án.

16 Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

*Ijnko ch'in ntasoá rico nixjehe ch'án tí ch'in Jesús**(Mt. 19.16-30; Lc. 18.18-30)*

17 A ntá tió sákjuí ch'in Jesús inaá ntá xrakoa ijnko ch'in tinká ch'án kjuák'exín toch'in ch'án nkayakon tí ch'in Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrín? —ichro ch'án.

18 Ntá ntáche ch'in Jesús tí jehe ch'án kixin:

—¿Nkekuènté ntáchrúa kixin jína tí janhan? Jehó jnkokóá nkexro mé jína la tíha mé Dios.

19 Ntá jaha ó noha kixin nkexrí k'uetóan Dios kixin: “Chrókjuacheéhya kichuá la chrók'oyánhya chojni la chrókueehya la chrókjontahya kichuá la chrókjuich'iahya la ko chróchontehé kjuasáya it'á la ko ìná”‡ —ichro ch'án.

20 A ntá jehe ch'án kjuátehe ch'án ntáχρο ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

21 Ntá ch'in Jesús mé komá ch'án la ko tjuèhe ch'án tí ch'in a. Ntá ntáχρο ch'án kixin:

—Naxá t'itjáyán jnkokóá nkehe chrókjuich'e. Sátjia nchekjia kaín tí nkehe chonta. A ntá tí chichaon sìnchekjixián tí nkehe chonta la mé nchekjionhén tí chojni nòa, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

22 Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chónata ch'án.

23 Ntá ch'in Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xrá ijnko chojni chónata imá tsjé nkehe ts'ixenhen sín tí tjen Dios t'etóan —ichro ch'án.

24 Ntá tóxakonhen tí sín k'uájiko ch'án kixin xikaha ntáχρο ch'án. Ntá chrónka ch'án inaá kixin:

—Tí sín tjekonhen tí nkehe chónata sín na imá xrá ts'ixenhen sín tí tjen Dios t'etóan.

25 Antsí xráhya chrók'uátsínka ijnko kocamello ijnko tjar'in ntachica tjexrja. A ntá antsí má xrá ijnko ch'in chónata itsjé nkehe chrók'uixenhen ch'án tí tjen Dios t'etóan —ichro ch'án.

26 Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

27 Ntá komá ch'in Jesús tí jehe sín ntáχρο ch'án kixin:

‡ 10:19 Éxodo 20.12-16; Deuteronomío 5.16-20

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Inchéni, kaín ni mé kuítóheni kaín nkehe chóntani ntá chréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkójín nkexro tsítóhe ntøe sín la o tí kichó ntoa o tí kichó chjin la o it'é o iné sín o ichjién sín o xjeen sín o nontee kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón

³⁰ na mé ntihi chjasintajni tsochóna sín ciento veces nchónhya ntøe sín la ko éxi kichó sín la ko éxi iné sín la ko éxi xjeen sín ts'ikon sín itsjé chojni kjé la ko éxi nontee sín xikaha ts'ikon sín itsjé nonte. Kjónté tsjasóte sín ntihi chjasintajni ntá chr'éxin tsochóna sín tí kjuachón jnkochr'ín.

³¹ A ntá itsjé tí sín t'etøan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etøan sín tí ntiha.

Níxin chronka ch'ín Jesús kixin its'en ch'án

(Mt. 20.17-19; Lc. 18.31-34)

³² Ntá tjejóti sín chr'in sín tí ntia sátsji chjasin Jerusalén. Ntá ch'ín Jesús mé tjetaón ch'án ntia ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín inaá ntá kjuankixin ch'án chénka ch'án sín nkexrí tí nkehe tsonhen ch'án.

³³ Ntá ntáchro ch'án kixin:

—Ijje sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchat'á t'etøan la ko tí sín tjako tí ley. Ntá ts'etøan sín kixin its'en ch'án. Ntá sinchek'áyéhe sín ch'án tí sín jehya judío.

³⁴ Ntá jehé sín la tsjanoá sín tí jehé ch'án la ko ntaté sín tsjikite sín ch'án la ko tsjate sín ch'án ntá ts'óyán sín ch'án. Kjánchó tí yaon níxin mé tsoxechón ch'án inaá —mé xikaha ichro ch'ín Jesús.

Ch'ín Jacobo la ko ch'ín Juan tjanchia sín nkehe

(Mt. 20.20-28)

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétøanxián tí kjuachaxián jié na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'ín Jesús tí jehé sín kixin:

—Jahará la noahará nkehe tí tjanchaná. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'án.

³⁹ Ntá jehé sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehé sín kixin:

—Chaxín its'irá éxi tí nkehe tsjá its'ia la ko tsikiterá éxi tsikite janhan.

⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsikónoxín —ichro ch'án.

41 **A** ntá tió kuínhin tí ite sín xíkaha tsíntáchro tí sín a ntá kjuankíxin kónínkakonhen sín tí ch'ín Jacobo la ko tí ch'ín Juan.

42 Ntá k'uíyehé ch'ín Jesús kaín tí jehe sín ntá ntáche ch'án sín kíxin:

—Ó nohará kíxin tí sín t'etóan chjasintajni la imá t'etueñhen sín kaín chojni la ko tí sín imá tjetóan mé imá nchehnkehe asén sín kíxin ihyé sín ts'etóan sín.

43 Kjánchó jahará la xíkaha chrókjuich'erá. Náhi. Tí jnkojínrá tjinkáonrá chrókuétoanrá la chrókjuínkítsará tí í so sín.

44 **A** ntá tió jnkojínrá antsí chrókuétoanrá mé t'ichjánxin senó chrókjuákoxínrá chrókjuich'eherá kichuárá xra.

45 Kíxin tí Xjeen Dios K'óna Chojni mé kuihya ch'án kíxin chojni chrókjuich'ehe ch'án xra. Náhi. Ikui ch'án kíxin sich'ehe ch'án sín xra la ko ts'enyákonhen nchónhya chojni kíxin tsaáxin sín ch'án —ichro ch'án.

Ch'ín Bartimeo k'uék'ikonhya ch'án ntá ch'ín Jesús kjuínchekitqhe ch'án jína (Mt. 20.29-34; Lc. 18.35-43)

46 Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'ín ch'án Bartimeo ntá it'é ch'án mé it'in Timeo. Tjetjaxín ch'án chrínta ntja tjanchak'á ch'án.

47 Ntá kuínhin tí ch'ín t'ikonhya kíxin ó kuichjina ch'ín Jesús, mé tí nkexro kjuixín chjasin Nazaret, ntá tí ch'ín t'ikonhya kjuankíxin t'èya ch'án ntáchro ch'án kíxin:

—Jaha Jesús, tsík'axrjeníxian ch'ín David tikonóehéni —ichro ch'án.

48 Ntá nchónhya sín k'uetuñhen sín ch'án kíxin tsótání ch'án. Ntá íchá antsí má tsen t'èya ch'án ntáchro ch'án kíxin:

—Jaha, tsík'axrjeníxian ch'ín David tikonóehéni —ichro ch'án.

49 Ntá ntaó kjuák'e ch'ín Jesús. Ntá k'uetoan ch'án kíxin:

—T'jyehérá tí ch'ín a —ichro ch'án.

Ntá k'uíyehé sín tí ch'ín t'ikonhya ntá chénka sín ch'án kíxin:

—Tócháha la t'inkatjen kíxin tjet'iyaha ch'án. —ichro sín.

50 Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús.

51 Ntá ch'ín Jesús kjuanchankihi ch'án tí ch'ín a kíxin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntáchro ch'án kíxin:

—Maestro, tjinkaonni kíxin chrók'uikonni —ichro ch'án.

52 Ntá ntáche ch'ín Jesús tí ch'ín a kíxin:

—Ijje la jína sátsjia. Ó kuítqha jína kíxin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uikon ch'án ntá chréhe ch'án tí ch'ín Jesús.

11

Ntá ch'ín Jesús k'uixenhen ch'án chjasin Jerusalén (Mt. 21.1-11; Lc. 19.28-40; Jn. 12.12-19)

1 Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuñhen ch'ín Jesús iyó tí sín k'uájiko ch'án,

2 ntáchro ch'án kíxin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehérá va ntá tsjikoanará va ntihi.

³ A ntá tí jnkójín chojni tsjanchankíhará sín kixin nkekuènté xikaha ch'erá ntá tsontáchrora kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va.

⁵ Ntá iso tí chojni tjejó ntiha kjuanchankí sín kixin:

—¿Nkekuènté xikaha ch'erá tjasintankehérá tí kolócho a? —mé chro sín.

⁶ Ntá kjuátexín sín éxí k'uetqan ch'ín Jesús. Ntá kjuanjon sín kjuachaxin sátjiko sín va.

⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús.

⁸ Ntá itsjé chojni kuakitsje sín iké sín la kjuentoá sín tinkák'ikjínxín sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xráko sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankixin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kuixín kjuachaxin ihnié Inchéni.

¹⁰ Jína tí kjuachaxién Dios itsi mé ts'etuñhen tí nkexro k'uaxrjeníxín it'éni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uixenhen ch'ín Jesús chjasin Jerusalén la ko kjaxín k'uixenhen ch'án tí njnko jié tsjehe ch'án nkuixín tí nkaxenhen. Ntá ó kóntó ntá ch'ín Jesús sákjuiko ch'án tí teyó sín k'uájiko ch'án sákjuí sín chjasin Betania.

Ch'ín Jesús kóninkakonhen ch'án ijnko nta t'óna to higo tsík'ónahya to (Mt. 21.18-19)

¹² A ntá tí kóyaon ntá kjanxín sín chjasin Betania ntá ch'ín Jesús mé k'uén ch'án kjinta.

¹³ Ntá k'uíkon ch'án kjín kixin itjen ijnko nta t'óna to higo itsá kayoa. Ntá sákjuitsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to.

¹⁴ Ntá nixjehe ch'ín Jesús tí nta t'óna to higo k'uetuñhen ch'án tí nta kixin: —Í ninkexró sinehya tí to ts'óna tí jaha inaá —ichro ch'án.

A ntá tí sín k'uájiko ch'án mé kuínhin sín xikaha.

Ch'ín Jesús kjuínchetjóá ch'án njnko (Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uixenhen ch'ín Jesús nkaxenhen njnko a. Ntá kjuankixin ch'án k'uínkité ch'án tí sín nchekjixín nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá

¹⁶ la ko kjuanjonhya ch'án kjuachaxín kixin tsamá sín nkehe ts'ajixenhen sín njnko.

¹⁷ Ntá kjuakqhe ch'án sín ntáchro ch'án kixin:

—Ntáchro xroon itén Dios kixin: “Tí ntqna i mé it'in nchia tsonixjanaxín chojni nkuixín nació”, a ntá jahará tsíkjich'énará itjuéé xíche* —ichro ch'án.

* 11:17 Isaías 56.7; Jeremías 7.11

¹⁸ Ntá tí sín nchat'á t'etɔan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án.

¹⁹ Kjánchó ntá ó kóntó ntá k'uaxrjexín ch'án tí chjasin a sákjuí ch'án.

Ó tsíxámá tí nta t'óna to higo

(Mt. 21.20-22)

²⁰ A ntá tí nchítjen k'uátsínka sín tí tjen tí nta t'óna to higo ntá k'uíkón sín kixin ó tsíxámáxin nuèe tí nta.

²¹ A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakhén jna na ó tsíxámá nta —ichro ch'án.

²² Ntá kjuátɛhe ch'ín Jesús ntáchro ch'án kixin:

—Tinkachónkirá Dios.

²³ Chaxín ntáxrjan kixin jnkojínrá chróntácherá tí jnɔ i kixin: “Sátjixián ntihi tjíkjiankiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchrórá, ntá xíkaha chaxín tsonhen.

²⁴ Mé xíkaha ntáxrjan kixin kaín tí nkehe tsjanchehérá Dios tí tsítekáonrá kixin chaxín ts'ayéhérá ntá xíkaha tsonhen tsóxiteyá.

²⁵ A ntá tío tjejonixjehérá Dios ntá jnkojín nkexro naxa ninkákhénrá, la chrók'uitjáyahanhárá tíha kixin It'ará tjen nkaya nkajní kjaxin chrókjuinçek'itjáyan ch'án tí jie chontará.

²⁶ A ntá tí sinček'itjáyanyhárá tí ijje chojni ntá It'ará tjen nkaya nkajní la kjaxin sinček'itjáyanyhá ch'án tí jie chontará.

Tjančankíhi sín tí ch'ín Jesús nkehe tí kjuachaxin chóna ch'án

(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén inaá. Ntá xritjak'e ch'án nkaxenhen njnko ntá kóchjina tí sín nchat'á t'etɔan la ko tí sín tjako tí ley la ko tí sín táda t'etɔan njnko

²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xíkaha ch'e? ¿Nkexro tjáha tí kjuachaxin kixin xíkaha kjuich'e? —ichro sín.

²⁹ Ntá kjuátɛhe ch'ín Jesús ntáchro ch'án kixin:

—Ntá kjaxin janhan tsjánchánkíhárá ijnko nkehe, síná á chrókjuátɛhérá, ntá tsotjonkará nkehe tí kjuachaxin chonta janhan kixin xíkaha it'a.

³⁰ ¿A ntá nkexro k'uetuɛnhen ch'ín Juan kixin tsíkíte ch'án chojni? ¿Á Dios ní o á chojni ó? A ntá jie la tjátɛhérá —ichro ch'án.

³¹ Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'etuɛnhen tí ch'ín Juan ntá tsjančankí tí ch'ín a kixin nkekuénté kuítekakuɛnhyani ch'án.

³² ¿Á chróntáchroni kixin chojni ó tsík'etuɛnhen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'ín Juan mé k'ueñixja ch'án itén Dios.

³³ Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsóxrjanqahya nkexro kjuanjon kjuachaxin kixin xíkaha t'a —ichro ch'án.

12

Ch'in Jesús mé kjuíncheyóexin ch'án éxí chojni ch'ehya xṙá jína
(Mt. 21.33-46; Lc. 20.9-19)

¹ Ntá ch'in Jesús kjuíncheyóexin ch'án inaá ntáchro ch'án kixin:

—Itjen ijnko ch'in k'u'enkaxin ch'án itsjé ntanòa t'óna to uva nontee ch'án la ko kjuich'éna ch'án corral la ko kjuich'éna ch'án ijnko tòye ts'énya sín to uva. A ntá kjuich'éna ch'án ijnko tjat'ò noi kixin ts'it'ótjen ch'án tsokotohe ch'án.

A ntá kjuínchekjen ch'án tí nonte iso chojni ch'e xṙá. Ntá sákjuí ch'án kjin.

² Ntá tí kjuixraká tí yaon ts'óna to ntá k'u'etuenhen ch'án ijnko tí nkexro ch'ehe ch'án xṙá kixin sátsjikjanchehe ch'án tí sín ch'e xṙá jnkosiné tí to tsakja ch'án.

³ Ntá tí sín ch'e xṙá mé tsé sín tí ch'in a, kjuate sín ch'án ntá ninkehó chjéhya sín ch'án ntá sákjuí ch'án.

⁴ A ntá tí ìnché tí nonte mé xíchr'án ch'án tí í jnko nkexro ch'ehe ch'án xṙá. Ntá kjuíji ch'án ntiha ntá chjéhe sín ch'án xṙó kjuíncheníhi sín kja ch'án la ko k'uántaxínhin sín ch'án.

⁵ Ntá tí ìnché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìnché mé xíchr'án ch'án í so nkexro ch'ehe ch'án xṙá sákjuitsjehe sín, kjánchó iso sín k'u'ékon sín la í so sín la k'óyán sín.

⁶ Ntá jehe ch'án chóna ch'án jnkokoáxón xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochónthehe sín kjuasáyé tí xjanna”, ichro ch'án.

⁷ A ntá tí sín ch'e xṙá a tjo sín kíchó sín kixin: “Tí ch'in i mé ts'áyéhe kaín nkehe siín ntihi. A ntá jie ts'óyáni ch'án, a ntá jeheni ts'áyéhe ni kaín tí nkehe a”, ichro sín.

⁸ Ntá xikaha itsé sín ch'án k'óyán sín ch'án ntá kuakitsjexín sín ntøe ch'án tí nontee ch'án.

⁹ A ntá kjuanchankí ch'in Jesús ntáchro ch'án kixin:

—¿A ntá nkehe chrókjuich'e tí ìnché tí nonte a? Chrókui ch'án chrók'óyán ch'án tí sín ch'e xṙá, a ntá chróchjéhe ch'án ókjé chojni.*

¹⁰ ¿Á kjuínchekuáxinhyará jahará tí xroon itén Dios? Ntáchro xikihí: Tí xṙó náxjrónhya kuítøenta tí sín ch'éna tjat'ò, mé jie k'óna tí xṙó tjetøan.

¹¹ Mé xikaha kjuich'é Ìnchéni Dios, na ntá tíha mé ijnko nkehe kjuachrakon k'uikonní† —ichro ch'in Jesús.

¹² Ntá chrótsé sín tí ch'in Jesús chrókjuak'echjina sín ch'án kixin kienxín sín kixin kaín tí ntáchro ch'án la jehe ch'án k'uántaxínhin tí jehe sín. Kjánchó chrakon sín kixin nchónhya chojni kóchjina ntá kuítøhe sín ch'án ntá sákjuí sín.

¿A jína chrókjuenkehe sín gobierno?
(Mt. 22.15-22; Lc. 20.20-26)

¹³ A ntá ichr'án sín iso tí sín fariseo la ko iso tí sín kuènte ch'in Herodes kixin tsjanchankíhi sín ch'án iso nkehe kixin tí ntoáhya chrókjuatehe ch'án ntá jína chrók'ueka sín ch'án jie.

¹⁴ Ntá kjuíji sín tí tjen ch'in Jesús ntáchro sín kixin:

—Maestro, ó noheni kixin tí nkehe chrønka la chaxín tíha la ko jehya nkexrí tsjehe chojni tjenkayáxián kixin á jína sín, la ko ntoá tjákua ntje Dios. ¿Á jína

* 12:9 Isaías 5.1-7 † 12:11 Salmo 118.22-23

chrókjuenkehēni tí gobierno tí chichaon tjanchia? ¿Á chrókjuenkehēni sín ní o náhi? —ichro sín.

¹⁵ Ntá ch'ín Jesús kjuátsoan ch'án kixin jehya jína tjenkayáxin sín ntáchro ch'án kixin:

—Jehya jína kixin tjáchaxinráni. Xrákqará ijnko tí chichaon tjanchia sín tsotsjáha —ichro ch'án.

¹⁶ Ntá xrákqo sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrxjén tjenkáni tí chichaon i la ko nkexro ihnjé chóna? —ichro ch'án.

Ntá jehe sín kjuátēhe sín kixin:

—Tí ch'ín t'etqan mé tjenkáni ch'án —ichro sín.

¹⁷ Ntá kjuátēhe ch'ín Jesús ntáchro ch'án kixin:

—Chróchjehérá tí ch'ín gobierno t'etqan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kixin xikaha kjuátēhe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

¹⁸ A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kixin:

¹⁹ —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókuaqja tí tjan k'án a ntá tí xjeen sín mé ts'óna éxi xjeen tí nkexro tsík'en.‡

²⁰ Kjánchó k'uéjyo yato sín jnkokoá kichó sín. Ntá tí ch'ín sao mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjich'énahya sín.

²¹ Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjich'énahya sín xjan. A ntá tí ch'ín nixin kuákja ch'án tí jehe tjan ntá xikaha kónhen ínaa.

²² Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan.

²³ Ntá tió tsoxechón kaín xín chojni la, ¿Ntá nkexro ts'óna xii tjan kixin kayatoé sín tsíkótehe tjan? —ichro sín.

²⁴ Ntá kjuátēhe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios.

²⁵ A ntá tió tsoxechón tí chojni tsík'en la tsotēhya sín la ko tsjanjonhya sín xjeen sín kixin tsotēhe sín kixin tí sín tsík'en la éxi sín ángel ts'ejó sín nkaya nkajní.

²⁶ A ntá tí tsoxechón tí sín tsík'en, ¿á kjuinchekuáxinhyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§

²⁷ Méxra tí Dios i la jehya tinkáchónki tí sín tsík'en. Náhi. Jehē ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanchankirá —ichro ch'án.

‡ 12:19 Deuteronomio 25.5 § 12:26 Éxodo 3.6

Tí nkehe antsí imá tjetaan tsík'etqan Dios

(Mt. 22.34-40)

²⁸ Ntá kuí ijnko ch'ín tjako tí ley kjuák'ekinhin ch'án nkexrí kjuachaxin sín ch'ín Jesús. Ntá kuínhin ch'án kixin imá jina kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjetaan tsík'etqan Dios? —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Tí nkehe antsí tjetaan tsík'etqan Dios mé tñi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro.

³⁰ Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótuèxínrá.”* Mé xikaha tí nkehe antsí tjetaan tsík'etqan Dios.

³¹ A ntá tí nkehe yóxin tsík'etqan Dios la mé tóyóhē na mé ntáchro xikihí: “Chrótuèhérá kichuárá éxí tjuèxínrá asánrá,”† la kohya í jnko nkehe antsí má tjetaan tsík'etqan ch'án —ichro ch'ín Jesús.

³² A ntá kjuátehe tí ch'ín tjako n̄jnko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxón Dios la ko kohya í jnko Dios.‡

³³ Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótuèxínni Dios la ko chrótuèheni kichó ni éxí tjuèxínni asénni.§ Tíha mé antsí má sínkí. A ntá kaín tí ko chrók'óyánni chrókjuanjoni chróhjánxin chrítaon altar la kánhyó tjetaan tíha —ichro ch'án.

³⁴ A ntá tió k'uikon ch'ín Jesús kixin jina kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuènte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'ín Jesús kjuák'ekjako ch'án tí n̄jnko jíé. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjenixin tí ch'ín David?

³⁶ A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntihó tsétqan,

tsjixinjian kaín xín tí sín nínkakonhan la tsjachahya sín ts'etqan sín kixin jahvá mé tsétqan”*

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjokinhin sín kóxrjínhin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinikáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín.

* 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio 4.35 § 12:33 Oseas

6.6 * 12:36 Salmo 110.1

³⁹ Jehe sín xritjeyá sín tí nta ʔntsí náxrjón ts'ejóyá sín tí nkaxenhen n̄nko. La ko k̄jaxin tió sátsji sín tí sine sín xritjeyá sín tí nta ʔntsí náxrjón ts'ejókjen sín sine sín.

⁴⁰ La ko takitsje sín ntøe chojni k'án. La ko ch'iyexín sín chojni k̄ixin isé nixjehe sín Dios k̄ixin chrókuinhin chojni chróntácho sín k̄ixin imá jína tí jehe sín. Tí sín a mé ʔntsí má tsjasóte sín —ichro ch'án.

Tí ofrenda kjuanjon ijnko tjan k'án
(Lc. 21.1-4)

⁴¹ ʔ ntá jnkonaá mé ch'ín Jesús tjetj̄axin ch'án nkaxenhen n̄nko chók'èxin tjen tí ntacajón tjetóxroyéya ofrenda. Ntá tjetsjehe ch'án k̄ixin nchónhya chojni tinkáki sín chr'áxenhen sín chichaon tí ntacajón. La ko k̄jaxin nchónhya tí sín rico chr'áxenhen sín nchónhya chichaon tí ntacajón a.

⁴² Ntá k̄jaxin ntiha mé k̄jui ijnko tjan k'án nòa tjan ntá chr'áxenhen tjan tí ntacajón yaá chichaon kánhyó tje te sínkí.

⁴³ Ntá ch'ín Jesús k'uíyehē ch'án tí sín k'uájiko ch'án ntácho ch'án k̄ixin:

—Chaxín ntáxrjan k̄ixin tí tjan k'án nòa tjan ʔntsí tje te k'uikon Dios tí chichaon chr'áxenhen tjan tí ntacajón, ʔ ntá tí sín í so la kánhyó

⁴⁴ k̄ixin kaín sín la ó chichaon xéhe sín kjuanjon sín. Ntá jehe tjan la k̄jonté nòa tjan la kjuanjon tjan kaín tí chichaon k'uéchonta tjan chrók'uíte nkehe chrókjónē tjan —ichro ch'án.

13

Ch'ín Jesús chrónka k̄ixin tsòxika n̄nko
(Mt. 24.1-2; Lc. 21.5-6)

¹ ʔ ntá tió k'uaxrjexín ch'ín Jesús tí n̄nko jié ntá ijnko tí sín k'uájiko ch'án ntácho ch'án k̄ixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátēhe ch'ín Jesús ntácho ch'án k̄ixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kichó, la kaín tíha la tsòxika —ichro ch'án.

Tí nkehe tsonhen chjina tí tsjixixín
(Mt. 24.3-28; Lc. 21.7-24; 17.22-24)

³ ʔ ntá sákjui sín chrítaón tí jn̄a Olivo chók'èxin tjen tí n̄nko a. Ntiha kjuák'etj̄axin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntácho sín k̄ixin:

⁴ —Tjinkaonni tsòchronka nkesá tsonhen tíha la ko nkexrí tsònoexínni nkesá tsòxiteyá kaín tíha —ichro sín.

⁵ Ntá ch'ín Jesús kjuátēhe ch'án ntácho ch'án k̄ixin:

—Tóxakonhanrá t̄jtoéhyará k̄ixin ninkehró chrókjuít'ayahyará.

⁶ Nchónhya chojni tsi tsontácho sín k̄ixin jehe sín mé Cristo. Ntá x̄ikaha sich'iyehē sín nchónhya chojni.

⁷ ʔ ntá tió tsinhínrá k̄ixin tjanjonko kichó sín la t'óyán kichó sín la chrakonhyará tóxakuanhyará ó jehí tsonhen tíha. K̄jonté x̄ikaha nax̄a tsjejehya chjasintajni.

⁸ Ijnko nación tsjanjonko í jnko nación. La ntiha la ntaha la tsínki nonte la ko itsjé chjasin na tsòkjinta la ko ts'ixité sín tsónínkaon sín. Tíha na ntá xránkixixón tí kjuatjoté.

⁹ Tóxakonhanrá jahará kixin mé tsjikaánrá sín nkayakon tí sín t'etōan ntá tí nkaxenhen n̄nko ntiha mé tsjatiáxinrá sín. Jahará t'ichjánxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín.

¹⁰ Tí naxa ts'itjáyanhya chjasintajni la mé t'ichjánxin tsinhin chojni kaín xín nación tí tan jina tsaáxin sín.

¹¹ Tió sátsjikoará sín tsjikaánrá sín tí tjejó tí sín t'etōan, la tóxakuanhyará nkehe tsjateherá la ko nkehe tsjenkayáxinrá. Náhi. Chronkará tí nkehe kjuanjon Dios tsontáchorá tí hora a, kixin jahyará tsonixjará. Náhi. Nchakuen Dios mé tsonixja.

¹² Iso chojni kjónté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko iné la tsjikaán sín kixin its'en.

¹³ Kaínxin chojni chjasintajni tsonínkakonhanrá sín kixin tinkachónkirá tí janhan. A ntá tí sín tsitōehya tinkáchónki sín tí janhan hasta tsjixixín ná mé tsaá sín.

¹⁴ Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxi tsintácho profeta Daniel* —ntá tí chojni sinchekuáxin tí xroon i mé chrókuienxin sín tíha—, a ntá tí chojni tjejó estado Judea ts'ikon sín xikaha la sátsji sín tsochriin sín jna tsjík'ejómá sín.

¹⁵ A ntá tí sín tjejó chrítaón nchia la í chrók'uinkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín.

¹⁶ Ntá tí sín tjejó nontee sín la í chrókjanhya sín naxa chrókjuiakja sín iké sín.

¹⁷ Ntá nòa tí chojni chjin ts'ejóyá tí yaon a la ko tí sín tjejónchekakí xjeen.

¹⁸ Chrókjuancheherá Dios kixin jehya nchakuen kin chrókónhen tíha.

¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuènhya xikaha desde tí kjuankíxixín Dios kjuích'éna ch'án chjasintajni la ko kjá xikahya tsonhen chr'éxin inaá.

²⁰ A ntá tí chrókjuanjon Inchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhi la kuikonóehē ch'án tí sín tsíkjeýá ch'án ntá k'uetōan ch'án kixin tjoka ts'atsínka tí kjuachrakon a.

²¹ A ntá jnkojin nkexro tsontácho kixin: “Tsjehé, ntihi itjen tí Cristo”, o tsontácho sín kixin: “Tsjehé, ntiha tjen ch'án”, la titekákuènhyará sín.

²² Na mé itsi iso sín tsontácho sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jié tjinkaon sín chrókjuich'iyexin sín chojni, kjónté tí sín tsíkjeýá Dios.

²³ A ntá jahará chrokóxakonhanrá kaín tíha. Tjéjtōnkará senó kixin tsonohará kixin xikaha tsonhen.

Itsi tí Xjeen Dios K'óna Chojni
(Mt. 24.29-35, 42-44; Lc. 21.25-36)

²⁴ Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjō la tsjanjonhya xrohi.

²⁵ A ntá tí konotsé la ts'anótjenxin nkajní la ko tí kjuachaxin síin nkaya nkajní la kjaxin tsínki.

²⁶ Ntá ts'ikon sín tí Xjeen Dios K'óna Chojni itsi chríkjan tjuj tsíkajo tí kjuachaxin jié.

* 13:14 Daniel 9.27; 11.31; 12.11

²⁷ Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjeýá ch'án.

²⁸ 'Chrókiénxinrá tí nkehe sintayóaxian. Éxí yóhe tí nta t'óna to higo tió sí'tayan kahnte ntá nohará kixin ts'ixenhen nchakuen sóa

²⁹ mé xikaha tió ts'ikonrá xikaha tsonhen kaín tíha ntá tsonoxáínrá kixin ó kuichjina tí tsjeje chjasintajni.

³⁰ Chaxín ntáxrjan kixin kaín tíha tsonhen tí naḡa t'enhya tí chojni siín chjasintajni.

³¹ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteýá tíha.

³² 'A ntá tí yaon la tí hora tsoxiteýá tíha la ninkexro noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'éni mé nohe.

³³ Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha.

³⁴ Éxí yóhe ijnko chojni sátsji kjín, a ntá tí naḡa sátxixínhya ch'án ntøe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntøe ch'án, la jnkojnko sín ts'áyehé sín jnkojnko xra kuente sín. La ko ts'etueñhen ch'án ijnko ch'ín tsjak'e ts'ayakonhen ch'án tí ntója nchia.

³⁵ Méxra jahará chrók'uejotsjehérá kixin noahyará nkesá tsokjan tí ñché tí nchia a, á ijnko tsonntanonte o á ijnko k'áxrótjen o á ijnko tjetee tsje cochiká o á ijnko ts'inkaséyan.

³⁶ Ntá xínahya tsi ch'án ts'itjaxín ch'án kixin tjejochrinrá.

³⁷ Mé xikaha tjonkará la ko xikaha ntátjan kaín chojni kixin chrók'uejótsehe sín —ichro ch'án.

14

*Tjoyá sín kixin nkexrí tsotsé sín tí ch'in Jesús
(Mt. 26.1-5; Lc. 22.1-2; Jn. 11.45-53)*

¹ Naḡa t'itjáyan iyó yaon ntá tsjasin sín tí kia pascua, la ko sine sín tí niotja tsíkjhohya tí xroan nchek'ánkí niotja.

Ntá tí sín ncha'tá t'etøan la ko tí sín maestro tjako tí ley mé kjueýá sín kixin nkexrí sich'iyehé sín tí ch'in Jesús kixin tsotsé sín ch'án a ntá ts'óyán sín ch'án.

² Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókóninkaon sín —ichro sín.

*Ijnko tjan kuikítexín aceite náxrjón xraxé ikja ch'in Jesús
(Mt. 26.6-13; Jn. 12.1-8)*

³ A ntá ch'in Jesús kjuák'e ch'án chjasin Betania ntøe ch'in Simón, tí ch'in k'uéchonta chinlepra. A ntá tí tjene ch'in Jesús ntá xrinahya ikui ijnko tjan kuikao tjan ijnko xro mé tjia tí aceite xraxé itsjo nardo, imá tjete tsík'ite. Ntá tí tjan a mé kuakitjehé tjan tí xro a ntá kuikite tjan kja ch'in Jesús tí aceite a.

⁴ A ntá iso tí sín tjejó ntiha kónínkakonhen sín tjan ntáchro sín kixin:

—¿Nkekuente kjuínchexénhen tjan tí aceite náxrjón xraxé?

⁵ Íchá jina chrókóxixín iní ciento chichaon denario tí aceite a ntá tí chichaon a mé chrókuitonhen tí chojni nõa —mé xikaha ichro sín k'uántaxínhín sín tjan.

⁶ Ntá ntáchro ch'in Jesús kixin:

—Nté t̄itohérá tjan; ¿nkekuènte t'antaxínhínrá tjan? Ó nchoxon tí nkehe kjuích'ena tjan.

⁷ A ntá tí chojni nòa la ó xráxín ts'ejókoará sín la jína tsjínk̄itsará sín jnkójín yaon. Ntá janhan la jnkochr̄ixínhya ts'ejóni.

⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuèntana k̄ixin tsoxravána.

⁹ Chaxín ntáxrjan k̄ixin tí tsjako sín tí tan jína tsaáxin chojni nkuíxín ch-jasintajni ntá tsochronka sín k̄ixin x̄ikaha kjuích'e tí jehe tjan, a ntá x̄ikaha tsoxraxinkakonxín sín tjan k̄ixin x̄ikaha kjuích'e tjan —ichro ch'án.

Ch'in Judas kjuinchekji ch'án tí ch'in Jesús

(Mt. 26.14-16; Lc. 22.3-6)

¹⁰ A ntá ch'in Judas Iscariote mé ijnko teyóxin sín k'uájiko ch'in Jesús a mé sákjuitsjehe ch'án tí sín nch̄at'á t'et̄oan k̄ixin tsochrónka ch'án nkexrí tsotsé sín tí ch'in Jesús.

¹¹ A ntá jehe sín la chéhe sín kuínhin sín ntá ntáchro sín k̄ixin chaxín tsjanjon sín chichaon ts'áyéhé tí ch'in Judas. Ntá kjuank̄ixin ch'án kjueyá ch'án nkexrí tsochrónka ch'án k̄ixin tsotsé sín tí ch'in Jesús.

Kjóneko sín tí ch'in Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrank̄ixín kia sine sín nioṭja tsík̄ikohya tí xroan nchek'ánkí nio tió ts'óyán sín tí kolélo kuènte kia pascua. A ntá tí sín k'uájiko ch'in Jesús mé kjuanchank̄ihi sín ch'án k̄ixin:

—¿Nketí tjinkávan sátsjini sincheyax̄inní k̄ixin sineni kuènte tí kia pascua? —ichro sín.

¹³ Ntá k'uet̄enhen ch'án iyó tí sín k'uájiko ch'án ntáchro ch'án k̄ixin:

—Sátjirá chjasin Jerusalén ntá ntiha tsoxetará ijnko ch'in yámá tóa tjiá ntá. Tí ch'in a tsochréhérá.

¹⁴ A ntá tí nchia ts'ixenhen ch'án la tsjanchank̄ihirá tí inché nchia, tsontáchorá k̄ixin: “K'uet̄oan tí Maestro k̄ixin: ¿Nketí tjen tí cuarto sinex̄inko ch'án tí sín xriko ch'án tí kia pascua a?”, x̄ikaha mé tsixrorá.

¹⁵ Ntá tsjakohará ch'án ijnko cuarto jié, yóxin piso mé chóna kaín nkehe t'ichjānx̄in. Mé ntaha mé sincheyax̄inrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'in Jesús mé x̄ikaha k'uitja sín. Ntá tí cuarto a mé kjuíncheyax̄in sín tí nkehe sine sín kuènte tí kia pascua.

¹⁷ A ntá ó kóntó ntá ó kjuíji ch'in Jesús la ko tí teyó sín k'uájiko ch'án tí nchia ntiha.

¹⁸ Ntá k'uejó sín, a ntá tió tjejóne sín ntá ntáchro ch'in Jesús k̄ixin:

—Chaxín ntáxrjan k̄ixin ijnko tí jahará tjejóne jnkokoá ntihi mé sinchekjiráni —ichro ch'án.

¹⁹ Ntá jehe sín mé kjuank̄ixin k'uává sín. Ntá kjuank̄ixin sín jnkojnko kjuanchank̄ihi sín tí jehe ch'án k̄ixin:

—¿Á janhan ní? —ichro sín.

²⁰ Ntá kjuátehe ch'in Jesús ntáchro ch'án k̄ixin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi.

21 Chaxín tí Xjeen Dios K'óna Chojni mé tsoṇhen éxí nixja xroon itén Dios. Kjánchó nõa tí ch'ín sinchekji ch'án. Íchá jína tí ch'ín a la chrókokjéhya ch'án —mé xikaha ichro ch'án.

22 A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'o ch'án tí niotja ntá kjuanjon ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuéntana —ichro ch'án.

23 Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjá.

24 Ntá ntáchro ch'án kixin:

—Tíhi mé jnina mé chrónkaxín kixin chaxín tsoxiteyá tí nkehe nixin tsoṇhen na mé ts'itjí kixin tsaáxin nchónhya chojni.

25 Chaxín ntáxrjan kixin ts'íhya janhan tí inté to uva inaá tí naxa tsjixrakáhya tí yaon itsi kjuachaxin kuénte Dios, a ntá ti yaon a xik'ía inté to uva nixin —mé xikaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án

(Mt. 26.30-35; Lc. 22.31-34; Jn. 13.36-38)

26 Ntá kjuixin itsje sín ijnko himno kuénte Dios ntá sákjuí sín tí jna Olivo.

27 Ntá ch'ín Jesús ntáchro ch'án kixin:

—Ijie tie kaín rá tsochrakonrá ntá tsjtonará. Ntá tsoxiteyá éxí ntáchro xroon iten Dios kixin: “Ts'óyan sín tí nkexro t'ayakonhen tí kolélo ntá tsoqohya nkexro t'ayakonhen va, a ntá tsjichroe va.”*

28 A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

29 Ntá ntáchro ch'ín Pedro kixin:

—Kjonté kaín sín tsítoha sín ntá janhan la náhi —ichro ch'án.

30 Ntá ntáchro ch'ín Jesús kixin:

—Chaxín ntáxrjan kixin ijie tie tí naxa tsjehya kochíntoá yáya, la jaha mé sinchemána níya kixin chonhyana, tsixrua —ichro ch'án.

31 Ntá itsen kjuátehe ch'ín Pedro ntáchro ch'án kixin:

—Kjonté koína its'én la sjintamáhya tí jaha —ichro ch'án.

La ko xikaha ntáchro sín kaín sín.

Ch'ín Jesús nixjeexín ch'án Dios tí Huerto Getsemaní

(Mt. 26.36-46; Lc. 22.39-46)

32 Ntá kjuíji sín ijnko nonte mé it'in Getsemaní. Ntá k'uętuęnhen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjaha Dios —ichro ch'án.

33 Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án.

34 Ntá ntáche ch'án sín kixin:

—Imá t'avá asenná éxí chrók'uén xikaha. Ijie la ntihyó titohará tjejot-sjehérá —ichro ch'án.

35 Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóhe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a.

36 A ntá ntáchro ch'án kixin:

* 14:27 Zacarías 13.7

—It'eni jaha. Jaha mé chonta kaín xín kjuachaxin na ntá chrónóghani tsjakínhinni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhi. Éxí tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuitqhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora?

³⁸ Ijie la tjejotsjehérá la ko chronóghérá Dios kixin títoehya ch'án tí Jínahya chrókjuichroerá. Tí asánrá ntáchro kixin chrókjuinchesiteyará tí jína kjánchó tí cuérporá la tsjachahya —ichro ch'án.

³⁹ Ntá sákjuí ch'án inaá chrónóghé ch'án Dios. Ntá ó jehe xikahó xínixja ch'án.

⁴⁰ Ntá ikjan ch'án la ó tjejójua sín inaá kixin kújhí sín kotáchrin. Ntá í noehya sín nkexrí chrókjuatehe sín.

⁴¹ Ntá nixin sáxíkji ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án.

⁴² Ntá t'ayará sátsjini kixin ó kjuí tí nkexro sinchekjina.

Sákjuíko sín tí ch'ín Jesús tsjak'echjina ch'án

(Mt. 26.47-56; Lc. 22.47-53; Jn. 18.2-11)

⁴³ Naxá tjenixja ch'ín Jesús ntá xrinahya kjuíji ch'ín Judas, mé ijnko tí tyeóxin sín k'uájiko ch'ín Jesús. Nchónhý chojni kjuíkáo ch'án kjuíjiko sín chica espada la ko inta. Na mé kjuachaxién tí sín nchat'á t'etqan la ko tí sín maestro tjako tí ley la ko tí sín táda t'etqan nínko mé kjuixín sín.

⁴⁴ A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinekian kochíto mé jehe tiha la itsérá ch'án sájtikoará ch'án —ichro ch'án.

⁴⁵ Ntá kjuí sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto.

⁴⁶ A ntá tí sín kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etqan xra.

⁴⁸ Ntá ch'ín Jesús mé ntáche ch'án tí sín a kixin:

—¿Nkekuénté kixin éxí chrótserá xíchee mé xikaha k'uinkakoará chica espada la ko inta kixin tsotseráni?

⁴⁹ Kaín yaon kjuak'é nkaxenhen nínko kjuákohará, ¿ntá nkekuénté tsehyaráni? Kjánchó t'ichjánxin xikaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuitqhe sín ch'án jehó ch'án ntá sákjuí sín.

Ijnko ch'ín ntasoá sákjuixín ch'án ntiha

⁵¹ A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án.

⁵² Kjánchó tí ké ch'án ó tsitsé sín ntá kjónté tjóchin ch'án sákjuí ch'án.

Ch'ín Jesús kóchjina ch'án tí tjejó tí sín t'etqan

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuiko sín tí ch'ín Jesús tí ntøe tí nchat'á imá t'etøan. Ntaha mé tsikójnkotsé kaín tí sín nchat'á t'etøan la ko tí sín táda t'etøan nínko la ko tí sín maestro tjako tí ley.

⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntasin ntøe tí nchat'á imá t'etøan a. Ntaha síche xrohi. A ntá ntüha tjejótxaxín tí sín policia tjejóchjxrohe sín, ntá kjaxín ch'án ntahó kuitøhe ch'án tjechjixrohe ch'án.

⁵⁵ Ntá tí sín t'etuenhen tí sín nchat'á la ko kaín tí sín t'etøan kjuéyá sín chojni kixin tsochrónka sín nkehe tí jie chóna ch'ín Jesús kixin jína chrók'óyán sín ch'án. Kjánchó ninkexró k'uitjahya sín tsjinkitsa tsochrónka.

⁵⁶ Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín.

⁵⁷ Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxika ch'án tí nínko tsikjich'énaxín chojni tja ntá iní yaon koá la ó tsjak'e ch'án í nínko nínko jehya chojni sich'éna† —ichro sín.

⁵⁹ Kjónté xíkaha la jnkokónhya tí nkehe chrónka sín.

⁶⁰ Ntá tí ch'ín t'etuenhen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tjatøehya jaha? ¿Á chaxín tí jie t'eka sín tí jaha? —ichro ch'án.

⁶¹ Ntá ch'ín Jesús tání ch'án la ninkehó tjatøehya ch'án. Ntá xíkjanckíhi tí nchat'á t'etøan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'ín Jesús kixin:

—Chaxín janhan tíha. Ntá chr'éxin ts'ikonrá kixin tí Xjeen Dios K'óna Chojni mé tsjak'etjaxín ch'án tí tja chjina kjuachaxín kuente Dios la ko itjuí mé ts'inkajinxín ch'án nkaya nkajní —ichro ch'án.

⁶³ A ntá tí nchat'á t'etøan kótséchje ch'án tí iké ch'án kjuakoxín ch'án kixin imá nínkaon ch'án ntáchro ch'án kixin:

—T'ichjánxínhya í so chojni tsochrónka nkehe.

⁶⁴ Jahará ó kuínhínrá kixin k'uántaxínhin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátøhe sín kixin chrók'uen ch'án.

⁶⁵ Ntá ikjé sín la kjuankixin sín kuikite sín ch'án ntate sín. Na iso sín na k'uikjehø sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuente nínko chjéhe sín nkayakon ch'án.

Ch'ín Pedro kjuínchemá ch'án kixin chónhya ch'án tí ch'ín Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntasin nonte itjen ch'ín Pedro. Ntá ikui ijnko tjan ch'ehe tjan xra tí nchat'á t'etøan.

⁶⁷ Ntá k'uíkon tjan kixin tjechjixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxín xrikoa tí ch'ín Jesús kjuixín chjasin Nazaret —ichro tjan.

⁶⁸ Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrua —ichro ch'án.

Ntá k'uaxrjexín ch'án ntiha sákjui ch'án ntója. Ntá xrínahya itsje ijnko kochíntoá.

⁶⁹ Ntá tí tjan a mé k'uikon tjan tí jehe ch'án ntá chénka tí sín sintaxín ntaha kixin:

—A ntá tí ch'ín i mé jnkojín tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'éxín tí sín k'uejontaxín ntáche sín tí ch'ín Pedro kixin:

—Chaxín kjaxian jaha tsíkíxian estado Galilea kixin tjatsqanxínni kixin nixja jaha éxí nixja tí jehe sín —ichro sín.

⁷¹ Ntá ch'ín Pedro kjuankíxín ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrórá jahará —ichro ch'án.

⁷² Ntá yóxin itsje kochíntoá. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Naxá tsotsjehya kochíntoá yáya mé ó tsjixin sjnchemána níya kixin chonhyana.”[‡] Ntá xraxinkaon ch'án tíha la ntá kjuankíxín ch'án tsjánka ch'án kixin ntoáhya kjuich'e ch'án kjuínchemá ch'án tí ch'ín Jesús.

15

Ch'ín Jesús nkayakon tí ch'ín Pilato (Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uínkaséyan ntá tí sín nchat'á t'etqan kójnkotséko sín tí sín táda la ko tí sín tjako tí ley la ko kaín tí sín t'etqan kuènte njnko mé kójnkotsé sín ikjo kichó sín. Ntá kjuixín ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato.

² Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátēhe ch'ín Jesús ntáchro ch'án kixin:

—Kjaxian jaha ntáchrúa —ichro ch'án.

³ A ntá tí sín nchat'á t'etqan mé k'ueka sín ch'án nchónhya jie.

⁴ Ntá ch'ín Pilato xíkjanchankí ch'án inaá ntáchro ch'án kixin:

—¿Jaha, nkekuènté tjetēheya ninkehó? Tsjehé kixin nchónhya jie t'eka sín tí jaha —ichro ch'án.

⁵ A ntá ch'ín Jesús la ninkehó kjuátēheya ch'án. Ntá ch'ín Pilato la í noehya ch'án nkehe tsjenkayáxin ch'án.

K'uáyēhe ch'ín Jesús kixin sinchekjasóte sín ch'án ntá its'en ch'án (Mt. 27.15-31; Lc. 23.13-25; Jn. 18.38—19.16)

⁶ A ntá ch'ín Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxí tjínkaon tsjanchia tí sín tsikójnkotsé tí kia a.

⁷ A ntá ntiha tjechjina ijnko ch'ín mé it'ín Barrabás, la ko í so sín kuítekakuenhya sín tí síxreé ntá k'óyán sín chojni.

⁸ Ntá kui nchónhya chojni kjuankíxín sín kjuanchehe sín tí ch'ín Pilato kixin chrókjuich'e ch'án éxí kaín nánó xíkaha.

⁹ Ntá kjuátēhe ch'ín Pilato kixin:

—¿Á tjínkáonrá tsjtōhā sátsji tí ch'ín Rey t'etuenhen tí sín judío? —ichro ch'án.

10 Mé xikaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nchat'á t'etqan, a ntá tsé sín tí ch'ín Jesús kjuikénhen sín ch'án.

11 A ntá tí sín nchat'á t'etqan a mé kjuínchekóninkaon sín kaín tí chojni síin, ntáche sín kixin íchá jína chrókjuanchia sín kixin chrók'uatjánta ch'án tí ch'ín Barrabás.

12 Ntá ch'ín Pilato kjuanchankí ch'án ntáchro ch'án kixin:

—A ntá tí ch'ín tikítexínrá kixin ch'ín Rey t'etuenhen tí sín judío la ¿nkehe tjinkáonrá sít'aha ch'án? —ichro ch'án.

13 Ntá jehe sín kjuátehe sín k'óyako sín kjuanchia sín kixin:

—¡Tjakénkana ch'án ntacruz!

14 Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénkana ch'án ntacruz! —ichro sín.

15 Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uixité ntá kuitóhe ch'án kixin sátsji tí ch'ín Barrabás. Ntá k'uetqan ch'án kixin tsjate sín tí ch'ín Jesús. Ntá kjuixin ntá kjuanjon ch'án kjuachaxin kixin tí sín soldado sátsjiko sín ch'án tsjak'enkanı sín ch'án ntacruz.

16 Ntá tí sín soldado a mé sákjuiko sín ch'án tí ntasin tí palacio. Ntaha kójnkotséxin kaín tí sín soldado.

17 Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkáya sín kja ch'án ijnko corona tsík'óna ntach'í.

18 Ntá kjuankixin k'uixité sín ntáchro sín kixin:

—Jnkochríxin tsjak'e tsétuenhén tí sín judío —ichro sín.

19 Na ntá ntavara chjéhe sín ikja ch'án na ko ntaté sín kuikite sín ch'án. K'uéjoxin toch'in sín nkayakon ch'án kjuích'eyáxixin sín éxí imá chrókjuikosáyehe sín ch'án.

20 Ntá tíó kjuixin xikaha kjuích'ehe sín ch'án kjuanoá sín ch'án ntá kuakit-sjehe sín ch'án tí ka kjátse tié tsíkjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjexín sín ch'án ntiha sákjuiko sín ch'án kixin ntá tsjak'enkanı sín ch'án ntacruz.

*Ntá kjuak'enkanı sín ch'ín Jesús ntacruz
(Mt. 27.32-44; Lc. 23.26-43; Jn. 19.17-27)*

21 A ntá ijnko ch'ín tsíkjin chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjin ch'án nontee ch'án, ntá k'uátsínka ch'án ntiha. Ntá tí sín soldado a mé k'uetuenhen sín ch'án kixin tsochréhe ch'án tsamá ch'án tí ntacruz tsjak'enkáni ch'ín Jesús.

22 A ntá sákjuiko sín tí ch'ín Jesús ijnko tjo it'in Gólgota, na mé nkívee sín t'axrxéxin kixin Tjo Calavera.

23 Ntá ntiha chjéhe sín ch'án xranvino tsík'ixinkíkjanxin xroqan mirra chrók'ui ch'án, kjánchó k'uíhya ch'án.

24 Ntá tí sín soldado kjuak'enkanı sín ch'án tí ntacruz a. Kjuixin ntá kjuích'exín sín suerte tí ké ch'án kixin tsoñohe sín nkexéhe tí ka sátsjiko sín jnkojnko sín.

25 A ntá ó las nueve nchítjen tí kjuak'enkanı sín ch'án tí ntacruz a.

²⁶ Ntá ikja tí ntacruz kjuak'enkaní sín ijnko ntachiso ntsí tsíkjin sín nixja nkekuènte kjuínchekjasóte sín ch'án na mé ntáχρο kixin: “Jehe ch'án mé Rey kuènte tí sín judío”.

²⁷ Na ko kjaxin k'u'éjójáni sín ntacruz yaá tí síchee la ijnko la nángo chjina la íjnko la nó kjon tí tjen ch'ín Jesús.

²⁸ Na mé xikaha xiteyá éxí nixja xroon itén Dios ntáχρο kixin: “Éxí yóhe ijnko chojni kjuasin jie mé k'uíkon sín ch'án”*.

²⁹ Ntá tí sín k'uaatsínka ntiha mé kjuanoá sín ch'án la ko k'uantaxínhjin sín ch'án tinkátjía kja sín ntáχρο sín kixin:

—Kjá na ntáχrua kixin chrók'oxíka tí nínko, a ntá iní yaon koá la ó chrókjuixin chrókjuích'éna ínaá, † ichrua.

³⁰ Nchekaá asán jahvá tjasinkajinxían tí ntacruz méhe —ichro sín.

³¹ Ntá tí sín nchat'á t'etəan la ko tí sín tjako tí ley mé kjuanoá sín ch'án ikjo sín kíchó sín kixin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án.

³² A ntá chaxín jehe ch'án tí Cristo tí Rey kuènte tí nación Israel ntá chrók'uikonní kixin jehó ch'án chrókjuinkajinxín ch'án asén ch'án tí ntacruz ntá kjaxin chrókuitekaonni ch'án —ichro sín.

Kjónté tí yaá sín kjaxin tjejóyáni ntacruz mé k'uantaxínhjin sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkíxín mé k'uíxín tie kuenté chjasintajni, kóxrjenhen tí sítié hasta las tres kónjin

³⁴ ntá tí hora a mé itsen k'uèya ch'ín Jesús ntáχρο ch'án kixin:

—Eloi, Eloi, ¿lama sabactani? —tí nkivee sín mé t'axrxéjin kixin: It'éni, It'éni, ¿nkekuènté kuitohéni? ‡ mé xikaha ichro ch'án.

³⁵ Ntá iso sín síin ntiha kuínhin sín, ntá ntáχρο sín kixin:

—Tinhínrá kixin tí'yehé ch'án tí ch'ín Elías tí ch'ín k'uéchrónka itén Dios ósé —ichro sín.

³⁶ Ntá ijnko tí jehe sín síin ntiha kuínká ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjinjin ntá kjuínchekhina ch'án tí tjen ir'va ch'ín Jesús chrók'ui ch'án tí vino náxrjónhya. Ntáχρο tí ch'ín a kixin:

—Tsitoheni tsotsjeheni á chaxín tsi tí ch'ín Elías tsjinkajin tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án.

³⁸ A ntá tí ka tjenkákuènxín nkaxenhen nínko mé yaá k'óna k'uichje kjuankíxixin noi la hasta nonte k'uichje.

³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin xikaha ó kjuixin k'uén ch'án ntá ntáχρο ch'án kixin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejé iso chojni chjin, ikjín k'uejé sín tsjehe sín. Tjejóko sín tjan María Magdalena la ko íjnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko íjnko mé it'in José. La ko kjaxin ntaha kjuák'e tí tjan Salomé.

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

⁴¹ A ntá tí chojni chjin i mé kuinkáchréhe sín tí ch'ín Jesús ntá kjuikao sín ch'án kixin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuiko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankíxixin tí yaon t'ok'éhe sín,

⁴³ mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etōan ch'án tí xra kuente tí síxreé. Kjaxin jehe ch'án tjechónhen ch'án itsi tí kjuachaxin kuente Dios. Chrakonhya ch'án sákjuí ch'án ntōe ch'ín Pilato kjuikjanchia ch'án tí cuerpo kuente ch'ín Jesús.

⁴⁴ Ntá ch'ín Pilato chrakon ch'án kixin ó tsíkjin tsík'en ch'ín Jesús, ntá k'uíyēhe ch'án tí ch'ín capitán a kjuanchankíhi ch'án kixin á chaxín xíkaha kónhen.

⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xíkaha ntá kjuanjōn ch'án kjuachaxin kixin tsjikakja ch'ín José tí cuerpo kuente ch'ín Jesús.

⁴⁶ Ntá ch'ín José mé k'uēna ch'án ijnko ka sávana náxrjōn. Ntá kjuinkajin ch'án tí cuerpo kuente ch'ín Jesús, a ntá jehe tí ka a mé kjuínchek'isímá ch'án tí cuerpo kuente ch'án. Ntá kjuak'enkaya ch'án ijnko tōyē tsíxrayá itjō. Ntá ijnko xro jíé mé k'uíkjēxin ch'án tí ntōja tí tōyē.

⁴⁷ A ntá tí tjan María Magdalena la ko tí tjan María iné ch'ín José mé k'uikon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María iné ch'ín Jacobo la ko tí tjan Salomé mé k'uēna sín xroqan xraxé sátsjiko sín sincheka sín tí cuerpo kuente ch'ín Jesús.

² Ntá imá nchítjen tí yaon xrankíxixin tí semana mé kjuíji sín tí tōyē tsíxravá ch'án, na mé ó kjuítōn yaon.

³ A ntá jehe sín mé tinkákjo kichó sín kixin:

—¿Xá nkexro tí chrókuakjinhinni tí xro tjejkjēxin tí tōyē? —ichro sín.

⁴ A ntá xrinahya k'uikon sín kixin ó tsíkjin tsíkjin tí xro jíé tjejkjēxin tí tōyē kixin í tjenhya éxi k'uékjak'e senó.

⁵ Ntá kjuíji sín ikon tí tōyē ntá k'uikon sín kixin tjetjaxin ijnko ch'ín ntasoá tí tja sín chjina tjenkaya ch'án ka kjinjin tjóá ntá imá chrakon sín k'uikon sín.

⁶ Ntá ntáchro ch'án kixin:

—Chrakonhyará. Ó nōna kixin xritjéyará jahará tí ch'ín Jesús tsíkjin chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsehérá tí tsíkjak'e sín ch'án.

⁷ Ntá sáttjirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxi tsíchrónka ch'án —mé xíkaha chrónka tí ntasoá a.

⁸ Ntá tí chojni chjin a mé sákjuixin sín tí tsíxravá tí ch'ín Jesús imá síxranka sín chrakon sín. Ntá naxa chenkaaha sín ninxeró kixin chrakon sín.

Ch'ín Jesús titāyā xeta tí tjan María Magdalena

(Jn. 20.11-18)

⁹ Tió tsíkjiixin tsíxechón ch'ín Jesús nchítjen tí yaon xrankíxixin semana ntá titàya xeta ch'án saoxín tí tjan María Magdalena na mé jehe tjan tsíkakitsjexín ch'án yato nchakuen tí jínahya.

¹⁰ Ntá sákjuichenka tjan tí sín k'uék'ajiko tí jehe ch'án t'avá sín tsjánka sín.

¹¹ A ntá tió kuínhin sín kixin tjechón tí ch'ín Jesús kixin xikaha tsík'ikon tjan la kjónté kuítekakonhya sín.

Iyó sín k'uék'ajiko ch'ín Jesús titàya k'uikuèn sín tí jehe ch'án

(Lc. 24.13-35)

¹² A ntá chr'éxin ntá iyó tí sín a titàya k'uikuèn sín tí ch'ín Jesús, ókjé nkexri tsjehe ch'án. Tí sín a mé tjejótji sín ntia sátsji sín ijnko nonte.

¹³ A ntá jehe sín sákjuichenka sín tí sín í so a; la kjónté xikaha la kuítekakonhya sín.*

Ch'ín Jesús k'uetuñhen ch'án tí sín k'uék'ajiko ch'án tí xra sich'e sín

(Mt. 28.16-20; Lc. 24.36-49; Jn. 20.19-23)

¹⁴ A ntá tió kjuixixin la titàya k'uikon tí tejnko sín tí jehe ch'án tí tjejóné sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án.

¹⁵ Ntá ntáche ch'án sín kixin:

—Sátjirá kuenté chjasintajni tjákoherá kaín xín chojni tí tan jína tsaáxin sín.

¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte.

¹⁷ Ntá tí sín tsinkáchónki tí janhan mé tsjasin sín kjuaxroan kixin kjuachaxin njina tsakitsjexín sín tí nchakuen tí jínahya chóntha chojni la ko tsonixja sín ókjé nkiva.

¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóntha veneno la kohya nkehe tsonhen sín. Kjaxin ts'ejotja tja sín chojni níhi la tsitohe sín jína.

Ch'ín Jesús chr'in ch'án nkaya nkajní

(Lc. 24.50-53)

¹⁹ Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní. A ntá ntilha kjuák'etjaxin ch'án tí tja chjina Dios.

²⁰ A ntá jehe sín sákjuí sín nkuíxín sákjuík'ajiko sín tí tan jína tsaáxin chojni. A ntá jehe Ìnchéni mé kjuínk'itsa ch'án tí sín a la ko kjuachaxièn ch'án mé kjuasixín sín kjuaxroan kixin tíha mé tsonoxín tí sín tjejótinhin kixin chaxín nkehe kuènte Dios kjuako sín. Amén.

* 16:13 Lucas 24.13-35

Tí tan jína chrónka ch'ín Lucas

Tíhi mé xrankíxixín tí xroon i

¹ Nchónhya chojni tjínkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni.

² Éxi kjuákohe ni tí sín tsík'ikonxín kon sín tí xrankíxixín nkehe k'uátsínka ch'án la ntá k'uáyéhe sín tí xrá sákjuíchronka sín tí tan jína

³ a ntá janhan kjaxian kjuánchánkiá jína kaín nkehe k'uátsínka tí xrankíxixín. Ntá nõna jína ikjian kaín tíha éxi tsíkónhen ntá tsochr'anhan jaha Teófilo kíxin imá tjuaha

⁴ kíxin ntá jaha tsonoha jína tí nkehe chaxín tsíkjakoha sín.

Jjuko ángel mé chrónka kíxin tsokjíhi Juan Bautista

⁵ A ntá tí ch'ín rey Herodes k'ueṭoan ch'án tí estado Judea la ko ntiha kjuák'e ijnko nchaṭ'á mé it'in Zacarías. Jehe ch'án mé kuente tí sín tsík'axrjeníxin tí ch'ín Abías.* A ntá ichjién ch'án mé it'in Elisabet. Jehe tjan mé tsík'axrjeníxin tjan tí nchaṭ'á Aaron.

⁶ Yói sín na mé jína sín kíxin éxi tjínkaon Dios la mé kjuínchexiteyéhe sín kaín nkehe k'ueṭoan ch'án. Méxra ninkexró chrók'uekahya jie tí jehe sín.

⁷ A ntá jehe sín chónthaha sín xjeen sín kíxin ó jehí tsíkítjenhya tjan Elisabet kíxin sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xrá nchaṭ'á kuente Dios.

⁹ A ntá xikaha kuénhen tí sín nchaṭ'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuente nínko tsjak'e ch'án chjincṭo chrítaón tí altar kuente Dios.

¹⁰ Ntá kjuák'e ch'án ntiha kjuák'e ch'án tí chjincṭo la nachrohe kaín tí chojni k'uéjóni sín ntója nixjehe sín Dios.

¹¹ Ntá xrinahya k'uikon ch'ín Zacarías ijnko ángel kuente Dios tjexín toté ch'án nángo chjina tí altar tjak'exin sín chjincṭo.

¹² A ntá tió k'uikon ch'ín Zacarías tí ángel la imá kóxakonhen ch'án la ko imá chakon ch'án.

¹³ A ntá ntáchro tí ch'ín ángel kíxin:

—Zacarías, chakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sijnchek'ian xjan Juan.

¹⁴ Jaha la tsocháha má la ko itsjé chojni tsochéhe sín kíxin tsokjíhi xjan

¹⁵ kíxin imá tjeoan tsjak'e tí xjaan éxi tóxrjínhin Dios. Ninkehó xran vino la ko ninkehó í jnko xran ts'ihya ch'án. Tsochóntha ch'án kjuachaxin kuente Nchakuen Dios kjónté naxa tokjiejha ch'án.

¹⁶ Jehe ch'án mé tsjakohé ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios.

¹⁷ Jehe ch'ín Juan tsitaón ch'án ntja tsixin Ìnchéni. Éxi k'uékjako ch'ín Elías ósé mé tsjako ch'án la ko tsochóntha ch'án kjuachaxin éxi k'uéchóntha ch'ín Elías kíxin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kíxin ó itsi Ìnchéni la chrókuinkáchónki sín tí jehe ch'án.

* 1:51 Crónicas 24.10

18 **A** ntá tí ch'in Zacarías kjuanchankíhi ch'án tí ch'in ángel ntáchro ch'án kixin:

—¿Nkexrí chrókónòna kixin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

19 Ntá kjuátehe tí ch'in ángel ntáchro ch'án kixin:

—Janhan mé Gabriel la mé t'ahá xrá Dios. **A** ntá jehe ch'án mé k'uetuanna k'uinka tsonixjaha tsoxrjanka tí nkehe jína tsohnen.

20 **A** ntá jie kuitekákonhya tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xíkaha tsoxiteyá kaín tíha —ichro ch'án.

21 **A** ntá tí í so sín ntiha k'uéjóchónhen sín ntója nínko kixin ts'axrje ch'in Zacarías, ntá kóxakonhen sín kixin imá sé kóxrjenhen ch'án nkaxenhen nínko.

22 Ntá tió k'uaxrjexín ch'in Zacarías tí nkaxenhen nínko la í xitjahya nixja ch'án. Ntá kónohe sín kixin ichrén kjuaxroan kuente Dios tsik'ikon ch'án tí nkaxenhen nínko. Ntá itja ch'án ó tjákoxin ch'án tí nkehe chróntáchro ch'án kixin í xitjahya nixja ch'án.

23 **A** ntá tió kjuixin tí yaon kjuích'e ch'in Zacarías xrá nínko ntá sákjuí ch'án ntøe ch'án.

24 **A** ntá chr'exín ntá kjuák'eyá tí ichjién ch'án Elisabet. Ntá ntøe tjan ó kuitøhe tjan in'ó nitjó kjuenkayáxin tjan kixin:

25 “Mé xíkaha ijnko kjuaxroan kjuanjon Ìnchéni kixin chrók'uántaxíenhyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kixin tsokjíhi Jesús

26 **A** ntá k'uátsínka injon nitjó ntá Dios k'uetuénhen tí ch'in ángel Gabriel kixin sátsji ch'án ijnko chjasin estado Galilea mé it'in Nazaret,

27 sátsji nixjehe ch'án ijnko tjan tjarisoá naxá kuákjahya tjan chojni ntoa mé it'in tjan María. Jehe tjan mé tsíkatehe tjan kixin tsøtehe tjan ijnko ch'án mé it'in José, mé tsik'axrjeníxin ch'án tí ch'in rey David.

28 **A** ntá tí ch'in ángel k'uúixenhen tí tjen tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Ìnchéni Dios tjekoa tí jaha. **A** ntá jaha imá kjuíntayavan ch'án ntá tí í so chojni chjin la kénhyó —ichro ch'án.

29 Kjánchó tió k'uúikon tjan tí ch'in ángel na mé kóxakonhen tjan kjuenkayáxin tjan kixin nkekuente xíkaha nixjeheni ch'án, ichro tjan.

30 **A** ntá ntáchro tí ch'in ángel kixin:

—Chrakonhya, María. Dios la imá tjetjinkítsa tí jaha.

31 **A** ntá jie la tsjak'eyá jaha, tsochonta ijnko xjan ntoa la ko sìnchek'ian xjan Jesús.

32 Imá ts'etøan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etøan ch'án éxí ijnko rey éxí k'uetuøan ch'in David, tí nkexro ts'axrjeníxin ch'án.

33 Jnhokhríxin tsjak'e ch'án ts'etueñhen ch'án tí sín nación Israel, la mé tsjejehya tí kjuachaxin ts'etøan ch'án —ichro tí ch'in ángel.

34 Ntá kjuanchankíhi tjan María tí ch'in ángel kixin:

—¿Nkekuente kixin xíkaha chrókónhen kixin janhan la naxá chontahya chojni ntoa? —ichro tjan.

35 Ntá kjuatehe tí ch'in ángel, ntáchro ch'án kixin:

—Tí Nchakuen Dios mé ts'inkajin éxí ijnko tjuí la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios.

³⁶ La ko kjaxin tjan Elisabet kjéhya jaha kjónté ó nána tjan la mé tjejá tjan. Senó la k'uéchóntahya tjan xjan, a ntá jie la ó injon nitjó tjejá tjan.

³⁷ Kíxin tí kjuachaxiéén Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María kíxin:

—Janhan mé t'ahá Ìnchéni Dios xra. Ó nchóxon tí nkehe k'uetoan ch'án sintaxiteyáha ch'án éxí chronka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ A ntá ijnko yaon tí tjan María tjan sákjuí tjan ijnko chjasin tjan tí jna estado Judea.

⁴⁰ Ntá kjuíji tjan tí chjasin ntiha ntá k'uixenhen tjan ntóe ch'ín Zacarías la ntá nixjehe tjan tí tjan Elisabet.

⁴¹ A ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá ántsi k'uáyéhe tjan kjuachaxiéén Nchakuen Dios

⁴² ntá itsen nixja tjan ntáchro tjan kíxin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaon ch'án tí xjaan.

⁴³ ¿Xá nkexro tí janhan kíxin kjuínixjana ìné Ìnchéni?

⁴⁴ Tió kuínhan nixjana ntá tí xjan la chrika xjan nkaya tseña kíxin chéhe xjan kjuíha.

⁴⁵ Ntá jaha la cháha kíxin kuítekávan kíxin Ìnchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kíxin:

Asenná imá tjikosáyehe Ìnchéni Dios

⁴⁷ la ko chéhe asenná kíxin Dios sinchekaáni ch'án.

⁴⁸ Kíxin Dios ikuá kuentá ijnko tí chojni chjin nóe ch'exón xra kuènte ch'án.

A ntá ijie la ko jnkochríxín tsontáchro chojni kíxin náxrjón tjèn janhan, tsixro sín.

⁴⁹ Kíxin Dios chóna kaín kjuachaxin ntá janhan mé kjuasixínna ch'án ijnko kjuaxroan jie;

imá tjóá tí ihnjé ch'án.

⁵⁰ Jnkochríxín tsikonóehé ch'án kaín tí sín tjikosáyehe sín ch'án.

⁵¹ Tsíkjasin ch'án itsjé kjuaxroan jie;

kuakitsjehe ch'án tí kjuachaxin chóna tí sín nchehnke.

⁵² Kuakitsjehe ch'án tí kjuachaxin chóna tí sín t'etoan,

A ntá tí sín nóa k'uék'etuñhaya senó la mé jie chjéhe ch'án kjuachaxin ts'etoan sín.

⁵³ A ntá tí sín t'énxín kjinta la kjuanjon ch'án kaín nkehe tsicháxinhin sín, a ntá tí sín rico xráxín jehó tja sín sákjuí sín.

⁵⁴ Kjuínkítsa ch'án tí sín nación Israel kíxin tjejóch'ehe sín ch'án xra;

k'uitjáyenhya ch'án tí jehé sín kuikonóehé ch'án sín,

⁵⁵ éxí k'uéchenka ch'án tí sín k'uaxrjeníxinni k'uéjéjé sín ósé,

na mé tí ch'ín Abraham la ko kaín tí sín naxá ts'axrjeníxin ch'án —mé xíkaha ichro tjan María.

56 **A** ntá tjan María kuítpeko tjan tí tjan Elisabet iní nitjó la ntá chr'éxin xíkjan tjan ntøe tjan.

Kokjîhi ch'in Juan Bautista

57 Ntá xétja tí yaon sinchekokjîhi tjan Elisabet tí xjeen tjan, a ntá kjuínchekokjîhi tjan ijnko xjan ntoa.

58 **A** ntá tí sín chjinaxón ntøe la ko tí sín kjéhya tjan mé kjuíjtsjehe sín kixin tsøchéheko sín tjan kixin kuínhin sín kixin Dios imá tsíkikonóehe tí jehe tjan.

59 Ntá tí yaon jnixin ikui sín sincheka sín xjan tí xroye kuente tí sín judío. Ntá chrókjuínchek'in sín xjan Zacarías éxi it'in it'é.

60 Kjánchó ntáchro ìné xjan kixin:

—Náhi. T'ichjánxin its'in xjan Juan —ichro tjan.

61 Ntá ntáchro sín kixin:

—¿Nkekuente kixin xíkaha chrók'uin xjan? Kohya nkexro naxa kjéhya xíkaha it'in —ichro sín.

62 **A** ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uín tí xjan.

63 **A** ntá tí it'é xjan mé kjuanchia ch'án ijnko ntachiso ntsi tsokjin ch'án ntá kjin ch'án kixin: “Ihnié xjan mé Juan.” **A** ntá kaín tí sín tjejó sín ntiha la chrakon sín kuínhin sín xíkaha kónhen.

64 **A** ntá xrínaħya ch'in Dios Zacarías kjuankixin ch'án nixja ch'án inaá kjuanchehe ch'án Dios kjuasáya.

65 **A** ntá kaín tí sín chjinaxón ntøe sín mé chrakon sín. La ntá nkuíxín tí jnø kuente estado Judea mé kjo sín kichó sín chrónka sín kixin xíkaha tsíkónhen.

66 **A** ntá kaín tí sín kuínhin mé kjuenkayáxin sín kjuanchankíhi sín kichó sín kixin:

—¿Xá nkehe tí xra tsíkítønhen tí xjan i? —ichro sín.

Kixin chaxín Ìnchéni Dios tsíkjincheyaon ch'án tí xjan.

Tí ch'in Zacarías itsje ch'án

67 **A** ntá it'é tí xjan mé ch'in Zacarías, mé antsi k'uáyéhe ch'án kjuachaxin kuente Nchaċuen Dios ntá xíkaha nixja ch'án itén Dios ntáchro ch'án kixin:

68 Imá jína Ìnchéni, na mé tí Dios kuente tí nación Israel,

kixin ikui ch'án tí tjejóni kjuínchekaá ch'án nación kuenténi.

69 La ko kjuanjon ch'án ijnko nkexro t'etøan sinchekaáni ch'án

na mé ijnko nkexro k'uaxrjeníxin tí ch'in David, tí nkexro k'uékjich'ehe Dios xra.

70 Éxi k'uéchronkaxín tí sín kjueyá Dios k'uéchronka itén Dios ósé,

71 k'uéchronka Dios kixin sinchekaáni ch'án kixin ntá tsjachahya kaín tí sín nínkakhenni,

72 tsíkónóehe ch'án tí sín k'uaxrjeníxinni ósé,

ts'itjáyenħya ch'án tí nkehe tsíchronka ch'án tsoxiteyá.

73 Tíhi mé tsíkjo Dios tí ch'in Abraham ósé kixin nkehe chaxín tsoxiteyá chr'éxin

74 kixin sinchekaáni ch'án kixin kohya nkehe sich'eħeni tí sín nínkakhenni kixin jína sich'eħeni ch'án xra tsochraħonyani,

75 la ntá jína ts'ejóni sinchetjóáni ch'án kaín yaon tí naxa tjejóħónni.

76 **A** ntá jaha xjeenni mé tsontáchro Dios kixin jaha ijnko nkexro tsochónka itén Dios tjen nkaya nkajní.

Jaha tsítønħian ntja tsixín Ìnchéni la ko jaha tsjásiyóħian ntja tsixín ch'án.

77 Jaha tsjákohé tí chojni chjasintajni nkexrí tsjiin tí jie chóna sín, ntá tsaá sín.

78 A ntá Dios mé tjuèheni ch'án la ko kuikonóeheni ch'án, kixin nkajní kuixín ijnko xrohi nixin ts'inkaséyanxín tí yaon nixin.

79 Tíha mé tsjkaó tí xrohi ts'inkaséyanxín tí sín tjejó sítié la ko tí sín chrók'uitjáyan, la ko ts'ikonxínni tí ntjá tsjanjon kjuaxróxin.

Na mé kaín tíhi chrónka tí ch'ín Zacarías.

80 A ntá tinkak'ánki tí xjan a la ko Dios kjuínchek'ánki tí kjuaxrexinkaon kuènte xjan kixin antsí tsonohe xjan nkexrí tjen Dios. A ntá kjuák'e xjan nteje k'uánki xjan kjuixrakájia tí yaon kjuankixin kjuakohé ch'án tí chojni nación Israel.

2

Kokjíhi ch'ín Jesús (Mt.1.18-25)

1 A ntá tí yaon a na mé tí ch'ín imá t'etóan mé it'ín Augusto César na mé k'uetóan ch'án kixin ts'ínixín ihníé kaín xín chojni síin tí chjasin t'etóan ch'án kixin tsonohe ch'án nkekjaín chojni síin.

2 Tí xrankixín k'uínixín ihníé sín tíó Cirenio mé k'uegobnador k'uetóan estado Siria.

3 Kaínxín chojni t'ichjánxin sátsji sín chjasén sín kixin ntaha ts'ínixín ihníé sín.

4 Mé xikaha ch'ín José kjaxin k'uaxrxjén ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsikokjéxin tí ch'ín rey David kixin jehe ch'ín José mé tsík'axrjenixin ch'án tí ch'ín David.

5 Sákjuí ch'án chjasin Belén sákjuíko ch'án tí tjan María kixin ntiha ts'ínixínko ihníé ch'án tjan kixin jehe tjan tsíkatehe kixin tsotéhe ch'án. A ntá jehe tjan na mé ó tjejá tjan.

6 A ntá xikaha kónhen nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María.

7 A ntá ntiha kokjéxin tí xjeen tjan saó. Ntá kjuínchek'ísímá tjan xjan ka, a ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ok'èxin sín mé kjónté ntiha k'uéjó sín.

Tí sín ángel la ko tí sín k'uáyakonhen kolélo

8 Kjaxin chjinaxón tí chjasin Belén tjejó iso chojni nteje ó la ntá ntahó titóhe sín tí tie a kixin t'ayakonhen sín kolélo.

9 A ntá titàya k'uúkuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxin jie kuènte Dios kuikao ch'án. Ntá jehe sín la imá chrakon sín.

10 A ntá tí ch'ín ángel ntáchro kixin:

—Chrakonhyará jahará. Ijie k'uinka tsotjonkará nkehe jina nixin kixin tsochéhe kaín xín chojni

11 kixin ijie tí chjasén ch'ín David kokjéxin tí nkexro tsaáxinrá jahará na mé ínchéni Cristo tíha.

12 Ntá tsonoaxínrá jahará kixin tí xjan a kixin ika tjechr'ísímá xjan la ko ijnko nta neyá iko mé tjetsínkayá xjan —mé xikaha chrónka tí ch'ín ángel.

13 A ntá titàya k'uúkuèn sín kixin nchónhya sín ángel kuixín nkaya nkajní tjejóko tí ch'ín ángel tjejótsje sín tjanchehe sín Dios kjuasáya, ntáchro sín kixin:

14 Kjuasáyé Dios tjen nkaya nkajní kixin imá chóna

ch'án kjuachaxin. Ntá chjasintajni ts'ixin
kjuaxróxin tí tjejó tí sín sinchexiteyéhe ch'án.
Mé xikaha ichro sín.

¹⁵ **A** ntá tí sín ángel xíkjan sín nkaya nkajní, a ntá tí sín t'ayakonhen kolélo
ikjo sín kichó sín ntáchro sín kixin:

—Íntá sátsjini tí chjasin Belén tsjitsjeheni tí nkehe tsíkónhen kixin Ìnchéni
k'ueṭoan kui tí nkexro kjuínchenoheni —ichro sín.

¹⁶ Ntá tñjan sákjuí sín ntiha la k'uitja sín tí tjan María la ko tí ch'ín José la ko
tí xjan a tjetsínkayá nta neyá iko.

¹⁷ **A** ntá tió k'uíkón sín xíkaha ntá chrónka sín tí nkehe tsíchronka tí ángel kixin
nkexrí tjen tí xjan a.

¹⁸ Ntá chrakon kaín tí sín kuínhin kixin xíkaha chrónka tí sín k'uáyakonhen
kolélo.

¹⁹ Kjánchó tí tjan María la asén tjan ó xraxinkakonxín tjan kaín tíha.

²⁰ **A** ntá tí sín k'uáyakonhen kolélo la sákjuí sín ntja kuinkákjanchehe sín Dios
kjuasáya kixin kaín tí nkehe tsíkinhin sín la ko k'uíkón sín kixin ó xiteyá kaín
nkehe éxi tsíchronka tí ángel.

Sákjuíko sín tí xjan Jesús tí nínko Jerusalén

²¹ **A** ntá tió xétja tí ijní yaon ntá kjuíncheke sín xjan xroye kuènte tí sín
israelita ntá kjuínchek'in sín xjan Jesús éxi tsintáchro tí ch'ín ángel chénka tí
tjan María tí naxá kjuák'eyáha tjan.

²² **A** ntá tió kuitohe tjan María jína éxi chrónka ley kuènte Moisés * ntá
sákjuíko sín tí xjan tí chjasin Jerusalén kixin tsochjéhe sín Dios kjuasáya.

²³ Éxi ntáchro tí xroon ley kuènte Ìnchéni Dios kixin: “**A** ntá kaín xjan ntoa
tsokjili saoxín la mé tsochjéhe sín Dios tí xjan a sich'ehe xjan xra Dios.”†

²⁴ Ntá xíkaha sákjuí sín kixin ntaha tsjanjon sín iko ts'enxín ntiha tsochjéxín
sín Dios kjuasáyé éxi t'etjoan tí ley kuènte ch'án na mé yaá kontóá najni o yaá
kontóá nteje chrókuanjon sín.

²⁵ **A** ntá tí yaon a kjuák'e chjasin Jerusalén ijnko ch'án ó táda ch'án mé it'in
ch'án Simeón. Jehe ch'án ijnko chojni jína la ko jnkochrixin xraxinkaon ch'án
Dios la ko kjuák'echónhen ch'án kixin itsi tí nkexro tsaáxin tí nacióon Israel. Tí
Nchakuen Dios tjeko tí ch'ín Simeón

²⁶ tsíkjinchenohe ch'án kixin naxá ts'enhya ch'án ts'ikonjia ch'án tí nkexro
Cristo, na mé tí nkexro tsochr'án Ìnchéni Dios.

²⁷ **A** ntá tí Nchakuen Dios kjuínchexraxinkaon tí ch'ín a kixin sátsji ch'án
nínko. **A** ntá tió kui tí iné la ko it'é xjan Jesús k'uixenko sín xjan nkaxenhen
nínko kixin sinchexiteyéhe sín tí nkehe t'etjoan tí ley

²⁸ ntá ch'ín Simeón kuakja ch'án tí xjan a kjóa ch'án ntá kjuanchehe ch'án
Dios kjuasáya ntáchro ch'án kixin:

²⁹ Ijie jaha Ìnchéni Dios, tsjánjuan kjuachaxin kixin kjuaxróxin its'éen janhan
kixin jaha ó kjuínchexiteyá tí nkehe tsintáchrua

³⁰ kixin ó k'uíkoxin kuan tí nkexro tsaáximni,

³¹ mé xíkaha kjuich'e kixin ts'ikon kaín xín chojni.

³² Jehe ch'án mé tí xrohi ts'inkaséyanxín ntje tí sín jehya kuènte Israel,
la ko jehe ch'án tsjikosáyehe ch'án tí chjasín kuéntá Israel,
mé ichro ch'ín Simeón.

* 2:22 Levítico 12.1-8 † 2:23 Éxodo 13.2,12

³³ Ntá ch'ín José la ko tí iné ch'ín Jesús la chrakon sín kixin xikaha kuínhin sín ntáchro ch'ín Simeón kixin nkexrí tjen tí xjan.

³⁴ Ntá ch'ín Simeón kjuíncheyaon ch'án sín ntá chénka ch'án tí tjan María mé tí iné xjan Jesús kixin:

—Tí xjan i tsíkikao itsjé xrá la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsoñohe sín la ko nchónhya chojni tsojtinkakonhya tsinhin sín tí nkehe tsjako ch'án.

³⁵ Mé xikaha tsoñoxín nkexrí tjenkayáxin jnkojnko asén chojni. Kjánchó kaín tíha tsoyóhe éxí ijnko chica espada chróchr'áte asán na mé tsoxakonhan la ko ts'avá má —ichro ch'án nixjehé ch'án tí tjan María.

³⁶ Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxin ch'án tí ch'ín Aser. Jehe tjan la ó nána tjan. Tí naxá k'uétjarisoá tjan la kótehe tjan. Ntá yatokoá nánó kjuák'eko tí xí tjan

³⁷ ntá jie ochenta y cuatro nánó tsikók'án tjan. Kuítqehya tjan tí xrá kuènte nínko la mé ntahó tjen tjan ch'ehe tjan Ìnchéni Dios xrá nchakotjin la ko tie la jnkoyaxón nehya tjan kixin jína tsonixjehé tjan Dios.

³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí tjen tí xjan Jesús nixjehé tjan kaín tí sín tjejóchónhen kixin itsi nkexro sinchekaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuínchexiteyá sín kaín nkehe t'etqan tí ley kuènte Dios ntá kjan sín estado Galilea na mé chjasén sín chaxín Nazaret.

⁴⁰ A ntá tí xjan a mé k'uánkí xjan la ko tsanká xjan la ko imá kónohe xjan kixin Dios imá tjinkítsa tjencheyaon xjan.

Tí xjan Jesús kjuák'e xjan tí nínko Jerusalén

⁴¹ Tí it'é la ko iné tí xjan Jesús xráxin k'uékji sín kaín nánó tí chjasin Jerusalén kixin tí kia pascua.

⁴² A ntá tió xetjehé ch'ín Jesús tí teyó nánó, ntá sákjui sín kaín sín tí chjasin Jerusalén kixin xikaha kuénhen sín kixin tí kia a.

⁴³ A ntá kjanxin sín ntiha sáchrókjui sín chjasén sín tió k'uátsínka kia la tí xjan Jesús ó tsikitohe xjan Jerusalén ntahó, kjánchó iné xjan la ko ch'ín José xraxinkakonhya sín kixin kohya tí xjan.

⁴⁴ Jehe sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntjá tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín

⁴⁵ kjánchó k'uitjahya sín xjan. Ntá kjan sín tí chjasin Jerusalén kixin tsjeyá sín xjan ntiha.

⁴⁶ Ntá k'uátsínka iní yaon ntá k'uitja sín xjan la mé nkaxenhen nínko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín.

⁴⁷ Ntá kaín tí sín tjejótaxín tjejótinhin sín mé chrakon sín kixin xikaha imá nohe xjan la ko xikaha tjatehe xjan kaín nkehe tjanchankíhi sín xjan.

⁴⁸ Ntá tió k'uikon iné la ko it'é la chrakon sín. Ntá ntáchro iné kixin: —Xjeenni, ¿nkekuènte xikaha kjuich'e? It'á la ko janhan imá kóxakonhenni kjueyáni tí jaha —ichro tjan.

⁴⁹ Ntá ntáchro ch'ín Jesús kixin:

—¿Nkekuènte tǵeyá tí jeheni? ¿Á noahya jaha kíxín tóxakonhenni kíxín tí xra kuènte It'èni? —ichro ch'án.

⁵⁰ Kǵánchó kienxínhya sín nkexrí t'axrjexín tí nkehe ntáchro ch'án.

⁵¹ Ntá kǵan sín chjasin Nazaret. A ntá ntiha naxa kuítekakonhen xjan tí jehe sín. A ntá tí iné la ntá asén tjan xráxín ó nohe kíxín xíkaha kónhen.

⁵² La ko naxa k'uánkí xjan kónteto xjan la ko k'uánkí tí kǵuaxrexinkaon kuènte xjan la ko Dios kóxrjínhjn nkexrí kǵuínchexiteyá xjan la ko kǵaxin kaín chojni kóxrjínhjn sín kíxín jína tjen xjan.

3

Ch'in Juan Bautista kǵuák'e nteje kǵuako itén Dios

(Mt. 3.1-12; Mr. 1.1-8; Jn. 1.19-28)

¹ A ntá quince nánó k'uék'etoan ch'in Tiberio tí xra gobierno, la ko tí ch'in Poncio Pilato k'uégobrnador tí estado Judea, la ko tí ch'in Herodes k'uégobrnador tí estado Galilea, la ko tí kíchó ch'án Felipe mé k'uégobrnador estado Iturea la ko estado Traconite, la ko ch'in Lisantias k'uégobrnador tí estado Abilinia.

² A ntá ch'in Anás la ko ch'in Caifás k'uéchóna sín xra nchat'á t'etoan. A ntá Dios mé kǵuanjon kǵuachaxin k'uáyéhe ch'in Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías.

³ Ch'in Juan k'uátsínka ch'án kaín tí chjasin chjino tí ntario Jordán kǵuakohe ch'án chojni ntiha kíxín chrókuikí sín tí nkehe tjenkayáxin sín chrókuítóhe sín tí ijíe sín ntá chrókuikite sín kíxín xíkaha mé chrókuilin ijíe sín.

⁴ Mé xíkaha kónhen éxi k'uéchronka la ko tsíkjin ch'in Isaías, mé tí nkexro k'uéchronka itén Dios ósé kíxín:

Tsinhin sín itén ijnko nkexro tsjak'e nteje ts'èya tsontáchro kíxín:

“Tóxakonhanrá ncheyóxinrá ntǵa tsixín Inchéni

Takítjehérá ijnko ntǵa ntoí.

⁵ Kaínxín tsáka mé tsyóxin,

la ko kaín xín jna la ko kaín xín itjo tsitóhe yóxin,

la ko tí ntǵa tsixrèya mé tsoxrentoá,

la ko kaín tí ntǵa yóxinhya la mé tsyóxin;

⁶ Xíkaha mé kaín xín chojni chjasintajni mé ts'ikon sín kíxín Dios mé chrókuaáxin sín.”*

Mé xíkaha ichro itén Dios.

⁷ A ntá tíó kǵuǵi chojni ntiha kíxín ch'in Juan chrókuíkite ch'án sín ntá ntáche ch'án tí jehe sín kíxín:

—Jahará tsík'axrjeníxinrá konche. ¿Xá nkexro kǵuántanohará kíxín chrókuinkeherá tí kǵuanínkaon kuènte Dios ó tsi?

⁸ T'ichjánxin kíxín chrók'uejorá jnkojína chrókǵuákoxinrá kíxín chaxín kǵuítóxinhínrá tí nkehe tjenkayáxinrá. Jahará nchehnerá ntáchrórá kíxín k'uaxrjeníxinrá ch'in Abraham. Janhan ntáxrjan kíxín kjónté tí xro i la Dios tsjacha chrókǵuich'èna ch'án chojni k'uaxrjeníxin ch'in Abraham.

⁹ Kíxín tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kíxín tsoche —ichro ch'án.

¹⁰ A ntá tí chojni mé kǵuanchankíhi sín ch'án kíxín:

—A ntá tí xíkaha, ¿a ntá jeheni nkehe tí chrókǵuich'èni? —ichro sín.

¹¹ Ntá kǵuátehe ch'in Juan kíxín:

* 3:6 3.4-6 Isaías 40.3-5

—Tí nkexro chón̄ta yaá camisa la chrókjuinche^kitonhen tí nkexro chón̄tahya. La ko tí nkexro chón̄ta nkehe sine chróchjéhe sín tí nkexro chón̄tahya nkehe sine —ichro ch'án.

¹² Kjaxin ikui iso tí sín nche^kjèn^ki kixin chrókuikite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kixin:

—Jehó éxi tí tsik'ítuanhanrá chrókjuinche^kjèn^kirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chichakoen sín la ko ninkexró sich'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kain tí chojni chjasin k'uéjóchónhen sín tóxakonhen asén sín tjinkaon sín tsonhe sín kixin á tí ch'ín Juan mé tí Cristo.

¹⁶ Kjánchó chénka ch'ín Juan kain tí sín tjejó a kixin:

—Janhan mé ìnta tíkítexián chojni. A ntá tí nkexro itsi chr'éxin mé tsikítexínrá tí Nchakuen Dios la ko xrohi. Antsí t'etōan ch'án a ntá janhan la kánhyó. Méxra chrókósuana chrókjuasintankaha ch'án tí Correa tí tokaté ch'án.

¹⁷ Jehé ch'án la ó tje^xraá ch'án pala sinchetjuáxin ch'án noatrigó kixin tí ntachjiji trigo la ókjé tsjejo ch'án a ntá tí noatrigó la tsjenájín ch'án la ts'enkájijina ch'án. A ntá tí ntachjiji trigo la tsjakaxin ch'án ijnko xrohi ts'ankahya jnkochríxin —mé xikaha ichro ch'ín Juan.

¹⁸ Mé xikaha chronkaxín ch'án la ko itsjé í so nkehe kjuínchexraxinkaon ch'án chojni mé xikaha kjuakoxén ch'án sín tí tan jína.

¹⁹ Kjaxin kjuentuéhe ch'án tí ch'ín Herodes kixin chón̄ta ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsík^jich'e ch'án.

²⁰ Kjánchó ch'ín Herodes antōsén ch'án kjónté kuínhin ch'án la kjuínche^k'ánkí ch'án tí ijje ch'án inaá kixin kjuak'echjina ch'án tí ch'ín Juan tí ntōechiso.

Kuikite ch'ín Jesús

(Mt. 3.13-17; Mr. 1.9-11)

²¹ A ntá naxa kuénhya tíha naxa kjuák'e ch'ín Juan kuikite ch'án chojni ntá kjaxin ch'ín Jesús mé kuikite ch'án. A ntá tjenixjehé ch'án Dios ntá xitjehé nkajní

²² ntá k'uínkajin Nchakuen Dios éxi ijnko kontóá tsjehe la kjuák'e chrítaón kja ch'án. Ntá xrínahya kuínhin sín itén nkexro nkaya nkajní ntáchro kixin:

—Jaha mé xjanna la tjuaha tí jaha. Imá chàna kixin nchexiteyána tí jaha.

Tí sín tsík'axrjeníxin ch'ín Jesucristo

(Mt. 1.1-17)

²³ Ch'ín Jesús k'uéchón̄ta ch'án chjino treinta nánó tió kjuankíxin kjuako ch'án. Ntá kjuenkayáxin sín kixin it'é la mé ch'ín José. Ntá it'é tí ch'ín José la mé ch'ín Elí.

²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José.

²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai,

²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá,

²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri,

²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er,

²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat,

³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim,

³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán,

³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón,

³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá,

³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham ná mé ch'ín Taré, a ntá it'é tí ch'ín Taré na mé ch'ín Nacor,

³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala,

³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec,

³⁷ a ntá it'é tí ch'ín Lemec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán,

³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4

*Ch'ín Tsochren chrókjuachroe tí ch'ín Jesús
(Mt. 4.1-11; Mr. 1.12-13)*

¹ A ntá ch'ín Jesús imá chón'ta ch'án kjuachaxién Nchakuen Dios ntá kjanxin ch'án tí ntario Jordán. Ntá tí Nchakuen Dios sákjuiko ch'án nteje.

² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xrinahya ik'uén ch'án kjinta.

³ Ntá ntá chro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntá chro ch'án kixin:

—Náhi. Ntá chro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”^{*} —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí nacióon siín chjasintajni.

⁶ Ntá ntá chro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nacióon a. Janhan na k'uayáha kaín tíha la ntá jie tsotjaha tí nkexro tjínkavan tsotjaha.

⁷ Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuéntá —ichro ch'án.

⁸ Ntá kjuátehe ch'ín Jesús ntá chro ch'án kixin:

—Sátjia Satanás, kixin xroon itén Dios ntá chro kixin “Chrókjuikosáyehé Ìnchéni Dios la jehó ch'án chrókjuich'ehé xra”[†] —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja njnko, a ntá ntá chro ch'án kixin:

—Tí chaxín Xjeen Dios jaha la tjtóhé t'anótjenxian tí noi ntihi

¹⁰ kixin ntá chro xroon itén Dios kixin:

Dios mé ts'etuenhen tí sín ángel kuénte ch'án kixin ts'ayakonhan sín.[‡]

¹¹ Tsotsé sín itjá

kixin tsotéhya totá ts'itja xro tí ts'anótjen§

—mé xikaha ichro ch'ín Tsochren.

¹² Ntá kjuátehe ch'ín Jesús ntá chro ch'án kixin:

—Náhi. Kjaxin ntá chro xroon itén Dios kixin: “Chjinihya chrókjuásixián kjuaxroan kjuachaxin kuénte Ìnchéni Dios”^{*} —ichro ch'ín Jesús.

¹³ Mé xikaha tió kjuachahya tí ch'ín Tsochren kaín nkehe chrók'uetuenhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuénte ch'án estado Galilea

(Mt. 4.12-17; Mr. 1.14-15)

¹⁴ Ntá ch'ín Jesús xikjan ch'án estado Galilea inaá na imá chóna ch'án kjuachaxin kuénte Nchakuen Dios. Ntá tjejóto jéne nkuíxin ntiha kixin nkexro tí jehe ch'án.

¹⁵ Kjuakoxin ch'án tí njnko sín kaín chjasin la ko kaín xín chojni kjuanchia sín kjuasáya kixin kóxrjinhin sín tí kjuako ch'án.

Ch'ín Jesús kjuák'e ch'án chjasin Nazaret

(Mt. 13.53-58; Mr. 6.1-6)

¹⁶ Ntá ch'ín Jesús sákjuí ch'án chjasin Nazaret na mé tí chjasin tsík'ánkixin ch'án. Ntá tí yaon t'ok'éhe sín mé k'uixenhen ch'án ijnko njnko Israel kixin xikaha kuénhen ch'án. Ntá kjuák'exín toté ch'án kixin sinchekuáxin ch'án tí xroon itén Dios.

* 4:4 Deuteronomio 8.8 † 4:8 Deuteronomio 6.13 ‡ 4:10 Salmo 91.11 § 4:11 Salmo 91.12

* 4:12 Deuteronomio 6.16

17 Chjéhe sín ch'án tí xroon kuénte tí profeta Isaías. Ntá kuakitjehē ch'án tí xroon ntá k'uitja ch'án nketí nixja xīkihí:

18 Tí Nchakuen It'éni Dios tjetjinkitsana má, kixin kjueyána ch'án kixin tsoxrjanka tí tan jína kuénte Dios tsjakohā tí sín nòa. K'uetuanna ch'án kixin s̄intakītohā jína tí sín t'ává asén kixin chóntahya sín nkerí tsaáxin sín,

la ko tsjakohā tí sín tjejóhjna kixin nkexrí tsaá sín,

la ko s̄intak'ikuān tí sín t'ikonhya,

la ko s̄intakaá kaín tí sín tjejótjasóte kohya nkehe tsaáxin sín,

19 la ko tsoxrjanka kixin ó kjuixraká tí yaon kixin tí nkexro tsitekaon la tsaá sín.†

20 A ntá ch'ín Jesús kjuixin kjuínchekuáxin ch'án tí xroon, a ntá chjéhe ch'án tí ch'ín tjinkitsa tí xra n̄inko ntá kjuák'etjāxin ch'án. Ntá kaín tí sín tsíkójnksé ntiha n̄inko naxa tjejókomá sín tí jehe ch'án.

21 Ntá kjuankixin chronkaxin ch'án ntáchro ch'án kixin:

—Ntá ijie la ó xiteyá tí nkehe kjuíntakuáxian tí xroon itén Dios kuínhínrá —ichro ch'án.

22 Ntá kaín sín kóxrjnhjn sín tí kjuako ch'ín Jesús la ko chrakon sín kixin náxrjón tí nkehe nixja ch'án. Ntá kjuanchankíhi sín kichó sín ntáchro sín kixin: —¿A jehya xjeen ch'ín José tíhi? —ichro sín.

23 Ntá kjuátehe ch'ín Jesús ntáchro ch'án kixin:

—Kjá tsontáchrórā kixin janhan ijnko chojni ch'e xroān chrókjuíntakītohā jína asenná senó, la ko tsontáchrórā kixin tí nkehe kuínhínrá kjuít'a tí chjasin Capernaum xīkaha chrókjuít'a ntíhi chjasenná, tsixrorá —ichro ch'án.

24 Naxa tjenixja ch'án ntáchro ch'án kixin:

—Ijnko nkehe chaxín tsotjōnkará kixin tí sín chjasén ijnko nkexro chrónka itén Dios la mé xráxin chóntehya sín kjuasáyé tí nkexro a.

25 Chaxin ntáxrjan kixin k'uejó itsjé chojni chjin tsíkók'án tí naciōn Israel tíó kjuák'e ch'ín Elías tí nkexro k'uechrónka itén Dios la ntá í k'uániáhya chrin iní nánó ko t'ò la ko imá kókjinta nkuíxin chjasin ntiha.

26 Kjánchó Dios la k'uetuēnhya ch'ín Elías sáchrókjuitsjehe ch'án nijnko chojni chjin tsíkók'án tí naciōn Israel. Náhi. Dios k'uetuēnhen ch'án kixin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón.‡

27 Kjaxin naciōn Israel k'uejó nchónhya chojni chóna chinlepra tíó kjuák'e ch'ín Eliseo chrónka ch'án itén Dios, kjánchó nijnko sín kuítōehya sín jína la mé jehó ch'ín Naamán kjuix̄xin ch'án naciōn Siria mé kuítōhe ch'án jína§ —mé xīkaha ichro ch'án.

28 A ntá tíó kuínhin sín xīkaha ntáchro ch'ín Jesús la ntá kaín tí chojni k'uejóxēnhen n̄inko la mé imá kónínkaon sín.

29 K'uínkatjen sín itsé sín ch'án sákjuiko sín ch'án tí ikon chjasin la sákjuiko sín ch'án chrítaón tí tjo tí tjen tí chjasin a chrókjuinchek'anótjenxin sín ch'án tí tjo a.

30 A ntá ch'ín Jesús k'uátsínka jnkōsiné tí síin tí jehe sín la sákjuí ch'án.

*Ijnko chojni chóna ijnko nchakuen tí jínahya
(Mr. 1.21-28)*

³¹ A ntá ch'in Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuankíxin ch'án kjuakohé ch'án chojni tí yaon t'ok'éhe sín.

³² Chrakon sín kixin nkexrí kjuako ch'án kixin kjuakoxin ch'án kixin chóna ch'án kjuachaxin.

³³ A ntá nkaxenhen nínko kjuák'e ijnko ch'in chóna ijnko nchakuen tí jínaha k'óyaxoxín itén tí ch'in a, ntáchro kixin:

³⁴ —Títohéni; ¿nkekuente tjiaté tí jeheni kaín ni, jaha Jesús kjuíxian chjasin Nazaret? ¿Á k'uinka kixin sinchek'itjáyanni? Ó tjátsoan tí jaha la ko nóna kixin jaha mé tí nkexro tjóá kuente Dios —ichro tí nchakuen tí jínaha.

³⁵ Ntá ch'in Jesús jiehe k'uetuēnhen tí nchakuen tí jínaha ntáchro ch'án kixin:

—Tánía. T'axrxéxian tí ch'in a —ichro ch'án.

A ntá tí nchakuen tí jínaha kjuáka tí ch'in a kjuítsínka ch'án nonte jnkosiné tí siín sín la k'uaxrje tí nchakuen tí jínaha la kohya ninkehó kónhen tí ch'in kjuítsínka.

³⁶ A ntá kaín sín chrakon sín itjo sín kichó sín kixin:

—¿Xá nkexrí kixin xikaha nixja tí ch'in i? Jhehe ch'án chóna kjuachaxin kixin k'uetuēnhen ch'án tí nchakuen tí jínaha k'uaxrxéxín tí nkexro i —ichro sín.

³⁷ A ntá nkuíxín ntiha ikjo sín kichó sín kixin nkerí kjuaxroan kjuích'e ch'in Jesús.

Ch'in Jesús kjuínchekitohe jína tí tjan ich'ee ch'in Simón Pedro
(Mt. 8.14-15; Mr. 1.29-31)

³⁸ Ntá ch'in Jesús k'uaxrxéxín ch'án tí nínko la ntá k'uixenhen ch'án ntøe ch'in Simón. A ntá tí tjan ich'ee ch'in Simón mé níhi tjan chóna tjan ijnko sóa jieé ntá chronóhe sín ch'án kixin chrókjuinchekitohe ch'án tjan jína.

³⁹ Ntá k'uísén ch'in Jesús tí tjen tjan ntá k'uetuēnhen ch'án tí sóa a ntá kjuiin. Ntá tuénxín k'uàya tjan la ntá kjuanjon tjan nkehe sine sín.

Ch'in Jesús kjuínchekitohe ch'án jína itsjé chojni níhi
(Mt. 8.16-17; Mr. 1.32-34)

⁴⁰ A ntá kuétaón yaon ntá kaín tí sín chóna sín sinníhi chóna sín nchónhya clase chin mé kuíkao sín tí tjen ch'in Jesús. Ntá kjuak'etja tja ch'án jnkojnko tí jhehe sín a ntá xikaha kuitøhe sín jína.

⁴¹ La ko nchónhya chojni níhi chóna nchakuen tí jínaha la mé k'uaxrje tí nchakuen tí jínaha la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínaha.

Kjánchó ch'in Jesús k'uetuēnhen ch'án tí nchakuen tí jínaha la kjuanjonhya ch'án kjuachaxin kixin sintonixja kixin ó nohe tí nchakuen tí jínaha kixin jhehe ch'án na mé tí nkexro Cristo.

Ch'in Jesús kjuako ch'án tí estado Galilea
(Mr. 1.35-39)

⁴² A ntá tí kóyaon k'uínkaséyan ntá ch'in Jesús k'uaxrjenta ch'án chjasin sákjuí ch'án nteje. A ntá kaín tí chojni kjuíkjoyá sín ch'án la k'uitja sín tí tjen ch'án. Tjinkaon sín chrókjuinchexrjenhen sín ch'án kixin sáchrókjuihya ch'án ókjé.

⁴³ Kjánchó kjuátøhe ch'in Jesús ntáchro ch'án kixin:

—T'ichjánxín kixin sátsjia kaín chjasin ókjé tsøxrjanka tí tan jína kuente Dios kixin nkexrí tí kjuachaxin t'etøan Dios, kixin xra ó mé k'uinka —ichro ch'án.

44 **A** ntá xikaha k'uájikjako ch'in Jesús kaín tí nínko Israel tí estado Galilea.

5

Kjuaxroan itsé sín koche

(Mt. 4.18-22; Mr. 1.16-20)

1 Ntá ijnko yaon kjuák'e ch'in Jesús chrínta ntayaon Genesaret ntá kóchjina nchónhya chojni na mé k'uixitja kichó sín kixin tjinkaon sín chrókuinhin sín itén Dios.

2 Ntá k'uíkon ch'in Jesús kixin tjejó iyó ntabárcø jehó chjino chrínta ntayaon. **A** ntá tí sín itsé koche mé tsík'axrjéxín sín ntiha la k'uéjó sín tjentoá sín la ko tjejtøjønemá sín tí nchísén tséya sín koche.

3 Ntá ch'in Jesús k'ujt'ótjen ch'án ijnko tí ntabárcø ntiha na mé ntabárcø kuènte ch'in Simón na ntá chronóhø ch'án tí ch'in Simón kixin sátsjiko ch'án ntabárcø ijnko chrínta ntá kjínhya. Ntá ntahó kjuák'enkáya ch'in Jesús tí nta kjuák'etjæxín ch'án kjuakøhø ch'án nchónhya chojni sín chrínta ntá.

4 **A** ntá tió kjuixín nixja ch'án ntá ntáche ch'án tí ch'in Simón kixin:

—Tjíkoa ntabárcø tí tjáá ntá nínka ntá iterá tí nchísén tseyará koche —ichro ch'án.

5 Ntá kjuátehe ch'in Simón ntáchro ch'án kixin:

—Maestro, kjuích'eni xrå kuènté tie la tséhyani ninkehó koche. Kjánchó tí jaha xikaha kuétuénhéni la mé tsochr'ánni tí nchísén inaá —ichro ch'án.

6 Na ntá xikaha kjuích'e sín la ntá nchónhya koche tsítsé tí nchísén la ntá tí nchísén kjuankixin tinkák'ichje.

7 Ntá k'uèyæxín sín tja sín kixin chróxrakoa tí sín ch'eko sín xrå tjejóxenhén tí ijnko ntabárcø kixin tsjnkítsa sín. Ntá xråqao sín ntabárcø kuènte sín ntá kjuínchekaón sín yóí tí ntabárcø ntá chrókjuachahya tí ntabárcø na tjinkaon chrók'uániánkí ntá.

8 Ntá xikaha k'uíkon ch'in Simón Pedro ntá kjuák'exín toch'in ch'án nkayakon ch'in Jesús ntá ntáchro ch'án kixin:

—Tjtohéni Ìnchéni kixin jeheni ijnko chojni chóna jie —ichro ch'án.

9 Mé xikaha ichro ch'in Simón kixin chrakon ch'án la ko kjaxín chrakon tí í so sín tjejóko ch'án kixin xikaha kónhen xrenájín nchónhya koche.

10 La ko ch'in Jacobo la ko ch'in Juan, xjèen ch'in Zebedeo, na mé jnkokøá ch'eko sín xrå ch'in Simón, la kjæxín chrakon sín. Kjánchó ntáche ch'in Jesús tí ch'in Simón kixin:

—Chrakonhya. Senó la koche k'uétse la nta jie la náhí la mé chojni tsjéyá —ichro ch'án.

11 Ntá tió kjuújiko sín tí ntabárcø tí chrínta ntá la kuitohe sín kaín nkehe kuènte sín ntá chréhø sín sákjuíko sín tí ch'in Jesús.

Ch'in Jesús kjuínchekitohe ch'án jína ijnko chojni chóna chinlepra

(Mt. 8.1-4; Mr. 1.40-45)

12 Kjuák'e ch'in Jesús ijnko tí chjasín, ntá kui ijnko chojni níhi chóna chinlepra. **A** ntá tió k'uíkon ch'án tí ch'in Jesús ntá kjuák'exín toch'in ch'án chronóhø ch'án jnkøjína ntáchro ch'án kixin:

—Ìnchéni, tí tjínkævan jaha la jína chrókjuínchekitøhéni jína —ichro ch'án.

13 Ntá ch'in Jesús kjuéntoá tja ch'án ntá kjuak'etja tja ch'án chrítaón tí sinníhi ntáchro ch'án kixin:

—Méxrå xikaha tjínkævan. Ntá jie sintakitøha jína —ichro ch'án.

Ntá xikaha ichro ch'án ntá tí chinlepra tuénxín kjuíinhin tí sinníhi.

14 **A** ntá k'uɛtuɛnhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjtisjehé tí ncha'tá la tsjánjuan tí nkehe tsik'etqan ch'ín Moisés ts'áyéhe Dios* kixin ntá tsoñoexín kaín xín chojni kixin ó kuitóha jína —ichro ch'án.

15 Kjánchó antsi k'uúxikónohe sín nkexrí tí kjuaxroan kjuasin ch'ín Jesús, ntá nchónhya chojni k'uúxikóchjinehe sín ch'án kixin tsinhin sín nkehe tsjako ch'án, la ko tsitogexín sín jína tí chin chóna sín.

16 Kjánchó ch'ín Jesús la k'uaxrjenta ch'án tí kohya chojni la ntaha nixjexín ch'án Dios.

Ch'ín Jesús kjuínchekitóhe ch'án jína ijnko ch'ín tsík'en toté

(Mt. 9.1-8; Mr. 2.1-12)

17 **A** ntá ijnko yaon kjuák'ekjako ch'ín Jesús na ntá ntiha k'uéjótjaxín iso sín fariseo la ko iso tí sín tjako tí ley, tsíkijixín sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuènte Dios kjuakoxín ch'án kixin sinchekitóhe ch'án chojni jína.

18 Ntá kui iso chojni tinkátsénkí sín ijnko ch'ín tsík'en tote tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án.

19 Kjánchó xitjahya ts'ixenhen sín kixin nchónhya chojni síxenhen nchia. Ntá k'ujt'ótjen sín tí chrítaón nchia, ntá kjuakjlin sín iso teja la ko tí nta sít'ó ntá ntiha kjuinkajinxín sín tí ch'ín níhi tjenkáya kania ntoí tí tjen ch'ín Jesús.

20 Na ntá tió k'uúkon ch'ín Jesús kixin imá tinkáchónki sín ch'án ntá nixjehé ch'án tí ch'ín níhi, ntáchro ch'án kixin:

—Jaha, ó kjuixin kjuínhan tí jie chonta —ichro ch'án.

21 **A** ntá tí sín maestro tjako tí ley la ko tí sín fariseo kjuankíxin sín kjo sín asén sín kixin: “¿Xá nkeexo tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjlin ijie kixin jehó Dios mé chóna kjuachaxin tsjatsen ijie chojni”, mé xikaha kjuenkayáxin sín.

22 Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuènte kixin xikaha tjenkayáxinrá?

23 ¿Nkehe antsi xrahya chróntátjan ch'án? ¿Á antsi xrahya chróntátjan ch'án kixin ó kjuixin kjuínhin ch'án tí ijie yámá ch'án, o á antsi xrahya chróntátjan ch'án kixin chrók'uínkatjen ch'án sáchrókjuí ch'án?

24 Méxra ijie tsjákoxian kixin tí Xjeen Dios K'óna Chojni mé chóna kjuachaxin ntihi chjasintajni tsjakjlinhin ijie chojni —ichro ch'án.

Ntá k'uɛtuɛnhen ch'án tí ch'ín tsík'en tote ntáchro ch'án kixin:

—Jaha tétuánhan t'ínkatjen tjatsyan kaníaa la sátjia ntqo —ichro ch'án.

25 Ntá tuénxín k'uúinkatjen tí ch'ín tsík'en tote nkayakon kaín tí sín siín a la kuákja ch'án kaníee ch'án k'uékjak'eták'á ch'án ntá sákjuí ch'án ntqo ch'án la kjuanchehe ch'án Dios kjuasáya.

26 Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uúkonni antsi má kjuaxroan jie —ichro sín.

Ch'ín Jesús k'uúyehé ch'án tí ch'ín Leví

(Mt. 9.9-13; Mr. 2.13-17)

* 5:14 Levítico 14.4-8

²⁷ Ntá chr'éxin ntá ch'in Jesús k'uaxrjexin ch'án nchia ntá k'uikon ch'án ijnko ch'in nchekjènkj mé it'in ch'án Leví tjetjaxin ch'án tjech'e ch'án xra nkaxenhen tí nchia ntá s'í xenkaxin chichaon a. Ntá ntáchro ch'án kixin:

—Chr'éhé tí janhan —ichro ch'án.

²⁸ Ntá ch'in Leví mé tuénxín k'uínkatjen ch'án la ntá kuitqhe ch'án kaín xín nkehe ntá chr'éhé ch'án tí ch'in Jesús.

²⁹ Ntá chr'éxin ch'in Leví chóna ch'án ijnko kia jié ntqe ch'án kjuikosáyehé ch'án tí ch'in Jesús. Kjaxin k'uéjé itsjé tí sín nchekjènkj la ko itsjé í so chojni chóna jié k'uéjótjaxinko sín tí ch'in Jesús chjino tí mesa a.

³⁰ A ntá tí sín fariseo la ko tí sín maestro tjako tí ley la mé kjuankixin sín tjonta sín tí sín k'uájiko ch'in Jesús ntáchro sín kixin:

—¿Nkekuènte ntekoará la ko t'ikoará tí sín nchekjènkj la ko tí sín chóna jié? —ichro sín.

³¹ A ntá kjuátehe ch'in Jesús ntáchro ch'án kixin:

—Tí chojni níehya t'ichjánxienhya sín nkexro sich'e xroan. Náhi. Jehó tí sín níhi mé t'ichjánxinhin sín nkexro sich'ehe sín xroan.

³² Janhan la k'uinkahya ntihi kixin chrók'uíyaha tí sín jína tjejó. Náhi. Janhan k'uinka kixin ts'iyaha tí sín chóna jié kixin chrókuítqhe sín tí ijíe sín ntá chrókuinkí sín tí tjenkayáxin sín —ichro ch'án.

Tjanchankíhi sín tí ch'in Jesús kixin á chrókjónehya sín tió tsonixjehé sín Dios (Mt. 9.14-17; Mr. 2.18-22)

³³ A ntá kjuanchankíhi sín tí ch'in Jesús kixin:

—¿Nkekuènte kixin tí sín k'uék'ajiko ch'in Juan jnkoyaxón nehya sín na nixjehé sín Dios, la ko kjaxin xikaha ch'e tí sín xriko tí sín fariseo, a ntá tí sín xrikoa la ine sín la ko it'í sín? —ichro sín.

³⁴ Ntá kjuátehe ch'in Jesús kixin:

—¿Xá chrókuachará chrókuétuenhenrá kaín tí sín tsík'íyehé sín tsíkóchjina tí tjejó tí sín tsíkótehe kixin chrókjónehya sín tí naxa tjejóko sín tí ch'in tsíkótehe?

³⁵ Kjánchó tsjixraká tí yaon itsi chojni tsotsé sín tí ch'in tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

³⁶ Kjaxin kjuíncheyóexin ch'án ntáchro ch'án kixin:

—Ninkexró chrókuaté ijnko camisa nixin ntá chrókuak'eniéhe ijnko camisa ntaxin kixin xikaha chrókuich'e sín ntá chrók'uitjáyán tí camisa nixin la ko kjaxin tí t'q ka k'uaxrjexin tí camisa nixin tsoyóehya tí camisa ntaxin.

³⁷ Kjaxin chrókuikjahyará xranvino nixin ijnko tjuaxran ntaxin kixin tí xikaha chrókuich'erá la chrók'uichje tí tjuaxran ntaxin ntá chrók'uitjáyán tí xran la ko chrók'uitjáyán tí tjuaxran.

³⁸ A ntá tí xranvino nixin chrókuikia ijnko tjuaxran nixin kixin yóí la chrók'uitjáyannya.

³⁹ La ko kjaxin ninkexró tió tsík'í tí xran ntaxin naxa chrókóxrjinhin chrók'ui xran nixin. Náhi. Tsontáchro ch'án kixin íchá jína tí xran ntaxin, tsixro ch'án —mé xikaha ichro ch'in Jesús.

6

Tí sín k'uájiko ch'in Jesús mé k'uín sín iso noatrigó ijnko yaon t'ok'éhe tí sín israelita

(Mt. 12.1-8; Mr. 2.23-28)

1 Ijnko yaon t'ok'éhe sín la ch'in Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankíxin sín nkaya tja sín ó k'óntajinyá sín tí noa ntá kjóne sín.

2 Ntá iso tí sín fariseo kjuanchankí sín kixin:

—¿Nkeuènte kixin tjejoch'erá xra jie? La mé kohya kjuachaxin tsonhen xra tí yaon t'ok'éheni —ichro sín.

3 Ntá kjuátgehe ch'in Jesús kixin:

—¿Jahará á kjuinchekuáxinhyará tí xroon chrónka nkehe kjuich'e ch'in David la ko tí sín k'uájiko ch'án tió k'uén sín kjinta?

4 Na mé jehe ch'án mé k'uixenhen ch'án ntøe Dios la kjóne ch'án tí niotja tsikóyaon, la ko kjaxin chjéhe ch'án tí niotja tí sín k'uájiko ch'án kjónté jehó siín kjuachaxin sine tí sín nchát'á* —ichro ch'in Jesús.

5 Kjaxin ntáchro ch'án kixin:

—A ntá tí Xjeen Dios K'óna Chojni mé chóna kjuachaxin ts'etøan nkexrí tsonhen tí yaon t'ok'éheni —ichro ch'án.

Ch'in Jesús kjuinchekitøhe jína ijnko ch'in tsixámá tja

(Mt. 12.9-14; Mr. 3.1-6)

6 A ntá í jnko yaon t'ok'éhe chojni ntá k'uixenhen ch'in Jesús ijnko njnko Israel la ntá kjuankíxin kjuako ch'án. A ntá ntaha kjuák'e ijnko ch'in tsixámá tja ch'án chjina.

7 Na ntá tí sín tjako tí ley la ko tí sín fariseo tjejó sín tsáyehe sín tí ch'in Jesús chrók'uikon sín á sinchekitøhe ch'án chojni jína tí yaon t'ok'éhe sín kixin ntá chrók'ueka sín ch'án jie.

8 Kjánchó jehe ch'án ó nohe ch'án nkehe tjenkayáxin asén sín ntá nixjehe ch'án tí ch'in tsixámá tja ntáchro ch'án kixin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'in a kjuák'exín tøte ch'án.

9 Ntá nixjehe ch'in Jesús tí í so sín ntáchro ch'án kixin:

—Tsjánchánkíhárá ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitøheni chojni jína ní o á chrók'óyánni chojni? —ichro ch'án.

10 Ntá ch'in Jesús komá ch'án kaín tí chojni siín ntiha ntá nixjehe ch'án tí ch'in níhi ntáchro ch'án kixin:

—Tjéntoá tjá —ichro ch'án.

A ntá tí ch'in a xíkaha kjuich'e ch'án ntá kuitøhe tja ch'án jína.

11 Kjánchó tí sín fariseo tjejó mé kónínkaon sín mé ntá kjo sín kíchó sín kixin tjinkaon sín chrók'óyán sín tí ch'in Jesús.

Ch'in Jesús kjueyá ch'án tí teyó sín ts'ajiko ch'án

(Mt. 10.1-4; Mr. 3.13-19)

12 A ntá ijnko yaon ch'in Jesús sákjui ch'án ijnko jna kixin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios.

13 A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án.

14 A ntá tí sín í mé xíkíhi it'ín sín. Na mé ch'in Simón la ntá ch'in Jesús kjuíncheb'ino ihnjé ch'án Pedro kjaxin; la ko kíchó ch'án ch'in Andrés; la ko ch'in Jacobo la ko ch'in Juan, la ko ch'in Felipe, la ko ch'in Bartolomé,

* 6:4 6.3-4 1 Samuel 21.6; Levítico 24.5-9

15 la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko íjnko ch'ín Simón na mé tí ch'ín a mé k'uék'aji tí partido cananista;

16 la ko ch'ín Judas la kichó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

Ch'ín Jesús kjuakohé ch'an nchónhya chojni

(Mt. 4.23-25)

17 Ntá ch'ín Jesús la ko tí jehe sín k'uínkajinxín sín tí jna ntá k'uéjé sín nonte yóxin jehe ch'án la ko tí sín kjueyá ch'án. Kjaxín k'uixikóchjina nchónhya chojni kjuixín nkuixín estado Judea la ko chjasín Jerusalén la ko tí chrínta ntayáon tí siín tí chjasín Tiro la ko tí chjasín Sidón. Ó kjuí sín kixin tsinhin sín tí nkehe tsjako ch'ín Jesús la ko tsitohé sín jína.

18 A ntá tí sín kjuaxróxinhya k'uéjé k'uéchónta sín nchakuen jínahya na mé kuitohé sín jína kjaxín.

19 Kaín chojni tjinkaon chrókuákóxin sín tí ch'ín Jesús kixin kjuínchekitohé ch'án jína kaín xín chojni kixin jehe ch'án chóntha ch'án kjuachaxín jié.

Tí kjuachéhé la ko tí kjuaxróxinhya

(Mt. 5.1-12)

20 Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjeorá jahará nõará kixin chontará kjuachaxién Dios.

21 'Náxrjón tjeorá jahará t'énxinrá kjinta ijie kixin chr'éxin sinterá jína.

'Náxrjón tjeorá jahará tsjankará ijie kixin chr'éxin tsjanorá.

22 'Náxrjón tjeorá jahará nínkakonhanrá chojni la ko ts'inkítíará sín sátsjirá ókjé, la ko t'ántaxínhanrá sín la ko t'ákjenxin sín ihníará éxi ijnko nkehe jínahya kixin tinkachónkirá tí Xjeen Dios K'óna Chojni.

23 Tsocháhará má la ko imá tsochontará kjuachéhé tí yaon a kixin ts'ayéhérá nkehe kuénte nkaya nkajni. A ntá xikaha tí t'áchrii tí sín jínahya ch'e la mé ósé kjuate sín tí sín k'uéchrónta itén Dios.

24 'A ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

25 'A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

'A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.

26 'Kjuaxróxinhya ts'ejorá tió kaín chojni tsjikosáyahará sín kixin xikaha tí t'áchrii sín kjuikosáyehe tí sín ntoáhya k'uéchronka itén Dios ósé.

Tsojtjuhéni tí sín nínkakonhenni

(Mt. 5.38-48; 7.12)

27 'A ntá jahará tjeotinhínrá mé tjéxrjanka kixin chrótjuhéhérá tí sín nínkakonhanrá la ko jína chrókujínktsará tí sín tjinkakonhya tí jahará.

28 Jína nixjehérá tí sín t'ántaxínhanrá la ko tjanchehérá Dios kixin tsjinkítsa ch'án tí sín chónkíhará sín.

29 Tí chjéhe ijnko nkexro ijnko tuáanrá chrókjóka tí í jnko nánko kixin chróchjéhe sín tíha kjaxín. La ko tí siín ijnko nkexro tjinkaon sín tsakitsjaha sín tí chamara tjín t'ínkayate na mé títóhé kixin kjaxín sátsjiko sín camisá kjaxín.

30 Tí jnkojín nkexro tjanchaha nkehe chonta la chjéhé sín. A ntá tí tsakja sín nkehe kuéntá la tjanchehya sín kixin naxá ts'ókjanhan sín.

31 Méxra chrókjuikosáyehérá kichuárá éxi yóhe nkexrí tjinkáonrá chrókjuikosáyahará tí jehe sín kjaxin.

32 Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjónté tí sín jínahya tjasin jie la xikaha ch'e sín.

33 A ntá tí tjikosáyehérá jehó tí sín tjikosáyahará la kohya ninkehó tsjachahyará xikaha. Kjónté tí sín jínahya tjasin jie mé kjaxin xikaha ch'e sín.

34 La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjónté tí sín jínahya tjasin jie xikaha ch'e sín nchekjen kichó sín chichaon la ko chónhen sín kixin tsokjan tí chichakoen sín inaá.

35 Kjánchó jahará chrótjuèhérá tí sín nínkakanhanrá la ko jína chrókjuich'eherá sín xra la ko chrókjuinckekjenrá sín chichaon la chróchoénhyará kixin chrókjan tí chichaköanrá inaá. Mé xikaha chrókjuich'erá la imá tsjachará la ko ts'onará xjeen Dios nkaya nkajni kixin jehe ch'an ch'ehe ch'an jína tí sín chóntehya ch'an kjuasáya la ko tí sín jínahya.

36 Chrókuikonóghérá kichuárá éxi yóhe It'ará nkaya nkajni tikonógehe ch'an chojni.

Chrók'uanaxienhyani kichó ni

(Mt. 7.1-5)

37 Chrókuékahyará jie ókjé chojni kixin ntá Dios chrókjuanchahya ch'an jie tí jahará. Chrókuétuanhyará kixin chrókjuasóte í jnko chojni kixin Dios kjaxin chrókjuinckekjasótiahyará ch'an tí jahará. Chrók'uitjányanhanrá ichrén jie kjuasinhanrá í jnko chojni kixin ntá Dios chrókjuinckek'itjányanhanrá ch'an tí jie kjuásinrá.

38 Chjehérá í so sín tí nkehe ts'áyéhe sín kixin ntá Dios tsotjáhará ch'an nkehe jína kjaxin, tjetóxin ijnko medida jína chrókjuanjon ch'an, icha tsik'enka ch'an kixin tsik'ótsjéyehe ch'an tí nkehe tsikjachroyá ch'an tjetóxin tsjanjon ch'an. Dios tsotjáhará xikaha yóhe éxi tsichjehérá í so chojni.

39 Ntá kjuíncheyóexin ch'in Jesús ntáchro ch'an kixin:

—ǂXá á chrókójína ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanótjenyá sín ichrén tòye.

40 Ijnko nkexro xrakohe la noehya éxi tí nkexro tjako. Kjánchó tió tsjixin tsoxrakohe ch'an ntá tsonohe ch'an éxi nohe tí nkexro kjuakohe ch'an.

41 ǂA ntá nkekuènté tsjehé tí chjíninó ntsí tjenkánkí ikon tí kichuá, tí naxa ántosán tí nta jie tjenkánkí ikuan?

42 ǂMé xikaha nkexrí kixin chróntáche kichuá kixin chrókuítóhe ch'an kixin chrókuakitsjenkíhí ch'an tí chjíninó ntsí tjenkánkí ikon ch'an tí naxa ántosán tí nta jie tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jie tjenkánkí ikuan kixin ntá chrók'uikuan chrókuakitsjenkiá chjíninó ntsí tjenkánkí ikon tí kichuá.

Tí nta mé tjatsoanxinni tí to tsik'óna

(Mt. 7.17-20; 12.34-35)

43 Kohya nta jína chrók'óna to jínahya, la ko kjaxin kohya nta jínahya chrók'óna to jína.

44 Jnkojnko tí nta mé tjatsoanxinni tí to t'óna. Tí ntach'j xitjahya tsjakjinjinni tí higo la ko xitjahya ts'inni to uva.

⁴⁵ Ijnko chojni jína la jína nixja ch'án kixin jína asén ch'án. A ntá injnko chojni jínahya la mé nixja tí nkehe jínahya kixin jínahya asén ch'án. Kixin éxi tjenkayáxin asén mé xíkaha nixja ir'va.

Ch'in Jesús kjuíncheyóexin éxi yaá nkexro kjuích'éna nchia
(Mt. 7.24-27)

⁴⁶ ¿Nkekuénte ntáchrórá kixin janhan Ínchárá, la ntá tahyará kuenté tí nkehe tétuanhanrá?

⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín.

⁴⁸ Na mé jehe sín tóyóhe injnko nkexro kjuích'éna nchia la senó k'óxraya ch'án tóye nínka kixin ntá sich'éna ch'án nchia chrítaón tí tjo a. A ntá tió k'uánkí tí ntarío la ikui tí ntá k'uúntate tí nchia, kjónté xíkaha la k'uátjoákohya la ní kuínkíhya tí nchia a kixin jína tsík'óna chrítaón tjo tjekjen.

⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe injnko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntarío la ikui tí ntá k'uúntate tí nchia la ntá k'uátjoáko ntá tí nchia la ntá kuenté tí nchia la k'uújtáyan —mé ichro ch'in Jesús.

7

Ch'in Jesús kjuínchekitöhe jína injnko ch'in ch'ehe injnko soldado romano xra
(Mt. 8.5-13)

¹ Ntá ch'in Jesús kjuixin nixjehe ch'án tí chojni a ntá sákjuí ch'án chjasin Capernaum.

² Ntaha kjuák'e injnko capitán romano la mé chóna ch'án injnko nkexro ch'ehe ch'án xra imá tjuèhe ch'án la ntá jie níhi tí ch'in a tjet'en ch'án.

³ A ntá tió kuínhin tí ch'in capitán itjo sín nkexrí tjen ch'in Jesús ntá ichr'án ch'án iso sín táda judío tsjijitsjehe sín tí ch'in Jesús tsochronóehe sín ch'án kixin chrókjuíji ch'án chrókjuínchekitöhe ch'án jína tí ch'in ch'ehe ch'án xra.

⁴ Ntá kjuíji sín kóchjinehe sín tí ch'in Jesús kjuankíxin chrónóehe sín ch'án ntáchro sín kixin:

—Imá jína tí ch'in capitán la mé tjinkaon ch'án chrókjuínkítsa ch'án

⁵ kixin tjuèhe ch'án tí nacióon kuénteni la ko jehe ch'án kjuínkítsa ch'án la ko k'uetóan kixin ts'óna injnko nínko kuénteni —íchro sín.

⁶ Ntá ch'in Jesús sákjuiko sín ch'án. Ntá ó kjuíjichjina sín chjino tí nchia la mé tí ch'in capitán k'uetuénhen ch'án iso chojni chóxin ch'án tsontáche sín tí ch'in Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uixénhen ntóe ch'án.

⁷ Mé xíkaha chrókósuèhe ch'án chrókjuíji ch'án chrókjueyá ch'án tí jaha. Méxra tí kjuachaxin chrónixja ó chrókuitóexin jína tí ch'in ch'ehe ch'án xra.

⁸ Kixin jehe ch'án kjaxin t'ítuénhen ch'án la ko kjaxin chóna ch'án soldado t'etúenhen ch'án inaá. Tió t'etúenhen ch'án injnko sín kixin sátsji la mé sátsji la ko tió t'etúenhen ch'án injnko sín kixin xrákoa la mé xrákoa la ko tió t'etúenhen ch'án injnko sín kixin sich'e injnko xra la mé nchexiteyá ch'án —mé xíkaha ichro tí sín kui.

⁹ Ntá ó kuínhin ch'in Jesús xíkaha ntá chrakon ch'án kixin xíkaha tjenkayáxin tí ch'in a, a ntá nkátjía ch'án komá ch'án tí chojni chréhe ntáchro ch'án kixin:

—Ntáxrjan kixin naxa k'uíťjahya nijnko nkexro israelita xikaha tinkáchónki éxi tí ch'ín í —ichro ch'án.

¹⁰ A ntá ó kjan nchia tí sín tsík'ítuenhen la ó k'uikon sín kixin ó tsíkítøhe jína tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Nain

¹¹ Ntá chr'éxin ntá sákjui ch'ín Jesús ijnko chjasin it'in Nain la ko sákjuiko ch'án tí sín k'uájiko ch'án la ko nchónhya í so chojni.

¹² Tió kjuíjichjina sín tí chjasin a la k'uikon sín nchónhya chojni sákjuíkjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuikotoxin sín tjan.

¹³ Ntá tió k'uikon Ìnchéni tí tjan a ntá kuikonóøhe ch'án tjan ntáchro ch'án kixin:

—Tsjankehya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénkia sín tí ch'ín tsík'en. A ntá tí sín kuámá nta k'uejóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuñhan t'aya —ichro ch'án.

¹⁵ Ntá tí ch'ín tsík'en tuénxin kjuak'etjaxin ch'án la ko kjuankixin nixja ch'án. Ntá ch'ín Jesús kjuínchek'áyéhe ch'án iné tí ch'ín ntasoá la sákjuiko.

¹⁶ A ntá tió k'uikon sín xikaha kónhen la kaín sín imá chrakon sín la ko kjuankixin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etøan chrónka itén Dios ts'ejókoni —ichro sín.

Kjaxin ntáchro sín kixin:

—Ó kui Dios tsjinkítsa ch'án chjasén ch'án —ichro sín.

¹⁷ A ntá nkúixin estado Judea la ko kaín tí chjasin chjinaxon mé kuínhin sín kixin nkehe tí kjuaxroan kjuíche ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehé ch'án iyó tí sín k'uájiko ch'án

¹⁹ k'ueñuñhen ch'án sín sátsjtsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi o á tsochónhen sín í jnko nkexro, tsixro sín.

²⁰ A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kixin:

—Ch'ín Juan Bautista k'ueñuñ ch'án kuini tsikjanchankíhani kixin á jaha tí nkexro tsi ní o á tsochónhenni í jnko nkexro —ichro sín.

²¹ A ntá tí yaon kjuíjín sín na mé ch'ín Jesús kjuínchekítøhe ch'án itsjé chojni jína la mé kjuatsen ch'án kaín tí chin chóna sín la ko kuakítsje ch'án tí nchakuen jínahya chóna sín la ko kjuínchek'ikon ch'án itsjé chojni t'íkonhya.

²² A ntá kjuátøhe ch'ín Jesús ntáchro ch'án kixin:

—Sátjirá tjíchenkará tí ch'ín Juan kaín nkehe k'uikonrá la ko kaín nkehe kuínhínrá kixin tí sín k'uíkonhya la ó t'ikon sín jie, la ko tí sín k'uekjihya la ó tji sín jie, la ko tí sín k'uechóna chinlepra la ó kuitøhe sín jína, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nõa síxrakøhe sín tí tan jína tsaáxin sín.

23 Ntá náxrxjón tjen tí nkexro kohya nkehe t'inkákonhēn tí tinkáchónki sín tí janhan —mé ichro ch'án.

24 Tió sátsíkji tí sín ichr'án ch'ín Juan ntá kjuankíxin nixjehe ch'ín Jesús tí sín k'uéjót ntiha kíxin nkexrí tjen ch'ín Juan ntá chro ch'án kíxin:

—Tió sákjuítsejehérá ch'ín Juan nteje, ¿nkexrí k'uikonrá tí jehe ch'án? ¿Á k'uikonrá ch'án éxí ijnko tji nchexrayehe xrxjót?

25 Tí náhí, ¿la ntá nkehe k'uikonrá? ¿Á k'uikonrá ch'án éxí ijnko nkexro tsík'itsa jína? Jahará ó nohará kíxin chojni tsík'itsa jína la ko chóna kaín nkehe náxrxjón la mé ntqē rey tjejó sín.

26 ¿A ntá nkexrí k'uikonrá ch'án? ¿Á k'uikonrá ch'án éxí ijnko nkexro chrónka itén Dios? Na mé xrxjanka kíxin chaxín xíkaha jehe ch'án na mé antsí t'etqan ch'án la ntá tí sín k'uéchrónka itén Dios ósé la kánhyó.

27 Ch'ín Juan mé tí nkexro kui éxí chrónka tí xroon itén Dios ósé ntá chro kíxin: Janhan mé tsochr'an ijnko nkexro tsochrónka itan kuéntana tsitónxin ntja, kíxin tsjasíyoxin ch'án ntja kuénta.*

Mé xíkaha chrónka tí xroon itén Dios.

28 Ntá ijnko nkehe chaxín tsotjonkará kíxin kaín tí nkexro k'uéjót senó k'uéchrónka itén Dios la kánhyó tjetqan sín la antsí tjetqan tí ch'ín Juan Bautista. Kjánchó ijnko nkexro kjónté tjetuanhya la tí ts'áyēhe sín tí kjuachaxiēn Dios nkaya nkajní la antsí tjetqan sín a ntá jehe ch'ín Juan la kánhyó —ichro ch'ín Jesús.

29 A ntá tió kuínhin sín tíhi la ntá kaín tí chojni la ko tí sín nchekjēnkj tsíkikjite ch'ín Juan la ó kjuátsgan sín kíxin Dios la jína ch'án.

30 Kjánchó tí sín fariseo la ko tí maestro tjako tí ley tsíkikjitehya ch'ín Juan la mé tjinkakonhya sín tí nkehe tjinkaon Dios chrókjuinkjitsa tí jehe sín.

31 Ntá ntá chro Ìnchéni kíxin:

—¿Nkexrí chrókjuintayóaxian tí chojni tjejó jie? ¿Nkehe chrókóyóhe sín?

32 Tóyóhe sín tí chánjan tjejótxajin sín tí ntsin tsítan sín la t'íyēhe kíchó sín ntá chro sín kíxin: “Kjuínchentáchroni flauta la tēhyará la ko tsjeni isón kuēnte chojni tsík'en la tsjankahyará.”

33 Kíxin ó kui ch'ín Juan Bautista la kjónehya ch'án niotjā la ko k'uíhya ch'án vino la ntá jahará ntá chrorá kíxin ijnko nchakuen tí jínahya chóna ch'án.

34 A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntá chrorá kíxin imá kjóne ch'án la ko imá ik'ui ch'án vino la ko t'itō ch'án tí sín tjasin jie la ko tí sín nchekjēnkj.

35 A ntá tí xjeen Dios mé tjākoxin sín kaín tí nkehe tjinkaon Dios.

Ch'ín Jesús mé kjuák'e ch'án ntqē ijnko ch'ín fariseo it'ín Simón

36 Ijnko ch'ín fariseo mé chronóhe ch'án tí ch'ín Jesús kíxin tsjiji ch'án ntqē ch'án sineko sín ch'án. Ntá sákjui ch'án ntqē tí ch'ín a, a ntá ntiha kjuák'etjajin ch'án tí tjen mesa.

37 A ntá itjen ijnko tjan nchónhya jie chóna tjan. Itjen tjan tí chjasin ntiha la ntá kónohe tjan kíxin tsíkji ch'ín Jesús ntqē tí ch'ín fariseo la ko ntaha sineko sín ch'án. Ntá kui tjan ntiha kuikāo tjan ijnko xrxj tjeje tsikaón aceite xraxé náxrxjón.

38 Ntá tsjanka tjan kóchjina tjan toté ch'ín Jesús ntá ntakon tjan kjuátanxín toté ch'án la ko kaxjhi tjan kjuínchexámáxin tjan toté ch'án la ko kjóneko kochító toté ch'án la ko kjuíncheka tjan toté ch'án tí aceite xraxé náxrxjón.

* 7:27 Malaquías 3.1

³⁹ A ntá tió k'uikón tí ch'ín fariseo tsík'iyehé tí ch'ín Jesús ntá kjo ch'án asén ch'án kixin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetákóxiñ ch'án kixin ijnko tjan jínahya tíha”, ichro ch'án.

⁴⁰ Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátehe tí ch'ín fariseo ntáchro ch'án kixin:

—Chronka, Maestro —ichro ch'án.

⁴¹ Ntá ntáchro ch'ín Jesús kixin:

—K'uéjó yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario.

⁴² A ntá kjuachahya sín k'ókjenhen sín tí chichaon tí ch'ín síkéhe sín ntá kuikónóhéhé ch'án sín ntá k'ókíka ch'án tí cuenta síká yóí sín. A ntá jie chrónka jaha kixin nkexro tí yóí sín antsí chrótjuèhe tí nkexro kuikónóhéhé ch'án —ichro ch'ín Jesús.

⁴³ Ntá kjuátehe tí ch'ín Simón ntáchro ch'án kixin:

—Janhan ntáxrjan tí nkexro kuikónóhéhé má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'ikuan tí tjan a ní? Janhan na mé k'uixanhan ntõa la ntá jaha la kjuánjonhya ntá chrók'ontia totená. Kjánchó jehe tjan ti ntákon tjan kjuínchek'óntixín tjan totená la ko kaxíhi tjan kjuínchexámáxin tjan.

⁴⁵ A ntá jaha la kjóntekoahyana kochíto. Kjánchó jehe tjan naxá kuitõehya tjan neko kochíto totená.

⁴⁶ Jaha la kuikítexinhya aceite kjá. A ntá jehe tjan kuikíte tjan aceite xraxé náxrjón totená.

⁴⁷ Mé xíkaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuínhin tjan. A ntá ijnko nkexro kjuínhin íntsíkoá jie la mé xíkaha íntsíkoá tjakóxiñ kixin tjuana sín —ichro ch'án.

⁴⁸ Ntá nixjehé ch'án tí tjan a ntáchro ch'án kixin:

—Ó kjuínhan tí jie chonta —ichro ch'án.

⁴⁹ A ntá kaín tí sín tsíkóchjina sín k'uéjótjaxín sín tí tjen ch'án mé kjuankixin kjo sín kichó sín ntáchro sín kixin:

—¿Xá nkexro tíhi kixin tjakjínhin ch'án íjie chojni?

⁵⁰ A ntá ch'ín Jesús ntáche ch'án tí tjan a kixin:

—Ó kuaá jaha kixin kuitekávan tí janhan. A ntá jie kjuaxróxin sátsjia ntõa —ichro ch'án.

8

Iso chojni chjin kjuínkítsa tí xra kjuích'e ch'ín Jesús

¹ A ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsíntsí kjuako ch'án la ko chrónka ch'án tí tan jína kixin nkexrí tí kjuachaxin t'etõan Dios. A ntá tí teyó sín mé k'uájiko ch'án.

² Kjaxin chréhe iso chojni chjin tsíkjinchekitõhe ch'án jína tsíkakítsje ch'án tí nchákuen tí jínahya k'uéchónta sín la ko tsíkjatsen ch'án tí chin k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchákuen tí jínahya k'uéchónta tjan,

³ la ko í jnko tjan it'in tjan Juana ne mé xì mé it'in ch'án Chuza. Jehe ch'án mé ch'ehe ch'án xr̄a tí ch'ín Herodes t'et̄oan ch'án, la ko í jnko tjan mé it'in tjan Susana, la ko itsjé í so sín k'uéjó sín. A ntá kaín sín kjuanjón sín tí nkehe k'uéchonta sín kjuínk̄itsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexin ch'án éxí ijnko ch'ín k'uenk̄a nonte
(Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntíha. A ntá ch'ín Jesús kjuíncheyóexin ch'án ntáchro ch'án kixin:

⁵ —Éxí ijnko ch'ín sákjuík'enk̄a noatrigo nontee ch'án. Mé x̄ikaha sákjuík' ch'án ik'ue ch'án tí noatrigo a. Ntá iso noa la k'uanoťjen chr̄inta nt̄ia ntá nkaxénjin chojni tí noa a la ko k̄jaxin tí koxroxé k'uink̄a va.

⁶ A ntá í so la k'uítji chr̄ik'á xr̄o ntá k'uayan la xámá kixin kánhyó siín tjo.

⁷ A ntá í so la kjuítsínkák'á kach'j ntá k'uánkí kach'j la ntá í xitjahya k'uánkí tí no a kixin tsík̄jate tí kach'j.

⁸ A ntá í so la mé tsík'it̄j nche jina. A ntá tió k'uánkí la k'óna jina la mé jnkojno noatje k'óna ciento neno noa —mé x̄ikaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:

—Tí tjnkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuente kjuíncheyóexin ch'án
(Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án.

¹⁰ Ntá ntáchro ch'án kixin:

—Dios mé tsjink̄itsa kixin t̄soňohará tí nkehe noehya í so chojni nkexrí t'et̄oan Dios. Kjánchó tí í so sín tjákoh̄a sín kjuíntayóaxoán kixin ntá k'uíkon sín la kjónté tsjats̄oanhya sín la ko kuínhin sín na kjónté nax̄a tiénxínhya sín.

Ch'ín Jesús chronkaxín nkexrí t'axrjexín tí ch'ín k'uenk̄a nonte
(Mt. 13.18-23; Mr. 4.13-20)

¹¹ Ntá ts̄oxrjanka nkexrí t'axrjexín tí nkehe kjuíntayóaxoán. Tí noatje mé tí itén Dios.

¹² A ntá tí noa k'uanoťjen chr̄inta nt̄ia la mé tóyoh̄e tí sín kuínhin tí tan a. A ntá ó kui ch'ín Tsochren ntá kjuínchek'it̄jayan ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín.

¹³ A ntá tí noa kjuítsínkák'á xr̄o la éxí yoh̄e tí chojni kuínhin itén Dios la tjoka kóxrjín̄hin sín kuínkáchónki sín. Na ntá itsi tí kjuaxróxinhya, a ntá tsít̄oh̄e sín tí itén Dios kuínhin sín kixin nax̄a n̄inkahya chóna nuèe.

¹⁴ A ntá tí noa kjuítsínkák'á kach'j na mé éxí yoh̄e ijnko chojni kuínhin tí tan jina kjánchó tjitoxienhya nt̄je sín kixin tóxakonhen sín tí xr̄a chóna sín la ko tjínkaon sín t̄sochóna sín itsjé nkehe la ko kaín tí nkehe tóxrjín̄hin sín mé t'ínkákonhen kixin x̄ikaha la xitjahya sich'ehe sín xr̄a Dios.

¹⁵ A ntá tí noa k'uínka nonte jina na mé éxí yoh̄e tí chojni kuínhin tí itén Dios a ntá kaín asén sín kuítekaon sín la ntá kuít̄oh̄ehya sín tí tan, a ntá x̄ikaha la jina ch'ehe sín Dios xr̄a.

Ch'ín Jesús mé kjuíncheyóexin éxí ijnko xrohi tjeche
(Mr. 4.21-25)

16 Nijnko nkexro chrókjuinček'ákjen xrohi chrókjuak'ema nkaxenhen chí o chrókjuak'ema chrínki cama. Náhí. Noi chrókjuak'e xrohi kixin ntá tí sín ts'ixenhen nchia ts'ikonxín sín tí t'inkaséyan.

17 Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsónoxixin tí xrohi a.

18 A ntá chrókuinhíná jína kixin tí tjen ijnko nkexro chóna nkehe la mé ts'áyéhe ch'án má. A ntá tí nkexro chónahya nkehe la mé ts'axrjehe ch'án kjónté tí nkehe ntsí tónhen ch'án kixin chóna ch'án.

*Tí iné la ko tí kichó ch'in Jesús
(Mt. 12.46-50; Mr. 3.31-35)*

19 A ntá kjuíji iné la ko kichó ch'in Jesús tí tjen ch'án. Ntá xitjahya tsoghjinehe sín ch'án kixin nchónhya chojni síin.

20 A ntá ijnko sín ntiha tsíkjichenka ch'in Jesús kixin:

—Iná la ko kichuá tjejó sín ntója la tjinkaon sín chrók'uikon sín tí jaha —ichro sín.

21 Kjánchó kjuátēhe ch'án ntáchro ch'án kixin:

—Tí sín tinhin itén Dios la ko titekaon sín na mé t'ikuān tí jehe sín éxí naná la ko kichiná —ichro ch'án.

*Ch'in Jesús k'uetuenhen tí xrjnto la ko tí ntā kixin ts'ixita
(Mt. 8.23-27; Mr. 4.35-41)*

22 Ntá ijnko yaon k'uixenhen ch'in Jesús ijnko ntabarco la koí tí sín k'uájiko ch'án. Ntá ntáchro ch'án kixin:

—Sátsjini tóhe ntayaon —ichro ch'án.

Ntá sákjuí sín.

23 Ntá nachrohe tjejót'atòye sín a ntá ch'in Jesús mé kjuák'ejua ch'án. A ntá xrinahya tjan chjéhe xrjnto chrítaón ntā ntá xrankixin sítikia ntā tí ntabarco ntá chrakon sín kixin ts'aniankí ntā tí ntabarco.

24 Ntá kjuínčekjayehe sín tí ch'in Jesús, ntáchro sín kixin:

—Maestro, Maestro. Tjejót'aniankíni ntā —ichro sín.

Ntá ch'in Jesús k'uáya ch'án ntá k'uetuenhen ch'án tí xrjnto la ko tí ntā kixin ts'ixita, a ntá náxrjón k'uixita tí ntā la ko tí xrjnto.

25 Ntá ntáche ch'án tí sín k'uájiko ch'án kixin:

—¿Á naxā tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

—¿Xá nkexro tíhi kixin t'etuenhen ch'án xrjnto la ko tí ntā la titekakonhen ch'án?

*Ijnko ch'in nonte Gadara chóna nchakuen tí jínahya
(Mt. 8.28-34; Mr. 5.1-20)*

26 Ntá kjuíji sín tí nonte Gadara, na mé tóhe ntayaon ntoí chók'èxin estado Galilea.

27 Ntá k'uínkajinxin ch'in Jesús tí ntabarco ntá kóchjina ijnko ch'in chjasin ntiha. Ntá ó má sé chóna ch'án nchakuen tí jínahya. Na ntá ni ké ch'án t'inkáyahya ch'án, la ko jehya ntōe ch'án k'uékjak'e ch'án na mé tjen ch'án tí panteón.

28 Tió k'uikon ch'án tí ch'in Jesús ntá kjuák'exin toch'in ch'án nkayakon tí ch'in Jesús, ntá k'óyako ch'án ntáchro ch'án kixin:

—¿Nkekuente tjtāté tí jeheni, jaha Jesús Xjeen Dios itjen nkaya nkajní? Chronóahani nchekjasótehyani —ichro ch'án.

29 Xikaha ntáchro ch'án kixin ch'in Jesús tsík'etuēnhen tí nchakuen tí jínahya kixin ts'axrjexín tí jehe ch'án. Nchónhya veces tí nchakuen tí jínahya k'uék'etuēnhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsíkóntetoxín ch'án kixin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án kixin nchakuen tí jínahya tjinkaon sáchrókjuiko ch'án nteje.

30 Ntá ch'in Jesús kjuanchankíhi ch'án tí ch'in a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xikaha kixin nchónhya nchakuen tí jínahya chóntha ch'án.

31 A ntá kaín tí nchakuen tí jínahya chronóehē tí ch'in Jesús kixin chrók'uetōanhya ch'án kixin chrókjuitsínkayá tí tōye ninka.

32 A ntá ntiha tí jna síin nchónhya cochíno xrine va. A ntá tí nchakuen tí jínahya chronóehē tí ch'in Jesús kixin chrókjuanjon ch'án kjuachaxin chrók'uixenhen tí cochíno a. A ntá kjuanjon ch'án kjuachaxin.

33 A ntá tí nchakuen tí jínahya k'uaxrjexín tí ch'in a, a ntá k'uixenhen tí cochíno a. A ntá kaín tí cochíno kuinká va sákjuí va nó nkaya tsáka k'uánótjenkí va ntá kjuínhin va ntá.

34 A ntá tí sín sít'ayakonhen tí cochíno k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho.

35 A ntá tí chojni k'uaxrjexín sín chjasin sákjuitsjehe sín nkehe tí tsíkónhen. A ntá kjuíji sín ntiha tí tjen ch'in Jesús ntá k'uíkon sín kixin ntaha tjen tí ch'in tsík'axrjexín tí nchakuen tí jínahya. Ntaha tjetjaxín ch'án chrínkí toté tí ch'in Jesús, ó tsík'inkáya ch'án iké ch'án kixin ó jina tjen ch'án, a ntá chrakon sín tí k'uíkon sín xikaha.

36 A ntá tí jehe sín tsík'ikon sín kixin xikaha kónhen la chrónka sín kixin nkexrí kuitōhe jína tí ch'in k'uéchóntha tí nchakuen tí jínahya.

37 A ntá kaín tí chojni chjasin Gadara kjuankíxin chronóehē sín tí ch'in Jesús kixin sáchrókjuixin ch'án ntiha kixin imá chrakon sín. A ntá tí ch'in Jesús k'ujt'ótjen ch'án tí ntabárcō sákjuíxin ch'án ntiha.

38 A ntá tí ch'in tsík'axrjexín tí nchakuen tí jínahya chronóehē ch'án tí ch'in Jesús kixin á chrókjuanjonhya ch'án kjuachaxin sáchrókjuí ch'án koí ch'án. Kjánchó ch'in Jesús k'uetuēnhen ch'án kixin tsitōhe ch'án ntáchro ch'án kixin:

39 —Titōha satjia ntōja la ko chrónka nkexrí tí kjuachaxin jié kuēnte Dios kuitōaxián jína jaha —ichro ch'án.

A ntá sákjuí tí ch'in a chrónka ch'án nkuíxín tí chjasén ch'án kixin ijnko kjuaxroan jié kjuích'e ch'in Jesús kjuínchekitōhe ch'án jína.

*Tí xjeen ch'in Jairo la ko tí tjan kuákóxin iké ch'in Jesús
(Mt. 9.18-26; Mr. 5.21-43)*

40 Tió ch'in Jesús kjan ch'án tí í jnko chrínta ntá ntá nchónhya chojni síin ntiha la chéhe sín kjuíji ch'án ntiha, kixin kaín sín tjejóchónhen sín ch'án.

41 Ntá kui ijnko ch'in it'ian Jairo na mé ijnko ch'in t'etōan kuēnte nínko. A ntá kjuák'exín toch'in ch'án toté tí ch'in Jesús chronóehē ch'án kixin sáchrókjuí ch'in Jesús ntōje ch'án

42 kixin chóntha ch'án jnkokoáxón xjeen ch'án chjin chóntha teyó nánó la ó mero tjet'en tjan. A ntá sákjuí ch'in Jesús la ntá nchónhya chojni chréhe k'uíxitja kichó sín.

43 Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóna tjan teyó nánó titoghya tjan jína. A ntá kaín nkehe k'uechóna tjan kjuenkehe tjan tí sín ch'e xroan la ko nijnko sín kjuachahya sín kjuínchekitøhe sín tjan jína.

44 A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxin tí jni la í kjuíhya tjan.

45 Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin ninkexró, ichro sín. A ntá ch'ín Pedro la ko tí sín k'uejóko ch'án ntáchro sín kixin:

—Maestro, nchónhya chojni siín la ko tótéka sín la ntáhi ntáha, ¿ntá nkekuènte kixin naxa tjan chankiá kixin nkexro tí kuákóxian? —ichro sín.

46 Kjánchó ntáchro ch'ín Jesús kixin:

—Jnkojin nkexro kuákóxinna kixin kónona kixin kjuachaxin kuèntaná kuítøxín ijnko chojni jína —ichro ch'án.

47 A ntá tió k'uíkon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínkí toté tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxin tjan iké ch'án la ko nkexrí kuítøxín tjan jína xikaha.

48 Ntá ntáchro ch'án kixin:

—Jaha, xjeenni, ó kuítøha jína kixin kuítekávan tí janhan. Kjuaxróxin sátjia —ichro ch'án.

49 Naxa tjejóto sín ntiha ntá xrínahya ikui ijnko nkexro kjuixín ntøe tí ch'ín t'etøan kuènte njnko, a ntá chénka ch'án tí ch'ín t'etøan kixin:

—Xjaan na mé ó kjuixin k'uén. Áxri í chjeéhya xra tí maestro —ichro ch'án.

50 A ntá tió kuínhin ch'ín Jesús la kjuátøhe ch'án ntáchro ch'án kixin:

—Chrakonhya. Títekávan tí janhan la tsitøhe xjaan jína —ichro ch'án. A ntá sákjuí sín.

51 A ntá tí kjuíjik'ixenhen sín nchia ntá kuítøehya ch'ín Jesús kixin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjin chrók'uixenhen sín tí tjen tí xjan a.

52 Kaín tí sín tjejó ntaha tsjánkàmá sín tí xjan a. Kjánchó jehe ch'án ntáchro ch'án kixin:

—Tsjankahyará. Tí xjan la tsík'enhya la tjejua xjan —ichro ch'án.

53 Ntá tjanoá sín ch'án kixin jehe sín la ó nohe sín kixin tsík'en xjan.

54 A ntá jehe ch'án itsé ch'án tja xjan ntá itsen k'uíyøhe ch'án tí xjan ntáchro ch'án kixin:

—Tjarisoá, t'àya —ichro ch'án.

55 Ntá kjan asén tjan ntá tuénxin k'uínkatjen tjan. Ntá k'ueñoan ch'ín Jesús kixin tsjanjon sín nkehe sine tjan.

56 Ntá it'é la ko iné xjan la chrakon sín. A ntá ch'ín Jesús k'ueñoenhen ch'án sín kixin ninkexró chróchenkahya sín kixin xikaha kónhen.

9

*Ch'ín Jesús ichr'án ch'án tí teyó sín
(Mt. 10.5-15; Mr. 6.7-13)*

¹ Ntá ch'ín Jesús k'uetōan kixin tsōchjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchakuen tí jínahya chóna chojni la ko sinchekitohe sín chojni jína.

² Ntá k'uetōan ch'án kixin sátsjikjako sín nkexrí tí kjuachaxin t'etōan Dios la ko sinchekitohe sín chojni jína.

³ La ko k'uetōan ch'án kixin:

—Ninkehó nkehe sátsjikohyará ntja sátsjirá, ni tí nta tjíxinrá la náhi, ni bolsa la náhi, ni niotja, ni chichaon, la ko tsjikoará jehó tí ka tjejóyará ó.

⁴ A ntá tí tsjasánrá ijnko nchia tsjanjon sín kjuachaxin la ntahó tsitōhará la tsjixixin tí xra ntá sátsjixinrá ntíha.

⁵ A ntá tí tsjasánrá ijnko chjasin la ntá tsjanjonhya sín kjuachaxin tsjakorá ntá t'axrjéxinrá tí chjasén sín ntíha tsotsénkará tí nche chóna totará tsjakoxinrá xíkaha kixin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsínsí sákjuichronka sín tí tan jína tsaáxin chojni la ko kjuínchekitohe sín chojni jína kaín chjasin.

Ik'uén ch'ín Juan Bautista
(Mt. 14.1-12; Mr. 6.14-29)

⁷ A ntá tí ch'ín Herodes t'etōan kuínhin ch'án kaín tí xra tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín.

⁸ A ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. A ntá í so sín la ntáchro sín kixin jnkójín tí sín k'uéchronka itén Dios ósé la mé ó tsíxechón, ichro sín.

⁹ Kjánchó ntáchro ch'ín Herodes kixin:

—Janhan mé kuétoan kóchrínjin sín kja ch'ín Juan. ¿Á chrókóchaxin jehe ch'án kixin nchónhya kjuaxroan kuínhan tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni
(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuich'e sín. Ntá k'uaxrjentako sín ch'án tí kohya ninkexró chjinaxón chjasin Betsaida.

¹¹ Ntá tió k'uixikónohe chojni kixin ntaha tjen ch'ín Jesús ntá sákjuichréhe sín ch'án. A ntá kjuanjon ch'án kjuachaxin ts'ejó sín. Ntá kjuankixin chrónka ch'án nkexrí tjen tí kjuachaxin t'etōan Dios la ko kjuínchekitohe ch'án chojni jína.

¹² A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuátēhe sín ntáchro sín kixin:

—Chóntahyani itsjé nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kaín tí chojni síin? —ichro sín.

¹⁴ Kixin síin chjina in'ó mil chojni ntoa. A ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkojié sín ts'ixitjaxin sín jnkojnko cincuenta sín —ichro ch'án.

¹⁵ A ntá xikaha kjuích'e sín k'uətoan sín, a ntá k'uíxitjaxin sín kaín sín.

¹⁶ A ntá ch'ín Jesús kuákja ch'án tí n'ó niotja la ko tí yaá koche. Ntá konta ch'án nkajni kjuanchehe ch'án kjuasáyé Dios kixin kjuanjon tí nkehe sine sín. Ntá kóchrít'ó ch'án tí niotja la ko tí koche la chjéhe ch'án sín xriko ch'án. A ntá jehe sín k'óxikayehe sín chjéhe sín kaín tí chojni siín.

¹⁷ A ntá kaín sín kjóne sín la kókjehe sín. A ntá chr'éxin kjuenájín sín kaín tí nkehe síxehé mé teyó ntaxra kjuínchekaón sín.

*Ch'ín Pedro mé chrónka kixin ch'ín Jesús mé tí Cristo
(Mt. 16.13-19; Mr. 8.27-29)*

¹⁸ Ntá ijnko yaon ch'ín Jesús k'uaxrjenta ch'án tjenixjehe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan? —ichro ch'án.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'ín Elías. A ntá í so sín ntáchro sín kixin jaha ijnko nkexro k'uéchronka itén Dios ósé mé ó síxechón —ichro sín.

²⁰ A ntá kjuanchankíhi ch'ín Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'ín Pedro kixin:

—Jaha tí Cristo ichr'án Dios —ichro ch'án.

*Ch'ín Jesús chrónka kixin its'en ch'án
(Mt. 16.20-28; Mr. 8.30—9.1)*

²¹ Ntá ch'ín Jesús k'uətuənhen ch'án sín kixin ninkexró tsochenkahya sín kixin nkexro tí jehe ch'án.

²² Ntá chénka ch'án sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsoñhen la ko tsitekakuenhya tí sín t'ətoan kuènte njnko la ko tí sín t'ətoan kuènte tí sín nchát'á la ko tí sín maestro tjako tí ley. Ts'óyán sín tí jehe ch'án, kjánchó tí nixin yaon na ó tsoxechón ch'án inaá —ichro ch'án.

²³ Ntá chr'éxin chénka ch'án kaín sín kixin:

—Tí chaxín tsochréhérá tí janhan na t'ichjánxin tsitohérá kaín tí nkehe tjaké asánrá, ntá tsamará tí ntacruz kuéntará jnkojnko yaon, a ntá tsochréhérá tí janhan.

²⁴ Tí nkexro tjinkaon jehó sinchekaá asén mé ts'itjayan. A ntá tí nkexro sinchek'itjayanxín asén kixin tinkáchónki tí janhan la tsaá.

²⁵ ¿A ntá nkehe tsoñhen tí chrókjuacha ijnko chojni chróchónta kaín nkehe siín chjasintajni a ntá kjuachón chrókjuincheck'itjayan ch'án?

²⁶ A ntá jnkojín chojni chrókósuèhe kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsoquèhe chróntáchro ch'án kixin chóxin ch'án tí jehe sín tió tsi ch'án éxí ijnko rey tsikao ch'án tí kjuachaxin kuènte It'é ch'án la ko tí sín ángel jína.

²⁷ Tíhi mé ntoá xrjanka kixin iso chojni tjejó ntíhi tjejótinhin sín naxa ts'enhya sín ts'ikon sín kixin Dios ts'ətoan tí kjuachaxin kuènte ch'án.

*K'uíxitóxin nkexrí tsjehe ch'ín Jesús
(Mt. 17.1-8; Mr. 9.2-8)*

²⁸ A ntá k'uátsínka ijní yaon tí tsíchronka ch'án tíhi ntá sákjuiko ch'án ch'ín Pedro la ko ch'ín Juan la ko ch'ín Jacobo la chríin sín ijnko jnā kixin tsonixjehe ch'án Dios.

²⁹ Ntá ch'ín Jesús tjenixjehe ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákini tsjehe.

³⁰ Ntá xrínahya k'uikon sín yaá chojni tjejóto sín tí jehe ch'án na mé jehe sín la tí ch'ín Moisés la ko tí ch'ín Elías.

³¹ Imá t'inkáséyan jnkontatjen tí tjejó sín tjejóto sín tí ch'ín Jesús kixin nkexrí its'en ch'án la ko nkexrí tsjasótexín ch'án tí chjasín Jerusalén.

³² A ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjótjehe sín k'uikon sín tí kjuachaxin kuente ch'ín Jesús la ko k'uikon sín tí yóí chojni ntoa tjejóko sín ch'án.

³³ A ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kixin:

—Maestro, jina kixin tjejóni ntíhi. Chrókuich'énaní iní nchia la mé ijnko kuéntá la ijnko kuente ch'ín Moisés la ko ijnko kuente ch'ín Elías —ichro ch'án.

Kjánhó ch'ín Pedro í noehya ch'án nkehe chróntáchro ch'án kixin chrakon ch'án.

³⁴ A ntá naxa tjenixja ch'án ikui ijnko tjuí kjuák'etja tí jnā tjejó sín. Ntá chrakon sín tjejó sín chrínki tí tjuí.

³⁵ Ntá xrínahya kuínhin sín chríkjan tí tjuí itén nkexro ntáchro kixin:

—Tíhi mé Xjanna, imá tjuāha ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ A ntá tió kjuixin kuínhin sín tí tan nixja ntá k'uikon sín kixin jecho ch'ín Jesús tjen. A ntá tí jehe sín la tání sín kixin xíkaha k'uikon sín tí yaon a la ninxeró chenkahya sín tí nkehe k'uikon sín.

Ch'ín Jesús kjuínchekitohe jina ijnko chánjan chóna nchakuen tí jínahya (Mt. 17.14-21; Mr. 9.14-29)

³⁷ A ntá tí yaon chr'éxin k'uínkajinxin sín jnā la ntá nchónhya chojni sákjuixinhin sín ntja ch'ín Jesús.

³⁸ A ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kixin:

—Maestro, chronóahani kixin chrótsjehé tí xjeenni kixin jnkokoaxón ó chóntani a ntá níhi xjan.

³⁹ Chóna xjan nchakuen tí jínahya la ntá nchek'íyato xjan la ko nchek'aniáte xjan nchexránkā xjan kixin tjetéhe xjan la ko ntalórxjo sítjixin ir'va xjan la ko ncheníhi xjan, na mé chrohya tsjínhin xjan.

⁴⁰ A ntá chronóeheni tí sín xríko chrókuakitsje sín tí nchakuen tí jínahya, kjánhó kjuachahya sín —ichro ch'án.

⁴¹ Ntá kjuátehe ch'ín Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jina tjenkayáxinrá. ¿Xá hasta nkesá tjínkáonrá ts'ejóni tsjákohará kixin nunca t'itjáhyará? Xrákoá tí xjan ntíhi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánhó ch'ín Jesús jiehe k'uetuēnhen tí nchakuen tí jínahya kixin ts'axrxjén xjan. Ntá k'uaxrje tí nchakuen tí jínahya ntá kuitóhe xjan jina. A ntá ch'ín Jesús kjuínchek'áyéhe tí it'é xjan.

⁴³ A ntá kaín sín chrakon sín kixin k'uikon sín tí kjuachaxin jie kuente Dios.

Ch'in Jesús chrónka ch'án inaá kixin its'en ch'án

(Mt. 17.22-23; Mr. 9.30-32)

Naxa chrakon sín kaín sín kixin tí kjuaxroan kjuich'e ch'in Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etóan —ichro ch'án.

⁴⁵ Kjánchó jehe sín kienxínhya sín tí nkehe ntáchro ch'án kixin naxa kjuanjonhya Dios kjuachaxin kixin chrókuienxín sín, ntá chrakon sín na kjuanchankiéhya sín ch'án kixin nkexrí t'axrjexín tí nkehe ntáchro ch'án.

Nkexro tí imá tjeotan ts'etóan

(Mt. 18.1-5; Mr. 9.33-37)

⁴⁶ A ntá tí sín k'uájiko ch'in Jesús kjuankixin sín itjo sín kichó sín kixin nkexro tí jehe sín antsí má tjeotan ts'etóan.

⁴⁷ Kjánchó ch'in Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án

⁴⁸ ntá ntáche ch'án sín kixin:

—Tí jnkojín nkexro chrók'uáyéhe tí xjan i kixin tinkáchónki sín tí janhan mé xikaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xikaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchehnkehya la mé antsí chrók'uáyéhe kjuachaxin chrók'uetóan.

Tí nkexro nínkakuenhya tí jeheni la mé tóxrjínhin ch'án tí xra ch'eni

(Mr. 9.38-40)

⁴⁹ Ntá ntáchro ch'in Juan kixin:

—Maestro, k'uikonni ijnko nkexro kjuachaxin ihniá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókjuich'e ch'án kixin xrikoxyani ch'án.

⁵⁰ Kjánchó ch'in Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhin tí xra ch'eni —ichro ch'án.

Ch'in Jesús kjuentuéhe ch'án tí ch'in Jacobo la ko tí ch'in Juan

⁵¹ A ntá ó kóchjina tí yaon sátsji ch'in Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén.

⁵² Tchr'án ch'án chojni kuitónxin ntja a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín.

⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'uikon sín kixin ó xra ó sátsji ch'án chjasin Jerusalén.

⁵⁴ A ntá tió k'uikon tí sín k'uájiko ch'án la mé ch'in Jacobo la ko ch'in Juan la ntáchro sín kixin:

—Inchéni, ¿á tjínkávan kixin chrókjuanchiani xrohi chrók'uinkajinxin nkaya nkajní chrókjuinçek'itjáyan tí jehe sín éxí kjuanchia tí ch'in Elías?* —ichro sín.

⁵⁵ Ntá ch'in Jesús kuinkátjá ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará.

⁵⁶ Kixin tí Xjeen Dios K'óna Chojni kuihya ch'án kixin chrókjuinçek'itjáyan ch'án chojni. Náhi. Xra ó ikui ch'án sinchekaá ch'án chojni —ichro ch'án.

* 9:54 1 Reyes 18.30-40

Ntá sákjuj sín í jnko chjasin ntsí.

*Tí sín tjinkaon chróchréhe sín tí ch'ín Jesús
(Mt. 8:19-22)*

⁵⁷ A ntá jehe sín sákjuj sín ntja inaá. Ntá xeta sín ijnko nkexro ntáche ch'án tí ch'ín Jesús kixin:

—Ínchéni, tjinkaonni chróchréheni tí jaha nketí tjinkávan sátsjia —ichro ch'án.

⁵⁸ Ntá ch'ín Jesús kjuátēhe ch'án ntácho ch'án kixin:

—Tí koxróntá chóna va itjueé va la ko tí koxroxé chóna va káké va. A ntá tí Xjeen Dios K'óna Chojni chónahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

—Chréhé tí janhan —ichro ch'án.

Kjánchó kjuátēhe ch'án kixin:

—Ínchéni, tjtóhéni senó sátsjikjaváni it'éni —ichro ch'án.

⁶⁰ Ntá kjuátēhe ch'ín Jesús ntácho ch'án kixin:

—Tjtóhé kixin tí chojni tsík'en la jnkokón sín tsjává kichó sín. A ntá jaha la sátsjikjåua nkexrí tjen tí kjuachaxin t'etōan Dios —ichro ch'án.

⁶¹ Ntá ntácho í jnko nkexro kixin:

—Ínchéni, tjinkaonni tsochréheni tí jaha. Jehí tjtóhé tsjinixjeheni tí sín siín ntoeni —ichro ch'án.

⁶² Kjánchó ntácho ch'ín Jesús kixin:

—Tí nkexro kjuankixin tsotsé ch'án arado ntá chrókjan chrókotónhen nóton mé xíkaha xitjahya sich'ehe ch'án Dios xra.

10

Ch'ín Jesús k'uetuēnhen setenta chojni sátsjikjako sín

¹ Ntá chr'éxin Ínchéni kjueyá ch'án í jnko setenta chojni ntá k'uetuēnhen ch'án sín sátsji sín yóyó sín sátsji sín tsitónxin sín ntja tí kaín chjasin na ko nkúixín tjinkaon ch'án sáchrókjuj ch'án.

² Ntá ntácho ch'án kixin:

—Chaxín ntáxrjan kixin imá tsík'óna, a ntá tí chojni ch'e xra mé tsjéhya. Chrókjuancheherá tí Ínché nonte kixin chróchr'án ch'án itsjé chojni chrókjuich'e xra.

³ Sátjirá jahará. Xráxinkáonrá kixin tétuānhanrá sátsjirá éxi kolélo ts'ejóyåkjanrá chrikjan tí kolobo.

⁴ Tsjikoahyará kabólsa la ko tjoa t'inka chichaon la ko tokatē tjikoahyará la ko tí nixjehérá chojni tí ntja tjtóéhyará kixin chrókjuintaxrjanhanrá sín.

⁵ A ntá tíó ts'ixenhenrá jnkojín nchia la senó nixjehérá sín ntáchrórá kixin ts'áyéhe sín kjuaxróxin, tsixrorá.

⁶ A ntá tí tjejó sín kjuaxróxin ntiha la nixjehérá sín la ts'áyéhe sín kjuaxróxin. A ntá tí la náhi, a ntá tí kjuaxróxin chrók'uáyéhe sín na sátsjikoará inaá.

⁷ A ntá tí nchia ntiha chrókjuanjon sín kjuachaxin chrókuitōhará, ntaha mé tsjanjon sín nkehe chóna sín sinterá la ko its'irá, kixin tí nkexro ch'e xra la sín kjuachaxin tsoxenkehe. Tsjíhyará í jnko nchia la ko í jnko nchia.

⁸ A ntá tsjasánrá ijnko chjasin tsjanjon sín kjuachaxin ts'ejorá ntiha ntá interá tí nkehe tsjanjon sín.

⁹ Nchekitōhérá chojni níhi jina. Ntá chenkará sín kixin tí kjuachaxin t'etōan Dios la kjinhya tjen tí tjejó sín, ichrorá.

10 **A** ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntoe sín sájtírá tí ntia chjasin ntiha ntá ntáchrórá kíxin

11 kjónté tí nche tsík'ixitja totará tsotsénkará kíxin tsjákoqxínrá kíxin tí kjuaxróxinhya ts'áyehé sín chr'éxin. Kjánchó chrókónohe sín kíxin tí kjuachaxin t'etōan Dios la kjínhya tjen tí tjejó sín, ichrorá.

12 Ntáxrjan kíxin tí yaon tsjejéxin chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya
(Mt. 11.20-24)

13 Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uíkonrá jahará, ntá chrókójehe sín la tjoka chrókjuítóxinhin nte sín, tjoka chrók'uinkáya sín ka tié la ko chrókjuikjanjin sín ikja sín nteso, kíxin chrókjuákoqxín sín kíxin t'ává sín.

14 **A** ntá tí yaon tsitoexín ijíé chojni a ntá jahará antsí tsjasótiará, a ntá tí sín kuénte chjasin Tiro la ko chjasin Sidón la kénhyó tsjasóte sín.

15 **A** ntá jahará chjasin Capernaum, tjenkayáxinrá kíxin imá nohará a ntá sátsjírá nkaya nkajní, ichrorá. Chaxínhya. Jahará la tsjasinkajínrá sátsjírá tí tsjasótexín tí sín tsík'en.

16 Tí nkebro tinhin tí nkehe ntáchrórá la mé xíkaha tinhin tí nkehe ntáxrjan la ko tí sín titekakonhya sín tí jahará na mé xíkaha titekakonnhya sín tí janhan. **A** ntá tí nkebro titekakonnhya sín tí janhan xíkaha titekakonhya sín tí nkebro chr'ánna k'uinka.

Ó kjan tí sín setenta sátsíkji

17 **A** ntá ó kjan tí sín setenta sátsíkji la imá chéhe sín ntáchró sín kíxin:

— Ìnchéni, kjónté tí nchakuen tí jínahya titekakonhenni tió t'ákjenxínni ihnjá —ichro sín.

18 Ntá ntáchró ch'ín Jesús kíxin:

— Kja chaxín k'uikuān kíxin ch'ín Tsochren k'uánótjenxín nkajní éxi ijnko kjónkíxin xíkaha kónhen. †

19 Ó tjahará kjuachaxin kíxin kjónté konche la ko konchija tsinkátjará la ko tsjachahya ninkehó tí kjuachaxin kuénte tí ch'ín Tsochren kíxin ninkehó tsoanhyará.

20 Kjánchó jehya tíha chrókóchàxinrá kíxin tí nchakuen tí jínahya kuítেকоннанhá. Náhi. Chrókóchàxinrá kíxin ihnjárá ó ts'ínixín nkaya nkajní —ichro ch'án.

Tí Xjeen Dios nixjehe It'é ch'án
(Mt. 11.25-27; 13.16-17)

21 **A** ntá tuénxín tí Nchakuen Dios kjuínchechéhe tí ch'ín Jesús ntá ntáchró ch'án kíxin:

— Tjáncháha kjuasáya It'eni Ìnché nkaya nkajní la ko chjasintajni kíxin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kíxin ts'itja tí sín noehya. Mé xíkaha It'eni, jaha kóxrjínhan kíxin xíkaha tsonhen.

22 T'aná mé chjina kaín xín nkehe. Ninkexró noehya nkebro tí Xjeen ch'án. Na mé jehó It'é ch'án mé nohe. La ko ninkexró noehya nkebro tí It'é ch'án. Na

* 10:12 Génesis 19.24-28 † 10:18 Isaías 14.12

mé jehó tí Xjeen ch'án mé nohe ch'án la ko tí sín tsíkjeýá ch'án kixin tjinkaon ch'án tsonohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kixin:

—Chéhe tí sín k'uíkonxín kon sín éxi k'uíkonrá.

²⁴ Ntáxrjan kixin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uikon sín éxi t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejetinhínrá jie, kjánchó í kienhya sín —ichro ch'án.

Ch'ín Jesús kjuíncheyóexin éxi ijnko samaritano jína

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án tsonoexin ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochrín? —ichro ch'án.

²⁶ Ntá kjuátehe ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátehe ch'án ntáchro ch'án kixin:

—Chrótjuèheni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuénténi la ko chrótjuèheni kichó ni éxi tjuèxinni asénni[‡] —ichro ch'án.

²⁸ Ntá ntáchro ch'ín Jesús kixin:

—Jína kjuátehe. A ntá tí jaha xíkaha sích'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxín ch'án tí ch'ín Jesús ntá kjuanchankí ch'án ínaá kixin:

—¿Xá nkexro tí kichó ni chrótjuèheni, ichrua? —ichro ch'án.

³⁰ Ntá ch'ín Jesús kjuátehe ch'án ntáchro ch'án kixin:

—Ijnko chojni k'uínkajinxín nó ntja kjuixín chjasin Jerusalén sátsji ch'án chjasin Jericó, ntá kuátóhe ntja iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkjate sín ch'án, la ntá sátsíkji sín tsíkóthe sín ch'án la ó mero tjet'én ch'án.

³¹ Ntá xrínghya k'uátsínka ijnko nchat'á tí ntja ntiha ntá k'uíkon ch'án xíkaha ntá ántosén ch'án k'uátsínké ch'án.

³² A ntá kjaxín ijnko ch'ín levita k'uátsínka chjinaxón ntiha. Ntá k'uíkon ch'án xíkaha ntá ántosén ch'án k'uátsínké ch'án kjaxín.

³³ A ntá ijnko ch'ín kjuixín estado Samaria k'uátsínka tí ntja ntiha ntá k'uíkon ch'án xíkaha tjetsínka tí nkexro ntá kuíkonóhe ch'án.

³⁴ Ntá kóchjinehe ch'án tí nkexro tsíkónihi ntá kjuich'ehe ch'án xroan tí síchrit'ó chjéhe ch'án aceite la ko vino la ko kjuínchentetoxín ch'án ka. Ntá kjuixín ntá kjuínchekíták'á ch'án tí kolóchoe ch'án. Ntá sákjuíko ch'án ijnko nchia t'ók'èxín chojni ntiha la k'uáyakonhen ch'án.

³⁵ Ntá tí kóyáon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí ínché tí nchia ntáchro ch'án kixin: “T'ayakonhén tí nkexro í, a ntá ántsí má ts'ichjánxínhin ch'án la tió tsokjan ntá tsjénkaha ts'ókjanhan kaín tiha,” ichro ch'án.

³⁶ A ntá tí íní nkexro k'uátsínka ntja la, ¿nkexro tjuèhe tí nkexro kjuíncheníhi tí síchee? —mé kjuanchankí ch'ín Jesús.

³⁷ A ntá kjuátehe tí maestro tjako tí ley kixin:

[‡] 10:27 Deuteronomio 6.5; Levítico 19.18

—Tí nkexro kujikonóhē tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xikaha chrókjuich'e —ichro ch'án.

Ch'ín Jesús sákjuí ch'án ntōe tjan Marta la ko tjan María

³⁸ Naxa tjetji ch'ín Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuítóhe ch'án ntōe tjan ntiha.

³⁹ A ntá tjan Marta chóna tjan ijnko kichó tjan it'in María. A ntá jehe tjan kjuák'etjaxin tjan chrínki toté tí ch'ín Jesús tjetinhin tjan nkehe tí tjechro ch'án.

⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Ínchéni, zá tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ Kjánchó ch'ín Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta.

⁴² Kjánchó jnkokoá nkehe t'ichjánxin. A ntá tjan María kjueyá tjan tí nkehe antsí jína la ko ninkexró tsakitsjehya tjan tíha —ichro ch'án.

11

Ch'ín Jesús tjako ch'án nkexrí tsonixjeheni Dios

(Mt. 6.9-15; 7.7-11)

¹ A ntá jnkonaá ch'ín Jesús tjenixjehē ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Ínchéni, tjákehēni nkexrí tsonixjehēni Dios kixin xikaha ch'ín Juan kjuakohē ch'án tí sín k'uájiko ch'án.

² Ntá ch'ín Jesús ntáchro ch'án kixin:

—Tió nixjehérá Dios ntáchrórá kixin:

It'éni tjen nkaya nkajní, jaha imá tjóá.

Chrókui tí kjuachaxin kuentá.

Chrókjuich'e tí nkehe tóxrjínhan jaha ntihi chjasintajni éxí tjech'e nkaya nkajní.

³ Ijie tsjánjuan tí niotja t'ichjánxinhinni jnkojnko yaon.

⁴ T'óxíka tí nkehe jínahya kjuích'eni kixin kjaxin jeheni ts'itjáyenhenni tí nkehe kjuích'eheni chojni.

Títóéhyani jeheni xrajya chrókjuasinni jie. Nchekaáni kaín tí nkehe jínahya chrókónhenni

—mé xikaha ichro ch'ín Jesús.

⁵ Kjaxin ntáchro ch'án kixin:

—A ntá jnkojínrá chróchontará ijnko chojni choxian, a ntá sáchrókjuia ntōe ch'án k'áxrótjen chróntáche ch'án kixin: “Amigo, nchekjenni iy'á niotja

⁶ kixin nantá ó kui ijnko chojni chóxinni kujxin ch'án kjín kjuíji ch'án ntōeni ntá chóntahyani ninkehó tsochjeheni ch'án.”

⁷ A ntá tí chrókjuatehe tí nkexro choxian tjen nkaxenhen chróntáchro kixin: “Chjeéhyani xra. Tí ntója ntōeni méhe t'ikjéhe. A ntá xjeenni tjetjót'ok'èkoni xjan. Ntá xitjahya ts'ayani tsotjáhani nkehe”, ichro ch'án.

⁸ Ntáxrjan kixin kjónté chrók'uàyahya ch'án chrótjáhya ch'án nkehe kjónté chóxian ch'án, kjá ts'áya ch'án tsotjáha ch'án kaín nkehe t'ichjánxīnhan kixin tjinkakonhya ch'án kixin naxa chrókjuak'é chrók'uèya jaha.

⁹ Mé xīkaha ntáxrjan kixin: Tjanchiará nkehe la Dios tsotjáhará; tjéyará nkehe la ts'itjará; t'inkará puerta la tsoxitjehē.

¹⁰ A ntá tí nkexro tjanchia nkehe la ts'áyehē tí nkehe; la ko tí nkexro tjeyá nkehe la ts'itja; la ko tí nkexro t'inka puerta la tsoxitjehē.

¹¹ 'ǂXá jnkojínrá chontará xjaanrá chrókjuanchahará xjan niotja la ǂá chrókjuánjonrá ijnko xro? Q chrókjuanchahará xjan koche la ǂa chróchjehérá ijnko konche?

¹² Q chrókjuanchahará xjan koja la ǂá chrókjuánjonrá ijnko konchia?

¹³ A ntá jahará kjónté jínahyará la ó nohará nkehe jína tsochjehérá xjaanrá, la mé antsí chróknohará kixin It'eni tjen nkaya nkajní tsotjáhará Nchakuen ch'án tí jnkojínrá chrókjuanchehérá ch'án —ichro ch'ín Jesús.

*Tjanchia sín jīē kixin ch'ín Jesús chóna kjuachaxin tí Jínahya
(Mt. 12.22-30; Mr. 3.19-27)*

¹⁴ Ntá ch'ín Jesús kuakitsje ch'án ijnko nchakuen tí jínahya tsikjinchenósín ijnko chojní. A ntá tíó tsík'axrje tí nchakuen tí jínahya a ntá tí ch'ín xitjahya nixja la jína nixja ch'án. Ntá kaín chojni chrakon sín kixin xīkaha tsíkjich'e ch'án.

¹⁵ A ntá jnkojín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé t'etuenhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxin sín tí ch'ín Jesús ntá kjuanchehe sín ch'án ijnko kjuaxroan náxrjón kuente nkaya nkajní.

¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkojín gobierno jnkokónhya tjenkayáxin sín ntá tjanjonko kichó sín na mé ts'itjāyan tí kjuachaxin ts'etqanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá.

¹⁸ A ntá kjaxin tí ch'ín Tsochren chrókjuánjonko kichó ch'án, ǂla nkexrí chróchóna ch'án kjuachaxin naxa chrók'uetoan ch'án tí chrók'uaxrje tí jínahya? A ntá jahará ntáchrórá kixin janhan takítsjé nchakuen tí jínahya kixin tí kjuachaxién ch'ín Tsochren chonta janhan, ichrorá.

¹⁹ A ntá tí xīkaha la, ǂntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxin sín kixin jahará ntoáhya tjenkayáxinrá.

²⁰ A ntá tí kjuachaxién Dios mé takítsjéxian tí nchakuen tí jínahya na mé chrókónoaxínrá kixin tí kjuachaxién Dios t'etqan ch'án mé ó kui tí tjejorá.

²¹ A ntá ijnko chojni jīehē yamá chica t'ayakonhen ch'án ntqē ch'án kixin tí nkehe chóna ch'án ts'itjāyanhya.

²² A ntá itsi ijnko nkexro antsí má tsehe, a ntá tsjanjonko ch'án tí ñché nchia, a ntá tsjacha tsakitsjehe tí ñché nchia kaín tí chica yamá ch'án kixin imá jīēxín ch'án. A ntá tí ch'ín antsí tsehe mé tsakja ch'án kaín nkehe síin ntīha.

²³ Tí nkexro titekakonhya tí janhan mé nínkakonna ch'án. A ntá tí nkexro tjinkītsahya tí janhan mé t'inkákonhen tí xra t'a —ichro ch'án.

Ijnko tí nchakuen tí jínahya mé tsokjan ínaá

(Mt. 12.43-45)

²⁴ A ntá injko nchakuen tí jínahya tsík'axrjexín injko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Axri tsokjan ntona k'uaxrjéxian.”

²⁵ A ntá tió kjan la éxi injko chojni tsík'ánjón ntöe la náxrjón tsjehe tí nkaxenhen nchia. A ntá k'uikon tí jínahya xikaha tjen nchia

²⁶ a ntá sákjuikakjín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen injko chojni kénhya asén tinkáchónki Dios —ichro ch'án.

Tí kjuachéhe chaxín

²⁷ Ntá ch'ín Jesús tjenixja ch'án chrónka ch'án kaín tíha ntá injko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjenixin tí jaha kjuúntak'ánkiá —ichro tjan.

²⁸ Ntá jehe ch'án kjuátéhe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín injko kjuaxroan náxrjón

(Mt. 12.38-42; Mr. 8.12)

²⁹ Ntá nchónhya chojni sítójnokotsé sín tí tjen ch'ín Jesús ntá jehe ch'án kjuankixin nixja ch'án ntáchro ch'án kixin:

—A ntá tí chojni síin jie la jínahya sín, a ntá tjanchia sín kixin chrókjuasian injko kjuaxroan náxrjón. Kjánchó tsjáqxínhya í jnko kjuaxroan la jehó tí nkehe tsíkónhen ch'ín Jonás.

³⁰ Ntá éxi yóhe kónhen ch'ín Jonás kónoexín tí sín chjasin Nínive mé xikaha tsonhen tí Xjeen Dios K'óna Chojni la ts'ikon tí chojni síin jie.

³¹ A ntá tí yaon tsitöexín ijie chojni tjejó jie la mé tí tjan reina k'uetöan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjín kjuixín tjan tsinhin tjan nkexrí imá k'uénohe ch'ín Salomón.* A ntá jie itjèn janhan antsí chonta kjuachaxin, a ntá ch'ín Salomón la kénhyó.

³² La ko tí sin chjasin Nínive kjaxin ts'inkatjen sín tió tsitöexín ijie chojni la tsjanchia sín jie kixin tí sín tjejó jie la ko tsontáchro sín kixin chrókjuasóte tí chojni tjejó jie kixin tió kuínhin tí sín Nínive chrónka ch'ín Jonás itén Dios la kjuítöxínhin sín ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

Xrohi t'inkaséyanxín cuerpo kuènte chojni

(Mt. 5.15; 6.22-23)

³³ Nijnko chojni chrokjuincheck'ákjen injko xrohi chrókjuak'emá ch'án la ko chrókjuak'ehya ch'án chrínki injko ntacajón. Náhi. Noi chrókjuak'e xrohi chrókjuak'enkáya candelero kixin ts'ikonxín chojni tí t'inkaséyan.†

³⁴ Tí ikonrá mé éxi yóhe injko xrohi t'inkaséyanxín tí cuerpo kuéntará. A ntá tí chontará ikonrá jína la ntá kuénté cuerpo kuéntará chóna xrohi. A ntá tí chontará ikonrá jínahya la ntá kuénté cuerpo kuéntará la síiti tjen.

³⁵ Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjejórá.

* 11:31 1 Reyes 10.1-10 † 11:33 Lucas 8.16

36 **A** ntá tí kuenté tí cuerpo kuèntará chróchónta xrohi la ko nit'ò chrók'uixitiéhya la ntá kuenté la chrók'uikonrá jína la éxí ijnko lámpara kuenté ch'e xrá jína.

Ch'in Jesús chrónka kixin ntoáhya tjako tí sín fariseo la ko tí sín tjako ley (Mt. 23.1-36; Mr. 12.38-40; Lc. 20.45-47)

37 **A** ntá tió kjuixin nixja ch'in Jesús ntá ijnko ch'in fariseo chrónóhe ch'án tí ch'in Jesús kixin sátsjiko ch'án ntøe ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjaxin ch'in Jesús chjino tjen tí mesa a.

38 **A** ntá tí ch'in fariseo chrakon ch'án k'uikon ch'án kixin ch'in Jesús k'óntihya ch'án tja ch'án senó tí sine ch'án éxí tinkáchónki tí jehe sín.

39 Kjánchó Ìnchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. **A** ntá nkaxenhen la tsíkaón kjuachee la ko kjuachjinoxínhin.

40 Jahará lóntirá. ¿A noahyará kixin tí nkexro kjuích'éna tí ntója la koí tí nkaxenhen kjuích'éna ch'án?

41 Tí chrókjuínchekítònhérrá chojni nòa kaín asánrá tí nkehe chontará la ntá chrókóxakuanhyará tí chrók'ónti chojni ó náhi.

42 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. **A** ntá tahyará kuentá tí nkehe ntoá la ko nkexrí chrótjuèhérrá Dios la ko nkexrí chrótjuèhérrá kichuárá. Jína chróchjehérá Dios nkehe la ko chrók'uitjáyanhyará tí chrókjuínkítsará kichuárá.

43 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kixin jnkojína tsonixjahará sín tió tsoxétará sín ntasin.

44 'Nòará jahará maestro tjàkorá tí ley la ko jahará fariseorá. Ntoáhya tjenkáyáxinrá ch'iará. Jahará éxí yóhe tòye tsíxravá chojni tsík'en t'ikonhya chojni la t'atsínka sín nátaón la noehya sín kixin tsíxravá chojni ntiha.

45 **A** ntá kjuátehe ijnko tí maestro tjako tí ley ntáchro ch'án kixin:

—Maestro, xíkaha ntáchrua la, ¿á kjaxinhya jeheni kaín ni t'ántaxínhinni ní? —ichro sín.

46 **A** ntá ntáchro ch'in Jesús kixin:

—Kjaxin nòará tí jahará tjàkorá tí ley. Tétuènhénrá chojni tсамá sín ijnko nkehe imá ye chrókjuachahya chojni chrókuamá. **A** ntá jahará nijnko dedo tjárá chrókjuínkítsará tí nkehe imá ye yámá sín.

47 'Nòará tí jahará. Ch'énará tjàt'øe tí sín k'uéchrónka itén Dios ósé tsík'óyán tí sín k'uaxrjeníxinrá.

48 Xíkaha jahará tjáqoxinrá kixin ó nchoxon tí nkehe kjuích'e tí sín k'uaxrjeníxinrá ósé kixin jehe sín k'óyán sín tí nkexro k'uéchrónka itén Dios ósé. **A** ntá jahará ch'énará tjàt'øe tí tsíxravá sín.

49 'Mé xíkaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. **A** ntá chojni ts'óyán jnkojín tí jehe sín la ko tsochónkíhi tí í so sín, ichro ch'án.

50 **A** ntá Dios mé tsjanchia jie tí chojni siín jie kixin k'uitji ijnié kaín tí sín k'uéchrónka itén ch'án ósé desde tí xrankixin k'óna chjasintajni

51 la mé xrankixín k'uitji ijnié ch'in Abel la mé kjuixixín k'óyán sín ch'in Zacarías k'óyáxin sín ch'án jnkosiné tí tjen tí altar la ko tí njnko. Ntá Dios sinchekjasóte ch'án tí sín siín jie kixin xíkaha ik'uén kaín tí sín a.

⁵² 'Nòará jahará maestro tjàkorá tí ley. Jahará tjinkákonhyará kixin í so chojni tsonohe sín tí nkehe chaxín la ni jahará tjinkákonhyará sìnchexiteyará la ko t̄t̄oéhyará kixin í so chojni chrókjuinchexiteyá sín —ichro ch'án.

⁵³ A ntá kjuixin nixja ch'in Jesús kaín tíha ntá tí sín maestro tjako tí ley la ko tí sín fariseo imá kóninkakonhen sín ch'án ntá kjuankixin sín kjuanchankíhi sín ch'án nchónhya nkehe

⁵⁴ chrókjuachaxín sín ch'án kixin ách'e ntoáhya chrókjuatehe ch'án ntá chrókjuanchia sín jié tí jehe ch'án.

12

Ch'in Jesús chrónka kixin ntoáhya ch'e tí sín fariseo

¹ A ntá nchónhya mil chojni kójnkotsé sín ntá tinkák'íntate kichó sín. Ntá ch'in Jesús saoxín kjuankixin chénka ch'án tí sín k'uájiko ch'án ntáchro ch'án kixin:

—Chrókuitekákonhyará tí nkehe ntoáhya tjenkayáxin tí sín fariseo ch'ia sín, na mé éxi yóhe tí xroḡn nchek'ánkí nioḡja tí nkehe tjako sín.

² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin.

³ A ntá kaín nkehe ntáchrórá tí sítié la chr'éxin tsinhin chojni tí nchakotjin; la ko kaín nkehe mó ntáchrórá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

Nkexro tí chróchrakonhenni

(Mt. 10.26-31)

⁴ 'Jahará chojni chóxin kichó ni mé tjonkará kixin chróchrakuenhyará tí chojni t'óyán tí cuerpo, a ntá chr'éxin la kohya nkehe tsjacha sín chrókjuich'e sín.

⁵ Kjánchó tjonkará kixin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chónka kjuachaxin tsochr'án chojni tí síin xrohi tsjasótexín sín. Tí nkexro a mé chróchrakonhénrá ch'án má.

⁶ '¿Á chrókóxiñinnya in'ó koxroxé yaá chichaon ntsínsí? Kjánchó Dios la ts'itjáyenya ch'án nijnko tí jehe va.

⁷ Kjónté tí kaxihí chónka ikjárá la nohe ch'án nkekjaín ka chontará. Méxra chrakonhyará tí jahará kixin antsí má tjeté sínkí tí jahará. A ntá kjónté nchónhya koxroxé la kánhyó sínkí tíha.

Chróchrónkani kixin tinkáchónkini Ínchéni Jesucristo nkayakon chojni

(Mt. 10.32-33; 12.32; 10.19-20)

⁸ 'Ntáxrjan kaín tíhi kixin tí nkexro tsochrónka kixin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kixin chóxin ch'án tí jehe sín nkayakon tí sín ángel kuènte Dios.

⁹ A ntá tí sín sinchemá sín kixin chónhyana sín nkayakon chojni la ntá kjaxian janhan s̄ntamá kixin chonhya tí jehe sín nkayakon tí sín ángel kuènte Dios.

¹⁰ A ntá jnkojín nkexro ts'ántaxínhin sín tí Xjeen Dios K'óna Chojni naxa jina ts'itjayan tí jie k'uántaxínhin sín. A ntá tí nkexro ts'ántaxínhin tí Nchakuen Dios la xitjahya tsjin tí jie tí xikaha síxro sín.

¹¹ 'Tió tsjikoará sín nkaxenhen nijnko Israel la ko tí tjejó tí sín t'etḡan la ko tí tjejó tí síxreé la tóxakuanhyará nkehe tsjatēherá la ko tóxakuanhyará nkehe tsixrorá

12 Kíxin tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochóna chojni itsjé nkehe

13 Ijnko nkexro tjenkákjan tí sin tsíkójnkotsé ntáche ch'án tí ch'ín Jesús kíxin: —Maestro, ntáche tí kíchó ni a kíxin tsjanjon ch'án tí nkehe tónhenni tocar tsíkitohe it'eni tsakjani —ichro ch'án.

14 Ntá kjuátehe ch'ín Jesús ntáchro ch'án kíxin:

—Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

15 Kjaxin ntáchro ch'án kíxin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

16 Ntá kjuíncheyóexin ch'án ntáchro ch'án kíxin:

—Kjuák'e ijnko chojni rico, a ntá tí nontee ch'án na mé imá k'óna.

17 A ntá tí ch'ín rico kjuenkayáxin ch'án ntáchro ch'án kíxin: “¿Nkexrí chrókjuít'a jie kíxin chontahya nketí ts'ínkächjina tí noa k'ónana?” ichro ch'án.

18 Ntá kjuenkayáxin ch'án ntáchro ch'án kíxin: “Ó nõna nkehe sít'a jie. Ts'oxika tí t'ínkachjinayá noa chonta ntá sít'ána ijnko antsí jie ts'ínkachjinayá kaín nkehe k'ónana jie chonta.

19 Ntá tsontátjan asenná kíxin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ók'áha la inte la its'ia la tócháha,” ichro ch'án.

20 Kjánchó ntáche Dios tí jehe ch'án kíxin: “Lontia xikaha ichrua la, kíxin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án.

21 Mé xikaha tsonhen tí nkexro chóna nchónhya nkehe chjasintajni nihi, a ntá naxá kjueyáhya ch'án nkehe kuènte nkaya nkajni —mé ichro ch'ín Jesús.

Dios mé t'ayakonhen tí xjen ch'án

(Mt. 6.25-34)

22 Ntá chr'éxin ntáche ch'ín Jesús tí sín k'uájiko ch'án kíxin:

—Tjonkará kíxin chrókóxakuanhyará tí nkehe chrókjónterá la ko tí ka chrók'uítšará.

23 Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuèntará, a ntá kánhyó sínkí tí ka chrók'uítšará.

24 Xráxinkáonrá nkexrí síin tí kontálo. T'enkáhya va la ko tjáhya va la ko chóntahya va nketí ts'ínkachjinayá va tí noa. Kjánchó Dios la tjanjon nkehe sine va. A ntá jahará la antsí tjetóan, a ntá tí ko xritjaka la kénhyó.

25 ¿Á tjejó jnkójnra tjenkayáxinra kíxin tí chrókóxakonhanrá má ntá naxá chrók'uankirá it'o metro ntétoxinrá inaá?

26 A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe síin?

27 Xráxinkáonrá nkexrí sít'ánkí tí catsjo lirio ch'ehya xra la ko tjonhya. Ntá kjónté ntáxrjan kíxin tí ch'ín rey Salomón kaín ka náxrjón k'uék'ínkáya ch'án naxá kjuíncheyóehya ch'án kíxin antsí náxrjón tí tsjo a.

28 A ntá xikaha Dios mé nchek'itsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chrok'uítšará jahará. ¿Ntá nkekuènte kíxin naxá titekákonhyará ch'án?

29 ¿Ntá nkekuènte ixrírá tóxakonhanrá xritjéyará nkehe sinterá la ko nkehe its'irá?

³⁰ **A** ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a.

³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tjete síin nkaya nkajní

(Mt. 6.19-21)

³² 'Chrakonhyará jahará kolélo kuèntana. Kjonté tsjéhyará la It'ará tóxrjínhin ch'án tsotjáhará ch'án tí kjuachaxin kuènte ch'án.

³³ Nchekjirá kaín nkehe chontará la ntá chjeherá tí chichaon tí sín chóntahya. **A** ntá xikaha sich'erá la tí tjoa t'inka chichakoanrá tsontaxinhya kixin tí nkehe tjete síin nkaya nkajní tsjejehya la ko ntaha kohya xichee la ko ts'ínhya kué la ko ts'itjáyanhya.

³⁴ **A** ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxin listo chrók'uejóchónhenni

³⁵ T'ichjánxin listo ts'ejochonhénra la ko tsjak'ekoará xrohi tjeche.

³⁶ Listo chrók'uejorá éxí chojni ch'e xra tjejóchónhen sín tsokjanxin tí lámoe sín tí tsikótehe chojni kixin tió tsi ch'án la ts'éya ch'án, la ntá tsakitjehe sín tí puerta tjoka.

³⁷ Náxrjón tí nkekro ch'e xra tió chrókjan tí lámoe sín chrók'uikon ch'án kixin naxa tjejótsjehe sín. Ntá chaxin ntáxrjan kixin tí ch'ín lamo ts'etqan ch'án kixin ts'ejótjaxin sín tí tjen mesa ntiha ntá tsjanjon ch'án nkehe sine sín.

³⁸ Kjonté chrókui ch'án k'áxrótjen o chrókui ch'án nantóye mé xikaha chrók'uikon ch'án kixin tjejótsjehe sín la náxrjón tí sín ch'ehe ch'án xra.

³⁹ Chrókónohará tíhi kixin tí chrókónohe tí ìnché nchia nke hora chrókui tí xichee ntá chrókjuak'etsjehe ch'án chrókuitqehya ch'án chrók'uixenhen xichee tí ntqo ch'án chrókueé.

⁴⁰ Ntá jahará kjaxinrá xikaha chrók'uejotsjehérá kixin titàya tsi tí Xjeen Dios K'óna Chojni.

Tí nkekro jina ch'e xra la ko tí ch'ín ch'ehya xra jina

(Mt. 24.45-51)

⁴¹ **A** ntá ch'ín Pedro kjuanchankí ch'án kixin:

— Ìnchéni, ¿á jehóni kaín ni kjuìncheyóéxian nkehe ntáchrua o kaín chojni? —ichro ch'án.

⁴² Ntá ntáchro Ìnchéni kixin:

— ¿Nkekro tí t'etqan tí xra jina, a ntá tí lámoe ts'etuenhen kixin ts'ayakonhen ch'án tí chojni síin tí nchia ntiha kixin tsjanjon ch'án nkehe sine sín xintii tí hora a?

⁴³ Náxrjón tjen tí nkekro a tió tsi tí lámoe ts'ikon ch'án kixin naxa tjech'e tí xra.

⁴⁴ Tíhi mé chaxin tsontáxrjan kixin tí ch'ín lamo tsochjéhe ch'án kaín xra chóna ch'án ts'etqan tí ch'ín a.

⁴⁵ **A** ntá tí ch'ín t'etqan sítónhen xra tsjenkayáxin kixin tjokahya tsokjan tí lámoe ch'án, a ntá tsjankixin ch'án tsóninkakonhen ch'án tsjanjonko ch'án tí í so chojni ch'e xra, tí chojni ntoa la ko tí chojni chjin, a ntá jehe ch'án sine ch'án la ts'i ch'án la tsokan ch'án.

⁴⁶ **A** ntá tí lamo tsokjan tí yqon tjenkayáxinhya tí ch'ín ch'e xra, na mé ijnko hora noehya ch'án. **A** ntá imá sinchekjasóte ch'án tí ch'ín kuitqehhe xra la ntá tsjasóteko ch'án tí sín titekakonhya.

47 A ntá tí nkexro nohe ch'án nkehe tí xra tjinkaon tí lámɔe ch'án la tókakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án.

48 A ntá tí nkexro noehya nkehe tí xra tjinkaon tí lámɔe ch'án ntá ch'e ch'án nkehe chrókjuasótéxín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

*Jnkokoáhya tsjenkayáxin chojni kixin ó kui Ìnchéni Jesús
(Mt. 10.34-36)*

49 Janhan k'uinka kixin sintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá naxa náhi.

50 T'ichjánxín nchónhya tsona tsjasótena. Tókakonna tsoxiteyájia kaín tíha.

51 ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xíkaha.

52 Kixin ijie xrankíxín in'ó chojni naxa kjéhya jnkokoáhya tsjenkayáxin sín. Tí iní tsonínkakonhen tí yaá. Tí yaá tsonínkakonhen tí iní.

53 A ntá tí it'é tsonínkakonhen tí xjeen ntoa, la ko tí xjeen ntoa tsonínkakonhen tí it'é. A ntá tí iné tsonínkakonhen tí xjeen chjin, la ko tí xjeen chjin tsonínkakonhen tí iné. Tí ich'ee tsonínkakonhen tí tíkíntee la ko tí tíkíntee tsonínkakonhen tí ich'ee tjan.

*Tí nkehe chronkaxín nkehe tsonhen
(Mt. 16.1-4; Mr. 8.11-13)*

54 Ch'ín Jesús kjáxin ntáche ch'án tí chojni síin kixin:

—A ntá ts'ikonrá ts'aya tjuj tí tjiatóxin yaon, a ntá ntáchrórá kixin ts'aniá chrin, a ntá xíkaha chaxín tsonhen ts'aniá chrin.

55 A ntá tí chjéhe xrinto nó sur ntá ntáchrórá kixin tsosóa, a ntá xíkaha chaxín tsosóa.

56 Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajni la ko chjasintajni. ¿Ntá nkexrí naxa tiénxinhyará nkehe sitónhen tí tjeorá jie?

*Chrókóxakonhenni kjuaxróxin chrók'uejókoni tí sín nínkakonhenni
(Mt. 5.25-26)*

57 ¿Nkekuénte tjéyáhyará jahará nkehe tí jíina?

58 Tí jnkójín nkexro tsjanchia jie sátsjikoará ch'án nkayakon tí sín t'etqan na tí ntá ó chrónkajórá ch'án kixin tsoyóxin ts'ixinhya kjuanínkaon kixin sátsjikoahyará nkayakon tí ch'ín juez, kixin tí ch'ín juez chrók'uetqan ch'án kixin sátsjikoará tí sín comandante. A ntá tí ch'ín comandante chróchr'áxanhanrá ch'án ntqechiso.

59 Ntáxrjan kjá ní chrók'uaxrjéxinhyará ntiha tsjenkajiará kaín xín chichaon chonta.

13

T'ichjánxín chrókjuinkí chojni tí nkehe tjenkayáxin sín

1 A ntá tí yaon k'uejé iso sín chénka sín tí ch'ín Jesús kixin nkexrí kjuích'e ch'ín Pilato k'uetqan its'en iso chojni tsíkixín estado Galilea k'uíti ijnié sín kójnkojiéko tí ijnié tí ko k'óyán sín kjuanchexín sín kjuasáyé Dios.

2 A ntá kjuátehe ch'ín Jesús ntáchro ch'án kixin:

—¿Á tjenkayáxinrá kixin xíkaha kónhen tí sín tsíkjin estado Galilea kixin antsí jié jié chóna sín, a ntá tí í so sín chjasén sín la á náhi ní?

³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xíkaha its'enrá kjáxin.

⁴ ¿Á tjenkayáxinrá kixin antsí má k'uéchóna jié tí dieciocho chojni ik'uén xratja sín tí torre Siloé, a ntá tí í so sín chjasin Jerusalén la á náhi ní?

⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xíkaha ts'itjáyánra kjáxin.

Ch'ín Jesús kjuíncheyóexin ch'án éxi ijnko nta to higo t'ónahya to

⁶ A ntá ch'ín Jesús kjuíncheyóexin ch'án ntácho ch'án kixin:

—Ijnko chojni chóna ijnko nta to higo nóntee ch'án. Ntá sákjuítsjehe ch'án á k'óna to. A ntá náhi k'uitjahya ch'án ninkehó to.

⁷ Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjaha tí nta la k'uitjáhya ninkehó to higo. T'ochrínjian tí nta kixin tsoxéhe tí nonte a.”

⁸ A ntá tí ch'ín t'ayakonhen nonte kjuátéhe ch'án ntácho ch'án kixin: “Áxri, títohé ijie nánó kixin sjintantá nche la ko tsjiko nchekatjehe.

⁹ A ntá tí xíkaha áche ts'óna to. A ntá tí náhi na ntá ts'ochrínjian chr'éxin.”

Ch'ín Jesús kjuínchekitohe jina ijnko tjan níhi tí yaon t'ok'éhe chojni

¹⁰ Ch'ín Jesús kjuák'e ch'án ijnko njnko kjuakoxin ch'án ijnko yaon t'ok'éhe chojni.

¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jínahya kjuínchenihi tjan tjesékoá tjan xitjahya xrentoá tjan.

¹² A ntá ch'ín Jesús k'uíkon ch'án kixin xíkaha tjen tjan ntá k'uíyehé ch'án tjan ntácho ch'án kixin:

—Naná, ó kjuíinhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxín xrentoá tjan ntá chjéhe tjan kjuasáyé Dios.

¹⁴ A ntá tí ch'ín t'etoan kuénte njnko kónínkaon ch'án kixin ch'ín Jesús kjuínchekitohe jina ijnko chojni ijnko yaon t'ok'éhe sín, ntá ntáche ch'án tí chojni a kixin:

—Siín injon yaon mé chrókónhen xra chrók'uinkará chrókuitohará jina na jehya tí yaon t'ok'éheni chrókónhen tíha —ichro ch'án.

¹⁵ A ntá Inchéni kjuátéhe ch'án ntácho ch'án kixin:

—Ntoáhya tjenkayáxinrá jahará. ¿Á chrókjuasintánkeehyará tí koxintáará la o tí kolóchoará chrókjuíkoará va nta tí yaon t'ok'éheni ní?

¹⁶ A ntá tí tjan mé tsík'axrjenixin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jina kjáxin chrókjuasintánka tí nkehe tsíkóntetoxín tjan tí yaon t'ok'éheni? —ichro ch'án.

¹⁷ Ntá xíkaha ichro ch'ín Jesús la ntá kaín tí sín kónínkakonhen ch'án la kósuéhe sín. A ntá kaín tí chojni siín ntaha chéhe sín k'uíkon sín kaín tí kjuaxroan jié kjuakoxin tí jehe ch'án.

Kjuíncheyóexin ch'ín Jesús éxi ijnko tje ntsi kuénte nta mostaza

(Mt. 13.31-32; Mr. 4.30-32)

¹⁸ Ntá ntácho ch'ín Jesús kixin:

—¿Nkehe tóyóexin tí t'etoan Dios tí kjuachaxin kuénte ch'án la ko nkehe jina chrókjuintayóaxian?

19 Éxí yóhe ijnko tje kuènte nta mostaza k'uēnka ijnko chojni nontēe ch'án. A ntá tió k'uáankí kóyóhe éxí ijnko nta jíé. A ntá tí koxroxē xritjaká mé kui va kjuích'ēna va kaké va chrík'á tí chaon tí nta.

Ch'in Jesús kjuíncheyóēxin éxí tí xroan t'ánkixin nioṭja
(Mt. 13.33)

20 Ntá ntáchro ch'in Jesús inaá kixin:

—¿Nkehe chrokjuíntayóaxian tí t'etōan Dios tí kjuachaxin kuènte ch'án?

21 Éxí yóhe tí xroan nchek'ánkí nioṭja kjuinkikjānxin ijnko chojni chjin iní medida harina. A ntá tí ch'o la k'uáankí.

Tí puerta tekahya
(Mt. 7.13-14, 21-23)

22 K'uátsínka ch'in Jesús kaín chjasin hyé la ko kaín chjasin ntsintsí nkákjako ch'án tí tan jina kixin jehe ch'án ó sátsji ch'án chjasin Jerusalén.

23 A ntá ijnko nkexro kjuanchankí ch'án kixin:

—Ínchéni, zá tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

24 —Tóxakonhanrá t'ixēnxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín.

25 A ntá tí ínché nchia ts'ikjéhe ch'án tí puerta. A ntá chr'éxin jahará ts'ejorá ntója ts'èyará ts'inkará tí puerta tsontáchrórá kixin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchro ch'án kixin: “Nonahya nketí k'uínkaxínrá jahará”, tsixro ch'án.

26 A ntá tsjankixinrá tsontáchrórá kixin: “Kjóneni la ko k'uíni jnkokóá la ko jaha kjuákoxian tí ntāsjinni”, tsixrorá.

27 A ntá jehe ch'án tsjatehe ch'án tsontáchro ch'án kixin: “Ó ntáxrjan janhan kixin chonhya tí jahará. Títohérá tí janhan sájtirá ókjé kaín tí jahará jínahya kjuích'erá.”

28 Ntaha tsotsjankará la ko sintetaónrá nénorá tió ts'ikonrá kixin ch'in Abraham la ko ch'in Isaac la ko ch'in Jacob la ko kaín tí sín k'uéchronkaxín itén Dios mé tjejó sín tí tjen Dios t'etōan ch'án, a ntá jahará la ts'axrjéxinrá ntója ntíha.

29 Tsjixin chojni nó tjtōxin yaon la ko nó tjiátōxin yaon la ko nó norte la ko nó sur ntá ts'ejótjāxin sín tí tjen Dios t'etōan ch'án la sine sín.

30 A ntá iso tí sín k'uítuenhen senó la mé ts'etōan sín, la ko iso tí sín k'uék'etōan senó la mé ts'ítuenhen sín.

T'ává ch'in Jesús
(Mt. 23.37-39)

31 A ntá tí yaon a ikui iso sín fariseo ntáche sín tí ch'in Jesús kixin:

—Sátjixian ntihi kixin ch'in Herodes tjinkaon chrók'óyán ch'án tí jaha —ichro sín.

32 A ntá jehe ch'án kjuátehe ch'án ntáchro ch'án kixin:

—Sátjirá chenkará tí ch'in jínahya ch'ia kixin: “Íjie la ko ntóye tsakítsje nchakuen tí jínahya la ko sintakítóhā chojni níhi jina la ntá tí nixin yaon a ntá tsjixinna tí xra kuēntāna,” tsixrorá.

33 Kjánchó t'ichjānxin kixin naxā sájtija tí jie yaon la ko ntóye la ko tí yaon chr'éxin kixin t'ichjānxin kixin ijnko nkexro chrónka itén Dios chrók'uēnxín ch'án chjasin Jerusalén.

³⁴ Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítasará. Imá itsjé veces tjínkavan chrókójkotsérá la chrók'uáyakonhanrá éxi ijnko cochíká mé t'ayakonhen xjeen va chrínkí kanénee va mé xikaha tjínkavan chrók'uáyakonhanrá tí jahará. Kjánchó jahará lá tjínkákonhyará xikaha.

³⁵ Chrókónohará kixin Dios la tsítóhe ch'án tí jahará lá ts'ikonhyará tí janhan tsjixrakájia tí yaon tsonotáchorá kixin: “Jína tí nkexro kjuixín kjuachaxin ihnjé Inchéni Dios.”

14

Ch'in Jesús kjuínchekitóhe jína ijnko nkexro tsík'atjyé kuenté

¹ A ntá tí yaon t'ok'éhe sín sákjuí ch'in Jesús ntóe ijnko ch'in fariseo t'etóan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án.

² A ntá ntiha ntoí chók'èxin tí tjen ch'án itjen ijnko chojni tsík'atjyé kuenté.

³ A ntá ch'in Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿A siín kjuachaxin sinchekitóheni jína ijnko chojni níhi tí yaon t'ok'éheni o náhi? —ichro ch'án.

⁴ A ntá jehe sín la táni sín. A ntá ch'in Jesús sákjuíko ch'án tí ch'in níhi la kjuínchekitóhe ch'án jína la k'uétuénhen ch'án kixin sátsji ch'án.

⁵ A ntá ntáche ch'án tí sín fariseo kixin:

—Jnkojín tí jahará chontará kolóchoará o koxjintaará chrókjuítsínkáya va tòye zá senóhya chrókuaquítsjetaónrá va tòye kjónté yaon t'ok'éheni ní? —ichro ch'án.

⁶ A ntá jehe sín ninkehó kjuátéghya sín kixin xikaha ichro ch'án.

Tí sín tsík'iyéhe sín sátsji sín kia tsíkótehe chojni

⁷ Ntá k'uíkon ch'in Jesús kixin tí sín tsíkóchjina tí kia a kjuéyá sín silla náxrjón ts'ejóya sín tí tjen mesa ntá kjuíncheyóéxin ch'án ntáchro ch'án kixin:

⁸ —Tió jnkojín nkexro ts'iyáha sín kixin tsjasán ijnko kia tsótehe chojni la tjéyáha tí nta silla kuénte tí sín t'etóan kixin ách'e tsí jnkojín nkexro antsí t'etóan

⁹ a ntá tí nkexro k'uíyahará yóirá itsi ch'án tsjanchará ch'án kixin t'inkátjenxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuáha sátsjia tsjak'etjaxian tí silla kjuixín.

¹⁰ Íchá jína tió t'iyáha sín chrókjuak'etjaxian tí silla tjetuanhya, kixin ntá chrókui tí ch'in tsík'iyáha tsonotáchro ch'án kixin: “Jína tjoni la t'atsínka tjak'etjaxian tí silla antsí náxrjón”, kixin ntaha tsjikosáyaha sín nkayakon kaín tí sín ts'ejótjaxínkoa sín ntiha.

¹¹ Kixin tí nkexro sinchénkehe asén kixin imá chrók'uétóan ch'án la mé chr'éxin Dios tsjanjonhya kjuachaxin kixin ts'etóan ch'án. A ntá tí nkexro k'uék'etóanhya la mé chr'éxin Dios tsjanjon kjuachaxin kixin antsí ts'etóan ch'án.

¹² Kjaxin ntáche ch'án tí nkexro tsík'iyéhe ch'án kixin:

—Tió tsjásian kia it'o yaon la o tsonjin la t'iyéghya tí sín choxian la ko tí sín kichuá la ko tí sín náxa kjéhya la ko tí sín rico chjino ntóe, kixin jehe sín la chr'éxin ts'iyáha sín inaá la xikahó la ó kjuixin kjan tí k'uyéghé sín.

¹³ Íchá jína chrók'uyéghé tí sín nòe la ko tí sín tsixénká toté sín la ko tí sín xitjahya tji la ko tí sín t'ikonhya.

14 Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkítsa tí jehe sín.

Ch'in Jesús kjuíncheyóexin ch'an éxi ijnko kia jié

15 A ntá kuínhin ijnko tí sín tjejtójtaxin sín chjino tí mesa, a ntá ntáche ch'an tí ch'in Jesús kixin:

—Náxrjón tí sín sine niojtá tí tjen Dios t'etóan ch'an —ichro ch'an.

16 Ntá ntácho ch'in Jesús kixin:

—Ijnko chojni kjuasin ijnko kia jié ijnko kónjín la k'uíyehé ch'an nchónhya chojni tsi sín tí kia a.

17 A ntá ó kuichjina tí hora sine sín ntá k'ueuēnhen ch'an ijnko chojni ch'ehe ch'an xra tsjichenka ch'an kaín tí sín ó tsik'iyehé ch'an kixin chrókóchjina sín kixin ó tjejóchónhen kaín nkehe sine sín.

18 Ntá kaín sín kjuankixin sín chrónòa sín kixin xitjahya tsjiji sín sine sín. A ntá tí ch'in saoxín kjuitsjehe ch'an ntácho ch'an kixin: “Na ntá k'ueñani ijnko nontēeni la t'ichjánxin tsjitsjeheni la xitjahya tsjijini tí t'iyehēni ch'an, ntá chénka ch'an kixin chrókónínkakuenhyani ch'an”, ichro ch'an.

19 A ntá í jnko ch'in ntácho ch'an kixin: “Na ntá k'ueñani in'ó yunta koxinta, a ntá t'ichjánxin tsotsjeheni á jína ch'e va xra, ntá chénka ch'an kixin chrókónínkakuenhyani ch'an”, ichro ch'an.

20 A ntá í jnko ch'in ntácho kixin: “Na ntá kótēheni, méxra xitjahya tsjijini”, ichro ch'an.

21 Ntá ó kjan tí ch'in ch'e xra chénka ch'an tí ch'in lámo kaín tí nkehe tsintácho sín. A ntá tí ch'in lámo kuínhin ch'an xikaha la ntá kónínkaon ch'an ntá ntáche ch'an tí ch'in ch'ehe ch'an xra kixin: “Tjoka sátjia kaín ntia chjasin í la tsjikaon ntihí tí sín nòa la ko tí sín tsixénká toté sín la ko tí sín xitjahya tji la ko tí sín t'ikonhya”, ichro ch'an.

22 A ntá chr'exin ntá kjan tí ch'in ch'e xra chénka ch'an tí lámo kixin: “Ó kjuínchexiteyáni xikaha kuétueñhēni la kjónté naxa xranka chrókui chojni”, ichro ch'an.

23 A ntá tí ch'in lámo ntáche ch'an tí ch'in ch'ehe ch'an xra kixin: “Sátjia kaín ntia jié la ko kaín ntia ntsí la tētuēñhen chojni siín chrókui sín chrók'uíxixenhen nchia ntona naxa xranka.

24 Kixin ntáxrjan kixin nijnko tí sín k'uíyahá senó chrókui sín chrókjone sín tí nkehe chrótjahá sín”, ichro ch'an.

Ixra tsochrēheni Cristo

25 Nchónhya chojni nkáchrēhé sín tí ch'in Jesús, ntá jehe ch'an kuinkátjía ch'an kotónhen ch'an ton ch'an ntácho ch'an kixin:

26 —A ntá jnkojín chojni tsotjinkaon tsochrēhé tí janhan la antsí má tjeoan chrótjuana sín la kjónté kénhyó chrótjuēhe it'é sín la ko iné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuēhe asén sín. A ntá náhí la xitjahya ts'óna discípulo kuētana jehe sín.

27 Tí nkexro tsamáhya tí ntacruz kuēnte sín tsochrēhya sín tí janhan la xitjahya ts'óna discípulo kuētana.

28 A ntá jnkojín tí jahará chrókjuich'énará ijnko tjat'ó nteto, zá senóhya chrókuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchoxon chrókjuixixín chrók'ónaxín tí tjat'ó a?

29 A ntá tió tsjankixinrá sich'énará tí tjat'ó ntá chr'exin xitjahya tsjixin sich'énará, ntá kaín chojni ts'ikon sín tsjanoará sín

³⁰ tsontáchro sín kixin jaha kjuankíxian kjuich'éna, a ntá jie xitjahya sìnchekjixian ts'óna, tsixro sín.

³¹ A ntá jnkójín tí ch'in rey t'etoan tsjanjonko í jnko rey t'etoan kjaxin násenó chrókjuenkayáxin ch'án kixin ite mil soldado ch'óna ch'án, á chrókjuacha ch'án chrókjuachaxin ch'án tí kán mil soldado ch'óna tí í jnko ch'in t'etoan.

³² A ntá tí chrókjuachahya ch'án chrókjuanjonko ch'án tí í jnko ch'in rey, ntá naxa ikjín tjen ch'án la íchá jina chróchr'án ch'án ijnko nkexro tsochronóehe ch'án kixin chrók'uixinhya kjuanínkaon.

³³ Mé xikaha jnkójín tí jahará tí tsitóéhyará kaín nkehe ntoáhya tjenkayáxinrá xitjahya ts'óna discípulo kuéntana.

Tí xjnta tsík'ánkéhé tí jní

(Mt. 5.13; Mr. 9.50)

³⁴ A ntá jina tí xjnta, kjánchó tí chrók'uánkéhé tí jní la ntá xitjahya chrókjní inaá.

³⁵ Ntá tí xikaha la ní tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

15

Kjuíncheyóexin ch'in Jesús éxi ijnko kolélo tsik'itjáyán

(Mt. 18.10-14)

¹ Kaín tí sín nchekjènkí la ko tí sín ch'óna nchónhya jie kóchjinehe sín tí ch'in Jesús kixin tjinkaon sín chrókuinhin sín tí nkehe tjechronka ch'án.

² A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'in i la kjónté tí sín ch'óna nchónhya jie la t'ito ch'án la ko neko ch'án —ichro sín.

³ Ntá ch'in Jesús kjuíncheyóexin ch'án ntáchro ch'án kixin:

⁴ —A ntá jnkójín tí jahará, tí chontará ijnko ciento kolélo ntá chrók'uitjáyán ijnko va, zá chrókuitóéhyará tí noventa y nueve va tí nteje ó, a ntá á chrókjuikjéyáhyará tí ko tsík'itjáyán hasta chrók'uitjájíará va ní?

⁵ A ntá tí ts'itjára va ntá tsamára va tsócháhárá.

⁶ Ntá tió tsokjanrá ntóará ntá ts'iyehérá kaín tí sín choxinrá tjórá jina la ko tí sín chjinaxón ntóará ntá tsontácherá sín kixin: “Tsóchéheni ts'ejóni jie kixin ó k'uitjá tí kolélo tsik'itjáyán.”

⁷ Na mé kjaxin xikaha tsotjonkará kixin antsí tsóchéhe kaín tí sín siín nkaya nkajní tió ijnko chojni tsítóhe kaín tí jie tsíkjenkayáxin ch'án. Ntá kánhyó tsóchéxin tí sín nkaya nkajní kixin tí noventa y nueve chojni jina t'ichjánxienhya chrókjuinkí sín tí nkehe tjenkayáxin sín.

Kjuíncheyóexin ch'án éxi chichaon k'uitjáyán

⁸ A ntá ijnko chojni chjin ch'óna ite chichaon, a ntá tí chrókjuinçek'itjáyán tjan ijnko tí chichaon a la, zá chrókjuinçek'ákjenhya tjan xrohi kixin chrókjuéyáxin tjan la ko chrok'uánjón tjan tí nchia kixin chrótsjehe tjan jina hasta chrók'uitjajia tjan?

⁹ A ntá tió chrók'uitja tjan la ts'iyehé tjan kaín tí chojni chjin jina tjo tjan la ko tí sín chjinaxón ntóe tjan la ntá tsontáche tjan sín kixin: “Tsóchéheni ts'ejóni kixin ó k'uitjani tí chichaon kjuínçek'itjáyanni.”

¹⁰ Ntá kjaxin xikaha tsotjonkará kixin imá tsöchéhe kaín tí sín ángel kuènte Dios tió ijnko chojni tsitöhe kaín tí jie tsíkjenkayáxin ch'án.

Ch'in Jesús kjuíncheyóexin ch'án éxi ijnko ch'in kuicháxinhin chichaon

¹¹ Kjaxin ntáchro ch'in Jesús kixin:

—Ijnko nkexro chóna yaá xjeen ch'án.

¹² A ntá tí ch'in tsoyo ntáche ch'án tí it'é ch'án kixin: “It'éni, chjehéni kaín nkehe chróchjehéni.” A ntá tí it'é sín k'óchrít'öhe ch'án tí nkehe chóna ch'án. A ntá tí ch'in tsoyo k'uáyéhe tí nkehe kuènte ch'án.

¹³ A ntá kánhyó tsjé yaon chr'éxin tí xjeen ch'án tsoyo kjuínchekji ch'án kaín nkehe tsík'áyéhe ch'án, ntá sákjuiko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kaín chichaon chóna ch'án kixin jehya tí jina kjuích'e ch'án.

¹⁴ A ntá tió kjuixin kjuèhe ch'án tí chichaon kuicháxinhin ch'án ntá xrináhya kókjinta tí chjasin ntiha ntá kohya nkehe sine kaín sín. A ntá jehe ch'án kjuankíxin ch'án t'énxin ch'án kjinta.

¹⁵ Ntá jehe ch'án sákjuíkjejá ch'án xrá sich'e ch'án. Ntá chjasin ntaha tjeen ijnko ch'in kjuanchehe ch'án xrá. Ntá tí ch'in a kjuanjón ch'án xrá ntá k'uetóan ch'án kixin sátsji ch'án nontee ch'án kixin ntiha ts'ayakonhen ch'án cochíno.

¹⁶ A ntá jehe ch'án t'énxin ch'án kjinta ntá tjinkaon ch'án chrókjóne ch'án tí nkehe ine tí cochíno kixin ninkexró tí ntiha chrohya tsjanjon nkehe sine ch'án.

¹⁷ Ntá jehe ch'án kjuák'e ch'án kjuenkayáxin ch'án kixin: “Nchónhya chojni siín ntóe t'aná ch'e sín xrá la chóna sín nkehe sine sín. Ntá janhan tjét'énxian kjinta ntihi.

¹⁸ Ntá jie tsokjan tí tjeen t'aná la ntá tsontáxrjan kixin: It'éni, kjuasinni jie kuítekakuenhya It'éni nkaya nkajni la ko kjuasinhanni jie kuítekakuanhyani tí jaha.

¹⁹ Tósuèheni tsontáchrúa kixin xjaan tí jeheni. Ch'énani éxi ijnko chojni t'aha xrá”, mé xikaha kjuenkayáxin ch'án tsontáchró ch'án.

²⁰ Ntá kuákja ch'án ntja xrakoa ch'án tí ntóe it'é ch'án.

A ntá kjónté naxá kjín kui ch'án a ntá tí it'é ch'án la ó tsík'ikon ntá kujkonóhehe ch'án tí xjeen ch'án. Ntá kuinká ch'án la kjuíxinhin ch'án ntja la kjóa ch'án la ko kjóneko ch'án kochíto.

²¹ Na ntá ntáchro tí xjeen kixin: “It'éni kjuasinni jie kuítekakuanhyani Dios la ko kjuasinhanni jie kuítekakuanhyani tí jaha. Tósuèheni tsontáchrúa kixin xjaan tí jeheni”, ichro ch'án.

²² A ntá tí it'é ch'án k'uíyehé ch'án tí sín ch'ehe ch'án xrá ntáchro ch'án kixin: “Xrákoará tí ka antsí jina nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án totjoa.

²³ La ko tjicakjínra koxintáxjan tsanká la t'oyánra va kixin sinekoni ch'án tsjasinhinni ch'án kia.

²⁴ Kixin tí xjanna i la éxi ó tsík'en ch'án xikaha ntá jie la éxi ó xechón ch'án la tsík'itjáyan ch'án la ntá jie la ó kónoxín ch'án inaá”, ichro ch'án. Ntá kjuankíxin sín kjuasin sín kia.

²⁵ A ntá tí xjeen ch'án saó la nonte tjech'e ch'án xrá. A ntá tió kjan ch'án kui ch'án chjinaxón nchia ntá kuínhin ch'án siín són la ko ité sín.

²⁶ Ntá k'uíyehé ch'án ijnko ch'in ch'e xrá ntá kjuanchankíhi ch'án kixin nkekuènte xikaha sitónhen.

²⁷ A ntá tí ch'ín a ntáchro ch'án kixin: “Kíchuá la ó tsíkjan. A ntá it'á la k'uetōan k'uén koxintáxjan tsanká kixin jína xíkjan ch'án”, ichro ch'án.

²⁸ A ntá tí ch'ín saō la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóhēhē ch'án kixin chrók'uixenhen nchia.

²⁹ Kjánchó jehe ch'án kjuátēhe ch'án ntáche ch'án it'é ch'án kixin: “Nchónhya nánó t'ahani xra, la xráxín kuítékakonhanni kaín nkehe kuétōan la kjuánjonhya nijnko kotētso chrókjónekoni tí sín chóxinni.

³⁰ A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naḡa t'oyán koxintáxjan tsanká”, ichro ch'án.

³¹ A ntá ntáchro tí it'é ch'án kixin: “Xjeenni jaha, xráxín tjejóko kichó ni ntíhi. Kaínxín nkehe kuéntana la kuénta jaha kjaxín. ¿Nkeuente ninkávan?

³² A ntá jie la t'ichjánxin tsjasinhinni kíchuá kia tsochéhēni kixin éxí tsík'len ch'án la ntá jie la ó tsíxechón, la tsík'itjáyan ch'án xíkaha la ntá jie la kónoxín ch'án inaá.”

16

Ch'ín Jesús kjuíncheyóexin ch'án éxí tí ch'ín k'uáyēhe xra la ntá kjuích'ehya xra jína

¹ Kjaxín ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etōan tsonhen xra. Ntá kui ijnko nkexro chénka tí lamó kixin: “Tí nkexro t'etōan nchexénhen ch'án tí nkehe chonta”, ichro ch'án.

² A ntá tí ch'ín lamó k'uáyēhe ch'án tí ch'ín ch'ehe ch'án xra ntáche ch'án kixin: “¿Á chaxín xíkaha ch'e kixin xíkaha ichro sín? A ntá jie tsjánjuan jaha kuénta tí xra kjuích'e kixin ijie í sích'ehya xra tsétōan ntíhi”, ichro ch'án.

³ A ntá tí ch'ín t'etōan tónhen xra kjuenkayáxin ch'án kixin: “¿Nkehe chrókjuít'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nontēe chojni la ko tósuaña kixin chrók'uájia chrókjuánchák'á nkehe.

⁴ Ó nòna nkehe sít'a kixin ntá tsochonta nkexro tsjanjon kjuachaxin tsjak'é nteōe sín tí í tsochontahya xra sít'a”, ichro tí ch'ín t'etōan.

⁵ Ntá k'uáyēhe ch'án jnkojnko jnkojnko tí sín síkéhe tí lámōe ch'án. A ntá tí ch'ín saō kui ntá tí ch'ín t'etōan mé kjuanchankíhi ch'án kixin: “¿Nkekjaín tjasikéhe lámōeni?” ichro ch'án.

⁶ A ntá jehe ch'án kjuátēhe ch'án ntáchro ch'án kixin: “Síkani ijnko ciento ntabarril aceite”, ichro ch'án. A ntá tí ch'ín t'etōan ntáchro ch'án kixin: “Ntíhi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án.

⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjásiká?” ichro ch'án. Ntá ntáchro ch'án kixin: “Ijnko ciento medida noatriga síkani”, ichro ch'án. A ntá ntáchro tí ch'ín t'etōan kixin: “Tí xíkaha la ntíhi tjen tí xroon tsjénkaxian. A ntá jie la ch'éna ochenta ó”, ichro ch'án.

⁸ A ntá tí ch'ín lamó kjuátōan ch'án kixin kjónté jehya xra jína kjuích'e tí ch'ín t'etōan kjuích'ehe ch'án xra la kjánchó tí kjuích'ia ch'án la antsí nohe ch'án kjuích'ia ch'án. Méxra tí sín chjasintajni antsí nohe sín ch'yēhe kichó sín, a ntá tí sín ixri tí t'inkaséyan la xíkahya chrókjuenkayáxin sín chrókjuích'ia sín, chrókjuenkayáxin sín tí jína.

9 Janhan la tétuñhanrá kixin chrókuicháxinhanrá tí chichaon síin chjasintajni kjónté tjuáhya kixin tsjínkĩtsará chojni kixin ntá itsjórá sín jína. A ntá tió tsjeje kaín chichaon ntá jehe sín ts'ejóchónhen sín nkaya nkajní ts'áyáhará sín jnkochríxín.

10 Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án.

11 Mé xikaha tí xitjahya t'ayakonhénra tí chichaon kuènte chjasintajni ntihó la, çntá nkexri chrók'uayéhérá nkehe tjete chaxín kuènte nkaya nkajní?

12 Mé xikaha tí kjuachahyará k'uáyakonhénra tí chichaon kuènte ókjé nkexro, çntá nkexro chrótjáhará jahará tí nkehe chaxín tjete chrók'uáyakonhénra?

13 Nijnko nkexro xitjahya sich'ehe yaá lamó xra kixin ijnko la tsonínkakonhen ch'án la ko tí í jnko tsotjuèhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuich'ehe chojni xra Dios tí tjinkaon sín tsochóna sín itsjé chichaon —ichro ch'án.

14 A ntá tí sín fariseo imá kóxrjínhin sín chichaon, ntá kuínhin sín kaín tíha nkerí ichro ch'in Jesús, ntá kjuanoá sín ch'án.

15 Na ntá ch'in Jesús ntáche ch'án sín kixin:

—A ntá jahará tjinkáonrá chrók'uejóxínra jína nkayakon chojni. A ntá Dios la chóxin ch'án asánra. A ntá tí nkehe imá tóxrjínhin ch'e chojni la Dios la tóxrjénhya ch'án.

Tí ley la ko tí t'etqan Dios tí kjuachaxin kuènte ch'án

16 Naxa kjuakohya ch'in Juan la k'uékjako sín tí ley kuènte ch'in Moisés la ko tí nkehe k'uékjin tí sín k'uéchronka itén Dios ósé. A ntá kui ch'in Juan la chrónka ch'án tí tan jína nkexri ts'etqan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etqan ch'án.

17 Antsí xrahya chrók'uitjáyan tí nkehe síin nkajní la ko chjasintajni. A ntá xitjahya kixin chróxiteyáhya kjónté ijnko nkehe ntsí t'etqan tí ley.

Ch'in Jesús tjako ch'án kixin chrókjuákéhya kichó chojni

(Mt. 19.1-12; Mr. 10.1-12)

18 A ntá ijnko chojni tsjakehe ichjién la ntá tsakja ch'án í jnko chojni chjin la ijje tíha. A ntá tí ch'in tsakja ijnko tjan tsikísínkehe la kjaxin ijje tíha.

Tí ch'in rico la ko tí ch'in Lázaro

19 Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia.

20 A ntá ntója ntqé ch'án kjuák'etjaxin ijnko ch'in nòa mé it'in ch'án Lázaro tjanchak'á ch'án la ko níhi ch'án tsíchrenka kuenté ntqé ch'án.

21 A ntá tí ch'in nòa la imá kjuak'e asén ch'án chrókjóne ch'án la ko chrókókjexin ch'án tí nkehe tot'q tsjixènjinkixin mesa kuènte tí ch'in rico. A ntá tí konja la kjuamá va tí tosóa chóna ch'án.

22 A ntá ijnko yaon mé ik'uén tí ch'in nòa. A ntá tí sín ángel mé sákjuiko ch'án tí náxrjón tjen ch'in Abraham. La ko kjaxin ik'uén tí ch'in k'uéríko la sákjuikjavá sín ch'án.

23 Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uíkon ch'án kixin ikjin náxrjón tjen ch'in Abraham tjeko ch'án tí ch'in Lázaro.

²⁴ Ntá k'uèya tí ch'ín k'uéchonta tsjé nkehe ntáchro ch'án kixin: “It'éni Abraham, tikonóana tétuehén tí ch'ín Lázaro kixin sinchekjataxín ch'án kóhe dedo tja ch'án intá ntá tsi ch'án tsjak'etak'á ch'án nejen kixin tsoxruehe kixin tjinahya sóa tí xrohi siín ntihi”, ichro ch'án.

²⁵ Kjánchó ntáchro ch'ín Abraham kixin: “Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uáyéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe.

²⁶ A ntá kjaxin jnkosiné tjen tsaka imá jié xitjahya ts'átòye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átòye sín itsji sín ntihi”, mé ichro ch'ín Abraham.

²⁷ A ntá tí ch'ín k'uéríko mé ntáchro ch'án kixin: “Ntá xrjanóaha jaha It'éni Abraham kixin tétuehén tí ch'ín Lázaro sátsji ch'án ntòe t'aná

²⁸ kixin ntaha kuítóhe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhya ntihi”, mé ichro ch'án.

²⁹ Kjánchó kjuátehe ch'ín Abraham ntáchro ch'án kixin: “Ó chóna sín tí nkehe tsikjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsintáchro tí sín a”, ichro ch'án.

³⁰ Ntá ntáchro tí ch'ín a inaá kixin: “Náhi, It'éni Abraham. Chrókójina sáchrókjuitsjehe ijnko chojni tsik'en ntá chrókuitekaon sín chrókuítóhe sín ijje sín”, ichro ch'án.

³¹ Ntá ntáchro ch'ín Abraham kixin: “Tí tsitekakonhya sín tí nkehe tsintáchro ch'ín Moisés la ko tí nkehe tsintáchro tí í so sín tsichronka itén Dios ósé, ntá kjaxin tsitekakonhya sín kjónté chróxechón ijnko chojni tsik'en chrókjuichronka inaá”, ichro ch'án.

17

Tí kjuaxikaon naxa tjasin chojni jie
(Mt. 18.6-7, 21-22; Mr. 9.42)

¹ Ch'ín Jesús ntáche ch'án tí sín k'uájiko ch'án kixin:

—Xráxin siín nkehe tsjasixín chojni jie. Kjánchó nóa tí nkexro tjasin tí nkehe tsjasixín chojni jie.

² Íchá jina chrókjuincheteyá sín ch'án ijnko xro tsik'óna xrochre chrókjuikákánkí sín ntayaon kixin tjasin ch'án tí nkehe tsjasixín jie ijnko chánjan naxa noehya.

³ Tóxakonhanrá kixin xikahya chrókjuásinrá nkehe.

A ntá tí kichuára chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jina tí xikaha kjuít'ahará ch'án. A ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjányanhanrá tí nkehe kjuít'ahará ch'án.

⁴ Kjónté chrókjuasinhanrá ch'án jie yato veces jnkokoá yaon la ko yato veces chróntáchro ch'án kixin í xikahya tsjasin ch'án jie inaá, la t'ichjánxin ts'itjányanhanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kixin tinkáchónkini Cristo

⁵ Ijnko yaon tí sín k'uájiko Inchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

⁶ A ntá Inchéni ntáchro ch'án kixin:

—Kjonté intsi chrókuinkachónkirá tí janhan éxí jiéxin ijnko tje ntsí kuénte nta mostaza la jína chrókuétuénhénrá tí nta sicómoro kixin chrók'uaxrjenkixin tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókuinchexiteyá tí xikaha chróntáchrórá.

Nkexrí chrókuinchexiteyá tí nkexro ch'e xra

⁷ Jnkojín tí jahará tí chróchontará ijnko nkexro t'ahará xra, a ntá tí chrókjanxín ch'án nontaará kjuínchentá ch'án nche o k'uàyakonhen ch'án tí ko kuéntará, ¿á chróntácherá ch'án kixin senó chrókjuak'e ch'án chrókjóné ch'án?

⁸ Kjá náhi. Kjá chrókuétuénhénrá ch'án kixin senó chrókjuinchechján ch'án tí nkehe sinte la ko chrókóyaxínhin ch'án kixin tsjanjon ch'án nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'án sine ch'án la ko its'i ch'án.

⁹ ¿Á chrókjuancheherá ch'án kjuasáya kixin kjuínchexiteyá ch'án tí nkehe kuétuénhénrá ch'án? Kjá náhi.

¹⁰ Mé kjaxín xikaha tí jahará tió chrókjuixin kaín tí xra k'uətuəhanhá Dios chróntáchróhyará kixin jina kjuich'erá xra kixin ó jehó tí nkehe k'uítuanhanrá kjuínchexiteyará, tsixrorá.

Ch'in Jesús kjuínchekitohe ch'án jína ite chojni chóna chinlepra

¹¹ Ntá sátsji ch'in Jesús chjasín Jerusalén ntá k'uátsinka ch'án nó estado Samaria la ko estado Galilea.

¹² Ntá kjuíji ch'án ijnko chjasín ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín

¹³ ntá itsen k'uíyehé sín ch'án ntáchro sín kixin:

—Jesús, Maestro, tikonóghéni kaín ni —ichro sín.

¹⁴ Ntá k'uikón ch'in Jesús tí jehe sín ikjín tjejó sín ntáche ch'án sín kixin:

—Sátsjirá tjákoherá tí sín nchát'á kixin ó kuítóhará jína, ichrorá.

Nachrohe sákjuí sín tinkákitohe sín jína.

¹⁵ Ntá ijnko tí jehe sín tió kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án.

¹⁶ Kjuák'exín toch'in ch'án chrínkí toté ch'in Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'in a mé tsíkjiñ ch'án estado Samaria.

¹⁷ A ntá ch'in Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina?

¹⁸ ¿Á jehó tí ch'in i kjónté ikjín tsíkjiñ ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹ A ntá ntáche ch'án tí ch'in a kixin:

—T'ínkatjen sátjia. Kixin tí kuítekáván Dios la kuítóha jína —ichro ch'án.

Itsi tí kjuachaxién Dios

(Mt. 24.23-28, 36-41)

²⁰ A ntá tí sín fariseo kjuanchankíhi sín tí ch'in Jesús kixin nkesá tsi tí kjuachaxín kuénte Dios. A ntá jehe ch'án kjuátéhe ch'án ntáchro ch'án kixin:

—A ntá tí tsi kjuachaxín kuénte Dios la me tíha ijnko nkehe xitjahya ts'ikon chojni.

²¹ Xitjahya tsontáchrórá kixin: “Ntihi tjen,” o “Ntiha tjen”; kixin tí kjuachaxín kuénte Dios itjen jnkosiné tí tjejorá —ichro ch'án.

²² Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkojín yaon chrók'uikonrá tí Xjeen Dios K'óna Chojni, ntá í ts'ikonhyará ch'án.

²³ Tsontáchro sín kixin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín.

²⁴ Kíxin éxi ts'ikonrá tsjonkíxin ts'inkaséyanxín kuenté nkajní mé xikaha tsõnhen tió itsi tí Xjeen Dios K'óna Chojni.

²⁵ T'ichjánxin senó tsjasóte ch'án nchónhya la ko tí sín siín jie tsitekakuenhya sín ch'án.

²⁶ Éxi kónhen tí yaon kjuák'e ch'ín Noé mé xikaha tsõnhen tió tsokjan tí Xjeen Dios K'óna Chojni.

²⁷ K'uékjine sín la ko k'uék'i sín la ko kótehe tí xjeen sín. A ntá xrínghya kui tí yaon k'uixenhen ch'ín Noé tí ntabárcõ ntá k'uániá chrin, a ntá tí sín kuítóhe ntója la kaín sín k'uitjáyán sín.*

²⁸ Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enka sín nontee sín la ko k'uékjich'éna sín nchia.

²⁹ A ntá tí yaon k'uaxrjexín ch'ín Lot tí chjasin Sodoma, na mé tíha k'uénxín kaín xín tí sín ntiha.†

³⁰ Mé xikaha tsõnhen tí yaon itsi tí Xjeen Dios K'óna Chojni.

³¹ A ntá tí yaon i tí tjejó jnkojín nkexro chrítaón nchia tjejó'ok'éhe sín, a ntá ichrén nkehe chóna sín kuítóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókui sín ókjé. Kjaxin xikaha jnkojín chojni tjejó sín nontee sín la í chrókjanhya sín ntõe sín.

³² Xráxinkáonrá nkehe kónhen ichjién ch'ín Lot.‡

³³ Tí nkexro tjinkaon kixin kohya nkehe chrókónhen na mé ts'itjáyán. A ntá tí nkexro chrókjuinçek'itjáyánxín asén kixin chróchronka itén Dios la mé tsaá.

³⁴ A ntá tsontáxrjan kixin tí tie a jnkokoá ts'ejójuá yaá chojni la ijnko la sátsji la ko tí í jnko la tsitõhe.

³⁵ Yaá chojni chjin its'o sín jnkokoá, la ijnko la sátsji la ko ijnko la tsitõhe.

³⁶ Yaá chojni ts'ejóch'e sín xrá nonte, la ijnko la sátsji a ntá ijnko la tsitõhe —ichro ch'án.

³⁷ Ntá kuínhin sín tíha ntá kjuanchankíhi sín ch'án kixin:

—¿Xá nketi tsõnhen tíha, Ìnchéni? —ichro sín.

A ntá jehe ch'án kjuátõhe ch'án ntáchro ch'án kixin:

—Tí tjen tí cuerpo kuénte chojni tsík'en la mé ntiha tsõjnkotsé tí kontexjuen —ichro ch'án.

18

Ch'ín Jesús kjuíncheyóexin ch'án éxi ijnko tjan k'án la ko ijnko ch'ín juez

¹ A ntá ch'ín Jesús kjuíncheyóexin ch'án kjuakõxín ch'án kixin jnkochríxín chrónixjehe chojni Dios la ko chrókóxrjéhya sín.

² Ntá ntáche ch'án sín kixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró.

³ Kjaxin chjasin ntiha kjuák'e ijnko tjan k'án, jnkoyaxón sákjuítsjehe tjan tí ch'ín juez kjuanchia tjan jie ntáchro tjan kixin chrókuitõexín kixin ijnko chojni nínkakonhen tjan ntiha.

* 17:27 17.26–27 Génesis 6.5–7.24 † 17:29 17.28–29 Génesis 18.20–19.25 ‡ 17:32 Génesis 19.26

4 Nchónhya veces tjitsjehe tjan tí ch'ín juez la chrohya ch'án chrókjuinchekitóexín ch'án. Ntá chr'éxin kjuenkayáxin ch'án ntáchro ch'án kixin: “Kjonté í tsjikosáyàhya Dios la ko ninkexró tsjikosáyàhya

5 a ntá tí tjan k'án jnkoyaxón tjanchia tjan jie, la tsjnkitsa tjan tsitóexín tí jie tjanchia tjan kixin í jnkoyaxónhya itsi tjan tsochronòda tjan kixin ó kjuixin kónkavan jie”, ichro ch'án.

6 Ntá ntáchro Ìnchéni kixin:

—Mé xikaha ichro tí ch'ín juez jínahya.

7 ¿Xá chrókjuinkitsahya Dios tí sín kjueya ch'án tí chróchronóhe sín ch'án nchakotjin la ko tie? ¿Á tjokahya chrókjuatehe chrókjuinkitsa sín ch'án?

8 Ntáxrjan kixin kjá tjoka chrókjuinkitsa sín ch'án. A ntá tió itsi tí Xjeen Dios K'óna Chojni, ¿á naxá chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxi ijnko ch'ín fariseo la ko ijnko ch'ín nchekjènkj

9 Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín kixin imá jina sín a ntá tí í so sín la náhi, ichro sín. Ntá ntáchro ch'án kixin:

10 —Iyó sín ntoa sákjuj nkaxenhen njnko kixin tsonixjehe sín Dios. Ijnko la fariseo la ko ijnko la ch'ín nchekjènkj.

11 A ntá tí ch'ín fariseo tjexín ch'án toté ch'án nixjehe ch'án Dios ntáchro ch'án kixin: “It'éni Dios, kjuasáya tjahá kixin jeheni la chóntahyani jie éxi tí sín í so kixin teé sín la ko ch'iyehé kichó sín la ko ch'iyehé sín chojni chjin. Kjáxin jeheni la jehya éxi tí ch'ín nchekjènkj tjinhin.

12 Jeheni la nehyaní iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án.

13 A ntá tí ch'ín nchekjènkj la imá kjín kuítóhe ch'án kóxakonhen ch'án chrókonta ch'án nkajni la mé chjéhe ch'án ntakuin ch'án ntáchro ch'án kixin: “It'éni Dios tikonóehéni tí jeheni kixin nchónhya jie chóntani”, ichro ch'án.

14 Tjonkará kixin tí ch'ín nchekjènkj tió kjan ch'án ntóe ch'án la Dios kujkonóhe tí jehe ch'án la kjuinhin ch'án tí jie chóna ch'án, a ntá tí ch'ín fariseo la náhi. Kixin kaín chojni nchehnkehe asén kixin imá jina tí jehe sín la mé imá tsóntsi. A ntá tí chojni nchehnkehya asén la imá ts'ánkí tí kjuaxrexinkaon kuénte sín.

*Ch'ín Jesús kjuíncheyaon ch'án chánjan
(Mt. 19.13-15; Mr. 10.13-16)*

15 Kjaxin kjuikao sín chánjan ntsíntsi tí tjen ch'ín Jesús kixin chrókjuincheyaon ch'án xjan. Kjánchó tió k'uikon tí sín k'uájiko ch'án la í kjuanjonhya sín kjuachaxin kixin tsóchinako sín xjan.

16 A ntá ch'ín Jesús k'uíyehé ch'án sín ntáchro ch'án kixin:

—Tjtoherá chánjan méhe xrakoa tí tjèn janhan la t'ínkakuènhyará xjan kixin tí sín kuénte kjuachaxin kuénte Dios la mé tóyóhe tí jehe xjan.

17 Ntá chaxin ntáxrjan kixin tí nkexro ts'ónahya éxi ijnko chánjan xitjahya ts'ejó sín tí ts'etóan Dios tí kjuachaxin kuénte ch'án.

*Ijnko ch'ín ntasoá ríco kjuínixjehe ch'án tí ch'ín Jesús
(Mt. 19.16-30; Mr. 10.17-31)*

18 Ijnko ch'ín t'etóan kuénte njnko kjuanchankíhi ch'án tí ch'ín Jesús kixin:

—Jaha la ijnko maestro jína la, ¿nkehe naᵗa t'itjáyan chrókjuich'eni kixin chróchóntani kjuachón jnkochrín? —ichro ch'án.

¹⁹ Ntá kjuátehe ch'ín Jesús ntáchro ch'án kixin:

—¿Nkeuènte ntáchrua kixin jína tí janhan? Jnkokoá nkexro la mé jína la tíha mé Dios.

²⁰ Jaha la ó noha nkehe tí k'ueᵗoan Dios kixin chrókjuacheéhya kíchuará, la ko chrók'oyánhya chojni, la ko chrókueehya, la ko chróntáchrohya ninkehó nkehe chaxínhya kuènte ókjé chojni, la ko chrókjuikosáyehé it'á la ko iná —ichro ch'án.

²¹ A ntá jehe ch'án kjuátehe ch'án ntáchro ch'án kixin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kixin:

—A ntá jnkokoá nkehe naᵗa t'itjáyan chrókjuich'e, chrókjuinchekjia kaín nkehe chonta la chróchjehé tí chichaon tí sín nòa. A ntá tí nkehe tjete la tsochonta nkaya nkajíní. A ntá tíó tsjixin sijnchekitonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xíkaha la kóxakonhen ch'án kixin imá itsjé nkehe chóna ch'án.

²⁴ Tíó k'uíkón ch'ín Jesús kixin kóxakonhen tí ch'ín a la ntá ntáchro ch'án kixin:

—Imá xrá kixin tí chojni chóna itsjé nkehe chrók'uixenhen sín tí tjen Dios t'et'oan.

²⁵ Antsí xrahya chrók'uaatsínka ijnko kocamello ijnko tjar'i ntachica tjexrja, a ntá antsí má xrá kixin ijnko chojni chóna itsjé nkehe chrókjuak'e tí t'et'oan Dios —ichro ch'án.

²⁶ A ntá kuínhin sín kixin xíkaha ntáchro ch'án ntá ntáchro sín kixin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kixin:

—Tí nkehe tsjachahya chojni chrókjuinchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kixin:

—Ínchéni, jeheni la ó kuítóheni kaín nkehe chóntani kixin tsochréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Ntá chaxín tsotjonkará kixin jnkójnra chrókjuítoherá ntoa, la o chrókjuítoherá it'á la ko iná, la o chrókjuítoherá kíchuará, la o chrókjuítoherá ichjiánra, la o chrókjuítoherá xjaanra kixin chrókjuich'erá xrá kuènte Dios

³⁰ la antsí nkehe ts'ayéherá ntihi chjasintajni la ko tí chr'éxin la ts'ayéherá kjuachón jnkochrín —ichro ch'án.

Ch'ín Jesús chrónka ch'án inaá kixin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uíyehé ch'án jehó tí teyo sín k'uájiko ch'án ntá chrónka ch'án kixin:

—Ijie sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni.

³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhin sín ch'án la ko ntate sín tsíkíte sín ch'án.

³³ Tsjate sín ch'án, a ntá chr'éxin la ts'óyan sín ch'án. A ntá nixin yaon tsoxechón ch'án —ichro ch'án.

³⁴ A ntá jehe sín la ninkehó kienxínhya sín tí nkehe nixja ch'án kixin tíha ijnko nkehe naᵗa tsjachahya sín chrókienxín sín.

Ch'in Jesús kjuínchekitohe ch'án jina ijnko chojni t'ikonhya chjasin Jericó
(Mt. 20.29-34; Mr. 10.46-52)

³⁵ A ntá ch'in Jesús tió chjina chrók'uixenhen ch'án chjasin Jericó ntá ntiha chrínta ntja tjetjaxin ijnko ch'in t'ikonhya tjanchak'á ch'án.

³⁶ Ntá xrinahya kuínhin tí ch'in t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

³⁷ Ntá chénka sín ch'án kixin ch'in Jesús tsíkixin chjasin Nazaret ts'atsínka ch'án ntiha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'in David, tikonóhéni —ichro ch'án.

³⁹ A ntá tí sín tsitaón ntja la k'uetuénhen sín ch'án kixin tsotáni ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'in David, tikonóhéni —ichro ch'án.

⁴⁰ A ntá ch'in Jesús ntá ntahó kjuák'echónhen ch'án ntá k'uetóan ch'án kixin tsjikakjín sín tí ch'in a. Ntá tió kuikao sín ch'án tí chjinaxón tjen ch'in Jesús ntá kjuanchankí ch'in Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátéhe tí ch'in t'ikonhya ntáchro ch'án kixin:

—Jaha Ìnchéni, tjinkaonni chrókjuínchek'ikuanni —ichro ch'án.

⁴² Ntá ntáchro ch'in Jesús kixin:

—Ó ts'ikuan. Ó kuítóha jina kixin kuítekávan tí janhan —ichro ch'án.

⁴³ Ntá tuénxín k'uíkon tí ch'in k'uék'ikonhya, a ntá jehe ch'án chréhe ch'án tí ch'in Jesús la ko kjuanchehe ch'án kjuasáyé Dios. La ko kaín tí sín k'uíkon kixin xíkaha kónhen kjuanchehe sín kjuasáyé Dios.

19

Ch'in Jesús la ko ch'in Zaqueo

¹ A ntá ch'in Jesús k'uixenhen ch'án chjasin Jericó la ntá k'uátsínka ch'án tí chjasin a.

² A ntá ntiha tjen ijnko chojni ríco it'in ch'án Zaqueo, t'etuénhen ch'án tí sín nchekjènkí.

³ Tjinkaon ch'án chrókjuatsóan ch'án nkexro tí ch'in Jesús, kjánchó nchónhya chojni síin la xitjahya t'ikon ch'án kixin intsí ch'án.

⁴ Ntá kuinká ch'án kuítaón ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'in Jesús.

⁵ A ntá tió k'uatsínka ch'in Jesús ntiha konta ch'án tí nta ntáchro ch'án kixin: —Zaqueo, tjoka tjasinkajján kixin ntóa ntahó tsitóna jie —ichro ch'án.

⁶ Ntá ch'in Zaqueo la tjoka k'uínkajin ch'án kóchéhe ch'án.

⁷ Ntá kaín sín k'uíkon sín xíkaha ntá kjuankíxin sín tjonta sín tí ch'in Jesús, ntáchro sín kixin ntóe ijnko chojni chóna nchónhya jie tsitóhe ch'án.

⁸ Ntá ch'in Zaqueo kjuák'exín toté ch'án ntáche ch'án Ìnchéni kixin:

—Jaha Ìnchéni, chrókónoha kixin tsjánjuan jnkosiné tí nkehe chonta sintakítõnhan tí sín nõa. A ntá tí jnkójín nkexro kjuít'áyaha kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'in Jesús kixin:

—A ntá jie la tsaá chojni tí nchia i kixin tí ch'in a mé k'uaxrjeníxian ch'in Abraham.

10 **A** ntá tí Xjeen Dios K'óna Chojni mé kuikjeyá la ko sinchekaá tí chojni chónṭa jje.

Ch'ín Jesús kjuíncheyóexin ch'án éxí ite chichaon imá tjete sínkí

11 **A** ntá tí chojni síin ntiha nachrohe tjejótnhin sín nkeri tjechro ch'ín Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuènte Dios la ách'e ó tuénxín tsi, ichro sín.

12 **A** ntá ntáchro ch'án kixin:

—Itjen ijnko nkexro tsík'axrjeníxin ijnko nkexro imá k'uék'etoan. Ntá sákjuí ch'án ókjé nacióon kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá.

13 **A** ntá tió chjina sátsji ch'án ntá k'uíyehé ch'án ite tí sín ch'ehe ch'án xra ntá chjéhe ch'án jnkojnko tí jehe sín jnkojnko chichaon imá tjete sínkí. Ntá k'uetóan ch'án kixin: “Tsjan kixinrá ch'ekoará xra tí chichaon hasta tí tsokjanjian”, ichro ch'án.

14 **A** ntá tí sín chjasén ch'án ntiha imá kónínkakanhen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín síin ntiha kixin tjinkakonhya sín tí nkexro a ts'óna rey ts'etuennen sín.

15 Kjónté xikaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetóan ch'án xrakoa tí sín ch'ehe ch'án xra, na mé tí sín tsík'áyéhe tí chichaon, kixin tsoñohe ch'án nkehe tí xra kjuích'eko sín tí chichaon k'uáyéhe sín.

16 **A** ntá tí ch'ín xránkixixín kóchjina la ntáchro ch'án kixin: “Tí chichakóan la kjuachani ite chichaon inaá”, ichro ch'án.

17 **A** ntá kjuátehe tí ch'ín rey kixin: “Ó nchoxon tí xikaha jaha la ijnko chojni jina ch'e xra. Jina kjuich'e xra kjónté jehya xra jje ntá tsjánjuan kjuachaxin tsétoan ite chjasin”, ichro ch'án.

18 **A** ntá kóchjina tí ch'ín ijnko a inaá ntáchro ch'án kixin: “Tí chichakóan la kjuachani in'ó chichaon inaá”, ichro ch'án.

19 **A** ntá xikaha inaá kjuátehe tí ch'ín rey kixin: “Tsjánjuan kjuachaxin tsétoan in'ó chjasin”, ichro ch'án.

20 **A** ntá kóchjina tí ch'ín níxin ntáchro ch'án kixin: “Tí chichakóan la tjinhin. K'uánkintani panítóéni

21 kixin chrakonhanni kixin jaha la jiaha la tjinkávan tsákjá tí nkehe jehya jaha kjuaké la ko tsotja tí nkehe jehya jaha kuènkaxian”, ichro ch'án.

22 **A** ntá tí rey ntáchro ch'án kixin: “Jehya chojni jina ch'e xra jaha. Tí nkehe ntáchrúa tsjáncháxian jje. Jaha la ó noha kixin jiéna janhan tsákjaá tí nkehe kjuakéhya, ichrua, la ko tsotja tí nkehe kuènkahya.

23 **A** Ntá nkekuènte kixin chr'anhya tí chichaon ijnko banco chrókjuich'exin xra? **A** ntá tió kjan ntona la antsi tsjé chichaon chrók'uayáha tí chrókjuacha kichó chica”, ichro ch'án.

24 **A** ntá ntáche ch'án tí sín síin ntiha kixin: “Takítsjehérá ch'án tí chichaon tsík'áyéhe ch'án la ntá chjehérá tí ch'ín chónṭa ite chichaon”, ichro ch'án.

25 **A** ntá jehe sín ntáchro sín kixin: “¿Nkekuènte chrók'uáyéhe ch'án kixin ó chónṭa ch'án ite chichaon?” ichro sín.

26 **A** ntá tí ch'ín rey kjuátehe ch'án ntáchro ch'án kixin: “Kjónté jnkojín nkexro itsjé chónṭa la ts'áyéhe má. **A** ntá tí nkexro chónṭahya la kjónté tí ntsi chónṭa ch'án la ts'axrjehe ch'án.

27 **A** ntá tí sín nínkakonna sín tjínkakonhya sín kíxín ts'ónana rey la xrákoará sín ntihi ts'íkoxín kuᵛn ts'ochrínjinrá kja sín."

*Ch'in Jesús k'uixenhen ch'an chjasin Jerusalén
(Mt. 21.1-11; Mr. 11.1-11; Jn. 12.12-19)*

28 Tió kjuixin ntáchro ch'in Jesús tíhi ntá chr'in ch'an sátsji ch'an chjasin Jerusalén.

29 **A** ntá ó kjuíji chjinaxón tí chjasin Betfagé la ko chjasin Betania chjinaxón tí jna nchek'in sín Olivo, ntá k'ueᵛenhen ch'an iyó tí sín k'uájiko ch'an

30 ntáche ch'an sín kíxín:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naᵛa ninkexró tjiták'áhya va. Tjasintankehéra va la tsjúkuanará va ntihi.

31 **A** ntá tí jnkojín nkexro tsjančankíhará nkekuènte tjasintankehéra va la ntácherá sín kíxín: "Inchéni ts'ichjánxinhin va", tsixrorá.

32 **A** ntá tí sín k'uituenhen sákjuí sín k'uitja sín éxi ntáchro ch'an.

33 **A** ntá tió tjejójtjasintankehe sín va la ntá tí sín inché va kjuanchankíhi sín kíxín:

—¿Nkekuènte tjasintankehéra tí kolócho? —ichro sín.

34 **A** ntá jehe sín kjuátehe sín kíxín:

—Inchéni ts'ichjánxinhin va —ichro sín.

35 Ntá sákjuíkohe sín va tí ch'in Jesús tí kolócho a.

36 **A** ntá tinkákji tí kolócho tjejkjen ch'an la tinkák'ikjínxín sín tí iké sín ntja kíxín nátaón tí ka ts'atsínka tí kolocho tjejkjen ch'an.

37 Ntá tió kjujijichjina sín tí chjinaxón tí t'inkajinxín chojni tí jna Olivo, a ntá kaín tí sín kuítekaon tí jehe ch'an chréhe sín kjuankíxín sín itsen nixja sín chéhe sín kjuanchehe sín kjuasáyé Dios kíxín kaín tí kjuaxroan k'uikoxín kon sín.

38 Ntá ntáchro sín kíxín:

—Jina tí nkexro Rey kjujixín kjuachaxin ihnjé Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

39 **A** ntá iso tí sín fariseo tjejóyákan sín í so chojni tjejónchexroan sín ntiha ntáchro sín kíxín:

—Maestro, téuēnhén tí sín chréhe tí jaha kíxín tsotáni sín —ichro sín.

40 **A** ntá ch'in Jesús kjuátehe ch'an ntáche ch'an sín kíxín:

—**A** ntá tí sín i tsotáni sín la ixró tsotsje —ichro ch'an.

41 **A** ntá tió kjujijichjina ch'an chjasin Jerusalén ntá k'uikon ch'an tí chjasin la ntá tsjánka ch'an kíxín kuítekakonhya sín

42 ntáchro ch'an kíxín:

—Chrókuiénxinrá la ko chrókónohará nkexrí chrók'uayèxinrá tí kjuaxróxin, kjánchó jahará kuítekakonhyará. **A** ntá ó kjuixin k'uatásínka tí kjuaxróxin chrók'uikonrá la xitjahya ts'ikonrá jie.

43 **A** ntá tsi iso yaon jínahya itsi tí sín nínkakonhanrá la sich'éna sín ijnko tjat'o ts'ántatjen tí chjasin tjejorá ntihi ts'inkákonhen kíxín xitjahya ts'axrjéxinrá chjasin ntihi kíxín nkuixín ts'ejó sín ts'inkákonhanrá sín

44 ntá ts'óxika sín kaín tí tjat'o siin ntihi la ko ts'óyán sín kaín tí chojni siin la ko tsítøehya sín kíxín ninkehó xro naᵛa ts'ejójen kíchó, kíxín jahará kjuátsoanhyará kíxín kuitsjehe Dios tí chjasin tjejorá ntihi.

Ch'ín Jesús kjuínchetjóá ch'án nkaxenhen nínko

(Mt. 21.12-17; Mr. 11.15-19; Jn. 2.13-22)

⁴⁵ A ntá ch'ín Jesús k'uixenhen ch'án tí nínko jíé, a ntá kjuankíxin ch'án kuakitsje ch'án tí sín nchekji nkehe la ko tí sín t'ena nkehe ntiha.

⁴⁶ Ntá ntáchro ch'án kixin:

—A ntá ntáchro xroon itén Dios chrónka kixin: “Tí ntóna i mé it'in nchia tsonixjanaxián chojni”,* ichro. A ntá jahará tí nchia i tsíkijch'énará itjuéé xíchee —ichro ch'án.

⁴⁷ A ntá tí nínko ntiha kjuák'e ch'ín Jesús kjuako ch'án kaín yaon. A ntá tí sín nchat'á t'etqan la ko tí maestro tjako tí ley la ko kjaxin tí sín t'etqan tí chjasin ntiha kjuéyá sín nkexrí chrók'óyán sín ch'án.

⁴⁸ Kjánchó k'uitjahya sín nkexrí chrók'óyán sín ch'án kixin kaín chojni tjejótinhin tí nkehe tjechronka ch'án.

20

Tí kjuachaxin chóna ch'ín Jesús

(Mt. 21.23-27; Mr. 11.27-33)

¹ A ntá ijnko yaon kjuák'e ch'ín Jesús tí nínko ntiha kjuáqohé ch'án chojni tí tan jina tsaáxin sín. A ntá kjui tí sín nchat'á t'etqan la ko tí sín maestro tjako tí ley la ko kjaxin tí sín t'etqan kuènte nínko.

² Ntá kjuanchankíhi sín ch'án kixin:

—Chronka nkehe tí kjuachaxin chonta kixin xíkaha ch'e. ¿Nkexro kjuanjón tí kjuachaxin a? —ichro sín.

³ Ntá kjuátehe ch'ín Jesús ntáchro ch'án kixin:

—Kjaxin janhan tsjánchánkíhará ijnko nkehe síná nkexrí tsjateherá.

⁴ ¿A ntá nkexro k'uetuēnhen tí ch'ín Juan kixin tsíkíte ch'án chojni? ¿Á Dios ní o chojni ó? —ichro ch'án.

⁵ Ntá kjuankíxin sín tjo sín kichó sín ntáchro sín kixin:

—¿Nkehe chrókjuateheni? A ntá tí tsontáchroni kixin Dios tsíchr'án tí ch'ín Juan la ntá tsjanchankí ch'án kixin nkekuènte kuítekakuenhyani ch'án.

⁶ A ntá tí tsontáchroni kixin chojni ó k'uetuēnhen sín ch'án la ntá kaín chojni tsonínkaon sín la ixrō ts'óyáxinni sín kixin tjenkayáxin sín kixin ch'ín Juan chaxín k'uékjako ch'án itén Dios —mé xíkaha ikjo sín.

⁷ Ntá kjuátehe sín kixin noehya sín nkexro tsíchr'án tí ch'ín Juan.

⁸ Ntá ntáchro ch'ín Jesús kixin:

—Kjaxin janhan tsoxrjankahya nkexro kjuanjón kjuachaxin tjet'á tíhi —ichro ch'án.

Ch'ín Jesús kjuíncheyóexin ch'án éxi tí sín ch'ehya xrā jína

(Mt. 21.33-44; Mr. 12.1-11)

⁹ Ntá tuénxín kjuankíxin ch'ín Jesús nixjehé ch'án chojni kjuíncheyóexin ch'án ntáchro ch'án kixin:

—Kjuák'e ijnko chojni k'uēnkaxin ch'án nta to uva tí nontēe ch'án, a ntá chr'éxin kjuínchekjen ch'án tí iso tí sín ch'e xrā. A ntá kjuixin ntá sákjuí ch'án imá sé.

¹⁰ A ntá kui tí yaon tsakjinjin sín to uva. Ntá k'uetuēnhen ch'án ijnko nkexro ch'ehe ch'án xrā kixin tsjikjanchehe ch'án tí sín ch'e xrā nontēe ch'án kixin tsjanjón sín tí to tónhen ch'án tocar. A ntá jehe sín kjuate sín tí ch'ín a la ntá k'uinkité sín ch'án la ninkehó tsíchjéhya sín ch'án.

* 19:46 Isaías 56.7

11 **A** ntá tí ch'ín nontee ichr'án ch'án í jnko nkexro ch'ehe ch'án xra. **A** ntá kjaxin k'uántaxínhin sín ch'án la ko kjuate sín ch'án la ko kjaxin ninkehó tsíchjéhya sín ch'án inaá.

12 **A** ntá tí ch'ín nontee ichr'án ch'án í jnko nkexro. **A** ntá tí sín ch'e xra kjaxin xikahó tsíkijich'ehe sín inaá, tsík'inkité sín ch'án.

13 **N**ta tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjana imá tjuaha. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án.

14 **A** ntá kjónté kui ch'án la k'uikon tí sín ch'e xra ntá chénka sín kichó sín kixin: “Tí ch'ín í mé ts'áyéhe ch'án kaín nkehe kuente it'é ch'án. Ts'óyánni ch'án kixin jeheni tsitqekoni kaín tí nkehe a,” ichro sín.

15 **A** ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—**A** ntá tí inché nonte la, ¿nkehe chrókjuich'e ch'án kixin xikaha kónhen tí xjeen ch'án?

16 Chrókui ch'án chrókjuinchekitjáyán ch'án tí sín ch'e xra kixin xikaha kjuich'e sín k'óyán sín tí xjeen ch'án, **a** ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

17 **A** ntá ch'ín Jesús komá ch'án tí jehe sín ntáchro ch'án kixin:

—¿**A** ntá nkehe t'axrjexín tí nkehe ntáchro xroon itén Dios ntáchro xikihí?:

Tí xro náxrxjónhya kútoenta tí sín ch'éna tjat'o, **a** ntá mé jie k'óna tí xro tjetóan.*

18 **A** ntá jnkojín chojni tsjitsínka chrítaón tí xro í tsokuen ch'án. **A** ntá ts'ánótjen tí xro í tsoxratja ijnko chojni la tsokuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

19 **A** ntá tí nchat'a t'etoan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni síin.

20 **N**ta k'uętuęnhen sín chojni tsotsáyehe sín ch'án, éxí chojni chóna kjuasáyé ch'án chrókjo sín ch'án jnkojína kixin ách'e ichrén nkehe ntoáhya tsonixja ch'án. **A** ntá jína tsjanxaxín sín jie tsjikaán sín ch'án tí tjen tí ch'ín gobernador.

21 Mé xikaha kjuanchankíhi sín ch'án nkehe, **a** ntá ntáchro sín kixin:

—Maestro, ó noheni kixin kaín nkehe ntáchrúa la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios.

22 **A** ntá jie la chronka, ¿á jína chrókjuenkeheni tí gobierno romano o náhí? —ichro sín.

23 **A** ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuente chrokjuachaxínrání?

24 Tjákonará ijnko tí chichaon méhe. ¿Nkexro tí tsík'axrjexín tjenkání tí chichaon í la ko nkexro ihnié chóna méhe? —ichro ch'án.

Nta kjuátehe sín kixin:

—Tí ch'ín t'etoan mé tjenkání ch'án —ichro sín.

* 20:17 Salmo 118.22

25 Ntá ntáchro ch'án kixin:

—Chróchjehérá tí ch'ín gobierno t'etōan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

26 A ntá ninkehó kjuachahya sín kjuachaxin sín ch'án tí nkehe ntáchro ch'án nkayakon chojni chjasin ntíha. A ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni
(Mt.22.23-33; Mr.12.18-27)

27 A ntá chr'éxin iso tí sín saduceo sákjuitsjehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

28 —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitōhe ichjién, tí chóntahya sín xjeen, la t'ichjánxin kixin kichó tí ch'ín tsík'en tsotēhe tí tjan k'án kixin tsochónta sín xjeen sín éxí xjeen tí ch'ín saō tsík'en ts'ikon sín.†

29 A ntá k'uéjō sín yato sín jnkokoá kichó sín. A ntá tí ch'ín saō la kótēhe ch'án. Ntá k'uén ch'án la chóntahya ch'án ninkehó xjeen ch'án.

30 A ntá tí ch'ín yóxin kichó ch'án la kótēhe tí tjan k'án. Kjaxin k'uén ch'án chóntahya sín xjeen sín.

31 A ntá tí ch'ín níxin xikótēhe jehe tjan inaá. Kjaxin xíkaha kayatoé sín. Kaín sín k'uén sín ninkehó xjeen sín chóntahya sín.

32 A ntá kjuixixin kjaxin jehe tjan ik'uén tjan.

33 A ntá tió tsoxechón chojni tsík'en, ¿ntá nkexro tí jehe sín ts'óna ichjién tí jehe tjan kixin yato tí jehe sín kótēhe tjan? —ichro sín.

34 Ntá ch'ín Jesús kjuátehe ch'án ntáchro ch'án kixin:

—Ntíhi chjasintajni tí chojni ntoa la ko tí chojni chjin tótēhe sín takja kichó sín.

35 A ntá tí sín kuítekaon sín tí janhan ntá tsjacha sín tsoxechón sín inaá la í tsotēheya sín la koí tsoteehya tí xjeen sín.

36 Kixin tí sín a la xitjahya ts'en kixin éxí tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín.

37 Kjaxin ch'ín Moisés tió chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡

38 Tí Dios í la Jehya tinkáchónki tí sín tsík'en. Náhí. Tí Dios í la tinkáchónki tí sín tjejóhón, la Dios la t'íkon ch'án kixin kaín chojni la síhón —ichro ch'án.

39 A ntá iso tí sín tjako tí ley la ntáchro sín kixin:

—Jína kjuàkua la ko jína ntáchrúa, Maestro— ichro sín.

40 A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?
(Mt. 22.41-46; Mr. 12.35-37)

41 Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjenixin tí ch'ín David?

42 A ntá ch'ín David ikjin ch'án tí libro Salmos la ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntíhó tsétōan

† 20:28 Deuteronomio 25.5 ‡ 20:37 Éxodo 3.6

⁴³ tsjixinjian kaín xín tí sín nínkakonhan la tsjachahya sin ts'etəan sín kixin jahvá mé tsétəan.”[§]

⁴⁴ ¿Xá nkexrí kixin Cristo chrók'óna it'é David, kixin jehe David kuik̄itexín ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jìe tí sín tjako tí ley
(Mt. 23.1-36; Mr. 12.38-40; Lc.11.37-54)

⁴⁵ Kaín chojni tjejótinhin sín nixjehē ch'ín Jesús tí sín k'uájiko ch'án ntáchro ch'án kixin:

⁴⁶ —Chrókóxakonhanrá chrókuankehyará tí sín maestro tjako tí ley. Tóxrjínhin sín chrók'uinkáya sín ka kínjin la ko tjinkaon sín kixin kaín chojni chrókjuikosáyehe sín tsoxeta sín ntašin la ko tjejá sín silla antsí náxrjón chrók'uejóyá sín nkaxenhen n̄nko la ko tjejá sín kixin jina chrók'uejó sín tí sátsji sín kia,

⁴⁷ la ko kjaxin takitsjehe sín ntəe tí chojni chjin k'án. A ntá kjuixin kjuich'iyehē sín chojni ntá náxrjón nixjehē sín Dios. A ntá jehe sín antsí má sinchekjasóte sín Dios kixin xikaha kjuich'ia sín.

21

Tí chichaon kjuanjon ijnko tjan k'án nòa
(Mr. 12.41-44)

¹ A ntá tí nkaxenhen n̄nko ch'ín Jesús k'uúikon ch'án kixin tí sín ricó kjuik̄əo sín chichaon chr'áxēnen sín tí ntacajón tjetóxroyéya chichaon.

² A ntá kjaxin k'uúikon ch'án ikjui ijnko tjan k'án nòa la ntá jehe tjan chr'áxēnen tjan yaá chichaon ntsintsí.

³ Ntá ntáchro ch'ín Jesús kixin:

—La chaxín ntáxrjan kixin tí tjan k'án i nòa tjan kjánchó antsí tjehe sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhi.

⁴ Kixin kaín tí chichaon kjuanjon sín la chichaon síxēhe sín. A ntá jehe tjan kjónté nòa tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án kixin tí n̄nko ts'itjáyan
(Mt. 24.1-2; Mr. 13.1-2)

⁵ Iso sín tjejótjo sín kixin nkexrí tsjehe n̄nko tsík'óna xro náxrjón la ko í so nkehe tsíkjanjon chojni éxi ijnko nkehe chjéhe sín Dios. A ntá ch'ín Jesús ntáchro ch'án kixin:

⁶ —A ntá tsi ijnko yaon tí n̄nko tjejokomará ntíhi la tsoxíka. A ntá tsokohya ninkehó xro ts'ejókjen kichó inaá —ichro ch'án.

Tí nkehe tsonhen tí naxq ts'itjáyanhya chjasintajni
(Mt. 24.3-28; Mr. 13.3-23)

⁷ Ntá kjuanchankíhi sín ch'án kixin:

—Maestro, ¿nkesá tsonhen tíha? ¿Nkexrí tsonhen tí tsonoxínni tí nkehe tsonhen? —ichro sín.

⁸ Ntá ntáchro ch'ín Jesús kixin:

—Chrókóxakonhanrá t̄itəéhyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Ijie

mé tsoxiteyá tsɔnhen.” Kjónté xíkaha tsontácho sín la chrókuítekákuenhyará tí jehe sín.

⁹ A ntá tió tsinhínrá tsontácho chojni kixin ó sún kjuanínkaon tjanjonko kichó sín, kjónté xíkaha naxá chróchrakonhyará kixin kaín tíha t'ichjánxin ts'atsínka senó tí naxá tsjixixínhya ts'itjáyan chjasintajni —ichro ch'án.

¹⁰ Naxá tjechrónka ch'án ntácho ch'án kixin:

—Ijngo nación la tsjanjonko í jngo nación la ko ijngo chjasin tsjanjonko í jngo chjasin.

¹¹ Kjaxin imá tjan tsínki nonte la ko tsokjinta la ko tsóníhi chojni nchónhya chjasin, a ntá nkajni nchónhya kjuachakon jié ts'ixin ts'ikon chojni.

¹² Naxá ts'atsínkahya tíha la tsónínkakonhanrá sín tsotsérá sín sátsjikoará sín tí njnko tsjanchia sín jié la ko sátsjikoará sín ts'íkjarahá la ko sátsjikoará nkayakon tí sín rey la ko tí sín gobernador kixin tinkachónkirá njna.

¹³ A ntá tí yaon xíkaha tsɔnhen la ts'ixin kjuachaxin kixin tsochronkará nkexro tinkachónkirá.

¹⁴ Tóxakuanhyará senó nkexrí tsjateherá tí nkehe tsjanchankíhará sín

¹⁵ kixin janhan la tsánjuan kjuaxrexinkaon jina tsonixjará kixin nijnko tí sín nínkakonhanrá xitjahya tsontácho sín kixin ntoháya tí nkehe tsjateherá.

¹⁶ Kixin kjónté it'ará la ko kichuárá la ko tí sín kjéhyará la ko tí sín tjórá jina mé sintakjirá sín. Jehe sín ts'oyán sín jnkojínra.

¹⁷ Kaín chojni chjasintajni tsónínkakonhanrá sín kixin tinkachónkirá njna.

¹⁸ Kjánchó xíkaha la nijnko kaxihí chóna kjárá ts'itjáyanhya.

¹⁹ Tí tsjtoéhyará tinkachónkirá tí janhan la tsochontará kjuachón jnkochrín.

²⁰ A ntá tió ts'ikonrá kixin kuenté chjasin Jerusalén tsík'ántatjen sín soldado ntá tsoñoaxínra kixin í séhya ts'itjáyan tí chjasin a.

²¹ A ntá tí sún tjejó sún Judea la t'ichjánxin sátsjixín sún ntiha sátsji sún jna. A ntá tí sún sún chjasin Jerusalén kjaxin t'ichjánxin sátsjixín sún ntiha la ko tí sún tjejó sún nontee sín la í xitjahya tsokjan sún chjasin.

²² Kixin tí yaon ts'ixin tsjasóte chojni tsoxiteyá tsɔnhen kaín nkehe nixja xroon itén Dios.

²³ Nóa tí chojni chjin tjejóyá tí yaon a la ko tí sún chóna xjanhte naxá nchekakí sún. Kixin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha.

²⁴ Jnkojínra ts'énxinrá tí sún kjuanínkaon ntiha la ko jnkojínra tsotsérá sún sátsjikoará sún sinchekjasótiará kaín tí í so nación. A ntá tí sún jehya judío tsjixín ókjé nación tsinkátja sún chjasin Jerusalén kixin Dios mé tsjanjon kjuachaxin iso yaon xíkaha tsɔnhen. A ntá chr'éxin tsontácho ch'án kixin: “La í kohya nkehe tsɔnhen.”

*A ntá tió itsi ti Xjeen Dios K'óna Chojni
(Mt. 24.29-35, 42-44; Mr. 13.24-37)*

²⁵ A ntá tsoñoaxínra nkexrí tsɔnhen tí yaon la ko nkexrí tsɔnhen nitjó la ko nkexrí tsɔnhen konotsé. A ntá chjasintajni tsokohya kjuaxróxin kaín nación la ko tsochakon chojni kixin imá tsojna ntayaon.

²⁶ A ntá chojni la tsótnhín sún kixin tsochakon sún tsjenkayáxin sún nkehe tsɔnhen chjasintajni kixin kaín tí nkehe sínkáni nkajni la tsínki.

²⁷ Ntá xíkaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuí tsíkao ch'án tí kjuachaxin jié kuente nkaya nkajni.

²⁸ A ntá tió tsoxrankíxin tsoñhen kaín tíha chrókócháhará chrókjuaya kjará ntá chróntáchorá kixin kijnhya tjen tí nkexro tsaáxinrá —ichro ch'án.

²⁹ Kjaxin kjuíncheyóexin ch'án í jnko nkehe ntáchro ch'án kixin:

—Tjenkayáxinrá nkexrí siín tí nta t'óna to higo la ko kaín tí í so nta.

³⁰ Tió ts'ikonrá kixin tinkák'ayan kahnte tí nta, ntá tsoñoaxínrá kixin í séhya ts'ixenhen nchakuen chrin.

³¹ Mé kjaxin xikaha tió ts'ikonrá kixin kaín tí nkehe sítónhen, ntá tsoñoaxínrá kixin tí kjuachaxin kuènte Dios la ó chjino tjen.

³² Mé chaxín ntáxrjan kixin kaín tíhi tsoñhen senó naḡa t'enhya chojni tjejó jie.

³³ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³⁴ 'Chrókóxakonhanrá chrókuijóehyará kixin chrókjuichròerá kixin tí imá chrókjónterá la ko tí chrókókoanrá. Kixin tí xikaha la ntá titàya tsi tí yaon la chrók'uejochoénhyará.

³⁵ Na mé éxi ijnko trampa xrínahya ts'ikjehe mé xikaha itsi tí yaon a, la ko xikaha tsoñhen kaín chojni siín chjasintajni tí ts'ejóchóenhya sín.

³⁶ Méxra listo chrók'uejorá la ko chrónixjehérá Dios kaín yaon chronóehérá ch'án kixin tió tsi kaín tí kjuaxikaon xikaha la ntá tsjinkitsará ch'án tsaára kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'in Jesús kjuák'ekjakoḡin ch'án tí nñnko ntiha jnkojnko yaon, a ntá tie la sákjuí ch'án tí jnḡ nchek'in sín Olivo, la ntaha kuítóhe ch'án.

³⁸ A ntá kaín chojni kóchjina sín tí nñnko jnkojnko nchítjen kixin tsinhin sín tí nkehe tsochronka ch'án.

22

Imó kjuenkayáxin sín nkexrí tsotsé sín tí ch'in Jesús

(Mt. 26.1-5,14-16; Mr. 14.1-2, 10-11; Jn. 11.45-53)

¹ Ntá kuichjina tí yaon kia sine sín tí niotja tjikohya tí xroḡn t'ánkixin niotja na mé tí kia nchek'in sín pascua.

² Ntá tí nchať'á t'etḡan la ko tí sín maestro tjako tí ley kjuenkayáxin sín nkexrí chrók'óyán sín tí ch'in Jesús kixin chrakonhen sín tí chojni chjasin ntiha.

³ A ntá ch'in Tsochren k'uúixenhen asén ch'in Judas, mé kjaxin it'in ch'án Iscariote, mé jehe ch'án ijnko tí teyó tí sín k'uúájiko ch'in Jesús.

⁴ Tí ch'in a mé sákjuitsjehe tí sín nchať'á t'etḡan la ko tí sín t'etḡan kuènte nñnko, ikjo kichó sín kixin nkexrí tsjikaán sín tí ch'in Jesús.

⁵ Ntá jehe sín kóchéhe sín la ko ntáchro sín kixin tsjenkehe sín tí ch'in Judas.

⁶ Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'in Jesús tí kohya chojni.

Kjuixixín kjoneko sín tí ch'in Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroḡn t'ánkixin niotja, a ntá t'ichjánxin ts'óyan sín tí kolélo sine sín kuènte tí kia pascua.

⁸ A ntá ch'in Jesús k'uetuēhen ch'án tí ch'in Pedro la ko tí ch'in Juan kixin sátsji sín sincheyaxín sín tí nkehe sine sín kuènte tí kia pascua.

⁹ Ntá jehe sín kjuanchankíhi sín ch'án kixin:

—¿Nketí tjinkávan sincheyaxíinni? —ichro sín.

10 Ntá kjuátēhe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko tóa tjíá ntá. Chréhérá ch'án sátsjirá tí nchia ts'ixenhen ch'án.

11 Tsontácherá tí inché tí nchia kixin: “Ntáchro Maestro kixin: ¿Nketí tjen tí cuarto tsjánjuan kjuachaxin tsoyaxíxin sineko ch'án tí sín teyó xriko ch'án tí yaon pascua?” tsixrorá.

12 A ntá jehe ch'án tsjakohará ch'án ijnko cuarto jíé tí yóxin piso la ntiha síin nkehe t'ichjánxin, la ntaha sincheyaxíxinrá tí sineni tsonjín —ichro ch'án.

13 A ntá jehe sín sákjuí sín k'uitja sín kaín nkehe éxí tsíchronka ch'in Jesús. Ntá ntiha kjuíncheyaxíxin sín sine sín kuente pascua.

14 A ntá kui tí hora, a ntá ch'in Jesús la ko tí sín k'uájiko ch'án kjuíji sín ntiha k'uéjótjāxin sín tí tjen tí mesa.

15 Ntá ntáchro ch'in Jesús kixin:

—Imá tjinkavan kixin tsjasinni kia sinekianrá tí yaon pascua naxa ts'énhya janhan.

16 Ntáxrjan kixin sinehya janhan xikaha inaá tí naxa tsoxiteyáhya tíha tió tsi kjuachaxin kuente Dios —ichro ch'án.

17 Ntá kuákja ch'án tí nkehe tjíá inté to uva ntá chjéhe ch'án kjuasáya Dios ntá ntáchro ch'án kixin:

—Tákjára tíhi la its'irá kaín rá

18 kixin ntáxrjan kixin xik'ikianhyará tí inté to uva tí naxa tíhya tí kjuachaxin kuente Dios —ichro ch'án.

19 A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ō ch'án chjéhe ch'án tí jehe sín ntáchro ch'án kixin:

—Tíhi mé cuerpo kuéntana kixin ts'ényákonhanrá. Mé xikaha tsoxráxinkákonxínrá tí janhan —ichro ch'án.

20 Kjaxin xikaha kjuanjon ch'án tí nkehe tjíá inté to uva tió kjuixin kjóne sín la ntáchro ch'án kixin:

—Tí nkehe tjíá tí vaso chronkaxin tí nkehe nixin tsonhen tsoxiteyá kixin tí jnina ts'itjí tsotjuáxin tí ijíará.

21 Tí nkexro sinchekjina mé tjejian tí tjen mesa ntíhi.

22 Méxra tí Xjeen Dios K'óna Chojni its'en éxí k'uítuenhen; kjánchó nòà tí ch'in sinchekji ch'án kixin tsjasóte ch'án —ichro ch'án.

23 A ntá jehe sín kjuankixin sín tjanchankíhi kichó sín:

—¿Xá nkexro sinchekji ch'án? —ichro sín.

Ikoj sín kixin nkexro tí imá ts'etōan

24 A ntá jehe sín mé tjo sín kixin nkexro antsí ts'etōan.

25 A ntá ntáchro ch'in Jesús kixin:

—Tí sín reyes kuente tí naciones imá t'etōan sín. A ntá tí chojni mé ntáchro sín kixin tí sín t'etōan la mé chojni ch'e xra jina.

26 A ntá jahará xikahya chrókjuich'erá. Íchá jina tí nkexro imá t'etōan chrók'óna éxí tí nkexro antsí ntasoá chróchóxin chrók'uítuenhen, na mé tí nkexro t'etōan chrók'óna éxí ijnko nkexro ch'exón xra.

27 ¿A ntá nkexro tí antsí t'etōan, á tí nkexro lámō tjetjāxin tí tjen mesa ntá sine ch'án, o á antsí t'etōan tí nkexro kujíao tí nkehe sine ch'án? Náhi. Tí nkexro tjetjāxin tí tjen mesa mé antsí t'etōan ch'án. Mé xikaha janhan tjeñakjánrá éxí ijnko nkexro ch'exón xra tí janhan.

28 Jahará xráxin k'uéjontaxínrá k'uikonrá kaín nkehe náxrjónhya kónna.

²⁹ Méxra janhan tsjánjuan kjuachaxin tsétǝanrá éxí chjina T'aná tí tétǝan janhan

³⁰ kixin sinterá la ko its'irá tí tsjak'e mesa kuèntǝna tí tsétǝan janhan nkaya nkajní la ko tsétǝanrá s̄inchekitǝexínrá tí ijíé kaín tí sín k'uaxrjenixin tí teyó xjeen ch'ín Israel.

Ch'ín Jesús chrónka ch'án kixin ch'ín Pedro sinchemá kixin chónhya tí jehé ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ìnchéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxí noatrigó.

³² Kjánchó janhan xrjanóaha T'aná kixin jaha chrókuiǝéhya tí tinkachónkia tí janhan. A ntá jaha kjónté tsjásian jje, a ntá tsokjan inaá ts'itjáyannya tinkachónkia tí janhan ntá s̄inchechéhé kíchuará —ichro ch'án.

³³ A ntá ntáchro ch'ín Simón kixin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ A ntá kjuátéhe ch'ín Jesús ntáchro ch'án kixin:

—Pedro, ntáxrjan kixin ijie jaí naxá tsjehya kochíntǝa s̄inchemána iníya kixin chonhya tí janhan, tsixrua —ichro ch'án.

Ntá ó kuichjina tí hora xikaha tsǝnhen ch'án

³⁵ Ntá ch'ín Jesús kjuanchankíhi ch'án tí jehé sín kixin:

—Tió kuétuǝanhrá sákjuírá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tǝkatǝ na, ¿á naxá t'itjáyan ichrén nkehe ní? —ichro ch'án.

Ntá kjuátéhe tí jehé sín ntáchro sín kixin:

—Náhí. Ninkehó nkehe t'itjáyannya —ichro sín.

³⁶ Ntá ntáchro ch'án kixin:

—A ntá jie tí nkexro chóna kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chóntahya chica espada chrókjuinchejki ch'án tí ka t'inkáya ch'án kixin chrók'ueñaxín ch'án ijnko chica.

³⁷ Ntáxrjan kixin t'ichjánxin tsoxiteyá tsǝna éxí nixja xroon itén Dios ntáchro kixin: “Éxí yóhé ijnko chojni kjuasin jje mé xikaha ts'ikon sín ch'án.”* Mé xikaha kaín nkehe chrónka xroon itén Dios kixin tsǝna mé t'ichjánxin tsoxiteyá —ichro ch'án.

³⁸ A ntá jehé sín ntáchro sín kixin:

—Ìnchéni, ntihi tjejó yaá chica espada —ichro sín.

Ntá kjuátéhe ch'án kixin:

—Kjónté ó táhó la ó nchǝxon —ichro ch'án.

Ch'ín Jesús nixjeexín ch'án Dios tí Huerto Getsemani

(Mt. 26.36-46; Mr. 14.32-42)

³⁹ Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kixin xikaha kuènhen ch'án k'uékjich'e ch'án la koi tí sín k'uájiko ch'án tinkáchréhe sín.

⁴⁰ Ntá kjuíji sín ntiha ntá ntáchro ch'án kixin:

—Nixjehérá Dios kixin tsjinkitsa ch'án tí jahará kixin tsjásinhyará jje —ichro ch'án.

* 22:37 Isaías 53.12

41 Ntá ch'ín Jesús k'uaxrjenta ch'án tí jehe sín sákjuí ch'án ijnko k'jínxin éxí chrók'ue chojni xro. Ntá kjuák'exín toch'in ch'án k'ixin tsonixjehe ch'án Dios.

42 Ntá ntáchro ch'án k'ixin:

—It'éni, tí tjínkávan chrókjuínchekaáni kaín nkehe náxrxónhya chrók'uaitsínkani. K'jánchó jehya éxí tjínkaonni jeheni chrókónhenni. Náhí. Éxí tjínkávan jaha —ichro ch'án.

43 Ntá xrínghya k'uíkon ch'án itjen ijnko ángel tsíkixín nkaya nkajní k'ixin tsjínkítsa ch'án.

44 A ntá imá tóxakonhen ch'án, a ntá antsí fuerte nixjehe ch'án Dios, ntá k'uíxin ch'án ntáchjin éxí yóhe jní xíkaha k'uitji k'uánótjen nonte.

45 Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án k'ixin tjejójua tí jehe sín k'ixin kjuachahya sín imá t'ává sín.

46 A ntá ntáchro ch'án k'ixin:

—¿Nkekuènte tjejochrinrá? T'àyará. Nixjehérá Dios k'ixin tsjínkítsará ch'án k'ixin tsjachroehyará ch'ín Tsochren —ichro ch'án.

Itsé sín tí ch'ín Jesús

(Mt. 26.47-56; Mr. 14.43-50; Jn. 18.2-11)

47 A ntá ch'ín Jesús naxá tjenixja ch'án ntá xrínghya kui nchónhya chojni yámá ch'ína. Tí ch'ín it'ín Judas, ijnko tí teyo sín k'uájiko ch'ín Jesús, kuítaón ch'án ntá, ntá kóchjinehe ch'án tí ch'ín Jesús k'ixin sineko ch'án kochíto.

48 A ntá ntáchro ch'ín Jesús k'ixin:

—Judas, ¿á ijnko kochíto ó s'ínchekj'ixian tí Xjeen Dios K'óna Chojni? —ichro ch'án.

49 A ntá tí sín tjejóko ch'ín Jesús tió k'uíkon sín k'ixin xíkaha kónhen ntá kjuanchankíhi sín ch'án k'ixin:

—Ìnchéni, ¿á chrókuatéxinni sín chica espada? —ichro sín.

50 A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etōan, kóchrínjin ch'án ntatsjon ch'án ch'ina.

51 A ntá ntáchro ch'ín Jesús k'ixin:

—Táhó, t'itōhé, ó t'jen —ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekitōhe ch'án j'ina.

52 Ntá tuénxin ch'ín Jesús ntáche ch'án tí sín nchat'á t'etōan la ko tí sín t'etōan kuènte n'ínko la ko tí sín táda t'etōan mé tí sín tsiki sátsjiko sín ch'án ntáchro ch'án k'ixin:

—¿Nkekuènte k'uinkakoará chica espada la ko inta éxí chrótserá ijnko xíchee?

53 A ntá kaín yaon kjuak'é janhan k'uejóni kjuákoáxinrá tí n'ínko ntiha la ninkehó tsehyará tí janhan. A ntá jie mé tí hora kuèntará ntá kjuacha tí kjuachaxin kuènte sítíe —ichro ch'án.

Ch'ín Pedro kjuínchemá ch'án k'ixin chónhya ch'án tí ch'ín Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Ntá itsé sín tí ch'ín Jesús kjuínchenteto sín ch'án sákjuíko sín ch'án ntōe nchat'á t'etōan. A ntá ch'ín Pedro ik'jín tinkáchréhe ch'án.

55 A ntá tí ntásin ntiha kjuaka sín xrohi síxrohe sín. A ntá ch'ín Pedro kjaxin kjuák'entaxín ch'án tí tjejó sín ntiha.

56 **A** ntá ijnko tjachjin ch'e xra tió k'uikon tjan kixin koí ch'ín Pedro tjechjixrohe ch'án ntiha ntá komá tjan tí jehe ch'án ntá ntáchro tjan kixin:

—Kjaxin tí ch'ín i xriko tí ch'ín Jesús —ichro tjan.

57 Ntá ch'ín Pedro kjuínchemá ch'án ntáchro ch'án kixin:

—¿Nkekuènte xikaha ichrua jaha? Ni chonhya tí nkexro a —ichro ch'án.

58 **A** ntá antsíkoá chr'èxin ikui í jnko chojni k'uikon tí jehe ch'án ntá ntáchro kixin:

—Kjaxin jaha xríkoa tí nkexro a —ichro.

Ntá ch'ín Pedro ntáchro ch'án kixin:

—Náhi, janhya —ichro ch'án.

59 Ntá éxi ijnko hora chr'èxin ntá nixja í jnko ch'ín chénka tí í so sín kixin:

—Tí ch'ín i chaxin xriko tí ch'ín Jesús kixin kjaxin tsíkijixin ch'án estado Galilea —ichro ch'án.

60 Ntá ntáchro ch'ín Pedro kixin:

—Nonahya janhan nkehe tí ntáchrúa —ichro ch'án.

Ntá tuénxin naxa tjenixja ch'án ntá xrínahya ó tsje kochíntoa.

61 Ntá Ínchéni kuinkátjía ch'án komá ch'án tí ch'ín Pedro. Ntá ch'ín Pedro xraxinkaon ch'án kixin xikaha tsíchronka Ínchéni kixin: “Naxa tsotsjehya kochíntoa sijnchemána iníya.”†

62 Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús

(Mt. 26.67-68; Mr. 14.65)

63 Tí sín sákjuiko ch'ín Jesús kjuanoá sín ch'án la ko kjuate sín ch'án.

64 K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

65 La ko í so nkehe ntáchro sín k'uántaxínhin sín ch'án.

Ntá sákjuiko sín tí ch'ín Jesús nkayakon tí sín t'etōan

(Mt. 26.59-66; Mr. 14.55-64; Jn. 18.19-24)

66 **A** ntá kóyaon nchakotjin la kójnkotsé kaín tí sín táda t'etūenhen tí sín judío, la ko tí nchat'á t'etōan, la ko tí sín maestro tjako tí ley la sákjuiko sín tí ch'ín Jesús nkayakon tí sín imá t'etōan. Ntá ntiha kjuanchankíexín sín ch'án kixin:

67 —Ijie la chronka, zá jaha tí Cristo? —ichro sín.

Ntá jehe ch'án kjuátēhe ch'án kixin:

—Tí tsontáxrjan kixin chaxín janhan na tsitekákonhyará.

68 **A** ntá tí chrókjuánchánkíhará ichrén nkehe la chrókjuátēehyará la ko chrók'uatjántahyarána.

69 **A** ntá jie tí Xjeen Dios K'óna Chojni mé tsjak'etjajin tí tja chjina kuènte Dios chóna kaín xín kjuachaxin —ichro ch'án.

70 **A** ntá tuénxin kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátēhe ch'ín Jesús ntáchro ch'án kixin:

—Chaxín janhan xikaha ntáchrórá tí jahará —ichro ch'án.

71 Ntá kjo sín kichó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

† 22:61 Lucas 22.34

23

*Sákujuiko sín tí ch'ín Jesús nkayakon tí ch'ín Pilato**(Mt. 27.1-2, 11-14; Mr. 15.1-5; Jn. 18.28-38)*

¹ Ntá kaín sín k'uínkatjen sín ntá sákujuiko sín tí ch'ín Jesús nkayakon tí ch'ín Pilato.

² A ntá ntiha kjuankíxin sín t'eka sín jie tí jehe ch'án ntáchro sín kíxin:

—K'uitjani tí nkexro i tjachroe ch'án chojni nación kuènténi ntáchro ch'án kíxin chrókjuenkeehyani tí gobierno romano, la ko kjaxin ntáchro ch'án kíxin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kíxin:

—¿Á jaha tí Rey t'etuenhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kíxin:

—Chaxín xíkaha ntáchrúa jaha —ichro ch'án.

⁴ A ntá ch'ín Pilato ntáche ch'án tí sín nchát'á t'etöan la ko tí chojni tsíkikao sín kíxin:

—T'itjáhya nijnko jie chóna tí nkexro i —ichro ch'án.

⁵ A ntá jehe sín antsí itsen nixja sín ntáchro sín kíxin:

—Tjachroe ch'án kaín xín chojni estado Judea kíxin tí nkehe tjako ch'án. Kjuankíxin ch'án kjuako ch'án chojni estado Galilea, a ntá jie ó kui ch'án ntihi la xíkaha tjako ch'án —ichro sín.

Sákujuiko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xíkaha ntáchro sín ntá kjuanchankí ch'án á tí ch'ín i la á Galilea tsíkixín ch'án.

⁷ A ntá kjuátehe sín kíxin ntaha tsíkixín ch'án, ntá k'uetöan ch'ín Pilato kíxin sátsjiko sín ch'án tí tjen ch'ín Herodes kíxin jehe ch'án mé gobernador tí estado Galilea kíxin kjaxin ch'án tjen ch'án chjasin Jerusalén tí yaon a.

⁸ A ntá ch'ín Herodes k'uikon ch'án kjuíji tí ch'ín Jesús ntá imá kóchéhe ch'án kíxin isé tjinkaon ch'án chrók'uikon ch'án tí ch'ín Jesús kíxin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxín ch'ín Jesús.

⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án.

¹⁰ Kjaxin ntiha k'uejó tí sín nchát'á t'etöan la ko tí sín maestro tjako tí ley la ntá nchónhya jie k'ueka sín ch'án kíxin nínkakonhen sín ch'án.

¹¹ A ntá ch'ín Herodes la ko tí sín soldado kuente ch'án kjuankíxin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjeje náxrjón éxi t'inkáya tí sín rey. A ntá tuénxín ch'ín Herodes k'uetöan ch'án kíxin sátsji ch'án ínaá tí tjen ch'ín Pilato.

¹² A ntá tí yaon a ch'ín Pilato la ko ch'ín Herodes kjuankíxin sín tjuèhe kíchó sín kíxin tí senó la k'uénínkakonhen kíchó sín.

*K'uetöan sín kíxin its'en ch'ín Jesús**(Mt. 27.15-26; Mr. 15.6-15; Jn. 18.39—19.16)*

¹³ A ntá ch'ín Pilato k'uíyehé ch'án tí nchát'á t'etöan la ko tí sín gobernador la ko kaín chojni chjasin ntiha kíxin tsojnkotsé sín

¹⁴ ntá ntáche ch'án sín kíxin:

—Jahará kjuikuánará tí nkexro i ntáchrórá kíxin ntoáhya tjakohe ch'án chojni kíxin chrókónínkakonhen sín tí gobierno. Kjánchó janhan kjuánchankíha

ch'án itsjé nkehe kuínhínrá ntá k'uikonrá kixin k'uitjahya ninkehó tí jié tékará ch'án.

¹⁵ La ko kjaxin ch'in Herodes k'uitjahya ch'án tí jié tékará tí ch'in Jesús ntá chr'án ch'án inaá ntihi. Ó k'uikonrá kixin ninkehó jié chóntahya ch'án chrók'uexín ch'án.

¹⁶ Sîntakjasóte ch'án ntá chr'éxin tsjánjuan kjuachaxin sátsji ch'án —ichro ch'án.

¹⁷ A ntá tí yaon kia a la t'ichjánxin kixin ch'in Pilato tsjanjon kjuachaxin sátsji ijnko chojni tjechjina kixin xikaha kuènnen sín ósé.

¹⁸ Ntá kaín sín kjuankíxin sín k'óyako sín ntáchro sín kixin:

—j Tí nkexo la náhí! j Ch'in Barrabás mé t'atjánta! —ichro sín.

¹⁹ A ntá ch'in Barrabás tsík'ikjéhe sín ch'án kixin jehe ch'án la ko í so chojni kónínkakonhen sín tí chjasin ntiha la ko tsík'óyán ch'án chojni.

²⁰ A ntá ch'in Pilato tjinkaon ch'án chrókjuanjon ch'án kjuachaxin sáchrókjui ch'in Jesús. A ntá xíkjanckhíhi ch'án tí chojni sín ntiha inaá.

²¹ Kjánchó jehe sín antsí má tsen k'óyako sín ntáchro sín kixin:

—jTjakékanirá ch'án ntacruz! jTjakékanirá ch'án ntacruz! —ichro sín.

²² Níxin xíkjanckhíhi ch'in Pilato ntáchro ch'án kixin:

—jXá nkehe ntoáhya kjuich'e ch'án? Janhan la k'uitjahya ninkehó jié chóna ch'án chrók'uexín ch'án. Sîntakjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

²³ Kjánchó jehe sín antsí tsen kjuanchia sín ntáchro sín kixin chrókjuak'enkáni ch'án ntacruz. A ntá k'óyako sín la ko k'óyako tí sín nch'átá t'etóan ntá kjuacha sín kjuanchia sín tí nkehe tsonhen.

²⁴ A ntá ch'in Pilato kjuanjon ch'án kjuachaxin xikaha tsonhen tí nkehe kjuanchia sín.

²⁵ A ntá kjuanjon ch'in Pilato kjuachaxin sátsji tí ch'in Barrabás éxi kjuanchia sín, na mé tí ch'in k'uijkéhe sín kixin k'uékje ch'án kjuanínkaon la ko k'uék'óyán ch'án chojni. A ntá ch'in Pilato kjuanjon ch'án kjuachaxin kixin sátsjiko sín tí ch'in Jesús sinchekjasóte sín ch'án éxi tjinkaon sín.

Kjuak'enkani sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

²⁶ A ntá tió sákjuiko sín ch'in Jesús tsjak'enkani sín ch'án ntacruz, ntá itsé sín ijnko ch'in tsíkijxin chjasin Cirene it'in ch'án Simón, mé kjuixín ch'án nontge ch'án, ntá kjuínchekamá sín ch'án tí ntacruz tsjak'enkani ch'in Jesús la tinkáchréhe ch'án.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjánkàma sín ch'án.

²⁸ Kjánchó ch'in Jesús nkátjía ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjanckamahyará tí janhan. Chrótsjanckará kixin tí nkehe tsonhanrá jahará la ko xjaanrá.

²⁹ Kixin itsi yaon tsontáchrórá kixin náxrjón tí sín chóntahya xjan la ko tí sín kjuínchekokjéhya xjan la ko tí sín kjuínchekakíhya ninkehó xjan.

³⁰ Ntá tsjankíxin chojni tsontáche sín tí jnà kixin tsoxrátja sín la ko tsontáche sín tjo kixin tsjavá sín.

³¹ Kjónté tí nta yoa la ó sítonhen kaín tíhi la íchá tió chróxámá tí nta la ¿nkehe tí kaá chrókónhen tí nta tsíxámá? —ichro ch'án.

³² Kjaxin sákjuiko sín iyó sín tsíkjasin jié kixin ts'óyáanko sín ch'in Jesús.

³³ Ntá tió kjuíji sín tí jna t̄ik̄itexín sín tí jna Nta Hueso Kja Chojni, na mé ntiha kjuak'enkani sín ch'in Jesús tí ntacruz la ko kjaxin tí iyó sín chóna jie, la ijnko la tja ch'án chjina la í jnko la tja ch'án kjon tjejóyáni sín ntacruz kjaxin.

³⁴ Ntá tió kjuixin kjuak'enkani sín tí ch'in Jesús tí ntacruz ntá nixjehe ch'án tí It'é ch'án Dios ntácho ch'án kixin:

—It'eni, tónínkakuènhya sín kixin tí nkehe kjuích'ehe ni sín kixin noehya sín nkehe tí kjuích'e sín —ichro ch'án.

A ntá tí sín soldado k'óixikayehe sín iké ch'án ch'exín sín suerte kixin tsonoexín sín nkexro tsakja tí ka a.

³⁵ Kaín chojni chjasin ntiha tjejótsjehe sín kixin x̄ikaha sítónhen la ko kjaxin tí sín t'et̄oan tjanoá sín tí jehe ch'án ntácho sín kixin:

—Kjuínchekaá ch'án ókjé chojni, a ntá jie jehe ch'án chrókjuinchekaá ch'án asén ch'án tí chaxín jehe ch'án tí Cristo tí nkexro tsíkjejá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kuík̄ao sín xranvino náxrjónhya chjéhe sín ch'án chrók'ui ch'án,

³⁷ ntáche sín ch'án kixin:

—Tí jaha chaxín rey kuènte tí sín judío ntá jahvá chrókjuinchekaá asán —ichro sín.

³⁸ Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkiva griego la ko nkiva latín la ko nkiva hebreo ntácho kixin: “Tíha mé Rey kuènte tí sín judío”, ichro.

³⁹ Ijnko tí sín chóna jie tjenkani ntacruz k'uántaxínhn sín ch'án tí ch'in Jesús ntácho ch'án kixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

⁴⁰ A ntá tí ch'in jnko a k'uetuènhen tí í jnko ch'án a kixin tsotáni ch'án, ntácho ch'án kixin:

—Ntáchohya x̄ikaha. ¿Á chrakuenhya Dios kixin x̄ikaha ichrúa kixin kjaxin jeheni na ó tjejótsjósoteni?

⁴¹ Yóini na nchoxon tjejótsjósoteni tjejótsjenkani tí jie kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'in a.

⁴² Ntá ntácho ch'án kixin:

—Jesús, xráxinkávan tí janhan tió ts'ayéhé kjuachaxin tsét̄oan jaha —ichro ch'án.

⁴³ Ntá kjuát̄ehe ch'in Jesús ntácho ch'án kixin:

—Chaxín ntáxrjan kixin ijie jaí ts'ejóko kichó ni nkaya nkajni —ichro ch'án.

Ntá ó k'uén ch'in Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkixin. A ntá k'uixin tie kuenté chjasintajni hasta las tres kónjin.

⁴⁵ Ik'uén yaon, la ko tí ka t'ínkakuènxín nkaxenhen njnko k'uichje jnkosiné.

⁴⁶ Ntá ch'in Jesús k'uèya ch'án itsen ntácho ch'án kixin:

—It'eni tjen nkaya nkajni, jaha ts'ayéhé aséni —ichro ch'án.

X̄ikaha ichro ch'án ntá k'uén ch'án.

⁴⁷ A ntá k'uikon tí ch'in capitán romano kaín x̄ikaha kónhen ntá kjuanchehe ch'án kjuasáyé Dios ntácho ch'án kixin:

—Chaxín tí nkexro la jina la ninkehó jie chóntahya —ichro ch'án.

48 **A** ntá kain tí chojni tsíkójnkotsé ntiha k'uikon sín xikaha kónhen ntá sákjuixin sín ntiha chrakon sín tjate sín ntakuin sín kixin xikaha kónhen.

49 **A** ntá kain tí sín chóxin ch'in Jesús la ko kjaxin tí chojni chjin k'uékinkáchónki sín ch'an tsíkjiixin sín estado Galilea ikjín tjejó sín tjejótsjehe sín nkerí sitónhen.

Sákjuikjavá sín tí ch'in Jesús

(Mt. 27.57-61; Mr. 15.42-47; Jn. 19.38-42)

50 **A** ntá ntiha tjen ijnko ch'in it'in José, chjasén ch'an mé Arimatea estado Judea. Kjaxin jehe ch'an ijnko tí sín imá t'etōan kuènte tí sín judío, jehe ch'an mé ijnko nkexro jina.

51 Jehe ch'an kjuák'echónhen ch'an itsi tí kjuachaxin kuènte Dios. Méxra kóxrjienhya ch'an nkexrí kjuích'e tí sín í so t'etōan.

52 Méxra sákjuítsjehe ch'an tí ch'in Pilato kjuikjanchia ch'an tí cuerpo kuènte ch'in Jesús. **A** ntá ch'in Pilato kjuanjon ch'an kjuachaxin.

53 Ntá sákjuí sín tsjinkajixin sín ch'an ntacruz. Ntá kjuixin kjuinkajin sín ch'an ntá kjuínchek'isímá sín ch'an ijnko ka jié, ntá sákjuíko sín tsoxravá ch'an ijnko tòye xráxin tsíkjih'éna ch'in José jehó tjé la ko naxá ninkexró tsíxraváhya ntiha.

54 Kain tíha kónhen tí yaon viernes kónjin. Tí yaon mé tjejóyáxnhin sín kixin í séhya tsoxrankixin tí yaon t'ok'éhe sín sábado kixin kohya kjuachaxin sich'e sín ninkehó xra.

55 **A** ntá tí chojni chjin nkáchréhe kjuikoxin ch'in Jesús estado Galilea kjaxin sákjuíko sín sákjuítsjehe sín tí tòye tsoxravá ch'an la ko k'uikon sín jina nkexrí kjuak'e sín tí cuerpo kuènte ch'an.

56 **A** ntá tió kjan sín tí nchia tjejó sín k'óyaxínhin sín kjueyá sín xroan xraxé náxrjón itsa ntōé ch'an kixin xikaha k'uékinkáchónki tí sín judío. **A** ntá k'ok'éhe sín tí yaon sábado éxí t'etōan tí ley.

24

Ó xechón ch'in Jesús

(Mt. 28.1-10; Mr. 16.1-8; Jn. 20.1-10)

1 Tí yaon domingo, mé tí yaon xrankixixin semana tí chojni chjin na xikjan sín inaá tí tsíxravá ch'in Jesús sákjuíko sín xroan xraxé tsík'éna sín. La ko í so chojni chjin sákjuíkotōxin sín.

2 Ntá ó kjuíji sín ntiha k'uikon sín tí xro tsíkjèxin tí tòye la í xikahya tjen tí sákjuí sín.

3 Ntá k'uíxenhén sín tòye ntá k'uitjahya sín cuerpo kuènte Ìnchéni Jesús.

4 Ntá chrakon sín ntá noehya sín nkehe sich'e sín. Ntá xrínahya k'uikon sín iyó chojni ntoa tjejóxin toté chjinaxón tí tjejó sín, la iké sín la tjákini tsjehe.

5 **A** ntá tí chojni chjin kjuínchek'isén kja sín tjejótsjehe sín nonte kixin imá chrakon sín, **a** ntá tí chojni ntoa ntáchro sín kixin:

—¿Nkekuènte xritjéyará tí nkexro tjechón tí siin tí sín tsík'en?

6 Tjenhya ch'an ntihi la ó xechón ch'an. Xráxinkáonrá nkehe ntáchro ch'an tí kjuák'e ch'an estado Galilea

7 ntáchro ch'an kixin jehe ch'an tí Xjeen Dios K'óna Chojni t'ichjánxin tsotsé tí sín chóna jié tsjak'enkani sín ch'an ntacruz la ko tí nixin yaon tsoxechón ch'an inaá —ichro sín.

8 **A** ntá tí síchjin xráxinkaon sín kixin nkexrí tsíchronka ch'in Jesús,

⁹ a ntá tió kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín.

¹⁰ A ntá tí sín sákjuichenka tí sín apóstol la mé tjan María Magdalena la ko tjan Juana la ko tjan María iné ch'ín Jacobo la ko tí í so chojni chjin.

¹¹ A ntá tí sín apóstol kuínhin sín éxi ijnko nkehe chaxínhya tí nkehe chrónka tí jehe sín ntá kuítekakhonhya sín.

¹² Kjánchó ch'ín Pedro k'uaxrjexín ch'án nchia tinká ch'án sákjuitsjehe ch'án tí tsíkjiixravá ch'ín Jesús. Ntá kjuíji ch'án k'uíkon ch'án tí nkaxenhen tòye k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xikaha tsíkónhen.

*Tí ntía Emaús sákjuí sín la kjuíjichréhe Inchéni
(Mr. 16.12-13)*

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjinxin tejnko kilómetro tí chjasin Jerusalén.

¹⁴ Tinkákjo sín kichó sín kixin kaín tí nkehe tsíkónhen tí chjasin Jerusalén.

¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án.

¹⁶ Kjónté k'uíkon sín ch'án la kjuanjonhya Dios kjuachaxin kixin chrókjuatsqan sín tí jehe ch'án.

¹⁷ A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntía? ¿Nkekuènte kixin t'avará? —ichro ch'án.

¹⁸ A ntá ijnko tí jehe sín mé it'in Cleofas, mé kjuátéhe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

¹⁹ A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkjiixin ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxin ch'án kjuachaxin kuènte nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xikaha k'uíkon Dios la ko k'uíkon tí chojni.

²⁰ A ntá tí nchat'á t'etqan la ko tí sín gobierno kjuínchek'áyéhe sín ch'án kixin its'en ch'án la tsjak'enkanı sín ch'án ntacruz.

²¹ A ntá jeheni k'uejóchónhenni kixin jehe ch'án chrókjuinchekaá ch'án tí sín Israel. A ntá jie ó chóna iní yaon xikaha kónhen.

²² A ntá iso chojni chjin kjaxin k'uéinkáchónki sín ch'án kjuínchechrakon sín tí jeheni kixin jehe sín tsíkjiitsjehe sín tí tsíxravá ch'án imá nchtjén

²³ la mé tsík'itjahya sín tí cuerpo kuènte ch'án, ntá kjan sín chrónka sín kixin tsík'íkon sín iyó sín ángel chrónka sín kixin ch'ín Jesús la tjechón ch'án, ichro sín.

²⁴ Ntá tuénxin iyó tí sín k'uájikoni kjaxin sákjuitsjehe sín tí tsíxravá ch'án la kuik'itja sín éxi chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

²⁵ Ntá kjuátéhe ch'ín Jesús ntáchro ch'án kixin:

—Lontírá jahará la tjokahya kuítekaonrá tí nkehe k'uéchronka tí sín profeta k'uéjío ósé.

26 ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'ueŋoan ch'án? —ichro ch'án.

27 Ntá kjuankíxin ch'án chronkaxín ch'án nhexrí t'axrjexín kaín tí nkehe nixja xroon itén Dios kíxin nkehe tsonhen tí jehe ch'án la mé kjuankíxixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

28 Ntá kjuíji sín tí chjasin ntsi a, a ntá ch'ín Jesús tsjehe ch'án éxi naxa sáchrókjui ch'án kjín.

29 A ntá jehe sín mé chronóehe sín ch'án kíxin ntahó chrókuitóhe ch'án, ntáchro sín kíxin:

—Titóha ts'ejóni ntihi kíxin ntá ó kóntó la ó ts'ixitie —ichro sín.

Ntá ch'ín Jesús la k'uixenhen ch'án nchia kíxin tsitóeko sín ch'án.

30 A ntá tjejótxaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'o ch'án kuákja tí jehe sín.

31 Ntá tuénxín xraxinkaon sín ntá kjuátsoan sín tí jehe ch'án. Ntá tuénxín k'uitjáyankoá ch'án.

32 Ntá jehe sín itjo sín kichó sín ntáchro sín kíxin:

—¿Á chaxínhya chéhe asénni tí kuíkajoni ch'án ntja kíxin chronkaxín ch'án nhexrí t'axrjexín tí itén Dios tsíkjin sín óse? —ichro sín.

33 Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín.

34 A ntá tí sín ntiha chrónka sín kíxin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

35 Ntá jehe sín kjaxin chrónka sín nkehe tsíkónhen tí ntja sákjuí sín kíxin nhexrí kjuátsoanxín sín tí ch'ín Jesús tí kóchrít'o ch'án niotja kjuanjon ch'án.

Titáya k'uikùen sín ikui ch'ín Jesús

(Mt. 28.16-20; Mr. 16.14-18; Jn. 20.19-23)

36 A ntá jehe sín naxa tjejóto sín kaín tí nkehe tsíkónhen, a ntá xrínahya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kíxin:

—¿Á kjuaxróxin tjejorá? —ichro ch'án.

37 A ntá jehe sín la imá chrakon sín kjuenkayáxin sín kíxin k'uíkon sín ijnko xríntoe chojni.

—Ách'e kjuachani —ichro sín.

38 A ntá ntáche ch'ín Jesús tí jehe sín kíxin:

—¿Nkekuènte chrakonrá? ¿Nkekuènte xíkaha tjenkayáxin asánrá?

39 Tsjehérá tjaná la ko totená kíxin chaxín janhan. Itsérána la ko komárána, kíxin ijnko xríntoe chojni chóntahya nto la ko chóntahya hueso éxi t'íkonrá kíxin chonta janhan —ichro ch'án.

40 A ntá xíkaha ichro ch'án ntá kjuako ch'án itja ch'án la ko toté ch'án.

41 Ntá kjónté xíkaha k'uíkon sín la naxa kuítekakonhya sín kíxin chéhe sín la ko chrakon sín. A ntá ch'ín Jesús ntáchro ch'án kíxin:

—¿Á chontará ichrén nkehe sineni ntihi ní? —ichro ch'án.

42 Ntá chjéhe sín ch'án it'o koche tsíchjántaón xrohi la ko ijnko t'o katjé kotsjenta tjá tsjen.

43 A ntá jehe ch'án kuákja ch'án kjóne ch'án k'uíkonxín kon sín.

44 Na ntá ntáchro ch'án kíxin:

—Kaín tí nkehe k'uaátsínka tí janhan mé k'uéntáxrjan tí naxa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'in Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

⁴⁵ Ntá kjuanjon ch'án kjuachaxin kixin tsienxin sín tí xroon itén Dios tsíkjin sín ósé.

⁴⁶ Ntá chénka ch'án sín kixin:

—Mé xíkaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án.

⁴⁷ A ntá t'ichjánxin tsjakoxin sín ihnié ch'án tsjankíxixín sín chjasin Jerusalén la ko chrókuinhin chojni kuenté chjasintajni kixin chrókuítóhe sín ijíé sín chrókuitekaon sín tí jehe ch'án kixin jehe ch'án mé chrókuincheyaon tí ijíé sín.

⁴⁸ A ntá jahará mé tsochrónkaxínrá kixin xíkaha k'uikonrá kaín tíha.

⁴⁹ Ntá tsochr'an janhan tí Nchakuen T'aná éxi tsintáchro ch'án. Kjánchó chjasin Jerusalén ntahó titohará tsoxiteyája ts'ayéhérá kjuachaxin tsixin nkaya nkajní.

Ch'in Jesús sákjuj ch'án nkaya nkajní

(Mr. 16.19-20)

⁵⁰ A ntá ch'in Jesús sákjuiko sín ch'án k'uaxrjexín sín chjasin Jerusalén sákjuj sín chjasin Betania. Ntá kjuàya ch'án tja ch'án kjuíncheyaon ch'án tí jehe sín.

⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuj ch'án nkaya nkajní.

⁵² A ntá jehe sín k'uikon sín xíkaha, a ntá xraxinkaon sín ch'án, ntá kjan sín chjasin Jerusalén chéhe sín.

⁵³ A ntá kaín yaon tjejó sín nkaxenhen nínko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naᵗa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kᵗaxin Dios tíha.

² Tí xrankíxixín na mé tí nkexro xráxín kjuák'eko Dios

³ la ko kjuachaxin kuènte ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuènte ch'án.

⁴ Jehé ch'án na mé kjuanjon kjuachaxin kaín nkehe síchón síin chjasintajni la ko jehe ch'án mé xrohi t'inkaséyanxínhin jnkojnko ntje chojni chjasintajni.

⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

⁶ Ntá kjuák'e ijnko chojni k'uetuēnhen Dios kui mé it'ín ch'án Juan.

⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kíxín kaín xín chojni chrókuitekaon sín tí tjechrónka ch'án a.

⁸ A ntá tí ch'ín Juan la jehya tí xrohi a. Ó k'uítuēnhón ch'án kui ch'án kíxín tsochrónka ch'án nkerí kuènte tí xrohi a.

⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkjich'éanaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naᵗa kjuátsəanhya sín ch'án.

¹¹ Ikui ch'án tí tjejó tí sín judío k'uaxrjeníxin ch'án, kjánchó kuítekakuenhya sín ch'án.

¹² A ntá tí sín kuítekaon sín ch'án mé k'uáyéhe sín kjuachaxin kíxín ts'óna sín xjeen Dios.

¹³ Ntá yóehya ts'axrjeníxin sín it'é sín chjasintajni ntihyo la ko yóehya ijnko it'é chrókjuenkayáxin ch'án chrókjuich'éna ch'án ijnko xjan. Náhi. Dios mé kjuéyá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uétjuéhé ch'án chojni chjasintajni la ko imá ntoá chrónka ch'án. Kuayeni k'uíkonní kíxín imá t'ətoan ch'án kíxín jehe ch'án mé tí jnkokoáxón Xjeen It'éni tjen nkaya nkajní na mé xíkaha imá t'ətoan ch'án.

¹⁵ Ch'ín Juan mé chrónka ch'án nkexrí tjen tí nkexro a. Ntáchro ch'án kíxín:

—Senó k'uékjáhohará kíxín chr'éxin tsi tí nkexro a, na mé əntsí má t'ətoan ch'án, a ntá janhan la náhi kíxín tí janhan naᵗa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

¹⁶ Kaínni ó k'uáyéhení tí kjuachaxin jie tjetjanjon ch'án la ko əntsí má tjencheyaonni ch'án la ko tjencheyaonni ch'án.

¹⁷ Dios mé tsík'etuēnhen ch'ín Moisés kíxín tsokjin ch'án tí ley. A ntá Ínchéni Jesucristo mé kjuakoxin ch'án kíxín nkexrí imá tjuéhé Dios tí chojni chjasintajni. A ntá kaín nkehe chrónka ch'án mé əntsí ntoá.

¹⁸ Kohya ninkexró chjasintajni k'uúkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

Ch'ín Juan mé chrónka ch'án nkexrínchi tjen ch'ín Jesús
(Mt. 3.11-12; Mr. 1.7-8; Lc. 3.15-17)

¹⁹ Iso tí sín judío k'uejó sín chjasin Jerusalén na ntá ichr'án sín iso chojni nchát'á la ko iso tí sín levita, ikuí sín kuinixjehe sín tí ch'in Juan kjuanchankíhi sín ch'án kixin:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kixin:

—Náhi. Jehya janhan tí Cristo —ichro ch'án.

²¹ Ntá xíkjančankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkatehe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjančankíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'ín Juan inaá kixin:

—Náhi. Janhya —ichro ch'án.

²² Ntá kjuanchankíhi sín ch'án inaá kixin:

—¿Ntá nkexro jaha? T'ichjánxín tsonoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

²³ Ntá kjuátehe ch'ín Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Takitjehérá ijnko ntja ntoí tsjixín Ìnchéni” —mé xíkaha ichro ch'án kjuáteexín ch'án itén ch'ín Isaías k'uechrónka xroon itén Dios ósé.*

²⁴ A ntá tí sín fariseo mé tsích'án tí jehe sín kuikjančankíhi sín tí ch'ín Juan.

²⁵ A ntá kjuanchankíhi sín ch'án kixin:

—Ó ntáchrúa kixin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uechrónka itén Dios ósé. ¿A ntá nkekuenté tikite chojni tí xíkaha? —mé ichro sín.

²⁶ Ntá ntáchro ch'ín Juan kixin:

—Janhan na mé ìntá ó tikítexián chojni. Ó ntihi tjenkákjan ijnko nkexro naxa tjátsqanhyará.

²⁷ Jehe ch'án mé tsi ch'án nóton tí janhan. A ntá antsí má t'etqan ch'án, a ntá janhan na kénhyó. A ntá tósuána chrókjuasintanka tí correa tokaté ch'án —ichro ch'án.

²⁸ Káin tíha mé tsíkónhen tí chjasin it'in Betábara tí nó tjtioxín yaon tóhe tí ntarío Jordán tí kjuák'e ch'ín Juan kuikite chojni.

Ch'ín Jesús na mé éxí yóhe ijnko kolélo kuente Dios

²⁹ A ntá tí yaon chr'éxin mé k'uúkon ch'ín Juan kixin ó tjekui ch'ín Jesús. Ntá nixjehe ch'án tí sín tsíkóchjina ntáchro ch'án kixin:

—Tsjehérá tí nkexro tjekui mé tí Kolélo kuente Dios jehe ch'án. Tíha mé tsjijnxín ijie chojni chjasintajni.

³⁰ Janhan mé k'uéxrjanka kixin tí iton tí janhan mé tsichréhe ijnko nkexro antsí t'etqan, a ntá janhan la kénhyó tétqan kixin naxa kohyana na jehe ch'án la ó xráxín tjen ch'án.

* 1:23 Isaías 40.3

³¹ Kjaxin janhan naxa chonhya nkexro tíha. A ntá xra ó k'uinka kjuak'é kuikitexián chojni intá kixin tí chojni nació n Israel mé chrókuátsóanxín sín ch'án —ichro ch'in Juan

³² Kjuintaxín ntá chro ch'in Juan kixin:

—Ó k'uikuan kixin tí Nchakuen Dios mé k'uínkajinxin nkaya nkajni na éxi yóhe ijnko kontóá k'uínkajin la ko kjuák'e va ntoí tí tjen ch'án.

³³ A ntá janhan kjaxin naxa chonhya nkexro tíha. A ntá tí nkexro k'uetuanna kixin tsjak'é tsikitexián chojni intá mé tsichró nka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsóanxián janhan kixin tí nkexro a mé tsikitexián ch'án Nchakuen Dios chojni.

³⁴ A ntá janhan jie mé ó k'uíkonxín kuán kixin xikaha kónhen tí jehe ch'án, a ntá xrjankaxián kixin táha mé Xjeen Dios tíha —mé xikaha chrónka ch'án.

Tí sín saxóin kjueyá ch'in Jesús

³⁵ Tí yaon chr'éxin kjuák'e ch'in Juan la ko iyó tí sín k'uájiko ch'án,

³⁶ a ntá xrinahya k'uíkon ch'án k'uátsínka ch'in Jesús. Ntá ntá chro ch'in Juan kixin:

—Tsjehérá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uájiko ch'in Juan na ntá sákjuíchréhe sín tí ch'in Jesús.

³⁸ Ntá kuinkátjía ch'in Jesús k'uíkon ch'án kixin tinkáchréhe sín ntá kjuan-chankíhi ch'án sín kixin:

—¿Xá nkehe xritjéyará? —ichro ch'án.

Ntá ntá chro sín kixin:

—Maestro, ¿xá nketí nchia itjen? —ichro sín.

³⁹ Ntá kjuátehe ch'án ntá chro ch'án kixin:

—Intá sátsjini ts'ikonrá nketí —ichro ch'án.

Ntá kuinkáchréhe sín ch'án k'uíkon sín nketí nchia kjuák'e ch'án ntá k'uejóko sín ch'án kuente tí kónjín kixin kjuíji sín ntiha como las cuatro kónjín.

⁴⁰ A ntá yóí sín tsíkinhin sín tí chrónka ch'in Juan ntá sákjuíchréhe sín tí ch'in Jesús na mé ijnko mé it'in Andrés. Jehe ch'án chónka ch'án ijnko savé mé it'in Simón Pedro.

⁴¹ Na ntá tuénxín tí ch'in Andrés sákjuíkjeýá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexín kixin Cristo.

⁴² A ntá ch'in Andrés mé kuikáo ch'án tí savé ch'án Simón tí tjen ch'in Jesús. Ntá ch'in Jesús mé komá ch'án tí ch'in Simón ntá chro ch'án kixin:

—Jaha mé Simón, it'á mé it'in Jonás. Ntá jie sjintak'ian Cefas —ichro ch'án.

A ntá tí palabra Cefas la ko tí palabra Pedro na mé yóí mé t'axrjexín kixin ixro tíha.

Ch'in Jesús mé kjueyá ch'án tí ch'in Felipe la ko tí ch'in Natanael

⁴³ A ntá tí yaon chr'éxin mé sáchrókjui ch'in Jesús tí estado Galilea. Ntá k'uitja ch'án tí ch'in Felipe, na ntá ntáche ch'án kixin:

—Chréhé tí janhan —ichro ch'án.

⁴⁴ A ntá tí ch'in Felipe mé chjasén ch'án mé it'in Betsaida tí chjasén ch'in Andrés la ko ch'in Pedro.

⁴⁵ Ntá tí ch'in Felipe mé sákjuíkjeýá ch'án tí ch'in Natanael na ntá chénka ch'án kixin:

—Ó k'uitjani tí nkexro tsi éxí k'uéchrónka tí ch'ín Moisés tí tsíkjin ch'án tí xroon chrónka tí nkehe k'uetōan Dios. Kjaxin tí sín k'uéchrónka tí itén Dios chr'éxin mé k'uéchrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchro ch'ín Natanael kixin:

—ǵXá kjuánchí má chrókójína tí nkehe chrók'uaxrjexín tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kixin:

—Xrákiá ts'ikuan —ichro ch'án.

⁴⁷ Na ntá k'uúikon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankíhi ch'án tí ch'ín Jesús kixin:

—ǵNkexrí kixin tjátsōanna? —ichro ch'án.

Ntá kjuátehe ch'ín Jesús ntáchro ch'án kixin:

—Naxa nixjaahya tí ch'ín Felipe mé k'uúikuān tí jaha tjenkaníá tí nta t'óna to higo —ichro ch'án.

⁴⁹ Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajní tsétuēnhén tí naciōn Israel —ichro ch'án.

⁵⁰ Ntá kjuátehe ch'ín Jesús ntáchro ch'án kixin:

—Jehya tí nkehe ntáxrjan k'uúikuān tjenkaníá nta t'óna to higo, jehya táho tsítékākonxian. Náhí. Chr'éxin xiki í jnko kjuaxroan aṅtsí má jié ts'ikuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsoxrjanka kixin tsoxitjehe tí nkajní ts'ikonrá itsi itsjé tí sín ángel kuènte Dios mé ts'ít'ótjen la ko ts'inkajin tí tjén janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí iné ch'ín Jesús tsík'íyehé sín tjan la ntiha tjen tjan koí.

² Kjaxin tsík'íyehé sín tí ch'ín Jesús la ko tí sín k'uájiko ch'án kixin sátsji sín tí tsíkótehe sín ntiha.

³ Ntá ó tsík'ankehé sín tí xranvino ik'uí sín na ntá tí iné ch'ín Jesús mé ntáche tjan tí jehe ch'án kixin:

—Ó tsík'ànkā xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ǵnkehe tsoṅhen chrónka? Naxa kjuixrakáhya tí yaon tsjásian kjuaxroan —ichro ch'án.

⁵ A ntá tí iné ch'án na mé ntáche tjan tí sín ch'e xra kixin:

—Tí chrén nkehe chrók'uetuānhanrá ch'án chrókjuinchexiteyará —ichro tjan.

⁶ A ntá siín ntiha injon chj tsík'óna xro na mé tíha tjia ntā t'ònti sín kixin xikaha mé ts'axrjehe tí jié ch'óna sín koí, mé xikaha kuinkáchónki tí sín judío. Na mé jnkojnko chj mé tjacha tikia ochenta litro la o ciento litro ntā.

7 Ntá k'uetuēnhen ch'ín Jesús tí sín ch'e xṛá kíxin:

—Tíkíará ntá kaín tí chí a tsokaón —ichro ch'án.

Ntá kjuínchexiteyá sín kjuínchekaón sín ntá jnkojnko tí chí a.

8 A ntá ntáche ch'ín Jesús tí jehe sín inaá kíxin:

—Tákjá intsi ntá tjá chí tjikuehé tí ch'ín t'etōan tí kia a —ichro ch'án.

Ntá xíkaha kjuích'e sín kjuínchexiteyá sín.

9 A ntá tí ch'ín t'etōan tí kia a mé tsjexín ch'án tí ntá tsík'óna xranvino kjónté noehya ch'án nketí kuixín tí xran a. Jehó tí sín ch'e xṛá kuikao sín mé nohe sín kíxin jehe sín mé tsíkakitsje sín ntá. Ntá tí ch'ín t'etōan mé k'uíyehē ch'án tí ch'ín tsíkótehe.

10 Ntáche ch'án kíxin:

—Xráxin tí sín tjasin kia la senó tí xranvino náxrjón tjanjon sín na tíó chrók'uihya tí sín tsíkóchjina na ntá tjanjon sín tí xranvino náxrjónhya. A ntá jaha la náhi. Senó kjuakéchjina tí xranvino antsí má náxrjón, a ntá tí jie tjetjánjuan jaha —ichro ch'án.

11 Tí kjuaxroan a kjuích'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxín ch'án nkexrí imá jié tí kjuachaxin kuēnte ch'án, a ntá tí sín k'uájiko ch'án mé kuítekaon sín tí jehe ch'án.

12 Ntá ó k'uátsínka kia, a ntá sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí nínko jié

(Mt. 21.12-13; Mr. 11.15-18; Lc. 19.45-46)

13 A ntá ó kuichjina tí yaon kia kuēnte pascua kuēnte tí sín judío. Ntá ch'ín Jesús sákjuí ch'án chjasin Jerusalén.

14 Ntá nkaxenhen tí nínko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjetótjaxín tí sín tjínkixixín chichaon.

15 Ntá ch'ín Jesús mé kuákja ch'án ihno tsíxehē sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen nínko kaín xín sín la ko tí kolélo la ko tí koxinta. Na ntá tí ntamesa tjínkitóxixín sín tí chichaon mé kótéka ch'án tsíkjaminkí xēnjín tí chichaon a.

16 Ntá k'uetuēnhen ch'án tí sín nchekji tí kontóá a kíxin:

—Takítsjerá kaín tí nkehe a. Ch'énahyará ijnko ntasin tí ntōe T'aná ntihi —ichro ch'án.

17 Ntá xráxinkaon tí sín k'uájiko ch'án tí nkehe tsíkjin sín ósé kíxin: “Éxi xrohi k'uáksen asenná nínkavan kíxin tí ntōa tjikosáyehya sín.” *

18 Ntá tí sín judío mé kjuanchankíhi sín ch'án kíxin:

—¿Xá nkerí kjuaxroan tsjásixián tsjákoxian nketí kjuachaxin chonta kíxin xíkaha kjuích'e tíhi? —ichro sín.

19 Ntá kjuátehe ch'ín Jesús kíxin:

—Tí ts'oxíkará tí nínko i ntá iníkoá yaon la ó sít'ána nixín tsjak'e inaá —ichro ch'án.

20 Na ntá ntáchro tí sín judío a kíxin:

—Cuarenta y seis nánó k'uéjé sín kjuích'éna sín tí nínko i, a ntá jaha ntáchrua kíxin iní yaon koá sích'éna inaá, ichrua —ichro sín.

21 Kjánchó kienxínhya sín kíxin tí nínko ntáchro ch'ín Jesús la tí cuerpo kuēnte ch'án.

* 2:17 Salmo 69.9

²² Ntá tió kjuixin xechón ch'án ntá xráxinkaon tí sín k'uájiko ch'án kixin xikaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'in Jesús mé nohe nkehe tónhen asén kaín xín chojni

²³ Tió kjuák'e ch'in Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kixin ó k'uúikon sín tí kjuaxroan kjuasin ch'án.

²⁴ Kjánchó ch'in Jesús la kuítekakuenhya ch'án tí jehe sín kixin jehe ch'án la ó nohe ch'án jina nkexrí tónhen asén jnkojnko chojni

²⁵ a ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

3

Ch'in Nicodemo kuinixjehe ch'án tí ch'in Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexo imá tjetooan kuènte tí sin Israel.

² A ntá ijnko tie kjuíchréhe ch'án tí ch'in Jesús a nixjehe ch'án ntáchro ch'án kixin:

—Maestro, kónoheni kixin It'éni tjen nkaya nkajní mé tsíchr'án k'uinka tsjákohéni kixin tí jehya Dios chrókjuak'ekoa la xitjahya chrókuásian kjuaxroan jie —ichro ch'án.

³ Ntá kjuátéhe ch'in Jesús ntáchro ch'án kixin:

—A ntá tsotjonka ijnko nkehe imá tjetooan. Tí nkexo tsokjéhya nixien mé xitjahya ts'íkon tí kjuachaxin ts'etooan Dios —ichro ch'án.

⁴ A ntá ch'in Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína nixien? ¿Á chrók'uixanhan tsee naná inaá ntá chrókokjína nixien ní? —ichro ch'án.

⁵ Ntá kjuátéhe ch'in Jesús ntáchro kixin:

—Ntá tsotjonka ijnko nkehe imá tjetooan. Jehó tí sín tsíkokjéxín ntá la ko kjaxin tsíkokjéxín Nchakuen Dios mé ts'áyéhe sín tí kjuachaxin kuènte Dios.

⁶ Tió ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsokjéxín nixien ijnko chojni na ntá ts'áyéhe sín tí Nchakuen Dios a.

⁷ Chrakonhya tí nkehe xrjanka kixin “Kaín chojni t'ichjánxin tsokjíhi nixien.”

⁸ Éxí yóhe tí tinhín tí chjéhe xrjnto ntá noahya nketí kujxin tí xrjnto la ko noahya nketí sátsji na mé kjaxin xikaha kónhen kaín tí nkexo tsíkokjéxín Nchakuen Dios —ichro ch'án.

⁹ Ntá xíkjanchankí ch'in Nicodemo inaá kixin:

—¿Nkekuènté kixin xikaha chrókónhen? —ichro ch'án.

¹⁰ Ntá kjuátéhe ch'in Jesús ntáchro ch'án kixin:

—¿Jaha ijnko maestro imá t'etooan tí nacióon Israel ntá naxa tiénxinhya tí nkehe ní?

¹¹ Chaxín tjetjonka tí nkehe nõna la ko tí nkehe k'uúikuån ntá títekáonnahya jaha.

¹² Tí nkehe tjetjonka la kuènte chjasintajni ó ntá kjónté la títekáonnahya jaha. ¿Ntá nkexrí chrókuítekáván tí chrótjonka nkehe kuènte nkaya nkajní?

¹³ Kohya í jnko nkexo k'uúit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko niha kujxin ch'án.

¹⁴ Éxí yóhē ch'ín Moisés tió k'uúxin sín tí nteje, a ntá Dios mé k'uetōan kixin sinčekjanoya ch'án ijnko konche tsjak'enkani ch'án ijnko nta, ntá xikaha kjuúch'e ch'án kjuak'enkani ch'án tí konche tí nta a komá sín tí konche ntá kuaá sín k'uénhya sín, * mé xikaha tsonhen tí Xjeen Dios K'óna Chojni mé t'ichjánxin kixin tsjak'enkáni ch'án ijnko ntacruz

¹⁵ kixin mé xikaha kaín nkexro tsinkáchónki tí jehe ch'án mé tsaá sín tsochónta sín kjuachón jnkochrixín.

Dios imá tjuèhe ch'án tí chojni chjasintajni

¹⁶ 'Kíxin Dios mé imá tjuèhe ch'án chojni chjasintajni ntá kjuanjon ch'án jnkokoáxón Xjeen ch'án, kixin ntá jnkojnko chojni tsinkáchónki tí Xjeen ch'án mé ts'itjáyanhya sín tsochónta sín kjuachón jnkochrixín.

¹⁷ Chr'ánhya Dios tí Xjeen ch'án chjasintajni kixin sinčekjasóte chojni kixin tí jje kjuasin sín. Náhi. Ó jehí ichr'án ch'án tí Xjeen ch'án chjasintajni kixin sinčekaa chojni.

¹⁸ 'Na mé tí sín tsitekaon tí Xjeen Dios la tsjasótehya sín. A ntá tí sín titekauenhya sín na mé ó kjuixin kjuínčekitōexín Dios tí ijje sín tsjasóte sín kixin titekauenhya sín tí jnkokoáxón Xjeen Dios.

¹⁹ Na mé xikaha Dios sinčekjasóte sín jnkochrixín kixin ó kui tí nkexro t'inkaséyanxín chjasintajni na kjónté ntá antsí má tóxrjínhin sín tí sítié a. A ntá tí t'inkaséyan la náhi kixin naxa tóxrjínhin sín tí nkehe jínahya tjejóch'e sín.

²⁰ Kaín tí sín tjejóch'e nkehe jínahya na mé tóxrjénhya sín t'inkaséyan chrókóchjinehya sín kixin tsonoxínhya tí nkehe jínahya tjejóch'e sín.

²¹ A ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuènte Dios kixin tsonoxín tí nkehe ch'e sín kixin ntá kaín xín chojni mé tsjatsōan sín kixin tjejóch'e sín tí nkehe tóxrjínhin Dios.

Ch'ín Juan Bautista chrónka inaá kuènte ch'ín Jesús

²² Na ntá chr'éxin ch'ín Jesús la ko tí sín k'uájiko ch'án na sákjuí sín estado Judea. Ntaha k'uejóko sín ch'án kuikite ch'án chojni.

²³ Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuikite ch'án chojni kixin ntiha mé yeé ntā síin. Na ntá nkáki sín kuikite sín.

²⁴ Mé xikaha kónhen naxa kjuák'echjinahya ch'ín Juan.

²⁵ Ntá tí sín k'uájiko ch'ín Juan la ko tí sín judío mé kjuachaxín kichó sín kixin nkexrí íchá jína chrókótjuáxin chojni, ichro sín.

²⁶ A ntá tí sín k'uájiko ch'ín Juan sákjuútsjehe sín ch'án chénka sín ch'án kixin: —Maestro, tí ch'ín kjuák'ekoa tóhe ntario Jordán, na mé tí nkexro tsichronka kuènte ch'án, la mé itjen ch'án tikite ch'án chojni la ko kaín xín chojni mé tjichréhe sín ch'án —ichro sín.

²⁷ Na ntá ntáchro ch'ín Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni.

²⁸ Ó kuínhínrá ntóá k'uéxrjanka senó kixin janhya tí Cristo. Náhi. Janhan ó kuítuannuá kuítōnxián ntja tsōxrjanka kixin ó tsi ch'án.

²⁹ Éxí yóhē ijnko ch'ín tsōtehe na mé jehe ch'án mé ts'áyéhe ch'án tí ichjién ch'án. A ntá tí ch'ín chóxin ch'án mé chéhe asén ch'án tjetinhin ch'án tjenixja tí ch'ín ts'áyéhe ichjién a. Mé xikaha janhan imá chàna kixin xikaha sítonhen

* 3:14 Números 21.9

kíxin itsjé chojni sítóchjinehe sín tí ch'ín Jesús tsinhin sín nkehe tí tjenixja ch'án.

³⁰ A ntá jehe ch'án t'ichjánxin antsí ts'etōan ch'án. A ntá janhan la kénhyó —mé chro ch'ín Juan.

Tí nkebro kuixin nkaya nkajni

³¹ Tí nkebro kuixin nkaya nkajni mé kaín nkehe t'etuenhen ch'án. A ntá ijnko chojni kuente chjasintajni ó mé chrónka kuente chjasintajni ó. A ntá tí nkebro kuixin nkaya nkajni mé kaín nkehe t'etuenhen ch'án.

³² Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án.

³³ A ntá jnkojin nkebro titekaon sín tí nkehe chrónka ch'án na mé xikaha tjakoixin ch'án jie kíxin chaxín ntoá chrónka Dios

³⁴ kíxin tí nkebro ichr'án Dios mé nixja itén Dios kíxin jehya intsíkoá tí Nchakuen Dios k'uáyéhe ch'án. Náhi.

³⁵ It'eni Dios mé tjuéhe ch'án tí Xjeen ch'án na mé xikaha ó tsíchjéhe ch'án kjuachaxin kíxin kaín xín nkehe ts'etuenhen ch'án.

³⁶ A ntá tí nkebro tsitekaon tí Xjeen Dios mé xikaha tsochóna sín tí kjuachón jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xikaha. Tí sín a mé Dios sinchekjasóte sín jnkochrín.

4

Ch'ín Jesús ikjo ch'án ijnko tjan samaritana

¹ A ntá tí sín fariseo mé kónohe sín kíxin antsí tsjé chojni chréhe sín tí ch'ín Jesús kuikite ch'án sín na ntá tí chojni chréhe sín tí ch'ín Juan la kánhyó tsjé sín.

² Kjánchó jehya ch'ín Jesús kuikite ch'án chojni. Méxra tí sín k'uájiko ch'án mé kuikite sín chojni.

³ A ntá tió kónohe ch'ín Jesús kíxin xikaha tsíkinhin tí sín fariseo ntá k'uaxrjexín ch'án tí estado Judea xikjan ch'án estado Galilea ínaá.

⁴ Ntá t'ichjánxin ts'átsínka ch'án estado Samaria.

⁵ A ntá kjuíji ch'án ijnko chjasin mé it'in Sicar kuente estado Samaria, mé chjino tí nonte tsíkjinchekitonhen ch'ín Jacob tí xjeen ch'án José.

⁶ La ó chjino tjen tí tōyē takitsje chojni ìntā mé it'in Ìnté Jacob. Na ntá ó chonkíxin kjui sín ntiha. Méxra tí ch'ín Jesús la imá kóxrxjé ch'án kíxin imá kjín tí ntā kjuixin ch'án ntá kjuák'etjāxin ch'án chrínta tí tōyē takitsje sín ìntā.

⁷⁻⁸ Ntahó kuitōhe ch'án. A ntá tí sín k'uájiko ch'án sákjuí sín tí chjasin chjinaxón sákjuik'ena sín nkehe sineko sín ch'án. Ntá séhyó ikui ijnko tjan kuente estado Samaria ikui tjan tsakitsje tjan ìntā. Ntá ntáchro tí ch'ín Jesús kíxin:

—Chjina intsí ntā its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kíxin:

—¿Nkekuénté kíxin jaha ijnko chojni judío mé chrókuanchana ntā kíxin janhan ijnko chojni samaritana? —mé chro tí tjan a.

(Mé xikaha kjuanchankí tjan kíxin tí sín judío mé ninkehó t'ikonhya tí sín samaritano.)

¹⁰ Na ntá ntáchro ch'ín Jesús kíxin:

—Chrókónoha tí nkehe tjanjon Dios la ko chrókjuatsqan jaha nkexro tí tjetjanchaha ntá ntá chrókjuanchana ntá, ntá chrótjaha tí ntá tjechón chaxín —ichro ch'ín Jesús.

¹¹ Na ntá ntáchro tí tjan a kixin:

—¿Ntá nkexri kixin xraahya jaha ninkehó nkehe tsakítsjeyá ntá kixin tí tòye i la imá njinka? ¿Ntá nkexri tsochjina tí ntá tjechón tjemé?

¹² Tí nkexro k'uaxrjenixinni mé Jacob mé kuítqeheni tí tòye tjia ntá ntíhi la ko kjaxin ik'uí ch'án tí ntá la ko kjaxin ik'uí tí xjeen ch'án la ko tí iko kuénte ch'án. ¿A ntá xá jaha la xá antsí má tjeoan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátehe ch'ín Jesús ntáchro ch'án kixin:

—Tí sín it'i sín tí ntá ntíhi tí tòye i nántaxón its'en sín ntá inaá.

¹⁴ A ntá tí sín its'i sín tí ntá sintakitonhan sín mé í ts'enhya sín ntá inaá. Tí ntá sintakitonhan sín mé ts'óna éxí yóhē ijnko ntá ts'axrje nkaya asén sín mé tsinkákjanjon tí kjuachón tsochóna sín jnkochrín —ichro ch'án.

¹⁵ Ntá ntáchro tí tjan a inaá kixin:

—Chjina tí ntá, a ntá ts'énhyana ntá inaá la ko ts'inkahya ntíhi tsakítsje ntá —ichro tjan.

¹⁶ Ntá k'uetqan ch'ín Jesús kixin:

—Sátjia tjik'iyehé xiá ntá ts'inkará ntíhi inaá —ichro ch'án.

¹⁷ Ntá ntáchro tjan kixin:

—Chontahya xiná —ichro tjan.

Ntá ntáchro ch'ín Jesús kixin:

—Chaxín ntáchrua kixin chontahya jaha xiá.

¹⁸ K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrua kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuqan kixin jaha ijnko nkexro chrónka itén Dios.

²⁰ A ntá tí sín k'uaxrjenixinni k'uixín ósé mé k'uéxraxinkakonxín sín Dios tí jna ntíhi. Kjánchó jahará chojni judío mé ntáchrorá kixin tí njnko jíe chjasin Jerusalén kaín ni chróxraxinkakonxínni Dios —ichro tjan.

²¹ Ntá ch'ín Jesús ntáche ch'án tjan kixin:

—Títekávan kixin tjetsi tí hora a tsoxráxinkákonxínhyará It'éni Dios tí jna ntíhi la ko tsoxráxinkákonxínhyará ch'án chjasin Jerusalén kjaxin.

²² Jahará chojni samaritano chonhyará tí nkexro xráxinkaonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjiihin chojni tí jie yámá sín mé ts'axrjenixín tí sín judío.

²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín It'éni la mé asén sín ó tsoxraxinkakonxín sín It'éni Dios. Dios mé tóxrjínhin ch'án kixin chojni xíkaha chrókjuich'e sín chróxraxinkakonxín sín ch'án.

²⁴ Jehe Dios na mé nchakuen ó, a ntá tí sín chróxraxinkaon sín ch'án na mé t'ichjánxin kixin asén sín ó tsoxraxinkakonxín sín ch'án —mé xíkaha chrónka ch'ín Jesús.

²⁵ A ntá ntáchro tí tjan a kixin:

—Ó nõna kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kixin:

—Tí nkexro a la mé janhan tjetjuá jie —ichro ch'án.

²⁷ Na ntá tí sín k'uájiko ch'án mé kjanx̄in sín tí chjasin a, ntá chrakon sín k'uúkon sín kixin tjenixjehe ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjinkaon ch'án na nkekuènté nixjehe ch'án tí tjan a.

²⁸ A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Íntará sátsjitsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókójeheya tí nkexro i Cristo? —ichro tjan.

³⁰ Na ntá tí chojni a mé xrákuax̄in sín tí chjasin a ntá kuitsjehe sín tí ch'ín Jesús.

³¹ Naḡa tihya sín nachrohe tí sín k'uájiko ch'án mé chrónóeh̄e sín ch'án ntáchro sín kixin:

—Maestro, kjaxian chrókjónte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naḡa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kichó sín kixin:

—¿Xá jnkojín sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxí yóhe chrókjoné nkehe mé tí sít'a tí xrá la ko tsjixinna tí xrá kuènte tí nkexro chr'ánna k'uinka.

³⁵ Ntáchrorá kixin: “Noó nitjó naḡa t'itjayan tsochónhenni ntá tsotjáni noatrigo”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxamá kixin ó jína chrótjáni.

³⁶ Tí sín ch'e xrá tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochrín. Ntá tí sín k'uenká sín nonte la ko tí sín tjá sín jnkokón tsochéhe sín.

³⁷ Mé xíkaha tsoxiteyá tí nkehe ntáchro sín kixin: “Ijnko nkexro mé t'enka noa, a ntá ókjé sín tsotjá sín tí noa a”, ichro sín.

³⁸ A ntá janhan ichr'an tí jahará tsotjará ijnko nonte tsík'énkahyará. Na mé ókjé sín kjuich'e sín xrá ntá jahará tsjachará tí xrá kjuich'e tí sín a —ichro ch'án.

³⁹ A ntá itsjé tí sín samaritano kuènte tí chjasin ntiha mé kjuankixin kuinkáchónki sín tí jehe ch'án kixin xíkaha chrónka tjan kixin jehe ch'án ó chrónka ch'án kaín xín nkehe kjuich'e tjan tí senó a.

⁴⁰ A ntá tió kuínhin sín tí nkehe chrónka tjan ntá kui sín tí tjan ch'ín Jesús ntá chrónóeh̄e sín ch'án kixin tsitóhe ch'án ntiha. Ntá kuitóhe ch'án ntiha iyó yaon.

⁴¹ Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án.

⁴² Ntá ntáche sín tí tjan a kixin:

—Ntá jie jehya jehó tí nkehe chronka kuítekaonni. Náhi. Tí jie ó kuínhinni nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitóhe jína ijnko xjeen ijnko ch'ín ch'ehe xrá gobierno

⁴³ A ntá k'uátsinka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea.

⁴⁴ A ntá jehe ch'án tsíntáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án.

45 Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehe sín ch'án jína kixin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntiha.

46 Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjaminca ch'án tí ntá tí xranvino a. Ntaha mé kjuák'e ijnko ch'ín ch'ehe xrá gobierno. A ntá níhi tí xjeen ch'án ntoa itjen chjasin Capernaum.

47 Ntá kuínhin tí ch'ín ch'ehe xrá gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónógehe ch'án tí ch'ín Jesús kixin sáchrókjui ch'ín Jesús ntøe ch'án sinchekitøhe jína tí xjeen ch'án ó tjet'en xjan.

48 Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

49 Ntá chrónòta tí ch'ín ch'ehe xrá gobierno ntáchro ch'án kixin:

—¿Á chrókójinahya sáchrókjuíni ntøna jai kixin xjanna ó tjet'en? —ichro tí ch'ín a.

50 Ntá kjuátehe ch'ín Jesús ntáchro ch'án kixin:

—Ikjan sátjia ntøa kixin tí xjaan na ó jína tjen jie —ichro ch'án.

Ntá kuítekaon ch'án nkeri ichro ch'ín Jesús ntá sákjuí ch'án.

51 A ntá kjuíji ch'án chjino ntøe ch'án ntá xrínghya tí sín ch'ehe sín ch'án xrá kjuíxinhin sín ntjia chrónka sín kixin:

—Xjaan la ó jína tjen —ichro sín.

52 Ntá kjuanchankíhi ch'án sín kixin nkehora kjuankíxin kuítóhe xjan jína, na ntá chrónka sín kixin:

—Ijna la una kónjin mé kjuin tí sóa —ichro sín.

53 Ntá kónohe tí it'é xjan kixin xíkaha tí hora tsintáchro ch'ín Jesús kixin tí xjeen ch'án na ó jína tjen. A ntá jehe ch'án la ko kaín tí sín siín ntøe ch'án mé kuinkáchónki sín tí ch'ín Jesús.

54 Tíha mé tí yóxin kjuaxroan kjuasin ch'ín Jesús tió kuixín ch'án estado Judea ikjan ch'án estado Galilea.

5

Ch'ín Jesús kjuínchekitøhe jína ijnko ch'ín tsík'en tøte chjasin Betesda

1 Ntá chr'éxin tí sín judío mé kjuasin sín ijnko kia na ntá ch'ín Jesús xíkjan ch'án chjasin Jerusalén inaá.

2 A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkiva hebreo tí ntá mé it'in Betesda. A ntá chrínta tí pila siín in'ó cuarto ntsínsi.

3 Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en toté. Tjejóchónhen sín kixin nkehora tsinkí ntá

4 kixin nántaxón k'uínkajin ijnko ángel kjuíánki ntá kjuínchekínki ntá. A ntá tí nkexro senó tsjiánki ntá mé tsitøhe jína kjónté cualquiera chin chónka.

5 A ntá ntaha kjuák'e ijnko ch'ín na mé chónka ch'án treinta y ocho nánó níhi ch'án.

6 A ntá tió k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsitøha jína? —ichro ch'án.

7 Ntá ntáchro tí sinníhi kixin:

—Chóntahyani ninkexró tsjinkĩtsani tsjiánkini ntã. A ntã tí tjinkaonni chrókjuíánkini ntã la ntã ókjé nkexro tjítaón ntĩa tjiánkí ntã senó —mé chro tí sinníhi.

⁸ A ntã k'ueṭoan ch'ín Jesús kixin:

—Ijie la t'inkatjen, tjatsíyan kaniãa, itjia —ichro ch'án.

⁹ Ntã tuénxín kuítõhe ch'án jina, ntã kjuatsen ch'án kaniëe ch'án kjuankixin itji ch'án. Kjánchó yaon sábadó tíha mé tí yaon t'ok'éhe sín.

¹⁰ Mé xikaha tí sín judío ntáche sín tí ch'ín kuítõhe jina kixin:

—Ijie tí yaon t'ok'éheni ntã kohya kjuachaxin tsamá kaniãa —ichro sín.

¹¹ A ntã ntáchro tí ch'ín a kixin:

—Tí nkexro kjuínchekitõna jina mé k'ueṭuãna kixin tsjatsíyan kaniãana la ko sátsjia —ichro ch'án.

¹² Ntã kjuanchankíhi sín ch'án kixin:

—¿Nkexéhe tí nkexro k'ueṭuãnhan kixin tsjatsíyan kaniãa la ko sátsjia? —ichro sín.

¹³ A ntã tí ch'ín tsíkõtõhe jina na í kjuátsoanhya ch'án tí nkexro kjuínchekitõhe ch'án jina kixin ntaha la sín nchónhya chojni, a ntã ntahó k'uitáyaxín ch'ín Jesús.

¹⁴ A ntã chr'exín ch'ín Jesús xeta ch'án tí ch'ín a nkaxenhen tí ninko jie ntã ntáchro ch'án kixin:

—Tsjehe kixin ijie la ó jina tjen jaha la í tjásinhya jie inaá. A ntã tí tsjásian jie inaá a ntã antsi má jinahya tsonhan —ichro ch'án.

¹⁵ A ntã sákjuí tí ch'ín a ntã chénka ch'án tí sín judío kixin jehe ch'ín Jesús mé kjuínchekitõhe ch'án jina.

¹⁶ Mé xikaha tí sín judío kjuankixin sín chónkíhi sín tí ch'ín Jesús la ko chrók'óyán sín ch'án kixin kjuínchekitõhe ch'án chojni jina tí yaon t'ok'éhe sín.

¹⁷ Kjánchó ch'ín Jesús ntáche ch'án tí jehe sín kixin:

—Méxra T'aná naxã tjech'e ch'án xra. A ntã janhan kjaxin tjet'ã xra —ichro ch'án.

¹⁸ Méxra xikaha tí sín judío antsi tjinkaon sín chrók'óyán sín ch'án kixin kuítekauenhya ch'án tí ley kuente tí yaon t'ok'éhe sín la ko kjaxin ntáchro ch'án kixin tí It'é ch'án la mé Dios, mé xikaha ncheyõhe ch'án asen ch'án Dios.

Tí kjuachaxin chõnta tí Xjeen Dios

¹⁹ Ntã ntáche ch'ín Jesús tí jehe sín kixin:

—Ijiko nkehe tjetoan tsõtjonkará kixin tí Xjeen Dios nkaya nkajní tí jehó kjuachaxin kuente ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xikaha ch'e ch'án.

²⁰ A ntã tí It'é mé tjuëhe tí Xjeen ch'án, la ko tjakohe ch'án kaín xín xra ch'e ch'án, la ko antsi tjetoan tí xra naxã tsjakohe ch'án kixin ntã tsochakonrá kixin ts'ikonrá tí xra sich'e ch'án.

²¹ Tí It'é mé chõnta kjuachaxin nchexechón tí sín tsík'en la ko chjéhe ch'án sín kjuachón. A ntã tí Xjeen kjaxin chõnta kjuachaxin tsochjéhe kjuachón tí nkexro tjinkaon tsochjéhe ch'án.

²² A ntã It'é la í sinchekitõexínhya ch'án ijie ninkexró. Kaín tí kjuachaxin kuente ch'án chjéhe ch'án tí Xjeen kixin sinchekitõexín ch'án ijie chojni chjasintajni

²³ Kixin ntã kaín chojni tsjikosáyehe sín tí Xjeen éxi yõhe tjikosáyehe sín tí It'é ch'án. Tí sín tjikosáyeheya tí Xjeen xikaha kjaxin tjikosáyeheya sín tí It'é kixin jehe ch'án mé tsichr'án tí Xjeen.

24 'Ijnko nkehe tjetoan tsotjonkará kixin tí jnkojínrá tjejetinhínrá tí nkehe tjákua la ko tinkachónkirá tí T'aná, mé tí nkexro ichr'ánna, na mé xikaha ó chontará tí kjuachón la ko tsjasótiahyará, na mé kuítóhérá tí ntja chrók'uénxinrá, la ntá jie kjuankíxinrá tsochontará tí kjuachón jnkochríxín.

25 Ijnko nkehe tjetoan tsotjonkará kixin ó tsi tí yaon, na mé jie tíha, mé xikaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóhón sín.

26 Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón

27 la ko kjaxin chjéhe ch'án kjuachaxin tí Xjeen ch'án sinchekitoexín tí ijje chojni chjasintajni kixin jehe mé tí Xjeen Dios K'óna Chojni.

28 Chrakonhyará tjétjonkará xikaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án.

29 A ntá ts'axrjexín sín tí tòye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'in Jesús

30 'Tí jehó kjuachaxin kuéntana xitjahya sít'a ninkehó xra. A ntá jie ntákitoxián tí ijje éxi k'uetuanna T'aná. A ntá tí nkehe ntákitoxián la jína ntoá kixin tjínkakhonya sít'a éxi tjínkavan. Náhi. Éxi tjinkaon T'aná, tí nkexro ichr'ánna, mé xikaha jtét'a.

31 A ntá tí chróxrjanka kixin nkexrí imá jína janhan la tíha la ninkehó kjuachaxin chróchóntahya.

32 Itjen í jnko nkexro tjechrónka nkexrí tjén janhan a ntá ó nõna kixin tí nkehe chrónka ch'án la sínkí.

33 Jahará tsíkétuénhénrá chojni kjuikjanchankíhi sín tí ch'in Juan kixin nkexrínchi tjén janhan. A ntá tí nkehe tsíkatehe ch'án la chaxín ntoá tíha.

34 Kjánchó chontiaxinhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kixin jahará jína chrókuaará.

35 Tí ch'in Juan kjuák'e éxi yóhe ijnko xrohi kjuák'eche k'uínkaséyanxín la ko jahará kócháhará xikaha, kjánchó séhya kóxrjínhanrá tí xrohi a.

36 Kjánchó síin nkehe antsí tjetoan tjákoxin nkexrí tjén janhan, a ntá kánhyó tjetoan tí nkehe tsíchrónka tí ch'in Juan. Tí xra jtét'a, mé tí xra kjuanjon T'aná sít'a tsjixinna tí xra, na mé tíha mé tjákoxin kixin chaxín T'aná tsíchr'án k'uínka.

37 Kjaxin jehe T'aná, tí nkexro ichr'ánna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uikonhyará ch'án

38 la ko kjaxin itén ch'án kuítóehya nkaya kjará kixin tjínkakhonyará tsítekaonrá tí Xjeen Dios tsíchr'án tsíki.

39 Jahará nchekuáxinrá jína tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochríxín. A ntá tí nkehe tsíkjin sín ósé mé chrónka kuénte janhan.

40 Kjánchó jahará tjínkakhonyará tsochjinará tí tjén janhan kixin chrók'uayéhérá tí kjuachón a.

41 'Janhan na tjéyáhya kixin chojni chrókjuikosáyana sín.

42 A ntá janhan ó nõna kixin jahará la tjuéhyará Dios.

⁴³ Mé k'uinkaxian janhan tí kjuachaxin kuènte T'aná. Kjánchó jahará la títekákonahyará. **A** ntá tí chrókui í jnko nkexro kjuachaxin chrókuakitsjeníxin asén ó, **a** ntá tíha mé tjinkáonrá chrókuítekákonnéhnrá.

⁴⁴ ¿Nkexrí chrókuítekáonrá jahará kixin tjéyará kixin tí chojni chjasintajni chrókjuikosáyahará sín, **a** ntá tjéyáhyará tí kjuachaxin chrókjuanjon jnkokoá Dios?

⁴⁵ Tsontáchrohýará kixin janhan tsjánchíá jię tí jahará nkayakon T'aná. Náhi. Ch'ín Moisés mé tsjanchia ch'án jię tí jahará kixin tsontáchrórá kixin jehe ch'án kuinkachónkirá.

⁴⁶ Kja tí jahará chrókuítekáonrá nkehe tsintáchro ch'ín Moisés ntá chrókuítekáonrá tí janhan kixin tí xroon tsíkjin ch'án mé chrónka kuènte tí janhan.

⁴⁷ **A** ntá tí títekákonhyará tí nkehe tsíkjin ch'án, ¿ntá nkexrí chrókuítekákonrará nkehe ntáxrjan janhan? —ichro ch'án.

6

Ch'ín Jesús kjuanjon ch'án nkehe kjóne in'ó mil chojni

(Mt. 14.13-21; Mr. 6.30-44; Lc. 9.10-17)

¹ **A** ntá chr'éxin ntá sákjuí ch'ín Jesús k'uatòye ch'án tí ntayaon Galilea na mé tí ntayaon Tiberias tíha.

² **A** ntá nchónhya chojni tinkáchréhe sín kixin k'uíkon sín tí kjuaxroan jię kjuasin ch'án kjuínchekitohe ch'án jína tí sinnedi.

³ **A** ntá jehe tí ch'ín Jesús chr'in ch'án ijnko jnā na ntá ntaha kjuák'etjāxin ch'án la koí tí sín k'uájiko ch'án a.

⁴ **A** ntá í séhya ts'ixin tí kia pascua a mé kié tí sín judío a.

⁵ **A** ntá tí ch'ín Jesús k'uíkon ch'án kixin nchónhya chojni chr'in sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'uęnani nkehe sine kaín tí chojni a? —ichro ch'án.

⁶ Mé xikaha ntáchro ch'án kixin siná nkehe tsixro ch'ín Felipe. **A** ntá tí ch'ín Jesús la ó nohe ch'án nkehe tí kjuaxroan tsjasin ch'án.

⁷ Ntá kjuátęhe ch'ín Felipe ntáchro ch'án kixin:

—Kjonté doscientos chichaon denario chróchóntani chrók'uínáxin tí niotja la naxā chrókjuachahya chrók'uáyęhe jnkojnko sín tot'ó tí niotja a —ichro ch'án.

⁸ **A** ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchro ch'án kixin:

⁹ —Ntíhi tjen ijnko xjan ntoa chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni síin? —ichro ch'án.

¹⁰ **A** ntá ntáchro ch'ín Jesús kixin:

—Tétuęhén tí sín síin a kixin ts'ixitjāxin sín —ichro ch'án.

A ntá nchónhya ika yoa síin na ntá ntaha k'uixitjāxin sín na mé éxi in'ó mil chojni k'uixin sín.

¹¹ **A** ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. **A** ntá jehe sín k'óxikeyęhe sín chjéhe sín kaín tí sín sítjāxin a. Xikaha kjāxin k'óxikeyęhe sín tí koche. **A** ntá kaín sín kjóne sín éxi tjínkaon sín.

¹² Kjuixin kjóne sín ntá k'uetuęhnen ch'ín Jesús tí sín k'uájiko ch'án ntáchro ch'án kixin:

—Tjenájínrá tí nkehe tot'ò síxèhe sín kixin ts'itjáyanhya ninkehó —ichro ch'án.

¹³ Ntá xíkaha jehe sín kjuenájín sín kjuínchekaón sín teyó ntaxra tí tot'ò tí in'ó niotjã tsík'óna noa cebada síxèhe sín tí kjuixin tsíkjine sín.

¹⁴ A ntá tí sín kjóne tí niotjã k'uúikon sín tí kjuaxroan jíe kjuasin ch'ín Jesús ntáχρο sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni tsjakoheni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxenhén sín ch'án tí xrã rey kixin chrók'uetóan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntíha.

Éxi ijnko ntia xíkaha kjuítaón ch'ín Jesús tí ntayaon
(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'ín Jesús k'uínkajínxín sín jnã sákjuí sín chrínta ntayaon

¹⁷ k'uit'ótjen sín ijnko ntabárcõ kjuankíxin sín ts'atòye sín ntayaon sátsji sín chjasin Capernaum. Na ó k'uúxin tie na nãxã kjanhya ch'ín Jesús.

¹⁸ Ntá kjuankíxin chjéhe xríntõ tsankã ntá kjuankíxin tinkákjaminkí ntã.

¹⁹ A ntá tíõ kjuacha sín á in'ó õ injon kilómetro ntá xrínãhya k'uúikon sín tí ch'ín Jesús tinkákóchjinehe ch'án tí ntabárcõ, éxi ijnko ntia tjetjitaón ch'án tí ntã, ntá k'uúikon sín ntá imá chrakon sín.

²⁰ Kjánchó ntáχρο ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcõ. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² A ntá tí yaon chr'éxin na mé tí sín kuitóhe tóhe ntayaon na mé ó nohe sín kixin jnkokoáxón ntabárcõ k'uékjak'e ntíha la ko ó nohe sín kixin ch'ín Jesús kjá ní sátsíkjhohya sín ch'án na mé k'uúikon sín kixin jehó tí sín k'uájiko ch'án sátsíkji sín.

²³ Kjánchó síin ntabárcõ tíxin chjasin Tiberias tinkákóchjinehe tí nó kjónéxín sín tí niotjã kjuanchaxín ch'ín Jesús kjuasáyé Dios.

²⁴ A ntá tíõ k'uúikon sín kixin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabárcõ ntá sákjuí sín chjasin Capernaum sákjuíkjeyá sín tí ch'ín Jesús.

Ínchéni Jesús mé éxi niotjã tjanjon kjuachón

²⁵ A ntá tóhe ntayaon xéta sín tí ch'ín Jesús ntá kjuanchankíhi sín ch'án kixin: —Maestro, ¿nkesá k'uinka ntíhi? —ichro sín.

²⁶ Ntá kjuátehe ch'ín Jesús ntáχρο ch'án kixin:

—Ó nõna kixin jahará tjéyará tí janhan kixin kjónterá niotjã kókjahará, la jehya kixin kiénxinrá tí kjuaxroan kjuásian.

²⁷ Chrókjuich'ehyará tí xrã chrók'uite tí nkehe chrókjónterá tjoka tsjeje ó. Náhi. Chrókjuéyará tí nkehe chrókjuejehya chrókjónterá chrók'uayéxinrá tí kjuachón jnkochr'íxin. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjakõxin ch'án kixin tí Xjeen ch'án mé chónnta kjuachaxién tí jehe ch'án —ichro ch'ín Jesús.

²⁸ A ntá kjuanchankíhi sín ch'án kixin:

—¿Nkexrí chrókjuich'eni chrokuinchexiteyáni nkexrí tjinkaon Dios? —ichro sín.

²⁹ **A** ntá kjuátehe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuákoéxianni chrók'uikonni kixin ntá chrókuitekaonni tí jaha? ¿Nkehe tí xra ch'e jaha?

³¹ Tí sín tsík'axrjeníxinni k'u'éjó sín ósé mé kjóne sín maná k'óna niotja tió k'uíxin sín nteje mé xíkaha tí xroon kuénte Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkixin nkaya nkajní”* —ichro sín.

³² **A** ntá kjuátehe ch'ín Jesús ntáchro ch'án kixin:

—Ijnko nkehe tjetoan tjonkará kixin jehya ch'ín Moisés kjuanjon tí maná k'óna niotja k'uínkajinxin nkaya nkajní. Náhí. T'aná mé tjetjanjon tí niotja chaxín jina k'uínkajinxin nkaya nkajní.

³³ Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kixin:

—Jaha Ìnchéni, jnkochrín chjehéni tí niotja a —ichro sín.

³⁵ **A** ntá ntáchro ch'ín Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá.

³⁶ Kjánchó éxi k'uétjonkará senó na ó k'uíkonrá tí janhan na kjónté naxa titekákonhyará.

³⁷ **A** ntá kaín tí sín chjina T'aná la tsóchjina sín tí janhan. **A** ntá kaín tí sín tjejótóchjinehe sín tí janhan la tsétuanhya sín kixin sátsji sín.

³⁸ Janhan k'uinkaxian nkaya nkajní jehya tí xra tóxrjina chrókjuít'a. Náhí. K'uinka kixin chrókjuít'a tí xra tóxrjínhin tí nkexro tsíchr'ánna.

³⁹ **A** ntá T'aná mé tí nkexro tsíchr'ánna mé tjinkaon ch'án kixin sintak'itjáyanhya ninkexró tí sín chjina ch'án na mé tjinkaon ch'án kixin janhan mé sintaxechón kaín sín tí yaon tsjixixín.

⁴⁰ Mé xíkaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. **A** ntá janhan sintaxechón sín tí yaon tsjixixín —ichro ch'án.

⁴¹ **A** ntá tí sín judío kjuankixin sín kjonta sín tí ch'ín Jesús kixin tsintáchro ch'án kixin jehe ch'án mé tí niotja k'uínkajinxin nkaya nkajní.

⁴² Mé ntáchro sín kixin:

—¿Á jehya tí Jesús, it'é mé it'ín José, na mé chóxinni tí it'é la ko tí ìné ch'án? ¿Ntá nkekuénté ntáchro ch'án kixin nkajní k'uínkajinxin ch'án? —ichro sín.

⁴³ Ntá kjuátehe ch'ín Jesús ntáchro ch'án kixin:

—Títóhérá tjontahará tí janhan.

⁴⁴ Kohya nkexro chrókóchjina tí tjén janhan tí chrókjuínkítsahya T'aná. **A** ntá tí sín tóchjina na mé sintaxechón sín tí yaon tsjixixín.

* 6:31 Salmo 78.24

45 Na mé tí sín k'u'échrónka itén Dios ósé mé tsíkjin sín xroon ntácho kíxin: “Dios mé tsjakohe ch'án kaín chojni.”† A ntá kaín tí sín tsíkinhin tí nixja T'aná la ko kjuakohe ch'án sín mé sítóhjna sín tí tjén janhan.

46 Jehya kíxin itjen ijnko chojni tsík'ikon T'aná. Náhi. Jehó tí nkexro kujxin tí tjen Dios mé tsík'ikon ch'án Dios.

47 Chaxín tí nkehe tjéxrjanka kíxin tí sín titekaon sín tí janhan mé ó tsochóna sín kjuachón jnkochríxín.

48 Janhan na mé tí niotja tjanjon kjuachón.

49 Tí sín k'uaxrjeníxinrá k'u'éjó ósé kjóne sín tí maná k'óna niotja tió k'u'éjó sín nteje, a ntá kjónté ik'uén sín k'uitjáyan sín.

50 Tí nkehe xrjanka mé tí niotja k'uínkajinxín nkaya nkajni, a ntá tí sín sine tí niotja a mé ts'enhya sín.

51 Janhan mé tí niotja tjechón k'uínkajinxín nkaya nkajni. A ntá tí sín sine tí niotja a mé ts'ejóhón sín jnkochríxín. Tí niotja tsjánjuan ts'ejóhónxin chojni chjasintajni mé ntona tíha —ichro ch'ín Jesús.

52 A ntá tí sín judío mé sítjité sín itjo sín kichó sín ntácho sín kíxin:

—¿Nkexrí chrókuajon ch'án ntøe ch'án chrókjóneni? —ichro sín.

53 A ntá kjuátehe ch'ín Jesús ntácho ch'án kíxin:

—Ntá tsotjonkará kíxin tí sintehyará ntøe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará.

54 Tí sinterá ntona la ko it'irá jnina ntá tsochontará kjuachón jnkochríxín la ko janhan mé sintaxechónrá tí yaon tsjixixín.

55 Kíxin ntona na mé chaxín nkehe ine chojni la ko jnina na mé chaxín nkehe it'i chojni.

56 Tí sín ine ntona la ko it'i sín jnina mé jnkoqóá tjenkayáxinkian sín la ko janhan mé xríkian sín.

57 T'aná tsíchr'án ch'án tí janhan mé chóna kjuachaxin, a ntá janhan mé tjechónxin tí jehe ch'án. Ntá tí sín sine tí ntona mé ts'ejóhónxin sín tí janhan.

58 A ntá tjénixja kuente tí niotja k'uínkajinxín nkaya nkajni na mé yóehya tí maná tsík'óna niotja kjóne tí sín tsík'axrjeníxinrá ósé kíxin jehe sín na kjóne sín na kjónté k'uén sín. A ntá tí sinterá tí niotja k'uínkajinxín nkaya nkajni ntá ts'ejochónrá jnkochríxín —mé chro ch'ín Jesús.

59 Kaín tíha mé kjuakohe ch'án tí sín tsikójnkséxin tí njnko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochríxín

60 A ntá tió kuínhin sín tí nkehe kjuako ch'ín Jesús ntá itsje tí sín k'uájiko ch'án ntácho sín kíxin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

61 A ntá kónohe ch'ín Jesús kíxin xíkaha tóxakonhen sín kíenxínhya sín tí nkehe tsíntácho ch'án ntá kjuanchankíhi ch'án sín kíxin:

—¿Á kjáxinrá tjnkákonhyará tsinhínrá tíhi?

62 ¿Ntá nkexrí tsonhen chrók'uikonrá kíxin tí Xjeen Dios K'óna Chojni mé sátsji ch'án inaá tí nó tsíkixín ch'án tí tsíkjak'e ch'án ósé?

63 Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjetjonkará na mé kuente tí Nchakuen Dios na mé tjejóhónxin chojni.

64 Kjánchó isorá nağa titekákonnahyará —ichro ch'án.

Mé xikaha ichro ch'án kixin tí xrankixín ó kónohe ch'án kixin nkexro tí sín tsitekakuenhya sín ch'án la ko kónohe ch'án kixin nkexro sinchekji ch'án.

⁶⁵ A ntá ntáchro ch'án kixin:

—Méxra xikaha k'uétjonkará kixin ninkexró tsochjina tí tjén janhan tí tsjinkitsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'in Jesús ntá xrínghya kuitóhe sín, í chréhya sín ch'án.

⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxinrá tjinkáonrá xikaha sáchrókjuirá? —ichro ch'án.

⁶⁸ Ntá kjuátéhe ch'in Simón Pedro kixin:

—Jaha Inchéni, ¿nkekuénté tjanchankíhíni á sáchrókjuini ókjé? Jaha tí tan chronka a mé tsochóntaxínni kjuachón jnkochrín

⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátéhe ch'in Jesús ntáchro ch'án kixin:

—Janhan kjuéyá tí kaín rá teyórá la ko jnkojínrá ntihi mé ts'ónará ijnko jínhya —ichro ch'án.

⁷¹ Tíha mé t'axrjexín tí ntáchro ch'in Jesús chrónka ch'án kixin ch'in Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'in Jesús.

7

Tí sín jnkokoá kichó ch'in Jesús mé kuítekakuenhya sín ch'án

¹ Ntá kjuixin tíha ntá k'uáji ch'in Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án.

² Kjánchó ó kuichjina tí yáon kia ntá tí sín judío sich'éna sín itsjé its'van tsjasixín sín kia.*

³ A ntá tí sín kichó ch'in Jesús ntáche sín ch'án kixin:

—Chrókuítqahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian.

⁴ Kixin tió tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kaín xín chojni síin chjasintajni —mé chro sín.

⁵ Xikaha ntáchro tí sín kichó ch'án kixin kjaxin jehe sín titekakuenhya sín tí jehe ch'án.

⁶ A ntá kjuátéhe ch'in Jesús ntáchro ch'án kixin:

—Naxá kjuixrakáhya tí hora kuéntana tsjásian kjuaxroan. Ntá jahará la cualquier hora tjinkáonrá jina chrók'uikonrá kjuaxroan.

⁷ Tí sín chjasintajni xitjahya tsonínakonhanrá sín tí jahará. Ntá janhan na imá nínkakonna sín kixin ntátjan sín kixin jehya jina tí nkehe tjejóch'e sín.

⁸ Jahará la sájtjírá tí kia a. A ntá janhan la tjíhya kixin naxá kjuixrakáhya tí hora kuéntana —ichro ch'án.

⁹ Mé xikaha ntáchro ch'án ntá kuitóhe ch'án estado Galilea.

Itjen ch'in Jesús tí kia a

¹⁰ A ntá ó kjuixin sátsíkji tí sín jnkokoá kichó ch'in Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án.

* 7:2 Levítico 23.34

11 **A** ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

12 **A** ntá itsjé sín Ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jína ch'án”; kjánchó í so sín ntáchro sín kixin: “Jehya chojni jína ch'án, méxra imá ch'iyehé ch'án chojni”, ichro sín.

13 Kjánchó noxínha kjo sín xikaha kixin chrakonhen sín tí sín judío a.

14 **A** ntá ó kjuíji jnkosiné tí kia a ntá k'uixenhen ch'ín Jesús tí nínko jié ntá kjuankixin ch'án kjuako ch'án.

15 **A** ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakøghya ch'án? —ichro sín.

16 Ntá kjuátehe ch'ín Jesús ntáchro ch'án kixin:

—Tí nkehe tjákua la jehya kuèntana na mé tí xra kuènte tí nkexro tsíchr'ánna k'uinka.

17 Tí jnkoinrá tjinkáonrá chrókjuinchexiteyéhérá éxí tóxrjínhin Dios la tsonohará á chaxín kuènte Dios tí nkehe tjákua o á kuèntana tíha.

18 **A** ntá tí nkexro tjako tí nkehe t'axrjenixin kja sín ó mé xikaha ch'e kixin tjinkaon sín kixin tí chojni ó mé chróchóntehe sín ch'án kjuasáya. **A** ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

19 '¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekáuenhyará tí nkehe tsíkjin ch'án. ¿Méxra nkekuènté tjinkáonrá chrók'oyánrá tí janhan? —ichro ch'án.

20 Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'oyán tí jaha? —ichro sín.

21 Ntá kjuátehe ch'ín Jesús ntáchro ch'án kixin:

—Jnkokøá kjuaxroan kjuásian tí yaon t'ok'éheni ntá chrakonrá.†

22 **A** ntá ch'ín Moisés tsík'etoan kixin xjaanrá ntoa itsa xjan xroye, (kjánchó jehya ch'ín Moisés kjuankixin ch'án kjuako ch'án tíha, na mé tí sín tsík'axrjenixinrá kjuankixin sín kjuako sín tíha). Mé xikaha nchekará xjan tí xroye a kjónté yaon t'ok'éheni.

23 **A** ntá xikaha nchekará xjan xroye tí yaon t'ok'éheni kixin xikaha chrókjuinçek'itjáyankihyará ninkehó tí nkehe k'ueñoan ch'ín Moisés, ¿ntá nkekuènté kixin ninkáonará tí janhan kixin kjuintakítóhā jína ijnko chojni tí yaon t'ok'éheni?

24 Chrókjuanchahyará jié kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjínhin Dios —mé chro ch'ín Jesús.

Ch'ín Jesús chrónka kixin nketí k'uaxrjenixin ch'án

25 **A** ntá iso sín chjasin Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'ín a xritjeyá sín chrók'oyán sín?

26 Ntá jie noxín tjen ch'án nixja ch'án kohya ninkexró nínkakohen ch'án. Kjá tí síxreé titekaon sín kixin tí nkexro a chaxín Cristo tíha.

27 Kjánchó ó noheni nketí tsíkjin ch'án. **A** ntá tió tsi tí nkexro Cristo ntá ninkexró tsonohya nketí tsíxin ch'án —ichro sín.

† 7:21 Juan 5.2-9

²⁸ **A** ntá ch'ín Jesús kjuák'ekjako ch'án tí nínko jié ntá kuínhin ch'án kixin xikaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkíxian. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxa chonhyará tí nkexro a.

²⁹ Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

³⁰ Ntá chrótsé sín ch'án chrókjuak'echjina sín ch'án ntá kjónté ninkexró tséhya sín ch'án kixin naxa kjuanjonha Dios kjuachaxin chrótsé sín ch'án.

³¹ Kjánchó itsjé chojni kuítekaon sín tí jehe ch'án. **A** ntá ntáchro sín kixin:

—**A** ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

³² **A** ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín nchat'á t'etóan k'uuetuhenen sín iso sín policia kuénte nínko tsotsé sín ch'án tsjak'echjina sín ch'án.

³³ **A** ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjija tí tjen tí nkexro ichr'ánna.

³⁴ **A** ntá jahará tsjeyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

³⁵ **A** ntá tí sín judío kjuankixin sín kjuanchankíhi sín kichó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkiva griego kixin ntá tsjakóhe ch'án tí sín griego?

³⁶ ¿Nkexrí t'axrxín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntarío tjechón

³⁷ **A** ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kja tí jnkojínra ik'uénra ntá xrákirá its'irá ntá.

³⁸ **A** ntá éxi ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje ìnta tjechón —ichro ch'án.

³⁹ Mé xikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxa tihya tí Nchakuen Dios kixin ch'ín Jesús naxa sájtjehya ch'án nkaya nkajní.

Jnkokóahya kjuenkayáxin tí chojni

⁴⁰ **A** ntá iso sín tió kuínhin sín tí nkehe ntáchro ch'ín Jesús ntá ntáchro sín kixin:

—Kja chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuénté chrókjuixín Galilea tí nkexro Cristo?

42 Tí xroon tsikjin sín ósé mé chrónka kixin tí nkexro Cristo mé ts'axrjenixin tí sín k'uaxrjenixin tí ch'ín rey David la ko tsjixin ch'án chjasin Belén mé tí chjasin k'uékjak'e ch'ín David —ichro sín.

43 Mé xikaha jnkokoáhya kjuenkayáxin sín kaín sín kixin nkexro tí ch'ín Jesús.

44 Iso sín tjinkaon sín sáchrókuiko sín ch'án chrókuikjehe sín ch'án kjánchó ninxeró kjuích'ehya xikaha.

Tí síxreé kuítekakonhya sín tí ch'ín Jesús

45 A ntá tí sín policia kuente nínko mé kjan sín tí tjejó tí sín fariseo la ko tí sín nchat'a t'etqan. Ntá tí sín a mé kjuanchankíhi sín tí sín policia kixin:

—¿Nkekuénté kjuíkoahyará ch'án? —ichro sín.

46 Ntá kjuátehe tí sín policia kixin:

—Kohya ninkexró nixja éxí xikaha nixja tí ch'ín a —ichro sín.

47 Ntá ntáche tí sín fariseo tí sín policia kixin:

—¿Á kjaxinrá kuitohérá kjuít'ayahará ch'án?

48 ¿Á kuítekaon tí jehe ch'án jnkójín tí sín t'etqan kuénténi o tí sín fariseo?

49 A ntá tí sín a mé chónhya sín tí ley na mé tsjasóte sín —ichro sín.

50 A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

51 —Tí ley kuénténi la kohya kjuachaxin sinchekjasóteni ijnko chojni tí naxá kíenhyani nkehe nixja ch'án la ko kíenhyani tí jié kjuasin ch'án —ichro ch'án.

52 Ntá kjuátehe sín ntáchro sín kixin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsonoha kixin nijnko tí sín k'uéchrónka itén Dios tsikjixinhya sín tí estado Galilea —ichro sín.

Ijnko tjan kjuasin jié chóna ókjé chojni ntoa

53 Ntá jnkójnko tí sín xíka sín sákjuí sín ntqé sín.

8

1 Ntá ch'ín Jesús mé sákjuí ch'án tí jnā Olivo.

2 Ntá tí kóyaon nchítjen ikjan ch'án k'uixenhen ch'án tí nínko jié a la ko kaín xín tí chojni mé kóchjinehe sín ch'án. Ntá kjuák'etjaxin ch'án kjuankíxin ch'án kjuako ch'án.

3 Ntá tí sín tjako tí ley la ko tí sín fariseo mé kjuikao sín ijnko tjachjin kónoxíxin kixin chóna tjan ókjé chojni ntoa. Ntá kjuak'e sín tjan jnkosiné tí sín tjejó ntíha.

4 Ntá ntáche sín tí ch'ín Jesús kixin:

—Maestro, tí tjan i kónoxíxin kixin kjuasin tjan jié chóna tjan ókjé chojni ntoa.

5 A ntá tí ley tsikjin ch'ín Moisés mé t'etqan kixin ixrō chrók'óyánxinni tí chojni chjin xikaha ch'e. ¿A ntá jaha, nkechrua? —ichro sín.

6 Mé xikaha ichro sín kixin tjinkaon sín kixin ách'e ntoáhya chrókuatehe ch'ín Jesús ntá chrókjuanchia sín jié. Ntá ch'ín Jesús mé k'uísén ch'án kjinxin ch'án dedo tja ch'án nonte a.

7 Ntá naxá tinkákjanchankíhi sín ch'án. Ntá k'uínkatjen ch'án k'uetqan ch'án kixin:

—Xá nkexro tí tjejorá ntíhi chónahya ninkehó jié mé saoxín chróchjéhe sín tjan xro —ichro ch'án.

⁸ Ntá xík'isén ch'án inaá ikjin ch'án tí nche inaá.

⁹ Ntá tí sín a mé kuínhin sín tí nkehe k'uetóan ch'ín Jesús ntá kósuehe sín kixin koí sín chóna sín jie, ntá jnkojnko jnkojnko sín, sásitji sín na mé saxín tí ch'ín antsí má táda ch'án sákjuí ch'án, ntá kaín tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuitóhe sín ntiha.

¹⁰ Ntá xrentoá ch'án la kjuanchankíhi ch'án tjan kixin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kixin:

—Náhi, Ìnchéni, ninkexró —ichro tjan.

Ntá ntáchro ch'ín Jesús kixin:

—Kjaxin janhan sjintakjasótiahya. Sátjia la í tjasinhya jie inaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjehe ch'án tí sín tsíkóchjina inaá ntáchro ch'án kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítié a —ichro ch'án.

¹³ Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínhya tíha kixin jahvá tjechronka —ichro sín.

¹⁴ Ntá kjuátehe ch'ín Jesús ntáchro ch'án kixin:

—Janhván tjetjonkará nkexrí tjen na kjónté chaxín xrjanka kixin ó nòna nketí nó k'uinkaxian la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá.

¹⁵ Jahará la éxi chojni chjasintajni ó tékará jie. A ntá janhan la tékahya jie ninkexró.

¹⁶ Kjánchó ntoá chrókjuintakitoaxián ijje chojni kixin jehya janhván t'a tíha, T'aná tjékian, na mé tí nkexro k'uetuanna k'uinka ntihi na mé jehe ch'án mé tjékian ch'án ntihi ntakitoaxínkian ijje chojni.

¹⁷ A ntá tí ley tsíkjin ch'ín Moisés mé ntáchro kixin tí tsonoxín iyó sín tsochrónka á chaxín xikaha tsíkónhen ntá chrókuitekaon chojni.

¹⁸ Ntá janhan na mé tjéxrjanka nkexrí tjen janhan la ko kjaxin T'aná mé tí nkexro k'uetuanna k'uinka mé jehe ch'án kjaxin chrónka ch'án nkexrí tjen janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'ín Jesús ntáchro ch'án kixin:

—Jahará la chonhyará tí janhan la ko kjaxin chonhyará T'aná. Tí chróchoxoinrá tí janhan ntá kjaxin chróchoxoinrá tí T'aná —ichro ch'án.

²⁰ Mé xikaha chro ch'ín Jesús tí kjuák'ekjakoxxin ch'án tí ninko jie chjino ntacajón tjetóxroyéya chichaon tjanjon sín. Kjánchó ninkexró tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijjará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntáchro ch'án kixin xitjahya tsjijini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntihi k'uaxrjénixiná. A ntá janhan la nkaya nkajni k'uaxrjénixián. Jahará la kuènte chjasintajni ntihi. A ntá janhan la janhya kuènte chjasintajni.

²⁴ Mé xikaha tjonkará kixin tió ts'énrá naxa tsochontará ijiará kixin tí tsitékákonyará tí janhan, mé tí nkexro xráxín tjen,* ntá kjónté ts'énrá naxa tsochontará tí ijiará —ichro ch'án.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

—Tí xránkixixín kjuankixián tjonkará kixin nkexro tí janhan.

²⁶ Itsjé nkehe chonta chróntáxrjan kixin chrókujuintakitoaxián tí jie chonará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuinhan chrónka ch'án mé tjáqoha tí sín chjasintajni —ichro ch'án.

²⁷ Kjánchó jehe sín mé kíenxínnya sín kixin nixja ch'án kuènte It'é ch'án tjen nkaya nkajni.

²⁸ A ntá ntáchro ch'án kixin:

—Tió sinchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxín tjen.† Ntá tsonohará kixin jehya janhan tétōan tí xra jtét'a. Náhí. Jehó tí nkehe kjuakona T'aná mé tjétjaka.

²⁹ Tjékian tí nkexro k'uetuanna k'uinka kixin jehí xráxín T'aná la kuítōnahya janhván kixin xráxín ntaxiteyáha tí nkehe tóxrjinhin ch'án —ichro ch'án.

³⁰ Mé xikaha ntáchro ch'án ntá nchónnya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsitōhe sín ijie sín

³¹ Ntá nixjehe ch'ín Jesús tí sín judío kuinkáchónki sín ch'án ntáchro ch'án kixin:

—Tí tsitōéhyará tí tan kjuákohará ntá jahará chaxín discípulo kuèntāna

³² la ko tsjátsoanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsokohya nkehe ts'inkákonyen —ichro ch'án.

³³ Ntá kjuátehe sín ntáchro sín kixin:

—Jeheni mé tsík'axrjénixinni ch'ín Abraham na í xráxín kohya nkexro k'uena tí jeheni. ¿Nkekuènté ntáchrúa jaha kixin ts'áyéheni kjuachaxin tsaáxinni? —ichro sín.

³⁴ Ntá ntáchro ch'ín Jesús kixin:

—Tjetoan tí nkehe tjétjonkará kixin tí sín tjasin jie mé éxi chojni k'uíná chrokjuahya tsitōhe sín ijie sín.

³⁵ A ntá ijnko chojni k'uíná la jnkochrínxínnya tsjak'e ch'án tí ntōe tí nkexro a. A ntá tí xjeen tí nkexro na mé jnkochrínxín tsitōhe ntiha.

³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonyen.

³⁷ Ó nōna kixin jahará tsík'axrjénixinrá ch'ín Abraham. Kjánchó tjinkáonrá chrók'oyánrá tí janhan kixin títekákonyará tí nkehe tjéxrjanka.

* 8:24 Éxodo 3.14 † 8:28 Éxodo 3.14

³⁸ Janhan xrjanka tí nkehe k'uíkuañ kixin nkexrí tjen T'aná. A ntá jahará tjejonchexiteyéhérá tí nkehe kuínhínrá chrónka it'ará —ichro ch'án.

³⁹ A ntá jehe sín kjuátehe sín ntáchro sín kixin:

—It'éni mé ch'ín Abraham —ichro sín.

Kjánchó ntáchro ch'ín Jesús kixin:

—A ntá tí jahará chrókóchaxín xjeen ch'ín Abraham ntá chrókjuich'erá éxi kjuich'e ch'án.

⁴⁰ A ntá tjétjonkará tí tan chaxín kuinhan chrónka Dios na kjónté chrók'oyánrá tí janhan. A ntá ch'ín Abraham xjikhaya kjuich'e ch'án.

⁴¹ Jahará tjejoch'erá éxi kjuich'e it'ará —ichro ch'án.

Ntá ntáchro sín kixin:

—Jehya k'ónamá tí jeheni. Náhí. Chóntani jnkokoá It'éni mé Dios —ichro sín.

⁴² Ntá ntáche ch'ín Jesús tí jehe sín kixin:

—Tí chrókóchaxín kixin Dios mé It'ará la ntá chrótjuanará kixin janhan kjaxin k'uaxrjenixinna Dios k'uinkaxian tí tjen ch'án. Jehya kixin janhván k'uinka. Náhí. Dios mé ichr'ánna k'uinka.

⁴³ ¿Nkekuénté kixin tiénxinhyará tí nkehe tjonkará? Jehí tjinkákonhyará chrókuinhínrá tí nkehe xrjanka.

⁴⁴ Jahará mé xjeen Tsochren la ko jahará tsík'axrjenixinrá ch'án la ko tjinkáonrá sijnchexiteyará tí nkehe tjinkaon ch'án. Tsochren mé xrankixixin kjuaya ch'án. Nunca k'uénixja ch'án ntoá. Xrácín ch'ia ch'án kixin xjikhá tjenkayáxin ch'án. Jehe ch'án mé it'é kaín tí kjuach'ia.

⁴⁵ A ntá janhan tjétjonkará nkehe ntoá ntá titekákonnyará.

⁴⁶ ¿Á tjejorá jnkójinrá nohará nkerí jie kjuásian janhan? A ntá tí ntáxrjan tí nkehe ntoá, ¿ntá nkekuénté titekákonnyará?

⁴⁷ Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonnyará chrókuinhínrá itén ch'án —ichro ch'ín Jesús.

Cristo la ó xrácín tjen ntá chr'éxin kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátehe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan.

⁵⁰ Janhan na tjéyáhya nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuitekakonhya.

⁵¹ Imá tjeotan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'án.

⁵² Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchronka itén Dios ósé la mé ik'uén sín. Ntá jaha ntáchrua kixin tí tsítekaonni tí nkehe tjákua jaha ntá í ts'énhyani, ichrua.

⁵³ ¿Xá imá tétjan jaha la ntá kánhyó t'etoan it'éni Abraham? Jehe ch'án la ik'uén ch'án la ko kjaxin ik'uén tí sín k'uéchronka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'ín Jesús ntáchro ch'án kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchrórá kixin jehe ch'án mé Dios kuéntará.

⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyona tí jahará chrókjuit'ayahará. Kjánchó janhan na choxian ch'án la ko ntáxiteyáha tí nkehe t'etōan ch'án.

⁵⁶ Ch'in Abraham tí nkexro tsík'axrjenixínrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uikon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'in Jesús kixin:

—Jaha naxa chontahya cincuenta nánó, ¿na ntá nkekuénté ntáchrúa kixin ó k'uikuan tí ch'in Abraham? —ichro sín.

⁵⁸ Ntá kjuátehe ch'in Jesús ntáchró ch'án kixin:

—Imá tjetōan tí nkehe tjetjōnkará kixin naxa kohya ch'in Abraham mé xráxín itjén janhan —ichro ch'án.

⁵⁹ Ntá kuákja sín xro chróchéhe sín tí ch'in Jesús. Kjánchó kjuák'emá ch'án njnko ntá chr'éxin k'uaxrxjén ch'án ntiha. K'uátsínka ch'án jnkōsiné tí tjetjō sín sákjuí ch'án.

9

Ch'in Jesús kjuínchekitohe jina ijnko ch'in tsíkōkjéxín t'ikonhya ch'án

¹ K'uátsínka sín ijnko ntja ntá k'uikon ch'in Jesús ntiha tjen ijnko ch'in tsíkōkjéxín t'ikonhya ch'án.

² Ntá tí sín k'uájiko ch'in Jesús kjuanchankíhi sín ch'án kixin:

—Maestro, ¿Nkekuénté tsíkōkjéxín ch'án t'ikonhya ch'án? ¿Á ijíé it'é o iné ch'án o á ijíé ch'án? —ichro sín.

³ Ntá kjuátehe ch'in Jesús ntáchró ch'án kixin:

—Jehya ijíé ch'án la ko jehya ijíé it'é la ko iné ch'án. Náhi. Jehí xikaha tsíkónhen ch'án kixin tí kjuachaxién Dios tsjakōxin kixin tsitōexín ch'án jina.

⁴ Naxa nchakotjin t'ichjánxin sít'a tí xra tjinkaon tí nkexro tsíchr'anna. Ntá ts'ixín tie ntá kohya ninkexró tsjacha sich'e xra.

⁵ Naxa itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchró ch'án tíha ntá kuíkite ch'án ntāten ch'án intsí nche k'óna nchet'o ntá kuátematóxin ch'án ikon tí ch'in t'ikonhya.

⁷ Ntá k'uetuenhen ch'án tí ch'in t'ikonhya kixin:

—Sátjia tí pila tjiá ntā it'in Siloé t'ontia kuan —ichro ch'án. (A ntá tí ihnjé Siloé mé t'axrxjén nkívee sín kixin K'uítuenhen.)

Ntá sákjuí tí ch'in t'ikonhya k'ónti ch'án ikon ch'án ntá kjan ch'án k'uikon ch'án.

⁸ Ntá tí sín ntōe chjinaxón ntōe ch'án la ko tí sín k'uék'ikon sín kixin t'ikonhya ch'án mé ntáchró sín kixin:

—¿Á jehya tí ch'in i k'uékjak'etjaxín ch'án k'uékjanchak'á ch'án? —ichro sín.

⁹ Iso sín ntáchró sín kixin:

—Kjá chaxín jehe ch'án —ichro sín.

Ikjé sín ntáchró sín kixin:

—Náhi, jehya jehe ch'án. Tóyóhó ch'án tí ch'in a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jái t'ikuan jaha? —ichro sín.

11 Ntá kjuátehe ch'án ntáchro ch'án kixin:

—Ijanko ch'in mé it'in Jesús mé kjuíchéna ch'án nchet'o kuátematóxin ch'án kuan la ntá k'uetuanna ch'án kixin satsjia ti pila tjiá ntá nchek'in sín Siloé ts'ontia kuan, ichro ch'án. Ntá sákjuia k'ontia, ntá xringhya ó k'uikuan —ichro ch'án.

12 Ntá kjuanchankíhi sín ch'án ntáchro sín kixin:

—¿Nketí tjen tí ch'in a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'in k'uék'ikonhya kuítóhe jína

13 Ntá tí sín a sákjuiko sín tí ch'in k'uék'ikonhya sákjuíchréhe sín tí sín fariseo a.

14 A ntá tí sín yaon t'ok'éhe sín mé tsíkjich'éna ch'in Jesús tí nchet'o kjuínchekitoxín jína tí ch'in k'uék'ikonhya.

15 A ntá tí sín fariseo xíkjanchankíhi sín ch'án inaá kixin nkexrí kuítóhe ch'án jína t'ikon ch'án jie. Ntá kjuátehe ch'án ntáchro ch'án kixin:

—Kuátematóxin ch'án nchet'o kuan, ntá k'ontia kuan ntá jie t'ikuan —ichro ch'án.

16 Ntá iso tí sín fariseo ntáchro sín kixin:

—Tí chojni a jehya kuénte Dios kixin chóntahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jie tí ch'óna ch'án jie? —ichro sín.

Mé xíkaha jnkokónhya kjuenkayáxin tí jehe sín.

17 Ntá xíkjanchankíhi sín tí ch'in k'uék'ikonhya inaá kixin:

—¿Ntá jaha nkechrúa nkexro tíha tí nkexro kjuíntak'ikuan? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

18 Kjánchó tí sín judío kuítekakonhya sín kixin chaxín k'uék'ikonhya ch'án ntá jie t'ikon ch'án. Ntá k'uíyehé sín tí it'é la ko tí iné tí ch'in tsíkítóhe jína.

19 Kjuanchankíhi sín ntáchro sín kixin:

—¿Á xjaan tíhi tí ntáchrórá kixin tí tsíkokjéxin ch'án t'ikonhya ch'án? ¿Ntá nkexrí jie t'ikon ch'án? —ichro sín.

20 Ntá kjuátehe tí it'é la ko tí iné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxin ch'án t'ikonhya ch'án.

21 Kjánchó noehyani nkexrí kixin t'ikon ch'án jie la ko noehyani nkexro kjuínchekítóhe ch'án jína. Tjanchankíhírá ch'án, ó nteto ch'án, ntá jehe ch'án tsochrónka ch'án kixin nkexrí kuítóhe ch'án jína —ichro sín.

22 Mé xíkaha kjuátehe tí it'é la ko tí iné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen njnko tí sín titekaon kixin ch'in Jesús mé tí nkexro Cristo.

23 Mé xíkaha ntáchro tí it'é la ko tí iné ch'án kixin chrókjuanchankíhi sín ch'án, ó nteto ch'án, ichro sín.

24 Ntá yóxin xík'íyehé tí sín judío tí ch'in k'uék'ikonhya ntá k'uetuñhen sín ch'án kixin:

—Tjetsjehe Dios ntá ntoá chro_nka kíxin ó noheni kíxin tí ch'ín a na chón_ta ch'an j̄ie —ichro sín.

²⁵ Ntá tí ch'ín k'uék'ikonhya kjuátehe ch'án kíxin:

—Nonahya á chón_ta ch'án j̄ie o á chón_tahya ch'án j̄ie. Jnkokoá nkehe nóna kíxin senó k'uék'ikonhya ntá j̄ie t'íkuan —ichro ch'án.

²⁶ Ntá xíkjan_{ch}ankíhi sín ch'án inaá kíxin:

—¿Nkexrí kjuich'e ch'án kíxin kjuíntak'ikuan ch'án? —ichro sín.

²⁷ Ntá kjuátehe ch'án ntáchro ch'án kíxin:

—Ó kjuixin tjonkará kján_{ch}ó titekákonhyará. ¿Nkekuènté tjinkáonrá kíxin tsotjonkará inaá? ¿Á kjaxinrá tjinkáonrá tsochréhérá ch'án? —ichro ch'án.

²⁸ Ntá kónín_{ka}konhen sín ch'án la k'uántaxinh̄in sín ch'án la ko kjuátehe sín kíxin:

—Jaha la chréhé tí chojni a. A ntá jeheni na chréhēni tí nkehe k'uetōan ch'ín Moisés.

²⁹ Ó noheni kíxin Dios k'uénixjehē ch'ín Moisés. A ntá tí ch'ín a la noehyani nketí tsík̄j̄ix̄in ch'án —ichro sín.

³⁰ Ntá kjuátehe tí ch'ín ntáchro kíxin:

—Imá ókjé tíha. Tí ch'ín a mé kjuín_{ch}ek'ikonna. A ntá jahará ntáchrórá kíxin noahyará nketí tsík̄j̄ix̄in ch'án.

³¹ Ó noheni kíxin tienhya Dios tí nkehe tjanchia tí chojni chón_ta j̄ie. Jehó tinh̄in ch'án tí nkehe tjanchia tí sín titekaon Dios la ko nchexiteyēhe sín tí nkehe tjinkaon ch'án.

³² Nunca kienhyéni kíxin ijnko nkexro chrókjuin_{ch}ek'ikon ijnko chojni tsík̄kj̄éx̄in t'ikonhya.

³³ A ntá tí nkexro a tí chrókjuix̄inh̄ya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuátehe tí sín fariseo ntáchro sín kíxin:

—Jaha la nchónhya j̄ie chonta tió kokj̄íha. A ntá j̄ie ¿á tjinkávan kíxin jaha chrókjuá_kohéni ní? —ichro sín.

Ntá kótéka sín tí ch'ín a kíxin ts'axrjex̄in ch'án tí n̄in_{ko} a sátsji ch'án.

Ntakótán nchakuen sín

³⁵ Ntá kuín_hin ch'ín Jesús kíxin x̄ikaha k'uetuēnhen tí sín judío kíxin ts'axrjex̄in n̄in_{ko} tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kíxin:

—¿Á tinkachón_kia tí Xjēn Dios K'óna Chojni? —ichro ch'án.

³⁶ Ntá kjuátehe tí ch'ín a ntáchro ch'án kíxin:

—Tjákohéni nkexro tíha kíxin ntá tsinkáchón_kini ch'án.

³⁷ Ntá kjuátehe ch'ín Jesús ntáchro ch'án kíxin:

—Ó k'uíkuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exin toch'in ch'án to_té ch'ín Jesús ntáchro ch'án kíxin:

—Ijje kuítekavan tí jaha Ìnchéni —ichro ch'án.

³⁹ Ntá ntáchro ch'ín Jesús kíxin:

—K'uinka ntihi chjasintajni kíxin sj̄intakitoaxián ij̄jé chojni kíxin ntá tí sín t'ikonhya la mé ts'ikon sín, a ntá tí sín t'ikon j̄ie la í ts'ikonhya sín —ichro ch'án.

⁴⁰ A ntá iso tí sín fariseo k'uej̄óntaxin kuín_hin sín kíxin x̄ikaha ntáchro ch'ín Jesús, ntá kjuanchankíhi sín ch'án kíxin:

—¿Xá kjaxin jeheni ntakótáni? —ichro sín.

41 Ntá kjuátēhe ch'ín Jesús ntáchro ch'án kixin:

—A ntá tí jahará tí chaxín chrók'uiikonhyará ntá chróchontahyará jie. Kjánchó ntáchrorá kixin t'ikonrá. Méxra chontará jie —ichro ch'án.

10

Ch'ín Jesús ncheyóexín tí t'inkachjina kolélo

1 Ntá ntáchro ch'ín Jesús kixin:

—Imá tjetóan tí nkehe tjetjónkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'ui xenxín ch'án na mé xíchee tíha la tjinkaon chrókueé.

2 A ntá tí nkexro t'ixenxín tí puerta na mé nkexro t'ayakonhen tí kolélo a.

3 La ko tí ch'ín tjet'ayakonhen tí puerta a mé tsakitjēhe ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsōan va itén ch'án. Ntá t'íyexín ch'án jnkojnko ihnié jnkojnko tí kolélo kuente ch'án ntá ts'axrjexín va ntōe va.

4 Ntá t'íkon ch'án kixin k'uaxrje kaín va ntá kuítonhen ch'án va ntja ntá tinkáchrēhe va kixin tjatsōan va itén ch'án.

5 Chrohya va tjichréhe va ijnko chojni ókjé na mé tsinkéhe va tí chojni a kixin tjatsōanhya va itén ókjé chojni —ichro ch'án.

6 Mé xíkaha ntáchro ch'ín Jesús kjuíncheyóexín ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jína

7 Ntá chrónka ch'ín Jesús inaá ntáchro ch'án kixin:

—Ijnko nkehe tjetóan tsotjónkará kixin janhan la éxí tí puerta t'ixenxín tí kolélo tí t'inkachjina va.

8 Kaín tí sín kuitónxin ntja kui senó mé xíchee la ko chrókueé. La ntá tí kolélo la ántōsén va tí nkehe ntáchro tí jehé sín.

9 Janhan mé tí puerta a mé t'ixenxínrá tí janhan mé tsaará la mé tsyóhgará tí kolélo síin kjuachaxín ts'axrjexín va tí kōrré va sátsjikjine va la ko síin kjuachaxín ts'ixenhen va tí ts'inkachjina va inaá.

10 'A ntá xíchee mé jehó chrókueé la ko tjinkaon chrók'óyán la ko chrókjuinček'itjáyán kaín nkehe. A ntá janhan k'uinka kixin tsóchontaxínrá kjuachón na mé kjuachón jnkochríxín.

11 Janhan mé ijnko pastor jína a ntá tí pastor jína mé ts'enyákonhen tí kolélo a.

12 A ntá tí nkexro ch'e xra tjinkaon chrókjuacha ó na mé ts'íkon ch'án itsi ijnko kolobo tsítōhe ch'án tí kolélo sátsji ch'án kixin jehé ch'án la jehya tí nkexro t'ayakonhen tí kolélo la ko jehya kolélo kuente ch'án. Ntá tí kolobo mé tsotsé va tí kolélo ntá tsinká va la sátsjichroe va.

13 Mé xíkaha tí chojni tjinkaon chrókjuacha tí xra chrókjuich'e ó la mé sátsji. A ntá tí kolélo la ántōsén ch'án kuáhya ch'án kuenté tí jehé va.

14-15 'A ntá janhan mé ijnko pastor jína. Mé xíkaha T'aná chóxin ch'án tí janhan la ko kjaxín janhan choxian tí jehé ch'án mé xíkaha choxian janhan tí sín éxí kolélo kuéntana la ko jehé sín mé chóxin sín tí janhan. Ntá ts'enyákonhan tí sín éxí kolélo kuéntana.

16 Kjaxín chonta kolélo naxa jehya kōrré va ntihi mé kjaxín t'ichjánxín sátsjicakjián va. A ntá tí tsitekakonna va ntá ts'óna jnkokqá kōrré va la ko jnkokqá nkexro ts'ayakonhen va.

17 Tjuana T'aná kixin kjónté its'én la tsoxechónna ínaá.

18 Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna ínaá. Tíhi mé k'uetuanna T'aná —ichro ch'ín Jesús.

19 Tió kuínhin tí sín judío tí nkehe ntáchro ch'ín Jesús ntá kjuankixin jnkokoáhya kjuenkayáxin sín.

20 Nchónhya tí jehe sín ntáchro sín kixin:

—¿Nkekuénté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

21 Ntá ikjé sín ntáchro sín kixin:

—Xikahya chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

Tí sín judío kuítékakuenhya sín tí ch'ín Jesús

22 A ntá tí nchakuen kin tí chjasin Jerusalén k'uúxin kia xraxinkakonxín sín tí yaon tsikjixin tsík'óna njnko.

23 Ntá ch'ín Jesús itjen ch'án tí njnko tí ntásin kuènte Salomón.

24 Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchóhenni tsinhinni jína? A ntá jie chonka ntoá kixin á chaxín jaha tí Cristo —ichro sín.

25 Ntá kjuátehe ch'ín Jesús kixin:

—Ó tjonkará ntá naxa títekákonhyará. Kaín tí xra jté'a janhan tí kjuachaxin kuènte T'aná mé tjáqoxin nkexro tí janhan.

26 Kjánchó jahará títekákonhyará kixin jahará la jehya kolélo kuèntana éxi tjonkará senó.

27 Tí kolélo kuèntana mé tjatsqan va tí tanná la ko kjaxin janhan tjátsqan tí jehe va la ko jehe va mé chréhe va tí janhan.

28 Janhan mé tjaha va tí kjuachón jnkochrín la í ts'itjáyanyha va la ko ninkexró tsjachahya tsakitsjexín va tjaná.

29 Ó kjuanjon T'aná, mé tí nkexro tjetóxin t'etqan, na ninkexró tsjacha tsakitsjexín va tí tja ch'án.

30 Janhan la ko T'aná na mé jnkokoá nkexro tíha —ichro ch'án.

31 Ntá tí sín judío kuákja sín xro chróchjéhe sín ch'án ínaá.

32 Ntá kjuátehe ch'ín Jesús ntáchro ch'án kixin:

—Nchónhya nkehe jína k'uikonrá kjuákoxian kjuachaxin kuènte T'aná. ¿Ntá nkekuénté chróchjinára xro? —mé chro ch'án.

33 Ntá kjuátehe tí sín judío kixin:

—Jehya tí kjuaxroan jína tjásian chrótjiáxiánni xro. Náhí. Jaha ijnko chojni ó ntá kjuincheyóhé asán Dios na mé tsotjiáxiánni xro —ichro sín.

34 Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjaxinrá éxi Dios tí jahará.”*

35 Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé xikaha ntáchro Dios kixin éxi Dios jnkojnko nkexro k'uáyéhe itén ch'án.

* 10:34 Salmo 82.6

³⁶ A ntá kjueyána Dios ichr'ánna ch'án chjasintajni, ¿ntá nkekuènté ntáchrorá kixin k'uántaxínhan Dios kixin janhan ntáxrjan kixin Xjeen Dios tí janhan?

³⁷ Kja tí chrókjuít'ahya tí xra ich'e T'aná la chrókuítekákonhyará.

³⁸ A ntá kjónté tjét'a tí xra a kjónté títékákonhyará tí janhan na mé chrókuítekáonrá tí xra tjét'a chrókónoaxínrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

³⁹ Mé xikaha chrótsé sín tí ch'ín Jesús ínaá chrók'uikjéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xíkjan ch'án tí í jnko lado ntario Jordán ínaá tí k'uékjak'e ch'ín Juan k'uékikítexín ch'án chojni senó.

⁴¹ Ntá nchónhya chojni sákjuíchréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jíe la kjónté ntoá tí nkehe chrónka ch'án kuènte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

¹ Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta.

² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuikítexín aceite xraxé toté Ìnchéni la ko kjuínchexámáxin tjan kaxíhi tjan toté ch'án.*

³ A ntá yóí tí kichó ch'án chjin ichr'án sín ijnko nkexro tsochénta tí ch'ín Jesús kixin:

—Ìnchéni jaha, tí nkexro choxian tjuèhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

—Tí chin chóntha ch'án jehya kixin ónaá chrók'uitjáyanxón ch'án tí ts'en ch'án. Náhi. Tíha mé tsjakoxín tí kjuachaxin jíe kuènte tí Xjeen Dios —ichro ch'án.

⁵ A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro.

⁶ Na ntá tíó kuínhin ch'án kixin níhi ch'ín Lázaro na kjónté kuítqhe ch'án iyó yaon ínaá tí nó kjuák'e ch'án.

⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea ínaá —ichro ch'án.

⁸ Ntá kjuátqhe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha ínaá? —ichro sín.

⁹ Ntá ntáchro ch'ín Jesús kixin:

—Jnkojnko yaon mé chóntha teyó hora. Tíó ixri chojni nchakotjin tsóténkixínhya sín ninkehó kixin t'inkaséyanxín xrohi chjasintajni a.

¹⁰ Tí sín ixri tie mé tsóténkixín sín nkehe kixin chónthaha sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sjintakjayaḡa ch'án —ichro ch'án.

* 11:2 Juan 12.3

12 Ntá ntáchro tí sín k'uájiko ch'án kixin:

— Ìnchéni, tí k'uájua ch'án la mé chrókuitòhe ch'án jína — ichro sín.

13 Kjánchó tí nkehe ntáchro ch'ín Jesús mé t'axrjexín kixin ó tsíkjin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjejú ch'ín Lázaro.

14 Ntá ntoá chrónka ch'ín Jesús kixin:

— Ó tsík'en ch'ín Lázaro.

15 Ntá chàna kixin kohyana ntiha kixin mé xikaha tsitékákoxínrá. A ntá jie íntará sátsjitsjeheni ch'án — ichro ch'án.

16 Ntá ch'ín Tomás, kjaxin tikítexín sín ch'án ch'ín Nohé, mé ntáche ch'án tí í so sín kixin:

— Sátsjini koíni kaín ni ts'enkaóni Ìnchéni — ichro ch'án.

Ch'ín Jesús ntáchro ch'án kixin sinchexechón ch'án chojni ínaá

17 Ntá kjují ch'ín Jesús kuínhin ch'án kixin ch'ín Lázaro la ó chóna noó yaon tsíkji xravá ch'án.

18 A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ò kjínxin.

19 A ntá itsjé tí sín judío sátsíkjitsjehe sín tí tjan Marta la ko tí tjan María tjejónixjehe sín kixin kánhyó ts'ává sín kixin tsík'én tí kichó sín a.

20 Ntá kuínhin tjan Marta kixin ó kui ch'ín Jesús ntá k'uaxrjexín tjan nchia tsjixinhin ntja. A ntá tí tjan María kuítòhe tjan nchia.

21 Ntá tí tjan Marta ntáche tí ch'ín Jesús kixin:

— Ìnchéni jaha. Chrókjuak'e ntihi ntá chrók'uenhya kichó ni.

22 Kjánchó ó nòna kixin Dios tsotjáha kaín nkehe tsjanchehé ch'án — ichro tjan.

23 Ntá ntáchro ch'ín Jesús kixin:

— Tsoxechón kichuá ínaá — ichro ch'án.

24 Ntá ntáchro tjan Marta kixin:

— Ó nòna kixin tsoxechón ch'án tió tsoxechón kaín tí sín tsík'en, tí yaon tsjixixín — ichro tjan.

25 Ntá ntáchro ch'ín Jesús kixin:

— Janhan mé ntáxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxá sintaxechón sín ínaá.

26 La ko kaín xín tí sín naxá tjejóchón sín la tsitekaon sín tí janhan na ts'enhya sín. ¿Á titekávan xikaha ní? — ichro ch'án.

27 Ntá ntáchro tjan kixin:

— Chaxín Ìnchéni titekávan kixin jaha mé Cristo, mé Xjeen Dios, mé tí nkexro kui chjasintajni — ichro tjan.

Tsjánka ch'ín Jesús tí tsíkji xravá nkexro Lázaro

28 Ó kjuixín ntáchro tjan Marta xikaha ntá sákjuík'iyehé tjan kichó tjan María ntá imó chénka tjan kixin:

— Ntiha tjen Maestro t'iyahá ch'án — ichro tjan.

29 Ntá kuínhin tjan María ntá tuénxín k'uínkatjen tjan sákjuítsjehe tjan tí ch'ín Jesús.

30 Naxá tsík'ixenhya ch'án chjasin naxá tjen ch'án tí xéta ch'án tjan Marta.

31 Ntá tí sín judío tjejónixjehe tjan María kixin kánhyó ts'ává tjan, mé k'uíkon sín kixin tjoka k'uaxrjexín tjan nchia, ntá kjuíchréhe sín tjan kjuenkayáxin sín

kíxin sátsji tjan tí tsíkji_xravá kíchó tjan, ntaha tsjitsjánkàma tjan ch'án, ichro sín.

³² Ntá tí tjan María mé kjuíji tjan tí tjen ch'ín Jesús ntá kjuák'exín toch'in tjan toté ch'án ntáchro tjan kíxin:

—Ínchéni jaha, chrókjuak'e jaha ntíhi ntá chrók'uenhya kíchíná —ichro tjan.

³³ Ntá k'uíkon ch'ín Jesús kíxin tsjánka tí tjan María la ko tí sín judío kjuikotoxín tjan ntá imá k'uává ch'án kóxakonhen asén ch'án.

³⁴ Ntá kjuanchankí ch'án kíxin:

—¿Nketí kjuavará ch'án? —ichro ch'án.

Ntá ntáchro sín kíxin:

—Ínchéni, ¿á sátsjitsjehé? —ichro sín.

³⁵ Ntá tsjánka ch'ín Jesús.

³⁶ Ntá ntáchro tí sín judío kíxin:

—Tsjuhérá kíxin imá tjuèhe ch'án tí ch'ín tsik'en —ichro sín.

³⁷ Kjánchó í so sín ntáchro sín kíxin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'avá asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsik'ikjèxin ijnko xro.

³⁹ Ntá k'uetqan ch'ín Jesús kíxin:

—Tjakjíyan tí xro a —ichro ch'án.

A ntá tí tjan Marta mé kíchó tí nkexro k'uén mé ntáchro tjan kíxin:

—Ínchéni, kjá noha kíxin kjá imá xra kíxin ó chóna noó yaon tsík'en ch'án —ichro tjan.

⁴⁰ Ntá kjuátèhe ch'ín Jesús ntáchro ch'án kíxin:

—Ó tjonka kíxin tsítekávan ntá ts'ikuan tí kjuachaxin jié kuènte Dios —ichro ch'án.

⁴¹ Ntá kjuakjìin sín tí xro a. Ntá ch'ín Jesús konta ch'án nkajní ntáchro ch'án kíxin:

—It'éni, tjáncháha kjuasáya kíxin ó kuínhín tí nkehe ntáxrjan.

⁴² Janhan na ó nòna kíxin xráxin tjetinhín tí nkehe ntáxrjan ntá xikaha ntáxrjan jie kíxin tsinhín tí sín tjejóntaxín ntíhi ntá tsitekaon sín kíxin jaha mé kuétoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kíxin:

—¡Lázaro, t'axrjéxian méhe! —ichro ch'án.

⁴⁴ Ntá tí ch'ín tsik'en k'uaxrjéxín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkjèxin ijnko ka. Ntá k'uetqan ch'ín Jesús kíxin:

—Tjasintankará tí ka chróntetoxín ch'án kíxin jína tsji ch'án —ichro ch'án.

Imó kjuenkayáxin sín kíxin nkexrí ts'óyan sín tí ch'ín Jesús

(Mt. 26.1-5; Mr. 14.1-2; Lc. 22.1-2)

⁴⁵ Ntá itsjé tí sín judío sákjuikotoxín sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án.

⁴⁶ Kjánchó iso tí jehe sín sákjuítsjehe sín tí sín fariseo kjuíchénha sín tí kjuaxroan tsikjasin ch'ín Jesús.

⁴⁷ Ntá tí sín fariseo la ko tí sín nchat'á t'etqan jnkokoá kójnkotséko sín tí sín antsí t'etqan, la ntáchro sín kíxin:

—¿Xá nkexrí chrókjuich'eheni tí ch'ín a kixin jehe ch'án mé tjasin ch'án kjuaxroan jié?

⁴⁸ A ntá tí chrókuítōheni ch'án xikahó ntá kaín xín chojni chrókuitekaon sín tí jehe ch'án, ntá tsi tí sín romano t'etōan sinchek'itjáyān sín tí n̄nkoēni la ko tí xra chótani la ko tí nación kuéntēni —ichro sín.

⁴⁹ Ntá ch'ín Caifás mé tí nkexro t'etuenhen tí sín ncha'tá tí nánó a ntáche ch'án tí jehe sín kixin:

—Jahará la noahyará ninkehó tíha

⁵⁰ la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjasēni kixin ntá chrók'uitjáyānhya kuenté tí nación kuéntēni —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhi. Jehé ch'án mé k'uetuenhen tí sín ncha'tá tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía.

⁵² A ntá jehya tí nación kuēnte sín ó chrók'uenyákonhen ch'án. Náhi. Kjaxin kixin sinchekaá ch'án kaín tí sín ts'óna xjeen Dios tjejó sín kuenté chjasintajni.

⁵³ A ntá tí yaon a tí sín t'etuenhen tí sín judío mé kjuankixin sín kjuenkayáxin sín kixin chrók'óyán sín tí ch'ín Jesús.

⁵⁴ A ntá ch'ín Jesús la í noxínhya k'uáji tí k'uéjé tí sín judío, na mé k'uaxrjéxín ch'án tí estado Judea, sákjuí ch'án chjinaxón nteje, tí tjen ijnko chjasin it'ín Efraín. Ntaha kuitōeko ch'án tí sín k'uájiko ch'án.

⁵⁵ Ntá í séhya ntá ts'ixín tí kia pascua mé ijnko kié tí sín judío. Ntá itsjé chojni k'uaxrjéxín sín chjasén sín sákjuí sín chjasin Jerusalén kixin ntaha tsyaxínhin sín kixin tsotjóa sín kjónté naḡa xrankíxinhya ts'ixín tí kia pascua.

⁵⁶ Ntaha k'uájikjeyá sín tí ch'ín Jesús k'uéjóxēnhen sín tí n̄nko jié ntá kjuanchankíhi sín kichó sín kixin:

—¿Jahará nkechorá? ¿Á chrókjuí ch'án tí kia ní o náhi? —ichro sín.

⁵⁷ A ntá tí sín fariseo la ko tí sín t'etuenhen tí sín ncha'tá na ó k'uetōan sín kixin tí sín ijnko nkexro nohe nketí tjen ch'ín Jesús chróchrónka sín kixin ntá jina chrókjuitsé sín ch'án chrókjuinchenteto sín ch'án la ko chrókjuak'echjina sín ch'án.

12

Ijnko tjan kjuíncheká tjan aceite xraxé náxrjón toté tí ch'ín Jesús (Mt. 26.6-13; Mr. 14.3-9)

¹ Naḡa t'itjáyān injon yaon ntá ts'ixín tí kia pascua. A ntá ch'ín Jesús sákjuí ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án.

² Ntá ntíha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyáxin tjan. A ntá tí ch'ín Lázaro la ko í so sín k'uéjé sín kjóneko sín tí ch'ín Jesús.

³ Ntá tjan María kuikḡo tjan it'ō litro aceite tsík'óna xroḡan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxíhi tjan kjuínchexámáxin tjan tí toté ch'án. Na mé kuenté nkaxēnhen nchia kókaxraxé tí xroḡan.

⁴ Ntá ch'ín Judas Iscariote, it'é ch'án mé it'ín Simón, jehe ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxín, mé ntáchro ch'án kixin:

5 —¿Nkekuènté kóxiha tí xroaṅ xraxé, chrókóxiṅ iní ciento chichaon denario kíxin chrókjuinkĩta tí sín nòà? —ichro ch'án.

6 Kjànchó ch'ín Judas la jehya ntáchro ch'án xikaha kíxin chrókjuikonóḡe ch'án tí sín nòà. Náhí. Ntáchro ch'án tíhi kíxin xráxín chee ch'án kíxin jehe ch'án t'ayakonhen ch'án tí nkehe tjínká chichaon ntá xráxín teé ch'án tí chichaon tsixrenájín ntiha.

7 Ntá ntáchro ch'ín Jesús kíxin:

—Nté títòhérá tjan. Tsíkjak'echjina tjan tí xroaṅ a kíxin tí yaon tsoxrávána.

8 Tí sín nòà jnkochrín ts'ejokoará sín. A ntá janhan jnkochrínnya ts'ejóni —ichro ch'án.

Tí sín judío itjo sín nkexrí chrók'óyán sín tí ch'ín Lázaro

9 A ntá itsjé tí sín judío k'uixikónohe sín kíxin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kíxin chrókjuitsjehe sín tí ch'ín Jesús ó. Náhí. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús.

10 Ntá tí sín ncha'tá t'etqaon mé kójnkotsé sín kjuenkayáxin sín chrók'óyán sín tí ch'ín Lázaro kjaxin

11 kíxin itsjé tí sín judío kuítekaon sín tí ch'ín Jesús kíxin xikaha kjuínchexechón ch'án tí ch'ín Lázaro ntá k'uaxrjekjanxín sín tí sín ncha'tá.

K'uixenhen ch'ín Jesús chjasin Jerusalén

(Mt. 21.1-11; Mr. 11.1-11; Lc. 19.28-40)

12 Nchónhya chojni sátsíkji sín chjasin Jerusalén kíxin tí kia pascua. A ntá tí yaon chr'éxin k'uixikónohe sín kíxin tsjiji ch'ín Jesús tí chjasin ntiha.

13 Ntá kóchrínjin sín chaan ntakajni kjuíxinhin sín ntja itsji ch'ín Jesús, itsje sín, ntáchro sín kíxin:

—Tjancheheni Dios kjuasáya. Imá jína tí nkexro kjuíxin tí kjuachaxién It'éni tjen nkaya nkajni. Imá jína tí ch'ín Rey ts'etuenhen tí nación Israel —ichro sín itsje sín.

14 Ntá tsík'itja ch'ín Jesús ijnko kolócho la ntá kjuák'ekjen ch'án, éxí nixja itén Dios kíxin:

15 Chrakonhyará jahará tjejorá chjasin Jerusalén, tsjehérá ó tjekei tí ch'ín Rey kuèntará,

tjekjen ch'án ijnko kolócho.*

16 A ntá tíó kónhen tíha kíenxínnya tí sín k'uájiko ch'ín Jesús kíxin nkekuènté xikaha kónhen. A ntá chr'éxin tíó kjuíxin sákjuíjia ch'án nkaya nkajni ntá xraxinkaon sín kíxin xikaha tsíkjin tí sín k'u'échrónka itén Dios ósé nkexrí tsonhen ch'án, na ntá xikaha chaxín xiteyá tí chrónka sín senó kíxin xikaha tsonhen ch'án.

17 Mé xikaha kaín tí sín tsíkójnkotsé tí kjuák'e ch'ín Jesús tíó k'uíyḡe ch'án tí ch'ín Lázaro kíxin ts'axrjéxin ch'án tí tóyè tsíkji xravá ch'án ntá xechón ch'án mé tí sín a mé chrónka sín tí nkehe k'uikon sín.

18 Mé xikaha sákjuíxinhin sín tí ntja tsjixín ch'ín Jesús, k'uixikónohe sín kíxin xikaha tsíkjasin ch'ín Jesús tí kjuaxroan jíé.

19 Mé xikaha ntáchro tí sín fariseo itjo sín kichó sín kíxin:

—Tsjehérá kaín rá, ninkehó tsjachahyani sich'eni kíxin kaín xín chojni sákjuíchréḡe tí jehe ch'án —ichro sín.

Iso sín nkivee griego tjejá sín tí ch'ín Jesús

* 12:15 Zacarías 9.9

20 Iso sín nixja griego k'uéjórakjan tí sín sákjuí sín tí kia chjasin Jerusalén tsoxaxinkakonxín sín Dios.

21 Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónóhehe sín ch'án kixin:

—Tjinkaonni chrók'uikonni tí ch'ín Jesús —ichro sín.

22 Ntá ch'ín Felipe sákjuichenka ch'án tí ch'ín Andrés. Na ntá yóí sín sákjuichenka sín tí ch'ín Jesús.

23 Ntá ntáchro ch'ín Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhe ch'án tí kjuachaxin kuènte It'é.

24 A ntá tsotjónkará ijnko nkehe chaxín kixin tí chrókjuítsínkahya ijnko noatrigó tí nche chrók'uenhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kixin chrótjá sín.

25 A ntá tí nkekro imá tjuèhe asén kixin kohya nkehe chrók'uatsínka na mé tsochóntahya ch'án kjuachón jnkochrixin. A ntá tí nkekro tjejuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochónta ch'án kjuachón jnkochrixin.

26 A ntá tí jnkojín nkekro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkojín sín sich'ena sín xra xikaha na mé T'aná mé tsjikosáyehe tí jehe sín.

Ch'ín Jesús chrónka ch'án kixin its'en ch'án

27 Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kixin sinchekaána ch'án tí nkehe tsona jie o náhi? Kjánchó xra ó k'uinka xikaha tsona.

28 Jaha It'éni, tjákoxian tí kjuachaxin kuènte ihníá —ichro ch'án.

Ntá kuínhin sín nixja ijnko nkekro nkajni ntáchro kixin:

—Ó kjuixin kjuákoxian tí kjuachaxin la ko xikaha xikjákoxian inaá.

29 A ntá tí sín tjejóntaxín tsíkinhin sín mé ntáchro sín kixin kjónta, la ko í so sín ntáchro sín kixin:

—Ijnko ch'ín ángel nixjehe ch'án —ichro sín.

30 Kjánchó ntáchro ch'ín Jesús kixin:

—Náhi. Jehya kixin janhan tí jie chrókuinhan tí nixja ch'án. Náhi. Nixja ch'án kixin tsinhírá jahará.

31 Ntá jie tsitoxín tí ijje chojni chjasintajni na mé tí nkekro t'etóan chjasintajni mé ts'axrjehe ch'án tí xra t'etóan ch'án.

32 A ntá tió tsjak'énkánja ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

33 Mé xikaha chrónkaxín ch'án kixin nkekri ts'enixín ch'án.

34 A ntá kjuátehe tí sín ntiha ntáchro sín kixin:

—Kuínhinni nchekuáxin sín tí xroon tsikjin sín ósé chrónka kixin Cristo la jnkochrixin tsjak'e ch'án. ¿Ntá nkekuènté ntáchrúa kixin tí Xjeen Dios K'óna Chojni t'ichjánxin tsjak'enkání ch'án ijnko ntacruz? ¿Xá nkekéhe tí Xjeen Dios K'óna Chojni? —ichro sín.

35 Ntá ntáchro ch'ín Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen tí xrohi t'inkaséyanxín ntja. A ntá náhi la ó ts'ixin tie. A ntá tí sín ixri tí sitié a mé noehya sín nketí sátsji sín.

³⁶ Títékáonrá tí xrohi tí naxá tjen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'ín Jesús

³⁷ K'uékjasin ch'ín Jesús nchónhya kjuaxroan jié k'uikonxín kon sín ntá kjónté kuítekakuenhya sín ch'án

³⁸ Kixin mé xikaha tsoxiteyá tí nkehe tsintáchro ch'ín Isaías tsíkjin ch'án ósé kixin:

Inchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuènte ch'án.†

³⁹ Méxra kuítekakuenhya sín tí ch'ín Jesús éxi tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókiénxínhya sín,

kixin ntá chrókóchjinehya sín tí janhan kixin chrókjuintakitoha sín jína.‡

⁴¹ Xikaha k'uéchónka ch'ín Isaías imá ósé kixin k'uék'ikon ch'án tí kjuachaxin jié kuènte Jesús ntá k'uéchónka ch'án nkexrí tsjak'e tí ch'ín Jesús.

⁴² Kjánchó itsjé tí sín judío t'etōan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonhya sín kjuachaxin chrók'uixenhen sín tí njnkoé sín judío.

⁴³ Mé xikaha imá kóxrjínhín sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'ín Jesús mé tsitoexín ijié chojni

⁴⁴ Ntá itsen nixja ch'ín Jesús ntáchro ch'án kixin:

—Tí títékáonrá tí janhan na mé jehya janhván títékáonrá na mé kjaxin títékáonrá T'aná, mé tí nkexro k'uetuanna k'uinka.

⁴⁵ Éxi tí t'ikonrá tí janhan mé xikaha t'ikonrá tí nkexro k'uetuanna k'uinka.

⁴⁶ A ntá janhan mé xrohi k'uinka chjasintajni kixin tí sín títékaon sín tí janhan ts'ejóhya sín tí sítíé a.

⁴⁷ A ntá tí jnkojínrá tinhínrá tí nkehe xrjanka ntá títékákonnyará la jehya janhan sjntakjasótiará kixin jehya kixin k'uinka sjntakjasóte chojni chjasintajni. Náhi. K'uinka kixin sjntakaa chojni.

⁴⁸ A ntá tí títékákonnyará tí janhan la ko títékákonnyará tí tan kuèntana la ó siin nkexrí tsitoexín ijjará, na mé éxi tí tan xrjanka mé Dios sinchekitōexín ijjará tí yaon tsjixixín chjasintajni.

⁴⁹ Jehya tí nkehe kuèntana tjéxrjanka. Náhi. T'aná na mé tí nkexro k'uetuanna k'uinka mé k'uetuanna nkehe tsoxrjanka la ko nkehe tsjákua.

⁵⁰ A ntá nóna kixin tí nkehe k'uetōan T'aná mé xranjonxín tí kjuachón jnkochríxín. Mé xikaha tí nkehe ntáxrjan mé tjéxrjanka kixin T'aná mé k'uetuanna.

13

Ch'ín Jesús kjuínchek'onti ch'án toté tí sín k'uájiko ch'án

¹ A ntá tí yaon xika tí ntóye tsjasin sín tí kia pascua. A ntá ch'ín Jesús ó nohe ch'án kixin ó kjuixraká tí hora tsitōhe ch'án chjasintajni sátsjichréhe ch'án It'é

ch'án. Xráxín tjuèhé ch'án tí sín kuènte ch'án chjasintajni, a ntá jie tsjakoxin ch'án kixin imá tjuèhe ch'án tí jehe sín.

² A ntá tí ch'ín Tsochren tsík'etuñhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús.

³ Ntá ch'ín Jesús la ó nohe ch'án kixin tsíkixin ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsíkjanjon kjuachaxin ts'etuñhen ch'án kaín xín nkehe.

⁴ Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xamáxin chojni t'ónti k'uínkat'óxin ch'án.

⁵ Ntá kuikja ch'án ijnko nkehe ntá, ntá kjuankíxin ch'án kjuínchek'ónti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjujixiraká tí tjen ch'ín Pedro, a ntá ntáchro ch'ín Pedro kixin:

—Jaha Ìnchéni la, ¿nkekuènté chrókjuínchek'óntia toténi? —ichro ch'án.

⁷ Ntá kjuátehe ch'ín Jesús ntáchro ch'án kixin:

—Jaha la naxa tiénxinhya tí nkehe tjét'a janhan. Chr'éxin ntá tsiénxian nkekuènté tjét'a tíha —ichro ch'án.

⁸ Ntá ntáchro ch'ín Pedro kixin:

—Jaha la sinchek'óntihya toténi —ichro ch'án.

Ntá ntáchro ch'ín Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'án.

⁹ Ntá kjuátehe ch'ín Simón Pedro ntáchro ch'án kixin:

—Náhi, Ìnchéni. Jehya tí toténi ó chrókjuínchek'óntia. Kjaxin itjani la ko ikjan chrókjuínchek'óntia —ichro ch'án.

¹⁰ Ntá ntáchro ch'ín Jesús inaá kixin:

—Tí sín tsíkixin tsík'ónti la t'ichjánxinhya kuenté sín ts'ónti sín inaá. Náhi. Jehó toté sín ó mé t'ichjánxín naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

¹¹ Mé xikaha ntáchro ch'ín Jesús kixin kénhya sín tjóá sín kixin ó nohe ch'án nkexro sinchekji ch'án.

¹² Ntá tió kjuixin kjuínchek'ónti ch'án toté sín kaín sín ntá xík'inkáya ch'án inaá tí ka kuítsáte ch'án ntá kjuák'etjaxin ch'án tí k'uínkatjenxin ch'án. Ntá ntáchro ch'án kixin:

—¿Á kiénxinrá tí nkehe kjuít'a?

¹³ Jahará la ntáchrorá kixin janhan Maestro kuéntará la ko Ìnchará. Chaxín ntoá ntáchrorá kixin janhan tíha.

¹⁴ Janhan tí Maestro kuéntará la ko ìnchará kjuíntak'óntia totará. A ntá jahará kjaxin xikaha chrókjuínchek'óntirá toté kichuára.

¹⁵ Janhan mé kjuákoxián kixin xikaha chrókjuích'erá éxi kjuít'a janhan.

¹⁶ Ijnko nkehe chaxín tsotjonkará kixin tí sín ch'exón xra mé t'etqanhya sín éxi t'etqan tí lámqe sín, la ko tí sín k'uáyéhe sín ijnko xra t'etqanhya sín éxi t'etqan tí sín kjuanjon tí xra a.

¹⁷ Tí chrókiénxinrá nkehe tíha la ko chrókjuínchexiteyará la chrókócháhará má.

¹⁸ Jehya kaín rá xikaha ntáxrjan. Ó nòna kixin nkexro kjuéyá janhan. Kjánchó t'ichjánxín tsoxiteyá tí nkehe tsíkjin sín ósé ntáchro kixin: “Ijnko nkexro tjéñkian mé tsjanjonkian.”*

* 13:18 Salmo 41.9

19 Mé xikaha tjetjonkará senó kixin tió ts'atsínka tíha ntá tsítekáonrá kixin janhan mé tí nkexro xráxin tjen.

20 Ijnko nkehe tjeotan tjetjonkará kixin tí tsjánjonrá kjuachaxin tsitohe tí chojni ichr'an janhan, mé éxí yóhe chrókjuánjonrá kjuachaxin chrókuítóhe tí janhan, a ntá tí tsjánjonrá kjuachaxin tsitona janhan mé éxí yóhe chrókjuánjonrá kjuachaxin chrókuítóhe tí nkexro k'uetuanna k'uinka —ichro ch'in Jesús.

*Ch'in Jesús chrónka kixin ch'in Judas sinchekji ch'an
(Mt. 26.20-25; Mr. 14.17-21; Lc. 22.21-23)*

21 Ntá kjuixin chrónka ch'in Jesús tíha, ntá kóxakonhen asén ch'an má ntá ntoá chrónka ch'an kixin:

—Ijnko nkehe tjeotan tsotjonkará kixin jnkojínrá tjejorá ntihi mé sinchekjiráni —ichro ch'an.

22 Ntá tí sín k'uájiko ch'an kjuanjixin komáxin la ko í komáxin kichó sín kixin noehya sín nkexro tí ntáchro ch'an.

23 A ntá ijnko ch'in k'uájiko ch'in Jesús imá tjuèhe ch'an itjen ch'an chjinaxón tí tjen ch'in Jesús tjejóne sín.

24 Ntá ch'in Simón Pedro kjuakqexín seña k'uetuennen ch'an tí í jnko ch'in a kixin:

—Tjanchankíhí ch'an nkexro tíha —ichro ch'an.

25 A ntá tí ch'in a na mé antsí kóchjinehe ch'an tí ch'in Jesús, ntá kjuanchankí ch'an ntáchro ch'an kixin:

—Ínchéni, ¿nkexro tíha? —ichro ch'an.

26 A ntá kjuátèhe ch'in Jesús ntáche ch'an tí ch'in a kixin:

—Sintakjata it'ò niotja, a ntá tí nkexro tsotjaha tí t'ò niotja a mé tí nkexro a —ichro ch'an.

A ntá mé xikaha kjuínchekjata ch'in Jesús it'ò niotja ntá chjéhe ch'an tí ch'in Judas Iscariote, it'é ch'an mé it'in Simón.

27 Ntá k'uáyèhe ch'an tí niotja ntá tuénxín k'uúixenhen asén ch'an tí ch'in Tsochren. Ntá ntáche ch'in Jesús tí jehe ch'an kixin:

—Tí xra tjinkávan sich'e la jaí tóxakonhan —ichro ch'an.

28 Kjánchó nijnko tí sín tjejóne ntiha kienxínhya sín nkekuèté xikaha ntáchro ch'an.

29 Ch'in Judas la t'ayakonhen ch'an tí nkehe tjinká chichaon ntá iso sín kjuenkayáxin sín kixin ách'e ch'in Jesús mé k'uetuennen ch'an tí ch'in Judas kixin ichrén nkehe sátsjik'ena ch'an kuènte tí kia a, o ách'e ichrén nkehe sinchekitonhen ch'an tí sín nò a.

30 Ntá k'uáyèhe ch'in Judas tí niotja, a ntá k'uaxrxéxin ch'an ntiha. A ntá ó k'uúixin tie.

Ijnko nkehe nixin k'uetqan ch'in Jesús

31 A ntá ó kjuixin sátsíkji ch'in Judas, ntá ntáchro ch'in Jesús kixin:

—A ntá jie tsonoxín tí kjuachaxin jié kuènte tí Xjeen Dios K'óna Chojni la ko tsjakoxin ch'an tí kjuachaxin jié kuènte Dios.

32 Na mé xikaha tí Xjeen Dios K'óna Chojni mé tsjakoxin tí kjuachaxin jié kuènte Dios. A ntá Dios mé tsjakoxin ch'an tí kjuachaxin kuènte Xjeen ch'an la tjoka tsoxiteyá.

³³ Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxí yóhɛ k'uétjanka tí sín judío mé tjonkará kjaxinrá kixin: Ninkexró xitjahya tsjiji sín tí sátsjiyá janhan.†

³⁴ Ijnko nkehe nixin tétuñhanrá ijie kixin chrótjuèhérá kichuára éxí yóhɛ tjuahará mé xikaha chrótjuèhérá kichuára.

³⁵ Tí tsotjuèhérá kichuára ntá tsonoxín kaín xín chojni síin chjasintajni kixin tinkachónkirá tí janhan —ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án

(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

—Ínchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án kixin:

—Tí nó sátsjiyá xitjahya tsochréhérá jaí. Ntá chr'éxin tsjasánchréhérá ntiha —ichro ch'án.

³⁷ A ntá ntáchro ch'ín Pedro kixin:

—¿Nkekuènté xitjahya tsochráha tí jaha jaí? Kjonté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákónna jaha? Ijnko nkehe chaxín tsotjonka kixin naxa tsotsjehya tí kochíntoa la ó tsjixin sijnchemána níya kixin chonhyana, tsixrua.

14

Jesús mé ntia sátsjixinni tí tjen It'éni tjen nkaya nkajní

¹ Tóxakuanhyará jahará. Títekáonrá Díos la ko kjaxin títekáonrá tí janhan.

² Ntoe T'aná nchónhya nchia síin ts'ejóni. A ntá tí xikahya chrók'uixin la xikahya chrótjonkará. Méxra sátsjiyá sintayóxian tí chrók'uejóni.

³ A ntá tí sátsjiyá sintayóxian, ntá tíó tsjixin ntá ts'ínka inaá, ntá sátsjini kixin jahará kjaxin chrók'uejorá ntiha tí tsjak'é janhan.

⁴ Jahará la ó nohará nketí sátsjiyá la ko ó nohará tí ntia a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Ínchéni, noehyani nketí sátsjia jaha. ¿A ntá nkexrí chrókónoheni tí ntia a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí ntia la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jina tsjiji tí tjen T'aná.

⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxínrá ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

—Ínchéni, títóhéni kixin tsochóxinni It'á. Táho mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

—Felipe, ósé tjejóni, ¿a ntá naxa tjátsoanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuènté tjanchàna kixin chrókuitohá chrók'uikonrá tí T'aná?

¹⁰ ¿Á títekákonhya jaha kixin janhan jnkokoá tjékian T'aná, la ko T'aná tjen tí tjeñ janhan? Tí nkehe níxja janhan la jehya kuèntana. Náhi. T'aná tjékian janhan mé tjech'e ch'án tí xra kuènté ch'án.

† 13:33 Juan 7.33

11 Títekáonrá kixin jnkokoa tjékjan T'áná, a ntá T'aná itjen tí tjén janhan. Kjónté kuítekáonhyará xikaha la chrókuítekáonrá kixin tí kjuaxroan jié kjuákoxián k'uikonrá.

12 Ijnko nkehe chaxín tjonkará kixin tí chaxín tsítekáonrá tí janhan ntá kjaxinrá tsjachará sích'erá xra yóhé tjét'a la ko kjaxin ixra antsi jié tsjachará sích'erá kixin janhan la ó sátsjiyá tí tjen T'aná.

13 Kaín nkehe tsjanchatóxiáinrá tí nina na mé tsjánjuan kixin xikaha tsjákoxián tí kjuachaxin kuente T'aná.

14 Tí chrén nkehe tsjanchatóxiáinrá nina la janhan la tsjánjuan.

Ch'in Jesús chrónka ch'án kixin chaxín tsochr'án ch'án tí Nchakuen Dios

15 Tí chaxín tjuèhérá tí janhan ntá chrókjuinchexiteyéhérá tí nkehe kuétuanhanrá.

16 Ntá tsoxrjannóaha T'aná kixin tsochr'án ch'án Nchakuen ch'án kixin tsjinkitsa tí jahará la ko sinchechéhe asánrá la mé ts'ejokoará jnkochr'ín.

17 Jehé ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin tjejokoará ch'án la ko ts'ejokoará ch'án jnkochr'ín.

18 Janhan na tsitóahyará nõerá jahóra, na mé tsokjan inaá kixin ts'ejóni.

19 A ntá séhya ntá tí sín chjasintajni ts'ikonhya sín tí janhan inaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjéchuán.

20 A ntá tí yaon a chróónohará kixin T'aná la ko janhan jnkokoá tjékjan la ko kjaxin jahará la ko janhan jnkokoá tjejóni.

21 Tí nkexro nohe tí nkehe tétóan la ko sinchexiteyéhe sín mé xikaha tsjákoxián sín kixin chaxín tjuéhe sín tí janhan. A ntá tí tjuéhe sín tí janhan ntá T'aná mé tsotjuéhe tí jehé sín la ko kjaxin janhan tsotjuáha sín la ko tsjákoxián nkexri tjeén janhan —ichro ch'in Jesús.

22 A ntá tí ch'in Judas, jehya tí ch'in Iscariote tíha, na mé kjuanchankí ch'án kixin:

—Ínchéni, ¿nkekuènté jehóni tjákoxián, a ntá tjákoéxinhya tí chojni chjasintajni? —ichro ch'án.

23 Ntá kjuátéhe ch'in Jesús ntáchro ch'án kixin:

—Tí nkexro tjuéhe tí janhan mé sinchexiteyéhe tí nkehe tétóan. La ko T'aná mé tsotjuéhe tí jehé sín la ntá T'aná la ko janhan ts'ejókoni sín.

24 A ntá tí sín tjuéhya tí janhan la mé nchexiteyéhe sín tí nkehe tjákua. A ntá tí nkehe tjákua tjejotinhínra la jehya kuéntana. Náhi. Kuente T'aná tí nkexro k'uetuanna k'uinka.

25 Naxa tjejóni la tjetjonkará kaín tíhi.

26 A ntá Nchakuen T'aná tsochr'án ch'án kjuachaxin nina mé tsjinkitsa tí jahará la ko sinchechéhe asánrá la ko tsjákoahará kaín nkehe la ko sinchexraxinkaonrá kaín nkehe xrxanka.

27 Kjuaxróxin tsitóha la ko kjuaxróxin kuéntana tsotjahará. Jehya éxi tí kjuaxróxin chrókjanjon tí sín chjasintajni. Náhi. Chróókakuenhya asánrá la ko chróchrakonhyará.

28 Ó kuínhínra ntáxrjan kixin sátsjiyá la ko tsokjan janhan ts'ejóni inaá. Tí chaxín tjuèhérá tí janhan ntá chróókóháhará tí kuínhínra kixin sátsjiyá tí tjen T'aná kixin antsi t'etóan ch'án la kánhyó tétóan janhan.

29 Senó tjetjonkará tíhi kixin tió tsonhen tíha la ts'ikonrá ntá tsitékáonrá jahará.

30 'Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuñhen tí sín chjasintajni. A ntá jehe ch'án la ninkehó t'etuannahya tí janhan.

31 Kjánchó t'ichjánxin kixin xikaha tsonhen ntá tí sín chjasintajni mé tsonhe sín kixin tjuahá T'aná la ko nchexiteyáha tí nkehe k'uetuanna ch'án. Ntá jie t'inkatjenrá sátsjixínni ntíhi.

15

Tí nta t'óna to uva la ko tí chaan nta

1 Janhan mé éxi yóhe ijnko ntanò tjechón itsa to uva la ko T'aná mé éxi yóhe tí nkexro t'ayakonhen tí nta a.

2 Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna qntsí má tsjé to.

3 A ntá jahará la kótjuáxinrá tí tanná k'uetjonkará senó.

4 Tí tsitóehyará tí janhan ntá kjaxin janhan tsitóahya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahóra tsjachahyará s'ich'erá tí xra kuéntana tí tsjtohérá tí janhan.

5 Janhan na mé yóhe tí ntanò, a ntá jahará la tí chaan tí ntanò tsik'ayanta. Tí nkexro jnkokoá tjenkayáxinkian mé tsjacha ts'óna nchónhya to. A ntá tí tsinkáchónkihya sín tí janhan la ninkehó xra tsjachahya sín sich'e sín.

6 A ntá tí nkexro jnkokoáhya tjenkayáxinkian na mé éxi yóhe tí nta ch'ehya xra tsikóchrínjin sín tsik'itjí sín chrínta tí nonte a tsqxámá ntá tsorexjo ntá tsöhe.

7 'Ntá tí chaxín tsitóehyará tsinkachónkirá tí janhan la ko ts'itjáyanyhará tí nkehe kjuákohará ntá tsjanchiará ichrén nkehe tjinkáonrá la ts'ayéhérá.

8 A ntá T'aná la tsöchéhe ch'án tí ts'ónará itsjé to. Mé xikaha tsjákoxinrá kixin tinkachónkirá tí janhan.

9 Janhan tjuahará tí jahará éxi tjuana T'aná. Chrókónohará kixin tjuahará.

10 Tí tsitékáonrá tí nkehe kuétuñhanrá ntá tsonohará kixin tjuahará éxi yóhe kjaxin janhan ntaxiteyá tí nkehe k'uetuanna T'aná ntá kónona janhan kixin tjuana ch'án.

11 'Mé xikaha tjonkará kaín tíha kixin ntá éxi chàna mé xikaha tsjintaxín tsochéhe asánrá.

12 Tí nkehe kuétuñhanrá la mé tíhi kixin chrótjuèhérá kichuárá éxi tjuahará xikaha.

13 Ninkexró chrókóyóhe éxi tí nkexro imá tjuèhe tí sín chóxin ch'án ntá ts'enyákonhen ch'án tí jehe sín.

14 Jahará la chojni choxian tí tsitékáonrá tí nkehe tétuñhanrá.

15 Ntáxrjanhya janhan kixin jahará chojni ch'exón xra kixin tí chojni xikaha ch'exón xra mé noehya sín nkehe tí xra ch'e tí lámoe sín a. Náhí. A ntá jahará la chojni choxian kixin kaín xín nkehe kjuakona T'aná mé kjuákohará.

16 Jehya kixin jahará kjuéyará tí janhan. Náhí. Janhan mé kjuéyá tí jahará kixin tsotjahará xra, a ntá éxi yóhe to xé mé chrók'uaxrje jina tí xra s'ich'enará kixin chrók'uitjáyanyha. A ntá T'aná mé tsotjahará ch'án kaín xín nkehe tsjanhexínrá njina.

17 Mé xikaha tétuñhanrá kixin tsotjuèhérá kichuárá.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

18 Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín.

19 Tí chrókókuentará chjasintajni ntá tí sín chjasintajni chrótuahará sín kixin naxa kjéhyará sín. Kjánchó janhan kjuéyá tí jahará kixin chrók'uaaxrjékjanxínrá tí sín síin chjasintajni. A ntá tí sín chjasintajni nínkakonhanrá sín kixin jahará jahyará kuentará chjasintajni.

20 Xráxinkáonrá tí nkehe tsítjonkará kixin tí sín ch'ehe lámoe sín xra tjetóxinhya ts'etóan sín.* Éxí yóhe chónkìna sín mé xíkaha tsochónkíhi sín tí jahará. A ntá tí kuítekaon sín tí nkehe kjuákoḡa sín ntá kjaxin tsitekaon sín tí nkehe naxa tsjákoḡerá sín.

21 Mé xíkaha sit'ahará sín kixin jahará tinkachónkirá tí janhan la ko jehe sín chónhya sín tí nkexro ichr'ánna k'uinka ntihi.

22 Tí chrók'uinkahya janhan ntihi chrónixjahya sín ntá chrókuamáhya sín jje. Ntá jíe kohya nkerí tsaáxin sín kixin tí jje tinkákjasin sín.

23 Tí sín nínkakonna mé xíkaha nínkakonhen sín T'aná.

24 Chróchóntahya sín jje tí chrók'uejókianhya sín ntihi chrókuásinhya janhan kjuaxroan jíe éxí tsíkjasinhya ninkexró senó. Ntá jie ó k'uúkon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin.

25 Mé xíkaha tsonhen kaín tíha kixin ntá tsoxiteyá tí nkehe ntáchro tí ley kuente sín kixin: "Kohya jje kjuásian janhan ntá kjónté kónínkakonna sín."†

26 A ntá tsi tí nkexro tsjinkítsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuente T'aná. A ntá jehe ch'án mé tsochrónka nkexrí tjén janhan

27 la ko jahará kjaxinrá tsochroḡkará nkexrí tjén janhan kixin tí xrankíxixín la k'uéjóni jnkokoḡa.

16

1 Kaín tíhi tjetjonkará kixin chrókuítoéhyará tí nkehe kjuákoḡará.

2 Tí sín judío tsjanjonhya sín kjuachaxin ts'ixenhenrá nínkoḡe sín la ko tsjixraká tí yaon kixin tí sín ts'óyan sín tí jahará tsontáchro sín kixin xíkaha mé tjejóch'e sín xra kuente Dios, tsixro sín.

3 Mé xíkaha sich'e sín kixin chónhya sín T'aná la ko chónhyana sín.

4 A ntá tjonkará kaín tíhi kixin tíó tsjixraká tí yaon xíkaha tsonhen ntá tsoxráxinkáonrá kixin ó k'uétjonkará senó a.

Tí xra ch'e Nchakuen Dios

*Tí xrankíxixín k'uétjonkahyará tíhi kixin jnkokoḡa k'uék'ejóni.

5 Ntá jie sátsjiyá tí tjen tí nkexro ichr'ánna k'uinka. Kjánchó nijnkorá tjanchankíhyará nketi sátsjiyá.

6 Ntá kjuixin tjonkará tíha ntá imá t'avará kixin kuínhínrá xíkaha xrxanka.

7 A ntá chaxín tí nkehe tjetjonkará kixin íchá jína sátsjiyá kixin jahará jína chrók'uejorá. A ntá tí sáchrókjuíhya ntá chrókuihya tí nkexro tsjinkítsará. A ntá tí sátsjiyá janhan ntá tsétoan kixin itsi ch'án ntihi.

8 A ntá tíó tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jie, la ko itjen ijnko ntia ntoá chrókuakja sín la ko Dios mé sinchekitoexín tí jie kjuasin sín.

* 15:20 Juan 13.16 † 15:25 Salmo 35.19; 69.4

9 Xikaha chón̄ta sín̄ j̄iē k̄ixin tinkáchón̄kihya sín̄ tí janhan.

10 A ntá t̄sonohe sín̄ k̄ixin itjen tí nt̄ja ntoá k̄ixin sáts̄jiyá tí t̄jen T'aná ntá ts'ikonhyará tí janhan inaá,

11 la ko t̄sonohe sín̄ k̄ixin Dios sinchekit̄oexín̄ ij̄iē k̄ixin ó k̄juixin kuít̄oexín̄ ij̄iē tí nkexro t'et̄oan chjasintajni k̄ixin tsjasóte.

12 Nax̄a chonta janhan its̄jé nkehe chrót̄jonkará, k̄jánchó chrók̄juachahyará chrók̄iēxinrá jie.

13 A ntá tió t̄si tí Nchakuen Dios chaxín̄ ntoá ntá jehe tí Nchakuen Dios mé ts̄jakohará ch'an̄ kaín̄ xín̄ nkehe ntoá. Méxrā jehya tí nkehe kuènte ch'an̄ tsochrónka ch'an̄ na mé tí nkehe tsinhin ch'an̄ mé tsochrónka ch'an̄ ts̄jakohará ch'an̄ tí nkehe t̄sonhen chr'éxin̄.

14 Jehe ch'an̄ mé ts̄jikos̄ayana ch'an̄ k̄ixin ts'áyéhe ch'an̄ tí nkehe kuènt̄ana ntá ts̄jakohará ch'an̄ nkehe tíha.

15 Kaín̄xín̄ nkehe chón̄ta T'aná na mé kuènt̄ana. Mé x̄ikaha ntáx̄rjan k̄ixin tí Nchakuen Dios chaxín̄ ntoá mé ts'áyéhe ch'an̄ tí nkehe kuènt̄ana ntá ts̄jakohará ch'an̄ nkehe tíha.

Senó ts'avá sín̄ ntá chr'éxin̄ ts̄ochéhe sín̄

16 Ntá í séhya la í ts'ikonhyará tí janhan. La ko k̄j̄axin̄ séhya xik'ikonrá tí janhan inaá k̄ixin sáts̄jiyá tí t̄jen T'aná —ichro ch'an̄.

17 Ntá iso tí sín̄ k'uáj̄iko ch'an̄ mé k̄juanchankíhi sín̄ k̄ichó sín̄ k̄ixin:

—¿Nkexrí t'ax̄rjexín̄ tí nkehe ntáchro ch'an̄ k̄ixin í séhya ts'ikonhyani ch'an̄ la ko k̄j̄axin̄ séhya ntá xik'ikonni ch'an̄ inaá k̄ixin sáts̄ji ch'an̄ tí t̄jen It'é ch'an̄?

18 ¿Nkexrí t'ax̄rjexín̄ tí ntáchro ch'an̄ k̄ixin “í séhya”? Méxrā tienxín̄hya nkehe tí ntáchro ch'an̄ —ichro sín̄.

19 Ntá kón̄ohe ch'in̄ Jesús tí nkehe chrók̄juanchankíhi sín̄ ch'an̄ ntá ntáche ch'an̄ sín̄ k̄ixin:

—Xikaha t̄jonkará k̄ixin í séhya ts'ikonhyará tí janhan la ko k̄j̄axin̄ séhya xik'ikonrá tí janhan inaá. ¿Á tíha mé t̄jet̄jonchankíhírá k̄ichuárá ní?

20 T̄j̄ét̄jonkará ij̄nko nkehe chaxín̄ k̄ixin imá tsots̄jan̄kará la ko ts'avará. A ntá tí chojni chjasintajni la ts̄ochéhe sín̄. A ntá jahará ts'avará la ko s̄intanihará k̄j̄onté chr'éxin̄ ts̄ocháhará má.

21 Éxí yóhe ij̄nko t̄jan sinchekok̄j̄íhi t̄jan x̄jeen t̄jan mé imá tóxakonhen t̄jan k̄ixin ó k̄juixraká ts̄joté t̄jan. A ntá ts̄jixin tsok̄j̄íhi x̄jan ntá í x̄raxinkakonhya t̄jan nkexrí k̄joté t̄jan k̄ixin chéhe t̄jan kok̄j̄íhi ij̄nko x̄jan ntíhi chjasintajni.

22 Mé x̄ikaha jahará ij̄ie t'avará. Ntá xik'ikuān̄ tí jahará inaá ntá imá ts̄ochéhe asán̄rá la ko ts̄okohya ninkexró tsakitsajahará tí k̄juachéhe tsochon-tará.

23 Tíó t̄si tí yaon a ntá ts̄janchankínahyará ninkehó. Chaxín̄ tí nkehe t̄j̄ét̄jonkará k̄ixin T'aná tsot̄jáhará ch'an̄ kaín̄ nkehe ts̄janchatóxixín̄rá n̄ina.

24 Nax̄a k̄juán̄chatóxixín̄hyará ninkehó tí n̄ina. Ntá jie t̄janchará la ts'ayéherá, a ntá ts̄jintaxín̄ ts̄ocháhará.

Ínchén̄i Jesucristo mé k̄juacha ch'an̄ k'uēt̄oan ch'an̄, ntá chjasintajni la náhi

25 Tí nkehe t̄j̄ét̄jonkará mé k̄juintayóaxián̄ ó. Ntá ts̄jixraká tí yaon la í ninkehó s̄intayóaxián̄ na mé ntoá ts̄ot̄jonkará nkexrí t̄jen T'aná.

26 A ntá tí yaon a mé ts̄janchaxín̄rá nkehe n̄ina. Ntá ntáx̄rjanhya tíhi k̄ixin tsonix̄jayákonhanrá tí t̄jen T'aná

²⁷ Kíxin jehe T'aná mé tjuahará jahará. Na mé tjuahará ch'án kíxin jahará tjuanará tí janhan la ko kíxin kuítekáonrá kíxin janhan k'uinkaxian tí tjen Dios.

²⁸ K'uaxrjéxian tí tjen T'aná k'uinka chjasintajni. Ntá jie la ó tsjtoḡa chjasintajni ntá sátsjiyá inaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kíxin:

—Ntá jie ntoá tjéchronka ninkehó ncheyoéxinhya.

³⁰ Ntá jie tienxínni kíxin jaha mé noha kaín xín nkehe la ko t'ichjánxinhya kíxin jnkojín nkexro chrókjuanchankíha sín ichrén nkehe. Méxra xjkaha titekaonni kíxin jaha mé k'uinkaxian tí tjen Dios —ichro sín.

³¹ Ntá kjuátēhe ch'ín Jesús ntáchro ch'án kíxin:

—¿Á jie kuítekáonrá ní?

³² Ntá tsi tí yaon na mé jie tíha na ntá tsochraonrá jnkojnkorá tsoxíkará sátsjirá ntá tsjtonará janhván tsjak'é. Kjánchó jehya janhván tjén. T'aná mé tjékjan.

³³ Tjéjtjonkará kaín tíhi kíxin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjónté kjuaxróxinhya tjejorá tjejtjasóterá kjánchó chraonhyará kíxin janhan mé ó kjuixin kjuacha tsétoan. A ntá tí chjasintajni la kjuachahya ts'etoan —ichro ch'án.

17

Ch'ín Jesús chrónóḡe ch'án It'é ch'án kíxin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajní ntáchro ch'án kíxin:

—Jaha It'eni, ó kjuixraká tí yaon a. A ntá jie chróchjehé tí Xjaan antsí má kjuachaxin kíxin kjaxin tí Xjaan chrókjuikosáyehe tí jaha.

² Jaha tsichjehé kjuachaxin tí Xjaan kíxin ts'etuñhen ch'án kaín xín chojni na ntá jehe ch'án tsochjéhe kjuachón jnkochrínín kaín tí sín tsíchjehé ch'án.

³ Tí kjuachón jnkochrínín mé t'axrjéxín kíxin tsochóxian sín tí jaha tí jnkokoá Dios chaxín tjechón la ko kjaxin tsochóxin sín Jesucristo la mé jaha kuétuñhén ch'án kui ch'án ntihi chjasintajni.

⁴ Ó kjuixin kjuikosáyaha tí jaha ntihi chjasintajni kjuixinna tí xra chjina sit'a.

⁵ A ntá jie It'eni, chjina jaha tí kjuachaxin jie k'uéchonta janhan tí k'uéjóni jnkokoá naxa k'ónahya chjasintajni.

⁶ Ó kjuixin kjuákoḡa tí sín chjina chjasintajni kíxin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuákoḡa sín itán la ntá ijie la ó kuítekaon sín.

⁷ Ntá jie ó kjuátsoan sín kíxin kaín tí kjuachaxin chonta janhan la jaha tsíkjánjuan.

⁸ Kíxin ó kjuixin kjuákoḡa sín tí tán chjina jaha, ntá kuítekaon sín, ntá kuénxín sín kíxin mé chaxín tsík'inkaxian tí tjen jaha, na mé kuítekaon sín kíxin jaha kuétuñna k'uinka.

⁹ Janhan mé xrjanóaha kíxin chrók'uayakonhén tí jehe sín. Jehya kíxin xrjannóaha kíxin chrók'uayakonhén kaín tí chojni sín chjasintajni. Náhi. Jehó xrjanóaha kíxin chrók'uayakonhén tí sín chjina kíxin kuéntá sín.

10 A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jié kuéntana mé ts'inkaséyanxín tí jehe sín.

11 'A ntá jie tsitonahya janhan ntihi chjasintajni. Kjánchó jehe sín naxa tsitoge sín chjasintajni. A ntá jie tsjasán tí tjen jaha. Jaha It'eni imá jina jaha, t'ayakuexián sín tí kjuachaxin tí ihniá kixin ntá jnkokoá chrókjuenkayáxin sín éxi tí jaha la ko janhan jnkokoá tjenkayáxinni.

12 A ntá tí naxa k'uéjókian tí jehe sín ntihi chjasintajni la k'uàyakuánxián sín tí kjuachaxin tí ihniá chjina. Nijnko tí jehe sín k'uitjáyannya sín. A ntá jnkokoá nkexro mé k'uitjáyan mé tí ch'in xráxin ts'itjáyan kixin xikaha tsoxiteyá éxi nixja tí xroon tsíkjin sín.

13 'Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tihi kixin ntá tsochéhe sín éxi yóhe imá chána.

14 Janhan mé kjuáqoha sín itán jaha, a ntá jie tí sín chjasintajni mé nínkakonhen tí jehe sín kixin jehe sín la jehya kuénte chjasintajni éxi kjaxin janhan na janhya kuéntana chjasintajni.

15 Tjáncháhya kixin chrókuakítsjehé sín chjasintajni. Náhi. Tjáncháhá kixin chrók'uayakonhén sín kixin chrókjuich'iyehya sín tí Jínahya.

16 Jehe sín la jehya kuénte chjasintajni éxi yóhe janhan kjaxin janhya kuénte chjasintajni.

17 Nchetjuáxian sín tí kjuachaxin kuéntá kixin itán jaha mé tí tan chaxín ntoá.

18 Éxi yóhe jaha kuétuanna k'uinka chjasintajni mé xikaha janhan tétuanhan sín kixin chrók'uejójákjan sín tí sín chjasintajni.

19 Jehó tí xra kuéntá chrókjuit'a kixin chrókjuinkítsa tí jehe sín, a ntá jehe sín kjaxin chrókjuich'e sín tí xra kuéntá kixin kuínhin sín itán chaxín ntoá.

20 'Kjánchó jehya kixin xrjanóaha kixin chrókjuinkítsa tí jehó sín. Náhi. Kjaxin xrjanóaha kixin chrókjuinkítsa kaín tí sín tsitekaon sín chr'éxin tsinhin sín tí nkehe tsochrónka tí sín a.

21 Mé xikaha xrjanóaha kixin kaín tí jehe sín jnkokoá chrókjuenkayáxin sín éxi jaha It'eni la ko janhan jnkokoá tjenkayáxinni mé xikaha xrjanóaha kixin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín kixin jaha tsíkétuanna k'uinka ntihi.

22 A ntá tí kjuachaxin jié chjina na mé tjaha tí jehe sín kixin ntá kaín sín jnkokoá chrókjuenkayáxin sín éxi yóhe jaha la ko janhan jnkokoá tjenkayáxinni.

23 Janhan la ko jehe sín jnkokoá chrókjuenkayáxinni éxi jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuéhé tí jehe sín éxi yóhe tjuana tí jaha.

24 'Jaha It'eni, tí sín kjuánjuan la tjínkavan kixin tí jehe sín chrók'uejókian sín tí tsjak'é janhan kixin chrók'uikon sín tí kjuachaxin jié chjina; kixin xráxin naxa k'ónahya chjasintajni k'uétjuana jaha.

25 It'eni jaha, imá jina jaha. Kjonté tí sín chjasintajni naxa chónhya sín tí jaha, ntá janhan na ó xráxin choxian tí jaha la ko kaín tí sín i kjaxin ó nohe sín kixin jaha kuétuanna k'uinka.

26 Ó kjuáqoha sín kixin nkexro tí jaha la ko xikaha naxa tsjáqoha sín, kixin éxi tjuana jaha mé xikaha chrótjuéhe sín kichó sín la ko janhan chrók'uejókian tí jehe sín —mé xikaha chrónóhehe ch'in Jesús tí It'é ch'an.

18

Ch'in Jesús sákjuiko sín ch'an tsjak'echjina ch'an
(Mt. 26.47-56; Mr. 14.43-50; Lc. 22.47-53)

1 Ó kjuixin ntáchro ch'in Jesús kaín tíha ntá jehe ch'an la ko tí sín k'uájiko ch'an k'uaxrjexín sín ntíha k'uatòye sín tí tsaka Cedrón. Ntaha tjen ijnko nonte síin nchónhya nta k'uixenhen ch'in Jesús la ko tí sín k'uájiko ch'an.

2 Kjaxín ch'in Judas tí ch'in sinchekji tí ch'in Jesús mé nohe ch'an kixin ntaha tjen tí huerto a kixin ntaha jnkoyaxón kójnkotséko ch'in Jesús tí sín k'uájiko ch'an a.

3 A ntá ch'in Judas ó kjuikao ch'an nchónhya sín soldado la ko iso sín policia kuènte njnko tsík'etuenhen tí sín nchat'á t'etoan la ko tí sín fariseo. Ntá kjui sín kaín sín xraá sín chica la ko kjuikao sín xrohi t'inkaséyanxín tí kjuixín sín.

4 A ntá ch'in Jesús ó nohe ch'an kaín xín nkehe ts'atsínka ch'an, ntá sákjuí ch'an kjuanchankíhi ch'an sín ntáchro ch'an kixin:

—¿Nkexro xritjéyará? —ichro ch'an.

5 Ntá kjuátehe sín ntáchro sín kixin:

—Tjeyáni tí ch'in Jesús tsíkjixín chjasin Nazaret —ichro sín.

Ntá kjuátehe ch'in Jesús ntáchro ch'an kixin:

—Janhan tíha —ichro ch'an.

A ntá ch'in Judas tí ch'in tsíkjinchekji tí ch'in Jesús mé koí tjenkákjan ch'an tí jehe sín ntíha.

6 A ntá tíó kjuátehe ch'in Jesús kixin jehe ch'an tíha, ntá jehe sín xráchonka sín kjuítsínka sín nonte.

7 Ntá xíkjanhankí ch'in Jesús ínaá ntáchro ch'an kixin:

—¿Nkexro xritjéyará? —ichro ch'an.

Ntá xíntáchro sín kixin:

—Tjeyáni tí ch'in Jesús tsíkjixín chjasin Nazaret —ichro sín.

8 Ntá ntáchro ch'in Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá tjtóherá sátsji tí í so sín xríkian —ichro ch'an.

9 Mé xíkaha ntáchro ch'in Jesús kixin ntá tsoxiteyá tí nkehe tsíntáchro ch'an kixin: “Tí sín kjuanjón T'aná la ninxeró kjuintak'itjáyanyha.”*

10 Ntá ch'in Simón Pedro kuakítsje ch'an tí chica espada chrinkatoxin ch'an kóchrínjin ch'an tatsjon chjina ijnko ch'in it'in Malco, mé ijnko ch'in ch'ehe nchat'á t'etoan xra.

11 Kjánchó ch'in Jesús ntáche ch'an tí ch'in Pedro kixin:

—Chr'axenhén tjoje chica espada méhe. Kjá ntáchrua kixin tsjasótehyana, kjá ichrua. Kjánchó T'aná kjuanjón kjuachaxín kixin nchónhya tsjasótena —ichro ch'an.

Ch'in Jesús kjuák'e nkayakon tí ch'in t'etuenhen tí sín nchat'á
(Mt. 26.57-58; Mr. 14.53-54; Lc. 22.54)

12 A ntá tí sín soldado la ko tí ch'in comandante t'etuenhen sín la ko tí sín policia judío kuènte njnko mé itsé sín tí ch'in Jesús kjuínchenteto sín ch'an.

13 A ntá sákjuiko sín ch'an ntøe ch'in Anás ich'ee tí ch'in Caifás mé tí nkexro tsík'áyéhe xra nchat'á t'etoan tí nánó a.

14 A ntá tí ch'in Caifás, jehe ch'an na mé tí nkexro tsíntáche tí sín judío kixin íchá jína kixin jnkokoá chojni chrók'uenyákonhen kaín tí sín chjasén ch'an.†

* 18:9 Juan 17.12 † 18:14 Juan 11.49-50

*Ch'in Pedro kjuínchemá ch'án kixin chóxin ch'án tí ch'in Jesús**(Mt. 26.69-70; Mr. 14.66-68; Lc. 22.55-57)*

¹⁵ Ch'in Simón Pedro la ko i jnko ch'in k'uék'ajiko ch'in Jesús mé kuinkáchréhe sín ch'án. Tí ch'in ijnko a mé chóxin ch'án tí nchat'á t'etoan. Ntá k'uixenko ch'án tí ch'in Jesús tí ntasin ntöje tí nchat'á t'etoan.

¹⁶ Kjánchó ch'in Pedro kuitöhe ch'án ntója ntasin ó. Ntá tí ch'in ijnko a chóxin tí nchat'á t'etoan mé k'uaxrje ch'án ntasin nixjehe ch'án tí tjan t'ayakonhen tí ntója ntasin chrónögehe ch'án tjan ntá xranjon kjuachaxin ntá k'uixenhen ch'in Pedro kjaxin.

¹⁷ Na ntá tí tjan t'ayakonhen tí ntója ntasin kjuanchankíhi tjan tí ch'in Pedro kixin:

—¿Á jahya kjaxin xríkoa tí ch'in a? —ichro tjan.

Ntá kjuátehe ch'in Pedro kixin:

—Náhi, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policia kjuaka sín xrohi ntaha tjejóxin toté sín tjejóchjixrohe sín. La ko koí ch'in Pedro tjechjixrohe ch'án ntaha.

*Tí nchat'á t'etoan mé kjuanchankíhi ch'án tí ch'in Jesús**(Mt. 26.59-66; Mr. 14.55-64; Lc. 22.66-71)*

¹⁹ Ntá tí nchat'á t'etoan kjuankixin kjuanchankíhi ch'án tí ch'in Jesús kixin nkexro tí sín k'uájiko ch'án la ko nkehe tí kjuakohe ch'án sín.

²⁰ Ntá kjuátehe ch'in Jesús ntáchro ch'án kixin:

—Noxín kjuak'é kjuákua, la ntá kaín xín chojni kuínhin sín. Xrácín k'uék'ájokxian kaín xín tí nínko ntá la ko tí nínko jíé tójnkotséxin kaín xín sín judío. Nínkehó nkehe kjuákohya imó.

²¹ ¿Nkekuénté tjanchankína tí janhan xíkaha? Chrókjuanchankíhi tí sín kuínhin kixin nkexrí kjuákoha sín. Jehe sín mé nohe sín nkehe kjuákoha sín —ichro ch'án.

²² Kjuixin ntáchro ch'in Jesús tíhi ntá ijnko ch'in policia kuénte nínko mé tjetaxín ch'án ntíha ch'jehe ch'án nkayakon tí ch'in Jesús ntáchro ch'án kixin:

—¿Á xíkaha jíehe tsjátéhé tí nchat'á t'etoan ní? —ichro ch'án.

²³ Ntá kjuátehe ch'in Jesús ntáchro ch'án kixin:

—Tí ntoáhya tí nkehe xrjanka ntá chrónka nkehe tí ntoáhya. A ntá tí ntoá tí nkehe xrjanka, ¿ntá nkekuénté kixin tjatena? —ichro ch'án.

²⁴ Ntá k'uetöan ch'in Anás kixin tjechróntetoxinhín ch'in Jesús sátsji ch'án tí tjan ch'in Caifás tí nchat'á t'etoan.

*Ch'in Pedro xikjinchemá ch'án inaá kixin chóxin ch'án tí ch'in Jesús**(Mt. 26.71-75; Mr. 14.69-72; Lc. 22.58-62)*

²⁵ Ntá ch'in Simón Pedro mé naxa tjejin toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro i ní? —ichro sín.

Ntá ch'in Pedro kjuínchemá ch'án inaá ntáchro ch'án kixin:

—Náhi, janhya —ichro ch'án.

²⁶ A ntá ijnko ch'in ch'ehe tí nchat'á t'etoan xra, na mé tí ch'in a mé naxa kjéhya ch'án tí ch'in tsíokóchrínjin ch'in Pedro ntatsjon, na mé kjuanchankí ch'án kixin:

—¿Á jehya jaha tí k'uíkuan tjekoa ch'án tí huerto ní? —ichro ch'án.

²⁷ Ntá ch'in Pedro xikjinchemá ch'án inaá kixin jehya ch'án, ichro ch'án. Ntá xrinahya tuénxín itsje ijnko kochíntöa.

Ch'ín Jesús kjuák'e nkayakon tí ch'ín Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Ntá k'uaxrjexín sín ntq̄e ch'ín Caifás, sákjuiko sín ch'ín Jesús tí palacio t'et̄oanxín tí ch'ín gobernador. Ntá ó kjuankíxín k'uínkaséyan kjuíji sín ntiha. A ntá tí sín judío la mé í k'uixenhya sín tí palacio kíxín tí xíkaha chrók'uixenhen sín tí nchia a la chrókuamá sín tí jiē síin ntiha la í xitjahya sine sín tí kia pascua, ichro sín.

²⁹ A ntá ch'ín Pilato k'uaxrjexín ch'án tí nchia t'et̄oanxín ch'án kjuanchankíhi ch'án sín kíxín:

—¿Nkehe tí jiē chón̄ta tí nkexro í? —ichro ch'án.

³⁰ Ntá kjuátēhe sín ntáchro sín kíxín:

—Tí chróchón̄tahya ch'án jiē jiē la chrókjuíkq̄ahyani ch'án —ichro sín.

³¹ Ntá k'uēt̄oan ch'ín Pilato kíxín:

—Sátjikoará ch'án nchekit̄oexín̄rá nkerí jiē chón̄ta ch'án kíxín éxí ntáchro tí ley kuéntará —ichro ch'án.

Ntá kjuátēhe tí sín judío ntáchro sín kíxín:

—Jeheni chojni judíoni la chón̄tahyani kjuachaxín ts'óyánni ninkexró —ichro sín.

³² Mé xíkaha tsoxiteyá tí nkehe tsíntachro ch'ín Jesús kíxín nkexrí ts'enxín ch'án.

³³ Ntá ch'ín Pilato xík'ixenhen ch'án tí nchia t'et̄oanxín ch'án ntá k'uíyēhe ch'án tí ch'ín Jesús kjuanchankíhi ch'án kíxín:

—¿Á jaha tí nkexro Rey t'et̄uēnhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kíxín:

—Tí nkehe tjanchankíná, ¿á jahyá kjuenkayáxian xíkaha, o á í jnko nkexro kjuanchia jiē kíxín tí janhan? —ichro ch'án.

³⁵ Ntá kjuátēhe ch'ín Pilato ntáchro ch'án kíxín:

—¿Á kjanhya janhan tí judío kíxín? Tí sín chjasán la ko tí sín nch̄at'á t'et̄oan mé kjuikaán sín tí jaha. ¿Xá nkehe kjuích'e kíxín? —ichro ch'án.

³⁶ Ntá kjuátēhe ch'ín Jesús ntáchro ch'án kíxín:

—Tí kjuachaxín chonta janhan jehya kíxín chjasintajni chrókuét̄oan. Náhí. Tí chrókuét̄oan chjasintajni ntá tí sín xrikjan chrókjuanjonko sín tí sín judío kíxín chrótséhyana sín la chrókjuikánhyana sín ntihi. Kjánchó tí kjuachaxín chonta janhan jehya kíxín chjasintajni chrókuét̄oan —ichro ch'án.

³⁷ Ntá ntáchro ch'ín Pilato kíxín:

—¿Á jaha chaxín ijnko rey? —ichro ch'án.

Ntá kjuátēhe ch'ín Jesús ntáchro ch'án kíxín:

—Janhan tí rey éxí ntáchrua jaha. Tí xr̄á ó kokj̄ina la ko tí xr̄á ó k'uinka chjasintajni kíxín tsoxrjanka nkehe tí chaxín ntoá. Kaín tí sín titekaon tí nkehe chaxín ntoá mé t̄ejót̄inhin sín tí nkehe tjákua —ichro ch'án.

³⁸ Ntá ntáchro ch'ín Pilato kíxín:

—¿Xá nkehe tí nkehe chaxín ntoá, ichrua? —ichro ch'án.

Ch'ín Pilato kjuanjon kjuachaxín kíxín its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixín kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí t̄ejó tí sín judío nixjēhe ch'án sín ntáchro ch'án kíxín:

—K'uitjáhya ninkehó jiē chón̄ta tí nkexro í.

³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjinkáonrá kixin ts'atjánta tí ch'ín Rey t'etuenhen tí sín judío? —ichro ch'án.

⁴⁰ Ntá kain sín k'óyako sín kjuanchia sín kixin:

—Tí ch'ín a la náhí. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetōan ch'án kixin tsjate sín tí ch'ín Jesús.

² Ntá tí sín soldado kjuích'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'ínkáya sín ch'án ijnko ka kjátse tié kixin jehe sín tsjikosáyehe sín ch'án éxí ijnko rey, kjánchó chaxínhya tíha.

³ Ntá kóchjinehe sín tí tjen ch'án ntácho sín kixin:

—Isé tsjak'e tsétuenhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etōanxín ch'án inaá nixjehe ch'án tí sín tsíkójnksé ntácho ch'án kixin:

—Tsjeherá tsakítsjexián ch'án ntihi kixin tsonohará kixin k'uítjáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'í la ko tjenkáya ch'án tí ka kjátse tié. Ntá ntácho ch'ín Pilato kixin:

—Tsjeherá, ntihi tjen ch'án —ichro ch'án.

⁶ A ntá tió k'uíkōn tí sín nch'at'á t'etōan la ko tí sín policía kuènte njnko ntá kjuankixin sín t'óyako sín ntácho sín kixin:

—¡Tjakéknánirá ch'án ntacruz! ¡Tjakéknánirá ch'an ntacruz! —ichro sín.

Ntá ntácho ch'ín Pilato kixin:

—Jahará tjíkoará ch'án tjaké nkanirá ch'án ntacruz kixin janhan k'uítjáhya ninkehó jie chóna tí jehe ch'án —ichro ch'án.

⁷ Ntá kjuátehe tí sín judío kixin:

—Jeheni chojni judío mé chónani ijnko ley t'etōan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án

⁹ ntá xik'ixenhen ch'án tí nchia t'etōanxín ch'án inaá kjuanchankíhi ch'án tí ch'ín Jesús kixin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuáteehya ch'án.

¹⁰ Ntá ntácho ch'ín Pilato kixin:

—¿Jaha nkekuénté tjáteehya nkehe tjánchánkíha? ¿Á noahya jaha kixin chonta janhan kjuachaxin tsétōan tsjak'enkania ntacruz la ko kjaxin chonta janhan kjuachaxin tsontáxrjan kixin sátsjia kohya nkehe tsonhan? —ichro ch'án.

¹¹ Ntá kjuátehe ch'ín Jesús ntácho ch'án kixin:

—Ninkehó kjuachaxin chróchontahya jaha chrókuétōan chrók'uen o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jie jie chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankixin ch'án kjueya ch'án nkexrí chrók'uetōan ch'án kixin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntácho sín kixin:

—Kja tí tsjtohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'etuenhen tí nació n kuénténi. Tí nkexro ch'éna asén ch'án éxí ijnko rey mé ní nkakonhen ch'án tí ch'ín t'etuenhenni —ichro sín.

13 Ntá kuínhin ch'ín Pilato tíhi ntá k'uetqan ch'án kíxin tsakitsje sín tí ch'ín Jesús ntója ntá ch'ín Pilato kjuák'etjaxin ch'án tí silla nchekitqoxín ch'án jie, mé nkíva hebreo mé it'in Gabata, mé t'axrxéjin kíxin tjat'q noi jehó xro tsík'óna.

14 Na mé ó chjina chonkíxin ntá tí tsonjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kíxin:

—Ntíhi itjen tí ch'ín rey kuéntará —ichro ch'án.

15 Kjánchó jehe sín k'óyako sín ntáchro sín kíxin:

—jts'en ch'án! jts'en ch'án! jtsjak'enkáni ch'án ntacruz! —ichro sín.

Ntá ntáchro ch'ín Pilato kíxin:

—¿Á tjinkáonrá kíxin janhan chrókjuakénkana ijnko ntacruz tí ch'ín rey kuéntará ní? —ichro ch'án.

Kjánchó tí sín nchat'á t'etqan mé kjuátehe sín kíxin:

—Náhi. Chóntahyani í jnko rey, jehó tí ch'ín César —ichro sín.

16 Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkani sín ch'án ntacruz. Ntá sákjuiko sín ch'án.

Kjuák'enkáni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

17 Ntá sákjuiko sín tí ch'ín Jesús kuámá ch'án tí ntacruz tsjak'enkáni ch'án. Ntá kjuíjiko sín ch'án ijnko tjo tikítexín sín Hueso Kja Chojni. A ntá nkíva hebreo mé tikítexín sín Gólgota.

18 Ntaha mé kjuák'enkani sín ch'án tí ntacruz. Ntá kjaxin yaá sín nánánko k'uéj jnkojnko sín ntá jnkosiné kjuák'e ch'ín Jesús.

19 Ntá k'uetqan ch'ín Pilato kíxin tsokjin sín ijnko ntachiso tsjak'enkani sín ikja tí ntacruz ntáchro kíxin: “Ch'ín Jesús kjuíxin ch'án chjasin Nazaret, mé tí ch'ín Rey kuénte tí sín judío”, tsixro.

20 A ntá tsjé tí sín judío mé kjuínchekuáxin sín tí letra tsík'óna kíxin chjino tí chjasin Jerusalén tsíkjak'enkani sín ch'ín Jesús ntacruz la ko iní nkíva tsíkjin sín, na mé ijnko nkíva la hebreo, la ijnko nkíva la griego, la ijnko nkíva la latín.

21 Ntá tí sín nchat'á t'etqan kuénte tí sín judío mé ntáche sín tí ch'ín Pilato kíxin:

—Chrókjinhya jaha xikaha kíxin jehe ch'án mé tí “Ch'ín Rey kuénte tí sín judío.” Náhi. Íchá jina chrókjin jaha kíxin “Jehe ch'án ntáchro ch'án kíxin jehe ch'án mé tí ch'ín Rey kuénte tí sín judío” —ichro sín.

22 Kjánchó kjuátehe ch'ín Pilato kíxin:

—Tí letra kuéqan k'óna la ó k'óna, kjónté xikahó tsitqhe —ichro ch'án.

23 Ntá tí sín soldado tió tsíkjin sín tsíkjak'enkani sín tí ch'ín Jesús tí ntacruz ntá kuákja sín tí ké ch'án la k'óxikayehé sín jnkojnko ka kuákja sín kanoé sín. La ko kjaxin kuákja sín tí ka kjínjin k'uék'inkáya ch'án. Tí ka mé tsírxonhya ka la mé jnkokoá ka tíha.

24 Ntá tí sín soldado kjo sín kíchó sín ntáchro sín kíxin:

—Tsótséjehyani tí ké ch'án. Íchá jina sich'exinni suerte ntá tsotsjeheni siná nkexro ts'áyéhe tí ka.

Mé xikaha xiteyá éxí ntáchro xroon itén Dios tsíkjin sín ósé ntáchro kíxin: “Kjuích'exín sín suerte ntá k'óxikayehé sín kaná.”* Mé xikaha kjuích'e tí sín

* 19:24 Salmo 22.18

soldado.

²⁵ **A** ntá chjino tí ntacruz kjuák'enkáni ch'ín Jesús mé kjuák'e tí ìné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena.

²⁶ **A** ntá tíó k'uíkón ch'ín Jesús kixin itjen tí ìné ch'án la ko chjino tjen tí ch'ín antsi tjuèhé ch'án k'uék'ajiko ch'án, ntá nixjehe ch'án tí ìné ch'án, ntá chro ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjehe ch'ín Jesús tí ch'ín a ntá chro ch'án kixin:

—Tsjehe kixin ntaha itjen iná —ichro ch'án.

A ntá tí ch'ín a mé k'uáyéhe ch'án tí tjan a sákjuiko ch'án tjan ntoge ch'án k'óna exí ìné ch'án xikaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntá chro tí xroon tsíkjin sín ósé ntá xikaha ntá chro ch'án kixin:

—Ik'uén nta.

²⁹ Ntá ntiha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuák'ekjen sín ijnko nta kjinjin, ntá kjuínchechrìn sín tí tjen ir'va ch'án.

³⁰ Ntá ik'uí ch'ín Jesús tí xranvino sán ntá ntá chro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

³¹ **A** ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuente tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jíé, ichro sín. Mé xikaha kjuanchehe sín tí ch'ín Pilato kixin ts'etqan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuente tí sín tsík'en.

³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús.

³³ Ntá kjuíji sín tí tjen ch'ín Jesús ntá k'uíkón sín kixin ó tsíkjin tsík'en ch'án, ntá í k'óchjenjinhya sín toté ch'án.

³⁴ **A** ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko ìnta.

³⁵ **A** ntá janhan mé tjékjan tí xroon i mé kjuak'é ntiha k'uíkuan kixin xikaha kónhen ntá ntoá tjejrjanka kixin jahará kjaxinrá chrókuítekaónrá.

³⁶ Mé xikaha kónhen tíha kixin tsoxiteyá tí nkehe ntá chro xroon itén Dios tsíkjin sín ntá chro kixin: “K'óchjenjinhya sín ninkehó huésege ch'án.”†

³⁷ Kjaxin itjen íjnko nketí nixja tí xroon itén Dios tsíkjin sín ósé ntá chro kixin: “Tsokomá sín tí nkexo tsíchr'áte sín chica.”‡

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé ijnko ch'ín kjuixín chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxín

ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jehé ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuiko ch'ín José tí cuerpo kuènte ch'ín Jesús.

³⁹ Kjaxin ch'ín Nicodemo, tí ch'ín kjuínixjehé tí ch'ín Jesús ijnko tie a mé kjui ch'án kjuikágo ch'án treinta kilo xroan xraxé tjiko xroan mirra la ko xroan áloes.

⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjínjin tsíka tí xroan xraxé a kixin xikaha k'uékinkáchónki tí sín judío k'uékjavá sín chojni tsik'en.

⁴¹ Tí kjuák'enkáni ch'ín Jesús ntacruz ntá chjinaxón ntíha tjen ijnko huerto itjen ijnko tòye nixin naxá ninkexró tsíxrávähya ntíha.

⁴² Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankixin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankixín semana ntá tí tjan María Magdalena naxá sitíe sákjuí tjan tí tjen tí tòye, ntá k'uíkon tjan kixin ó tsíkjiin tí xro tsík'ikjèxin tí tòye a.

² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexo imá k'uétjuèhe ch'ín Jesús, ntá ntácho tjan kixin:

—Ó tsíkakitsjèxin sín tòye tí cuerpo kuènte Ínchéni ntá noehyani nketí tsíkjak'e sín —ícho tjan.

³ Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a.

⁴ Ntá yóí sín kuinká sín sákjuiko kichó sín. Kjánchó tí ch'ín í jnko antsí tjan kuinká ch'án ntá kánhyó tjan kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a.

⁵ K'uísén ch'án tsjehe ch'án nkaxenhen tí tòye a. A tí ka tsík'ísímá ch'ín Jesús mé naxá tjejó k'uíkon ch'án, kjánchó jehé ch'án k'uixenhya ch'án tí tòye a.

⁶ Ntá kjónté chr'éxin kjuíji ch'ín Simón Pedro ntá k'uixenhen ch'án tí tòye a. Ntá kjaxin k'uíkon ch'án kixin tjejó tí ka tsík'ísímá ch'ín Jesús

⁷ la ko k'uíkon ch'án tí ka tsík'ísímá ikja ch'án na mé tí ka tsíxréya ka la ókjé tjen ka, a ntá tí í so ka na mé ókjé tjejó ka kjaxin.

⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsíkjiin senó na kjaxin k'uixenhen ch'án tí tòye ntá k'uíkon ch'án tí nkehe tsíkónhen ntá kuítekaon ch'án.

⁹ Kixin naxá k'uékiénxinhya sín tí nkehe k'uéchrónka xroon itén Dios kixin t'ichjánxin tsoxechón tí ch'ín Jesús.

¹⁰ A ntá tí sín sátsíkjitsjehé tòye la xíkjan sín ntøe sín.

Titàya k'uikuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuítóhe tjan ntója tí tòye tsjánka tjan. Naxá tsjánka tjan k'uísén tjan tsjehe tjan nkaxenhen tí tòye

¹² ntá xrinahya k'uíkon tjan yaá sín ángel tjejóyá sín ka tjóá tjejójtjaxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án.

13 **A** ntá tí sín ángel mé kjuanchankí sín kixin:

—Naná, ¿kuènte tsjanka? —ichro sín.

Ntá kjuátehe tjan ntáchro tjan kixin:

—Sátsíkjiko sín Ìnchéni, ntá nonahya nketí tsíkjak'e sín ch'án —ichro tjan.

14 Kjuixin ntáchro tjan tíha ntá kuinkátjía tjan ntá k'uikon tjan kixin itjen ch'ín Jesús, kjánchó kjuátsoanhya tjan kixin jehe ch'án.

15 Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuènte tsjanka? ¿Nkexro tjéyá? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, **a** ntá ntáchro tjan kixin:

—Kja tí jaha sákjuíkkoa ch'án ntá jie chrónka nketí sákjuíkkoa ch'án kixin janhan sátsjikian ch'án jie —ichro tjan.

16 Ntá ch'ín Jesús mé nixjehé ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjixin tjan nkíva hebreo ntáchro tjan kixin:

—¡Raboni! —ichro tjan. Tíha mé t'axrjexín kixin Maestro.

17 Ntá ntáchro ch'ín Jesús kixin:

—Tatjántana kixin **naxa** sátjíhya janhan tí tjen T'aná. Sátjia tjítsjehé tí sín kichiná chénka sín kixin sátsjijá tí tjen T'aná na mé kjaxin It'ará tí jahará na mé Dios kuèntana la ko kjaxin Dios kuèntará —ichro ch'án.

18 Ntá tí tjan María Magdalena sákjuíchénka tjan tí sín k'uék'ajiko ch'ín Jesús chrónka tjan kixin xíkaha tsík'ikon tjan Ìnchéni. La ko kjaxin chrónka tjan kixin xíkaha tsintáchro ch'án.

Tí sín k'uék'ajiko ch'ín Jesús titàya k'uikuèn sín ch'án

(Mt. 28.16-20; Mr. 16.14-18; Lc. 24.36-49)

19 **A** ntá ó kónjín tí yaon a mé tí yaon xrankíxixín semana, **a** ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehé sín ntója nchia jina kixin chrakonhen sín tí sín judío. Ntá xrinahya titàya kónohe sín k'uikon sín kixin jnkosiné tí tjejó sín tjen ch'ín Jesús, ntá nixjehé ch'án kjuajna tí sín k'uék'ajiko ch'án ntáchro ch'án kixin:

—Jina tjejorá —ichro ch'án.

20 Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uikon sín Ìnchéni.

21 Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uetuanna k'uinka, **a** ntá jie la janhan tétuanhan tí jahará —ichro ch'án.

22 Ntá k'uánote ch'án tí jehe sín ntáchro ch'án kixin:

—T'ayéhérá Nchakuen Dios.

23 Tí ts'itjayanhanrá tí jie kjuasin jnkojín chojni ntá xíkaha tsjin tí ijíé sín. Ntá tí ts'itjayanhyará tí jie kjuasin jnkojín chojni ntá **naxa** kjuinhyá tí ijíé sín —ichro ch'án.

Ch'ín Tomás k'uikon ch'án kixin tsíxechón Ìnchéni

24 **A** ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikítexín sín ch'ín Nohé mé kohya ch'án tí kui ch'ín Jesús.

25 Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uikonni Ìnchéni —ichro sín.

Kjánchó ntáchro ch'ín Tomás kixin:

—Tí ts'íkõnhyã janhan tí tsíkjiatexín chica clavo itja ch'án la ko tsochr'ánxianhyã dedo tjaná ntiha la ko tí tsochr'ánxianhyã tjaná tí chjia ch'án, ¿na mé nkexrí chrókuitekavan? —ichro ch'án.

²⁶ A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'íkjehe sín ntója nchia jina ntá xrínghya titàya kónohe sín k'uikon sín kixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsíkjiatexín chica clavo tjaná la ko xrákoa tjá chr'axénhén chjiana. Chróntáchrohya kixin chaxínhyã. Tsítekavan kixin chaxín —ichro ch'án.

²⁸ Ntá kjuátēhe ch'ín Tomás ntáchro ch'án kixin:

—jínchéni jaha la ko Dios kuéntana! —ichro ch'án.

²⁹ Ntá ntáche ch'ín Jesús tí ch'ín Tomás kixin:

—Jaha Tomás k'uikonjian ntá kuítekavan. Ntá antsí náxrjón tjejó tí sín kjónté k'uikonhyã la titekaon sín —ichro ch'án.

Tíhi mé chrónka nkekuente tsíkjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uikon tí sín k'uájiko ch'án kjónté chrónkahya tí xroon i kixin xikaha kónhen.

³¹ Tí nkehe chrónka tí xroon i ikjian janhan kixin chrókuítekaonrá jahará kixin Jesús mé tí Cristo, mé tí Xjeen Dios kixin ntá kaín ni chróchóntani kjuachón jnkochrín kixin chrókuítekaonni ch'án.

21

Yato tí sín k'uék'ajiko ch'ín Jesús xrínghya titàya k'uikon sín ch'án

¹ A ntá chr'éxin tí sín k'uék'ajiko ch'ín Jesús titàya xik'ikon sín tí jehe ch'án inaá chrínta ntayaon Tiberias. Mé xikaha kónhen

² kixin jnkokoá k'uéjó sín ch'ín Simón Pedro la ko ch'ín Tomás, me tí ch'ín tikítexín sín ch'ín Nohé, la ko ch'ín Natanael kujxin ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús.

³ Ntá ntáchro ch'ín Simón Pedro kixin:

—Sátsjitse koche —ichro ch'án.

Ntá kjuátēhe sín kixin:

—Koíni sátsjikoani —ichro sín.

Ntá sákjuí sín k'ujt'ótjen sín ijnko ntabárco. Kjánchó ninkehó koche tséhya sín kuenté tie.

⁴ A ntá ó chjina ts'inkaséyan ntá xrínghya titàya k'uikon sín itjen ch'ín Jesús chrínta ntayaon, kjánchó kjuátsoanhyã tí sín k'uék'ajiko ch'án kixin jehe ch'án.

⁵ Ntá kjuanchankíhi ch'án sín kixin:

—Jahará ntasoá, ¿á naxa ninkehó koche tsehyará? —ichro ch'án.

Ntá kjuátēhe sín ntáchro sín kixin:

—Naxa ninkehó ko tséhyani —ichro sín.

⁶ Ntá ch'ín Jesús ntáche ch'án sín kixin:

—Iterá tí nchísén tí nánko chjia chjina tí ntabárco la tsotserá va —ichro ch'án.

Ntá xikaha kjuich'e sín k'ue sín nchísén ntá í tjachahya sín tsakitsjenkixin sín ntá tí nchísén kixin nchónhyã koche tjinká.

7 **A** ntá tí ch'ín antsí tjuèhe ch'ín Jesús mé ntáche ch'án tí ch'ín Pedro kixin:
—Ìnchéni tí méhe! —ichro ch'án.

Ntá kuínhin ch'ín Simón Pedro kixin Ìnchéni tíha ntá k'uinkáya ch'án iké ch'án inaá (kixin tsikakitsje ch'án iké ch'án) ntá kjuíánkí ch'án ntá.

8 Tí í so sín k'uék'ajiko ch'ín Jesús mé kjuíjǐ sín tí chrínta ntáyaon kjuíkao sín tí ntabárcō tinkánkákjéntóxin tí nchísén tjínká koche chrítaón ntá kixin ijnko ciento metro kjínxin tí chrínta ntá k'uéjō sín.

9 Ntá kjuíjǐ sín chrínta ntá ntá k'uínkajínxin sín tí ntabárcō ntá k'uikon sín tjeche xrohi síxènkǐ xrínta ntá chrítaón tí xrínta tjejen ijnko koche la ko nánko síin niotja.

10 Ntá kjuanchia ch'ín Jesús ntáchro ch'an kixin:

—Xrákoará iso koche tsítserá nantá —ichro ch'án.

11 Ntá ch'ín Simón Pedro k'uit'ótjen ch'án tí ntabárcō kuákja ch'án tí nchísén kuínkánkákjen ch'án xráko ch'án tí nchísén tjínká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a.

12 Ntá ntáchro ch'ín Jesús kixin:

—Xrákirá, interá —ichro ch'án.

A ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsoan sín kixin Ìnchéni tíha.

13 Ntá kóchjina ch'ín Jesús kuákja ch'án tí niotja chéhe ch'án tí jehe sín la ko xíkaha xíkjanjon ch'án tí koche.

14 Tíhi mé níxin k'uikon tí sín k'uék'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

15 Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:
—Jaha Simón, xjeen Jonás, ¿á antsí tjuana jaha, a ntá tí í so la kánhyó?
—ichro ch'án.

Ntá kjuátēhe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntana —ichro ch'án.

16 Ntá yóxin kjuanchankí ch'ín Jesús inaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátēhe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntana —ichro ch'án.

17 Ntá níxin kjuanchankí ch'ín Jesús kixin:

—Jaha Simón, xjeen Jonás, ¿á tjínkavan tí janhan? —ichro ch'án.

A ntá k'uává ch'ín Pedro kixin níxin kjuanchankí ch'ín Jesús kixin á tjínkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha káin xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha t'ayakonhén tí kolélo kuèntana.

18 Ntá ijnko nkehe chaxín tjétjonka kixin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrínhan jaha. **A** ntá tíó tsótáda

* 21:14 Juan 20.19,26

jaha ntá tsjéntoá tjá ntá í jnko nkexro sintak'inkáya ka la ko sátsjikoa sín tí tóxrjíanhya sáchrókjuia —ichro ch'án.

¹⁹ **A** ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chrèhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uikon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanchankíhi ch'án tí ch'ín Jesús kixin nkexro sinčekji ch'án.†

²¹ Ntá ch'ín Pedro k'uikon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Ìnchéni, ¿a ntá tí ch'ín i la nkehe tsonhen ch'án a? —ichro ch'án.

²² Ntá kjuátéhe ch'ín Jesús kixin:

—Tí tjínkavan naḡa chrókjuak'echón ch'án tí chrókjan la jaha la chrókjuiatéhya tíha. Ntá jaha la chrèhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhi. Ó jehí ntáchro ch'án kixin tí tjínkaon ch'án naḡa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

²⁴ **A** ntá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ Naḡa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasin-tajni chrók'uinka kaín tí xroon chrók'óna xikaha. Amén. Ó tjen.

† 21:20 Juan 13.25

Tí xrā kjuích'e tí sín kjueyá ch'ín Jesús

Itsi Nchakuen Dios

¹ Tjuahā jaha Teófilo na tí libro saoxín mé kjan̄ kaín nkehe kjuako ch'ín Jesús la ko tí xrā kjuích'e ch'án tí xrankixín

² hasta tí yaon sákjuí ch'án nkaya nkajní. Ā ntā ti nāxa sákjuíhya ch'án nkajní la kjueyá ch'an tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehē ch'án sín la k'uetuēnhen ch'án sín kíxín tsonohē sín nkehe tí xrā chrókjuich'e sín.

³ Tió kjuixin k'uén ch'án ntá kónoxín kíxín tjechón ch'án, k'uíkon tí jehe sín la ko cuarenta yaon mé k'uíkon sín ch'án jnkoyaxón. Itsjé nkehe kjuakoxín ch'án kíxín tsonoexín sín kíxín chaxín tjechón ch'án la ko kjuako ch'án nkexri tí kjuachaxin kuēnte Dios.

⁴ Tí nāxa kójnkotséko ch'án tí sín k'uájiko ch'án la jehe ch'án mé k'uetuēnhen ch'án sín kíxín nāxa sátsjixinhya sín tí chjasin Jerusalén. Chrónka ch'án kíxín:
—Chróchonhénrá ntihó chrók'uyayéhérá tí nkehe tsjanjon T'aná, me tí nkehe kuinhínrá xrxanka janhan.

⁵ Ā ntā chaxín ch'ín Juan in̄tā ó kuíkítexín ch'án chojni. Ā ntá ijie kánhyó itsjé yaon ntá jahará la Nchakuen Dios la tsikitiaxínrá.

Sákjuí ch'ín Jesús nkaya nkajní

⁶ Ntá tí nāxa kójnkotséko sín ch'ín Jesús, kjuanchankíhi sín ch'án kíxín:

—Jaha İnchéni, ¿á tsjánjonhya kjuachaxin jaí ts'etōanni chjasénni Israel inaá? —ichro sín.

⁷ Ntá kjuátehe ch'ín Jesús kíxín:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etōan tíha.

⁸ Ntá itsi tí Nchakuen Dios ntá ts'ayéhérá kjuachaxin sátsjichronkará nkehe tí xrā kjuít'a, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin nixja ch'ín Jesús ntá xrin̄ahya tinkák'it'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijnko tjuí. Ntá í t'íkonhya sín nkerí kjuíji ch'án.

¹⁰ Ntá nāxa tjejókonta sín tí sákjuí ch'ín Jesús nkajní, ā ntá xrin̄ahya titàya k'uíkuēn sín yaá chojni ntoa tjejóyá sín ka tjóá tjejó sín chjinaxón tí tjejó tí jehe sín.

¹¹ Ntá tí sín a mé ntáchro sín kíxín:

—Jahará chojni kjuíxinrá estado Galilea, ¿nkehe tsonhen nāxa kontará nkajní? Xíkaha tjejokontará sákjuí Jesús la ko mé xíkaha xiki ch'án inaá —ichro sín.

Xreyá ch'ín Matías tsjiatēhe lúkē ch'ín Judas

¹² Na ntá kjanxin sín tí jnā it'in Olivo na ikjan sín chjasin Jerusalén. Tíha a mé kíjnhyō tjen kíxín ó xíkahó k'uetōan tí ley sátsji sín tí yaon t'ok'éhe sín.

¹³ Na ntá kjuíji sín tí chjasin ntíha ntá k'ui't'ótjen sín tí yóxin piso tí nchia tsíkjen sín k'uék'ejó sín. Mé ntíha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo,

la ko ch'ín Simón, mé tí ch'ín a mé kuènte tí partido cananista, la ko kjaxin ch'ín Judas, savé ch'án mé it'in Jacobo.

14 Kaín sín kójnkotsé sín ntiha tsonixjehé sín Dios la ko k'uéjoko sín tí kichó tí ch'ín Jesús la ko tí tjan María, iné ch'án, la ko iso chojni chjin.

15 Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsikójnkotsé ntiha. Ntá ntáchro ch'án kixin:

16 —Kíchóni, t'ichjánxin tsoxiteyá éxí nixja xroon itén Dios éxí tsínixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjuikao ch'án tí sín tsotsé ch'ín Jesús.

17 Jehe ch'án mé kjaxin k'uék'ajikoni la jnkokón xrá k'uáyèkoni ch'án.

18 A ntá jehe ch'án mé sákjuík'enaxín ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjehé tsee ch'án k'uaxrje kaín sintonòé ch'án.

19 Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrxjén kixin ijnko nonte siín ijni.

20 Tí xroon Salmo mé nixja xikihí:

Tsitöhe ntóé ch'án a,
la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyéhé tí xrá kuènte ch'án.*

Mé xikaha tsikjin ch'ín David.

21 Tí tjejóni ntihi la siín chojni ó k'uájikoni xráxín tí k'uék'ajikoni Ìnchéni Jesús

22 desde k'uíkoni nkexri kuikite ch'ín Juan tí jehe ch'án la ko hasta k'uíkoni sákjuí ch'án nkaya nkajní. Ntá ijie t'ichjánxin tsoxreyá jnkojín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xikaha chrónka ch'ín Pedro.

23 Ntá kjuenkayáxin sín tsonoxín yaá chojni mé tí ch'ín José, t'ikón ch'án Barsabás la ko Justo, la ko kjaxin í jnko ch'án it'in Matías.

24 Ntá nixjehé sín Dios la ntáchro sín kixin:

—Ìnchéni jaha mé choxian asén kaín chojni. Tjákehéni nkexro tsonhen tocar xrá tí yaá tí nkexro í kónoxín

25 tsjiatehe xrá apóstol kuènte ch'ín Judas. A ntá tí ch'ín Judas mé kuítóhe ch'án tí xrá kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

26 Ntá kjuích'e sín suerte ntá xrínghya kónhen tocar tí ch'ín Matías, ntá tuénxín tí hora a kuákja ch'án xrá k'uéjoko ch'án tí tejnko tí sín kjueyá Ìnchéni.

2

Ó kui Nchakuen Dios

1 Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín.

2 Xrínghya kuínhin sín ijnko tóvéntó kuixín nkajní. Tí tóvéntó mé éxí ijnko xrínto fuerte chjéhe. Kuenté tí nchia tjejóxehen sín mé kóvéntó kjaxin.

3 Ntá xrínghya k'uíkon sín nkehe éxí xrohi nene tsjehe. Ntá tíha xikayehé la k'uéjókjen jnkojnko kja tí jehe sín.

* 1:20 Salmos 69.25; 109.8

⁴ Na ntá kaín sín k'uáyéhe sín tí Nchākuen Dios ntá kjuankíxin sín nixja sín í jnko nkiva kíxin Nchākuen Dios kjuínkítsa sín nixja sín.

⁵ A nta tí yaon a la tí chjasin Jerusalén k'uéjój chojni judío tjinkaon sín sinchexiteyéhe sín tí nkehe tinkáchónki sín, mé tsíkijixín sín nkuixín chjasintajni.

⁶ A ntá jehe sín mé tsíkinhin sín tí tóvéntó ntá tsíkóchjina nchónhya chojni. Ntá í noehya sín nkehe chrókjuenkayáxin sín kíxin jnkojnko tí jehe sín mé kuínhin sín kíxin nixja tí sín a jnkojnko nkívee sín.

⁷ Ntá síxránká sín, chrakon sín ntá jehe sín mé tjo sín kíchó sín kíxin:

—¿Á jehya kaín tí sín tjejónixja mé tsíkijixín sín estado Galilea?

⁸ La ¿nkekuènté tjejótinhinhi kíxin nixja sín jnkojnko nkíveeni?

⁹ Kíxin ntihi mé síin chojni tsíkijixín chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia,

¹⁰ la ko Frigia, la ko Panfilia, la ko Egipto la ko nkuixín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkókjéxin judío, la í so la tinkáchónki sín Dios éxí tí sín judío xíkaha.

¹¹ La kjaxin síin chojni tsíkijixín Creta, la ko Arabia. Mé xíkaha kaín ni tsíkijixinni tí chjasin a mé tsíkinhinhi tjejónixja tí sín a tí kjuaxroan kuènte Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chrakon sín ntá kjuanchankíhi kíchó sín kíxin:

—¿Nkehe t'axrjéxin kaín tíha? —ichro sín.

¹³ A ntá iso sín kjuanoá sín ntáchro sín kíxin:

—Tsékoan tí sín a —ichro sín.

A ntá ch'in Pedro chénka tí sín síin

¹⁴ Ntá jehe ch'in Pedro mé k'uínkatjen ch'an, kjuák'exín toté ch'an la ko tí tejnko sín apóstol mé k'uínkatjen sín la ntá ch'in Pedro mé itsen nixja ch'an. Ntáchro ch'an kíxin:

—Jahará chojni judío la ko jahará tjejorá chjasin Jerusalén. Kainrá tjejorá tinhínra tí nkehe tsoxrjanka.

¹⁵ Tí sín tjejó ntihi la jehya tsékoan sín éxí ntáchrorá, kíxin na ntá las nueve nchítjen la kohya nkexro tsékoan.

¹⁶ Tíhi mé tsíchronka ch'in profeta Joel:

¹⁷ Ntáchro Dios kíxin: Itsi ijnko yaon tsjixixín

ntá tsochr'an Nchākuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuèntana.

La ko tí sín ntasoá mé titàya ts'íkuèn sín tí nkehe tsjákohá sín.

La ko tí sín ó táda la kotáchrién sín ts'ikoxín sín kíxin nkexrí tjinkaon Dios.

¹⁸ Tí yaon tsonhen kain tíha la tsochr'an tí Nchākuenná ts'áyéhe kaín tí síntoa ch'ena xra la ko tí síchjin kjaxin

la tsochrónka sín tanná.

¹⁹ Ntá janhan mé tsjákoxian ijnko kjuachrakon nkajni.

A ntá chjasintajni tsjákoxian kjuaxroan:

mé ts'ixín ijni la ko xrohi la ko itjuí tsík'óna ihnchi.

²⁰ Mé tí yaon la ts'inkaséyanxínhya, ts'óna ts'ixín tie.

A ntá tí nitjó mé ts'óna ijni.

Xíkaha senó tsonhen ntá itsi Ìnchéni.

Tíhi mé ijnko yaon imá jié la imá náxrjón.

21 **A** ntá kaín tí nkexro tsjanchehe ihnjé Ìnchéni kixin tsjinkĩtsa sín mé tsaa sín.*

Mé xikaha tsíchrónka ch'ín Joel.

22 'Jahará chojni israelita tinhínrá tí nkehe tsoxrjanka. Tí ch'ín Jesús tsíkixín chjasin Nazaret mé Dios kjuakoxín ch'án kixin tsíchr'án ch'án kixin kjuasin ch'án kjsjé kjuaxroan jié k'uíkonrá la ko kjuako ch'án kixin Dios tsíchjéhe ch'án kjuachaxin kixin tjinkaon ch'án chrók'uikonrá. Jahará ó jina nohará kaín tíha.

23 Kjónté xikaha k'uíkonrá la jahará itserá ch'án éxí tsíkjenkayáxin Dios ósé. **A** ntá jahará kjuínchek'ayéhérá ch'án tí sín jínahya, **a** ntá tí sín jínahya mé k'óyán sín ch'án, kjuak'enkanı sín ch'án ijnko ntacruz.

24 Kjánchó Dios la kjuínchexechón ch'án ínaá la kjuatsen ch'án tí kjuatjoté kuente kjuach'én kixin ntá ti kjuach'én xitjahya ts'etuenhen tí jehe ch'án.

25 **A** ntá ósé tí ch'ín rey David tsíchrónka ch'án kuente Jesús ntáchro ch'án kixin:

Jaha Ìnchéni t'íkuan kixin jnkochrín tjétaón ntja tí xritjak'é janhan.

Jaha mé itjen tjaná chjina kixin chrókohya jié chrókjuásian.

26 Méxra ímá chéhe asenná. Ir'vã tsjexian tí nkehe náxrjón.

Ó nòna kixin kohya nkehe ts'atsínka kjónté its'én.

27 Ó nòna kixin tí jaha tsítóehya asenná chríkjan tí síin chojni tsík'en.

Tsjánjonhya kjuachaxin kixin tsoxíka ntõna kixin janhan mé ijnko nkexro t'aha xra jina tjuèhe.

28 Jaha mé kjuákona tí ntja tsjanjon kjuachón. Jaha mé nchechàna kixin t'ayakonna.†

Mé xikaha tsíkjin ch'ín David.

29 'Kíchóni títóhérá tsontáxrjan kixin ch'ín David, tí nkexro k'uaxrjeníxinni mé tsík'én ch'án la ko tsíkixravá ch'án. Ntá naxã noheni nketí tsíxravá ch'án.

30 **A** ntá ch'ín David mé ijnko nkexro tsíchrónka itén Dios la ó nohe ch'án kixin chaxin Dios chrónka kixin ijnko nkexro ts'axrjeníxin ch'án mé ts'óna rey mé ts'etõan éxí jehe ch'án k'uetõan ch'án.

31 Mé xikaha ch'ín David la ósé ó nohe ch'án nkehe tsonhen la mé chrónka ch'án kixin tsoxechón Cristo la ko ntáchro ch'án kixin tí asén ch'án tsítóehya tí síin tí sín tsík'en la ts'itjáyannya tí cuerpo kuente ch'án.

32 Méxra Dios kjuínchexechón tí ch'ín Jesús, mé k'uíkonni kaín ni la mé chrónkani kixin chaxin tíha.

33 Ntá ijie Jesús mé sákjuiko ch'án Dios la nàno itja chjina Dios mé tjen ch'án. Ntá tsintáchro It'é ch'án Dios kixin tsochr'án ch'án tí Nchakuen ch'án. Ntá jie ó kui la ó k'uíkonrá la ko kuínhínrá nkehe kónhen.

34 Tí ch'ín David la jehya jehe ch'án sákjuí nkaya nkajní, kixin jehe David ntáchro ch'án kixin:

Ìnchéni Dios mé ntáche tí Ìnchéni kixin:

“Tjak'e tjaná chjina ntihó tsétõan,

35 tsjixinjian kaín xín tí sín nínkakonhan la tsjachahya sín ts'etõan sín kixin jahvá mé tsétõan.”‡

Mé xikaha tsíkjin ch'ín David.

* 2:21 2.17–21 Joel 2.28–32 † 2:28 2.25–28 Salmo 16.8–11 ‡ 2:35 2.34–35 Salmo 110.1

36 Ntá kaín rá chojni israelita chrókónohará chaxín kixin jehe tí ch'ín Jesús ó kjuakénkanirá tí ntacruz la Dios mé kjuích'éna Ìnchárá ijie, mé tí Cristo —mé xíkaha chrónka ch'ín Pedro.

37 Ntá tí kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáchro sín kixin:

—Kíchóni, a ntá jie la ¿nkexrí chrókjuich'eni?

38 Ntá kjuátehe ch'ín Pedro ntáchro ch'án kixin:

—Chrókujitohérá tí ijíará la chróxráxinkáonrá Dios. Ntá chrókuikitaxínrá ihníé Jesucristo ntá Dios mé tsjakjìinhanrá tí ijíará ntá jehe ch'án tsjanjon ch'án Nchakuen ch'án ts'ayéhérá.

39 Dios mé sinchekìtonhanrá ch'án tí Nchakuen ch'án ts'ayéhérá jahará la ko xaánrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkojnko tí nkexro tsjeyá ch'án.

40 Mé xíkaha ntáchro ch'ín Pedro la ko í so nkehe ntáchro ch'án. Nta nixjehé ch'án sín inaá, ntáchro ch'án kixin:

—Chrókujitohérá tí jínahya tjenkayáxin tí chojni síin chjasintajni kixin jahará me jína chrókuaará.

41 Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankíxin tinkáchónki Ìnchéni Jesús la k'uíto tí sín ó xráxín síin.

42 Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueyá Jesús la kjuínkítsa sín kjuanjón sín tí nkehe chrókjóné tí í so sín la ko chjéhe sín Dios kjuasáya la ko kójnkotsé sín kixin sine sín niqtja xraxinkakonxín sín kixin ik'uén Ìnchéni.

Mé xíkaha k'uéjótí sín xrankíxín tinkáchónki Ìnchéni

43 La ntá kaín tí í so sín mé chrakon sín kixin tí sín tsíkjeýa Jesús kjuasin sín itsjé kjuaxroan.

44 La kaín tí sín tinkáchónki Jesús mé jnkokóá k'uéjótí sín la jnkokóá chóna sín tí nkehe sine sín.

45 Kjuínchekji sín tí nkehe chóna sín ntá k'óxikayéhe sín tí chichaon la chjéhe sín tí sín chóntahya.

46 Jnkojnko yaon kójnkotsé sín tí nínko la ntá jnkojnko ntøe sín kjóneko kichó sín. La ko kjóné sín niqtja kixin xraxinkakonxín sín kixin ik'uén Ìnchéni la ko kjuaxróxin k'uéjótí sín la kohya nkexro kjuínchehnke.

47 Kjuanchehe sín kjuasáyé Dios. Ntá kaín chojni k'uéchónthehe sín kjuasáya. A ntá jnkojnko yaon Ìnchéni mé kjueyá iso chojni kixin tsotsjé tí sín tsaá.

3

Kuítøhe jína jnko nkexro xitjahya tji

1 Jnko yaon tí ch'ín Pedro la ko ch'ín Juan mé chriin sín sákjuí sín tí tjen tí nínko. Mé kjuíji sín las tres kónjín, tí hora mé nixjehé sín Dios.

2 Kaín yaon kjuák'e ntiha ijnko ch'ín tsíkokjéxín xitjahya tji. Sátsíkjiko sín ch'án tí nínko la tsíkjak'etjaxín sín ch'án tí ntója puerta mé it'ín Ntója Náxrjón. Ntaha tjetjançhak'éhe ch'án chichaon tí sín sí'tixenhen ntiha.

3 Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín nínko, a ntá kjuanchak'éhe ch'án sín chichaon.

4 Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin:

—Tsjehe ntihi.

5 A ntá tí ch'ín a tjetsjehe ch'án jina kixin ách'e ichrén nkehe tsjanjon tí sín a, ichro ch'án.

6 A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnjé Jesucristo, tí nkexro tsíkji_xin chjasin Nazaret, la t'inkatjen itjia —mé xikaha ichro ch'ín Pedro.

7 Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án.

8 Ntá tí ch'ín xitjahya tji la chrika ch'án la kjuák'exín toté ch'án ntá kjuankixin ch'án itji ch'án. Ntá k'uixenko sín ch'án nkaxenhen nínko. Tjetji ch'án la ko chrika ch'án la chjéhe ch'án kjuasáya Dios.

9 Na ntá kaín tí chojni sín tí chjasin ntiha la k'uíkon sín kixin ó tji ch'án la ko chjéhe ch'án kjuasáya Dios.

10 Ntá chrakon sín kixin xikaha tsíkónhen kixin tsíkatsōan sín kixin jehe tí nkexro kjuák'etj_xin kjuanchak'á ch'án chichaon ntója nínko it'in Ntója Náxrjón.

Nixjehe ch'ín Pedro tí chojni sín tí ntasin Salomón

11 Na tí ch'ín xitjahya tji la mé títoehya ch'án tí ch'ín Pedro la ko ch'ín Juan. Ntá kaín xín tí sín sín ntiha chrakon sín kuinká sín sákjuitsjehe sín tí ntasin kuènte nínko it'in ntasin Salomón kixin ntaha tjejó tí sín a.

12 Ntá tí k'uíkon ch'ín Pedro xikaha la ntáche ch'án sín kixin:

—Jahará chojni israelita, ¿nkekuènte chrakonrá jahará la ko nkekuènte komaráni? ¿Á tjenkayáxinrá kixin jehóni kjuínchekitōheni jina tí ch'ín i kixin jehóni chóntani kjuachaxin la ko kixin imá tinkáchónkini Dios?

13 Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkjikēnhenrá ch'án tí sín t'etōan. Ntá tí ch'ín Pilato mé tjinkaon ch'án chrók'uátjanta ch'án tí ch'ín Jesús kjánchó jahará la tjinkákonhyará xikaha.

14 A ntá jahará chrókjuanchiará chrókuítōhe sáchrókjui tí nkexro tjóá jina asén. A ntá náhi. A ntá jahará mé tjinkáonrá sátsji ijnko chojni chóna nchónhya jie.

15 A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xikaha k'uíkonni la chrónkani.

16 Tí kjuachaxién ihnjé Jesús mé tinkáchónkini la ntá tíha mé kuítōexín jina tí nkexro k'uíkonrá la ko choxinrá. Tí ch'ín a mé kuítekaon ch'án ntá kuítōhe ch'án jina. Mé xikaha ó k'uíkonrá kaín rá.

17 Kíchóni ó nòna kixin tió jahará la ko tí sín t'etōan k'oyánrá Jesús la ni kónoahyará nkehe kjuich'erá.

18 Ntá ó xiteyá tí nkehe tsintáchro Dios sínixj_xin tí sín tsíchronka itén ch'án kixin tí Cristo t'ichján_xin tsjasóte ch'án.

19 Méxra tsitōherá ijjará ntá xráxinkáonrá Dios ntá jehe ch'án mé ts'óxika ijjará ntá Ìnchéni mé sinchekitōhará ch'án jina.

20 Ntá jehe ch'án mé tsochr'án Jesucristo inaá la xra ó tsi kixin tsaáxinrá.

²¹ Na ntá ijie la Jesucristo la nkaya nkajní ntaó tsítóhe ch'án hasta tsjasiyóxinjian Dios kaín nkehe éxí tsíntácho ch'án tsínixjajín ch'án tí sín tsíchronka itén ch'án ósé.

²² A ntá senó tí ch'ín Moisés tsíchénka tí sín tsík'axrjeníxinni kíxin: “Ínchéni Dios mé tsochr'án ijnko nkexro ts'axrjeníxinrá tsochrónka itén ch'án éxí tsích'rán ch'án tí janhan. T'ichjánxin tihnínrá kaín tí nkehe tsontácho ch'án.

²³ A ntá tí chojni titekakonhya tí nixja tí nkexro a la ts'itjáyan sín la tsítóhe sín tí nación Israel,”* mé xíkaha tsíchronka ch'ín Moisés.

²⁴ Kaínxin tí sín tsíchronka itén Dios kjuankíxixín ch'ín Samuel la ko kaín tí sín kui chr'èxin mé chrónka sín kíxin kaín tíha tsonhen xíkaha tí yaon i.

²⁵ Mé tí nkehe tsíntácho Dios tsínixjajín ch'án tí sín tsíchronka itén ch'án kíxin xíkaha chrók'uayéhérá jahará tí nkehe chrókjuanjon ch'án kíxin chrók'uejorá jína. Dios tsíkjih'éna ch'án ijnko pacto mé nixjehe ch'án tí sín tsík'axjeníxinrá mé tsíntáche ch'án tí ch'ín Abraham kíxin: “Kaínxin chojni chjasintajni mé tsoyaonxin sín kíxin ijnko nkexro ts'axrjeníxin tí jaha.”†

²⁶ Dios kjuínchexechón ch'án tí Xjeen ch'án la saoxin ichr'án ch'án tí tjejorá jahará israelitará kíxin chrókjuintayaonrá ch'án kíxin jnkojnko tí jahará chrókuitóhérá tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etoan

¹ Ch'ín Pedro la ko ch'ín Juan la naxa tjejónixjehe sín tí sín tsíkójnkotsé ntá xrínahya ikui tí sín nchat'á la ko tí ch'ín t'etuénhen tí sín soldado kuènte tí nínko la ko tí sín saduceo.

² Imá kóninkaon sín kíxin ch'ín Pedro la ko ch'ín Juan kjuakóhe sín tí sín tsíkójnkotsé nkexrí tsoxechón chojni tsík'en kíxin xíkaha xechón ch'ín Jesús.

³ Ntá kuínhin sín xíkaha ntá itsé sín tí sín a ntá sákjuíko sín, chr'áxenhen sín ntóechiso. Ntaó k'uejój sín hasta kóyaon kíxin ó ntá kóntó.

⁴ A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

⁵ A ntá tí yaon chr'èxin kójnkotsé tí chjasin Jerusalén tí sín t'etoan kuènte tí sín judío la ko tí sín tjako tí ley.

⁶ Mé kjaxin ntaha tjen ch'ín Anás, mé jehe ch'an mé tí nchat'á imá t'etoan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchat'á t'etoan.

⁷ Ntá k'uetóan sín kíxin síxrakoa ch'ín Pedro la ko ch'ín Juan. Ntá k'uejój sín jnkosiné la ntá kjuanchankíhi sín ntácho sín kíxin:

—¿Nkexro kjuanjon kjuachaxin o nkexro kjuachaxin ihníé kíxin xíkaha ich'erá tí nkehe?

⁸ Ntá ch'ín Pedro imá chónka ch'án kjuachaxin kuènte Nchakuen Dios ntá kjuátehe ch'án ntácho ch'án kíxin:

—Jahará chojni t'etoan kuènte chjasin la ko jahará sín táda kuènte chjasin Israel,

⁹ jahará mé tjanchankirá kíxin nkexrí kuítóhe ijnko chojni níhi jína kíxin tjínkáonrá tsonohará.

¹⁰ Ntá tihnínrá jína tí nkehe tsochrónkaxínni kíxin kaín rá chojni chjasin Israel tsonohará kíxin tí ch'ín i itjen ntihi mé kuítóhe ch'án jína kjuachaxién

* 3:23 3.22-23 Deuteronomio 18.15,19 † 3:25 Génesis 22.18

ihnié Jesucristo, tí nkexro tsíkjiixin chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá.

11 Tí ch'ín Jesús í mé tí xro náxrjónhya kuítóentará tió kjuich'énará tjat'o ntá mé jie k'óna tí xro tjetoo.*

12 Kohya í jnko nkexro chóna kjuachaxin chrókuaáxinni kixin kohya í jnko ihnié chojni ntíhi chjasintajni chrókuinkáchónkini chrókuaáni —mé xíkaha ichro ch'ín Pedro.

13 Tí síxreé mé k'uíkon sín kixin ch'ín Pedro la ko ch'ín Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etoo ntá kjuátsoan sín kixin tí sín a mé tsik'ajiko ch'ín Jesús.

14 A ntá tí ch'ín tsíkitohe jína mé ntíha tjejóko sín ch'án. Méxra xitjahya tsjanchia sín jie tsjasóte tí sín a.

15 Ntá tí síxreé a mé k'uetooan sín kixin tí sín a ts'axrje sín ntója ntá jehó sín k'uejóxenhén sín nchia ikjo sín kichó sín.

16 Ntá ntáchro sín kixin:

—¿Nkehe chrókuich'ehe ní tí sín a? Kaínxín tí chojni ntíhi chjasin Jerusalén mé ó k'uikon sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha.

17 Í tjinkakonhyani kixin náxa tsochrónka sín tíha kixin náxa tsinhin chojni. Méxra ts'etooanni kixin í tsochénkahya sín ninkexró tí ihnié Jesús.

18 Na ntá k'uíyehé sín tí sín a inaá ntá k'uetuénhen sín kixin ninkehó chrónixja sín la ko chrókuako sín ihnié Jesús, ichro sín.

19 A ntá ch'ín Pedro la ko ch'ín Juan kjuátéhe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará o chrókuinchexiteyéhéni tí jehe ch'an?

20 A ntá jeheni la xitjahya tsitoheni tsochrónkani tí nkehe ó k'uíkonni la ko tí nkehe kuínhinni —ichro sín.

21 A ntá kjónté xíkaha kuínhin tí síxreé la jiehe k'uetooan sín ntá kjuanjon sín kjuachaxin kixin sátsji tí sín a kixin k'uitjahya sín nkexri sínchekjasóte sín tí sín a kixin kaín tí sín chjasin ntíha chjéhe sín Dios kjuasáya kixin tí kjuaxroan kjuich'e sín.

22 Na mé tí ch'ín kuítóhe jína kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochrakonhya sín

23 Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsikójnkotsé iso tí sín chóxin sín. Ntá chrónka sín kaín nkehe k'uetooan tí sín nchaj'á t'etooan la ko tí sín táda.

24 Ntá kjuixin kuínhin tí sín tsikójnkotsé na ntá kaín sín nixjehé sín Dios la ntáchro sín kixin:

—Inchéni, jaha mé kjuich'éna nkajni la ko chjasintajni la ko tí ntayaon la ko kaín xín tí nkehe síin.

25 Jaha mé kjuachaxién Nchakuan nixjaxian ch'ín David tí nkexro kjuít'aha xra. Ntáchro ch'án kixin:

¿Nkekuénte kixin kónínkaon kaín tí chojni nación ókjé?

A ntá tí chojni israelita mé tjenkayáxin nkehe ninkehó sínkíhya.

26 Tí sín rey síin chjasintajni la ko kaín tí sín tí chjasin kójnkotsé sín

* 4:11 Salmo 118.22

nínkakonhen sín Ìnchéni la ko Cristo.†
Mé xíkaha tsíkjin ch'ín David ósé.

27 Mé xíkaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsíkójkotsé sín tí chjasin ntihi kixin kónínkakonhen sín tí Xjaan Jesús chóntahya jie, mé tí nkexro tsíkjéyá jaha sit'aha xra.

28 Mé xíkaha kjuínchexiteyá sín tí nkehe ósé tsíkjenkayáxian kixin t'ichjánxin xíkaha tsonhen.

29 A ntá Ìnchéni, tsjehé kixin imá jiehe k'uetóan tí sín a. La ntá jaha tsjínkítsa tí sín sit'aha xra tsochraKonhya sín tsochrónka sín itán.

30 La ko tí kjuachaxián sìnchekitópexín jína tí chojni níhi la ko tsjákoxian kjuaxroan kjuachaxián ihnié tí nkexro Jesús t'aha xra —mé xíkaha nixjehe sín Dios nkaya nkajní.

31 A ntá tí kjuixin nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankixin sín chrónka sín itén Dios.

Tí kaín nkehe sín la kaín sín mé kuènte sín

32 La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntáchro kixin jehó kuènte tí nkehe sín. Náhí. Kaín sín mé kuènte sín.

33 Tí sín tsíkjéyá Jesús mé kaín asén sín chrónkaxín sín kixin nkexrí xechón Ìnchéni Jesús. Ntá Dios antsí kjuíncheyaon kaín sín.

34 Kohya ninkexró nóaxinhya tjejó ntiha kixin kaín tí sín chóna nontee sín o ntóe sín kjuínchekji sín. Na ntá tsíkjikao sín tí chichaon

35 chjéhe sín tí sín kjueyá Jesús. A ntá tí sín k'óxikeyehe sín tí chichaon, kuákja tí sín nòa.

36 Mé xíkaha kjuích'e ijnko ch'ín levita it'in José. Jehe ch'án la tsíkjin ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axrjexín kixin tí ch'ín nchechéhe asén chojni.

37 Jehe ch'án a mé kjuínchekji ch'án ijnko nontee ch'án ntá kjuíkao ch'án tí chichaon kjuínchek'áyéhe ch'án tí sín kjueyá Jesús.

5

Ijie kjuasin ch'ín Ananías la ko tjan Safira

1 A ntá í jnko ch'án mé it'in Ananías, a ntá ichjién ch'án mé it'in Safira, mé jehe sín mé kjuínchekji sín ijnko nontee sín.

2 A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjueyá Jesús la kjuanjon ch'án éxi kaín.

3 Ntá ntáchro ch'ín Pedro kixin:

—Ananías, ¿kuènté chjehé kjuachaxin tí Tsochren kixin k'uetuénhen asán? Ntá kjuich'iyehé tí Nchakuen Dios kixin kjuínchemá iso chichaon kjuínchekjixián nontaa.

4 ¿Á jehya nontaa tíha? Ntá tió kjuínchekjia la, tí chichaon la, ¿á jehya kuèntá? ¿Kuènte kjuenkayáxian sích'e tíha? Kjuich'iyehé Dios, jehya chojni kjuich'iyehé.

5 Na ntá kuínhin tí ch'ín Ananías ntá kjuítsinka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chraKon sín.

† 4:26 4.25–26 Salmo 2.1–2

6 Na ntá ikjui iso sín ntasoá la ntá kjuínček'ísímá sín ika tí cuerpo kuènte ch'án la ntá sákjuíko sín, sákjuíkjává sín.

7 Ntá k'uátsínka iní hora ntá kjuíji ichjién ch'ín Ananías k'uíxenhén tjan tí nchia ntaha a. La noehya tjan nkehe tsíkónhén tí ntiha.

8 Ntá ch'ín Pedro mé kjuanchankíhi tí tjan a, ntáchro ch'án kíxín:

—Chronka, ¿á chaxín xikahó kóxi^xín tí nonte ó kjuínčekjirá? —ichro ch'án.

Ntá kjuátehe tjan kíxín:

—Chaxín xikahó kóxi^xín.

9 Ntá ntáchro ch'ín Pedro kíxín:

—¿Nkekuènte jnkokoá kjuenkayáxinrá kjuich'iyehérá Nchakuen Ìnchéni? Kjá ntáchrorá kohya nkehe chrókónhanrá. Ntihi ó kui tí sín ntasoá sákjuíkjává sín xia na ntá jái sátsjiko sín tí jaha —mé xikaha ichro ch'ín Pedro.

10 Ntá tuénxín kjuítsínka tjan Safira toté tí itjen ch'ín Pedro ntá ik'uén tjan. Ntá k'uíxenhén tí sín ntasoá tí nchia a ntá k'uíkon sín kíxín tsíkjixin tsík'en tjan. La ntá sákjuíko sín tí cuerpo kuènte tjan la kjuává sín tjan tí chjinaxón tsíxrává tí xì tjan.

11 Na kaín tí sín kuènte njnko la ko tí í so sín kuínhin tí xikaha tsíkónhén, mé imá chrakon sín.

Itsjé kjuaxroan kjuakoxín sín

12 A ntá tí sín kjueyá Jesús mé kjuakoxín sín nchónhya kjuaxroan tí síin chojni ntiha la ko kaín sín mé kójnkotsé sín tí ntásin it'in Salomón.

13 Chrakon iso sín k'uítohya tí jehe sín la kjónté la kaín chojni tjikosáyehe tí jehe sín.

14 La ntá xríñahya nchónhya chojni ntoa la ko chojni chjin kjuankíxín tinkáchónki sín Ìnchéni.

15 Ntá itsjé chojni mé kuakitsje sín tí chojni níhi k'uejo sín ntja. Tjejóták'á sín chrítaón cama la ko kania kíxín ts'atsínka ch'ín Pedro ntá kjónté its'uèen ch'án ó ts'atsínka tí tjejó sín mé chrókuitoxín sín jína.

16 Kjaxin tí chjasin chjino mé kjuixín nchónhya chojni ikjui sín chjasin Jerusalén la kjuíkao sín tí chojni níhi la ko tí chojni chóna nchakuen tí jínahya. La kaín sín a mé kuítóhe sín jína.

Ch'ín Pedro la ko ch'ín Juan mé chónkíhi sín

17 Na ntá tí sín nchát'á t'etóan la ko tí sín kuènte tí sín saduceo mé imá kóchjinoxínhin sín.

18 Na ntá itsé sín tí sín kjueyá Jesús la chr'áxenhén sín ntóechiso.

19 A ntá ijnko ángel kuènte Ìnchéni ikui tí tie a kuakitjehe ch'án ntója ntóechiso ntá kuakitsje ch'án tí sín a. La ntá k'uetuènhén ch'án sín kíxín:

20 —Sátjirá njnko la tsjákohérá kaín tí sín ntiha tí tan njxin tsjanjon kjuachón.

21 Kjuixín kuínhin sín ntá sákjuí sín ntá tí k'uínkaséyan k'uíxenhén sín tí njnko kjuako sín.

A ntá tí nchát'á t'etóan la ko tí sín k'uéjóko ch'án mé k'uíyehé sín tsojnkotsé kaín tí síxreé, mé tí sín t'etóan kuènte Israel. Na ntá k'uetóan sín kíxín tsoxrakoa tí sín tjejóchjina tsíkjeýá Ìnchéni.

22 A ntá kjuíji tí sín policía tí ntóechiso a ntá k'uitjahya sín tí sín a. La ntá ikjan sín la

23 ntáchro sín kíxín:

—Kjujini ntiha la k'uíkoni tsíkjehe jina ntogchiso a la k'uejó tí sín soldado a ntója. Ntá kuakitjeheni ntogchiso la k'uitjahyani ninkexró tí nkaxenhen —ichro sín.

²⁴ Ntá kaín tí nchat'á t'etóan la ko tí ch'in k'uetuēnhen tí policía kuēnte nínko la ko i so tí sín nchat'á t'etóan mé kuínhin sín ntá ntáchro sín kíxin xá nkexrí chrókónhen chrók'uitjáyán tí xrá kuēnte tí sín a.

²⁵ Na ntá tuénxín kjuíji ijnko nkexro ntáchro kíxin:

—Tí sín k'uejochjinará jahará mé ó nkaxenhen nínko ntaha tjejó sín tjejójtákohe sín chojni —ichro ch'án.

²⁶ La ntá tí ch'in k'uetuēnhen tí sín policía mé sákjuúko ch'án tí sín policía la kjuikakjín tí sín tjako. Ninkehó kjuich'ehya tí sín policía tí sín tjako kíxin chrakon sín kíxin ách'e tí sín siín ntiha mé tsjak'e sín xro, ichro sín.

²⁷ Na ntá tió kjuikao sín tí sín a la k'uejó sín nkayakon tí sín t'etóan ntá tí nchat'á t'etóan ntáchro ch'án kíxin:

²⁸ —Jeheni kjuanjonhyani kjuachaxin kíxin tsjákorá ihnié tí nkexro a. ¿A ntá nkehe kjuich'erá jahará? Kuenté chjasin Jerusalén tsíkjákorá. La tjínkáonrá tsékaráni jie kíxin jeheni tsík'óyánni tí ch'in a —ichro ch'án.

²⁹ A ntá ch'in Pedro la ko tí iso sín kjueyá Jesús ntáchro sín kíxin:

—A ntá jeheni t'ichjánxin sinchexiteyéheni Dios senó. A ntá chr'éxin sinchexiteyéheni chojni.

³⁰ Tí Dios tsíkinkáchónki tí sín tsík'axjeníxinni ósé mé kjuínchexechón Jesús, ti nkexro a mé kjuakénkanirá tí ntacruz tsík'oyánrá.

³¹ Ntá ijie tjeko ch'án Dios nkaya nkajni la nángo itja chjina Dios mé tjen ch'án la Dios kjuich'éna ch'án ijnko nkexro t'etóan kíxin sinchekaá ch'án chojni kíxin tí nación Israel chrókjan chrókuinkáchónki sín Dios ntá chrók'uitjáyán tí jie chóna sín.

³² La ko kjaxin jeheni chrónkani kaín tí nkehe k'uíkoni kjuachaxiēn Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

³³ La ntá tí sín t'etóan a mé kuínhin sín tíha ntá kónínkaon sín la ko tjínkaon sín chrók'óyán sín tí sín a.

³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uetóan ch'án kíxin tí sín tsíkjejá Ínchéni mé ts'axrje sín ntója intsí, ichro ch'án.

³⁵ Na ntá nixjehe ch'án kaín tí síxreé ntáchro ch'án kíxin:

—Jahará chojni israelita, tóxakonhanrá kíxin kohya nkehe chrókjuich'eherá tí sín a.

³⁶ Xráxinkáonrá kíxin senó kjuák'e ijnko ch'in it'in Teudas la tónhen asén ch'án kíxin imá t'etóan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'in a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuéxín tí xrá k'uekjich'e sín.

³⁷ Ntá chr'éxin tió xrenájín kaín ihnié chojni k'uejó na ntá ikjui í jnko ch'in mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xíka sín sákjuí sín ínaá.

³⁸ Méxra títóherá tjiatéhyará tí jehe sín a. A ntá tí tjejóch'e sín xrá kuēnte chojni ó la kjaxin ts'itjáyán.

³⁹ A ntá tí chaxín tjako sín kjuachaxién Dios ntá tsjachahyará sinchek'itjáyánrá tíha. Méxra t̄tohéra sín kixin tsjánjonkohyará Dios.

⁴⁰ Na ntá kaín tí sixréé mé kuitekaon sín la ntá k'uíyehé sín tí sín kjueyá Jesús. La ntá kjuate sín la xík'etuñhen sín kixin í tsonixjahya sín ihnié Jesús la ntá kjuanjon sín kjuachaxin kixin sátsji sín.

⁴¹ Ntá tí sín kjueyá Jesús mé k'uaxrjexín sín tí tjejó tí sín t'et̄oan kjónté xikaha kónhen sín la chéhe sín kixin Dios kjuanjon kjuachaxin kjuasóte sín kixin tí kjuako sín ihnié Jesús.

⁴² Kuít̄oehya sín tsjako sín kuénte Jesucristo kaín yaon tí nkaxenhen n̄nko la ko tí jnkojnko nt̄o chojni.

6

Kjueyá sín yato chojni tsjink̄itsa

¹ Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nkiva griego mé kónínkakonhen sín tí sín nixja nkiva hebreo. Ntáchro sín kixin tí sín chjin k'án kuénte sín la kánhyó jína k'uáyéhe tí nkehe síxikayéhe sine sín jnkojnko yaon, ichro sín.

² Na ntá tí teyo tí sín tsíkjeýá Jesús mé k'uíyehé sín kaín tí sín tinkáchónki Ìnchéni. Ntá nixjehe sín, ntáchro sín kixin:

—Jeheni la jehya jína tsít̄oheni tí xra tjakoni itén Dios, kixin ntá sit'aharáni xra ts'óxikayeheni tí nkehe sine tí sín k'án.

³ Méxra jahará kichó ní tsjéýará yato chojni ntoa tí tjejorá, tí chojni jína choxinrá la ko nohe sín la ko ant̄sí chóna sín Nchakuen Dios mé tí sín a sinchek'áyeheni tí xra a.

⁴ A ntá jeheni la tsonixjeheni Dios la ko tsinkákjakoni itén ch'án —mé xikaha ichro sín.

⁵ La ntá kaín sín mé kuínhin sín xikaha ntá jnkokóá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko ant̄sí chóna ch'án tí Nchakuen Dios. La kjaxin kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehé ch'án mé tsíkjix̄in ch'án chjasin Antioquía la ósé mé tsíkinkáchónki ch'án tí nkehe tinkáchónki tí sín judío.

⁶ Ntá kjuixin kjueyá sín tí sín a ntá kjuik̄ao sín tí tjejó tí sín tsíkjeýá Ìnchéni. La ntá tí sín a mé nixjehe sín Dios la ko k'uejotja tja sín chr̄ítaón tí ikja tí sín tsikónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nchat'á judío kjuank̄ixin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyao ch'án la nchónhya kjuaxroan kjuakoxin ch'án tí sín chojni.

⁹ A ntá iso sín tsíkjix̄in tí n̄nko judío kuénte tí sín senó k'uejó esclavo sín tsíkjix̄in sín chjasin Cirene, la ko Alejandría, la ko Cilicia, la ko estado Asia, mé kjuank̄ixin sín ikjo sín ch'ín Esteban.

¹⁰ Kjónté xikaha la kjuachahya sín kixin Nchakuen Dios mé kjuínk̄itsa tí ch'ín Esteban nixja ch'án.

¹¹ Na ntá jehé sín mé kjuenkehe sín ókjé chojni kixin tsochrónka sín kixin kuínhin sín k'uántaxin̄in ch'án ch'ín Moisés la ko Dios, ichro sín.

¹² Mé xikaha k'uixité kaín chojni la ko tí sín t'etōan kuente n̄nko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí sín tí síxreé a.

¹³ Kjaxin kjueyá sín chojni tsochrónka kixin ntoáhya kjuako ch'ín Esteban la ntáchro tí sín a kixin:

—Tí ch'ín a mé títgehya ch'án t'ántaxinh̄in ch'án tí n̄nko kuenténi la ko tí ley.

¹⁴ Ó kuínhinni kixin chrónka ch'án kixin tí ch'ín Jesús, tí ch'ín tsikjixin chjasin Nazaret, mé sinchek'itjayan ch'án tí n̄nkoeni ntihi la ko tsjitóxinhin ch'án tí nkehe tinkáchónkini mé tí nkehe tsik'etōan ch'ín Moisés —mé xikaha ichro sín.

¹⁵ Ntá tí síxreé la ko kaín tí sín sitjaxin ntiha la komá sín tí ch'ín Esteban la mé k'uikon sín kixin tí kàré ch'án mé éxí ijnko ángel mé xikaha tsjehe tí jehe ch'án.

7

Tí nkehe kjuátēhe ch'ín Esteban

¹ A ntá tí sín nchaťá t'etōan kjuanchankíhi sín tí ch'ín Esteban kixin:

—¿Á chaxín kaín tíhi tsintáchrúa?

² Na ntá jehe ch'án kjuátēhe ch'án ntáchro ch'án kixin:

—Kaínrá kichó ni Israel la ko sín táda tinhínrá tí nkehe tsontáxrjan. Dios kuénteni chóna kjuachaxin mé kjuakohe ch'ín Abraham tí nkexro k'uaxrjenixinni tió kjuák'e ch'án nación Mesopotamia tí naxa sátiyhya ch'án tsjak'e ch'án nonte Harán.

³ Dios tsintáchro kixin: “Títōhé chjasán la ko kaín tí nkexro kjéhya. Na ntá sátiya tí nonte tsjákohá jaha.”*

⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjejorá ijie.

⁵ Kjánchó ch'ín Abraham la kuákjahya ch'án nít'ō nonte hasta ni tí tsjak'e toté ch'án la chóntahya ch'án. A ntá chrónka Dios kixin chaxín chr'éxin tió tsjixin ts'en ch'ín Abraham la tí sín ts'axrjenixin ch'án mé ts'áyéhe sín tíha. Kjóté naxa kohya nijnko xjeen ch'án la mé xikaha ntáchro Ínchéni.

⁶ Kjaxin tsintáchro Dios kixin tí sín ts'axrjenixin ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó.

⁷ La kjaxin xintáchro Dios inaá kixin: “Ntá chr'éxin janhan sintakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xikaha ichro Dios.

⁸ Na ntá Dios mé tsikjo ch'ín Abraham kixin kaín tí chojni ntoa ts'axrjenixin ch'án mé itsa sín xroye. Na ntá xikaha tió kokjhi xjeen ch'án Isaac ntá ch'ín Abraham mé chjéhe ch'án xjan xroye tió xétjehe xjan ijní yaon. Ntá kjaxin xikaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xikaha kjuích'e ch'án inaá. Ntá tí sín a mé k'óna it'é tí teyó tribu tsík'axrjenixin tí sín Israel.

⁹ Tí xjeen ch'ín Jacob mé tí sín k'uaxrjenixinni ósé la jehe sín k'uéchjinoxínhin sín tí kichó sín José ntá kjuínchekji sín ch'án la tí sín k'uena la sákjuiko sín ch'án nó nación Egipto, kjánchó Dios mé kjuínkítsa tí jehe ch'án.

¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsonohe ch'án. Na ntá k'uikon ch'ín Faraón tí

* 7:3 Génesis 12.1

rey kuènte naciòn Egipto a xikaha tí xra jina kjuích'e ch'ín José ntá kjuanjon ch'án kjuachaxin kixin ts'etqan ch'ín José tí naciòn Egipto la ko tí ntqe ch'án.

11 'Na ntá kókjinta xrinahya la náxrjónhya k'uejó tí sín naciòn Egipto la ko nonte Canaán la tí sín tsík'axrjenixinni la k'uitjahya sín nkehe sine sín.

12 A ntá tsíkinhin ch'ín Jacob kixin tí naciòn Egipto mé sitóxi noa trigo ntá k'uetuñhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjenixinni. Tíha mé tí saoxín sákjuí sín.

13 Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuakohé ch'án tí ch'ín Faraón tí sín naxa kjéhya ch'án.

14 La ntá k'uetqan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án.

15 Mé xikaha kónhen la tí ch'ín Jacob mé sákjuí ch'án la kjuák'e ch'án naciòn Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjenixinni k'uénxin sín ntiha.

16 Ntá chr'éxin kuakitsjexín sín tòye tí huésoé tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

17 La ntá ó kuichjina tsoxiteyá tí nkehe tsintáchro Dios tsíkjo ch'ín Abraham ntá tí sín Israel imá kótsjé sín naciòn Egipto.

18 A ntá xrinahya í jnko ch'ín rey kjuankíxin k'uetqan naciòn Egipto la k'uéchónhya ch'án tí ch'ín José.

19 La ntá tí ch'ín rey kjuích'iyehé ch'án tí sín naxa kjéhyani la ko kjuínchekjasóte ch'án sín. La tsík'etqan ch'án kixin tí xjan ntoa na ntá kokjíhi mé tsjik'itjí sín xjan kixin its'en xjan.

20 Na ntá tí yaon a tsíkokjíhi ch'ín Moisés ntá imá kóxrjínhin Dios tí xjan a. It'é la ko iné xjan mé k'uéchónta sín xjan iní nitjó koá ntqe sín.

21 Ntá chrokjuahya tsjak'emá sín xjan la ntá kjuíkjáka sín xjan. La ntá xjeen tí ch'ín rey kuènte Egipto mé kjuíakakja tjan xjan la sákjuíko tjan ntqe tjan la kjuínchek'ánkí tjan xjan éxí xjeen tjan xikaha.

22 La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetqan tí nkehe k'uéntáchro ch'án la ko tí nkehe k'uékjich'e ch'án.

23 'La ntá tió chóna tí ch'ín Moisés cuarenta nánó ntá tjinkaon ch'án tsjtsjehe ch'án tí sín israelita naxa kjéhya ch'án.

24 Ntaha mé k'uíkon ch'án kixin ijnko chojni Egipto kjuate ijnko chojni naxa kjéhya tí jehe ch'án. Ntá chrókjuinkitsa ch'án tí sín naxa kjéhya ch'án ntá k'oyán ch'án tí ch'ín Egipto a.

25 Kjuenkayáxin ch'án kixin tí sín naxa kjéhya ch'án, mé tí sín israelita, mé tsonoxín sín kixin Dios mé tsíchr'án tí jehe ch'án sinchekaá sín ch'án. Kjánchó tí sín a kjuátsoanhya sín.

26 La ntá í jnko yaon tí ch'ín Moisés k'uíkon ch'án kixin yaá sín israelita tjanjonko kichó sín. La ntá tjinkaon ch'án chrókjuít'oxin ch'án kixin chrokjuanjónhya sín. La ntáchro ch'án kixin: "Jahará jnkokoá kichuárá la, ¿nkekuénté tjanjonrá?"

27 A ntá tí nkexro chóna tí jje mé kónínkaon ch'án la kótéka ch'án tí ch'ín Moisés. Ntá ntáchro ch'án kixin: "¿Nkexro kjuanjon kjuachaxin kixin jaha k'óna juez kuénténi?"

28 ¿Á tjinkávan ts'oyánni kjaxinni éxí k'oyán tí ch'ín Egipto ijna ní?"

29 A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nació n Madián ntá ntiha kjuák'e ch'án éxí ijnko chojni tsíkji_xin ókjé. Ntá ntaha tsikótehe ch'án la ko kjuích'éna ch'án yaá xjan ntoa.

30 Na ntá k'uátsínka cuarenta nánó ntá tí nteje chjino jnā it'in Sinaí mé xrinaha k'uíkon ch'án ijnko ángel tjenkákjan tí xrohi chrikjan tí ntayoa tjeche.

31 Ntá tí ch'ín Moisés la chrakon ch'án kixin xíkaha k'uíkon ch'án la ntá kóchjinehe ch'án kixin chrótsjehe ch'án la ntá kuínhin ch'án itén Ìnchéni ntá chro kixin:

32 “Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob,” mé xíkaha ichro Dios. Ntá tí ch'ín Moisés la kjuankixin chrakon ch'án la síxránkā ch'án ntá í tjinkakonhya ch'án tsotsjehe ch'án.

33 Na ntá ntá chro Ìnchéni kixin: “Takítsje tokáté kixin tí nonte tinkatja la nonte tjóá chóntaha jie.

34 Ó k'uíkuan kixin tí sín kuèntana mé imá tjetotjasóte sín nació n Egipto. La ó kuínhan kixin t'èya sín. La ntá ijie ó k'uinka kixin tsjínkítsa sín. Méxra xrákiá jaha tsétuanhan jaha sátsjia nació n Egipto,”† ichro Dios.

35 “Tí sín israelita mé kjuanoá sín tí ch'ín Moisés. Tsíntá chro sín kixin: “¿Nkexro kjuanjon kjuachaxin kixin jaha k'óna juez?” ichro sín. Kjánchó Dios ichr'án ch'án tí ch'ín Moisés kixin ts'etóan ch'án la ko sínchekáá ch'án tí sín israelita kjuachaxin tí ángel k'uíkon ch'án chrikjan tí nta.

36 Ntá tí ch'ín Moisés kuakitsjexín ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakóxin ch'án tí nació n Egipto, la ko tí Ntayaon Kjátse, la ko tí nteje k'uáji sín cuarenta nánó.

37 Jehé tí ch'ín Moisés a mé chénka tí sín israelita kixin: “Dios mé tsochr'án ijnko chojni tsoníxja itén Dios ts'axrjeníxín tí sín kíchuará éxí ichr'án ch'án tí janhan. Títekákonhérrá tí jehe ch'án.”‡

38 Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehé ch'án tí jnā Sinaí la ko tí sín k'uaxrjeníxinni mé k'uáyéhé sín tí tan tjanjon kjuachón, ntá tí tan mé k'uátsínka tí jeheni ijie.

39 A ntá tí sín k'uaxrjeníxinni ósé mé tjinkakonhya sín kixin chrókuitekaon sín la kjuanoá sín tí ch'ín Moisés la ko tjinkaon ínaá chrókjan sín nació n Egipto.

40 A ntá ntáche sín ch'ín Aarón kixin: “Tjinkaonni sích'éna ijnko dios kixin tsínkáchónkini kixin í noehyani nkehe kónhen tí ch'ín Moisés, tí nkexro kjuínkítsa k'uaxrjexínni nació n Egipto.”§

41 Ntá kjuínchekjangya sín ijnko koxintáxjan la ntá k'óyán sín iko kjokehé tí nkehe tsíkjangya a la imá kóchéhé sín k'uíkon sín tí nkehe tsík'ónaxín tja chojni.

42 A ntá Dios mé kuítóhe tí jehe sín kixin tsínkáchónki sín tí konotsé síin nkajní. Tíhi mé tsíkjin ijnko nkexro k'uéchrónka itén Dios ntá chro xíkíhi:

Jahará chojni Israel, ¿á k'oyánrá tí iko kjókanará tí janhan

tí cuarenta nánó k'uejorá nteje ní?

43 Kja náhi, jehó tí nkehe kjuích'énar á mé kjókehér á tí ko a. Kjuíkoará tí njnkoé tí dios Moloc

la ko kjaxin kjuíkoará tí konotsé kuénte dios Renfán.

A ntá tí nkehe tsíkji ch'énar á jahará mé xráxinkákonxínrá éxí Dios kuéntará.

Méxra janhan tsakítsjexínrá tí tjejor á la tsétuanhánrá sátsjirá chjasin Babilonia.*

† 7:34 7.30–34 Éxodo 3.1–10 ‡ 7:37 Deuteronomio 18.15,18 § 7:40 Éxodo 32.1 * 7:43 7.42–43 Amós 5.25–27

Mé xikaha ntáchro Dios ósé.

⁴⁴ Naxa k'uejó tí sín k'uaxrjenixinni tí nteje la chóna sín ijnko nínko kamantá chóna tí ley tsík'etoan Dios. Tíhi kjuich'éna sín éxi tsík'etuñhen Dios tí ch'in Moisés kixin sich'éna ch'an kaín nkehe k'uikon ch'an.

⁴⁵ Ntá tí sín tsík'axrjenixinni mé k'uáyéhe sín tí nínko kujtonhen sín. Ntá tí sín kjuikao ch'in Josué mé kjuikao sín tí nínko tió kjuacha sín k'uáyéhe sín í jnko nonte kuente í so chojni kuakitsje Dios, kixin ts'áyéhe tí jehe sín. Mé xikaha kónhen hasta tí yaon kjuankixin k'uetoan ch'in David.

⁴⁶ Imá kjuíncheyaoan Dios tí ch'in rey David la ntá tí ch'in David mé tjinkaon ch'an sich'éna ch'an ijnko nínko kuente Dios mé tí Dios k'uékinkáchónki ch'in Jacob.

⁴⁷ Kjánchó jehe ch'an kjuich'énahya ch'an tí nínko a. Tí ch'in Salomón mé kjuich'éna.

⁴⁸ Kjánchó Dios nkaya nkajni chrohya tsjak'exenhen ijnko nchia tsík'ich'énoxín chojni itja. Ntáchro ijnko ch'in nixja itén Dios kixin:

⁴⁹ Janhan Dios nkaya nkajni itjén tétóanxián ntá chjasintajni tjekjen totená.

¿Xá nkexéhe tí nchia chrókjuich'énará?

¿Xá nketi chrókjuak'é chrók'ok'anaxián?

⁵⁰ ¿Xá jehya tjaná kjuít'anaxián kaín tí nkehe ní?†

Mé xikaha ichro Dios.

⁵¹ A ntá jahará la icha asánrá xráxín titekákonhyará. Jahará tinhínrá kjánchó ich'erá éxi chojni chónhya Dios. Xráxín tjánjonkoará Nchakuen Dios. Jahará mé tóyóhará tí sín tsík'axrjenixínrá ósé.

⁵² Tí sín tsík'axrjenixínrá kjuínchekjasóte kaín tí sín tsíchronka itén Dios. K'óyán sín tí sín k'uéchrónka kixin itsi tí nkexro chóntahya jie. A ntá ó kui tí nkexro a ntá jahará kjuínchekjirá ch'an ntá k'óyán sín ch'an.

⁵³ Jahará k'uayéhérá tí nkehe k'uetoan Dios senó, mé tí nkehe chrónka tí ángel, la kjónté xikaha kuitekákonhyará —ichro ch'in Esteban.

Ik'uén ch'in Esteban

⁵⁴ Ntá tí kuínhin tí jehe sín tí nkehe ntáchro tí ch'in Esteban ntá imá kónínkaon sín la netaón neno sín kixin nínkakonhen sín ch'an.

⁵⁵ A ntá ch'in Esteban antsi chóna ch'an Nchakuen Dios la konta ch'an nkajni k'uikon ch'an kjuachaxién Dios la ko k'uikon ch'an kixin ch'in Jesús tjexín toté ch'an nánko tja chjina Dios.

⁵⁶ Ntá ntáchro ch'in Esteban kixin:

—Tsjeherá kixin k'uikuán kixin xitjehe nkajni la ntaha itjen tí Xjeen Dios K'óna Chojni nánko tja chjina Dios.

⁵⁷ A ntá jehe sín la k'uikjehe sín ntatsjon sín la itsen k'uixité sín ntá sákjuí sín k'uixitja sín ch'an

⁵⁸ sákjuiko sín ch'an ikon chjasin ntá ixro chjéhe sín ch'an. La tí sín tjanchia jie mé kuakitsje sín iké sín la k'uejo sín toté ijnko ch'in ntasoá it'in Saulo kixin ts'ayakonhen ch'an tí ka a.

⁵⁹ La it'e sín xro ntá ch'in Esteban mé chrónóhehe ch'an Ìnchéni la ntáchro ch'an kixin:

—Ìnchéni Jesús takjá nchakuenná.

⁶⁰ Ntá tuénxín kjuák'exín toch'in ch'an la k'uèya ch'an itsen ntáchro ch'an kixin:

—Ìnchéni jaha mé tahya kuentá tí jie kjuasin sín.

Mé xikaha ichro ch'án ntá ik'uén ch'án.

8

Ch'in Saulo chrók'óyán ch'án tí sín tinkáchónki Jesús

¹ La tí ch'in Saulo mé jnkokón kjuenkayáxinko ch'án tí sín k'óyán tí ch'in Esteban.

Á ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xíkayehe sín sákjuí sín nkuíxín estado Judea la ko estado Samaria. Á ntá jehó tí sín tsíkjeýá Jesús mé kuítøhe sín ntiha.

² Na iso sín imá tinkáchónki Dios mé kjuavá sín ch'in Esteban la ko tsjánkama sín ch'án la ko t'avéhe sín ch'án.

³ Á ntá tí ch'in Saulo la kjuankíxin kónínkakonhen ch'án tí sín tinkáchónki Cristo. K'uixenhen ch'án jnkojnko jnkojnko ntøe sín la itsé ch'án tí sín ntoa la ko tí chojni chjin. La ntá kuinkánkákjen ch'án sín sákjuíkø ch'án sín kíxin ts'ejóchjina sín.

Kjuako sín itan jína tí estado Samaria

⁴ Á ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuíxín tí sákjuí sín.

⁵ La ijnko ch'in it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuènte Cristo.

⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'in Felipe kíxin ó k'uíkon sín tí kjuaxroan kjuakoxin ch'án.

⁷ Itsé chojni chóntha nchakuen tí jínahya mé kuítøhe sín jína la tí nchakuen tí jínahya k'óyako k'uaxrjexín tí jehe sín. La nchónhya tí sín chóntha chín xitjahya itji la ko tí sín síxénká toté mé kuítøhe sín jína.

⁸ Á ntá imá kóchéhe kaín tí sín siin chjasin ntiha.

⁹ Tí chjasin a mé kjuák'e ijnko ch'in it'in Simón mé ijnko ch'in ósé mé k'uékjinchexroan ch'án. K'uékjich'iyeye ch'án tí sín estado Samaria ntáchro ch'án kíxin ijnko chojni imá tjetøan tí jehe ch'án.

¹⁰ La kaín tí sín ntiha k'uejó sín kuínhin sín jína, mé tí chánjan ntsíntsi hasta tí chojni imá táda la k'uéntáchro sín kíxin:

—Tí ch'in i imá chóntha ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kíxin k'uékjinchexroan ch'án k'uékjich'iyexín ch'án sín itsjé nánó.

¹² Ntá tió kuítekaon sín tí tan jína kjuako ch'in Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuítekaon sín.

¹³ Á ntá kjaxin tí ch'in Simón, mé kuítekaon ch'án la kuítekaon ch'án, koí ch'án. Ntá kjuankíxin k'uájiko ch'án tí ch'in Felipe la imá chrakon ch'án kíxin k'uíkon ch'án tí kjuaxroan jíe kjuasin tí ch'in Felipe.

¹⁴ Á ntá tí sín apóstol, mé tí sín tsíkítøhe chjasin Jerusalén, kuínhin sín kíxin itsjé tí sín estado Samaria ó kuítekaon sín itén Dios. Ntá k'uøtuenhen sín ch'in Pedro la ko ch'in Juan sátsji sín ntiha.

¹⁵ Ntá tió kjuíji sín ntá kjuanchehe sín Dios kíxin tí sín ntiha tinkáchónki Cristo chrók'uáyéhe sín Nchakuen Dios

¹⁶ kíxin nijnko tí jehe sín ntiha naxax tsík'áyéhya sín Nchakuen Dios. Jehó tsíkikitexín sín ihnié Inchéni Jesús.

17 Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

18 Na ntá tí ch'ín Simón mé k'uikón ch'án kixin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon

19 La ntáchro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaón ikja jnkójín chojni ntá chrók'uáyéhe sín Nchakuen Dios —ichro ch'án.

20 Ntá ntáchro ch'ín Pedro kixin:

—Jaha la ko tí chichakoán ts'itjáyankqa kixin tjenkayáxian kixin chrók'uèna tí kjuachaxin kuènte Dios.

21 Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán.

22 Méxra tsitohé tí ijjá la chrónóghé Dios kixin ách'e tsjakjìnhan ch'án tí jie tjenkayáxian.

23 Ó t'íkuañ kixin imá chjinoxínhin asán la ko nchónhya jie chonta —ichro ch'ín Pedro.

24 La ntá ch'ín Simón kjuátéhe ch'án ntáchro ch'án kixin:

—Nixjehérá Ìnchéni kixin tí janhan kixin chrókónnahya tí janhan éxí tí ntáchrórá —ichro ch'án.

25 Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya tí chjasin ntsíntí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkjin naciòn Etiopía

26 A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sátjia nó sur tsoxeta tí ntja t'inkajinxin chjasin Jerusalén hasta chjasin Gaza —ichro tí ch'ín ángel.

Na ntá tí ntja a mé ijnko ntja t'atsínka nó nteje.

27 Na ntá tí ch'ín Felipe k'uínkatjen sákjuí tí ntja. La ntiha xrínahya xeta ch'án ijnko chojni tsíkjin nó naciòn Etiopía. Jehe ch'án mé ijnko chojni eunuco mé tja ch'án siín chichakoén tí tjan reína Candace t'etuènhen tí naciòn Etiopía. Jehe ch'án sátsíkji ch'án chjasin Jerusalén xraxinkakonxin ch'án Dios.

28 A ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsikjin ch'ín Isaías, ijnko nkexro k'uéchrónka itén Dios.

29 La ntá tí Nchakuen Dios mé k'uètuènhen tí ch'ín Felipe ntáchro kixin:

—Sátjia tóchjina antsí tí tjen tí carro.

30 Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsikjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

31 La ntá kjuátéhe tí ch'ín a ntáchro ch'án kixin:

—¿Nkexrí chrókuiánxian kixin kohya nkexro tsjinkítsana tsochrónkaxin nkexrí t'axrxén tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjaxin chjinaxón tí tjen ch'án.

32 Na tí xroon itén Dios tjenchekuáxin ch'án mé tíhi:

Jehe ch'án mé sákjuiko sín éxí ijnko kolélo kjuiko sín ts'óyán sín.

La éxí ijnko kolélo tsjánkahya tió kjínhin sín kaxree va mé xikaha jehe ch'án ninkehó xítjeehya ir'va ch'án.

³³ K'uikon sín ch'án éxí ijnko chojni chóna jje la ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín chrók'uaxrjeníxin ch'án

kíxin jehe ch'án la k'uénxín ch'án chjasintajni.*

Mé xikaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kíxin:

—Tsotsenkávan chronka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xikaha kjuanchankí ch'án.

³⁵ La ntá tí ch'ín Felipe kjuankíxin chrónka ch'án kuènte tí nkehe tjenchekuáxin tí ch'ín a la chrónka ch'án tí tan jína kuènte Jesús.

³⁶ A ntá xrinahya kjuíji sín tí tjia ntá, ntá ntáchro tí ch'ín eunuco kíxin:

—Tsjehé tjia ntá. ¿Á xitjahya chrókuíkítana? —ichro ch'án.

³⁷ Na ntá ntáchro tí ch'ín Felipe kíxin:

—Ti kuítekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kíxin:

—Títekávan kíxin tí Jesucristo la Xjeen Dios —ichro ch'án.

³⁸ La ntá tí ch'ín tsikjixín Etiopía a k'uetqan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjixín Etiopía mé k'uínkajin sín ntá kjuíankí sín ntá la tí ch'ín Felipe kuíkíte ch'án tí ch'ín a.

³⁹ La ntá kjuixin k'uaxrjenkí sín ntá la ntá tí Nchakuen Ìnchéni sátsíkjiko tí ch'ín Felipe ókjé. A ntá k'uíkonhya kíchó sín ínaá. Ntá kjónté xikaha la tí ch'ín eunuco sákjuí ch'án la antsí chéhe asén ch'án.

⁴⁰ A ntá tí ch'ín Felipe xrinahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Ìnchéni kíxin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo

(Hch. 22.6-16; 26.12-18)

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Ìnchéni Jesús. Méxra sákjuítsjehe ch'án tí ch'ín ncha't'á t'etqan.

² Ntá kjuanchia ch'án ijnko xroon kíxin ts'áyéhe ch'án kjuachaxin kíxin sátsji ch'án tí nínko chjasin Damasco tsjeyá ch'án tí sín kuákja ntja nixín mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén.

³ La ntá kjuíji ch'án chjinaxón chjasin Damasco, a ntá xrinahya titàya ikui ijnko xrohi t'inkaséyan kuixín nkaya nkajíní k'uantatjen ch'án a.

⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kíxin:

—Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kíxin:

—¿Xá nkexro jaha?

Ntá tí tan mé kjuátehe, ntáchro kíxin:

—Janhan mé Jesús, mé tí nkexro xritjéyá jaha.

* 8:33 8.32-33 Isaías 53.7-8

⁶ T'áya sátjia. T'ixenhnén tí chjasin Damasco, ntá ntiha mé tsinhín nkehe sích'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uikonhya sín ninkexró.

⁸ La ntá tuénxín k'uàya ch'ín Saulo ntá kuakitjenkí ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuíko sín ch'án chjasin Damasco.

⁹ A ntá ntiha kjuák'e ch'án la iní yaon k'uikonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uikuèn ch'án Ìnchéni ntáchro kixin:

—Ananías.

A ntá ch'ín Ananías mé kjuátehe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sátjia tí ntja it'in Ntja Ntoi. Ntá tió tsjasán ntøe ch'ín Judas tjanchankihí sín á ntahya itjen ijnko ch'ín tsíkjixín chjasin Tarso me it'in ch'án Saulo. Jehé ch'án mé tjechrónóana ch'án.

¹² A ntá titàya k'uikuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehé ch'án kixin xik'ikon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhi, tsjihyani kixin ó kuínhinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jína kjuúch'ehe ch'án tí sín kuítekaon tí jaha chjasin Jerusalén.

¹⁴ A ntá jie la ó kjui ch'án ntihi kixin tsík'áyéhe ch'án kjuachaxin kuènte nchat'á t'etøan kixin tsotsé ch'án kaín tí sín tinkáchónki ihníá.

¹⁵ Kjánchó Ìnchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakøhe ch'án tí sín ókjé nacióan la ko tí sín rey la ko kjaxin tí sín israelita.

¹⁶ Janhan tsjåkøhå ch'án kixin nchónhya tsjasóte ch'án kixin tsinkáchónkina ch'án.

¹⁷ A ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kichóni Saulo, Ìnchéni Jesús, tí nkexro k'uikuan tí ntja k'uinkaxian, mé k'uetuanna kjuíha kixin sintak'ikuan inaá la ko ts'ayéhé Nchakuen ch'án —ichro tí ch'ín Ananías a.

¹⁸ Ntá tuénxín k'uanojtjenxin ikon ch'ín Saulo ijnko nkehe éxí kjøe koche xíkaha. Ntá xik'ikon ch'án inaá. La ntá k'uinkatjen ch'án la ko kuíkite ch'án.

¹⁹ La ntá chr'éxin ntá kjóne ch'án la ntá ikjan asén ch'án inaá. Ntá kuítøhe ch'án iso yaon k'uéjoko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankixin ch'ín Saulo kjuåkøxin ch'án iso njnko Israel kixin Jesús mé Xjeen Dios.

²¹ La kaín tí sín tjejóntihin imá chrakon sín la ntáchro sín kixin:

—¿Á jehya tí ch'ín i tjinkaon sinchek'itjáyan ch'án kaín tí chojni tinkáchónki Jesús chjasin Jerusalén? ¿Á jehya tí xra a kjuixín ch'án ntihi kixin tsotsé ch'án sín la sátsjiko ch'án sín tí tjejó tí sín nchát'á t'etoan? —ichro sín.

²² Kjánchó antsí má fuerte kjuako ch'ín Saulo kixin chaxín tí ch'ín Jesús mé tí Cristo. La tí sín judío k'uéjío chjasin Damasco kjuachahya kjuachaxín sín ch'án.

Kjuachahya tí sín judio chrótsé sín tí ch'ín Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexri chrók'óyán sín tí ch'ín Saulo.

²⁴ A ntá ó kuínhin ch'án nkehe kjuenkayáxin sín. A ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrjexín ch'án chjasin.

²⁵ A ntá tí sín tinkáchónki Ìnchéni mé kjuak'enkaya sín tí ch'ín Saulo ijnko ntaxra jié ijnko tie. Ntá kjuinkajjinxín sín tí ntaxra tjenkaya tí ch'ín Saulo nóton tí tját'ò tsík'antatjen tí chjasin a. Ntá kuaa ch'án.

Ch'ín Saulo sákjuj chjasin Jerusalén

²⁶ Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kixin kuítekakonhya sín kixin á chrókóchaxín kjaxin ch'án tinkáchónki ch'án Ìnchéni.

²⁷ A ntá ch'ín Bernabé mé sákjuiko ch'án tí ch'ín Saulo ti tjejó tí sín apóstol la ntá chrónka ch'án kixin ch'ín Saulo mé tsík'ikon ch'án Ìnchéni tí ntja sákjuí ch'án ntá Ìnchéni mé nixjehe ch'án. Méxra chjasin Damasco k'uékjako ch'án ihnjé Ìnchéni la chrakonhya ch'án.

²⁸ Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxiэн ihnjé Ìnchéni Jesús.

²⁹ La ikjo ch'án tí sín judío nixja nkíva griego. A ntá jehe sín la tjinkaon sín chrók'óyán sín tí jehe ch'án.

³⁰ A ntá tí sín kichó ni tinkáchónki Cristo mé tsíkinhin sín nkehe chrókónhen ch'án la ntá sákjuiko sín ch'án tí chjasin Cesarea la k'uétuénhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjío sín la antsí má tinkáchónki sín Ìnchéni. K'uéchonta sín kjuasáyé Ìnchéni la ko tí Nchakuen Dios kjuinkítsa sín la ntá antsí má sitinkákótsjé sín.

Ch'ín Eneas kuítóhe ch'án jína

³² Na ntá tí ch'ín Pedro xritsjehe ch'án kaín tí sín tinkáchónki Ìnchéni. Kjaxin sákjuitsjehe ch'án tí sín kichó ni tjejó chjasin Lida.

³³ Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án.

³⁴ Na ntá ntáchro ch'ín Pedro kixin:

—Eneas, Jesucristo mé sintakitóha jína ijie. T'inkatjen tjatsíyan camá —ichro ch'án.

Na ntá ch'ín Eneas tuénxín k'uínkatjen ch'án.

³⁵ La kaín tí sín siín chjasin Lida la ko chjasin Sarón k'uíkon sín kixin kuítóhe ch'án jína la ntá kjaxin sín kuínkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkíva griego la mé t'axrjexín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkítsa tjan tí chojni nòa.

³⁷ Ntá ijnko yaon imá kóníhi tjan ntá ik'uén tjan. La ntá kjuínchek'ónti sín cuérpogé tjan la ntá tí yóxin piso noi kjuak'e sín tjan.

³⁸ Tí chjasin Jope mé chjino tí chjasin Lida la mé ntíha kjuák'e ch'in Pedro. A ntá tí sín tinkáchónki Ìnchéni mé nohe sín kixin ntíha tjan ch'an. Ntá ichr'an sín iyó chojni tsontáche sín ch'an kixin tjoka itsji ch'an í sínchexrjenhya ch'an, tsixro sín.

³⁹ Na ntá sákjuíko sín ch'in Pedro. Ntá kjuíji sín ntíha ntá tuénxín sákjuíko sín ch'an tí tjan tí cuérpogé tí tjan tsík'en. La ntaha tjejó kaín chojni chjin k'an imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan.

⁴⁰ A ntá k'uetqan ch'in Pedro kixin kaín sín ts'axrje sín ntója. Na ntá kjuák'exin toch'in ch'an nixjehé ch'an Dios. Ntá komá ch'an tí tjan tsík'en ntá ntáchro ch'an kixin:

—Tabita, t'aya.

Ntá kuakitjénki tjan ikon tjan ntá k'uíxon tjan kixin ntaha itjen ch'in Pedro ntá k'uàya tjan, kjuák'etjaxin tjan.

⁴¹ A ntá itsé ch'an itja tjan la k'uínkatjen tjan. La ntá k'uíyehé ch'an kaín tí sín tinkáchónki Ìnchéni la ko kjaxin kaín chojni chjin k'an kixin ntá ts'ikon sín kixin ó xíxehón tjan.

⁴² Na ntá kaín sín siín chjasin Jope mé kónohe sín tí kjuaxroan kjuích'e ch'in Pedro ntá itsjé sín kuinkáchónki Ìnchéni.

⁴³ A ntá ch'in Pedro kuítqhe ch'an itsjé yaon tí chjasin a la kjuák'e ch'an ntogé ch'in Simón, ijnko ch'in nchentá tjoé iko.

10

Ch'in Pedro la ko ch'in Cornelio

¹ Chjasin Cesarea kjuák'e ijnko ch'in it'in ch'an Cornelio. Jehé ch'an mé capitán k'uetuenhen tí sín soldado italiano.

² Tí ch'in a la imá jína ch'an la kaín tí sín kjéhya ch'an mé imá xraxinkaon sín Dios. Kjaxin kjuanjon ch'an nchónhya chichaon kixin tjinkaon ch'an tsjinkítsa tí sín judío la ko xráxín nixjehé ch'an Dios.

³ La ntá ijnko yaon las tres kónjin titàya k'uíkuèn ch'an ijnko ángel kuènte Dios k'uíxehen tí tjan ch'an ntáchro kixin:

—Cornelio.

⁴ A ntá tí ch'in Cornelio komá ch'an tí ángel la chrakon ch'an kjuanchankíhi ch'an kixin:

—¿Nkehe tjinkávan jaha? —ichro ch'an.

Ntá ntáchro tí ángel kixin:

—Dios kóxrjinhin kixin tí nixjehé ch'an la ko tí jína ch'e tjínkítsa tí sín nòa.

⁵ Ntá jaha tétuénhén jnkojin chojni sátsji chjasin Jope kixin tsjakakjín sín ch'in Simón kjaxin it'in ch'an Pedro.

⁶ Itjen ch'an ntogé ijnko ch'in kjaxin it'in Simón. Tí ch'in a mé nchentá tjoé iko. Mé tjan ntogé ch'an chjinaxón tí ntayaon a.

⁷ Ntá tíó sákjuí tí ángel nixjehé ch'in Cornelio la ntá jehé ch'an k'uíyehé ch'an yaá sín ch'ehe ch'an xra la ko ijnko ch'in soldado kjaxin xraxinkaon Dios, la chónthehe sín kjuasáya kíchó sín.

⁸ Ntá kjuixin chénka ch'án kaín sín tí nkehe k'uúikon ch'án ntá k'uetuēnhen ch'án sín sátsji sín chjasin Jope.

⁹ Í jnko yaon chr'éxin chjina chonkíxin tjejóyá sín ntia chjino chjasin Jope ntá ch'ín Pedro mé k'ui't'ótjen ch'án chrítaón nchia kíxin ntaha nixjeexín ch'án Dios.

¹⁰ Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titàya k'uúkuēn ch'án nkehe

¹¹ mé k'uúikon ch'án kíxin xitjehe nkaya nkajní ntá ntia k'uúinkajinxin ijnko ka jié. Kanoé punté tí ka tjejóte.

¹² Tí nkaxenhen tí ka a tjinká ko noó toté la ko konche la ko kaín ko xritjaká.

¹³ Ntá kuínhin ch'án nixja ijnko nkexro ntáchro ch'án kíxin:

—Pedro, t'áya, t'oyán tí ko a ntá inte.

¹⁴ Ntá ch'ín Pedro kjuátehe ch'án kíxin:

—Náhi, Ìnchéni. Nunca nehyani tí nkehe tjuáhya.

¹⁵ Ntá kjuátehe tí tan inaá ntáchro kíxin:

—Tí nkehe ó kjuínchetjóá Dios. La ntáchrohya kíxin tjuáhya —ichro ch'án.

¹⁶ Xikaha kónhen iní veces ntá tuénxín sákjuí tí ka nkaya nkajní.

¹⁷ Ntá ch'ín Pedro naxa tjenkayáxin ch'án nkehe t'axrjexín tí k'uúikon ch'án la xríñahya ó kui tí sín ichr'án ch'ín Cornelio ntója nchia. Ó tsíkjanckhankí sín nketí tjen ntqē ch'ín Simón.

¹⁸ Ntá kjuanchankí sín itsen kíxin:

—¿Á ntihi tjen ch'ín Simón kjaxin it'in ch'án Pedro?

¹⁹ Naxa tjenkayáxin tí ch'ín Pedro tí nkehe k'uúikon ch'án ntá Nchakuen Dios chrónka kíxin:

—Tsjehe ó kui iní sín xritjeyá tí jaha.

²⁰ T'áya t'inkajián sáttjkoa tí sín a. Tóxakuanhya jaha, janhan mé kuétuanhan sín ikui sín —ichro Nchakuen Dios.

²¹ Ntá k'uúinkajin tí ch'ín Pedro tí tjejó tí sín a ntá ntáchro ch'án kíxin:

—Janhan tí nkexro xritjeyará. ¿Nkehe tí tsonhen tjinkáonrá?

²² Ntá kjuátehe sín ntáchro sín kíxin:

—K'uetqan tí ch'ín capitán Cornelio ikuini ntihi. Jehe ch'án me ijnko chojni imá jina la ko xraxinkaon ch'án Dios. Kaín tí sín judío tjikosáyehe ch'án la ko tjuēhe sín ch'án. Ijnko ángel kuēnte Dios mé nixjehe ch'án chénka ch'án kíxin chrók'uíyēhe ch'án tí jaha kíxin chrókjuia ntqē ch'án la ntá chrókuínhin ch'án tí nkehe tsontáchrua —mé xikaha chrónka sín.

²³ Na ntá tí ch'ín Pedro kjuanjon kjuachaxin kíxin ntahó chrók'ok'éhe sín tí tie a. Ntá kóyaon ntá sákjuíko ch'án sín. Kjaxin iso sín tinkáchónki Ìnchéni tjejó chjasin Jope mé sákjuíkotoxin sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyēhe ch'án tí jehe sín kíxin tsinhin sín.

²⁵ Ntá tió kjuíji tí ch'ín Pedro ntqē tí ch'ín Cornelio ntá k'uaxrjexín ch'án nchia nixjehe kíchó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án.

²⁶ A ntá tí ch'ín Pedro kjuínckek'inkatjen ch'án tí ch'ín a la ntáchro ch'án kíxin:

—T'inkatjen. Tjak'exián totá. Janhan mé ijnko chojni éxi tí jaha.

²⁷ A ntá kjuixin ikjo sín la ntá k'uixenhen sín ntøe ch'án la ntá k'uikon tí ch'in Pedro kixin nchónhya chojni tsikójnko tsé ntiha.

²⁸ Ntá ntáchro ch'án kixin:

—Jahará nohará kixin tí jeheni judíoni chóntahyani kjuachaxin tsojnko tsékoni chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni.

²⁹ Méxra tió k'uíyanará la tjoka k'uinka. Tjínkavan chrókónona kixin nkekuènte k'uíyanará.

³⁰ Ntá kjuátèhe ch'in Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehyani la nixjeheni Dios. Ntá xrínahya k'uikonni ijnko chojni chóna iké tjákiní.

³¹ La ntáchro ch'án kixin: “Cornelio, ó kuínhin Dios tí nkehe nixjéhe ch'án la ó nohe ch'án kixin imá tjínkítsa jaha tí chojni nòa.

³² Méxra tétuènhén chojni sátsji chjasin Jope kixin tsjikakjín sín tí ch'in Simón mé kjaxin it'in ch'án Pedro. Itjen ch'án ntøe ijnko ch'in mé kjaxin it'in Simón nchentá ch'án tjoé iko. Chjino tí ntayaon a itjen ntøe ch'án,” ichro tí ángel.

³³ Méxra xikaha tjoka ichr'ánni sín tsíkjeýá sín tí jaha. Jína k'uinka ntøeni. Ntá ijje ó nohe Dios kixin kaín ni tjinkaonni tsinhinni nkehe tí k'uètuånhan Ìnchéni tsqchronka tsinhinni.

Ch'in Pedro kjuakohe ch'in Cornelio ntøe ch'án

³⁴ Ntá ntáchro ch'in Pedro kixin:

—Ijje ó t'íkuån kixin jnkokón t'íkon Dios kaín xín chojni.

³⁵ Tí nkexro kaín nacióon titekaon la chónthehe kjuasáyé Dios la mé tóxrjínhin ch'án.

³⁶ Dios mé nixjéhe ch'án tí sín k'uaxrjeníxin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehe ch'án mé Ìnché ch'án kaín nkehe.

³⁷ Jahará ó nohará jína kaín tí nkehe tsíkónhen nkuixín tí tjejó tí sín judío mé kjuankixin estado Galilea tió kjuixin kjuako ch'in Juan kixin t'ichjánxin tsikite chojni.

³⁸ Jahará ó nohará kixin Dios kjuanjon kjuachaxièn ch'án la ko Nchakuen ch'án k'uáyéhe tí ch'in Jesús tí nkexro tsíkjin chjasin Nazaret. Ó nohará kixin tí ch'in Jesús mé k'uáji ch'án ntiha la tí nkehe jína kjuích'e ch'án kixin kjuínchekitohe ch'án jína kaín chojni tjasótéxín kaín tí kjuachaxièn tí jínahya. Mé xikaha jína kjuích'e ch'án kixin Dios tjeko tí jehe ch'án.

³⁹ A ntá jeheni mé chaxín k'uikonni kaín tí nkehe kjuích'e tí ch'in Jesús tí estado Judea la ko tí chjasin Jerusalén. A ntá chr'éxin kjuak'enkani sín ch'án ijnko ntacruz la k'óyán sín ch'án.

⁴⁰ A ntá Dios kjuínchexechón ch'án tí nixin yaon la kjuanjon ch'án kjuachaxin kixin k'uikonni ch'án inaá.

⁴¹ Jehya kixin kaín chojni chrók'uikon sín ch'án. Náhi. Jehó tí sín tsíkjeýá Dios kixin ts'íkon chaxín xechón ch'án. Jeheni kjónekoni ch'án la ko k'uikõni ch'án tió xíxechón ch'án inaá.

⁴² K'uètuån ch'án kixin jeheni tsjakoheni chojni la tsochronkani kixin jehe ch'án mé tí nkexro juez sinchekitoexín ijje tí sín tjejóchón la ko tí sín ó tsík'en.

⁴³ Kaín tí sín k'uèchronka itén Dios mé chrónka sín kixin jnkojnko tí sín tinkáchónki Jesús mé ts'óxika ch'án ijje sín —ichro ch'in Pedro.

Tí sín jehya judío k'uáyéhe sín Nchakuen Dios

⁴⁴ Naxa tjenixja ch'ín Pedro ntá kaín tí sín tjejótinin tí nkehe kjuako ch'án k'uáyéhe sín tí Nchakuen Dios.

⁴⁵ Ntá tí sín judío kjuikotoxin ch'ín Pedro la chrakon sín kixin Dios mé kjuanjon Nchakuen ch'án, kjaxin k'uáyéhe tí sín jehya judío.

⁴⁶ Méxra kuínhin sín nixja sín jnkojnko nkíva ókjé la ko kuínhin sín tjanchehe sín Dios kjuasáya.

⁴⁷ Ntá ntáchro ch'ín Pedro kixin:

—Jehe sín ó k'uáyéhe sín tí Nchakuen Dios xíkaha jeheni. Ntá chrókjuanjonni kjuachaxin kixin tsíkíte sín —ichro ch'án.

⁴⁸ La ntá k'ueṭoan ch'ín Pedro kixin tsíkíte kaín sín kjuachaxiэн ihñié Jesucristo. Ntá tí sín kuíkíte mé kjuanchia sín kixin chrókuitohe tí ch'ín Pedro ntiha iso yaon.

11

Nixjehé ch'ín Pedro tí sín tinkáchónki Cristo chjasin Jerusalén

¹ Na ntá tí sín tsíkjeýá Ìnchéni la ko kaín tí sín tinkáchónki Ìnchéni k'uéjó estado Judea mé kuínhin sín kixin tí sín jehya judío ó tinkáchónki sín itén Dios.

² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án.

³ Kjuanchankíhi sín ch'án ntáchro sín kixin:

—¿Nkeuènté kjuítsjehé tí sín jehya judío, la ko kjóntekoa tí jehe sín? —mé xíkaha kjuanchankí sín.

⁴ Ntá tí ch'ín Pedro kjuankixin ch'án chrónka ch'án desde tí xrankixixin kaín nkehe tsíkónhen ch'án. Ntáchro ch'án kixin:

⁵ —Janhan mé kjuak'é chjasin Jope kjuak'énixjahá Dios. La ntá titàya k'uíkueñ ijnko ka jíé k'uínkajinxin nkaya nkajní. Kanoé punté tí ka tjejóte la kjuák'e chjino tí tjén.

⁶ Ntá tsjahá jína tí nkehe la k'uíkuan kixin tí nkaxenhen tí ka tjinká ko noó toté la ko iko nteje la ko konche la ko iko xritjaká.

⁷ La kjaxin kuínhan itén ijnko nkexro nixjana ntáchro ch'án kixin: “Pedro, t'aya t'oyán tí ko a ntá inte.”

⁸ A ntá kjuátahá kixin: “Náhi, Ìnchéni. Nunca nehiani tí nkehe tjuáhya.”

⁹ A ntá kjuátéhe tí tan kuixin nkaya nkajní a ínaá chrónka kixin: “Tí nkehe a mé ó kjuínchetjóá Dios. La ntáchrohya kixin tjuáhya,” ichro ch'án.

¹⁰ Xíkaha kónhen iní veces. Ntá sákjuj kaín tí nkehe a nkaya nkajní ínaá.

¹¹ Ntá xrinahya tuénxin kjujji iní chojni ntoa tí nchia tjejóni. Tsíkixin sín chjasin Cesarea xritjeýá sín tí janhan.

¹² Tí Nchakuen Dios mé k'ueṭoan kixin sáchrókjuikian sín la chrókóxakonahya. Kjaxin sákjuikian injon tí sín kichó ni tjejó i. Kaínni k'uixenhenni ntøe tí ch'ín a.

¹³ A ntá tí ch'ín ntøe ntiha mé chrónka ch'án kixin k'uikon ch'án ijnko ángel tjexín toté la nixja ntáchro kixin: “Tétuénhén chojni sátsji chjasin Jope kixin tsjikakjín sín ijnko ch'ín it'in Simón la ko kjaxin it'in ch'án Pedro.

¹⁴ Jehe ch'án mé tsonixjahá ch'án tsochrónka ch'án nkexrí tsaá jaha la ko kaín tí sín kjéhya.”

¹⁵ Ntá kjuankixian nixjahá sín na ntá ó kui tí Nchakuen Dios k'uáyéhe sín éxi k'uáyéheni tí senó a.

16 Na ntá xraxinkaonni tí nkehe k'uénixja Ìnchéni. K'uéntáchro ch'án kixin: “A ntá chaxín ch'ín Juan ìntá ó kuikítexín ch'án chojni, a ntá ijie jahará tsikitiaxínrá tí Nchakuen Dios.”

17 Éxí xikaha jeheni tió kjuankíxin kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xikaha ijie la kjuanjon Dios tí Nchakuen ch'án k'uáyéhe tí jehe sín kjaxin. ¿Xá nkexro tí janhan kixin chrókjuánjonkian Dios? —ichro ch'ín Pedro.

18 A ntá tí sín kichó ni tjejó chjasin Jerusalén kuínhin tí nkehe tsikónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrínin —mé xikaha ichro sín.

Tí ninko chjasin Antioquía

19 Tí kjuixin k'uen ch'ín Esteban ntá kjuankíxin sín chónkihi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakohé sín tí sín judío nkexrí tjen tí tan jína. A ntá tí sín jehya judío la náhi.

20 A ntá í so sín tinkáchónki Ìnchéni tsíkjixín chjasin Chipre la ko tsíkjixín sín Cirene sákjuí sín chjasin Antioquía. Tió kjuíji sín ntiha mé kjuakohé sín tí sín jehya judío nkexrí tjen tí tan jína kuente Ìnchéni Jesucristo.

21 Tí kjuachaxin kuente Ìnchéni mé chónka tí jehe sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

22 Tí sín tinkáchónki Ìnchéni chjasin Jerusalén mé kuínhin sín nkehe tsikónhen chjasin Antioquía. Ntá ichr'án sín ch'ín Bernabé sákjuí ch'án ntiha.

23 Ntá tió kjuíji ch'án ntiha ntá k'uikon ch'án kixin Dios imá kjuinkítsa tí sín ntiha kjaxin. Ntá imá kóchéhe asén ch'án. Ntá nixjehé ch'án sín kixin kaín asén sín ts'ejó sín tsinkáchónki sín Ìnchéni.

24 Ch'ín Bernabé la ijnko chojni imá jína asén la antsí chónka ch'án Nchakuen Dios la jína tinkáchónki ch'án; méxra kóchjina nchónhya sín kuinkáchónki sín Ìnchéni.

25 Kjuixin tíha a ntá ch'ín Bernabé sákjuí ch'án chjasin Tarso sákjuíkjoyá ch'an tí ch'ín Saulo.

26 Ntá tió k'uitja ch'án ntá sákjuiko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakohé sín itsje chojni. Ntiha chjasin Antioquía kjuankíxin sín kuikítexín sín tí sín tinkáchónki Cristo mé ihníé cristiano.

27 A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía.

28 Ijnko ch'ín it'ín Agabo k'uínkatjen ch'án kjuák'exín toté ch'an tí tsikójnksé tí sín tinkáchónki Jesús la kjuachaxién Nchakuen Dios chrónka ch'án kixin tsokjinta nkuíxin ntiha. Tí nkehe chrónka ch'án mé chaxín kónhen tió kjuák'e ch'ín Claudio k'uetqan ch'án.

29 A ntá tí sín tinkáchónki Ìnchéni chjasin Antioquía kjuenkayáxin sín kixin jehe sín tsjinkítsa sín tí sín kichó sín tinkáchónki Ìnchéni estado Judea. La jnkoinko sín kjuanjon sín tí nkehe chónka sín.

³⁰ Mé xikaha kjuenájín sín chichaon sákjuiko ch'ín Bernabé la ko ch'ín Saulo chjéhe sín tí sín t'ayakonhen n̄nko estado Judea.

12

Ik'uén ch'ín Jacobo la ko kjuák'echjina ch'ín Pedro

¹ A ntá tí yaon a tí ch'ín rey Herodes mé ntá kjuankíxin ch'án kónínkakohen ch'án tí sín tinkáchónki Jesús.

² La k'uet̄oan ch'án ḱixin tí ch'ín Jacobo ts'enxín ijnko chica espada tjate. Jehé ch'án mé kichó ch'án tí ch'ín Juan a.

³ Ntá k'uíkón ch'ín Herodes ḱixin imá kóchéhe tí sín judío ḱixin xikaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín n̄ot̄ja chóntahya tí xroan nchek'ánkí n̄ot̄ja.

⁴ Kjuixin itsé ch'ín Herodes tí ch'ín Pedro ntá chr'áxenhén ch'án nt̄ochiso. Ntá ntíha mé tjejónta noó grupo soldado la mé noó soldado jnkojnko grupo. Kjuenkayáxin ch'ín Herodes ḱixin tsjixin ts'átsínka tí kia pascua ntá sátsjiko ch'án tí ch'ín Pedro tí síin tí sín israelita ḱixin ts'íkon kuenté chjasin ntíha ḱixin nkexrí its'en ch'án.

⁵ Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehé sín Dios kaín asén sín ḱixin tsjink̄tsa Dios tí ch'ín Pedro.

Dios kjuínk̄tsa ch'ín Pedro k'uaxrjexín ch'án nt̄ochiso

⁶ Tí tie a mé kjuenkayáxin ch'ín Herodes ḱixin tsoyaon ntá tsakitsje ch'án ch'ín Pedro sátsjiko ch'án tí síin tí sín chjasin. A ntá ch'ín Pedro tjejua ch'án la nánánko tí jehé ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója nt̄ochiso.

⁷ A ntá xrínahya tuénxín ikui ijnko ángel kuénte Ìnchéni, a ntá tí nkaxenhén nt̄ochiso imá k'uínkaséyan ijnkóyé ntíha. Kjuak'etja itja tí ángel tí chjia ch'ín Pedro kjuínchekjajehé ch'án. Ntá k'uet̄oan tí ángel ntáchro ḱixin:

—Tjoka t'áya.

La ntá tí chica cadena tjejóchróntetoxín itja ch'ín Pedro mé k'uánótjen.

⁸ Ntá xík'et̄oan tí ángel ntáchro ḱixin:

—T'ínkaya iká la tjanka t̄okátá.

Ntá kuítekaon ch'ín Pedro la kjat̄ee xík'et̄oan tí ángel ntáchro ḱixin:

—T'ítsate iká ntá chréhé sátsjini —ichro ch'án.

⁹ Ntá ch'ín Pedro chréhé ch'án iton tí ángel a ntá noehya ch'án á chaxín xikaha kónhen tí nkehe kjuích'e tí ángel o náhí. Ntáchro ch'án ḱixin ách'e ijnko nkehe k'uíkonxón ch'án.

¹⁰ Ntá kjuixin k'uátsínka sín tí tjejó tí soldado saoxín la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta chica ijíe chjinaxón ntja. La ntá tí puerta chica la jehó xitjehé. Ntá k'uaxrje sín tjejótji sín ijnko ntja la ntá xrínahya tí ángel ó sákjuí la ntá jehó ch'ín Pedro kuít̄ghe ch'án.

¹¹ A ntá tí ch'ín Pedro kónohe ch'án ḱixin chaxín kónhen tíha. Ntá ntáchro ch'án ḱixin:

—Ntá ó noheni ḱixin chaxín Ìnchéni tsíchr'án tí ángel kuénte ch'án ḱixin sinchekaáni ḱixin ts'óyánhyani ch'ín Herodes la ko tsoenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntøe ijnko tjan María, iné ch'ín Juan kjaxin t̃ik̃itexín sín Marcos. Ntaha tsikójkotsé itsjé sín tinkáchónki Ìnchéni t̃ej̃ónixjehe sín Dios.

¹³ La ntá t'ínka ch'án tí puerta chjinaxón nt̃ia la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha.

¹⁴ A ntá tió kjuátsøan tjan itén ch'ín Pedro ntá k'uitjáyenhen tjan kuak-it̃jeehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntíha itjen ch'ín Pedro.

¹⁵ Ntá ntáchro sín kixin:

—Lontia.

La naḡa chrónka tjan kixin chaxín jehe ch'án ntá xíntáchro sín kixin:

—Jehya jehe ch'án. Kjá tí xr̃ntøe ch'án.

¹⁶ A ntá ch'ín Pedro naḡa t'ínka ch'án tí ntója puerta la ntá tió kuakit̃jehe sín la k'uíkón sín ch'án ntá chrakon sín.

¹⁷ A ntá kjuakoxin ch'ín Pedro itja ch'án kixin tsotání sín ntá chrónka ch'án kixin Ìnchéni mé kuakitsjexín ch'án ntøechiso. Ntá k'uetøan ch'án ntáchro ch'án kixin:

—Chenkará ch'ín Jacobo la ko kaín kichó ni nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketi sátsíkji ch'ín Pedro.

¹⁹ La ntá k'uetøan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetøan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrxjén ch'án estado Judea ntá sákjuí ch'án chjasin Cesarea la ntíha kjuák'e ch'án.

Ik'uén ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uáyakonhen ch'án ntøe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etøan. Kjuanchia sín kixin chrókóninkakuenhya sín ch'ín Herodes kixin naḡa tsochr'án ch'án tí nkehe sine sín kixin chjasén ch'án sít̃ixín tí nkehe ine sín.

²¹ Ntá ch'ín Herodes k'uíyeh̃e ch'án sín kixin tsøjnkotsé sín ijnko yaon. Ntá jehe ch'án k'uítsá ch'án ka náxrjón kuente chojni t'etøan la kjuák'enkáyá ch'án ijnko silla kuente chojni t'etøan. La ntá kjuankixin ch'án nixjehe ch'án tí sín tsikójkotsé.

²² A ntá tí sín a kjuankixin k'uèya sín, ntáchro sín kixin:

—Jehya chojni tjenixja. Dios tjenixja —ichro sín.

²³ A ntá tuénxín ijnko ángel kuente Ìnchéni kjuíncheníhi ch'ín Herodes kixin kjuíncheyóhe ch'án asén ch'án Dios. La ntá kos̃ntø kjóne nkaya tseø ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuixín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixr̃a kuente sín chjasin Jerusalén la ntá sáxíkji sín chjasin Antioquía la sákjuíko sín ch'ín Juan mé kjaxin t̃ik̃itexín sín ch'án Marcos.

13

Ch'in Saulo la ko ch'in Bernabé sákjuíkjako sín

¹ A ntá tí nínko chjasin Antioquia la sín iso sín nixja sín itén Dios la kjuákohe sín chojni. Tí sín tjako mé ch'in Bernabé la ko ch'in Simón, kjaxin it'in ch'án Negro, la ko ch'in Lucio, chjasen ch'án mé Cirene, la ko ch'in Manaén, ijnko ch'in tsik'ánkiko ch'in Herodes tí ch'in t'etōan estado Galilea, la ko ch'in Saulo.

² Ijnko yaon la tjejótojnkotsé sín xraxinkaon sín Dios la k'jónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'in Bernabé la ko ch'in Saulo kixin ó kjuéyá sín tsjánjuan ijnko xra sich'e sín.

³ Ntá nixjehe sín Dios la k'jónehya sín la ntá kjuixin ntá k'uejotja tja sín ch'raón ikja tí sín a la nixja sín jnkojnko sín kixin ó sátsji sín.

Ch'in Pablo la ko ch'in Bernabé tjako sín nonte Chipre

⁴ A ntá tí Nchakuen Dios ichr'án ch'in Bernabé la ko ch'in Saulo sákjuí sín chjasin Seleucia. Ntá ntaha k'uixenhen sín ijnko ntabarco sákjuí sín ijnko nonte it'in Chipre.

⁵ Ntá kjuji sín ijnko puerto it'in Salamina. Ntaha kjuákoxin sín itén Dios tí nínko kuente tí sín judío. Kjaxin kjuíjiko sín ch'in Juan kixin tsjinkitsa ch'án.

⁶ La ntá sákjuí sín nkuixín nonte Chipre hasta kjuíjín sín chjasin Pafos. Ntaha xéta sín ijnko ch'in nchexroan me ijnko ch'in judío it'in Barjesús. Jehe ch'án kjuich'ia ch'án ntácho ch'án kixin kjaxin ch'án nixja ch'án itén Dios.

⁷ A ntá tí ch'in nchexroan a mé kjuák'eko ch'án tí ch'in gobernador Sergio Paulo. A ntá tí ch'in gobernador mé imá jína kjuenkayáxin ch'án. K'uíyehé ch'án tí ch'in Bernabé la ko tí ch'in Saulo kixin jehe ch'án tjinkaon ch'án tsinhin ch'án itén Dios.

⁸ A ntá tí ch'in nchexroan, nkíva griego mé tikítexín sín ch'án Elimas, mé nínkakhonhen ch'án tí sín tjako a kixin tjinkakhonhya ch'án kixin tí ch'in t'etōan chrókuitekaon ch'án Ìnchéni.

⁹ A ntá tí ch'in Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'in nchexroan.

¹⁰ Ntácho ch'án kixin:

—Jaha mé chojni ch'ia, jínahya, xjeen Diabolo la nínkakhén kaín nkehe jína. ¿Nkekuente kixin ch'éna jínahya tí ntja ntoá kuente Ìnchéni?

¹¹ A ntá ijie la Ìnchéni sintakjasótia. Tsitōha ntakótán iso yaon la ts'ikonhya tí xrohi kuente yaon —ichro ch'in Pablo.

Ntá tuénxín tí ch'in Elimas la k'uixítie tjen ch'án. La ntá kjuéyá ch'án ijnko nkexro tsinkátséhe tja ch'án sátsjiko ch'án kixin t'ikonhya ch'án.

¹² A ntá xíkaha mé k'uíkon tí ch'in gobernador nkehe kónhen la ntá kjuankixin tinkáchónki ch'án Ìnchéni kixin k'uíkon ch'án tí kjuachaxin kuente Ìnchéni.

Ch'in Pablo la ko ch'in Bernabé tjejó chjasin Antioquia estado Pisidia

¹³ Ntá tí ch'in Pablo la ko tí sín xriko ch'án sákjuixin sín chjasin Pafos. K'uixenhen sín ntabarco sákjuí sín kjuíjín sín chjasin Perge estado Panfilia. Ntá ntaha ch'in Juan* kuitōhe tí jehe sín ntá kjan ch'án chjasin Jerusalén.

* 13:13 Hechos 12.25

14 Ntá sákjuixin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uixenhen sín tí nínko Israel na ntaha k'uejótjaxín sín.

15 Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'uechrónka itén Dios ntá tí sín t'etqan kuènte nínko mé k'uíyehé sín tí sín a ntá ntáchro sín kixin:

—Kíchóni tí chonta nkehe tsochronka kixin antsí má tsochéheni la chronka jie tsinhinni —ichro sín.

16 Ntá ch'ín Pablo k'uínkatjen ntá kjuakoxin itja ch'án kixin tsotání sín. Ntá ntáchro ch'án kixin:

—Chrókuinhínra jahará chojni israelita la ko kjaxin chrókuinhínra jahará tsíkjinínra chjasin ókjé tí chaxín tjinkáonra nchexiteyéherá Dios.

17 Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxin Dios kjuanjón kjuachaxin kixin chrókótsjé tí jehe sín tí naxá k'uejó sín chjasin Egipto. Éxí chojni tsíkjinín ókjé k'uejó sín a ntá chr'éxin ntá kjuachaxién Dios kjuínkítsa sín k'uaxrjéxin sín tí nonte ntiha inaá.

18 Dios kjuínkítsa sín tí cuarenta nánó k'uejó sín tí nteje.

19 Ntá chr'éxin kjuínchek'itjáyan ch'án yato nación k'uek'ejó nonte Canaán, kixin tí sín tsík'axrjeníxinni chrók'uáyehé tí nonte a.

20 Ntá kaín sín k'uejó sín ntiha ijnko cuatrocientos cincuenta nánó. K'uek'etqan tí sín juez hasta ikjui tí ch'ín Samuel ijnko ch'ín k'uechrónka itén Dios.

21 Ntá kjuanchia tí sín israelita ijnko ch'ín rey ts'etqenhen sín. Ntá kjueyá Dios tí ch'ín Saúl la k'uetqan ch'án cuarenta nánó. Jehe ch'án it'é ch'án mé ch'ín Cis la k'uaxrjeníxin ch'án ch'ín Benjamín.

22 Ntá chr'éxin Dios kuakitsjehe ch'ín Saul tí xra kjuák'e ch'án ntá k'uáyehé ch'ín David tí xra rey. Ntá ntáchro Dios kixin: “Ó k'uitjá ch'ín David, it'é ch'án mé Isaí. Jehe ch'án mé ijnko chojni nchexhána mé sinchexiteyàna ch'án kaín nkehe tjínkavan.”

23 Ijnko tí chojni k'uaxrjeníxin tí ch'ín David mé Jesús. Tíha la Dios tsíchr'án ch'án kixin sinchekaá tí sín israelita. Mé xikaha tsíntáchro ch'án.

24 Naxá tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án kixin chrókjan sín chrórxaxinkaon sín Dios ntá chrokuikite sín.

25 Ntá chjina its'en ch'ín Juan ntá ntáchro ch'án kixin: “Janhan na jehya tí nkexro tjenkayáxinra. Náhi. Chr'éxin na itsi í jnko nkexro la chrókósuàna chrókjuasintanká tí correa tokaté ch'án kixin antsí mé t'etqan tí jehe ch'án la kánhyó t'etqan tí janhan,” mé xikaha tsíntáchro ch'ín Juan.

26 Jahará kíchó ni tsík'axrjeníxinra ch'ín Abraham tinhínra la ko kaín rá chojni tsíkjinín ikjín nchexiteyéherá Dios, tinhínra tí tán tsaáxinra.

27 Méxra tí sín k'uek'ejó sín chjasin Jerusalén la ko tí sín t'etqan ntiha mé kónoehya sín nkexro tí ch'ín Jesús la ko kuienxínhya sín tí nkehe tsíkjin tí sín k'uechrónka itén Dios senó tíó kjuínchekuáxin sín tí xroon tí nkaxenhen nínko jnkojnko tí yaon t'ok'éhe sín. Mé xikaha jehe sín tíó kjuínchekjasóte sín tí ch'ín Jesús la kjuínchexiteyá sín éxí nixja tí xroon a.

28 Ntá k'uitjahya sín ninkehó jie kixin chrók'uen ch'án ntá kjónté kjuanchehe sín tí ch'ín Pilato kixin ts'etqan ch'án kixin its'en ch'án.

²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajinxin sín tí cuerpo kuènte ch'án tí ntacruz ntá kjuavá sín ch'án.

³⁰ A ntá Dios kjuínchexechón tí jehe ch'án ínaá.

³¹ A ntá nchónhya yaon k'uikon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjeiónixja sín nkexrí kjuako ch'ín Jesús, tjakohe sín kaín chojni.

³² A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjeníxinni ósé.

³³ Mé xíkaha xiteyá k'uáyéheni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'ín Jesús éxí nixja tí xroon yóxin Salmo, ntácho kíxin: “Jaha mé xjanna. Janhan mé tjahá kjuachón jie.”[†]

³⁴ Ntá tsíntácho Dios kíxin sínchexechón ch'án tí ch'ín Jesús kíxin tsoxíkaha cuérpóe ch'án. Mé xíkaha chrónka tí xroon itén Dios. Ntácho kíxin: “Janhan mé sintaxiteyá tí nkehe chaxín tjanka ch'ín David.”[‡]

³⁵ La ko í jnko Salmo mé ntácho xíkíhi: “Jaha tsjánjonhya kjuachaxin kíxin tsoxíka tí cuérpóe tí nkexro tjóá kjuít'aha xra.”[§]

³⁶ A ntá ch'ín David kjuínchexiteyá ch'án éxí tsík'etóan Dios tí kjuák'e ch'án ntá kjónté chr'éxín ik'uén ch'án ntá xravá ch'án xíkaha k'uéxravá tí sín tsík'axrjeníxinni la ntá kjónté la xíka ntóe ch'án.

³⁷ A ntá tí cuérpóe tí nkexro kjuínchexechón Dios la kótjehya.

³⁸ Méxra kíchó ni t'ichjánxin tsonohará kíxin nkexrí tsjin ijíará kíxin Jesús mé k'uenyákonhánra.

³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetoan ch'ín Moisés kjuachahya kótuáxin tí jie.

⁴⁰ Chróókakonhanrá kíxin chrókuánhyará xíkaha éxí tsíkjin tí sín ósé xíkíhi:

⁴¹ Tsjehérá jahara chojni titekakonhya. Ijie la tsochrakonrá kíxin nkehe tsonhen

kíxin janhan Dios tsjákoxián ijnko nkehe jie ijnko yaon

kjánchó tsitekákonhyará kjónté ókjé nkexro chróchrónka.*

⁴² A ntá ch'ín Pablo la ko tí nkexro k'uájiko ch'án k'uaxrjéxín sín nkaxenhen tí njnko, a ntá chrónða tí sín jehya sín judío tsíkokjéxín, kjuanchia sín kíxin í jnko semana tí yaon t'ók'éhe sín la ínaá tsochrónka ch'án éxí tí kjuako ch'án.

⁴³ Ntá tí kjuixin xíkaxín sín tí kójnkotsé sín tí njnko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxí tí sín judío la xraxinkao sín Dios, la mé imá kóxrjínhin sín tí nkehe kjuako ch'ín Pablo la ko ch'ín Bernabé la ntá sákjuíchréhe sín. A ntá jehe sín mé k'uetoan sín kíxin antsí jína chrókuinkáchónki sín tí Dios tjuèhe kaín chojni.

⁴⁴ A ntá í jnko semana kjuèxin, tí yaon t'ók'éhe sín la kójnkotsé kaín tí sín síin tí chjasin ntiha kíxin tjinkaon sín tsinhin sín itén Dios.

⁴⁵ A ntá k'uikon tí sín judío a kíxin nchónhya chojni tsíkokjéxín, ntá imá kóchjínóxiánhin sín, ntá kjuankíxin sín k'uántaxínhin sín tí ch'ín Pablo.

⁴⁶ A ntá ch'ín Pablo la ko ch'ín Bernabé la íchá antsí má chrakonhya sín nixja sín ntácho sín kíxin:

—T'ichjánxin senó jahará judíora chrókuinhínra itén Dios. Kjánchó tjinkákonhyará tsinhínra tí nkehe jína tsjanjon kjuachón jnkochríxín. A ntá

ijie la tsitohará tí jahara judíorá la ntá jeheni la sátsjini tsjakoheni tí sín jehya judío

⁴⁷ xikaha tsík'etean Ìnchéni. Ntáchro ch'án kixin:

Janhan ichr'an tí jahará éxí xrohi ts'inkaséyanxín kaín naciòn

kixin sátsjikoará tí tan tsjanjon kjuachón tsaáxin chojni hasta tí antsi má kjín kjuèxin chjasintajni.†

Mé xikaha k'uetean Dios.

⁴⁸ A ntá kuínhin tí sín jehya sín judío tíha la kjuankíxin kóchéhe sín la ntáchro sín kixin tí tan kuènte Ìnchéni la nkehe jína, ichro sín.

La ntá kjuankíxin kuinkáchónki kaín tí sín tsíkítøenxín sín kixin tsochónta sín kjuachón jnkochrín.

⁴⁹ Ntá xikaha xrankíxin xrako tí itén Ìnchéni nkuíxín tí chjasin ntiha.

⁵⁰ A ntá tí sín judío nixjehe sín iso chojni chjin jína tjetoan la ko tí chojni ntoa t'etøan tí chjasin ntiha la ntá kjuínchekónínkaon tí sín a la ntá kjuankíxin sín chrók'óyán sín tí ch'in Pablo la ko tí ch'in Bernabé ntá sákjuíxin sín chjasin ntiha.

⁵¹ A ntá jehe sín la kótsjénka sín tøkáté sín kixin tsoxénjin tí nche chóna toté sín. Tíha mé kjuakoxín sín kixin ntoáhya kjuenkayáxin tí sín a. A ntá sákjuí tí jehe sín chjasin Iconio.

⁵² Ntá tí sín tinkáchónki Ìnchéni la imá chéhe sín kixin antsi chóna sín Nchakuen Dios.

14

Ch'in Pablo la ko ch'in Bernabé tjejó chjasin Iconio

¹ Ntá kjuíji ch'in Pablo la ko ch'in Bernabé tí chjasin Iconio. Ntá k'uíxehen sín ninkøe tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín.

² A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kixin tsonínkakonhen sín tí sín tjako.

³ A ntá tí sín tjako la isé kuítóhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxín kóxrjínhin ch'án tí nkehe nixja sín kixin nkexrí tjuèheni Dios la kjuanjon ch'án kjuachaxin tsjasin sín kjuaxroan.

⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjejá Ìnchéni.

⁵ A ntá tí sín judío la ko tí sín jehya judío mé kjuenkayáxinko sín tí sín t'etøan kixin sinchechrakon sín tí sín tsíkjejá Ìnchéni la ko tsochjéhe sín xro.

⁶ La ntá tí ch'in Pablo la ko tí ch'in Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuíxín ntiha.

⁷ La kjaxin ntaha kjuako sín tí tan jína kuènte Ìnchéni.

Chjéhe sín xro ch'in Pablo chjasin Listra

⁸ Ntá tí chjasin Listra itjen ijnko ch'in xitjahya tji. Nunca xitjahya k'uáji ch'án kixin tsikokjéxín ch'án xitjahya itji ch'án.

⁹ Méxra ó tjetjaxínkoá ch'án ntá kuínhin ch'án nkehe tí tjako ch'in Pablo. Ntá ch'in Pablo komá ch'án tí ch'in a ntá kónohe ch'án kixin tí ch'in antsi tinkáchónki ch'án Ìnchéni kixin tsitøhe ch'án jína.

† 13:47 Isaías 42.6; 49.6

10 Ntá jehe ch'án itsen ntáche ch'án tí ch'ín a kixin:

—T'inkatjen, ntoá tjak'exián totá —ichro ch'án.

Ntá tuénxin k'uínkatjen ch'án, chrika ch'án, kjuák'exín ch'án toté ch'án ntá ó jina tji ch'án.

11 Ntá kaín tí sín chjasin ntiha k'uikon sín nkehe kjuích'e ch'ín Pablo, ntá kaín sín k'uíyexin sín nkíve sín Licaonia ntáchro sín kixin:

—Dios tsík'óna chojni mé tsíkixin nkajní tjejókoni ntihi —ichro sín.

12 La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kixin imá nixja ch'án.

13 Ntá tí ch'ín nchat'á kuènte tí dios Júpiter mé chóna ch'án nínko tí t'ixenxínni ikon chjasin ntá kjuíkao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kixin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a.

14 A ntá tí sín apóstol mé ch'ín Pablo la ko ch'ín Bernabé mé kónohe sín tiha ntá kjuankixin sín kótséchej sín iké sín la sákjuíkjiakjan sín tí chojni síin ntiha la t'óyako sín ntáchro sín kixin:

15 —¿Kuènté kixin tjejoch'erá xíkaha? Jeheni chojni éxi tí jahará. Tí xra ó kuini kixin tsochrónkani itén Dios kixin tsitohérá kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehe ch'án mé kjuích'éna ch'án nkajní la ko chjasintajni la ko tí ntayaon la ko kaín tí nkehe síin.

16 Ntá ósé mé kuítóhe Dios chojni kixin jehó ts'aji sín ntje sín.

17 Kjónté la Dios tjakoxin ch'án kixin jehe ch'án t'etóan ch'án kixin kjuích'éna ch'án kaín nkehe. Jehe ch'án mé t'etóan kixin ts'aniá chrin ntá ts'enkani la jina ts'óneheni, la jehe ch'án tjanjon ch'án nkehe kixin jnkochrixin ts'ixin nkehe sineni, la ko jehe ch'án mé nchechéheni ch'án —mé xíkaha ichro ch'ín Pablo.

18 Kjónté xíkaha ichro tí sín tjako la naxa tjinkaon tí chojni chrokjuikosáyehe sín chrók'óyán sín koxinta chrókjokehe sín tí sín tjako.

19 A ntá ikui iso tí sín judío kjuixin sín chjasin Antioquía la ko chjasin Iconio. Nixjéhe sín tí sín ntiha kixin tsítóhe sín tí nkehe jehya jina tjako tí sín a ntá kónínkaon sín ntá kjuankixin chjéhe sín xro tí ch'ín Pablo. La ntá ách'e ó kjuixin tsík'en ch'án ntá kuinkánkákjen sín ch'án sákjuíko sín ch'án ikon chjasin.

20 Ntá tí sín tinkáchónki Ìnchéni mé kójnkotsé sín k'uantatjen sín tí ch'ín Pablo ntá k'uàya ch'án xíkjan ch'án tí chjasin ntiha inaá. Ntá tí yaon chr'éxin ntá sákjuíko ch'án tí ch'ín Bernabé chjasin Derbe.

21 A ntá ó kjuixin chrónka sín tí tan jina la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía.

22 Nkuíxín tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uetóan sín kixin naxa jina chrókuinkáchónki sín Ìnchéni la ntáchro sín kixin tí ts'ixenhenni tí kjuachaxin kuènte Dios t'ichjánxin tsjasóteni.

23 A ntá ntiha kjueyá sín chojni jnkójnko nínko kixin ts'etuñhen sín tí sín tinkáchónki Jesús kixin jina ts'ejó sín. Ntá nixjéhe sín Dios tí naxa kjónehya sín la ntá ntáche sín Ìnchéni kixin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

24 Ntá chr'éxin k'uátsínka sín estado Pisidia la ntá kjuíji sín estado Panfilia.

²⁵ Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia.

²⁶ Ntá ntiha k'uúixenxín sín ntabárc̣o ntá sákjuí sín chjasin Antioquia tí chjasin k'uénixjeh̄e chojni Dios k'uékjanchia sín kixin Dios tsjinḳitsa tí sín a sich'e sín tí xra. La ntá ó kjuixin xiteyá.

²⁷ Ntá tió kjuíji sín chjasin Antioquia ntá kójnkotsé kaín tí sín tinkáchónki Jesús. Ntá kjuankixin chrónka ch'ín Pablo nkexrí kjuinḳitsa Dios tí jeh̄e sín la ko nkexrí kjuanjon Dios kjuachaxin tsjaḳoh̄e sín tí chojni jehya judío kixin kjaxin sín tsitekaon sín Ìnchéni.

²⁸ A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

¹ A ntá iso chojni tsiḳixin sín estado Judea ntá kjuíji sín chjasin Antioquia. Ntá kjuankixin sín kjuaḳoh̄e sín tí sín kichó ni kixin xitjahya tsaáxin sín tí chóntahya sín tí xroye tsík'eṭoan ch'ín Moisés.

² Ntá tí ch'ín Pablo la ko tí ch'ín Bernabé la ko tí sín judío kjuankixin kjuanjonkoxin sín kichó sín. Ntá áxri ntá kónoxin kixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsonixjeh̄e sín tí sín apóstol la ko tí sín t'eṭoan n̄inko kixin nkexrí tsonhen tí xroye tsík'eṭoan ch'ín Moisés.

³ Tí sín tinkáchónki Ìnchéni chjasin Antioquia mé ichr'án sín tí sín a ntá k'uátsínka sín estado Fenicia la ko estado Samaria la tinkáchrónka sín kixin nkexrí tí sín ókjé jehya sín judío kjuitox̄inhin tí k'uékjenkayáxin sín ntá kuákja sín nt̄ie Dios. Ntá kaín tí sín kichó ni imá kóchéh̄e sín tí kuínhin sín xikaha.

⁴ La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'eṭoan kuènte n̄inko mé kjuanjon sín kjuachaxin ts'ejó tí sín a. Ntá chrónka sín kixin Dios imá kjuinḳitsa tí jeh̄e sín.

⁵ Ntá iso tí sín fariseo ó tsikitekaon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyéh̄e sín kaín tí ley —ichro sín.

⁶ Na ntá kaín tí sín apóstol la ko tí sín t'eṭoan n̄inko mé kójnkotsé sín kjuenkayáxin sín nkexrí tsonhen kixin xikaha ichro tí sín judío.

⁷ Ntá imá nixjeh̄e kichó sín ntá k'uínkatjen ch'ín Pedro ntáchro ch'án kixin:

—Jahará kichó ni ó nohará nkexrí kixin senó Dios tsiḳeyá tí jeheni kixin tsjaḳoh̄eni kaín tí sín jehya judío kixin tsinhin sín tí tán jina kuènte Cristo kixin kjaxin jeh̄e sín tsitekaon sín.

⁸ Dios mé ó nohe ch'án nkexéhe kaín asén chojni. Kjuaḳoxin ch'án kixin k'uáyéh̄e ch'án tí sín jehya judío kixin chjéhe ch'án sín Nchakuen ch'án éxí tí xikaha k'uáyéh̄eni tí jeheni.

⁹ Dios la t'íkon kaín chojni jnkokón éxí tí jeheni. Ntá kjuínchetjóá ch'án asén sín kixin ó tinkáchónki sín Ìnchéni.

¹⁰ Méxra ¿nkekuénté titekákonhyará tí nkehe kjuích'e Dios la ntá tétuēnhénra chojni sinchexiteyá sín kaín tí nkehe ixra tsitekaon sín? Ni jeheni la ko ni tí sín tsík'axrjeniximi kjuachahya sín kjuínchexiteyá sín tíha.

11 Náhí. Ó noheni kixin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro.

12 Ntá kaín tí sín tsíkójkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan k'uíkon tí sín jehya sín judío.

13 Kjuixin nixja ch'ín Pablo la ko ch'ín Bernabé ntá kjuankixin nixja ch'ín Jacobo, ntáchro ch'án kixin:

—Kíchóni, tinhínrá tí nkehe tsòxrjanka.

14 Ch'ín Simón Pedro chrónka nkexrí kjuakoxin Dios kixin tjuèhe ch'án tí chojni jehya judío la nkexrí kjueya Dios iso tí sín kixin tsinkáchónki sín tí jehe ch'án.

15 Mé xikaha chaxín chrónka tí xroon tsíkjin tí sín k'uéchrónka itén Dios kixin: 16 Janhan mé tsokjan chr'éxin.

Tió ts'inka ntá sít'ána nixin tí nchia tsík'oya kuènte David la janhan la tsjínkítsa sín ts'etqan sín.

17 Kixin kjaxin kaín xín chojni mé tsjeyá sín Ìnchéni la ko kjaxin kaín xín tí sín ókjé nación mé tí sín kótjuáxin nina mé tsinkáchónkina sín.

18 Ìnchéni mé kjuakoxin kaín tíha tí ósé la tsíkjanjon ch'án tí tan kuènte ch'án.* Mé xikaha ichro itén Dios

19 Méxra ntáxrjan kixin tí sín jehya judío la t'ichjánxinhya sinchexiteyá sín kuènté tí ley kixin ó kuítóhe sín tí nkehe kuinkáchónki sín senó kixin jina chrókjueyá sín Dios.

20 Méxra tsochr'énhenni sín ijnko xroon la jehó ts'etuènhenni sín kixin chrókjonehya sín tí nto tsíkjokehe chojni tí nkehe tsíkjanoya la ko chróchóntahya sín chojni chjin ókjé la ko chrókjonehya sín tí nto kuènte ko tsíchrínjinhya ikja va la ko chrókjonehya sín ijnié va.

21 A ntá jnkoinko chjasin siín nkexro chrónkaxín tí ley kuènte ch'ín Moisés nchekuáxin sín tí nkaxenhen nínko jnkoinko tí yaon t'ok'éhe sín —ichro ch'ín Jacobo.

22 Ntá kaín tí sín tsíkjeýá Ìnchéni la ko tí sín t'etqan kuènte nínko la ko kaín tí í so sín tinkáchónki Ìnchéni kjueya sín iso chojni tsochr'án sín chjasin Antioquia, mé kjueya sín ch'ín Judas, tükítexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetqan ntiha.

23 Ntá ichr'án sín tí xroon sákjuíko tí sín a ntáchro kixin:

“Jeheni chojni tsíkjeýá Ìnchéni la ko chojni t'etqan kuènte nínko ntihi la nixjahaaráni tí jahará, kichó ni jehya judío, tjejorá chjasin Antioquia la ko estado Siria la ko estado Cilicia.

24 Ó noheni kixin iso chojni tsíkixin chjasénni kjónté k'uéchóntahya sín kjuachaxin la kjuínchexakonhanrá sín kixin ntáchro sín kixin t'ichjánxin itsará tí xroye tsík'etqan ch'ín Moisés.

25 Ntá jnkokoá kjuenkayáxinni tsjeyáni nkexro tjejó ntihi kixin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kixin imá tjuèheni sín.

26 Tí sín a mé ántqsen sín kjónté chrók'uénxín sín kixin tí tinkáchónki sín Ìnchéni Jesucristo.

* 15:18 15.16-18 Amós 9.11-12

²⁷ Méxra tsochr'ánni ch'ín Judas la ko ch'ín Silas tsjiji sín kixin jehe sín mé tsonixjahaará sín tsochrónkaxín sín kaín tíha.

²⁸ Jína kixin Nchakuen Dios mé kjuínkítsani kjuenkayáxinni kixin jehya chrók'uetuanhanráni ijnko nkehe imá xra. Náhi. Jehó tí nkehe kánhyó xra t'ichjánxin sinchexiteyará mé t'etōanni:

²⁹ chrókjóntehyará tí iko tsíkjokehē chojni tí nkehe tsíkjanoya la ko kjaxin chrókjóntehyará ijnjeé tí ko a la ko chrókjóntehyará tí nto kuente tí ko tsíchínjinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyará kaín tí nkehe t'etōanni la jína ts'ejorá." Mé xikaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquia. Ntá tió kjuíji sín ntiha ntá kójnkotsé tí sín tinkáchónki Jesús ntá kjuanjon sín tí xroon a.

³¹ Ntá tió kjuínchekuáxin tí sín kíchó ní tí xroon a ntá imá kóchéhē sín kixin xikaha chrónka tí xroon a.

³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhē sín tí sín kíchó ní kixin tí nkehe nixja sín.

³³ Ntá ntaó k'uejó sín iso yaon, ntá tió sátsji sín ntá kaín tí sín tinkáchónki Ìnchéni nixjehē sín jína ntá ó kíkjan sín inaá tí tsíkjiñin sín tí tjejó tí sín tsích'án sín.

³⁴ Kjánchó ch'ín Silas kjuenkayáxin ch'án kixin ntaó chrókuítóhe ch'án.

³⁵ A ntá ch'ín Pablo la ko ch'ín Bernabé kuítóhe sín chjasin Antioquia. Jehé sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankíxin tí yóxin viaje

³⁶ A ntá chr'éxin ch'ín Pablo nixjehē ch'án ch'ín Bernabé. Ntáchro ch'án kixin:

—Sátsjtsjeheni tí sín kíchó ní kaín tí chjasin kjuakoxinni itén Ìnchéni ósé. Tsjtsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókuiko sín ch'ín Juan kjaxin tikítexín sín ch'án Marcos.

³⁸ A ntá ch'ín Pablo kóxrjénhya sátsjiko sín tí ch'ín Marcos a kixin jehe ch'án kuítóhe ch'án sín estado Panfilia la kjuínkítsahya ch'án kixin naxa tsonhen tí xra.†

³⁹ Méxra jnkokoáhya kjuenkayáxin sín la ntá xikayehē sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uixenhen sín ijnko ntabarco sákjuí sín nonte Chipre.

⁴⁰ A ntá tí ch'ín Pablo la jehó ch'án mé kjueya ch'án tí ch'ín Silas ntá chr'éxin sákjuí sín. Tí sín kíchó ní ntiha kjuanchehe sín Dios kixin jína ts'ayakonhen sín ch'án la ntá sákjuí sín.

⁴¹ Ntá k'uaátsínka sín estado Siria la ko estado Cilicia la kjuínchechéhē sín asén tí sín tinkáchónki Ìnchéni njnko ntiha.

16

Ch'ín Timoteo sákjuíko ch'án ch'ín Pablo la ko ch'ín Silas

¹ Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'én ch'án Timoteo. Jehé ch'án mé xjēen ijnko tjan judía tinkáchónki Ìnchéni. A ntá it'é ch'án mé ijnko ch'ín griego.

† 15:38 Hechos 13.13

² Ntá tí sín kíchó ni tjejó chjasin Listra la ko chjasin Iconio mé nixja sín kixin jína tí ch'ín Timoteo.

³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'ueṭoan ch'án chrókua tí ch'ín Timoteo a tí xroye kixin tsonínkakonhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego.

⁴ Ntá sákjuí sín la kaín tí chjasin k'uátsínka sín la nixjehe sín tí sín kíchó ni la chrónkaxín sín tí nkehe tsík'etṭoan tí sín apóstol la ko tí sín t'etṭoan kuènte nṅnko chjasin Jerusalén.

⁵ Ntá tí chojni tinkáchónki Ìnchéni mé aṅtsí má ntoá k'uéjó sín la ko jnkojnko yaon sitinkákótsjé sín.

Xríngħya titàya k'uúkuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia.

⁷ Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha.

⁸ Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon.

⁹ Ntá ijnko tie xríngħya titàya k'uúkuèn ch'ín Pablo ijnko ch'ín estado Macedonia kjuák'exín toté ch'án chrónòa ch'án kixin: “T'átsínka Macedonia tsjínkĩtsani,” ichro ch'án.

¹⁰ Méxra tíha tsík'ikon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxínni kíchó ni ntiha.]

Ch'ín Pablo la ko ch'ín Silas, k'uéjó sín chjasin Filipos

¹¹ Ntá ntaha chjasin Troas k'uixenxínni ijnko ntabarco ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxín kjuíjini chjasin Neápolis.

¹² Ntá ntiha sákjuíxinni la kjuíjini chjasin Filipos. Tí chjasin a mé k'uéchóna tí sín romano ósé ntá ijnko chjasin aṅtsí má tjeoan tí it'ò tí estado Macedonia. Ntaha mé k'uéjóni iso yaon.

¹³ Ntá tí yaon t'ok'éhe sín ntá k'uaxrjexínni tí chjasin Filipos ntá sákjuíni ijnko chrínta ntarío mé ntiha kuènnen sín tsojnkotsé sín tsonixjehe sín Dios. Mé ntaha k'uéjótjaxínni la kjuankíxinni kjuakoheni iso chojni chjin tsíkójnkotsé ntiha.

¹⁴ Ntá ijnko tí jehe sín mé ijnko tjan it'in tjan Lidia la tsíkijxín tjan chjasin Tiatora. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Ìnchéni mé kjuínkĩtsa aṣén tjan kixin tsinhin tjan jína tí nkehe kjuako ch'ín Pablo.

¹⁵ Ntá jehe tjan la ko kaín tí sín tjejó ntṭe tjan mé kuíkite sín. Ntá chrónógehe tjan tí ch'ín Pablo ntáchro tjan kixin:

—Tí chaxín tjátsoan kixin chaxín tinkáchónkini Ìnchéni la jína chrókuitṭha ntṭéni ntihi —ichro tjan.

Ntá kjónté kuítṭoheni ntiha.

16 Ntá ijnko yaon sákjuíni tí nó kuènhen sín nixjeexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí inché tjan kixin xíkaha tónohe tjan.

17 A ntá tí tjan tjarisoá a kjuankixin tjan tinkáchréhe tjan tí ch'ín Pablo la ko tí jeheni ntá t'èya tjan ntáchro tjan kixin:

—Tí sín i ch'ehe sín xra Dios nkaya nkajni la tjako sín ijnko ntia jína tsaáxin chojni.

18 Mé xíkaha kjuích'e tjan itsje yaon. Ntá kóchjinhin ch'ín Pablo la nkátjá ch'án nixjehe ch'án tí nchakuen tí jínahya chóna tí jehe tjan, ntáchro ch'án kixin:

—Kjuachaxién ihnié Jesucristo tétuanhán kixin ts'axrjéxian tí jehe tjan —ichro ch'án.

Ntá tuénxín ó k'uaxrjexín tí nchakuen tí jínahya tí jehe tjan.

19 Na ntá tí inché tí tjan a mé k'uíkon sín nkehe kónhen tjan la ó nohe sín kixin í tsjachahya sín chichaon kuènte tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuíko sín tí tjejó tí síxreé ntasin tjeoan.

20 Ntá kjuíkaán sín ntaha tí tjejó tí sín juez la ntáchro sín kixin:

—Tí sín i mé sín judío la imá síjtité sín chjasénni.

21 Tjako sín tí nkehe kuènhyani tsonoheni la tóxrjénhyani sich'eni kixin jeheni mé chojni romanoni.

22 Kaín tí sín ntiha kónínkakonhen sín tí jehe sín. Ntá tí sín juez mé k'uetóan ts'axrjehe sín iké sín ntá ts'ekonxín sín nta sé.

23 Ntá tió kjuixin k'uékon sín nchónhya ntá chr'áxehen tí sín a ntóechiso ntá k'uetuènhen sín tí ch'ín t'ayakonhen ntóechiso kixin jína chrók'uayakonhen sín tí sín a.

24 Ntá tí ch'ín t'ayakonhen ntóechiso mé k'uáyéhe ch'án kjuachaxin ntá chr'áxehen ch'án tí sín a ijnko cuarto chrika ntóechiso kixin ts'axrjehya sín. Ntá chr'áxehen ch'án toté sín tí nta tjejóxra la ko ch'ica ye.

25 A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuènte Dios. La tí sín í so tjejóchjina mé tjejótinhin sín kixin xíkaha tjejóch'e sín tjejótsje sín.

26 Ntá xrinahya tjan kuínki nonte la kjuínchekinkí kuenté tí xrankíxixín ntóechiso ntá tuénxín kaín tí ntója puerta mé xítjehe la ko k'uánótjen tí ch'ica cadena tsíchrótetoxín kaín tí sín tjejóchjina.

27 Ntá tí ch'ín t'ayakonhen ntóechiso mé k'uàya ch'án. Ntá k'uíkon ch'án kixin síxítjehe tí ntója puerta ntóechiso a. Ntá kuakítsje ch'án ch'ica espada ntá chrók'óyán ch'án asén ch'án kixin kjuenkayáxin ch'án kixin ó kjuixin tsikínka kaín tí sín síchjina, ichro ch'án.

28 Ntá ch'ín Pablo k'uèya ch'án itsen ntáchro ch'án kixin:

—Náhi kohya nkehe ch'ehé asán kixin kaín ni naxa tjejóni ntihyó —ichro ch'án.

29 Ntá tí ch'ín t'ayakonhen ntóechiso kjuanchia kixin ts'ákjen xrohi ntá k'uíxehen ch'án kuínka ch'án la síxranka ch'án ch'raon ch'án ntá kjuítsínka ch'án toté tí ch'ín Pablo la ko tí ch'ín Silas.

30 Ntá tuénxín kuakítsjexín ch'án sín ntiha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

31 Ntá kjuátehe sín ntáchro sín kixin:

—Títekáván Inchéni Jesucristo la tsaá jaha la ko tí sín tjejó ntóa.

³² Ntá kjuakohę sín tí jehe ch'án a la ko kaín tí sín tjejó ntọe ch'án ti tan kuènte Ìnchéni.

³³ Na kjónté sítíe la tí hora a sákjuiko ch'án sín kjuínchek'íjma ch'án tí tsíchrit'ọ sín. Ntá tuénxín jehe ch'án la ko kaín xín sín tjejó ntọe ch'án mé kuíkite sín.

³⁴ Na ntá chr'éxin tí jehe ch'án sákjuiko sín ntọe ch'án. Ntá ntiha kjuanjon ch'án nkehe sín sín. Imá chéhe ch'án la ko kaín tí sín ntọe ch'án kixin ó kuítekaon sín Dios.

³⁵ Ntá kóyaon nchítjen ntá tí sín juez k'uetuenhen sín tí sín policia sátsjtsjehe sín tí ch'ín t'ayakonhen ntọechiso kixin chrókjuanjon ch'án kjuachaxin ts'axrje ch'ín Pablo la ko ch'ín Silas.

³⁶ Ntá tí ch'ín t'ayakonhen ntọechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etọan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policia kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jie chónani. Náhí. Kjónté la chr'áxenhenni sín ntọechiso. A ntá ijie la ịá imó chrókuakitsjeni sín ní? Náhí. Tsjjija tí jehe sín tsakitsjeni sín —ichro ch'án.

³⁸ Ntá tí sín policia mé sákjuíchénka sín tí sín juez nkehe ntáchro tí sín tjejóhjna. Ntá imá chrakon sín kixin kuínhin sín kixin tí sín a mé chojni romano.

³⁹ A ntá sákjuí tí sín juez ntá chrónòhę sín tí ch'ín Pablo la ko ch'ín Silas kixin tsonínkakhya sín kixin xíkaha kónhen sín ntá k'uaxrjexín sín ntiha ntá chrónòda tí sín a sátsjxin sín tí chjasin ntiha.

⁴⁰ Ntá ch'ín Pablo la ko ch'ín Silas tió k'uaxrjexín sín tí ntọechiso ntá kjuíji sín ntọe tí tjan Lidia. Ntá tió kjuixin sákjuítsjehe sín tí sín kíchó ní la kjuínchéhę sín ntá sákjuixin sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko njnko judío.

² A ntá ch'ín Pablo sákjuí ch'an njnko éxí kuènnen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios.

³ Kjuako ch'án kixin tí nkexro Cristo mé t'ichjánxin its'en la ko chr'éxin tsoxéhon ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsinhínrá jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxinkaon Dios a la ko kjaxin nchónhya chojni chjin tjeotan kuítekaon.

⁵ A ntá iso tí sín judío tinkáchónkihya Ìnchéni mé imá kóhjjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uúxité sín la kjuínchexakonhen sín tí sín síin chjasén sín. Ntá itsjé sín k'uúxenhén sín ntọe ijnko ch'ín it'in Jasón kjueya sín ch'ín Pablo la ko ch'ín Silas kixin tjinkaon sín sáchrókjuíkohe sín tí sín a tí sín t'etọan.

⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuinkánkákjen sín sákjuíko sín tí síin tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín i mé kjuínchexakonhen chojni kuenté chjasintajni. La ntá ó kjuí sín chjasénni ntihi kjaxin.

⁷ La ntá tí ch'ín Jasón a mé kjuanjon ch'án kjuachaxin kixin tí sín a mé ts'ejó sín ntøe ch'án. Kaín sín titekakonhya sín tí ley kuènte tí ch'ín romano t'etøan. Ntáchro sín kixin itjen í jnko nkexro antsí má t'etøan, ntá tíha mé Jesús —ichro sín.

⁸ Ntá tíó kuínhin kaín tí sín tsikójnkotsé la ko tí síxreé ntá k'uixité sín kónínkaon sín.

⁹ Ntá ch'ín Jasón la ko tí sín tjejóko ch'án kjuenka sín ntá tí síxreé kuítøhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kichó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tíó kjuíji sín ntaha k'uixenhen sín tí nínkoé tí sín judío.

¹¹ A ntá tí sín judío ntiha la antsí má jína asén sín, ntá tí sín chjasin Tesalónica la náhi. Antsí má kóxrjínhin sín tsinhin sín tí itén Dios la jnkojnko yaon kjuínchekuáxin sín tí xroon chóna itén Dios kixin tsoñohe sín á chaxín ntoá xíkaha tí ntáchro tí sín a.

¹² Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetøan mé kuítekaon la ko kjaxin tí chojni ntoa.

¹³ A ntá tí sín judío chjasin Tesalónica kónohe sín kixin ch'ín Pablo mé kjuakoxin itén Dios chjasin Berea inaá. Ntá sákjuí sín ntiha a ntá kjuínchekóninkaon tí sín a.

¹⁴ A ntá tí sín kichó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítøhe sín tí chjasin Berea.

¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uetoan ch'ín Pablo kixin tsochrónka sín kixin tjoka chrókóxonhen tí ch'ín Silas la ko tí ch'ín Timoteo tsjiji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kixin k'uikon ch'án kixin tí chjasin ntiha síin nchónhya tí nkehe tsíkjanoya.

¹⁷ Ntá tí nínko ntiha kjuakohe ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakøexin ch'án tí chojni síin ntiha.

¹⁸ La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankixin nixjehe sín tí ch'ín Pablo. Iso sín ntáchro sín kixin:

—¿Nkekuènté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'án kuènte í jnko dios.

Mé xíkaha ichro sín kixin kjuako ch'ín Pablo tí tán jína kuènte Jesús la ko kjuako ch'án kixin Jesús kjónté k'uén ntá xechón.

¹⁹ Ntá sákjuiko sín ch'ín Pablo ijnko tjo it'in Areópago. Ntiha mé kuèhnen sín tójkotsé sín kixin tjenkayáxixín sín. Ntá nixjehe sín tí ch'ín Pablo, ntáchro sín kixin:

—Tjinkaonni tsochronka tí nkehe nixin kjuíkoa.

²⁰ Itsjé tí nkehe ókjé tjetjækua la tjinkaonni tsonoheni nkehe t'axrjexín kaín tiha —ichro sín.

²¹ Ntá kaín tí sín chjasin Atenas la ko tí sín tsíkjiixin ókjé tjejó ntiha mé tóxrjienhya sín í jnko xra, jehí tóxrjínhin sín chrókuinhin sín la ko chrónixja sín ijnko nkehe nixin.

²² Ntá ch'ín Pablo k'uínkatjen ch'án kjuák'exín toté ch'án tí siín tí jehe sín chrítaón tí Tjo Areópago. Ntá ntáchro ch'án kixin:

—Jahará tjejorá chjasin Atenas tinhínrá. Janhan ó k'uíkuan kixin jahará la itsjé dios tinkachónkirá.

²³ Ntá tí kjuak'é ntiha k'uájia la k'uíkuan itsjé tí nketí tjásixínrá culto ntá k'uitja ijnko altar ts'ínixín kixin: “Ntíhí xraxinkakonxinni ijnko Dios naxa chónhyani”. Méxra tí Dios xráxinkáonrá kjónté naxa chonhyará mé tí Dios a mé tjákoará.

²⁴ Tí Dios mé kjuích'éna ch'án chjasintajni la ko kaín nkehe siín chjasintajni. Jehe ch'án mé Inché nkajní la ko chjasintajni. La tjejenhya ch'án ijnko njnko tsíkjiçh'énaxín chojni tja.

²⁵ La t'ichjánxienhya ch'án kixin chojni chrókuinkitsa tí jehe ch'án kixin jehe ch'án mé chjéhe kjuachón kaín chojni la ko tjanjon ch'án xrinto la ko kaín nkehe siín.

²⁶ Kaín tí nación k'uaxrjeníxin jnkokoá chojni kixin chrók'uejó sín nkuixín chjasintajni. Kjaxin chrónka Dios nkesá la ko nketí ts'ejó chojni.

²⁷ Méxra jeheni t'ichjánxin tsjeyáni Dios kixin ntá tsienxínni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án.

²⁸ Jehe ch'án tjejóchónxinni ch'án la ko nchekinkíni ch'án la jehe ch'án t'ayakonhenni ch'án. Mé xjkahta tsintáchro jnko ch'ín chjasánrá ósé kixin: “Jeheni mé naxa kjéhya Dios.”

²⁹ Jeheni mé naxa kjéhyani Dios méxra xitjahya tsjenkayáxinni kixin sich'énani Dios chica oro o chica plata o xro kixin éxí tsíkjenkayáxin chojni kixin sich'éna sín dios kuènte sín.

³⁰ Senó Dios kónínkakhonhya ch'án kixin ó nohe ch'án kixin naxa chónhya sín ch'án. Ntá ijie t'etuenhen Dios kaín xín chojni siín chjasintajni tsokjan sín la tsinkáchónki sín tí jehe ch'án.

³¹ Dios tsíkjejá ijnko yaon sinchekitoexín ijje chojni chjasintajni. Tsíkjejá ch'án ijnko chojni la kjuakoxín kaín kjuachaxin kixin tí nkexro kjónté tsík'en la xechón inaá —ichro ch'ín Pablo.

³² Na ntá tió kuínhin sín kixin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kixin:

—Chr'éxin tsinhinni inaá tí nkehe ntáchrua —ichro sín.

³³ Ntá ch'ín Pablo kuitóhe ch'án tí jehe sín.

³⁴ Na ntá iso sín kjuíchréhe sín ch'ín Pablo la kjuankixin tinkáchónki sín Inchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitoexín ijje chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankixin sín tinkáchónki sín Inchéni.

18

Sákjuí ch'ín Pablo chjasin Corinto

¹ Ntá kjuixín tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto.

² Ntiha mé xéta ch'án ijnko ch'ín judío it'in Aquila. Jehe ch'án mé tsíkjiixin ch'án estado Ponto la séhya jehe ch'án la ko ichjién ch'án Priscila mé kjuixín sín nació Italia kíxin t'ichjánxin ts'axrjéxin sín ntiha kíxin tí ch'ín t'etóan mé it'in Claudio k'uetóan ch'án kíxin kaín tí sín judío mé ts'axrjéxin sín tí chjasin Roma. Ntá ch'ín Pablo mé kjuínixjehe ch'án sín.

³ Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuítóeko kíchó sín kíxin jnkokóá sich'e sín tí xra a.

⁴ Ntá jnkojnko tí yaon t'ók'éhe sín sákjuí ch'ín Pablo tí nínko nixjehe ch'án tí sín judío la ko tí sín jehya judío kíxin tjinkaon ch'án kíxin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios kíxin tsoñohe tí sín judío kíxin Jesús mé tí nkexro Cristo.

⁶ Ntá tí sín judío mé kjuankíxin kónínkakonhen sín tí ch'ín Pablo la imá k'uántaxinhín sín ch'án. Ntá jehe ch'án k'ótsjénka ch'án iké ch'án kíxin kjuakoxín ch'án kíxin xíkaha tsjasóte sín. Ntá ntáchro ch'án kíxin:

—A ntá ijie la jahará kjuéyará tí jie ts'itjáyaxínrá. A ntá janhan la í chontahya jie kíxin ó kjuákohará tí tán jína, a ntá kuítékákonhyará. A ntá ijie la íchá jína sátsjia tsjákohá tí sín jehya judío —ichro ch'án.

⁷ Ntá k'uaxrjéxin ch'án nínko ntá sákjuí ch'án ntóe ijnko chojni mé it'in Justo mé jehe ch'án xraxinkaon ch'án Dios. Ntóe ch'án mé chjinaxón nínko.

⁸ Ntá ch'ín Crispo, ijnko nkexro t'etóan kuénte nínko, la ko kaín tí sín tjejó ntóe ch'án, mé kjuankíxin sín kuítekaon sín Inchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuankíxin sín kuítekaon sín Inchéni la kuíkite sín.

⁹ Ntá ijnko tie titàya k'uikuén ch'ín Pablo Inchéni nixjehe ch'án ntáchro kíxin:

—Chrakonhya tjákua itan kuéntana. Tjtoéhya tsochronka

¹⁰ kíxin janhan tjejóko kíchó ní kíxin nínkexró kohya nkehe sit'aha. Kíxin janhan la chonta itsjé chojni tí chjasin ntihi tinkáchónki tí janhan.

¹¹ Méxra ch'ín Pablo mé kuítóhe ch'án ijnko nánó ko t'ó ntiha chjasin Corinto, kjuakohé ch'án sín itén Dios.

¹² A ntá tí yaon k'uetóan ch'ín Galión estado Acaya, ntá itsjé tí sín judío kónínkakonhen sín tí ch'ín Pablo. Ntá itsé sín ch'án sákjuíko sín ch'án tí tjejó tí sín t'etóan.

¹³ A ntá ntáche sín tí ch'ín t'etóan kíxin:

—A ntá tí nkexro i ixri ch'án tjachroe ch'án chojni kíxin ókjé nkexrí chrókuinkáchónki sín Dios la ko tsitekakonhya sín tí nkehe t'etóan tí ley.

¹⁴ Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kíxin:

—Tí chaxín ijnko jie jie kjuasin tí ch'ín i ntá kjónté chrókuinhan tí nkehe ntáchrorá jahará judiorá.

¹⁵ A ntá jehí tjanjonxínrá tí nkehe nixjará la ko ihnié chojni la ko tí ley tinkáchónkirá. Méxra jahórá chrókjuínchekitóexínrá tíha kíxin janhan tjnkákonhya ts'óna juez sjntakitóaxian kuénte tí nkehe a —ichro ch'án.

16 Ntá k'uətoan ch'án kixin sátsjixin sín ntiha.

17 Ntá tí sín griego la kóninkaon sín la itsé sín tí ch'ín Sóstenes tí ch'ín t'ətoan kuènte tí ninko judío, la ntahó kjuatexín sín ch'án. Jehe ch'ín Galión a la mé kjónté k'uikón ch'án la ántosén ch'án.

Ch'ín Pablo xikjan ch'án chjasin Antioquia ntá sákjuí ch'án nixin viaje

18 A ntá ch'ín Pablo kuitohe ch'án chjasin Corinto itsé yaon ntá nixjehe ch'án tí sín kichó ni ntiha ntá k'uixenhen ch'án ntabárcə sákjuí ch'án nó estado Siria a sákjuiko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxə k'uixenhya ch'án ntabárcə inaá la ikjin ch'án mòlogé kixin xikaha kjuakoxin ch'án kixin kjuínchexiteyá ch'án tí nkehe chrónka ch'án.

19 Ntá tió kjuíji sín tí chjasin Éfeso ntá kuitohe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko ninko la ikjo ch'án tí sín judío tsíkójkotsé ntiha.

20 Ntá jehe sín chrónəa sín kixin chrókuitəhe ch'án isé ntiha, kjánchó jehe ch'án la chrohya ch'án.

21 Ntá tuénxín nixjehe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjahə tí jahará tí naxə tjinkaon Dios —ichro ch'án.

Ntá kuitohe ch'án sín ntá k'uixenhen ch'án ntabárcə sákjuíxin ch'án chjasin Éfeso.

22 Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Ìnchéni ntiha. Ntá tuénxín xikjan ch'án chjasin Antioquia.

23 Ntá kuitohe ch'án ntiha itsé yaon ntá xíkji ch'án inaá ntá xík'atsinka ch'án itsé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

24 Ntá tí yaon a mé ijnko ch'ín judío it'in Apolos ikui chjasin Éfeso mé tsíkjiixin ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios.

25 Jehe ch'án ó xrakohe ch'án ntje Ìnchéni ntá imá tóxrjnhin ch'án nixja ch'án la ko tsjako jina kuènte ch'ín Jesús. Kjánchó jehó nohe ch'án nkexri kjuikite chojni ch'ín Juan.

26 A ntá ch'ín Apolos kjuák'e ch'án kjuako ch'án tí ninko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohə sín ch'án tí nkehe naxə noehya ch'án kuènte ntje Dios.

27 Ntá tjinkaon ch'ín Apolos sátsji ch'án estado Acaya. Ntá tí sín kichó ni kjuínkítsa sín ch'án la ikjin sín ijnko xroon chr'énhen sín tí sín tinkáchónki Ìnchéni tjejó ntiha kixin jina tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohə ch'án tí sín tsíkjinkítsa Dios tsíkitekəon sín ch'án.

28 Ntá kjuakoxin ch'án kaín chojni kixin ntoáhya ch'e tí sín judío, la xitjahya tsontáchro sín náhi. Kjuakohə ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'in Pablo chjasin Éfeso

1 Ntá naxá itjen ch'in Apolos tí chjasin Corinto ntá ch'in Pablo k'uatsínka ch'án nchónhya chjasin chrík'á jna la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios.

2 Ntá kjuanchankíhi ch'án sín kixin:

—¿Á k'uayéhérá Nchakuen Dios tíó kuinkachónkirá Ìnchéni? —ichro ch'án. Ntá kjuátehe sín kixin:

—Náhi, kíenhyani á tjen Nchakuen Dios —ichro sín.

3 Ntá kjuanchankí ch'in Pablo kixin:

—¿Nkexro kjuachaxiэн kuikitiará? —ichro ch'án.

Ntá kjuátehe sín kixin:

—Éxi kjuako ch'in Juan kuíkiteni —ichro sín.

4 Ntá ntáchro ch'in Pablo kixin:

—Ch'in Juan mé kuíkite ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

5 Ntá kuínhin sín xíkaha ntá kuíkite sín kjuachaxiэн ihnié Ìnchéni Jesús.

6 A ntá ch'in Pablo kjuák'etja itja ch'án chrítaón ikja sín ntá ikui Nchakuen Dios k'uáyéhe sín ntá kjuankixin sín nixja sín itsjé nkiva ókjé la ko kjuankixin sín kjuako sín tí nkehe kjuanjon Dios.

7 Kaín tí sín ntoa tinkáchónki mé chjina teyó sín.

8 A ntá chjina iní nitjó, la ch'in Pablo k'uékji ch'án njnko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuente Dios.

9 A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'antaxínhin sín tí tan jina kuente Ìnchéni nkayakon chojni. Ntá tí ch'in Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoxin ch'án kaín yaon.

10 Mé xíkaha kjuák'e ch'án kjuako ch'án iyó nánó, ntá kaín tí sín k'uéjé ntaha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío.

11 Ntá Dios antsí má kjuakoxin kjuaxroan jié kixin tí nixja ch'in Pablo.

12 Ntá itsjé chojni kjuikao sín pañitoé sín la ko iké sín kuákóxin ch'in Pablo ntá sákjuiko sín kjuínchekakóxin sín tí sín níhi ntá kuítjehe sín jina la ko kjaxin nchakuen tí jínahya k'uaxrjexin tí jehe sín.

13 A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxiэн ihnié Jesús. La ntá ntáche sín tí nchakuen tí jínahya kixin:

—Kjuachaxiэн ihnié tí Jesús tjako tí ch'in Pablo t'etoxinni kixin jaha nchakuen jínahya sátxixian ntihi —ichro sín.

14 Mé xíkaha k'uékjich'e tí yato xjeen ijnko ch'in judío it'in Esceva mé ijnko nchat'á t'etoxan.

15 Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntáchro kixin:

—Chóxinni nkexro ch'in Jesús la ko ó noheni nkexro ch'in Pablo. A ntá jahará, ¿la nkexro tí jahará? —ichro tí nchakuen tí jínahya.

16 Ntá tí ch'ín chónṭa tí nchakuen tí jínahya kjaminkitaón ch'án tí jehe sín a la ntá imá tseḡe ch'án kjuacha ch'án kjuíncheníhi ch'án kaín sín la imá kjeté sín. Ntá k'uaxrjexín sín ntṓe sín tjóchín sín la ko síchrít'ṓ cuérpṓé sín.

17 Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsíkónhen la imá chrakon sín. Imá jié tí kjuachaxin ihñié Ìnchéni Jesús, ichro sín.

18 Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya.

19 Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xṛa ntá kjuaka sín tí libro a la k'uíkon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín.

20 Ntá tí itén Ìnchéni sítinkák'ánkí la tjakoxin kixin chaxín chónṭa kjuachaxin.

21 Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma.

22 Ntá ichr'án ch'án iyó tí sín tjinkítsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naṡa kuitṓhe ch'án estado Asia iso yaon.

Kónínkaon k'uúxité chojni chjasin Éfeso

23 Ntá itsjé chojni chjasin Éfeso kónínkaon sín la k'uúxité sín kixin kóxrjénhya sín tí itén Ìnchéni.

24 Kixin ntiha mé itjen ijnko ch'ín it'in ch'án Demetrio. Kjuích'éna ch'án nkehe chica plata tsjehe éxí nínko kuente tí dios Diana la nchónhya chichaon kjuacha ch'án la ko tí sín kjuích'eko ch'án xṛa.

25 Ntá kójnkotséko sín í so sín jnkokón tí xṛa ch'e sín. Ntá ntáchro ch'án kixin: —Jahará nohará kixin tí xṛa ch'eni la tjachani jína la náxrjón tjejóni.

26 Kjánchó ó k'uíkonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsíkjanṓya mé jehya Dios. Kjánchó jehya chjasin Éfeso ó. Náhi, nkuíxín estado Asia kuitekaon chojni.

27 Imá tóxakönhenni kixin tí xṛa ch'eni ts'itjáyan la kjaxin tóxakönhenni tsontáchro sín kixin chónkó tí nínkṓe tí dios Diana imá jié la ko ts'itjáyan tí kjuachaxin kuente tjan. Ntá í tsitekakonhya sín tí kjuachaxin kuente tjan nkuíxín estado Asia la ko kuenté chjasintajni —ichro ch'ín Demetrio.

28 Ntá tí kuínhin sín xíkaha la imá kónínkaon sín ntá k'uèya sín ntáchro sín kixin:

—Ts'itjáyanhya tí dios Diana kuente sín Éfeso.

29 Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'ín Gayo la ko tí ch'ín Aristarco mé iyó sín tsíkjixín sín Macedonia. Ntá kuinkánkákjen sín kuikao sín tí nchia jié tójkotséxin sín xṛáxín.

30 Ntá ch'ín Pablo tjinkaon ch'án chrók'uixenhen ch'án tí nchia kixin tsonixjeḡe ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a.

³¹ Kjaxin iso tí síxreé kuènte tí estado Asia mé chóxin sín ch'ín Pablo, ntá k'uetqan sín kixin tsochenka chojni tí ch'ín Pablo kixin chrókjuiatéhya ch'án tí siín sín ntiha.

³² A ntá iso tí sín tsíkójnkotsé ntáchro sín ijnko nkehe, la í so sín ntáchro sín óké nkehe kixin nínkaon sín. La itsjé sín la í noehya sín nkehe xra tsíkójnkotséxin sín kixin nínkaon sín.

³³ La iso sín judío chénka sín ijnko ch'ín it'in Alejandro nkerí xra kjuixin sín kixin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kixin tsotáni sín ntá tsonixjxin ch'án tí sín judío tsinhin kaín chojni.

³⁴ Ntá tió kjuátsqan tí sín tsíkójnkotsé kixin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyannya tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uetqan ch'án tsotáni sín. Ntá ntáchro ch'án kixin:

—Chojni chjasén Éfeso tinhínrá. Kuenté chjasintajni nohe sín kixin tí sín chjasin ntihi mé t'ayakonhen sín tí nínko kuènte tí dios Diana. Tí retrato kuènte tjan mé tsíkixin nkaya nkajní.

³⁶ Kohya nkexro tsontáchro kixin chaxínhya tíha. Méxra tánirá. Tjenkayáxinrá jina nkehe chrókjuich'erá.

³⁷ Jahará kjuíkoará tí sín a ntihi la kjánchó k'uántaxiñhya sín tí nínkoeni la ko k'uántaxiñhya sín tí tjan santo kuénteni.

³⁸ Méxra ch'ín Demetrio la ko tí sín ch'eko ch'án xra la tí tjanchia sín jie jnkojín nkexro la siín juez sinchekitqexin. Méxra tsochrónka sín tí tjan tí ch'ín juez kixin jnkojnko sín la chrókuitqexin tí jie chóna sín.

³⁹ Ntá tí siín ijnko nkehe tsjanchiará ntá t'ichjánxin tsojnkotsérá la ntoá chrókuitqexin.

⁴⁰ Tóxakonhenni kixin kjá tí sín t'etqan ts'ekani sín jie kixin jehya jina k'uixiténi kónínkaonni. Noehyani nkehe tsjateheni kixin tí tsjanchankí sín nkekuènte k'uixiténi, tsixro sín.

⁴¹ La ntá k'uetqan ch'án kixin sátsji sín kixin ó kjuixin tí kójnkotsé sín.

20

Sátsji ch'ín Pablo estado Macedonia la ko estado Grecia

¹ Ntá tí kjuixin k'uixité sín, a ntá ch'ín Pablo k'uíyehé kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jina, ntá nixjehé kichó sín ntá sáxíkji ch'án nó estado Macedonia.

² Ntá nkuíxin k'uatsínka ch'án la kjuínchéchéhé ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuíji ch'án estado Grecia.

³ Ntiha kuitqhe ch'án iní nitjó ntá chrók'uixenhen ch'án ijnko ntabárcq ntá sáchrókjuí ch'án estado Siria. Ntá kónohe ch'án kixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia.

⁴ Ntá tí sín sákjuíko ch'ín Pablo mé tí ch'ín Sópater mé jehe ch'án tsíkixin ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkixin sín chjasin Tesalónica, la ko ch'ín Gayo tsíkixin ch'án chjasin Derbe, la ko kjaxin sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkixin sín estado Asia.

⁵ Ntá tí sín kichó ni a mé kuitónxin sín ntja ntá tjejóchónhen sín tí jeheni chjasin Troas.

⁶ Kjuixin k'uátsínka tí kia tió kjóne sín niotja chóntahya tí xroan t'ánkíxin niotja, ntá k'uíxenhenni ijnko ntabárcq k'uaxrjexínni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuitónxin sín ntia. A ntá ntiha kuitóheni yato yaon.

Ch'in Pablo sákjuí chjasin Troas

⁷ Ntá tí yaon xrankíxixin semana ntá kójnkotséni kíxin tsochrít'o niotja tsoxraxinkakonxínni Ìnchéni. Ntá ch'in Pablo nixjehe ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxin, ntá antsí má sé tí nkehe chrónka ch'án la naḡa tjenixja ch'án k'áxrótjen.

⁸ Tí tsíkójnkotsé sín a mé ijnko piso noi la ntiha mé síche nchónhya xrohi.

⁹ Ntá ntiha itjen ijnko ch'in ntasoá it'in ch'án Eutico mé tjetjaxin ch'án chrítaón ventana. Ntá tí ch'in Pablo imá sé nixja ch'án ntá tí ch'in ntasoá mé tsíkíhi ch'án kotáchrin. A ntá xríngahya tsík'ajua ch'án ntá tsík'anótjenxin ch'án tí ventana tí níxin piso ntiha ntá sákjuíkatsen sín ch'án la ó tsíkjixin tsík'en ch'án.

¹⁰ Ntá ch'in Pablo k'uínkajin ch'án ntá kjuítsínkaták'á ch'án chrítaón tí ch'in tsík'anótjen a la kjóa ch'án. Ntá ntáche ch'án tí sín kíchó ni kíxin:

—Chrakonhyará tsík'enhya ch'án, tjechón ch'án —ichro ch'an.

¹¹ Ntá ch'in Pablo k'ujt'ótjen ch'án inaá tí k'uínkajinxin ch'án kíxin ntiha ts'óxikayehe ch'án niotja sine sín tsoxraxinkakonxin sín Ìnchéni. Ntá naḡa tjenixja ch'án hasta k'uínkaséyan a ntá sákjuí ch'án.

¹² Ntá tí ch'in ntasoá tsík'anótjen sákjuiko sín la tjechón ch'án kohya nkehe xéhe ch'án ntá kaín sín imá kóchéhe sín.

Sákjuixin ch'in Pablo chjasin Troas kjuíji ch'án chjasin Mileto

¹³ Jeheni mé kuitónxinni ntia saoxín la k'uíxenhenni ijnko ntabárcq sákjuíni nó chjasin Asón kíxin ntiha tsoxetani ch'in Pablo éxi tsintáchro ch'án kíxin tjinkaon ch'án sátsjixin ch'án toté ch'án ntiha.

¹⁴ Ntá ó xetani tí jehe ch'án chjasin Asón ntá k'uíxenhenni ch'án tí ntabárcq kjaxin ch'án ntá sákjuíkoni ch'án nó chjasin Mitilene.

¹⁵ Ntá tí sákjuixinni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjuíjini chjasin Samos. Ntá inaá k'uíxenhenni tí ntabárcq ntá sákjuíni chjasin Trogilio ntá ntiha k'ok'éheni. Ntá xík'ixenhenni ntabárcq inaá ntá tí yaon chr'éxin kjuíjini chjasin Mileto.

¹⁶ Mé xíkaha kjuích'eni kíxin ch'in Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kíxin tjinkaon ch'án tjoka chrókjuíji ch'án chjasin Jerusalén kíxin ntiha chrókjuak'e ch'án tí yaon Pentecostés, ichro ch'án.

Nixjehe ch'in Pablo tí sín t'etuenhen nínko chjasin Éfeso

¹⁷ Tí itjen ch'in Pablo tí chjasin Mileto k'uíyehé ch'án tí sín t'etuenhen tí nínko chjasin Éfeso.

¹⁸ Ntá tió kui sín ntá ntáchro ch'án kíxin:

—Tí jahará la ó nohará nkexrí kjuak'é la ko kjuàkua desde tí yaon xrankíxixin k'uínka estado Asia.

¹⁹ Ó nohará kíxin kaín tí yaon k'uejóni la kaín asenná kjuít'ahá xrá Ìnchéni la kjuíntahnkehya. Imá tsjanka kíxin nchónhya kjuasótena kíxin tjinkaon tí sín judío chrók'óyánna sín.

²⁰ Janhan la kũitõahya kjuàkua kaín tí nkehe jína t'ichjánxin tsonohará. Mé xikaha kjuàkua tió kójnkotsérá la ko xikaha kjuikjúakuaxian jnkojnko ntoará.

²¹ Kjuákoḡa kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Închéni Jesucristo.

²² Ntá ijie sátsjyá chjasin Jerusalén kixin Nchakuen Dios k'ueṭuṭanna la í nonahya nkehe tsonna ntiha.

²³ Ntá jehó nõna kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena.

²⁴ Kaín tíha la tóxakonahya. Kjónté chrókjuasótexián la ninkehó sínkíhyana la janhan la chàṅa kixin tí xṛa chonta la chrókjuintaxín la chrókjuintaxiteyá tí xṛa chjina Închéni Jesús kixin tsjakua tí tan jína nkexrí tjuèhe Dios chojni.

²⁵ Ntá jie ó nõna kixin tí jahará kjuákoḡará kjuachaxin kuènte Dios la nijnkorá ts'ikonhyará tí janhan ínaá.

²⁶ Méxṛa tinhínra ijie kixin í jehya jièna kixin jnkojínra chrók'uitjáyánra.

²⁷ Kixin ó kjuàkua kaín tí nkehe tjínkaon Dios kixin tsonohará la í t'itjáyánhya ninkehó.

²⁸ Méxṛa xṛáxinkáonra ts'ejorá jnkojína la ts'ayakonhénra kaín tí sín tinkáchónki Închéni kixin Nchakuen Dios mé tjáhará tí xṛa pastor kixin ts'ayakonhénra tí sín kuènte tí nínkõe ch'án k'uèṇaxín ch'án tí ijñiè ch'án.

²⁹ Ó nõna tió sátsjia ntá itsji í so chojni éxí kolóbo jiehe tsotjínkaon sinchek'itjáyán tí sín tinkáchónki Închéni.

³⁰ La ntá kjónté jahará la isorá tjejorá ntihi tsjankixínra tsjakorá kjuach'ia chrínki chrókjuákoḡará kíchuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya.

³¹ Méxṛa chrórxáxinkáonra kixin chjina iní nánó kjuak'é kjuákoḡará nchakotjin la ko tie la kũitõahya kjuintaxraxinkávan hasta kjuíncheníhi asenná nixjhará jnkojnko tí jahará.

³² A nta jie la jahará kíchó ni tjetjáncháḡa Dios kixin t'ayakuanxínra ch'án tí itén ch'án kixin tjuahará ch'án. Jehé ch'án imá chónṭa kjuachaxin tsjínkĩtsará ntá ts'ayéhérá kaín tí nkehe tjínkaon ch'án tsochjéhe ch'án kaín tí chojni tsikótjóa.

³³ Janhan mé kjuakéhya asenná chichakõen chojni õ iké jnkojín chojni.

³⁴ Náhí. Jahará ó nohará jína kixin janhan na mé tjaná kjuít'axián xṛa kjuácha k'uèṇaxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian.

³⁵ Méxṛa kjuàkuaxínra xikaha s̄ch'erá xṛa kixin jína tsjínkĩtsará tí chojni chóntahya. Xṛáxinkáonra kixin tsintáchro Închéni Jesús kixin: “Antsí tsochéḡeni kixin tí nkehe chrókjuanjõni, a ntá kánhyó tsochéḡeni kixin tí nkehe chrók'uáyéḡeni.”

³⁶ Ntá kjuixín ntáchro ch'in Pablo xikaha ntá jehé ch'an la ko kaín sín k'uejóxín toch'in sín ntá nixjehé sín Dios.

³⁷ Ntá kaín sín tsjánka sín la ko kjóa sín ch'án la ko tséhe sín tja ch'an.

³⁸ Imá k'uává sín kixin chrónka ch'án kixin í ts'ikonhya sín ch'án ínaá. Ntá sákjuikotoxin sín ch'án nó tí tjen tí ntabárçõ sátsjiko ch'án.

21

Sákjuí tí ch'in Pablo nó chjasin Jerusalén

¹ A ntá tió kuítóhenni tí sín kichó ni ntá k'uixenhenni ntabárcø la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara.

² Tí chjasin Pátara la mé ntiha k'uitjani ijnko ntabárcø sátsji nó estado Fenicia. Ntá k'uixenhenni tí ntabárcø a ntá sákjuíni.

³ Ntá tió k'uaátsínkani la k'uikonní tí nonte Chipre itjani ikjon kuítóhe ntá k'uaátsínkani estado Siria. Ntá tí ntabárcø la ts'atsínka tsítóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a.

⁴ Ntá ntiha k'uitjani tí sín tinkáchónki Ìnchéni a ntá ntiha kuítóhekoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'ín Pablo kíxin sáchrókjuíhya ch'án chjasin Jerusalén.

⁵ Ntá kjuixin k'uaátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíkotoxínni tí k'uaaxrjéntani ikon chjasin ntá sákjuíni chrínta ntayaon. K'uéjóxinni toch'inni nixjeheni Dios

⁶ ntá tuénxín nixjeheni sín jnkójina ntá tséhe tja kichó ni. Ntá k'uixenhenni tí ntabárcø, a ntá jehe sín ikjan sín ntøe sín.

⁷ Ntahó chjasin Tiro kjuixixín tí k'uixenhenni tí ntabárcø ntá kjuíjini chjasin Tolemaida. Ntiha kjuínixjeheni tí sín kichó ni tinkáchónki Ìnchéni. Ntá ntiha k'uéjókoni sín ijnko yaon.

⁸ Ntá tí yaon chr'éxin sákjuíxinni ntiha ntá kjuíjini chjasin Cesarea. Ntá ntiha sákjuíni ntøe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yatøxin tjinkítsa tí sín kjueyá Ìnchéni. A ntá jeheni mé kuítóhenni ntiha.

⁹ Tí ch'ín Felipe a mé chóna ch'án noó xjeen ch'án chjin naaxa tótøehya sín. Tí xjeen ch'án a mé chrónkaxín sín tí itén Dios.

¹⁰ Ntá ntaha k'uéjókoni sín itsjé yaon ntá ikjui ijnko ch'ín nixja itén Dios it'in Agabo, tsíkjixín ch'án estado Judea.

¹¹ Ikjui ch'án kjuínixjehé ch'án tí jeheni la ntá kuákja ch'án tí tjoa t'ínkat'óxin ch'ín Pablo na ntá kjuínchentetoxín toté ch'án la ko itja ch'án ntá ntáchro ch'án kíxin:

—Tí Nchakuen Dios mé ntáchro kíxin mé xíkaha chjasin Jerusalén tí sín judío sinchenteto sín ìnché tí tjoa sinchek'áyéhe sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónóeheni tí ch'ín Pablo kíxin sáchrókjuíhya ch'án tí chjasin Jerusalén.

¹³ Ntá kjuátehe ch'ín Pablo kíxin:

—¿Nkekuénté tsjankará la ko nkekuénté nchek'áváráni? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxian chjasin Jerusalén tí tinkáchónkia Ìnchéni —ichro ch'án.

¹⁴ Ntá kjuachahyani nixjeheni ch'án ntá kuítóhenni ch'án. Ntáchroni kíxin:

—Tí nkehe tjinkaon Ìnchéni mé tsonhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén.

¹⁶ Ntá sákjuíkoni iso tí sín tinkáchónki Ìnchéni tsíkjixín chjasin Cesarea. Sákjuíkoni sín ntøe ijnko ch'ín tsíkjixín Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kuítóhenni.

Ch'ín Pablo sákjuítsjehe tí ch'ín Jacobo

17 Tió kjujini chjasin Jerusalén ntá tí sín kichó ni tinkáchónki Ìnchéni mé kjuanjon sín kjuachaxin k'uéjóni la chéhe sín.

18 Ntá tí yaon chr'éxin ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etqan kuénte n̄nko.

19 Ntá ch'ín Pablo kjuixin nixjehe ch'án sín ntá tuénxín chrónka ch'án kaín tí xrā kjuich'e Dios tió kjuakohe ch'án tí sín jehya sín judío.

20 Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kichóni, jaha k'uíkuan kixin siín itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxin tsítogehyani tí ley.

21 Ntá tsíkinhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uętoqan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxi k'uékinkáchónkini ósé.

22 ¿Ntá nkehe chrókjuich'eni? Kixin tió tsinhin sín kixin kjuihá la tsojnkotsé nchónhya sín.

23 Méxrā íchá jina jaha sinchexiteyá tíhi. Ntíhi tjejó noó sín t'ichjánxin sinchexiteyá sín tí nkehe chénka sín Dios.

24 Jaha sáchrókjuíkoa sín la chrókótjóá jaha la ko jehe sín. La ko kjaxin chrókjuénka tsokjín sín ntá tsoñoexín tí sín judío kixin chaxínhya tí nkehe tsíkinhin sín la ko tsoñoexín sín kixin kjaxian jaha nchexiteyéhé tí ley.

25 A ntá tí sín jehya judío tsíkitekaon Ìnchéni la ikjinni ijnko xroon ó chr'énhenni sín. K'uętuęnhenni sín kixin sinehya sín tí nto tsíkjokehe chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí n̄nko

26 Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóá asén sín. Ntá kjuixin ntá k'uixenhen ch'án tí n̄nko kixin tsochrónka ch'án kixin ó kjuixin kjuínchexiteyá ch'an tí nkehe k'uítuēnhen ch'án. Tíhi mé t'axrjéxin kixin jnkojnko sín tsjik̄ao sín nkehe tsjanjon sín.

27 Ó chjina chróxétja tí yato yaon ntá iso tí sín judío tsíkjin estado Asia mé tsík'ikon sín ch'ín Pablo nkaxenhen tí n̄nko. Ntá kjuínchekóninkaon sín kaín chojni chjasin ntiha ntá itsé sín tí ch'ín Pablo.

28 Ntá k'uéya sín ntáchro sín kixin:

—Kaínrá chojni chjasin Israel tsjínk̄itsaráni kixin tsotséni tí ch'ín i. Jehe ch'án mé ixri nkuixín xritjakohé ch'án chojni nkehe jehya jina kuénte chjaséni, la ko titekakonhya ch'án tí ley kuénte Moisés, la ko titekakonhya ch'án n̄nkoeni. A ntá ijje la tsík'ixenko ch'án iso sín griego la kjuínchekjita sín nkaxenhen tí n̄nko tjóá —ichro sín.

29 Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkjin chjasín Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen n̄nko.

30 Ntá kuénté tí chjasin a kóninkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkákjenxín sín ch'án nkaxenhen n̄nko la kuakitsje sín ch'án ntója ntá tuénxín k'uíkjehe sín tí puerta n̄nko.

³¹ Ntá tjinkaon sín chrók'óyán sín ch'án ntá ijnko ch'ín comandante k'uətuənhen itsjé tí sín soldado romano kuínhin ch'án kixin kuenté tí chjasin Jerusalén k'uixité nínkaon sín.

³² Ntá tí ch'ín comandante sákjuiko ch'án iso sín soldado la ko tí sín k'uətuənhen tí soldado a la kuinká sín sákjuí sín tí siín tí chojni. Ntá tió k'uikon tí sín a kixin ó kjuíji tí ch'ín comandante la ko tí sín soldado a ntá kuitōhe sín, í kjuatehya sín ch'ín Pablo.

³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uətoan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án.

³⁴ A ntá tí chojni tsíkójnko tsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuente xikaha kjuích'e sín kixin k'uixité sín. Ntá k'uətoan ch'án kixin tí sín soldado sátsjiko sín tí ch'ín Pablo tí cuartel siín tí sín soldado.

³⁵ La ntá tió kjuíjiko sín ch'án tí t'it'ótjenxin sín tí nchia a ntá t'ichjánxin kuamá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín.

³⁶ Káin tí chojni chréhe nóton t'èya sín ntáchro sín kixin:
—Chrók'uen ch'án —ichro sín.

Ch'ín Pablo chrónka nkayakon chojni kixin chóntahya ch'án jie

³⁷ Ntá tió sáchrókjuiko sín ch'ín Pablo tí nkaxenhen tí cuartel kuente tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jína tsonixjahani jaha intsí? —ichro ch'án.

Ntá kjuátēhe tí ch'ín comandante ntáchro ch'án kixin:

—¿Jaha la á noha nixja griego?

³⁸ Méxra ¿á jehya jaha tí chojni tsíkjixin Egipto kjuínchenínkaon chojni la ko sákjuiko nteje tí noó mil chojni tsíkjàya? —ichro ch'án.

³⁹ Ntá kjuátēhe ch'ín Pablo ntáchro ch'án kixin:

—Náhi, janhan mé ijnko chojni judío. Tsíkókjínaxián chjasin Tarso, estado Cilicia. Janhan me ijnko chojni tsíkjixin ijnko chjasin imá tjetooan. A ntá ijie xrjannóaha kixin tsjánjuan kjuachaxin tsonixjahá tí chojni —ichro ch'án.

⁴⁰ Ntá tí ch'ín comandante kjuanjon kjuachaxin ntá ch'ín Pablo kjuák'exín toté ch'án tí tjen escalera ntá tja ch'án ó kjuákoxin ch'án kixin tsotání sín. Ntá tání sín ntá kjuankixin nixjaxin ch'án nkíva hebreo. Ntáchro ch'án kixin:

22

¹ —Jahará kichó ni la ko chojni it'é xjan tinhínrá nkehe tí tsóxrjanka kixin chontahya jie —ichro ch'án.

² Ntá kuínhin sín kixin nixjaxin ch'án nkíva hebreo ntá antsí má tání sín. Ntá ntáchro ch'ín Pablo inaá kixin:

³ —Janhan mé ijnko chojni judío tsíkókjínaxián chjasin Tarso estado Cilicia. K'uankixián ntíhi chjasin Jerusalén la kjuintakuáxian tí nkehe kjuako tí ch'ín Gamaliel la titekavan tí ley tsíkinkáchónki tí sín tsík'axrjeniximni ósé. Tjínkavan chrókjuít'ahá Dios xra káin asenná éxi tjinkáonrá jahará ch'erá tí yáon ijie.

⁴ Ti senó k'uénínkakonhan chrók'oyán tí sín tinkáchónki Ìnchéni kjuíntanteto chojni ntoa la ko chojni chjin kixin chrók'uejóchjina sín.

⁵ A ntá tí sín nchat'á t'etōan la ko kaín tí sín táda t'ayakonhen n̄nko la mé nohe sín kaín tíha kíxin jehe sín mé kjuanjon sín xroon ts'áyéhe tí sín kíchó n̄i judío tjejó chjasin Damasco. Ntá sákjuia nó ntiha kíxin chrókjuikjéyá tí sín tinkáchónki Ìnchéni kíxin chrótse sín ntá chrókjuikian sín ntihi Jerusalén chrokuuasóte sín.

Ch'ín Pablo chrónka nkexri kjuankíxin tinkáchónki ch'án Ìnchéni (Hch. 9.1—9; 26.12—18)

⁶ A ntá tió kjuasán chjina chjasin Damasco chjina chonkíxin ntá xrínghya k'uinkáséyan jnkontatjén tí tjén ijnko xrohi imá t'ínkaséyan kuix̄in nkajni.

⁷ Ntá kjuachr'ítsinka nonte ntá tuénxín kuinhan itén ijnko nkexro nixjana ntáchro kíxin: “Saulo, Saulo, ¿nkekuènté ninkákonna xritjéyá tí janhan?”

⁸ Ntá kjuánchánkiá kíxin: “¿Xá nkexro jaha?” Ntá kjuátehe ch'án ntáchro ch'án kíxin: “Janhan mé tí nkexro Jesús tsíkjix̄in chjasin Nazaret, mé tí nkexro xritjéyá.”

⁹ La ntá tí sín k'uájikian mé k'uíkon sín tí xrohi la chrakon sín kjánchó kuénghya sín itén tí nkexro nixjana.

¹⁰ Ntá kjuánchánkiá kíxin: “¿Xá nkehe tsonhen tjinkávan s̄it'aha jaha?” Ntá kjuátehe ch'án ntáchro kíxin: “T'áya sájtia t'ixenhén chjasin Damasco ntá ntiha tsochrónka sín kaín nkehe s̄ich'e.”

¹¹ Ntá tí xrohi a mé k'uíxenka ikuān ntā í xitjahya t'íkuān. Ntá tí sín chríkjan mé kuinkátséna sín sákjuikjan sín chjasin Damasco.

¹² Ntá ntaha kjuák'e ijnko ch'ín it'ín Ananías ijnko chojni jina kjuínchexiteyéhē ch'án tí ley kuènte ch'ín Moisés. Kaín tí sín judío síin chjasin Damasco tjikosáyehe sín tí jehe ch'án.

¹³ Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kíxin: “Kíchóni Saulo, ijie la ts'ayéhé kjuachaxin ts'ikuan inaá.” Ntá ó jina t'ikuan.

¹⁴ Ntá tuénxín ntáchro ch'án inaá kíxin: “Tí Dios kuinkáchónki tí sín tsík'axrjenix̄inni la ó tsíkjeýá ch'án tí jaha kíxin tsonoha nkehe tjinkaon ch'án la ko kíxin ts'ikuan tí nkexro jina la ko tsinhín tan k'uaxrjex̄in ir'va ch'án.

¹⁵ Jaha mé tsochrónka tí nkehe k'uíkuān la ko tí nkehe kuínhín tsinhin kaín tí chojni chjasintajni.

¹⁶ A ntá jie la í choénghya má. T'áya la tsikitiaxián ihnié Ìnchéni kíxin mé ts'imáxin ijíá,” ichro ch'ín Ananías.

Pablo chrónka kíxin Dios ichr'án ch'án tsjakohe tí sín jehya sín judío

¹⁷ Na ntá tió xíkjan chjasin Jerusalén ntá sákjuia n̄nko tsonixjahā Dios ntá titāyā k'uíkuēn

¹⁸ Ìnchéni ntáchro ch'án kíxin: “Tjoka ts'axrjéxian chjasin Jerusalén kíxin tsitekakuenghya sín tí nkehe tjákua mé tí tan kuéntana.”

¹⁹ Ntá janhan ntátjan ch'án kíxin: “Ìnchéni, jehe sín ó nohe sín kíxin senó k'uék'atsinka kaín tí n̄nko la k'uétse tí sín tinkáchónki tí jaha la sákjuikjan sín ntoechiso k'uékon sín.

²⁰ Tió k'óyán sín tí ch'ín Esteban tí nkexro k'uékjit'aha x̄rā, k'uénixja tí tan kuénta ntá janhan kjaxin tjéntaxián ntiha la janhan ntáxrx̄an kíxin ó nchoxon its'en ch'án la k'uáyakonhan tí iké tí sín kjuàya.”

²¹ Ntá Ìnchéni xínixja inaá, ntáchro ch'án kíxin: “Tétuānhan jaha kíxin sátsjia chjasin kjín kíxin tsjáhohé tí chojni jehya judío.”

Ntá tí ch'ín comandante k'uáyéhe tí ch'ín Pablo k'ixin tsjasóte ch'án

²² Ntá tí sín tsíkójnkotsé mé kuínhin sín kaín tíha ntá kjuank'ixin k'uèya sín ntáchro sín k'ixin:

—Its'en ch'án, í tsjak'echónhya ch'án —ichro sín.

²³ Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín.

²⁴ Ntá tí ch'ín comandante mé k'uetuenhen ch'án tí sín soldado a k'ixin sátsjiko sín ch'ín Pablo nkaxenhen tí cuartel kuènte sín. Ntá ntiha k'uetóan ch'án k'ixin tsjatexín sín ch'án chikoté ntá tsonoxín tí ch'ín comandante nkekuènte imá t'óyako sín nínkakonhen sín tí jehe ch'án.

²⁵ Ntá kjuixin kjuinchenteto sín ch'án k'ixin tsjate sín ch'án ntá nixjéhe ch'ín Pablo ijnko ch'ín capitán itjen ntiha ntáchro ch'án k'ixin:

—¿Á chontará kjuachaxin tsjaterá ijnko chojni romano, k'ixin naxa kjuéyáhyará nkerí jje chonta? —ichro ch'án.

²⁶ Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án k'ixin:

—¿Nkehe s'ich'e jaha k'ixin tí nkexro i mé ijnko chojni romano?

²⁷ Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án k'ixin:

—¿Á jaha chaxín chojni romano? —ichro ch'án.

Ntá kjuátéhe ch'ín Pablo k'ixin chaxín jehe ch'án.

²⁸ Ntá ntáchro tí ch'ín comandante k'ixin:

—¿A ntá nkexrí k'ixin janhan nchónhya chichaon kjuènká k'ixin ts'ónana chojni romano?

—A ntá ntáchro ch'ín Pablo k'ixin:

—Janhan na chojni ntiha tsíkókjínaxián.

²⁹ Na ntá tí sín soldado chrókjuate ch'ín Pablo mé kuínhin sín k'ixin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án k'ixin tí ch'ín Pablo a mé ijnko chojni romano ch'án chaxín. Ntá chrakon ch'án k'ixin tsikjinchenteto ch'án.

Ch'ín Pablo nixjéhe ch'án tí sín t'etóan kuènte tí sín judío

³⁰ A ntá tí kóyáon ntá tí ch'ín comandante a mé tjínkaon ch'án tsonohe ch'án nkehe tí jje chrók'ueka tí sín judío tí ch'ín Pablo. Ntá kjuasintánka ch'án ch'ica cadena tsichróntetoxín tja tí ch'ín Pablo ntá k'uetóan ch'án k'ixin tsojnkotsé kaín tí nchát'á t'etóan la ko tí sín t'etóan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí siín tí jehe sín.

23

¹ Ntá ch'ín Pablo komá tí sín t'etóan kuènte sín judío ntá ntáchro ch'án k'ixin: —Kíchóni, tí k'uékjak'é hasta ijie la Dios tjetsjehe k'ixin ijnko kjuaxrexinkaon jina chonta —ichro ch'án.

² Ntá tí ch'ín Ananías tí ch'ín nchát'á t'etóan mé k'uetuenhen ch'án tí sín chjino t'ejó tí tjen ch'ín Pablo tsochjéhe sín ir'va ch'án.

³ Ntá kjuátéhe ch'ín Pablo k'ixin:

—Dios mé sinchekjasóte tí jaha k'ixin ntoáhya kjuich'e. Tjetjaxian méhe k'ixin tsjéyá nkehe tí jje chonta éxí nixja tí ley. A ntá ¿nkekuènte kuítekákonhya tí ley, la kuétóan k'ixin ts'ékonna? —ichro ch'án.

⁴ A ntá tí sín siín ntiha ntáchro sín k'ixin:

—¿Á xikaha ts'antaxínhín tí nchát'á t'etóan kuènte Dios?

⁵ Ntá kjuátēhe ch'ín Pablo ntáchro ch'án kixin:

—Kichóni, kjuatsoanhya janhan kixin jehe ch'án mé tí nchat'á t'etōan. Ntáchro tí xroon itén Dios kixin: “Chrók'uantaxienhya tí chojni t'etuenhen chjasán”^{*} —ichro ch'án.

⁶ Ntá ch'ín Pablo mé kónohe ch'án kixin iso chojni síin ntiha mé chojni kuente partido saduceo, ntá í so sín a mé kuente partido fariseo. Ntá itsen k'uèya ch'ín Pablo, ntáchro ch'án kixin:

—Kichóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jiē chonta kixin janhan mé tinkachónkia kixin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kichó sín ntá xikaha jnkokónhya kjuenkayáxin tí sín tsikójnoksé ntiha.

⁸ Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín kaín tí nkehe a.

⁹ Ntá kaín sín k'uèya sín la ntá iso tí sín maestro tjako ley kuente sín fariseo mé k'uínkatjen sín ntáchro sín kixin:

—Tí ch'ín i, kohya ninkehó nkehe jínahya kjuích'e ch'án. Ách'e ijnko nchakuen chojni o ijnko ángel mé nixjēhe ch'án —ichro tí sín fariseo.

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kixin chrókjuinchequen sín tí ch'ín Pablo ntá k'uetuenhen ch'án tí sín soldado a kixin sátsjikakjín sín ch'án la tsikao sín ch'án inaá tí cuartel kuente tí sín soldado.

¹¹ A ntá tí tie a na ntá xrínahya titàya k'uíkuèn ch'ín Pablo Ìnchéni nixja ch'án, ntáchro kixin:

—Chrakonhya Pablo kixin éxí chronka tanná chjasin Jerusalén la mé xikaha tsochronka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin a ntá iso tí sín judío a mé kjuenkayáxin sín kixin ts'óyán sín tí ch'ín Pablo. Ntá k'uákjenxin sín ihnjé Dios chaxín tsoxiteyá la sinehya sín la ko ts'ihya sín ninkehó tí naxa ts'óyánhya sín ch'án.

¹³ Chjina cuarenta sín kjuenkayáxin sín kixin xikaha sich'e sín.

¹⁴ Ntá sákjuíchenka sín tí sín nchat'á t'etōan la ko tí sín t'etuenhen kuente tí sín judío la ntáche sín kixin:

—K'uákjenxinni ihnjé Dios kixin chaxín tsoxiteyá kixin í sinehyani ninkehó tí naxa ts'óyánhyani tí ch'ín Pablo.

¹⁵ Méxra ntá jahará la ko í so tí sín t'etuenhen tí sín judío tsontácherá tí ch'ín comandante a kixin tsjikao sín tí ch'ín Pablo ntihi tí tjejorá ntóye nchítjen kixin antsí má tsjanchankíhírá ch'án nkehe siná á chaxín tí jiē t'íká ch'án. A ntá jeheni senó ts'ejóchónhenni tí tsjixin ch'án ntá ts'óyánni ch'án kixin í tsjihya ch'án ntihi —ichro sín.

¹⁶ Ntá tí xjeen tí kjave tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uixenhen ch'án cuartel kuente tí sín soldado kixin tsochronka ch'án nkehe tí tjo sín kuínhin ch'án.

¹⁷ La ntá ch'ín Pablo mé k'uíyēhe ch'án ijnko tí sín capitán la ntáchro ch'án kixin:

* 23:5 Éxodo 22.28

—Sátsjikoa tí ch'ín ntasoá ti tjen tí ch'ín comandante kixin tjinkaon ch'án tsochrónka ch'án nkehe —ichro ch'án.

¹⁸ Ntá tí ch'ín capitán a mé sákjuiko ch'án ti tjen tí ch'ín comandante ntá ntáchro tí ch'ín capitán a kixin:

—A ntá tí ch'ín Pablo tjechjina mé k'uíyeheni ch'án kixin tsjikaooni tí ch'ín ntasoá ntihi kixin tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochrónka? —ichro ch'án.

²⁰ Ntá ntáchro tí ch'ín ntasoá a kixin:

—Iso tí sín judío mé kjuenkayáxin sín kixin tsjanchaha sín kixin ntóye nchtjten sátsjikoa ch'ín Pablo tí tsojnkotsé tí sín judío t'etóan. Sit'ayaha sín tsootáchro sín kixin tjinkaon sín tsjanchankíhi sín ch'ín Pablo tí nkehe antsi má xra.

²¹ A ntá jaha la chrókuítekákonhya kixin chjina cuarenta chojni tjejóchónhen sín imó la k'uákjenxin sín ihnjé Dios kixin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsoñohe sín nkehe tsixrua jaha —ichro ch'án.

²² A ntá tí ch'ín comandante a mé nixjehé ch'án tí tí ch'ín ntasoá la k'uetóan ch'án kixin:

—Tsochenkahya ninkexró kixin xíkaha kjuíchronka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uíyehé ch'án yaá tí sín capitán a ntá k'uetóan ch'án kixin tsoyaxínhin sín sátsjiko sín iyó ciento sín soldado sátsjixin toté la ko setenta tí sín tsjiták'á kokatę la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án.

²⁴ La ko k'uítuenhen sín sinchekamá sín kokatę tsjiták'á ch'ín Pablo la ts'ayakonhen sín ch'án jína kixin kohya nkehe tsoñhen kixin tsjiji ch'án tí tjen ch'ín Félix, tí ch'ín gobernador.

²⁵ Ntá tí ch'ín comandante ikjin ch'án ijnko xroon a, ntáchro kixin:

²⁶ “Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jína, nixjaha.

²⁷ Tí sín judío a mé itsé sín tí ch'ín i kixin chrók'óyán sín ch'án. Ntá tió kónona kixin ijnko chojni romano tí jehe ch'án la ntá sákjuikian sín soldado kjujntakaá ch'án.

²⁸ Tjinkávan tsoñona nkekuènte kixin nínkakonhen sín ch'án. Ntá sákjuikian ch'án tí tsikójnkotsé tí sín judío.

²⁹ Ntá kónoxín kixin nínkakuénxin sín ch'án kixin tí ley kuènte sín kjuínchexiteyáhya ch'án, ichro sín. Jehya jie jie tsíkjasin ch'án kixin chrók'óyán sín ch'án o chrókjuak'echjina sín ch'án.

³⁰ Ntá ó kuínhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kixin chrókjuiji sín tí tjen jaha chrókjuá sín kixin nkekuènte nínkakonhen sín ch'án. Kjuasáyá. Ó tjen.”

³¹ Ntá tí sín soldado a mé kjuínchexiteyá sín éxi k'uítuenhen sín a ntá sákjuiko sín tí ch'ín Pablo tí tie a chjasin Antípatris.

³² Ntá tí yaon chr'éxin tí sín soldado xrixín toté ó a mé xíkjan sín tí cuartel kuènte sín. Ntá tí sín k'uéjókjen kokatę a mé naḡa sákjuiko sín tí ch'ín Pablo.

³³ Ntá tió kjuíji sín tí chjasin Cesarea ntá tí sín soldado a mé kjuanjón sín tí xroon a chjéhe sín tí ch'ín gobernador la ko kjaxin kjuínchek'áyéhe sín ch'án tí ch'ín Pablo.

³⁴ Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketi chjasen ch'ín Pablo. La ntá kónohe ch'án kixin estado Cilicia tsíkijxin tí ch'ín a.

³⁵ Ntá ntáchro ch'án kixin:

—Ntá tsinhan nkehe tsixro tí sín itsji ts'eka jie.

Ntá k'uętuęnen ch'án tí sín soldado a kixin ts'ayakonhen sín tí ch'ín Pablo tí nchia kuęnte ch'ín Herodes.

24

Ch'ín Pablo nixjehe ch'án ch'ín Félix chrónka ch'án kixin kjuasinhya ch'án jie

¹ Ntá k'uátsínka in'ó yaon, ntá ch'ín Ananías, tí nchat'á imá t'ętoan, kjuíji ch'án chjasin Cesarea. Kjaxin kuikao ch'án iso tí sín t'ętoan kuęnte nįnko a la ko ijnko ch'ín abogado it'ín Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuęnte ch'ín Pablo.

² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankixin ch'án nixjehe ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkįtsa kixin kjuaxróxin tjejóni la kjuasáyá kixin imá noha kjuíncheyóxian tí nación kuęnteni.

³ Kjuasáyá jaha Félix. Imá jına jaha kixin k'uáyéhe ni kaín tíha.

⁴ Tjínkakhya sįntak'itjayanhan nchónhya tiempo la xrjanógha kixin chrókjuak'é chrókuinhín intsikóá tí nkehe tsóxrjanka.

⁵ A ntá ijie ó k'uitjani kixin tí ch'ín i mé éxi ijnko chin t'óxika kuęnté chjasintajni kixin ch'iyehé ch'án tí sín judío ntá xika sín. Jehé ch'án mé t'ętoan ch'án tí sín tinkáchónki tí ch'ín tsíkijxin chjasin Nazaret.

⁶ Jehé ch'án mé kjaxin chrókjuínchekjita ch'án tí nįnko. A ntá itséni ch'án ntá chrókjuínchekitęxinni tí ijie ch'án éxi t'ętoan tí ley kuęnteni.

⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakįtsje sín tí ch'ín Pablo.

⁸ Ntá k'uętoan ch'án kixin tí sín tjanchia jie chrókuitsjehe sín tí jaha kixin jaha chrókjuanchankíhí ch'án kixin chrókónoha jına nkexéhe tí jie chrókjuínchekjasótęxin sín ch'án —ichro tí ch'ín Tértulo.

⁹ Ntá ntáchro kaín tí sín judío siin ntiha kixin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéhe ni kixin tsonixjahani tsochrónkani kixin kohya jie kjuasinni kixin ó noheni kixin jaha la juez kuęnté tí nación ntihi la nchónhya nánó tętoan.

¹¹ Jaha la kjaxin ó chrókónoha kixin na ntá teyó yaon kjuíjini chjasin Jerusalén kixin ntaha tsoxráinkakhonxinni Dios.

¹² Kónoxínhya kixin nįnko nķexro chrókjuachaxinni, la ko kjuínchekakuenhyani ninķexró nįnko la ko ni tí nįnko ntsí la ko ninketó chjasin.

¹³ Tí sín i la xitjahya tsontáchro sín kixin xikaha tí jie kjuasinni.

¹⁴ Janhan chaxin xrjanka kixin t'aghá xřa tí Dios k'uékinkáchónki tí sín tsík'axrjenixinni mé yóhe tí ntja nįxin. A ntá jehé sín ntáchro sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín

tí xroon kuènte ley la ko tinkachónkia kaín tí nkehe k'uénixja tí sín k'uéchrónka itén Dios.

¹⁵ Kjaxín tinkachónkia tí Dios tinkáchónki tí jehe sín kixin tjéchonhan kixin Dios sinchexechón kaín chojni jína la ko kaín chojni jínahya kjaxín.

¹⁶ Méxra tóxakonna kixin tjóá chrókjuak'é kixin chrókjuanchahya Dios jie la ko kjaxín chojni chrókjuanchahya jie.

¹⁷ Nta kjuixin k'uatsínka iso nánó ixrini ókjé ntá kjuíjini chjasénni kixin tsjanjonni chichaon la ko kjaxín tsochjéheni Dios nkehe.

¹⁸ Méxra mé xikaha tjenni nkaxenhen nínko nta iso sín judío tsíkijixin estado Asia ó xetani ntiha. Ntá kjuínchetjóáni asénni la tsjéhya chojni k'uíkon la kohya chojni kjuánjonkoni.

¹⁹ A ntá tí sín a mé t'ichjánxin chrókui sín ntihi kixin chrókjuanchia sín jie tí nínkakonna sín.

²⁰ A ntá tí náhi la tí sín tjejó ntihi chróchrónka sín kixin nkehe tí jie k'uitjaxín sín tió kjuák'eni tí tjejó tí sín t'etóan kuènte tí sín judío.

²¹ Kjá tí tsontácho sín kixin náxrjónhya ijnko nkehe itsen k'uèya ntáxrjan kixin: “Ijie sinchekitoexinrá jièna kixin sinchekjasótenará kixin janhan tinkachónkia kixin tsoxechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jína kónohe ch'án kixin nkexrí tí ntía nixin. Ntá kjuínchekitoexínhya ch'án ijje ch'ín Pablo. Ntácho ch'án kixin:

—Tsijjia tí ch'ín comandante Lisias ntá tsochrónka ch'án nkekuènte tí jie tjanchará ntá tsonna —ichro ch'án.

²³ Ntá k'uètuènen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsi la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxin ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uètoan ch'án kixin tsjik'iyehé sín tí ch'ín Pablo kixin tsochrónka ch'án nkexrí tinkáchónki chojni Jesucristo.

²⁵ A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etuènen chojni asén sín kixin ch'ehya sín tí jínahya la ko nkexrí Dios sinchekitoexín ijje chojni tí tsjixixín. Ntá ch'ín Félix kuínhin ch'án xikaha ntá chrakon ch'án, ntácho ch'án kixin:

—A ntá jie la sátiya. Ntá ts'iyáha tió chonta tiempo —ichro ch'án.

²⁶ A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehé ch'án tí ch'ín Pablo kixin tsonixjehé ch'án.

²⁷ Ntá xikahó kónhen hasta k'uátsínka iyó nánó ntá tí ch'ín Félix kuitóhe ch'án tí xra gobernador la ntá í jnko ch'ín it'ín Porcio Festo mé k'uíxenhen ch'án tí xra a inaá. A ntá ch'ín Félix mé kuitóhe ch'án tí ch'ín Pablo tjechjina ch'án kixin tjinkaon ch'án chrókjuinchexiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

¹ Ntá tí ch'ín Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén.

² Ntiha tí sín nchat'á t'et'əoan la ko tí sín judío imá tjet'əoan mé kjuanchia sín kixin tsjasóte ch'ín Pablo.

³ Kjuanchia sín kixin xra ó chrók'ue'əoan ch'án kixin chrók'jui ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntja ts'óyán sín tí ch'ín Pablo.

⁴ Kjánchó ch'ín Festo kjuáte'he ch'an ntá'chro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'ín Pablo la tjechjina ch'án chjasin Cesarea la xitjahya ts'et'əoan ch'án kixin tsjixrakoa.

⁵ Ntá ntá'chro ch'án kixin:

—Tí chojni tjet'əoan kuéntará sáchrók'juikian ntiha chjasin Cesarea. A ntá tí chaxín tsíkjasin ch'án jie ntá ntiha la jina tsjanchia sín jie —ichro tí ch'ín Festo.

⁶ Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea ínaa. Ntá tí yaon chr'éxin a kjuák'etjaxin ch'án tí tjet'et'əoanxín ch'án ntá k'ue'əoan ch'án kixin tsjikakjín sín tí ch'ín Pablo.

⁷ Ntá tíó k'uixenhen ch'ín Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie.

⁸ A ntá tí ch'ín Pablo a chrónka ch'án kixin kjuasinhya ch'án jie. Ntá'chro ch'án kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrók'uitekakonhyani tí ley kuénte tí sín judío la ko jehya chrók'uitekakonhyani tí nínko la ko jehya chrók'uitekakonhyani tí ch'ín gobernador romano.

⁹ A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntá'chro ch'án kixin:

—¿Á tjinkávan sátsjia chjasin Jerusalén kixin ntaha janhan chrók'juintakitoaxián nkehe tí jie chonta jaha? —ichro ch'án.

¹⁰ Ntá kjuáte'he ch'ín Pablo kixin:

—Náhi, jeheni ó ntihi tjenni tí t'et'əoanxín tí sín gobierno romano la jina chrók'juinchekit'əoxián ijíeni kixin jaha la ó noha kixin ninkehó ijie kjuich'ehyani tí sín judío.

¹¹ Kja tí chaxín kjuásian ichrén jie jíe chrók'ue'nxian la chrakonhyana kjónté chrók'ue'n. A ntá tí chaxínhya xíkaha t'ekana sín jie la ninkexró chóntahya kjuachaxin chrók'ue'əoan sáchrók'juikoni tí jehe sín. A ntá tjánchiá kixin jehe tí ch'ín imá t'et'əoan mé sinchekit'əoxín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkjtsa ch'án ntá ntá'chro ch'án kixin:

—Jaha mé tjanchia kixin tí ch'ín imá t'et'əoan sinchekit'əoxín ch'án ijíá. Méxra tétuqnanhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uátsínka iso yaon ntá tí ch'ín rey Agripa la ko tjan Berenice kjuíji sín chjasin Cesarea kixin tsonixjehe sín tí ch'ín Festo.

¹⁴ Ntá ntiha mé kuít'əhe sín itsjé yaon ntá ch'ín Festo a mé chénka ch'án tí ch'ín rey nkehe kuénte tí ch'ín Pablo. Ntá'chro ch'án kixin:

—Ntíhi itjen ijnko ch'ín tjechjina tsíkí'əhe ch'ín Félix.

¹⁵ A ntá tíó kjuak'é chjasin Jerusalén ntá tí sín nchat'á t'et'əoan la ko tí sín t'et'ue'nenhén tí sín judío a mé kjuíjitsjehe sín tí janhan ntá kjuanchia sín jie kuénte ch'ín Pablo. Kjuanchia sín kixin chrók'óyánni tí jehe ch'án.

16 Ntá janhan kjuátaha kixin: Jeheni chojni t'etōan kuènte sín romano mé kuènyhani ts'etōanni its'en ninkexró tí naxa tsochjinahya tí ch'ín kjuasin jie kixin tsontácho ch'án á chaxín tí jie tjanchia sín o náhi.

17 Ntá tí sín judío kui ntihi ntá chuanyha má. Kjónté tí yaon chr'éxin kjuak'etjaxian tí ntakitōexián ijié chojni la kuétōan kixin síxrakoa tí ch'ín Pablo.

18 A ntá tí sín kóchjina kohya ninkehó ichro sín kuènte ti jehe ch'án éxi kjuenkayáxian janhan chróntácho sín.

19 Jehó nínkauenxín sín ch'án kixin tí nkehe tinkáchónki ch'án la ko nínkauenxín sín ch'án kixin tí nkexro it'in Jesús mé ik'uén ch'án ntá jie ntácho ch'ín Pablo kixin tjechón ch'án inaá.

20 Janhan la nonahya nkexrí tsitōexín tí ijié ch'án ntá kjuánchánkíha tí ch'ín Pablo á tjinkaon ch'án sátsji ch'án chjasin Jerusalén kixin ntaha tsitōexin tí jie ch'án.

21 A ntá jehe ch'án tsíkjanhia ch'án kixin tí ch'ín imá t'etōan mé chrókjuinchekitōexín ch'án ijié ch'án. Ntá kuétōan janhan kixin naxa ntihyó tsjak'echjina ch'án tsononajia janhan nkesá tsétuānhan ch'án sátsji ch'án ntiha —ichro ch'án.

22 A ntá ch'ín Agripa ntáche ch'an tí ch'ín Festo kixin:

—Kjaxian janhan tjínkavan tsínhan tí nkehe tsochrónka tí ch'ín a.

Ntá kjuátēhe ch'ín Festo ntácho ch'án kixin:

—Ntōye tsinhín nkehe tsochrónka ch'án.

23 Ntá tí yaon chr'éxin tí ch'ín Agripa la ko tí tjan Berenice kjuji sín la k'uixenhen sín la ko tí sín soldado t'etōan tsíkjkāo sín, la ko k'uixenko sín iso chojni tjetōan kuènte chjasin ntiha. Ntá k'uetōan ch'ín Festo kixin tsjixrakoa tí ch'ín Pablo.

24 Ntá ntácho ch'ín Festo kixin:

—Jaha ch'ín rey Agripa tinhín la ko tinhínrá kaín rá tsíkójnkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuítōehya sín, tjanhana sín kixin chrók'uen ch'án.

25 A ntá tónhenni kixin kohya jie jie kjuasin ch'án kixin chrók'uen ch'án. Kjánchó jehe ch'án mé tsíkjanhia ch'án kixin tí ch'ín imá t'etōan chrókjuinchekitōexín ijié ch'án. Ntá kjuenkayáxian kixin tsétuānhan ch'án sátsji ch'án ntiha.

26 Nonahya nkehe chaxín tsokjian ts'áyéhe tí ch'ín t'etōan. Ntá jie kuétōan kjuikakjín sín ch'án kjuikāo sín ch'án tí tjejóni ntihi kixin tjetōan kixin jaha ch'ín Agripa la ko kaín rá tjejorá ntihi tsjanchánkíhírá ch'án kixin mé tsonóna janhan nkehe tsokjian.

27 Méxra náxrjónhya chróchr'an ijnko tí chojni tjechjina naxa nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

1 Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochrónka —ichro ch'án.

Ntá tí ch'ín Pablo mé kjuaya tja ch'án ntá kjuankixin nixja ch'án, ntácho ch'án xíkíhi:

2 —Chàna kixin tsonixja nkayakuan tí jaha rey Agripa tsòxrjanka kaín tí jie t'ekana tí sín judío.

3 Ó noheni kixin jaha la ó noha jina kuènte tí ley la ko tí nkehe tinkáchónki tí sín judío, la ko jaha noha nkehe tí kjuachaxin sín kichó sín. Méxra xrxannógha kixin tjak'etinhín jina.

Chrónka ch'in Pablo nkexrí kjuák'e ch'án tí ósé

4 'Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána.

5 Kjaxin jehe sín la ó nohe sín la kjá jina chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuinchexiteyéhé sín tí ley kuènte tí nkehe tinkáchónkini.

6 Ntá ijie sinchekitòexián jìena kixin nínkaon tí sín judío a kixin tjéçhõnhan kixin Dios mé sinchexechón chojni inaá xikaha tsíchénka ch'án tí sín tsik'axrjeníxinni.

7 Tí teyó tribu tsik'axrjeníxin ch'in Israel mé tjejóchónhen sín kixin ts'ikon sín tsoxiteyá tí nkehe tsíchronka Dios. Méxra xraxinkaon sín Dios nchakotjin la ko tie. Méxra mé xikaha tjéçhõnhan, jaha rey Agripa, la mé xikaha nínkakonna tí sín judío ijie.

8 ¿Á títékakonhyará jahará kixin Dios sinchexechón chojni tsik'en?

Ch'in Pablo k'uénínkakonhen ch'án tí chojni tinkáchónki Ìnchéni

9 Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsíkjixin chjasin Nazaret.

10 Mé xikaha kjaxin k'uékjit'a chjasin Jerusalén. Tí sín nchat'á t'etõan mé kjuanjon sín kjuachaxin kixin janhan tsochr'áxanhan ntõechiso nchónhya tí sín tinkáchónki Ìnchéni. Ntá tió k'óyán sín tí sín a mé janhan la ntáxrjan kixin ó nchõxon xikaha kónhen.

11 Nchónhya veces kjuíntakjasóte tí sín tinkáchónki Ìnchéni kixin chrókuítõhe sín tí nkehe tinkáchónki sín. Mé xikaha k'uékjit'a kaín xín nínko kixin imá k'uénínkakonhan tí jehe sín la xikaha k'uájichráha sín kjónté sátsíkji sín chjasin ókjé.

*Chrónka ch'in Pablo nkexrí kuinkáchónki ch'án Ìnchéni
(Hch. 9.1—19; 22.6—16)*

12 Méxra xra ó sákjuia janhan chjasin Damasco. Tí sín nchat'á t'etõan mé ó kjuanjon sín kjuachaxin kixin xikaha t'aha sín xra.

13 A ntá tí ntia a jaha rey chróónoha kixin chonkíxin k'uíkuan éxi ijnko xrohi t'inkaséyan kujxin nkaya nkajní antsí má fuerte la kánhyó fuerte tí xrohi kuènte yõon la tí t'inkaséyan mé k'uantatjen tí janhan la ko tí sín xrikian.

14 Ntá kaín ni kjuítsínkani nonte ntá xrinahya kujnhan nixja ijnko nkexro mé nkiva hebreo nixjaxin ch'án. Ntáçhro tí nkexro a kixin: "Saulo, Saulo, çnkekuènte nínkakõnna xritjéyá tí janhan? Jahvá nchekjasóte asán kixin tjanjonkoa tí janhan. Éxi yóhe ijnko koxinta kónínkaon va tí chriáte sín va chica yo mé xikaha jaha."

15 Ntá kjuánchánkiá kixin: "¿Xá nkexro jaha?" Ntá tí nkexro me kjuátõhe kixin: "Janhan mé Jesús mé tí nkexro chréhe jaha.

16 Ijie t'aya jaha, tjak'exián totá. Janhan kjuánjuan kjuachaxin kixin k'uíkuan tí janhan ijie kixin jaha sích'ena xra. Janhan kjuéyá tí jaha kixin tsochénka

chojni kixin k'uikuan tí janhan la ko tsochronka tí nkehe tsjákohá inaá tí xik'ikuan tí janhan inaá.

¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tétogan satsjia.

¹⁸ Méxra tétogan sátsjia tí tjejó tí jehe sín kixin takítjenkia ikon sín kixin í ts'ajihya sín ntia sítie la ts'aji sín ntia t'inkaséyan la ko tsochóntahya tí jínahya kjuachaxién ts'etuēnhen tí jehe sín. Jehe sín mé tsinkáchónki sín tí janhan. Ntá janhan ts'áyahá sín la tsjin ijíé sín la ko tsitonhen sín tí nkehe ts'áyéhe kaín tí sín tsíkjinchetjóá Dios," ichro Închéni.

Ch'in Pablo kuítekaon ch'an tí nkehe tsík'ikon ch'an

¹⁹ Mé xikaha jaha rey Agripa kjuíntaxiteyáha tí nkehe k'uikuan kujin nkaya nkajni.

²⁰ Saoxín kjuákoḥa tí sín siín chjasin Damasco, la ntá chr'éxin chjasin Jerusalén, la ko kuenté tí estado Judea ntá kjaxin kjuákoḥa tí sín jehya judío. Kjuákoḥa sín kixin chrókuítóhe sín ijíé sín, la chrókjan sín chrókuinkáchónki sín Dios, la ko chrókjuakoxin sín xra jina kixin chaxín ó kjuítóxinhin sín tí nkehe tinkáchónki sín.

²¹ Mé xikaha tí xra tséxinna tí sín judío a nkaxenhen ninko la tjinkaon sín chrók'óyanna sín.

²² Ntá kjuasáyé Dios kjuínkítsana la ntoá itjén ijie tjákoḥa kaín chojni ntántsí la ko chojni ihyé la ninkehó k'uantaxíanhya kuēnte tí nkehe tsíchronka tí sín tsíchronka itén Dios la ko tí nkehe tsíchronka ch'in Moisés tsonhen,

²³ kixin t'ichjánxin its'en Cristo la ko tsoxechón ch'an inaá. Tí itén ch'an éxi ijnko xrohi ts'inkaséyanxín tí sín siín ntihi la ko tí sín siín í so nación kixin tsááxin sín.

Ch'in Pablo nixjehe ch'an ch'in Agripa kixin chrókuinkáchónki ch'an Închéni

²⁴ Mé xikaha ichro ch'in Pablo kixin kohya jie kjuasin ch'an ntá tí ch'in Festo mé itsen k'uèya ch'an kixin:

—Pablo jaha la kjá tsík'ixikján. Imá tsíkjinchekuáxian mé xikaha tsíkólókoxián —ichro ch'an.

²⁵ Ntá kjuátehe ch'in Pablo kixin:

—Jehya tsík'ixikjánna. Jaha Festo imá tjuaha. A ntá tí nkehe ntáxrjan la ijnko nkehe jina la ijnko nkehe chaxín.

²⁶ Ntihi itjen tí ch'in rey Agripa. Jehe ch'an mé jina nohe ch'an kaín tí nkehe a. Méxra tjenixjaha ch'an jnkójina kixin ó nõna kixin jehe ch'an ó nohe ch'an kaín nkehe kónhen kixin jehya ijnko nkehe imó kónhen tíha.

²⁷ Jaha, rey Agripa, zá titekávan tí nkehe tsíkjako tí sín tsíchronka itén Dios ósé? Janhan la ó nõna kixin titekávan jaha.

²⁸ Ntá kjuátehe ch'in Agripa ntáchro ch'an kixin:

—Ó antsíkoá chrokuacha chrókjuachròena kixin chrók'ónana cristiano —ichro ch'an.

²⁹ Ntá ntáchro ch'in Pablo kixin:

—Ntáxrjan kixin á isé tsoxrjanka o á séhya la Dios mé tjinkaon kixin jehya jahvá chrókuinkáchónkia ch'an. Náhi. Kjaxin tjinkaon ch'an kixin kaín nkexro tjejótinhin chrók'óna sín éxi tí janhan kjánchó xikahya chróchónta sín cadena.

³⁰ Ntá kjuixin nixja ch'in Pablo ntá k'uínkatjen tí ch'in rey, la ko kjaxin tí ch'in gobernador, la ko kjaxin tí tjan Berenice, la ko kaín xín tí chojni tjejótxajin ntiha.

³¹ Ntá kaín sín k'uaxrjenta sín la ikjo sín kíchó sín. Ntáchro sín kixin:

—Kohya jie tsíkjasin tí ch'ín a kixin chrók'uenxín ch'án la ko chrókjuak'echjinaxín ch'án ntogchiso.

³² Ntá tí ch'ín Agripa ntáche ch'án tí ch'ín Festo kixin:

—Ó nchoxon chrókjuánjuan kjuachaxin sáchrókjuí tí ch'ín a tí jehe ch'án chrókjuanchahya ch'án kixin tí ch'ín imá t'etoan sinchekitogéxín ijje ch'án —mé xíkaha ichro tí ch'ín Agripa.

27

Ch'ín Pablo sákuí ch'án chjasin Roma

¹ Ntá k'uetōan sín sátsjini nación Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'in Julio. Jehe ch'án me ijnko policía kuente tí ch'ín t'etoan Augusto César.

² Ntá k'uixenhenni ijnko ntabárcō tsíkjiixín nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjiixín chjasin Tesalónica nó estado Macedonia.

³ A ntá tí yaon chr'éxin mé kjuíjini tí puerto chjasin Sidón. Ntá ch'ín Julio mé ikjo jnkojína ch'ín Pablo ntá chjéhe ch'án kjuachaxin kixin sátsjitsjehe ch'án tí chojni chóxin ch'án ntiha kixin tsjinkítsa sín ch'án.

⁴ Ntá chr'éxin sákuíxinni chjasin Sidón. Ntá kjuíjini ijnko isla it'in Chipre la nó tja kjonni kuitohe tíha la imá chjéhe xrintō.

⁵ Ntá k'uatōyeni tí ntayaon chjinaxón chjasin Cilicia la ko Panfilia la ntá kjuíjini chjasin Mira estado Licia.

⁶ A ntá ntiha tí ch'ín capitán, tí ch'ín k'uetuēnhen tí sín soldado a, mé k'uitja ch'án í jnko ntabárcō tsíkjiixín nó chjasin Alejandría sátsji nó nación Italia. Ntá ntáchro ch'án kixin tíha sátsjikoni kixin tsjjijini ntiha.

⁷ Nchónhya yaon kjuíjixinni kixin imá iyó la imá xra kjuíjini chjino chjasin Gnido. Ntá naxa chjéhe xrintō tsankā ntá k'uátsínkani chjinaxón Salmón ntá kuinkátjixinni chjino tí isla Creta.

⁸ Ntá xíkahó imá xra k'uátsínkani chjinó chrínta ntá kjuíjini ijnko chjasin it'in Puertos Jína chjino chjasin Lasea.

⁹ Ntá k'uitjáyankí nchónhya yaon, ntá ó kjuixraká tí yaon xitjahya sátsjiko sín ntabárcō chrítaon ntayaon kixin ó kóchjina tí nchakuen kin. Méxra ch'ín Pablo nixjehe tí sín a.

¹⁰ Ntáchro ch'án kixin:

—Tinhínrá tí nkehe tsoxrjanka. T'íkuān kixin nchónhya kjuachrakon tsonhen. Sinchek'itjáyanni tí ntabárcō a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuente tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárcō la ko tí nkehe chrónka tí inché tí ntabárcō a ntá tí nkehe ntáchro ch'ín Pablo la náhí.

¹² Jehya jína kixin tí puerto ntahó chrók'uejóni ntá chrók'uatésinkajia tí nchakuen kin, ichro sín. Kaín sín kjuenkayáxin sín kixin íchá jína sátsjixinni ntiha kixin ákué xitjahya chrókjuíjini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatésinkajia tí nchakuen kin.

Tí xrintō chjéhe chrítaon ntayaon

13 Ntá kjuankíxin chjehe xr̄ntō kjuix̄in nó sur kjánchó kánhyó fuerte ntá kjuenkayáxin sín ḱxin kjá jína sátsjini.

Ntá sákjuix̄inni ntiha kjánchó kjónté nax̄a sákjuíni chjinaxón tí chr̄nta tí isla Creta a.

14 A ntá chr'éxin ikjui ijnko xr̄ntō kjuix̄in noroeste k'uúntaté tí ntabárc̄o.

15 La kjuankíxin xr̄ntō sákjuíko tí ntabárc̄o ḱxin tsjachahyani sátsjini tí sítjix̄in tí xr̄ntō a. Ntá t'ichjánx̄in kuítóheni sákjuíko xr̄ntō tí ntabárc̄o tjejóxenhenni.

16 Ntá k'uátsínkani chjino ijnko isla ntsí it'in Clauda ḱxin ntiha mé kánhyó tjian chjéhe xr̄ntō. Ntá imá x̄ra k'uítjiani tí ntabárc̄o ntsí t'et̄enix̄in nóton ntabárc̄o jíe.

17 Ntá kjuix̄in kjuínchek'it'ótjen sín tí ntabárc̄o ntsí ntá imá chrakon sín ntá kjuíncheteto sín tí ntabárc̄o jíe ḱxin kohya nkehe tsonhen. Kjax̄in tóxakonhen sín chrakon sín tsíkjine nchesen tí ntabárc̄o tí tsjiji sín tí it'in Sirte. Ntá kuakjinjin sín tí ka chóna ntabárc̄o ntá kuítóhe sín sátsjiko xr̄ntō.

18 Ntá tí yaon chr'éxin ntá nax̄a imá tjian chjéhe xr̄ntō. Ntá ik'ue sín tí nkehe sítjinká tí ntabárc̄o a chr̄nta ntayaon ḱxin kánhyó tsoye.

19 A ntá tí yaon ńxin a mé itjani ó kuakitsjex̄inni tí nkehe kuénte tí ntabárc̄o.

20 Isé k'uíkonhyani yaon la k'uíkonhyani konotsé ḱxin imá tjian chjéhe xr̄ntō la ko kjax̄in ó k'uítjáyenhenni kaín tí tjenkayáx̄inni ḱxin nax̄a chrókuaáni.

21 Ntá ó k'uatsínka itsjé yaon kjónehanyi ntá k'uínkatjen ch'in Pablo nixjeh̄e ch'án kaín tí sín tjejóxenhenni ntabárc̄o a ntáchro ch'án ḱxin:

—Chrókúitekáonrá tí nkehe x̄rjanka ḱxin chrókúítóheni tí estado Creta ntá chrók'uítjáyenhanyi tí nkehe tjinká tí ntabárc̄o a.

22 A ntá ijie la tóxakuanhyará ḱxin kohya nijnko tí jahará its'enrá ḱxin kjónté tí ntabárc̄o la ts'itjayan.

23 Ntá tí tie a mé k'uíkuan ijnko ángel tsíchr'án Dios tinkachónkia la ko t'ah̄a x̄ra.

24 A ntá tí ángel mé chrónka ḱxin: “Chrakonhya jaha Pablo. T'ichjánx̄in tsjasán tí tjen tí ch'in César t'et̄oan la kjax̄in Dios la tsjinkítsa jaha la ko tí sín tjejókoa ḱxin ts'enhya sín.”

25 Méx̄ra chróchrakonhyará jahará ḱxin tí Dios tinkachónkia la chaxín nchex̄iteyá tíha, éxí tsintáchro tí ángel.

26 Kjónté ó jehí t'ichjánx̄in sátsjikoni xr̄ntō ijnko nonte jnkosiné ntayaon —ichro ch'án.

27 Kjuix̄in k'uátsínka iyó semana ntá ijnko tie ntá kjuíjini ijnko ntayaon it'in Adria ntá sákjuíko tí ntabárc̄o ijnko lado la í jnko lado tí xr̄ntō. Ntá chjino k'áxrótjen ntá tí sín tjiko ntabárc̄o mé ó kónohe sín ḱxin ó chjina kjuix̄raká sín ijnko nonte xámá.

28 Ntá kjuáchroa sín tí nkekjain̄ n̄inkax̄in tí ntá mé chóna treinta y seis metro n̄inkax̄in. Ntá sákjuíni kjínhya la ó x̄íkjachroa sín la veintisiete metro ó n̄inkax̄in.

29 Imá chrakon sín ḱxin ts'itjaton̄ tí ntabárc̄o itjō ntá kjuinkajin sín noó chica gancho tí nóton tí ntabárc̄o a ḱxin ntaó tsochónhen tí ntabárc̄o hasta chrók'uinkaséyan.

30 Ntá tí sín tjiko ntabárc̄o kjuenkayáxin sín sáchrókjui sín ntá kjuankíxin kjuinkajin sín tí ntabárc̄o ntsí chr̄ntaón ntá éxí tjinkaon sín chrókjuinkajin sín tí gancho chóna tí kja ntabárc̄o.

31 A ntá ch'in Pablo ntáche tí ch'in capitán la ko kaín tí sín soldado ḱxin:

—A ntá tí tsitqehya tí sín i ntihi nkaxenhen ntabárcq ntá xitjahya tsaára
—ichro ch'án.

³² Ntá tí sín soldado a mé kóchrínjint'q sín tí hñq kuènte ntabárcq ntsí tsítqhe
sín tsjankí ntq.

³³ Ntá chjina t'inkaséyan a ntá ch'ín Pablo nixjehe ch'án kaín tí sín siín ntiha
ntáchro ch'an kixin chrókjóne sín ichrén nkehe. Ntáchro ch'án kixin:

—Ó k'uátsínka iyó semana k'uejóchrinhyará la ko k'jontehyará.

³⁴ Tinhínrǎ t'ichjánxin chrókjónterá ichrén nkehe tí tjínkáonrǎ tsaára kixin
ntihi la kohya nkexro ts'itjáyán la nijnko tí kaxíhi chóna kjará ts'itjáyán.

³⁵ Ntá xíkaha ichro ch'ín Pablo ntá kuákja ch'án ijnko niqtja a la ntiha tí tjejó
kaín sín ntá kjuanchia ch'án kjuasáyé Dios ntá kóchrít'q ch'án ntá kjuankixin
kjóne ch'án.

³⁶ Ntá kóchéhe sín kaín sín kjuankixin kjóne sín kjaxin.

³⁷ Kaínni tsik'ixenhenni ntabárcq mé iyó ciento setenta y seis chojni.

³⁸ Ntá kjuixin kjóne sín la kókjehe sín ntá ik'ue sín tí noa trigo a tjínká tí
ntabárcq a chrínki tí ntayaon a kixin kánhyó tsoye tí ntabárcq a.

Tí ntabárcq kjuixin k'uániánki ntq

³⁹ A ntá ó k'uínkaséyan, a ntá tí sín tjiko ntabárcq la kjuátsqanhya sín tí nonte
ntá k'uikon sín ijnko chrínta ntq. Ntáchro sín kixin ákué tsjachahya sín sátsjiko
sín tí ntabárcq ntiha.

⁴⁰ Ntá kóchrínjint'q sín tí hñq síchroéxin tí gancho kixin ntahó tsítqhe
chrínki ntayaon. Ntá kjuínchentá sín tí nkehe tjikoxín sín tí ntabárcq a.
Ntá kjuínchek'it'ótjen sín tí ka tjiko nkayakon tí ntabárcq. A ntá tí ntabárcq
kjuankixin sákjuí chrínta ntq.

⁴¹ Xrínahya kjujii ntabárcq tí iyó kójnkojiéxin ntayaon ntá ntiha kjuíkiat'ó tí
kja tí ntabárcq tí nchesen sín ntiha. Ntá í xitjahya nchekinkí ninkehó, a ntá
nóton tí ntabárcq kjuankixin síxíka kixin imá sítji chjéhe ntq a.

⁴² Ntá tí sín soldado a mé tjínkaon sín chrók'óyán sín tí sín tjejóchjina kixin
tjinkakonhya sín kixin ninkexró sáchrókjuí ókjé.

⁴³ A ntá tí ch'ín t'etueñhen tí sín soldado a mé tjínkakonhya ch'án kixin
its'en ch'ín Pablo ntá kjuanjonhya ch'án kjuachaxin. Íchá k'uetqan ch'án
kixin tí sín jína tjitaón ntq la senó sátsji sín kixin tsjiji nonte xámá

⁴⁴ La ko tí sín noehya tsjitaón ntq a mé sátsjiko sín tí ntabla q it'q tí ntabárcq.
Ntá xíkaha kaín ni kjujini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kixin tí isla la mé nchek'in sín
Malta.

² A ntá tí sín chjasin ntiha mé imá jína kjuínkítsa sín kaín ni la kjuaka
sín ijnko xrohi jié kixin imá kin kixin sít'aniá chrin. Ntá k'uèya sín kixin
tsochjinani kaín ni tsochjixroheni.

³ A ntá ch'ín Pablo mé sákjuíakja ch'án í so njo tsixámá ntá kjuasinkáte ch'án
tí xrohi a. Ntá xrínahya k'uaxrjenkixin ijnko konche tí xrohi a kixin imá sóa
ntá xrínahya k'uísímá itja ch'ín Pablo.

⁴ Ntá tí sín chjasin ntiha mé k'uikon sín tí konche kjítjjan kíjtjen itja ch'án ntá
ikjo sín kichó sín. Ntáchro sín kixin:

—Kjá tí ch'ín a la ijnko chojni tsíkjàya a kixin kjónté kuaá ch'án k'uénxinhya ch'án ntayaon la Dios la í tjinkakonhya kixin naxa tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi kixin ntiha ts'anótjen tí konche, ntá jehe ch'an la kohya nkehe kónhen ch'án.

⁶ Ntá kaín sín tjejóchónhen sín kixin ách'e ts'atjoyé itja ch'án o ách'e its'en ch'án. Ntá kjuixin k'uéjóchónhen sín isé la k'uíkon sín kixin kohya nkehe kónhen ch'án ntá kjuítóxin sín tí nkehe kjuenkayáxin sín la ntáchro sín kixin jehe ch'án mé ijnko dios tíha, ichro sín.

⁷ Ntá chjino tí k'uéjóni a mé itjen nontee ijnko ch'ín t'etqan kuènte isla me it'in Publio. Mé jína kjuanjon ch'án kjuachaxin k'uejóni ntqe ch'án la kjuanjon ch'an nkehe kjóneni iní yaon.

⁸ Ntá it'é tí ch'ín Publio a mé tjetsínka ch'án kixin níhi ch'án chóna ch'án sóa la ko chinjni. Ntá ch'ín Pablo sákjuútsjehe ch'án la kjuixin nixjehe ch'án Dios, ntá kjuák'etja itja ch'án tí ch'ín a ntá kuitqhe ch'án jína.

⁹ Mé xíkaha kjaxin kóchjina í so tí sín níhi síin tí isla ntá kaín sín kuitqhe sín jína.

¹⁰ Na ntá imá kjuikosáyehe sín ch'án. A ntá chr'éxin tió kjuixin k'uíxenhenni ntabárcq inaá ntá kjuanjon sín kaín nkehe t'ichjánxinhinni sátsjikoni.

Kjuúji ch'ín Pablo chjasin Roma

¹¹ Ntá k'uátsínka iní nítjé tjejóni tí isla ntá k'uíxenhenni ijnko ntabárcq mé ntaó tsíkitohe k'uátsinkajia tí nchakuen kin. Tí ntabárcq a mé tsíkijxin chjasin Alejandría la ko mé chóna nkehe tsíkjanqya chóna ihníé dios Cástor la ko Pólux.

¹² Ntá sákjuúni ntá kjuújini puerto chjasin Siracusa la ntaha kuitqheni iní yaon.

¹³ Ntá xík'ixenhenni tí ntabárcq la k'uaútsínkani chjinaxón tjen ijnko nonte ntá kjuújini chjasin Regio. Ntá tí yaon chr'éxin a ntá kjuankíxin chjéhe xríntq kjuixin nó sur, ntá yaon yóxin ntá kjuújini chjasin Puteoli.

¹⁴ Ntá ntiha xetani iso kíchó ni, a ntá tjinkaon sín ts'ejókoni sín ntiha. Ntá k'uéjókoni sín ijnko semana ntá chr'éxin sákjuúni chjasin Roma.

¹⁵ Ntá tí sín kíchó ni chjasin Roma la ó nohe sín kixin tsjijini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án.

¹⁶ Ntá tió kjuúji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuitqhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

¹⁷ Ntá k'uátsínka iní yaon ntá tí ch'ín Pablo a mé k'uúyehé ch'án kaín tí sín judío tjeoan kuènte chjasin Roma. Ntá tió kjuixin kójnkotsé kaín sín ntá ntáchro ch'án kixin:

—Kíchóni, kohya ninkehó jie kjuásian kixin chrókóninkakonna tí sín judío la jehya kixin ninkakonxian tí nkehe k'uékínkáchónki tí sín tsík'axrjeníxinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a.

¹⁸ Ntá k'uitjahya sín ninkehó jie chonta. Ntá tjinkaon sín chrók'uatjántana sín kixin k'uitjahya sín ninkehó jie chrók'uénxian.

¹⁹ A ntá tí sín judío a mé imá kónínkaon sín tjanchia sín jie. Ntá t'ichjánxin tsjanchiani kixin tí ch'ín César mé chrókjuinchekitogexín ch'án nkehe tí jie chóntani, kjónté chóntahyani ninkehó jie ts'eka tí sín tí nacióon kuénteni.

²⁰ Méxra k'uíyahará kixin tjinkaonni ts'íkuan tí jahará la ko tsonixjaharáni kixin tinkáchónkini tí nkexro tjejóchónhen kaín tí sín israelita mé xíkaha t'ikonrá kixin tjechrontetoxínni cadena ntihi.

²¹ Ntá ntácho sín kixin:

—K'uáyèhyani ninkehó xroon chrókjuixin Judea kuènte tí jaha la ko kuihya nijko tí sín kichó ni judío chróntácho sín ichrén nkehe jínahya tsíkji'ch'e.

²² Tjinkaonni chrókuinhinni nkexrí tjenkayáxian kixin ó noheni kixin itsjé chjasin t'ántaxínhin sín tí nkehe nixin tjákua —mé xíkaha ichro sín.

²³ Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkoté nchónhya chojni tí nchia kjuák'e ch'án. Kuénté yaon chrónka ch'án nkexrí tí kjuachaxin kuènte Dios. Nixjehe ch'án sín kixin chrókuitekaon sín tí nkehe kjuako ch'ín Jesús, la chrónkaxín ch'án kixin nkexrí nixja tí ley kuènte ch'ín Moisés la ko tí tsíkjin tí sín profeta ósé.

²⁴ Ntá iso tí sín mé kuítekaon sín tí nkehe ntácho ch'ín Pablo. A ntá í so sín na kuítekakonhya sín.

²⁵ Ntá jnkokóahya kjuenkayáxin tí jehe sín la iso sín tjinkaon sín kixin sáchrókjui sín, ntá ch'ín Pablo mé ntácho ch'án kixin:

—Ntoá nixja tí nkehe chénka Nchakuen Dios tí sín tsik'axrjeníxinni ósé chrónkaxín ch'ín profeta Isaías ntácho kixin:

²⁶ Sátjia nixjehé tí chojni a

kixin jehe sín kjónté tjejótinhin sín la tienxínhya sín,
la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha

la ntatsjon sín la tsík'ikjehe

la ikon sín la tsíchr'áto

kixin t'ikonxínhya sín

kixin tinhín sín la tjinkakonhya sín chrókuienxín sín,

la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá janhan

chrókjuintakitohá sín jína.*

Mé xíkaha tsíkjin ch'ín Isaías.

²⁸ Méxra chrókónohará jahará kixin ijie tí sín jehya judío me ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xíkaha ichro ch'ín Pablo ntá tí sín judío sákjuí sín la tinkákjo sín kichó sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjé tí sín kjuíjitsjehe ch'án.

³¹ La kjuako ch'án tí kjuachaxin kuènte Dios la ko kjuako ch'án kuènte Inchéni Jesucristo. La kohya ninkexró k'uínkákohen tió kjuako ch'án. Ó tjen.

* 28:27 28.26–27 Isaías 6.9-10

Tí xroon ikjin ch'ín Pablo chr'énhen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'ahá xrá Jesucristo mé kjian tí xroon i. Kjueyána Dios kixin sít'ahá ch'án xrá tsjákuá tí tan jína tsaáxinni.

² Tíha mé tsintácho Dios senó kixin tsoxiteyá éxi nixja tí xroon nixjaxin tí sín tsíchronka itén ch'án ósé.

³ Tí tan a mé chrónka nkexrí tjen Ìnchéni Jesucristo Xjeen Dios. Jehe ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David.

⁴ Tí kjuachaxin jé mé kjuakoxin kixin jehe ch'án mé chaxin Xjeen Dios kixin ó xechón ch'án la chóna ch'án Nchakuen Dios imá tjetóan.

⁵ Kjuasáyé Jesucristo k'uáyéheni kjuachaxin kixin sich'eheni ch'án xrá sátsjichronkaxinni itén ch'án kixin kaín xín chojni chónhya ch'án kuente chjasintajni chrókuitekaon sín ch'án la ko chrótuèhe sín ch'án.

⁶ Jahará k'uék'ejorá éxi tjejó tí jehe sín, a ntá jie la kjueyará Dios kixin chrókuitekaonrá Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuàhará Dios la kjueyará ch'án kixin tjóá chrók'uejórá. Kjuasáyé It'eni Dios la ko Ìnchéni Jesucristo kixin kjuanjón ch'án kjuaxróxin k'uayéhérá.

Ch'ín Pablo tjinkaon chrókjuitsjehe ch'án chjasin Roma

⁸ Xrankíxixin kjuachaxien Jesucristo tjánchàxian Dios kjuasáya kixin jahará ó kuitekaonrá ch'án la ko nkuíxin chjasintajni nixja sín nkexrí tinkachónkirá ch'án.

⁹ Dios, tí nkexro t'ahá xrá kaín asenná xrjanka tí tan jína kuente Xjeen ch'án, mé nohe ch'án kixin xráxin xráxinkavan tí jahará tió nixjahá ch'án.

¹⁰ Xráxin tjáncháha Dios kixin tí chrókjuanjón ch'án kjuachaxin la chrókjuasantsjahára.

¹¹ Kixin tjínkavan chrókjuasantsjahára tí jahará kixin chrókjuinkítsa tí jahará kixin chrók'uitjará jína nkexrí chrók'uejórá ntoá.

¹² Me xikaha tsöcháhará la ko tsöchàna kixin jnkokoá tinkáchónkini Ìnchéni, jahará la ko janhan.

¹³ Kíchóni, tjínkavan chrókónohará kixin nchónhya veces tjínkavan chrókjuasantsjahára kjánchó naxá xitjahya tsjasán. Tjínkavan chrókjuasán kixin chrókjuít'a xrá kuente Ìnchéni kixin chrókjuachani nchónhya chojni chrókuinkáchónki Dios éxi kjuít'a xrá í so chjasin naxá chónhya sín Dios.

¹⁴ T'ichjánxin tsjáqoha káin chojni, á chojni griego ó á chojni jehya griego ó á chojni nohe ó á chojni noehya.

¹⁵ Mé xikaha xrá ó tjéchonhan chrókjuasán chrókjuákohará tí tan tsaáxinrá tí jahará tjejórá chjasin Roma.

Tí kjuachaxin kuente tí tan jína

¹⁶ Tósuànaha xrjanka tí evangelio kixin táha ijnko tan jína kixin chóna kjuachaxin kuente Dios chrókuaáxin kaín xín tí chojni chrókuitekaon, mé saoxin tí sín judío la ko kjaxin tí sín jehya judío.

17 Kíxin tí tan jína kuènte Dios tjakuexin tí jeheni kíxin chrókótjuáxin ijíeni kíxin tinkáchónkini ch'án la jehó ch'án tinkáchónkini. Exí ntáchro xroon itén Dios kíxin: "Tí nkexro kótjóá kíxin kuítekaon sín Dios mé táhó ts'ejóchónxin sín."*

Tí jie tjasin chojni

18 Dios tjen nkaya nkajní mé tsonínkakohen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'ínkákohen kíxin chrókónohe sín tí nkehe jína chaxín.

19 Jehé sín ó nohe sín jína nkexrí tjen Dios kíxin jehé ch'án kjuakuexin ch'án tí jehé sín.

20 Tí kjuachaxin kuènte Dios kjónté t'íkonhyani la kjánchó noexínni kíxin tí nkehe kjuich'éna ch'án. Kíxin tí naxá k'ónahya chjasintajni kónoxín kíxin jehó ch'án mé Dios t'etóan la ko chóna ch'án kjuachaxin jnkochrín. La ntá tí sín jínahya xitjahya tsontáchro sín kíxin k'uénoehya sín.

21 Kjónté nohe sín kíxin xíkaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkáyáxin sín tí nkehe ninkehó sínkíhya kíxin jínahya asén sín la tí sítié ó kuítóhe sín.

22 Kjónté ntáchro sín kíxin imá nohe sín kjánchó imá lontj sín kíxin antsí kjuasin sín jie.

23 A ntá ó kjuixin kjuinkí sín tí nkehe tinkáchónki sín la ko kuítekakonha sín tí kjuachaxién Dios itjen jnkochrín, t'enhya. A ntá ijie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko íko chóna noó toté.

24 A ntá xíkaha Dios kuítóhe ch'án tí jehé sín kíxin chrókjuich'e sín tí nkehe jínahya tjenkáyáxin sín ntá xíkaha ch'e sín ijnko nkehe chrókósuèxin sín ch'ehe kíchó sín

25 kíxin kuítekakonha sín tí nkehe chaxín kuènte Dios, a ntá tí nkehe jínahya mé kjueyá sín. Kjuich'éna sín dios kuènte sín tí nkehe tsíkjach'éna Dios. A ntá tí nkexro kjuich'éna tí nkehe la titekakonha sín. Jehé ch'án mé chrókjuancheheni ch'án kjuasáya jnkochrín kíxin jehé ch'án mé kain tí nkehe sín mé kuènte ch'án. Amén.

26 La ntá xíkaha kjuich'e sín ntá Dios kuítóhe ch'án tí jehé sín kíxin chrókjuich'e sín tí nkehe chrókósuèxin sín chrókjuich'e sín. Kjónté tí chojni chjin la kuítóhe sín tí ichjin sín la ntá kjuich'éna sín asén sín chojni ntoá.

27 A ntá kjaxin xíkaha tí chojni ntoá kuítóhe sín chróchóna sín chojni chjin la tjínkaon sín tí nkehe ntoáhya. La ntá ch'e sín nkehe chrókósuèxin sín ch'ehe kíchó sín jnkókón ntoá sín. Mé xíkaha mé tí cuerpo kuènte sín mé tsjasótéxin sín tí jie kjuasin sín.

28 Tjinkakonha sín tsoxraxínkaon sín Dios ntá jehé ch'án mé kuítóhe ch'án tí jehé sín kíxin xíkaha tsjenkáyáxin sín tí nkehe jínahya kíxin sich'e sín tí nkehe chrókjuich'ehya sín.

29 Nchónhya jie chóna sín mé tí nkehe ntoáhya ch'e sín, la tjínkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjínkaon sín jehó sín chróchóna sín itsjé nkehe, la ko imá tjasin sín jie, la ko jehé sín chjinoxínhin sín, la ko tjínkaon sín chrók'óyán sín kíchó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia.

* 1:17 Habacuc 2.4

³⁰ T'ántaxínhjin sín kichó sín la ko nínkakonhen sín Dios, la ko jehó sín chrók'ueŕtoan sín, la ko nchehnke sín, la ko jehó sín ch'éna sín nkehe jínahya tjasixín chojni jje, la ko tjikosáyehya sín it'é sín la ko iné sín.

³¹ Tienxínhya sín la nchexiteyáhya sín nkehe nixja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichrén jje kjuasinhin kichó sín, la ko tikonóehya kichó sín.

³² Jehé sín ó nohe sín jína kixin nkexri k'ueŕtoan Dios la jehé sín ó nohe sín kixin tí jje kjuasin sín chrók'uenxín sín, la kjónté xikaha ó nohe sín, la naxa tjasin sín jje la kjaxin chéhe sín chrók'uiikon sín ókjé nkexro chrókjuasin jje xikaha.

2

Dios nchekitoexín ch'án tí jje tjasin chojni

¹ Mé xikaha jahará xitjahya tsontáchrora kixin chontahyará jje a ntá tékará jje tí í so sín tjasin jje. A ntá tí xikaha ch'erá la jahará xritjéyará nkexri chrókjuasótexínrá kjaxin kixin jahará jnkokón jje tjásinrá.

² Ó noheni kixin ntoá sinchekitoexín Dios tí jje kjuasin chojni kixin sinchekjasóte ch'án tí sín xikaha tjasin jje.

³ A ntá jahará la tékará jje í so chojni ntá jahará kjaxin la xikaha jnkokón jje tjásinrá. ¿Á tjenkayáxinrá kixin tsjachará tsinkehérá tí sinchekjasótiará Dios ní?

⁴ ¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naxa ninkakuanhyará ch'án? A ntá jahará la kuiéxinhyará kixin Dios tjuàhará kixin tjinkaon ch'án chrókuitohérá tí nkehe jínahya tjenkayáxinrá.

⁵ Kjánchó jahará imá icha asánrá, tjinkákonhyará chrókuitohérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótexínrá tí yaon tsjixixín tió tsonoxín kixin sinchekjasóte Dios chojni.

⁶ Jehé ch'án mé tsjenkehe ch'án jnkojnko chojni nkehe tí xra tsíkjich'e sín.

⁷ Tsjanjon ch'án kjuachón ts'áyéhe tí sín tjejá sín tí nkehe náxrjón la ko tí kjuachaxin ts'itjáyanyha la ko xráxin kjuich'e xra jína.

⁸ A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhí, la íchá má kóxrjínhjin sín kjuich'e sín tí nkehe jínahya.

⁹ Mé xikaha tsjasóte sín la ko kjuaxróxinhya tsonhen kaín tí sín kjuich'e tí nkehe jínahya, mé senó tí sín judío la ko kjaxin tí sín jehya judío.

¹⁰ A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuich'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínkí.

¹² Kaín tí sín tjasin jje kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jje, la tí ley a mé tsjanchia jje tsjasótexín sín.

¹³ Jehya tí sín ó chrókuinhón tí ley la ó chrókótjuáxin ijje sín. Náhí. Tí sín sinchexiteyéhe sín tí nkehe k'ueŕtoan Dios mé tsotjuáxin ijje sín.

¹⁴ A ntá tí sín jehya judío chóntahya sín tí ley t'etuñhen sín la ntá tió jehó sín chrókjuinchexiteyéhe sín éxi nixja tí ley la jehí jehó sín t'etuñhen asén sín.

15 Kíxin tí kjuínchexiteyá sín ch'e sín tí nkehe jína mé tjákoḁjín sín kíxin ásén sín xraxinkakonxín sín tí nkehe ntoá la ko ásén sín tjanchankíhi sín á jína tjejó sín o náhi.

16 Itsi tí yaon la Dios mé sinchekitḁexín kjuachaxin Ìnchéni Jesucristo kaín nkehe imó kjuich'e chojni éxi nixja tí tan jína tjákua janhan.

Tí sín judío la ko tí ley tsíkjin ch'ín Moisés

17 A ntá jahará ntáchrórá kíxin jahará judíorá la tinkachónkirá tí ley tsíkjin ch'ín Moisés la ko nchehnerá kíxin tinkachónkirá Dios.

18 Ó nohará tí nkehe tjinkaon Dios la ko tí ley ó kjuákoḁhará kíxin chrókjuéyará tí nkehe jína.

19 Ihnkerá kíxin nohará tsjákohérá tí sín t'ikonhya la ko jahará mé xrohi ts'ínkáséyanxín tí sín ixri sítíe, ichrorá.

20 Ntáchrórá kíxin nohará tsjákohérá tí sín noehya la ko tsjínkĩtsará tí sín tienxínhya kíxin jahará chontará tí ley chrónka kjuaxrexinkaon jína la ko tí nkehe chaxín, ichrorá.

21 Jahará tjákohérá í so chojni, a ntá jahará, ¿nkekuènté tjákoéhyará ásánrá xíkaha? Jahará tjákohérá chojni kíxin chrókueéhya sín, a ntá jahará la, ¿nkekuènté teerá?

22 Ntáchrórá kíxin xitjahya tsochóna chojni yaá chojni chjin, a ntá jahará la, ¿nkekuènté xíkaha ch'erá? Ntáchrórá kíxin titekákonhyará tí nkehe tsíkjanoya, kjánchó jahará, ¿nkekuènté teerá tí nkehe tjete síin nkaxenhen nínko?

23 Nchehnerá kíxin chontará tí ley, a ntá jahará chontahyará kjuasáyé Dios kíxin kjuínchexiteyéhyará éxi k'uetḁan tí ley.

24 Ntoá ntáchro tí xroon itén Dios kíxin: “Tí sín jehya judío la t'ántaxínhjin sín Dios kíxin tí ijjárá.”

25 A ntá tí chaxín kjuínchexiteyará tí ley tsíkjin ch'ín Moisés la ntá jehya chónkó tsíkará xroye. A ntá tí kjuínchexiteyéhyará tí ley la éxi tsíkahyará ninkehó xroye.

26 A ntá tí sín tsíkahya xroye kjánchó titekaon sín nkexri t'etḁan tí ley la tjejó sín éxi ó tsíka sín xroye kjónté chaxínhya chóna sín.

27 A ntá tí nkexro kuáhya xroye tí cuerpo chóna kjánchó nchexiteyéḁe tí ley, mé jehe sín tsjanchia sín jiḁe tí jahará kíxin jahará kuítekákonhyará kjónté chontará tí xroon nixja tí ley la ko kjónté ó tsíkará xroye.

28 A ntá tí xíkaha la chaxínhya judío jahará kíxin ó ntója ó chontará xroye la chaxínhya tsíkará xroye kíxin chrítaón cuérporá ó, chontará.

29 A ntá tí chojni chaxín judío la t'ichjánxín chróchóna sín xroye nkaya ásén sín. Jehya tí ley chrók'uetḁan xíkaha chrókonhen. Náhi. Táha la Nchakuen Dios. Jehya kíxin chojni chrókórxjínhjin kíxin ó nchḁoxon. Náhi. Dios mé tsḁrxjínhjin kíxin nchḁoxon tíha.

3

1 ¿A ntá nkehe tsonhen kíxin ntáchro sín kíxin judío sín la ko nkehe tsonhen kíxin tsíka sín xroye?

2 Chaxín xíkaha jína kíxin Dios kjuanjón tí itén ch'án saḁoxín k'uáyéḁe tí sín judío kíxin chrókjuínchexiteyá sín.

3 A ntá ¿nkehe tsonhen tí jnkojín tí jehe sín chrókjuínchexiteyáhya sín? Kjónté xíkaha chrókjuich'e sín la, ¿á chrókuítḁe Dios chrókjuínchexiteyáhya ch'án tí nkehe tsintáchro ch'an?

4 Kjá náhí. Dios la sinchexiteyá kaín nkehe tsíntáchro ch'án kjónté kaín chojni chrókjuich'ia. Ntáchro xroon itén Dios kixin: Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie.*

5 Tí jie chóntani mé tjakoxin kixin Dios mé nohe nkexrí sinchekitqexín ch'án ijíé chojni. ¿A ntá nkehe chróchroni? ¿Á ntoáhya chrókjuich'e Dios kixin chrókjuinchekjasóteni ní? (A ntá janhan nixja éxí nixja chojni ó.)

6 Kjá náhí. A ntá tí jehya ijnko nkexro jina tí jehe ch'án, ¿ntá nkexrí chrókjuinchekitqexín ch'án ijíé chojni chjasintajni?

7 A ntá tí chrókjuínkítsa tí kjuach'ia kuèntana kixin chróónoaxínrá tí nkehe chaxín kuènte Dios, ¿a ntá nkekuènté ts'ékaráni jie kixin janhan mé ijnko chojni chóna jie?

8 Tí xíkaha la, ¿á chrókjuich'eni tí nkehe jínahya kixin ntá chrókui tí nkehe jina? Mé xíkaha ichro iso chojni t'ekani jie kixin xíkaha tjakoni, ichro sín. Tí sín a chrókjuasóte sín kixin xíkaha ichro sín.

Kaíni chóntani jie

9 ¿Ntá nkexrí? Jeheni judíoni la, ¿á antsí má tjeoanni, a ntá tí sín í so la, á náhí? Kjá náhí. Kixin kaín ni chojni judíoni la ko tí sín jehya judío mé kaín ni kjuínchexiteyéheni tí jie kjuasinni.

10 Ntáchro tí xroon itén Dios kixin:

Kohya ninkexró chrókjuich'e tí nkehe jina, la kohya nijnko chojni.

11 Kohya ninkexró tienxín,

Kohya ninkexró chrókjuéyá Dios.

12 Kaín chojni k'uék'aji sín tí ntja jínahya la ko kaín chojni jnkokón k'uáji sín ntoáhya,

kohya ninkexró chrókjuich'e tí nkehe jina la kohya nijnko chojni.†

13 Tí isin chojni la éxí tóye tsíxrankehe tsíxravá chojni

kixin tí nejen chojni ch'iyaxín.

La tí veneno kuènte konche chóna ir'va chojni.‡

14 Tí ir'va chojni tsíkaón nkehe jínahya la ko kjuanínkaon.§

15 Xritinká sín kixin tjinkaon sín chrók'óyán sín chojni.

16 Tí ntja k'uáji sín tíó xíkaha kjuích'e sín mé kjuínchek'itjayan sín kaín kjuaxróxin k'uéchóna ókjé chojni.

17 Chónhya sín tí ntja tjanjon kjuaxróxin*

18 Kixin kjuenkayáxinhya sín chróchrakonhen sín Dios.†

Mé xíkaha ntáchro itén Dios.

19 Ó noheni kixin kaín tí nkehe nixja tí xroon chóna tí ley mé k'uètuènen kaín tí sín tinkáchónki tí ley kixin ntá kaín chojni chjasintajni chrótáni sín kixin kaín chojni tsjasóte kixin Dios mé sinchekitqexín ijíé kaín chojni.

20 Kixin ninkexró chrókjuacha chrókótjuáxin ijíé sín kixin chrókjuinchexiteyéhe sín tí nkehe t'etoan tí ley. Tí ley la jehó ch'e xra tsqnoexínni kixin chóntani jie.

Tsaáxinni kixin tinkáchónkini Cristo

21 A ntá jehya tí ley chrókuaáxinni. La ntá ó kónoxín nkexrí Dios tsaáxinní la kjaxín tí xroon chóna ley la ko tí nkehe nixja tí sín profeta la ó nixja xíkaha.

* 3:4 Salmo 51.4 † 3:12 3.10-12 Salmo 14.1-3, Salmo 53.1-3 ‡ 3:13 Salmi 5.9, 140.3 § 3:14 Salmo 10.7 * 3:17 Isaías 59.7-8 † 3:18 Salmo 36.1

²² Tsotjuáxin ijjéni kixin titekaonni Jesucristo kixin kaín chojni chrókuaáxin tí tsitekaon sín tí jehe ch'án kixin t'ikon ch'án kixin jnkokón tsjehe kaín chojni.

²³ Kixin kaín xín chojni kjuasin jie la k'uáyéhya sín tí kjuachaxin chrókuaáxin sín.

²⁴ A ntá kjuasáyé Dios kixin k'uenyákonhenni Cristo Jesús la kótjuáxin ijjéni.

²⁵ Dios mé ichr'án ch'án Cristo, kuamá ijjéni, k'uenyákonhenni ch'án kixin chrókuinkáchónkini ch'án ntá chrókuaáxinni. Mé xikaha kjuích'e Dios kixin kjuakoxin ch'án kixin ntoá kjuenkayáxin ch'án kixin kónínkakonhya ch'án kjónté nchónhya jie tsikjasinni senó.

²⁶ Xikaha kónhen kjuakoxin Dios kixin jina ch'án ijie la naxa tjechónhen ch'án sinchetjóá ch'án ijjé tí sín kuítekaon Jesús.

²⁷ A ntá ¿nkekuènté chrókjuinchehnkeni? Xitjahya sinchehnke chojni nkayakon Dios kixin jehya kixin kjuínchexiteyéheni tí nkehe k'uetóan tí ley ntá chrókuaáxinni. Náhí. Kixin Ìnchéni kuítekaonni ntá kuaáni.

²⁸ Mé xikaha ó noheni kixin tsotjuáxin ijjéni tí tsitekaonni Dios kixin Dios tahya cuenta á kjuínchexiteyéheni tí nkehe k'uetóan tí ley.

²⁹ ¿Xá Dios mé kuènte tí sín judío? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío.

³⁰ Kixin kohya í jnko Dios la jehe ch'án sinchetjóá ch'án ijjéni kixin tinkáchónkini ch'an la tahya ch'an cuenta á chóntani xroye o náhí.

³¹ A ntá tí tinkáchónkini Ìnchéni, la ¿á í chrókjuinchehiteyáhyani tí ley? Kjá náhí. Íchá antsí má jina chrókjuinchehiteyéheni tí ley.

4

Tí kjuakoxin ch'in Abraham

¹ ¿Nkehe tsixroni kixin nkehe k'uitja ch'in Abraham, tí nkexro k'uaxrjeníxinni ósé?

² Ntá ch'in Abraham tí chrókótjuáxin ijjé ch'án kixin tí xrá kjuích'e ch'án ntá chrókóhnke ch'án, kjónté jehya nkayakon Dios.

³ A ntá ntá chro xroon itén Dios kixin: "Ch'in Abraham kuítekaon Dios ntá táhó kuaáxin ch'án la ko kótjuáxin ijjé ch'án."*

⁴ Jnkojín chojni kjuích'e xrá la jehya k'uáyéhékoá ch'án tí chichaon. Náhí. Táha la tí xrá kjuích'e ch'án mé kjuacha ch'án.

⁵ A ntá kjónté jnkojín chojni kjuích'ehya ninkehó xrá ntá chrókuitekaon ch'án Dios á ntá Dios la sinchetjóá ch'án kjónté tí nkexro chóna jie, kixin tí kuítekaon ch'án Dios la táhó mé kuaáxin ch'án.

⁶ Mé kjaxin tsintá chro ch'in David kixin náxrjón tí nkexro kótjóá kixin Dios kuáhya kuéntá nkerí jie tsikjasin ch'án.

⁷ Ntá chro ch'in David kixin:

Náxrjón tjejó tí nkexro kjuíncheyaon Dios kjónté jínahya kjuích'e sín la kjuakjìn ch'án ijjé sín.

⁸ Náxrjón tjejó tí nkexro kixin Ìnchéni kuáhya ch'án kuéntá tí jie k'uéchóna sín.†

⁹ ¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chóntahya xroye? Ó chrónkani kixin Dios la kuikonóhēhē tí ch'in Abraham kixin kuítekaon tí jehe ch'án la táhó mé kótjuáxin ijjé ch'án.‡

* 4:3 Génesis 15.6 † 4:8 4.7-8 Salmo 32.1-2 ‡ 4:9 Génesis 15.6

10 ¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naxa náhí? Kjá naxa náhí. Senó tsíkjincheyaon Dios tí jehe ch'án.

11 Ntá chr'éxin ch'ín Abraham ikuá ch'án tí xroye éxi ijnko sello kjuakoxin Dios kixin ó kótjuáxin ch'án kixin kuinkáchónki ch'án Dios. Kixin ntá xíkaha ts'óna ch'ín Abraham xjeen kaín chojni tinkáchónki Dios, kjónté chojni tsíkaha xroye. Ntá kjaxin jehe sín la Dios sinchetjóá ijíé sín.

12 La ko jehe ch'ín Abraham mé ts'axrjeníxin ch'án kaín tí sín tsíka xroye kixin ntá chrókuinkáchónki sín éxi kuinkáchónki tí jehe ch'án kjónté naxa tsíkaha ch'án xroye.

Tí nkehe tsíntáχρο Dios la tsoxiteyá kixin tinkáchónki sín tí jehe ch'án

13 Dios tsíntáche ch'ín Abraham kixin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya kixin kuítekaon ch'án tí ley. Náhí. Ts'áyéhe ch'án tíha kixin kuítekaon ch'án Dios la ntá Dios mé kjuínchetjóá ijíé ch'án.

14 A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xíkaha la ko tí nkehe tsíntáχρο Dios la kjá ninkehó sínkíhya tí xíkaha.

15 Kixin tí ley la tjíkəo kixin tsjasótéxin chojni, a ntá tí chrókókohya ley la chrókókohya nkehe chrókjuanchia jje.

16 Méxra tí nkehe tsíntáχρο Dios la kjuasáyé ch'án tsjanjon ch'án kixin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhí. Kjaxin tí sín tsitekaon éxi kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni.

17 Éxi nixja xroon itén Dios kixin: “Janhan kjuánjuan kjuachaxin kixin jaha ts'óna it'é nchónhya chojni chjasintajni.”⁸ Mé xíkaha tjetsjehe Dios kixin jina kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etəon ch'án kixin ts'óna tí nkehe naxa kohya.

18 Kjónté k'uéchóntaha ch'ín Abraham xjeen ch'án la kuítekaon ch'án la chónhen ch'án kixin ts'óna ch'án it'é nchónhya chojni éxi tsíchronka Dios kixin xíkaha nchónhya chojni ts'axrjeníxin ch'án.

19 Ch'ín Abraham k'uéchónta ch'án chjina ijnko ciento nánó la kjánchó k'uítjáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kixin naxa chróchónta sín xjeen sín.

20 Ch'ín Abraham la kóxakuenhya ch'án la ko chrakonhya ch'án kixin tí nkehe tsjanjon Dios. Náhí. Íchá antsi má kuinkáchónki ch'án Dios la ko kjuanchehe ch'án kjuasáyé Dios.

21 Ó nohe ch'ín Abraham kixin Dios chóna kjuachaxin sinchexiteyá kaín nkehe tsíntáχρο ch'án.

22 Dios k'uíkəon kixin jehe ch'ín Abraham kuítekaon ch'án ntá Dios kjuínchetjóá ijíé ch'án.

23 La jehya kixin tsík'óna tí xroon kixin tí ch'ín Abraham ó.

24 Náhí. Tsíkjin sín xroon kixin kjaxin jeheni chrókótjuáxin ijíéni kixin tsitekaonni Dios. Tíhi mé tí nkexro kjuínchexechón Íncheni Jesucristo.

25 Jehe ch'án mé k'uenyákonhenni ch'án kixin tí jje chónani. Ntá xechón ch'án inaá kixin tsotjuáxin ijíéni kixin ó kuítekaonni tí jehe ch'án.

5

Kótjuáxin tí jię chóntani

¹ Kótjuáxin tí jię chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo.

² Kjuasáyé Cristo kixin jína tsochjineheni Dios kixin tinkáchónkini ch'án ntá ts'áyéheni kjuachaxin kuente ch'án. Ntá tí kjuachaxin la jína tsjinkitsa kixin jína ts'ejóni la ko tsöchéheni ts'ejóchónhenni kixin ntá tsjintaxín ts'áyéheni tí kjuachaxin jię kuente Dios.

³ Kjaxin jehya táhó. Náhi. Kjaxin tsöchéheni kjónté nchónhya nkehe tsonhenni kixin ó noheni kixin xikaha tsonhenni kixin ntá ts'itjani tsonínkakonhyani.

⁴ A ntá tí xikaha jína chrók'uejóni ntá tsjachani kixin jína ts'ejóchónhenni.

⁵ A ntá tí tjejóchónhenni la tósuèhyani kixin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kixin tí jię chóntani.

⁷ Kjá ninkexró chróntáchro chrók'uenyákonhén sín í jnko chojni kjónté ijnko chojni imá jína tjuèhe kichó. Kohya nkexro xikaha chrókjuich'e.

⁸ A ntá Dios mé kjuakoxín kixin imá tjuèheni ch'án kixin kjónté naxa chóntani jię la Cristo k'uenyákonhenni.

⁹ A ntá Dios mé kjuínchetjuáxin ch'án ijíeni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótéxinni.

¹⁰ Kjónté naxa k'uénínkakonhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án.

¹¹ La jehya chrókótíhó. Kjaxin tsöchéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxínni kjuaxróxin tí tjen Dios.

Adán la ko Cristo

¹² Mé xikaha ó jnko nkexro kjuasin jię ntá k'uíxin jię kuente chjasintajni. Mé xikaha kjuankixin k'uén chojni ntá kaín chojni kjuankixin k'uén kixin kaín sín kjuasin sín jię.

¹³ Kixin ósé la k'uékohya ley ntá ó xráxin k'uíxin jię chjasintajni kjánchó naxa kohya ley chrókjuanchia jię chrókjuasótéxín sín.

¹⁴ Desde kjuák'e ch'ín Adán hasta kjuák'e ch'ín Moisés la k'uéchónta kjuachaxin tí kjuach'én kixin tí jię kjuasin sín mé k'uénxín sín. Kjánchó tí jię kjuasin sín la yóghya tí nkehe kjuich'e ch'ín Adán, kuítekakonhya ch'án tí nkehe k'uetqan Dios. Ntá ch'ín Adán yóhe tsotsjehe éxi tí nkexro tsí chr'éxin.

¹⁵ Ntá tí jię kjuasin ch'ín Adán la xitjahya chrókóyóhe tí nkehe tsjanjon Dios kixin tí jię kjuasin jnkokoá chojni la ntá nchónhya chojni k'uénxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jína tíha kixin tsaáxin nchónhya chojni.

¹⁶ A ntá tí jię kjuasin jnkokoá chojni la tóyóghya tí nkehe tsjanjon Dios tsaáxinni. Kixin tí jię kjuankixin kjuasótéxín chojni kixin kjuasin jnkokoá chojni jię. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jię chóntani kjónté nchónhya jię kjuasin chojni.

¹⁷ Tí kjuach'én la k'uéchónta kjuachaxin kixin tí jię kjuankixixín kjuasin jnkokoá chojni. A ntá kjuasáyé Dios kjuínchetjóá ch'án tí jię chóntani la

ntá antsí tsochóntani kjuachaxin ts'ejóni jína kixin k'uenyákonhenni jnkokoá nkexro, mé Cristo tíha.

¹⁸ A ntá tí jie kjuasin ch'in Adán la ntá kaín chojni kjuasin sín jie chrokjuasótexín sín. A ntá ijie la Cristo mé kótjuáxin ijie kaín chojni kixin tí jína ch'án k'uenyákonhenni ch'án.

¹⁹ Mé xikaha kuítekakonhya jnkokoá chojni, mé Adán tíha, ntá nchónhya chojni kjuasin jie. A ntá jnkokoá nkexro jína kuítekaon kjuakoxín, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jie.

²⁰ Ikui tí ley kuínhin sín ntá kónoxín kixin íchá antsí kjuasin sín jie. A ntá antsí k'uúxin jie la kjónté xikaha la antsí má kuikonóeheni Dios kixin jehe ch'án tsjinkitsani ch'án tsaáxinni.

²¹ Mé xikaha tí jie k'uúxin k'uéchónta kjuachaxin kjuikao kjuach'én chrók'uexxíni. A ntá kjuasáyé Dios kjaxin antsí má chóntha ch'án kjuachaxin sinchetjóá ch'án tí ijieni la ko tsjanjon ch'án kjuachón jnkochrixín kixin Inchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jie ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jie kixin ntá Dios naxa chrókjuakoxín ch'án kixin chrókuikonóeheni ch'án?

² Kjá náhi. A ntá jeheni la éxi chojni tsík'en chrokjuahya tsjasin jie. ¿A ntá nkekuènte naxa chrókjuasinni jie ínaá?

³ ¿Á noahyará jahará kixin tí kuíkiteni kixin tinkáchónkini Cristo la yóhe k'uénkoni ch'án?

⁴ Tí kuíkiteni la éxi yóhe xravákoni Cristo la ko tsík'enkoni ch'án kixin ntá ó xechónni ntá chrók'uajini ijnko ntja nixin mé xikaha Cristo xechónxin ch'án tí kjuachaxin jie chóntha tí It'é ch'án.

⁵ Kixin tí chaxín k'uexxíni éxi ik'uén tí jehe ch'án la ntá kjaxin tsoxechónni éxi xechón tí jehe ch'án.

⁶ Ó noheni kixin nkexrí k'uejóni senó mé táha mé k'uexxín Cristo kjuák'enkánixín ch'án ntacruz kixin ntá chrók'uitjáyanxín kaín tí jie k'uékjasinni kixin ijie í chrókjuinchexiteyèhyani tí jie.

⁷ Tí nkexro ó k'uén la ntá ó kuítqhe tí jie.

⁸ A ntá jeheni tí k'uexxíni Cristo la ó noheni kixin ts'ejókoni tí jehe ch'án.

⁹ Kixin ó noheni kixin Cristo jnkokoá vez xechón ch'án a ntá í ts'enhya ch'án ínaá kixin tí kjuach'én í chóntahya kjuachaxin kixin naxa ts'óyán tí jehe ch'án.

¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijieni. Ntá xechón ch'án ijie kixin tsjak'eko ch'án Dios.

¹¹ A ntá kjaxin jahará chrókjuenkayáxinrá kixin ik'uénrá, xitjahya tsjásinrá jie kixin ntá ijie la xíxechonrá chrókjuich'eherá xrá Dios kixin tinkachónkirá Cristo Jesús, mé Inchéni tíha.

¹² Méxra chrókuítqéhyará kixin chrókjan tí jie chrók'uetuenhen tí cuérporá ínaá kixin tí jie chrók'uetqan kixin chrókjuinchexiteyéhérá tí nkehe tjenkayáxinrá.

¹³ Tjánjonhyará tí cuérporá kixin chrók'óna nkehe chrókjuásixínrá jie. A ntá íchá jína chróchjehérá asánrá Dios éxi ijnko chojni tsík'en ó xíxechón ínaá. Chjehérá Dios tí cuérporá ts'óna ijnko nkehe sich'exín ch'án xrá jína.

14 Kíxin tí jię la í chónthaya kjuachaxin ts'etueñhen tí jahará. Jehya tí ley ts'etqan ijie. Náhi, jehó kjuasáyé Dios.

Kjuíncheyóęxin ch'ín Pablo nkexrí tí chojni ch'exón xřą

15 A ntá ijie ģnkexrí? ģA chrókuasinni jię kíxin í t'etueñhyani tí ley? Kjá náhi. Kjuasáyé Dios tsaáxinni la kjá í chrókuasinhvani jię.

16 Jahará ó nohará jına kíxin tí sich'ehe ni ijnko lámo xřą la tsitekakonhenni ch'án la tí xıkaha la t'ichjánxin ch'ehe ni xřą tí lámo la t'ichjánxin sinchexiteyéhe ni ch'án. Mé xıkaha tónhen tí naxa sinchexiteyéhe ni tí jię la táha mé ts'énxínni. A ntá tí tsitekaonni Dios la mé chrók'uejóni jnkojına.

17 Jahará la óse k'uékjásinrá jię, a ntá ijie kjuasáyé Dios kuikonóahará ch'án kíxin kaín asánrá kuítekáonrá tí nkehe xrakohará.

18 A ntá ó kuítóhérá tí k'uékjínchexiteyéhérá tí jię. A ntá ijie ó kjuánjonrá asánrá kíxin sich'erá xřą jına kuente Ìnchéni.

19 A ntá jie nixjā éxi ijnko chojni ó kíxin jahará la tiénxinhvárá jına tí nkehe i. A ntá xıkaha tí senó kjuínchexiteyéhérá tí nkehe ntoáhya la ko jínahya kíxin sich'erá tí nkehe jínahya. A ntá ijie la xıkaha chrókuánjonrá tí cuérpo kuéntará kíxin chrókuich'exínrá tí xřą jına éxi tjinkaon Dios kíxin ntá jehe ch'án chrókuínchetjóará ch'án.

20 A ntá tí jahará tió naxa kjuínchexiteyéhérá tí jię la ntá xitjahya sich'erá tí xřą jına ntoá.

21 ģA ntá nkehe chrókuachará kíxin xıkaha kjuich'erá tí nkehe chróksuáxinrá ó? Ntá xıkaha kjuéyará tí nkehe ts'énxínrá ó.

22 Na ntá ijie ó kjuin tí nkehe k'uék'etuanhanrá k'uékjásinxínrá jię. A ntá ijie ch'eherá xřą Dios. Táha la tsjinkítsa kíxin ts'ejoxínrá jına kíxin ntá tsjixixín tsotjuáxinrá ts'ayéhérá kjuachón jnkochríxín.

23 A ntá tí chrókuasinni jię la chrókuachani kíxin éxi chrók'uenni ó. A ntá tí nkehe chrókuínchetjónhenni Dios la kjuachón jnkochríxín kíxin tinkáchónkini Ìnchéni Cristo Jesús.

7

Kjuíncheyóęxin ch'ín Pablo kuente tí sín tsikótehe

1 Kíchóni, jahará ó choxinrá tí ley la ó nohará kíxin tí ley chónthaya kjuachaxin ts'etueñhen tí chojni naxa tjejóhón ó.

2 Tíha mé ts'axrxjén éxi ijnko chojni chjin tsikótehe la tí xii tjan chónthaya kjuachaxin ts'etueñhen tjan kíxin naxa tjechón ch'án. A ntá tió tsík'en tí xii la ntá tí tjachjin la ó kuítóhe tí k'uék'etueñhen ch'án tjan.

3 A ntá tí jehe tjan chrókuakja í jnko chojni ntoa tí naxa tjechón xii tjan la ó chrókuasin tjan jię. A ntá tió tsík'en xii tjan la jehe tjan la ó kuítóhe tí k'uék'etueñhen ch'án tjan la jına tsotehe tjan í jnko chojni ntoa la jehya jie tíha.

4 Mé xıkaha jahará kichó ni mé k'uenyákonhenni Cristo la ntá jahará la éxi tsík'enrá kíxin í t'etuanhyará tí ley la éxi chrókuákjárá í jnko xiará la mé xıkaha tinkachónkirá Cristo. Cristo mé xechón ch'án inaá kíxin ntá jına chrókuich'ehe ni xřą Dios.

5 Tió naxa k'uékjásinni jię a ntá tí ley chrókuich'e xřą kíxin chrókuasinhvani jię, a ntá íchá antsí má kjuasixínni jię tí cuerpo kuénténi, la táha mé kjuixín tí ts'énxínni.

⁶ A ntá ijie la éxí yóhe ik'ueñni, a ntá tí ley chóntahya kjuachaxin naxa ts'etueñhenni. A ntá ijie í kohya nkehe t'inkákonhen kixin jína sich'eheni xra Dios kixin k'ónani ijnko chojni nixin kixin tí Nchakuen Dios k'uáyéheni. A ntá í t'etueñhyani tí ley ntaxin tsik'óna.

Tí jie naxa chonta

⁷ A ntá tí xikaha la, ¿nkehe chróchroni? Kixin tí ley la, ¿á jie táha ní? Kja náhi. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kixin tí nkehe ókjé chrókjuakéhya asenná tí chróchrónkahya tí ley kixin chrókjuakéhya asenná tí nkehe ókjé.

⁸ A ntá tió kónona tí ley a ntá tí jie antsí kjuacha k'uetqan. La ntá k'uixin kaín nkehe ntáchro asenná. A ntá tí chrókohya ley la chrókónoxínhya tí jie chrók'uenxian.

⁹ A ntá tí ósé la nonahya nkehe tí ley. A ntá tió ñona nkehe tí ley, a ntá antsí kjuásian jie la ntá ó ñona kixin tí jie kjuásian me ts'énxian.

¹⁰ Mé xikaha kónhen kixin tí ley chrókjuanjon kjuachón ntá kjuikao tí ts'énxinni.

¹¹ Ntá tí jie mé kjuacha k'uetqan kixin sintaxiteyáhya tí ley. A ntá tí ley mé kjuanchia jie ts'énxian.

¹² Mé xikaha tí ley la chaxín jína la ko tí nkehe t'etqan Dios la kjaxin jína.

¹³ Mé xikaha tí nkehe jína la ¿á táha chrók'uenxian? Kjá náhi. Tí jie kjuásian mé ts'énxian. Mé xikaha kjuakoxin tí nkehe jie kixin tsonoxín tí jie kixin tí ley la jína. Mé xikaha kjuakoxin tí ley kixin tí jie tjasin chojni mé imá jínahya tíha.

¹⁴ Ó noheni kixin tí ley la kuente Dios tíha. A ntá janhan la kjuintaxiteyáha tí ntáchro asenná kixin tí jie kjuacha k'uetuanna.

¹⁵ A ntá tí janhan la tí nkehe tjet'a la kjaxin naxa tjanxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a.

¹⁶ A ntá tí nkehe tjínkakonhya chrókjuít'a la tíha me it'a la mé xikaha tjátsoanxián kixin tí ley la jína.

¹⁷ A ntá jehya janhan it'a tíha. Náhi tí jie chonta mé ch'e tíha.

¹⁸ Kixin janhan ó ñona kixin tí ntáchro asenná la kohya nkehe jína chrókjuít'a. Tjínkavan chrókjuintaxiteyá tí nkehe jína kjánchó tjachahya sit'a tíha.

¹⁹ T'ahya tí nkehe jína chrókjuít'a. Tí nkehe jínahya tjínkakonhya chrókjuít'a mé it'a.

²⁰ A ntá tí it'a tí nkehe jínahya tjínkakonhya chrókjuít'a la ntá jehya janhan it'a tíha. Náhi. Tí jie chonta mé ich'e tíha.

²¹ Tónona tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya.

²² Kjonté xikaha la tóxrjìna chrókjuintaxiteyáha tí ley kuente Dios.

²³ T'ikuqan kixin tí nkehe ntáchro asenná mé t'inkákonhen tí nkehe tjínkavan chrókjuít'a. A ntá tí jie chonta mé éxí tjechjinaxián tíha.

²⁴ Nòna tí janhan. ¿Xá nkexro chrókjuatsen tí jie chóna tí cuerpo kuentana chrók'uenxian?

²⁵ Kjuasáya tjahá Dios kixin ikui Ìnchéni Jesucristo kuaáxinni. Mé xikaha tí janhan la it'ona tjenkayáxian kixin chrókjuintaxiteyáha Dios a ntá tí t'ona mé ntáchro asenná chrókjuintaxiteyáha tí nkehe kuente tí jie.

8

Tjejóchónxinni Nchakuen Dios

¹ **A** ntá ijie tí sín tinkáchónki Cristo Jesús la kohya jìe chrók'juasótexín sín. Jehé sín í tjinkakonhya nchexiteyá sín xíkaha ntáchro asén sín. Jehó tjinkaon sín sinchexiteyéhe sín Nchakuen Dios.

² Kíxin tí nkehe t'et'otan Nchakuen Dios mé tjanjon kjuachón kíxin tinkáchónkini Cristo Jesús. Tíha mé kjuatsen tí nkehe kuènte jìe chrók'uenxínni.

³ **A** ntá Dios kjuích'e tí nkehe kjuachahya kjuích'e tí ley kuènte ch'ín Moisés kíxin jeheni kjuachahyani chrók'juinchexiteyéheni tíha. **A** ntá Dios mé ich'r'án ch'án Xjèen ch'án k'óna éxí chojni. La xra ó kui ch'án k'uenyákonhen ch'án tí ijíeni kaín ni ntihi chjasintajni la kjuatsen ch'án tí jìe chrók'uitjáyaxínni.

⁴ Mé xíkaha kónhen kíxin ntá jeheni jína chrók'juinchexiteyéheni tí nkehe t'et'otan tí ley la chrók'juinchexiteyéhyani tí nkehe ntáchro asénni ó. Náhi. Chrók'juinchexiteyéheni tí nkehe ntáchro Nchakuen Dios.

⁵ **A** ntá tí sín tjinkaon nchexiteyéhe tí nkehe ntáchro asén sín ntá táhó tjenkayáxin sín. **A** ntá tí sín tjinkaon nchexiteyéhe Nchakuen Dios la ntá xritjeyá sín tí nkehe kuènte Nchakuen Dios.

⁶ **A** ntá tí sín tóxakonhen tí nkehe ntáchro asén sín la táhó ts'enzín sín. **A** ntá tí sín tóxakonhen tí nkehe kuènte Nchakuen Dios la tsochóntaxín sín kjuachón la ko kjuaxróxin.

⁷ **A** ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kíxin tjinkakonhya sín la ko titekakonhya sín tí ley.

⁸ Tí sín tóxrjínhin sín tí nkehe ntáchro asén sín ó la xitjahya sinchechéhe sín Dios.

⁹ **A** ntá jahará la nchexiteyéhyará tí nkehe ntáchro asánrá. Náhi. Jahará nchexiteyéhéhá Nchakuen Dios tí chaxín chontará Nchakuen Dios. **A** ntá tí nkexro chóntahya Nchakuen Cristo la í tinkáchónkihya sín Cristo.

¹⁰ **A** ntá tí Cristo tzejókoará tí jahará la tí asánrá la tjechón kíxin Dios kujikonóghará, kjuínchetjóá ch'án tí ijíará, kjánchó tí cuerpo la éxí tsík'en kíxin tí jìe chontará.

¹¹ **A** ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjáxin tsochjéhe ch'án kjuachón nìxin tí cuerpo kuéntará kjónté chóna jìe kíxin tí Nchakuen Dios chontará jahará.

¹² Mé xíkaha kíchó ni, ó chóntani nkehe sinchexiteyéheni, kjánchó í chrók'juenkayáxinhyani tí nkehe ntáchro asénni.

¹³ **A** ntá jahará tí chrók'uejorá éxí ntáchro asánrá la tíha la mé chrók'uénxínrá. **A** ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínrá.

¹⁴ Kaín tí nkexro t'et'utenhen Nchakuen Dios la mé ó k'óna xjeen Dios.

¹⁵ Ntá Nchakuen Dios ó k'uayéhéhá jahará la jehya tí nchakuen tí nkehe k'uek'et'uanhanrá ósé kíxin chróchrakonrá. Náhi. Ntá tí Nchakuen chóntani la k'ónaxínni xjeen Dios. **A** ntá tí Nchakuen ch'án nchexraxinkaonni tsontáchroni kíxin: "Ít'eni Dios kuéntá tí jeheni."

¹⁶ Tí Nchakuen Dios tónoexín nchakuenni kíxin k'ónani xjeen Dios.

17 **A** ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxi tsintáchro ch'án ósé. Mé ts'áyékoni Cristo tí nkehe tsjanjon Dios. Tí chaxín tsjasóteni éxi Cristo kjuasóte ntá chr'éxin ts'ejókoni ch'án kjuaxróxin.

Tí kjuachaxin jie itsi chr'éxin

18 **A** ntá ijie la tóxakuenhyani kjónté nkehe ts'atsínkani tsjasótéxinni kixin tíha la ninkehó sínkíhya kixin tíha la xitjahya tóyóhe tí nkehe ts'áyéheni chr'éxin kixin antsí má jína náxrjón tíha.

19 Tí nkehe tsík'óna tjejóchónhen kixin ts'ikon tí sín tsík'óna xjeen Dios.

20 Kjónté kaín nkehe tsík'óna síin la ts'itjayan tíha la jehya kixin xikaha tjinkaon tí nkehe tsík'óna. Náhi. Jehí xikaha tsík'etoan Dios. Ntá tjejóchónhen kaín nkehe tsík'jich'éna Dios

21 kixin chróchónta kjuachaxin chrók'uitjayanhya. Ntá náxrjón ts'ixin kaín nkehe éxi náxrjón ts'ejó tí sín tsík'óna xjeen Dios.

22 Ó noheni kixin kaín tí nkehe kjuich'éna Dios la náxa tsjasóte éxi yóhe jtótéxin ijnko chojni nchekokjíhi xjeen.

23 **A** ntá jehya jehó tí nkehe tsík'óna t'ikon chojni chrókjoté. Náhi. Kjaxin jeheni tjasóteni kjónté chóntani Nchakuen Dios kixin tí Nchakuen Dios la mé tí nkehe xrankíxixin kuákjani la náxa ts'áyéheni inaá tí nkehe náxa tsjanjon Dios. Tjejótjasóteni la ko tjejóchónhenni kixin tsjintaxín ts'ónani xjeen Dios la ko ts'áyéheni tí cuerpo chónhya ts'en.

24 Mé ó kuaáxinni la náxa tjejóchónhenni tí nkehe t'ikonhyani. Tí k'uíkoni tí nkehe tjejóchónhenni ntá t'ichjánxinhya chrók'uejóchónhenni. Tí nkehe ó t'ikonni la t'ichjánxinhya chrók'uejóchónhenni náxa chrók'uikonni inaá.

25 **A** ntá tí chónhenni tí nkehe náxa t'ikonhyani la ntá t'ichjánxin tsonínkakhonhyani tsochónhenni.

26 Mé kjaxin xikaha tí Nchakuen Dios tjinkítsani tí noehyani nkexrí tsonixjeheni Dios kixin chaxín noehyani tsonixjeheni ch'án éxi chrónixjani. **A** ntá tí Nchakuen Dios tjinkítsa nixjaxin ch'án tí jeheni kjónté noehyani nkexrí tsochrónóaxinni éxi tjinkaon ch'án.

27 Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxi tjinkaon Dios la nixjaxin ch'án tí sín tinkáchónki Dios.

28 Ó noheni kixin Dios la k'uetóan kaín nkehe chrók'uaxrje jína kixin tí sín tjuèhe ch'án kixin tsík'jeyá ch'án sín kixin xikaha tjinkaon ch'án.

29 Tí sín tsík'jeyá Dios ósé la ntá tsík'lyehe ch'án kixin ts'óna sín éxi tí Xjeen ch'án kixin ntá tí Xjeen ch'án mé ts'etuenhen nchónhya tí sín kíchó ch'án.

30 Mé xikaha tí sín tsík'jeyá Dios ósé mé kjaxin k'uíyehe ch'án sín la ko tí sín k'uíyehe ch'án la kjuínchetjóá ch'án ijje sín la ntá tí sín kjuínchetjóá ch'án ijje la kjuanjon ch'án kjuachaxin kuénte ch'án tsochónta sín.

31 **¿A** ntá nkehe chróchroni tí xikaha? Tí Dios tjuèhe tí jeheni, **¿a** ntá nkexro chrókjuacha chrókónínkakohen tí jeheni?

32 Kixin Dios la kjiakuénhya tí Xjeen ch'án. Kjuanjon ch'án k'uenyákonhenni kaín ní, **a** ntá tí ó kjuanjon ch'án Xjeen ch'án la kjá kaín nkehe chrókjuanjon ch'án.

33 **¿**Nkexro chrókjuacha chrókjuanchia jie chrókónínkakohen tí sín kjueyá Dios? Kixin Dios la ó kjuínchetjóá ijje tí sín a.

³⁴ ¿Nkexro chrókjuinçekjasóte tí jehe sín? Kíxin Cristo la ó k'uenyákonhen sín la kjaxin xechón ch'án inaá la itjen ch'án tí tja chjina Dios tjen nkaya nkajní la tjechronòa ch'án kíxin kaín tí jeheni.

³⁵ ¿Xá nkexro chrókuakitsjeheni tí tjuèheni Cristo? Kjónté ichrén nkehe chrókónhenni la ko chrókónínkakonhen chojni tí jeheni la ko kjónté chrók'uenxínni kjinta la ko chróchóntahyani ikéni o kjónté tí kjuaxikaon chrók'uenxínni la chrókuítqehya ch'án tí jeheni.

³⁶ Éxí ntáchro xroon itén Dios kíxin: Tí tinkáchónkini tí jaha la síin kjuaxikaon kaín yaon chrók'uenxínni. Chrók'óyánni sín éxí t'óyán sín kolélo tí matanza.*

³⁷ Kaín tíha la antsí chrókjuachaxínni kíxin kjuachaxién tí nkexro tjuèheni.

³⁸ Ó noheni kíxin ninkehó nkehe tsjachahya tsakitsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxién tí jínahya, o kjónté tí nkehe sitónhen ijie, o tí nkehe tsonhen chr'éxin,

³⁹ o kjónté tí nkehe síin nkaya nkajní, o tí nkehe imá njnka síin chjasintajni, o í jnko nkehe kjuích'éna Dios. Mé kohya nijnko tí nkehe a tsjacha tsakit-sjeheni tí tjuèheni Dios kjuakoxin tí jehe ch'án kíxin k'uenyákonhenni Ìnchéni Jesucristo.

9

Dios kjueyá tí sín Israel

¹ Ntoá xrjanka kíxin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kíxin chaxín.

² Imá t'ává asenná la ko náxrjónhya tjèn

³ kíxin tjínkavan kjónté chrók'uitjáyanxinna tí tinkáchónkia Cristo kíxin ntá jína chrókuinkáchónki Cristo tí sín kichiná naxa kjéhyana.

⁴ Jehe sín mé tsík'axrjeníxin sín tí sín Israel la Dios k'uáyéhe sín éxí xjeen ch'án la ko Dios chónthee tí jehe sín la kjuanjon kjuachaxién ch'án la kjaxin k'uáyéhe sín tí nkehe k'uetqan Dios la ko tí ley tsíkjin ch'ín Moisés la ko k'uáyéhe sín kjuachaxin ts'etqan sín kíxin nkehe tí xra tsonhen nkaxenhen njnko la ko k'uáyéhe sín tí nkehe tsintáchro Dios.

⁵ Tsík'axrjeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tió k'óna ch'án chojni. Jehe ch'án mé Dios kuènte kaín nkehe la tinkáchónkini ch'án jnkochríxín. Amén.

⁶ A ntá tí nkehe chrókuakja tí sín Israel kjuanjon Dios la jehya kíxin chrókitéyáhya tíha. Náhi. Kíxin jehya kaín tí sín tsík'axrjeníxin tí sín israelita mé chrók'óna sín chojni chjasin Israel.

⁷ Kíxin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsintáche ch'ín Abraham kíxin: “Tí sín ts'óna kjéhya jaha mé ts'axrjeníxin sín tí ch'ín Isaac.”*

⁸ Tíhi mé tienxínni kíxin ninkexró xitjahya ts'óna xjeen Dios kíxin tí tsík'axrjeníxin sín chojni ó. Náhi. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án.

⁹ Tí nkehe tsíchenka Dios tí ch'ín Abraham mé tíhi: “Itsi ijnko yaon mé tjan Sara sich'éna tjan ijnko xjan.”†

¹⁰ A ntá jehya táhó. Náhi. Kjaxin tí yaá chánjan tsík'ich'éna tjan Rebeca mé chóna jnkokqá it'é xjan mé it'ín Isaac, mé tsík'axrjeníxinni ch'án.

* 8:36 Salmo 44.22 * 9:7 Génesis 21.12 † 9:9 Génesis 18.10

11 A ntá tí xjan la naxa kokjéehya xjan la ninkehó nkehe jína o jínahya kjuíuch'e xjan. Ntá kjuakoxin Dios kixin chóntha ch'án kjuachaxin éxi tsikjenkayáxin ch'án tsjeyá ch'án nkexro ts'íyehē ch'án la tahya ch'án kuentá nkehe tí xra kjuíuch'e sín.

12 Ntá kjónté la ntá chenka ch'án tí tjan Rebeca kixin: “Tí ch'ín saó mé sich'ehe xra tí ch'ín soyo.”‡

13 Mé kjaxin xikaha ichro xroon itén Dios kixin: “Tjuahá Jacob, a ntá Esaú la náhi.”§

14 ¿A ntá nkehe chróchroni? ¿Á ntoáhya tjenkayáxin Dios? Kjá náhi.

15 Kixin tsintáche Dios tí ch'ín Moisés kixin: “Tsojtuahá tí nkexro tjinkavan tsotjuahá la ko tsikonóahá tí nkexro tjinkavan tsikonóahá.”*

16 Jehya éxi tjinkaon chojni o jehya kixin tí nkehe ch'e chojni. Náhi. Ó jehí Dios tsikikonóehē ti jehé sín.

17 Tí ntáchro xroon itén Dios mé nixjehē Dios tí ch'ín rey Egipto kixin: “Kjuánjuan kjuachaxin kixin jaha k'óna rey kixin tjinkavan chrókjuákoxiān kjuachaxin kuèntana kixin ntá kuènté chjasintajni chrókónohe la chrókuitekaon tí nina.”†

18 Mé xikaha tí tjinkaon Dios tsikonóehē ch'án chojni la tsikonóehē ch'án, a ntá tí nkexro tjinkakonhya ch'án tsikonóehē ch'án la tsikonóehya ch'án.

19 A ntá tsontáchorá kixin: “A ntá tí xikaha la, ¿nkekuènté t'eka Dios chojni jje? ¿Nkexro chrókjuacha chrókjuanjonko tí nkehe t'etōan Dios?”

20 ¿Xá nkexro tí jahará kixin chróntácherá Dios xikaha? ¿Á tí chí tsík'óna nchetje chróntáche tí ìnehé chí kixin: “¿Nkekuènté xikaha kjuich'énani?” chróchro.

21 A ntá kjaxin tí nkexro ch'éna chí mé chóntha kjuachaxin tjinkaon sich'éna ch'án tí nkehe tóxrjínhin ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhya.

22 Tjinkaon Dios chrókjuakoxin ch'án tí kjuachaxin kuènté ch'án chrókjuincheckjasóte ch'án chojni la kjónté xikaha kónhen la kjuacha ch'án kóninkakonhya ch'án la kuikonóehē ch'án tí sín chrókjuincheckjasóte ch'án kixin chrókjuincheck'itjáyan ch'án sín.

23 Mé xikaha kjuíuch'e ch'án kjuakoxin ch'án tí kjuachaxin imá jje chóntha ch'án kixin jehé ch'án kuikonóeheni ch'án kixin xikaha tsikjenkayáxin ch'án ósé kixin náxrjón chrók'uejókoni tí jehé ch'án.

24 Mé xikaha Dios tsikjeyá ch'án iso tí sín judío la ko iso tí sín jehya judío.

25 Mé xikaha ntáchro tí xroon tsikjin ch'ín Oseas kixin:

Tí sín jehya chjasenná la mé sintak'ian chjasenná.

La tí sín k'uetjuahya mé tsotjuahá sín ijje.‡

26 Tí chjasin ntiha tsintáchro ch'án kixin: “Jahará jehya chjasenná”,

a ntá ijje sintak'ian xjeen Dios tjechón.§

Mé xikaha ichro itén Dios.

27 Kjaxin nixja ch'ín Isaías kuènté tí sín israelita tsintáchro ch'án kixin: “Nchónhya chojni ts'axrjeníxin tí sín Israel éxi tí nchónhya nchesen siín ntayaon kjánchó tsjéhya tí jehé sín tsjacha sín tsaá sín.

28 Ntá tjoka tsoñhen tí nkehe tsintáchro Ìnehéni sinchexiteyá ch'án.”*

29 Ntá kjaxin ch'ín Isaías tsintáchro ch'án ósé kixin:

‡ 9:12 Génesis 25.23 § 9:13 Malaquías 1.2-3 * 9:15 Éxodo 33.19 † 9:17 Éxodo 9.16 ‡ 9:25

Oseas 2.23 § 9:26 Oseas 1.10 * 9:28 Isaías 10.22-23

Tí Ìnchéni chónṭa kaín kjuachaxin kuítogehya chrók'uitjáyan kaín tí sín k'uaxrjeníxin Israel éxí k'uitjáyan tí sín chjasin Sodoma la ko Gomorra.†

Tí sín judío la ko tí tan jına

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijíé sín ntá kjónté la k'uitja sín kixin tsotjóá ijíé sín kixin tinkáchónki sín Cristo.

³¹ A ntá tí sín israelita chrókjuinchexiteyéhe sín ley kixin chrókótjuáxin ijíé sín kjánchó kjuachahya sín kjuínchexiteyéhe sín tíha.

³² ¿A ntá nkekuénté kixin xíkaha k'uitjahya sín nkexrí chrókuinkáchónki sín Dios? Kixin kjueyáhya sín nkexrí chrókjuinchetjóá ch'án ijíé sín kixin tinkáchónki sín ch'án. Jehó tí xra kjuích'e sín chrókuaáxin sín, ichro sín. La méxra xíkaha tjen tí xro kóténkixin sín.

³³ Mé xíkaha chronkaxín xroon itén Dios kixin: Mé xíkaha kjuaké tí xro chjasin Jerusalén mé tí xro tsóténkixin sín la ko tí tjo ts'ánótjenxin sín.

A ntá tí sín chrókuitekaon tí jehé la chrókósuèhya sín.‡

10

¹ Kíchóni, kaín asenná níxjahá Dios kixin tjínkavan kixin tí sín israelita chrókuaá sín.

² Janhan ntáxrjan kixin tí sín israelita imá tjínkaon sín chrókjuich'ehe sín xra Dios kjánchó chaxínhya kixin jehé sín la tienxínhya sín.

³ Kjaxin noehya sín kixin nkexrí chrókjuinchetjóá Dios tí ijíé sín. A ntá jehó sín xritjeyá sín nkexrí chrókótjóá sín la tjínkakonhya sín chrókjuinchexiteyéhe sín Dios.

⁴ A ntá Cristo mé kjuínchexiteyá kaín níxja tí ley. A ntá ijíé kaín tí sín kuítekaon tí jehé ch'án mé sinchetjóá ch'án ijíé sín.

⁵ A ntá tí chrókótjóá ijíé sín kixin tí ley la ch'in Moisés mé tsíkjin ch'án xíkíhi: "Tí nkexro chrókjuinchexiteyéhe kaín tí ley la táhó chrókuaáxin sín."*

⁶ A ntá tí chrókjuinchetjóá Dios tí ijíéni kixin tí tinkáchónkini ch'án ó mé ntáchro xíkíhi: "Ntáchrohyará kixin, ¿Xá nkexro sáchrókjuí nkaya nkajní? (Tí xíkaha la t'axrjexín kixin naxá chrókui Cristo.)

⁷ La ko ntáchrohyará kixin: ¿Xá nkexro chrók'uinkajin tí imá núnka?" (Mé t'axrjexín tíha kixin chrókjuíakajín sín Cristo chrók'uaxrjetaón ch'án kixin itjen ch'án tí síin tí sín tsík'en, ichro sín.)

⁸ ¿A ntá nkehe ichro? Ntáchro kixin: "Itén Dios la chjinaxón tjen tí tjejorá kixin ó nohará la ko xraxínkaon asánrá."† Tí tan a mé tí nkehe tinkáchónkini kjuakoni.

⁹ Tí ir'va tsontáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá.

¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchroxian kixin choxian Jesucristo ntá sinchekaá ch'án tí jaha.

¹¹ Ntáchro xroon itén Dios kixin: "A ntá tí sín chrókuitekaon tí jehé ch'án la chrókósuèhya sín."‡

¹² Dios la t'ikon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe.

† 9:29 Isaías 1.9 ‡ 9:33 Salmo 118.22 * 10:5 Levítico 18.5 † 10:8 Deuteronomio 30.12-14

‡ 10:11 Isaías 28.16

13 Mé xíkaha ntáchro xroon itén Dios kixin: “Kaín tí sín tjanchaxín nkehe ihnié Ìnchéni la tsaá sín.”§

14 ¿A ntá nkexrí chrókjuanchehe sín ch'án kixin chrókjuinkitsa ch'án sín tí naxa kuítekakonhya sín ch'án? ¿A ntá nkexrí chrókuitekaon sín tí jehe ch'án tí naxa kuíenhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakohé sín tí itan a?

15 ¿La nkexrí chrókjuichronka sín tí tan tí kohya nkexro ichr'án sín sátsji? Éxi ntáchro xroon chóna itén Dios kixin: “Náxrjón tí sín xrichronka itan jína.”*

16 Kjánchó kénhya sín titekaon sín tí itan tsaáxinni. Tsintáchro ch'ín Isaías kixin: “Ìnchéni ¿xá nkexro ó kuítekaon tí tan xrichronkani?”†

17 Méxra t'ichjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

18 A ntá tjánchánkía kixin: ¿Á kuíenhya sín tí tan? Kjá ó kuínhin sín. Ntáchro xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni. Tí nkehe nixja sín la ó kjuixraká hasta kjuèxin chjasintajni.”‡

19 Ntá tjánchánkía ínaa: ¿Xá tí sín Israel la naxa kíenxínhya sín ní? Senó ntáchro ch'ín Moisés kixin:

Ijnko chjasin jehya chjasin kuéntana la tsoninkákonhénra sín

kixin injko chjasin tjinkakonhya tsinhin la tsoninkákonhénra sín.§

20 Ntá ntáchro ch'ín Isaías kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

21 La ko nixja ch'ín Isaías kuénte tí sín israelita kixin: “Kuenté yaon k'uíyaha injko chjasin sín chojni titekakonhya sín la ko jiehe sín.”†

11

Tí sín Israel tsíkjeyá Dios

1 A ntá ijie tjánchánkía kixin: ¿Dios la á kuítóhe ch'án tí sín Israel? Kjá náhi, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín.

2 Kixin ósé tsíkjeyá Dios tí sín israelita kixin ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehé ch'án Dios tjanchia ch'án ijie kuénte tí sín Israel? Mé ntáchro xíkíhi:

3 “Ìnchéni, jehe sín k'óyan sín tí sín chrónka itán la ko k'óxíka sín tí altar kuéntá ntá jehóni kuítóheni tjechónni la tjinkaon sín kjaxin chrók'óyan sín tí jeheni.”*

4 A ntá Dios kjuátehe ch'án kixin: “Naxa kuítóhe yato mil chojni kuítekaon sín tí janhan kjuíxienhya sín toch'in sín tí nkehe tsíkjanoya Baal.”†

5 Ntá kjaxin xíkaha ijie naxa kuítóhe iso tí sín naxa tinkáchónki Dios. Kjuasáyé Dios kixin kuikonóhe ch'án tí sín la tsíkjeyá ch'án kixin tsaá iso tí jehe sín.

§ 10:13 Joel 2.32 * 10:15 Isaías 53.1 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 * 10:20 Isaías 65.1 † 10:21 Isaías 65.2 * 11:3 1 Reyes 19.10, 14 † 11:4 1 Reyes 19.18

⁶ Mé xikaha kjuasáyé Dios sinchekaá ch'án tí jehe sín kixin jehya tí xra kjuich'e sín chrókuaáxin sín. Náhi. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

⁷ A ntá tí xikaha la, ¿nkexi? Tí sín israelita la k'uitjahya sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín í so a la icha asén sín la kuitekakonhya sín.

⁸ Éxi ntáchro xroon itén Dios kixin: “Dios kjuanjonhya kjuachaxin chrókiexín tí sín a la ko mé kjaxin xikaha naxa sítonhen tí yaon ijie. La kjuanjonhya ch'án kjuachaxin kixin chrók'uikon sín la ko chrókiexín sín.”[‡]

⁹ Kjaxin tsintáchro ch'ín David kixin:

Tí kia tjasin sín mé tjasixín sín jie,

tsjasótexín sín.

¹⁰ Tí ikon sín ts'ikonxínhya sín kixin ts'óna sín ntakótán

ntá tí jie kuénte sín mé jnkochrixin yamá sín. §

Tsaá tí sín jehya sín judío

¹¹ A ntá ijie tjánchánkiá: Tí sín judío la tí kjuasin sín jie la ¿á ó naá kuítexón Dios tí jehe sín? Kjá náhi. Tíó kuitekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín.

¹² A ntá tí jie kjuasin tí sín judío, a ntá kuítöhe Dios tí jehe sín, a ntá tí sín jehya judío antsí k'uitja sín nkexi tsinkáchónki sín Dios. A ntá tí nkehe ntoáhya kjuich'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuitekaon sín Cristo la antsí má náxrjón tíha.

¹³ Chonta iso nkehe chrókuinhínra jahará jehya judíora kixin Dios mé chr'ánna kixin tsjaköha tí sín jehya judío la antsí tjetöan tí xra kuénte Ínchéni chrókjuít'a.

¹⁴ Tjínkavan kixin tí sín chjasenná chróköchjínöxínhin sín kixin jahará tinkachónkirá Dios kixin ntá chrókjuacha chrókuaá iso tí jehe sín.

¹⁵ Kuítöhe Dios tí sín judío, a ntá iso tí sín jehya judío k'uitja sín tí kjuaxróxin kuénte Dios. A ntá tí chrókuitekaon tí sín judío kjaxin la yöhe éxi chróxechón chojni tsik'en tí jehe sín.

¹⁶ Tí chrókjuinchetjóá Dios tí niötja xrankixixin chrók'óna tí ich'o la ntá kuenté tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuéé ijnko nta la kjaxin kaín tí chaon tí nta chrókjuinchetjóá ch'án.

¹⁷ Ntá isó tí sín judío la éxi iso chaon tí nta olivo mé xikaha tsíchrinjin la ntá jahará la éxi ijnko chaon nta olivo nteje tsík'óna injerto mé xikaha ts'ejóchónxin tí nta chaon tí tronco tí nta olivo jína xráxin tjechón.

¹⁸ Ntáchrohyará kixin tí chaon tí nta la antsí jína. Íchá jína tsontáchrora kixin jehya tí nta t'etöenhen tí nuéé nta. Náhi. Tí nuéé mé tsjinkitsa tí nta mé xikaha tí jahará.

¹⁹ Ntá jahará tsontáchrora kixin: “A ntá tí chaon tí nta la tsíchrinjin kixin ntá jeheni tsitöheni lüké tí nta chaon tsíchrinjin”.

²⁰ Tíha la chaxín. Kjánchó chrínjin kixin kuitekakonhya Dios. A ntá jahará la tjejorá ntíha kixin tinkachónkirá Dios. A ntá chrokjuinchehnkehyará. Íchá jína chróchrakonrá.

²¹ Kíxin Dios la kuikonóǵehya ch'án tí nta chaon kuènte tí nta tronco la ntá mé xíkaha kjaxin tí jahará la tsikonóǵahyará ch'án.

²² Tsjehérá kixin Dios la imá jina kjánchó kjaxin sinchekjasóte ch'án tí sín titekakonhya. A ntá jina ch'án la kjuínkítsa ch'án tí jahará. Kjánchó chrók'uejorá jnkojína éxi tjinkaon tí jehe ch'án. A ntá tí náhi la chaxín jahará la tsítǵahará ch'án.

²³ A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco inaá kixin jehe ch'án la imá chóna ch'án kjuachaxin kixin xíkaha sich'e ch'án.

²⁴ A ntá jahará jehya judíora mé tsikóchrínjinrá ch'án nta olivo nteje. A ntá antsí má xra tsotséxin tí nta olivo jina. A ntá tí sín judío la nta chaon kuènte tí tronco nta olivo jina la antsí xrahya tsjatsueñhen tsotséxin kichó inaá kixin ó nta chaon kuènte.

Tí tsjixín ntá tsaáxin tí sín Israel

²⁵ Kíchóni, tjínkavan tsonohará tí nkehe jehó Dios nohe kixin sinchehnkehyará jahóra kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon.

²⁶ Tió xíkaha tsonhen ntá kaín tí sín Israel tsaá sín kixin tí xroon itén Dios ntáchro kixin:

Tí nkexro sinchekaáni mé tsjixín ch'án chjasin Jerusalén

la tsjatsen ch'án tí jie kuènte tí sín tsík'axrjeníxin ch'ín Jacob.

²⁷ Tíhi mé kjuachaxin nixin kuéntana ts'áyéhe tí jehe sín

kixin janhan mé kjuatsiyan ijie sín.*

²⁸ Xíkaha kixin tí tan nixin tsaáxinni ntá tí sín judío mé tsonínkakohen sín Dios kixin ntá jahará ts'ayéherá tí nkehe kuènte Dios. Kjánchó Dios naxa tjuéhe tí jehe sín judío kixin jehe ch'án tsíkjeýá ch'án tí sín tsík'axrjeníxin tí jehe sín.

²⁹ Kixin tí kaín nkehe kjuanjon Dios la tsakitsjehya ch'án la ko tsítóehya ch'án tí sín tsík'íyehé ch'án.

³⁰ Senó la jahará k'uékítekákonhyará Dios a ntá ijie la tí sín judío titekakonhya sín. A ntá jahará la kjónté la kuikonóǵahará Dios.

³¹ Mé xíkaha jehe sín kuítekakonhya sín Dios la ntá kjónté xíkaha la jehe ch'án tsikonóǵehé tí jehe sín éxi kuikonóǵahará ch'án.

³² Kixin Dios la kuítóhe ch'án kaín chojni kixin chrókjuasin sín jie kixin ntá tsjakoxín ch'án tí kjuachaxin kuènte ch'án kixin sinchetjóá ch'án kaín sín kjónté chojni chóna jie.

³³ A ntá tí kjuachaxin kuènte Dios la imá jie la ko imá nohe ch'án. Ninkexró tsjachahya tschronkaxín nkexrí tjenkayáxin ch'án la ko ninkexró tsjachahya tsienxín tí ntja kuènte ch'án.

³⁴ Ntáchro xroon itén Dios kixin: “¿Xá nkexro chrókienxín nkexrí tjenkayáxin Ìnchéni la xá nkexro chrókjuinkítsa chrókjuakõhe tí jehe ch'án?

³⁵ ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe inaá?”†

³⁶ Kixin kaín nkehe la tixín tí tjen Dios kixin kaín nkehe la kjuích'ena ch'án kixin jehe ch'án chóna ch'án. Mé xíkaha tjancheheni kjuasáyé Dios jnkochríxín. Amén.

* 11:27 Salmo 14.7, Isaías 59.20 † 11:35 Isaías 40.13-14

12

Chjehérá cuérporá Dios kixin sinchetjóá ch'án

1 Mé xikaha kichó ni, xrjanóahará kixin Dios ó kujikonóahará ch'án ntá jahará chróchjehérá cuérporá Dios éxi ijnko nkehe tjechón kixin jehe ch'án ó kjuintatjóará ch'án la mé xikaha chrókóxrjinhjin ch'án. Tíhi mé ijnko nkehe ntoá t'ichjánxin chróchjéheni ch'án.

2 Chrókóxrjánhyará tí nkehe síin chjasintajni. Náhi. Chrókónixin tí nkehe tjenkayáxinrá kixin jína chrókjuenkayáxinrá. Xikaha ntá chrókónohará kixin nkexri tjinkaon Dios kixin ntoá chrók'uejorá éxi tóxrjinhjin ch'án.

3 Kjuasáyé Dios kjuanjón ch'án tí xrā tjet'ahā ch'án. Mé xikaha nixjahará kaín rá kixin chrókjuenkayáxinhyará kixin imá tjetóanrá. Náhi. Chrókjuenkayáxinrá jína éxi tí kjuachaxin tjáhará Dios éxi nkexri tinkachónkirá ch'án.

4 Mé xikaha ijnko cuerpo la nchónhya parte chóna. A ntá tí parte la jehya jnkokón xrā chrókjuich'e.

5 Mé kjaxin xikaha tí jeheni kjónté nchónhyani la ts'ónani jnkokoá cuerpo kuente Cristo. Mé xikaha jnkokoá chrókjuenkayáxinni kixin ó k'ónani jnkokoá cuerpo.

6 Dios kjuanjón nchónhya clase xrā éxi tjinkaon ch'án chróchjéhe ch'án jnkójnko chojni tí xrā. Ntá t'ichjánxin jína sich'eni tí xrā kjuanjón ch'án. A ntá tí kjuanjón ch'án kjuachaxin kixin tsochronkaxinni tí tan kuente ch'án ntá t'ichjánxin sich'eni tí xrā éxi titekaonni ch'án.

7 A ntá tí kjuanjón ch'án xrā tsjinkitsani í jnko nkexro ntá t'ichjánxin jína sich'eni tí xrā a. A ntá tí nkexro tsik'áyéhe kjuachaxin tsjako la t'ichjánxin jehó tí xrā a chrókjuako.

8 Tí nkexro tsik'áyéhe kjuachaxin nchexraxinkaon í jnko nkexro la kaín asén chrókjuich'e ch'án tí xrā a. A ntá tí nkexro tsjanjón ichrén nkehe la chrókójjehya chrókjuanjón ch'án. A ntá tí nkexro t'etoan la jína chrókjuich'e ch'án xrā la ko tí nkexro chrókjuinkitsa tí sín chóntahya la kjuaxróxin chrókjuinkitsa sín.

Tí nkehe chrókjuich'e tí sín tinkáchónki Cristo

9 Kaín asánrá chrótjuèherá kichuárá. Chrókujtoherá tí nkehe jínahya tjenkayáxinrá la chrókjuenkayáxinrá tí nkehe jína.

10 Chrótjuèherá kichuárá la ko chaxín chrókjuíkosáyehérá kichuárá.

11 Chrókósáhyará la chrókjuich'eherá Ìnchéni xrā kaín asánrá.

12 Chrókócháhará kixin tjejóchonhénrá la chrókóninkákonhyará kjónté chrókjuasótiará. Chrókujtoéhyará chrónixjehérá Dios.

13 Chrókjuinkitsará tí sín tinkáchónki Ìnchéni tí chóntahya sín nkehe sine sín. Chjehérá kjuachaxin ts'ejó tí sín tsjijinixjahará sín.

14 Nixjehérá Dios la tsjancheherá ch'án kixin sincheyaon ch'án tí sín chonkíhará. Tjancheherá Dios tsjinkitsa tí jehe sín la jehya kixin chrókóninkákonhénrá sín.

15 Tócháhákoará tí sín tjejóchéhe sín la ko tí tjejótsjánka sín la koirá chrótsjankará.

16 Kjuaxróxin chrók'uejorá. Chrókjuínchehnkehyará. Náhi. Chrókóyóhārá éxi tí sín nõa. Chrókjuínchehnkehyará kixin nohará.

17 Chrókjuich'ehyará jínahya tí sín kjuít'ahará ichrén nkehe jínahya. Náhi. Íchá jína chrókjuákoxinrá nkehe jína kixin chrók'uikon kaín chojni.

¹⁸ Chrókjuéyará jnkojína chrók'uejórá. Exí nkexrí chrókjuachará la kjuaxróxin chrók'uejórá kaín rá.

¹⁹ Tjuahará kichó ni, la chrókjuincheckjasótehyará jahórá tí sín ichrén nkehe kjuít'ahará. Náhi. Títóhérá kixin Dios sincheckjasóte tí sín a. Ntáchro xroon itén Dios kixin: “Ixra kuèntana sintakitotaxián tíha. Janhan tsjénkaha tí sín a, ichro Ìnchéni.”*

²⁰ Kjaxin ntáchro xroon itén Dios kixin: “Tí sín nínkakonhan t'enxín sín kjinta la chróchjehé sín nkehe chrókjóne sín la tí t'enxín sín nta la kjaxin chróchjehé sín nkehe chrók'ui sín. Mé xikaha chrókjuich'e kixin chrókósuèhe sín kixin tí nkehe kjuich'e sín.”†

²¹ Chrókujtóehyará kixin chrókjuacha tí nkehe jínahya chrók'uetuanhanrá. Náhi. Chrókjuich'erá tí nkehe jína kixin chrókjuachahya tí nkehe jínahya chrók'uetóan.

13

¹ Kaín chojni t'ichjánxin sinchexiteyéhe sín tí gobierno kixin tí kjuachaxin chóna sín la Dios tsíkjanjon kixin kohya nijnko gobierno chrók'uejé tí jehya kjuachaxién Dios.

² Mé xikaha tí sín tjanjonko tí sín t'etóan la kjaxin nínkakonhen sín tí nkehe k'uetóan Dios. A ntá tí sín xikaha ch'e la mé jehe sín tjejá sín jie tsjasótéxín sín.

³ A ntá tí sín gobierno t'etóan la sincheckjasótehya sín tí nkexro titekaon ch'e nkehe jína. Náhi. Tsonínakonhen sín tí nkexro ch'e tí jínahya. Tí tjinkáonrá tsonínkakuanhyará sín la chrók'uejórá jnkojína. Chrókjuincheckxiteyéhérá sín kixin chrókónínkakuanhyará sín.

⁴ Kixin Dios k'uetóan tí xra tjejóch'e sín kixin ntá jahará la jína chrók'uejórá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhi. Chóna sín kjuachaxin sincheckjasótiará sín kixin jehe sín la Dios k'uetóan tjejó sín tí xra a kixin sincheckjasóte sín tí sín jínahya tjenkayáxin.

⁵ Mé xikaha t'ichjánxin sinchexiteyéhérá tí gobierno la jehya jehí kixin chrókjuincheckjasótiahayará sín. Náhi. Ó jehí jahará chróxráinkáonrá kixin t'ichjánxin sinchexiteyéhérá sín.

⁶ La kjaxin jehya táhó. Náhi. T'ichjánxin chrókjuenkehérá gobierno tí chichaon kuènte tí xra ch'erá tjanchia sín kixin tí gobierno la Dios k'uetóan tjejó sín t'etóan sín.

⁷ Kjaxin chrókjuenkehérá kaín chojni tjasikéhérá. Tí nkexro síká kuènte xra la chrókjuenká sín kuènte tí xra, la tí nkexro síká ichrén nkehe nchekji ntá tíha kjaxin chrókjuenká sín, la kjaxin chrókjuikosáyehérá tí sín t'etóan.

⁸ Kjaxin chrókjuasikéhyará nínkexró. T'ichjánxin chrójtjuéherá kichuárá kixin tí nkexro tjuèhe kichó la mé xikaha kjuínchexiteyá tí nkehe k'uetóan tí ley.

⁹ Kixin ntáchro tí mandamiento kixin: “Tjakéhya asánrá í jnko chojni chjin la ko t'oyánhyará kichuárá la ko tjehyará la nixjahyará kjuach'ia kuènte í jnko chojni. La ko tjaké hya asánrá nkehe ókjé.”* Kaín tíha la ko í so nkehe t'etóan Dios mé tienxinni t'axrxéxín kixin: “Chrótjuèheni kichó ni éxi tjuéxín asénni.”

¹⁰ Tí chojni tjuèhe kichó la ninkehó nkehe jínahya sich'ehe kichó. Mé xikaha chrójtjuèhe kichuárá la mé xikaha mé chróxiteyá jína tí nkehe nixja tí ley.

* 12:19 Deuteronomio 32.35

† 12:20 Proverbios 25.21-22

* 13:9 Éxodo 20.13-15, 17;

Deuteronomio 5.17-19, 21; Levítico 19.18

11 Kaín tíha chrókónoheni tí tjejóni kixin ó kui tí hora chrók'uejótsheni chrók'uauahyani. Tí nkexro tsaáxinni la í séhya itsi ch'án ijie, a ntá tí kjuankixinni kuítekaonni itén ch'án la ísé tsixin ch'án.

12 A ntá tí tie la í séhya tsjak'e kixin ó tsi tí t'inkáséyan la chrókuítsheni tí nkehe ch'eni kuènte sítié la chróchóntani kjuachaxin kuènte Nchakuen Dios kixin tsjinkítsa ts'ajini tí t'inkáséyan, éxi ijnko soldado t'inkáyate ch'án ka tsík'óna chica kixin kohya nkehe tsonhen ch'án.

13 Chrók'uejóni jnkojína éxi nkexrí chrók'uajini chaxín ntoá tí t'inkáséyan a. Chrókjuasinhyani kia chrókjuanjoxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjueyáhyani kjuanákaon la ko chrókóchjinoxienhyani.

14 A ntá jahará tákjára tí kjuachaxin kuènte Ìnchéni Jesucristo tsjinkítsará la tíha mé éxi chrók'uinkayára nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjótahyará kichuára

1 A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjótahyará ch'án kjónté kánhyó nohe ch'án.

2 A ntá iso sín chaxín nohe sín la tjinkaon sín chrókjóné sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín.

3 Tí nkexro chrókjóné kaín nkehe chrókjonéhya tí nkexro tjinkaon chrókjónéhya nkehe. A ntá tí sín chrókjónéhya nkehe chrókjontahya sín tí sín chrókjóné sín kaín nkehe kixin kjónté xikaha la Dios tsakja tí jehe sín.

4 ¿Xá nkexro jaha kixin chrókjóné tí nkexro ch'ehe xra í jnko nkexro? Tíha la xra kuènte tí lámqé ch'án tsontáchro á jína kjuich'e ch'án xra o náhi. A ntá kjá tsjak'e ch'án jína kixin Ìnchéni chóné ch'án kjuachaxin tsjinkítsa ch'án tsjak'e tí ch'ín a jína.

5 Iso sín tjenkayáxin sín kixin imá tjetoan ijnko yaon a ntá í jnko yaon la náhi. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín.

6 Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xikaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xikaha mé tjikosáyehe sín Ìnchéni la kjaxin tjanchehe sín kjuasáyé Dios.

7 Nijnko tí jeheni tjejóni kixin jehóni chrók'uejótsheni la ko jehya jehí chrók'uenni.

8 Tí tjejóni la tjejóni kixin sich'ehehi xra Ìnchéni la kjónté its'enni la kuènte ch'án tí jeheni. Méxra kjónté chrók'uejóchónni o kjónté chrók'uenni la kuènte ch'án tí jeheni.

9 Méxra xikaha ntá Cristo la ik'uén ch'án la ko xechón ch'án inaá kixin k'óna ch'án Ìnché tí sín tsík'en la ko tí sín tjejóchón.

¹⁰ A ntá jahará la, ¿nkekuènte tjónará tí kichuára o nkekuènte chontehyará kaín sín kjuasáya? Kíxin kaín ni tsoghjinani tí tjen Dios kíxin tsontáchro ch'án á jína xra kjuich'eni o náhi.

¹¹ Ntáchro xroon itén Dios kíxin:

Méxra janhan takjénxian asenná, ichro Ìnchéni, kíxin tí tjèn la ts'ejóxin toch'in kaín chojni

kíxin kaín chojni la tsjanchia sín kjuasáya kíxin janhan mé Dios kuènte sín.*

¹² Mé xikaha jnkojnkonni chrókónoheni kíxin tsochenkani Dios nkexrí kjuich'eni.

Tjachruehyará kichuára

¹³ Méxra chrókjontahyará kichuára. Íchá jína kíxin ninkehó nkehe chrókjuich'ehyará kíxin ntá tí sín kichó ni chrókjuasinxinha sín jie kíxin tí chrókjuasin sín jie ntá xikaha chrók'uitjáyaxín tí tinkáchónki sín Ìnchéni.

¹⁴ Janhan tinkáchónkia Ìnchéni Jesús la ntá xikaha ó nõna kíxin kohya ninkehó nkehe jehí tjuáhya. A ntá ijnko nkexro tjenkayáxin kíxin jehya nkehe jína tíha ntá chaxín tjuáhya tí nkehe kíxin xikaha tjenkayáxin ch'án.

¹⁵ Tí tjenkayáxin tí kichuá kíxin tí nkehe inte la ntoáhya á ntá tí xikaha ch'e la tjuèhya tí kichuá. Kíxin jehya tí nkehe chrókjonte ó chrókjuinçek'itjáyaxián tí kichuá kíxin Cristo k'uenyákonhen ch'án kjaxin.

¹⁶ Chrókjuich'ehyará nkehe jínahya kíxin ntá xikaha chrók'uántaxinhin sín tí nkehe jína tinkáchónkirá.

¹⁷ Kíxin tí kjuachaxièn Dios la jehya tí nkehe chrokjóneni o tí nkehe chrokw'ui. Náhi. Tí tjen tí kjuachaxièn Dios la chrók'uejóni jnkojína la ko kjuaxróxin chrók'uejóni la ko chrókóchéheni kíxin chóntani Nchakuen Dios.

¹⁸ Tí nkexro ch'ehe Cristo xra mé chrókjuinchechéhe Dios la ko chrókjuinchechéhe chojni.

¹⁹ Mé xikaha chrókjueyáni kaín tí nkehe tjikao kjuaxróxin kíxin ntá tsjinkjitsani tí sín kichó ni kíxin ntá kjaxin sín antsí chrókuinkáchónki sín Ìnchéni.

²⁰ Chrókjuinçek'itjáyaxián tí xra kuènte Dios kíxin tí nkehe chrókjónterá ó kíxin kaín nkehe chrókjónterá la ó tsíkjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyaxín tí nkehe tinkáchónki sín.

²¹ Ntá íchá jína chrókjontehyará into la ko chrók'uihyará vino la ko ninkehó nkehe chrókjuich'ehyará tí xikaha chrókjuasixín jie kichuára.

²² Tí nkehe tinkáchónkirá la jahóra chrókónohará kíxin Dios la tjetsjehe ch'án. A ntá jína tsjak'e tí nkexro tí chrókjuasixínnya ch'án jie tí nkehe tjenkayáxin ch'án.

²³ A ntá tí nkexro ine nkehe la tjenkayáxin sín kíxin tsjasixín sín jie ntá chaxín xikaha yámá sín jie kíxin kénhya asén sín kjóne sín tí nkehe. La tíó kénhya asén sín tjenkayáxin sín la ó kjuasin sín jie.

15

Nchechéhérá kichuára la jehya jahóra

¹ Tí antsí tinkáchónkini Ìnchéni ntá chrókjuinkjitsani tí sín kánhyó tinkáchónki tí jehe ch'án la chrókjuich'ehyani tí nkehe chrókóchéxinni jehóni.

* 14:11 Isaías 45.23

² Kjaxin kaín ni chrókjuinchechéheni kichó ni kixin chrók'uejó sín jína la ko kixin antsí chrókuinkáchónki sín Ìnchéni.

³ Kixin kjaxin Cristo kjuíuch'ehya ch'án tí nkehe chrókóchéheni ch'án jehó ch'án. Náhi. Kjuínchexiteyá ch'án éxi ntáchro xroon itén Dios kixin: "K'uinka kjuasótexinna kaín tí kjuanínkaon chóna tí sín nínkakonhen Dios."*

⁴ Kaín nkehe chrónka xroon itén Dios senó la tsíkjin sín ósé kixin chrókónoheni kixin ntá chrók'uejóchónhenni la chrókóninkakonhyani kixin tíha mé nchechéheni.

⁵ Dios, mé tí nkehe tjinkítsani la ko nchechéheni, la kjaxin tsjinkítsa ch'án tí jahará kixin ts'ejorá jnkójina la ko jnkokón tsjenkayáxinkoará kichuárá kixin xíkaha kjuakoxin Cristo Jesús.

⁶ Kixin kaín ni jnkokoá chrók'uákjenxinni Dios la chrókjuancheheni kjuasáyé ch'án mé jehe ch'án mé It'é Ìnchéni Jesucristo.

Tí tan jína xrakohe tí sín jehya judío

⁷ Chrókjuánjonrá kjuachaxin ts'ejó í so chojni la chrótjuèherá sín kixin éxi Cristo tsík'áyéhe ch'án tí jahará mé xíkaha tsjikosáyehérá Dios.

⁸ Janhan jína chróntáxrjan kixin Cristo ikui sich'ehé xra tí sín judío kixin tsoxiteyá tí nkehe tsíchenka Dios tí sín tsík'axrjeníxinni ósé kixin xíkaha tsjakoxin kixin Dios la jína ch'án la sinchexiteyá ch'án tí nkehe tsintáchro ch'án.

⁹ La kjaxin ikui ch'án kixin kjónté tí sín jehya sín judío la chrokjuanchehe sín kjuasáyé Dios kixin kuikonóhe ch'án sín éxi chrónka tí xroon itén Dios kixin: Janhan la ko tí sín tjejó ókjé nació mé tsjancheheni kjuasáyé Dios la ko tsotsjeni himno kixin ts'ákjenxinni ihnjé ch'án.†

¹⁰ Kjaxin ntáchro í jnko parte xroon itén Dios inaá kixin:

Tsocháakoará kaín tí sín kuènté Dios.‡

¹¹ Kjaxin ntáchro xroon itén Dios inaá kixin:

Tjanchehérá kjuasáyé ìnchéni Dios kaín rá kjónté jehya judiorá

mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkjin kixin:

Ts'axrjeníxin ch'ín Isaí ijnko nkehe

la ts'etuèhen ch'án kaín tí sín jehya judío,

a ntá tí sín a mé tsinkáchónki sín tí nkehe a.*

Mé xíkaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe ch'án kixin ntá ts'ánkí tí kjuachéhe tjejóchónhenni kjuachaxièn Nchakuen ch'án.

¹⁴ Kichóni, chaxín tónòna kixin jahará la jína tjejorá la kaín xín kjuaxrexinkaon jína tjenkayáxinrá la nohará tsjínkítsará chénkará kichuárá.

¹⁵ La kjónté xíkaha la chrakonhya ikjian tí xroon i chr'anhánrá xrjanka kaín tí nkehe kixin chrók'uitjáyanhyará chróxráinkáonrá kaín nkehe. Mé xíkaha it'a tí xra kixin kjuasáyé Dios kjuanjon ch'án tí xra.

¹⁶ Kixin sít'aha Jesucristo xra tsotjanka tí sín jehya judío tí itén Dios. Tí xra mé tjákua tí tan jína tsaáxin chojni kixin ntá janhan tsánjuan tí sín jehya judío

* 15:3 Salmo 69.9 † 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11

Salmo 117.1 * 15:12 Isaías 11.10

ts'áyéhe Dios éxi ijnko nkehe tsöxrjínhin ch'án kixin Nchakuen ch'án kótjuáxin sín.

17 Janhan mé ijnko chojni tinkáchónki Cristo Jesús la mé xikaha síin kjuachaxin tsöchàna kixin t'ahā xrā Dios.

18 Chrokjuahya tsöhnke tsontáxrjan í jnko nkehe. Jehó tsöxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuítekaon sín kixin tí itan kjuákua la ko tí nkehe jina kjuít'a.

19 Kixin tí kjuachaxién Dios mé kjuákoxián tí kjuásian kjuaxroan la ko kjuákoxián tí kjuachaxin kuénte Nchakuen Dios. Mé xikaha kjuintaxixin kjuákua tí tan jina tsaáxin chojni Cristo xrankixixín chjasin Jerusalén la nkuíxín chjinaxón ntiha la hasta estado Ilírico.

20 Mé xikaha tjínkavan tsjìkjákua tí tan tsaáxinni tí chjasin naxā tienhyé sín ihnié Cristo kixin tí janhan tjínkakhya tsjìxrónkáxián tí xrā kuénte í jnko chojni xráxín tjech'e xrā.

21 Íchá jina éxi ntáchro xroon itén Dios kixin:

Chrókuinhin tí sín naxā kienhyé sín tí tan kuénte ti jehe ch'án.

La ko chrókiénxín tí sín naxā kienhyé tí tan kuénte ch'án.†

Ch'in Pablo tjenkayáxin ch'án sátsji ch'án chjasin Roma

22 Nchónhya veces tjínkavan chrókjuasántsjahā tí jahará kjánchó naxā xitjahya kjuasán ntiha.

23 Kjánchó ijie la ó kjuixinna tí xrā nkuíxín tí tjèn ntihi. Ntá itsjé nánó tjínkavan chrókjuasántsjahā tí jahará

24 a ntá ijie ts'atsínka tsonixjahará tí sátsjia nación España. Ntá tsöchàna ts'ikuán tí jahará ntá tsjixin ntá chr'éxin tjínkavan kixin jahará tsjinkitsará tí sátsjia.

25 A ntá ijie la sátsjiya chjasin Jerusalén, sátsjikian tí nkehe tsjinkitsa tí sín kichó ni ntiha.

26 Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'enhen sín tí sín kichó ni ntiha tsochjéhe tí sín nòa tjejó chjasin Jerusalén.

27 Jehe sín kóxrjínhin sich'e sín xikaha kixin tí sín judío tinkáchónki Cristo kjuinkitsa tí jehe sín tsonohe sín itén Dios. Ntá ijie la jehe sín chrókjuinkitsa sín inaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni.

28 A ntá tió tsjixin tí xrā la ts'áyéhe sín tí chichaon la ntá janhan sátsjia España la ts'atsínkua tsonixjahará.

29 Ó nòna kixin tió sátsjia la Cristo mé imá sincheyaon ch'án tí janhan la ko tí jahará.

30 Kichóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèheni kichó ni mé xrjannóahará kixin jnkokoá chrókjuenkayáxinni kixin tí xrā tjét'a la ko chrónixjehérá Dios kixin tí janhan.

31 Tjanchehérá Dios kixin tsjinkitsa ch'án tí janhan kixin kohya nkehe tsónna kixin kaín tí sín titekakhya Dios síin chjasin Judea. La ko tjanchiará kixin jina sátsjikian tí nkehe tsjinkitsa tí sín kichó ni tjejó chjasin Jerusalén kixin jina chrók'uáyéhe sín.

† 15:21 Isaías 52.15

³² Ntá tí tjinkaon Dios la tsqchàna tsjasán tí tjejórá jahará la ko kjuaxróxin tsjak'é tí tsjasántsjahará.

³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehé ch'án tí sín chóxin ch'án

¹ Tétuanhanrá tsjínkítsará tí tjan kíchó ní Febe ch'e tjan xṛa nṛnko chjasin Cencrea

² mé tjánjonrá kjuachaxin tsjak'e tjan kjuachaxién ihnié Ìnchéni éxi ch'eherá í so sín kíchó ní tinkáchónki Ìnchéni. Tsjínkítsará tjan ichrén nkehe t'ichjánxinhin tjan kixin jehe tjan kṛaxin kjuínkítsa tjan nchónhya chojni la kṛaxin kjuínkítsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuích'ekoni xṛa kixin kṛaxin sín mé ch'ehe sín Cristo xṛa.

⁴ Jehe sín chrók'uenxín sín kixin kjuínkítsana sín tí janhan mé xikaha tṛaha sín kjuasáya la jehya janhván, kṛaxin kaín sín kíchó ní nṛnkoé tí sín jehya judío.

⁵ Nixjehérá kṛaxin kaín kíchó ní tóchjina ntqe tjan Priscila la ko ch'ín Aquila. Nixjehérá tí ch'ín choxian jína Epeneto mé jehe ch'án la saoxín kuítekaon ch'án Cristo estado Acaya.

⁶ Nixjehérá tjan María kixin kṛaxin tjan kjuích'e tjan xṛa tí tjejórá ntiha.

⁷ Kṛaxin nixjehérá tí sín tsíkixín chjasenná mé ch'ín Andrónico la ko ch'ín Junias. Tí k'uikjèna ntqechiso la kṛaxin tí jehe sín k'uikjehé sín. Kṛaxin kaín tí í so sín apóstol la tjikosáyehe sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tṛaha tinkáchónki Ìnchéni.

⁹ Nixjehérá ch'ín Urbano kixin jnkokoá kjuít'akian ch'án xṛa kuènte Jesucristo la ko nixjehérá tí ch'ín choxian Estaquis.

¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kṛaxin nixjehérá tí sín kjéhya ch'ín Aristóbulo.

¹¹ Kṛaxin nixjehérá tí ch'ín kjéhyana Herodión la ko kṛaxin nixjehérá kaín tí sín kjéhya ch'ín Narciso kixin kṛaxin sín tinkáchónki sín Ìnchéni.

¹² Nixjehérá tjan Trifena la ko tjan Trifosa. Kṛaxin jehe sín kjuích'e sín xṛa kuènte Ìnchéni la ko nixjehérá kṛaxin tí tjan kíchó ní Pérsida. Kṛaxin kjuínkítsa tjan kjuích'e tjan xṛa kuènte Ìnchéni.

¹³ Kṛaxin nixjehérá ch'ín Rufo, ijnko chojni tsíkjeýá Ìnchéni la ko nixjehérá tí iné ch'án kṛaxin kixin kṛaxin tjan kjuínkítsa tjan tí janhan la éxi naná k'uikuan tí jehe tjan.

¹⁴ Kṛaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kíchó ní tjejóko tí jehe sín ntiha.

¹⁵ Nixjehérá kṛaxin ch'ín Filólogo la ko tjan Julia la ko ch'ín Nereo la ko tí tjan kíchó ch'án la ko ch'ín Olimpás la ko kaín tí sín kíchó ní tinkáchónki Ìnchéni tjejóko sín ntiha.

¹⁶ Kṛaxin tsehérá tja kíchuára kjuachaxin ihnié Ìnchéni. Kaín tí sín nṛnko kuènte Cristo ntihi xraxinkaon sín tí jahará la nixjahará sín.

¹⁷ Kíchóni, xrjanóahará kixin chrótsjehérá nkexro tí sín tjixrónkáxin chrók'óxíka tí sín jnkokoá tinkáchónki Ìnchéni. Jehe sín titekakonhya sín tí itén Dios kjuákohará k'uitjará. Tí xíkaha ch'e sín la chrók'uaxrjekjanxinrá ntiha.

¹⁸ Tí nkexro xíkaha ch'e la jehya Ìnchéni Jesucristo ch'ehe xra. Náhi. Jehí tjinkaon sín chrókjuixrónkáxin sín la nixja sín tí nkehe náxrjón ó la xíkaha ch'iyehé sín asén tí chojni naxa noehya.

¹⁹ Kaín chojni ó nohe kixin jahará la ó kuítekáonrá Ìnchéni. Mé xíkaha chàna tí janhan la tjínkavan chrókóxakonhanrá chrókjuich'erá xra jína. Jehya kixin chrókjuich'erá nkehe jínahya.

²⁰ Tí Dios tjanjon kjuaxróxin mé tjoka tsinkátja Satanás, í ts'etueñhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetqan ch'ín Pablo la kjaxin nixjahará kjuachaxién Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntqe ch'án la ko kaín tí sín kuènte nínko tójnkotsé ntqe ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kíchó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjínkítsa ch'án kixin jína chrók'uejorá éxí chrónka tí tan jína tsaáxinni la ko éxí kjuakoni kuènte Jesucristo. Tíha mé chaxín chrónka éxí Dios k'uetqan nchenoheni ch'án tí nkehe ninkexró k'uénoehya desde k'óna chjasintajni.

²⁶ A ntá ijie kaín ni tsonoexinni nkexrí nixja xroon ikjin tí sín profeta kixin nkexrí k'uetqan Dios itjen jnkochrín. Ntá kaín nkehe k'uénoehya ninkexró a ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokoá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Ìnchéni Jesucristo jnkochrín. Amén. Ó tjen.

Tí xroon saoxín ikjin ch'ín Pablo chr'énhen ch'án tí sín tinkáchónki Cristo síin chjasin Corinto

Ch'ín Pablo mé ikjin ch'án xroon ichr'án ch'án tí nínko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuente Ìnchéni Jesucristo mé chrókjuít'ahá ch'án xra. Janhan la ko kichó ni Sóstenes mé

² ikjinni tí xroon i chr'ánhanráni tí jahará tójnkotsérá nínko chjasin Corinto. Ó kjuínchetjóará Ìnchéni Jesucristo na mé kjueyará Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueya ch'án kaín xín tí sín tjanchehe sín Ìnchéni Jesucristo kixin chrókjuinkítsa ch'án sín, tíha mé Ìnché sín la ko Ìnchéni.

³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochrín tjáncháha Dios kjuasáya kixin sintayaonrá ch'án tí jahará kixin tinkáchónkirá Ìnchéni Cristo Jesús.

⁵ Na mé Dios tjáhará kjuachaxin kuente ch'án ntá xikaha antsí jína nohará chroxínrá kixin nkexrí tinkáchónkirá Ìnchéni la ko kjaxin antsí jína tiénxínrá kaín nkehe chaxín ntoá.

⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá.

⁷ Ntá jahará ó chontará kaín xín tí kjuachaxin kuente Nchakuen Dios, la í ninkehó t'itjyankíhya tí kjuachaxin kuente ch'án k'uayéhérá nachrohe tjejochonhénrá tsokjan Ìnchéni Jesucristo.

⁸ Ntá Ìnchéni ts'ayakonhanrá ch'án kixin tsjtoéhyará tí tinkáchónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án.

⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsikjeyará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrjanóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoará kichuárá.

¹¹ Kichóni, ó kuñhan tí nkehe chrónka tí sín kjéhya ch'ín Cloé kixin síin kjuanínkaon tí tjejorá tójnkotsérá ntiha.

¹² Na mé ntáxrjan kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin jahará chréhérá tí ch'ín Pedro, la ko í sorá ntáchrórá kixin chréhérá Cristo.

¹³ ¿Xá nkekjaín Cristo síin kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuikitexínrá tí njna ní?

14 Tjáneháha Dios kjuasáya kixin nijnko tí jahará kuíkítiahyará ntiha. Jehó ch'ín Crispo la ko ch'ín Gayo mé kuíkíte janhan.

15 Na mé nijnkorá xitjaha tsontáchrórá kixin nína kuíkítexínrá.

16 Kjaxin jehó kuíkíte tí ch'ín Estéfanos la ko tí sín kjéhya ch'án. Xráxinkakonhya á kuíkíte í so sín o náhi.

17 Kixin tí xra chjina Cristo jehya kixin chrókuíkíte chojni. Náhi. Tí xra chjina Inchéni kixin tsoxrjankaxián tí tan tsaáxinni. Tjínkakonhya kixin chrókuákoxián palabra náxrjón noi kixin xikaha chrókuákua ntá chrókujintamá tí kjuachaxin jié kónoxín tí k'uénxin Inchéni Jesús tí ntacruz, kjuák'enkání ch'án, k'uenyákonhenni ch'án.

Cristo mé tjákoxin tí kjuachaxiэн Dios la ko tjákoxin ch'án kixin imá nohe Dios

18 Chronkaxinni kixin k'uenyákonhenni Cristo tí ntacruz. A ntá tí tsinhin tí sín xráxin ts'itjáyan ntá ts'ikon sín tíha éxi nkehe chónkó. A ntá kaín ni chojni kuaáni mé t'ikonni kixin kjuachaxin jié tíha.

19 Mé xikaha ntácho xroon itén Dios tsíkjin sín ósé kixin Dios mé sinchek'itjáyan tí nkehe tjenkayáxin tí sín imá nohe, la ko tsítogenta ch'án tí nkehe ntácho tí sín imá tienxín sín.*

20 ¿Mé nkehe tsonhen ntácho sín kixin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe siín chjasintajni ó. A ntá Dios mé t'ikon ch'án kixin lontj sín kixin xikaha ichro sín.

21 Kixin Dios antsí nohe ntá xikaha kuítogehya ch'án kixin kjuachaxin kuénte sín ó chrókuacha sín chróchóxixín sín ch'án. Ntá kóxrjínhín Dios chrókuéyá ch'án chrókuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

22 Tí sín judío mé tjínkaon sín chrók'uikon sín kjuaxroan jié, ichro sín. A ntá tí sín nkíva griego mé xritjeyá sín kixin antsí chrókónohe sín, ichro sín.

23 A ntá jeheni kaín ni tinkáchónkini Cristo la tjínkakonhyani chrókónohene kaín tíha la mé jehó Cristo tjákoxiníni. Chrónkani kixin ijnko ntacruz kjuák'enkání ch'án, k'uénxin ch'án. A ntá tí sín judío ntácho sín kixin ijnko nkehe chrókósuèhèni chrókuinkáchónkini tíha, ichro sín. A ntá tí sín jehya judío ntácho sín kixin chojni lontj tí jeheni kixin xikaha tinkáchónkini, ichro sín.

24 A ntá tí sín kjueyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhenni ch'án. Mé xikaha tjákoxin Dios tí kjuachaxin jié la ko tí kjuaxrexinkaon jina kuénte ch'án.

25 Ntá jehé sín ntácho sín kixin éxi ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhé sín ch'án. La ko kjaxin ntácho sín kixin jiéhya tí kjuachaxin chónka Dios. A ntá tí sín antsí má chónka kjuachaxin ntihi chjasintajni kjónté la tóyóehya sín Dios kixin antsí chónka ch'án kjuachaxin t'etóan ch'án.

26 Kíchóni, xráxinkáonrá nkexri k'uéjorá ntá kjónté kjueyará Dios tí jahará. Na mé tsjéhyará imá kónohará éxi t'ikon tí sín chjasintajni la kjónté kjueyará Dios tí jahará. La ko tsjéhyará imá kuétóanrá la ko tsjéhyará k'uaxrjenixínrá tí sín imá k'uék'etóan.

27 Ntá kjónté Dios mé kjueyá iso tí sín noehya éxi t'ikon tí sín chjasintajni kixin xikaha tjínkaon ch'án chrókuinchesuèhé ch'án tí sín imá nohe ntihi

* 1:19 Isafas 29.14

chjasintajni. La ko kjaxin kjueyá Dios iso tí sín chóntahya kjuachaxin éxi t'ikon tí sín chjasintajni kixin xikaha tjinkaon ch'án chrókjuinchesuehe ch'án tí sín imá chóna kjuachaxin ntihi chjasintajni.

²⁸ Dios mé kjueyá ch'án iso tí sín t'etqanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuinçek'itjáyán ch'án kjuachaxién tí sín jehó chrók'uetqan.

²⁹ Méxra xikaha ninkexró tsjachahya sinchehnke tí tjen Dios.

³⁰ A ntá tí kjuachaxin kuènte Dios mé tinkachónkirá Cristo Jesús, a ntá chóntaxínni Cristo kjuaxrexinkaon jína, la ko tí kjuachaxin kuènte ch'án kóxika tí jié kuènteni, la ko tí kjuachaxin kuènte ch'án sinchetjuáxinni ch'án, la ko tí ijníé ch'án k'ueñaxínni ch'án.

³¹ Mé xikaha éxi chrónka tí xroon tsíkjin sín ósé ntáchro kixin: “Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kixin imá t'etqan tí kjuachaxin kuènte Dios.”†

2

Ch'in Pablo mé tjako ch'án kixin Jesucristo kjuák'enkáni ch'án ntacruz

¹ Kíchóni, tió kjuasán ntiha chjasánrá níxjahará chrókjuákoahará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá.

² Kixin tió k'uejóni jnkokoá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz.

³ K'uejóni jnkokoá ntiha la ntá jahará ó nohará kixin janhan kjuak'é éxi chrókjuachahya kixin síxränkana, chrákonna.

⁴ Tí kjuankíxian níxjahará la ko xrjankaxián tí tan tsaáxin chojni, la tjínkakhonhya chrókjuáchruáxinrá tí nkehe náxrjón níxja chojni tsíkónohe má. Náhi. Tió kjuákoahará kónoxín kixin tjékjan Nchakuen Dios la ko kónoxín tí kjuachaxin jié kuènte ch'án,

⁵ Kixin jehya kjuaxrexinkaon kuènte chojni tsíkónohe má chrókuinkachónkirá. Náhi. Tí kjuachaxin kuènte Dios mé chrókuinkachónkirá.

Nchakuen Dios mé tsqchóxixínni ch'án

⁶ Kjánchó tió tjáqoha tí sín chaxín ó nohe sín tinkáchónki Ìnchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etqan chjasintajni, na mé tí kjuachaxin kuènte sín la tjoka ts'itjáyán.

⁷ Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naqá k'ónahya chjasintajni kixin nkexrí tsaáxinni.

⁸ Nijnko tí sín t'etqan chjasintajni kienxínhya sín tí nkehe tsíkjenkayáxin Dios. A ntá tí chrókienxín sín tíha la ntá chrókjuák'enkanihya sín Ìnchéni tjeotan tí ntacruz.

⁹ Éxi ntáchro xroon itén Dios tsíkjin sín ósé kixin: Naqá k'uikonhya chojni la ko naqá kienhya chojni, la ko naqá kjuenkayáxinhya chojni

kixin nkexrí siín kaín xín nkehe kjuích'éna Dios ts'áyehé tí sín tjuèhe ch'án.*

† 1:31 Jeremías 9.23 * 2:9 Isaías 64.4

¹⁰ A ntá Dios mé nchenoexínni kaín tíha kíxin chóntani Nchakuen ch'án. Na mé tí Nchakuen Dios mé tjetsjehe kíxin nkexrí síin kaín xín nkehe la ko kjaxin nkexrí tjen tí nkehe tjenkayáxin Dios.

¹¹ Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kíxin nkexrí tónhen asén. Méxra xíkaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe.

¹² A ntá jehya tí nchakuen chojni chjasintajni k'uáyéheni. Náhi. Tí Nchakuen kuixín tí tjen Dios mé k'uáyéheni kíxin ntá tsoñoexínni kíxin kaín xín nkehe kjuínchekitonhenni Dios.

¹³ Kjaxin jeheni chrónkani tíhi, a ntá jehya chronkaxínni tí nkehe tsikónohe chojni ó. Náhi. Tí Nchakuen Dios mé nchenoexínni nkexrí tsjakóexínni tí sín chóna Nchakuen ch'án.

¹⁴ Kjánchó tí sín naxa chónahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxi lóco t'ikon sín kaín tíha kíxin jehó tí sín chóna Nchakuen Dios mé tsjacha sín tsienxín sín tíha.

¹⁵ A ntá tí nkexro chóna Nchakuen Dios mé chrókjuacha chrókonohe nkexrí síin kaín xín nkehe. Kjánchó tí nkexró chónahya Nchakuen Dios tsjachahya tsjanchia jie tí jehe ch'án.

¹⁶ Méxra ntácho xroon itén Dios kíxin: ¿Xá ninkexró chrókonohe kíxin nkexrí tjenkayáxin Ìnchéni kíxin chrókjuacha sín chrókjuakohe sín ch'án inaá?† Kjánchó jeheni la ó chóntani tí kjuaxrexinkaon kuente Cristo.

3

Tí sín jnkokoá kjuích'ehe sín Dios xra

¹ Mé xíkaha, kichó ni, kjuachahya janhan chrónixjahará éxi chojni t'etuenhen asén sín Nchakuen Dios. Náhi. Éxi chojni naxa nchexiteyéhe sín tí nkehe ntácho asén sín, na mé éxi xjan ntsintsí na ntá kjuankíxin kuinkáchónki Cristo mé xíkaha tí jahará.

² Janhan na kjuákoáxinrá nkehe xrahya éxi yóhe ijnko xjanhte tí jahará naxa nchekakí iné tsjen kíxin naxa xitjahya sine nkehe cha. Mé xíkaha tí jahará naxa xitjahya sinterá nkehe cha

³ kíxin naxa éxi chojni ó nchexiteyéhérá tí nkehe ntácho asánrá kíxin tí naxa síin kjuachjinoxínhin la ko síin kjuanínkaon la ko jnkokoáhya tjenkayáxinrá, la mé tjejoch'erá éxi ch'e kaín xín chojni chjasintajni.

⁴ Isorá ntáchrórá kíxin chréhérá tí janhan Pablo, la ko í sorá ntáchrórá kíxin chréhérá tí ch'ín Apolos. Na mé éxi chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkachónkirá Ìnchéni kíxin janhan kjuákoará. Jnkojnkoni kjuích'eni tí xra kjuanjon Ìnchéni.

⁶ Janhan kuènka, a ntá ch'ín Apolos ìnta kjuáka ch'án, a ntá Dios la mé kjuínchek'ánkí ch'án tí nkehe a.

⁷ Méxra tí nkexro k'ueñkaxin la ko tí nkexro tjáka ntá la kánhyó tjetoan kíxin Dios mé chóna kaín kjuachaxin la jehe ch'án nchek'ánkí kaín nkehe síin.

⁸ A ntá tí sín t'enka la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuích'e sín.

⁹ Méxra jeheni mé jnkokoá ch'eheni Dios xra, a ntá jahará mé éxi tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án.

¹⁰ Janhan mé tí maestro ch'éna nchia kixin Dios kjuanjon kjuachaxin tsjaké tí xro xrankixín, a ntá í jnko nkexro sich'éna nchia chrítaón tí xro a. A ntá jnkojnko nkexro t'ichjánxin ntoá chrókjuich'éna sín nchia chrítaón tí xro a,

¹¹ Kixin kohya ninkexró tsjacha tsjak'e í jnko xro xrankixín tí nchia a kixin táha la ó tsíkjin tsík'óna, kixin Jesucristo tíha.

¹² A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xro náxrjón tjeje, la ko inta tabla, la ko kanj, la ko ntaxro.

¹³ Na mé tsonoxín nkehe tí xra kjuich'e jnkojnko chojni tió tsi tí yaon tsjixín. Kixin tí yaon a mé tsi xrohi. A ntá tí xrohi mé tsjakoxin nkexéhe tí xra tsoche la ko nkexéhe tí xra tsochehya.

¹⁴ A ntá tí jnkojín chojni kjuich'éna ijnko nchia tsochehya la mé tsjacha ch'án tí xra kjuich'e ch'án.

¹⁵ A ntá tí chróche tí nchia kjuich'éna ijnko chojni, ntá chrók'uitjayan kuenté. A ntá tí nkexro kjuich'éna nchia la tsaá éxi yóhe chrókuinkéhe ch'án xrohi.

¹⁶ ¿Á noahyará kixin jahará kaín rá na mé ijnko ninkoe Dios la ko Nchakuen Dios mé chóna asánra?

¹⁷ A ntá jnkojín nkexro tjinkaon ts'ókika tí ninkoe Dios na mé Dios mé sinchek'itjayan tí nkexro xikaha sich'e kixin tí ninkoe Dios la tjóá tíha. A ntá tí ninko a mé jahará tíha.

¹⁸ Ninkexró chrókjuenkayáxin kixin imá nohe. Tí jnkojínra tónhen asánra kixin imá nohará éxi nohe chojni chjasintajni ó, na ntá chrókjanra chrók'ónará éxi chojni noehya kixin ntá chrók'uitjára chrók'ónará ijnko chojni chaxín nohe.

¹⁹ Tí nkehe nohe tí chojni chjasintajni la mé ijnko nkehe lontj t'ikon Dios. A ntá ntácho tí xroon itén Dios tsíkjin sín óse kixin: “Tí nkehe tsík'itjá sín ch'iyaxín sín la tíha mé tsokjan ts'énxín sín.”*

²⁰ La ko kjaxin ntácho xroon itén Dios kixin: “Ínchéni la ó nohe ch'án kixin kaín nkehe tjenkayáxin tí sín ntácho sín kixin imá nohe sín la mé ijnko kjuaxrexinkaon lontj tíha, ichro Dios.”†

²¹ Méxra chrókjuinchehnkehyará jahará kixin chréhérá ijnko chojni imá nohe, kixin kaín xín nkehe sín la kuéntará jahará,

²² mé janhan Pablo, la ko ch'in Apolos, la ko ch'in Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxin, la kaín la kuéntará tí jahará.

²³ A ntá jahará la Cristo mé t'ayakonhanrá. Kixin Cristo la jehe ch'án la mé kuente Dios.

4

Tí xra kjuich'e tí sín kjueyá Ínchéni

¹ Jahará chrók'uikonrá tí jeheni éxi chojni ch'ehó Cristo xra k'uáyéhéni tí xra tjakoni tí nkehe kuente Dios ninkexró k'uénoehya.

² A ntá ijnko chojni k'uáyéhe xra ts'etóan chrókjuakoxin kixin jína ch'án la ko jína ch'e ch'án xra.

³ A ntá janhan tóxakonnahya tí nkehe chróntáchorá jahará chrókjuanchiará jie tí janhan kixin tí xra t'aha Dios, la ko kjaxin tóxakonnahya tí nkehe

* 3:19 Job 5.13 † 3:20 Salmo 94.11

chróntácho í so chojni chjasintajni, chrókjuanchia sín jie tí janhan. Kjaxin janhan la tékahya jie asenná.

⁴ Kjánchó janhan tjenkayáxinhya kixin chonta jie. Kjánchó jehya xikaha tsontáxrjan kixin Dios t'ikon kixin chontahya jie janhan. Náhi. Jehé Inchéni mé tsotsjehe ch'án nkehe tí jie chonta janhan.

⁵ Méxra náxa kjuixrakáhya yaon chrókjuinchekitoxínra ichrén jie. Chonhénra tí tsi Inchéni kixin jehe ch'án mé sinchenoxín ch'án kaín tí nkehe ch'án tí sítié, la ko sinchenoxín ch'án kaín xín nkehe imó tjenkayáxin asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kíchóni, nixjahará tí nkehe i kixin jína chrók'uejorá jahará ntá xikaha kjuintayóaxian éxi ch'in Apolos la ko éxi janhan kixin chrók'uitjará kixin chrókjuenkayáxinra jehó tí nkehe tsikjin sín ósé, kixin nijnko nkexro chrókjuinchehkehya kixin chréhe sín ijnko chojni, a ntá tsochóntehya sín kjuasáyé tí í jnko chojni.

⁷ Méxra nkexro ntácho kixin jahará antsí tjetoanra? Xá nkehe chontará náxa kjuanjonyha Dios kixin? Tí kjuanjon Dios kaín nkehe chontará, ¿ntá nkeuente nechenkerá kixin jahará tsíkjéyará tiha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinra. Ntá jie tónhen asánra éxi ijnko rey, la í t'ichjánxianhyará ninkehó tí jeheni kixin náxa chrókjuinkitsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'uejotanni.

⁹ Ntá tónhen asenná kixin jeheni chojni kjuéyá Inchéni mé kjuanjon Dios kixin jeheni chrókjuixixín chrók'uejóni éxi chojni kuítonghenni kixin noxín chrók'ueni ts'ikon kaín xín chojni chjasintajni la ko ts'ikon tí sín ángel kjaxin.

¹⁰ A ntá jeheni tinkáchónkini Cristo, a ntá xikaha t'ikon sín tí jeheni éxi chojni lontj. A ntá t'ikon sín tí jahará éxi imá nohará. Jeheni la éxi chóntahyani kjuachaxin, a ntá jahará la éxi imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín.

¹¹ A ntá kjónté náxa jie jeheni t'enixími kjinta, la ko t'enixími ntá, la ko chóntahyani ikéni, la ko nínkakonghenni chojni, la ko chóntahyani nkeri ts'ejóni.

¹² La ko tóxrjéni kixin itjani ch'exínni xra. A ntá tió t'ántaxínhínni sín la tjancheheni Dios kixin sincheyaon ch'án tí jeheni sín. La ko tió chónkíhi sín tí jeheni la tónínkakuenhyani sín.

¹³ Tió t'ántaxínhínni sín la jnkojína tjeteheni tí jehe sín. T'ikon sín tí jeheni éxi chjínínó ntihi chjasintajni, na mé éxi ijnko nkehe ninkehó sínkíhya la ko mé xikaha náxa sítonhen tí yaon jie.

¹⁴ Ikjian tíhi na jehya kixin chrókjuintasuàhará. Náhi. Tjínkavan chrókjuintaxráxinkáonra kixin éxi xjanna t'ikuán tí jahará, tjuahará.

¹⁵ Kjónté chróchontará ite míl chojni chrókjuakohará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonra Cristo Jesús kixin kjuákoahará tí tan jína tsaáxinni.

¹⁶ Mé xikaha xrjanóghará kixin chrókjuákoxinra éxi tí janhan.

¹⁷ Méxra kuétuanhan tí ch'in Timoteo kixin tsjiji ch'án ntiha. Na mé éxi xjanna t'ikuán tí jehe ch'án, tjuahá ch'án, kixin kjuákoqha ch'án ntá kuítekaon ch'án Inchéni ntá xráxín jína ch'e ch'án xra. Ntá tsjiji ch'án sintaxraxinkáonra ch'án nkexrí tjákoxian tí ntje Cristo éxi xráxín tjákua kaín xín njnko t'atsínka tí janhan.

18 Ntá iso tí jahará imá ihnkerá kixin tjenkayáxinrá kixin chaxínhya chrókjuasántsjahará.

19 A ntá tjoka chrókjuasántsjahará tí chaxín xíkaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuiñhan. Náhí. Na mé ts'íkuan á chaxín chóna sín kjuachaxin kixin xíkaha nixja sín.

20 A ntá tí kjuachaxiën Dios la jehya tí nkehe tsonixjani ó. Náhí. Tí tjakoxinni la tí kjuachaxiën Dios.

21 ¿Nkehe tjinkáonrá tí jahará, kixin á chrókjuasán chrókjuintakjasótiará? ó ¿á tjinkáonrá kixin jnkojína chrókjuasán?

5

Tsitqexín ijnko jië tjachehe kichó chojni

1 ¿Á chaxín tsík'ikon sín kixin tí tjejórá ntiha la ijnkorá mé chontará nájoanrá éxi ichjiánrá? Tíha mé ijnko jië jié, la mé kjónté tí sín chónhya Dios la xíkaha ch'e sín.

2 A ntá kjónté xíkaha tsíkónhen la imá ihnkerá. Íchá jína imá chrók'uavará. A ntá tí xíkaha ch'e ijnko chojni ntá chrókuétuñhénrá ch'án sáchrókjuí ch'án, chrók'uejokoahyará ch'án ntiha.

3 A ntá ntáxrjan janhan kjónté tjenhya cuerpo kuéntana tí tjejórá ntiha la tí tjenkayáxian la ntaha tjèn éxi chrókjuak'é janhan, ntá t'akjénxian ihnié Ìnchéni Jesucristo la ntáxrjan kixin ó kjuixin kjuenkayáxian kixin nkexrí chrókjuasóte tí ch'ín xíkaha tsík'ich'e.

4 Tió tsjinkotsérá kaín rá ntiha la éxi koyá tsjak'é ntiha la kjánchó nchakuenná ó la ko koí tí kjuachaxiën Ìnchéni Jesús ts'ejókoará ntiha.

5 A ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuénte ch'án. Ntá tió tsokjan Ìnchéni mé tsaá asén ch'án.

6 Jahará chrókjuinchehnkehyará kixin tí nkehe tsíkónhen ntiha. ¿Á noahyará nkehe ntáchro sín, kixin tí ch'o a mé tjiko intsíkoá tí xroñ nchek'ánkí niotja, ntá kjónté la tsqsán kaín tí ch'o?

7 Méxra chrókuakítsjerá ntója kaín tí xroñ ntaxin nchek'ánkí niotja, kixin ntá jahará ts'ejórá éxi niotja tsík'óna ch'o nixin tsík'ikohya xroñ nchek'ánkí niotja. Éxi niotja ine sín tí yaon pascua, mé jahará tíha. Kixin jehé Cristo, éxi ijnko kolélo t'óyán sín tí yaon pascua, mé k'uenyákonhenni ch'án.

8 A ntá chrókjuasinni tí kia a la kaín asénni chrórxaxinkaonni, tíha la éxi tí niotja chóntahya xroñ nchek'ánkixin. La jehya kixin chrókjuasinni tí kia naxa chróchóntani kjuanínkaon kixin táha la yóhé tí xroñ ntaxin nchek'ánkí tí niotja a.

9 A ntá íjnko xroon chr'anhánrá k'uéntáxrjan kixin ninkehó chrók'uítohyará tí sín tjasin jië chóna chojni chjin ókjé.

10 Ntá jehya kixin kuétuanhanrá kixin chrók'uítohyará tí sín chjasintajni tjasin jië chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhí. Tí xíkaha chrókjuich'erá la t'ichjánxin chrók'uaxrjéxinrá tí chjasintajni.

11 Méxra ó kuétuanhanrá kixin chrók'uítohyará ninkehó jnkojin chojni ntáchro sín kixin kichó ní tí jehé sín, ntá naxa tjasin sín tí jië chóna sín chojni chjin ókjé, la ko tjinkaon sín jehó sín tsochóna sín itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia,

la ko tí sín tókoan, la ko tí sín teé chichaon, la mé tí chojni xikaha ch'e la chrókjontekoahyará sín.

¹² Jehya xraṇa chrókjuintakitōaxián tí ijíé tí sín jehya kuènte nṅko ntiha. A ntá tí xra kuèntará jahará kixin chrókjuinchekitōexínrá tí ijíé tí sín kichó ni tōjnkotsé nṅko ntiha.

¹³ A ntá Dios mé sinchekitōexín ch'án ijíé tí sín jehya kuènte nṅko. Méxra, takítsjekjanxinrá tí ch'ín jínahya kjuasin jie tí tjejorá ntiha.

6

Chrókjuikjanahya sín jie nkayakon tí ch'ín juez tinkáchónkihya Ìnchéni

¹ A ntá jnkojínrá chrókjuánjonkoará kichuára chrókjuikjanahyará jie nkayakon tí ch'ín juez tinkáchónkihya Ìnchéni. Íchá jína chrókjuírá chróchenkará tí sín tinkáchónki Dios.

² A noahyará kixin tí sín tinkáchónki Ìnchéni mé sinchekitōexín sín ijíé kaín xín chojni chjasintajni? A ntá xikaha sinchekitōexínrá ijíé kaín xín chojni chjasintajni, ¿ntá nkekuènte tsjachahyará sinchekitōexínrá kjónté ijnko jie ntsí?

³ ¿A noahyará jahará kixin kjónté tí sín ángel tsotsjeheni nkehe tí xra kjuich'e sín? A ntá ijnko nkehe intsí ntihyó, la ¿á xitjahya chrókjuásiyóxinrá?

⁴ A ntá xikaha chrókjuánjonkoará kichuára, ¿ntá nkekuènte tjíkjanchiará jie nkayakon tí sín tikiníxinhya kuènte nṅko?

⁵ Ntáxrjan xikaha kixin chrókjuintasuàhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijíé kichó ní?

⁶ Jahará jnkokoá kichuára ntá tjanjonrá, la ko kjaxin sátjíkjanchiará jie nkayakon tí ch'ín juez tinkáchónkihya Ìnchéni.

⁷ Kjónté ijnko jie ntsí ntá imá tjanjonkoáxinrá kichuára; tíha mé t'óna ijnko jie jie. Íchá jína chrókónínkákonhyará kixin tí nkehe jínahya kjuít'ahará sín. Íchá jína chrókujtohéra sín kjónté tsaáhará sín.

⁸ Kjánchó kjaxin jahará ntoáhya tjejoch'erá kixin kjónté jnkokoá kichuára la teherá sín.

⁹ ¿A noahyará kixin tí sín jínahya ch'e la ts'áyèhya sín kjuachaxin kuènte Dios? Chrókujtoéhyará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ó chjin, t'ó ntoa, la ko tí sín jnkokón ntoa sín tóxrjínhin kichó sín,

¹⁰ la ko tí xichee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí sín ch'èna kjuach'ia, la ko tí sín ixri ch'ia sín kixin tsjacha sín chichaon, na mé ts'áyèhya sín kjuachaxin kuènte Dios.

¹¹ Xikaha k'uéjorá isorá senó. Ntá jie ó k'uíjmará, kjuínchetjóará Dios, ntá ó xika ijíará kjuachaxin ihnié Ìnchéni Jesucristo la ko kjuachaxin kuènte Nchakuen Dios.

Tí cuerpo ó tsíkótjóa

¹² Siín kjuachaxin kaín nkehe chrókjuít'a, kjánchó iso nkehe la ó chónkó. Siín kjuachaxin kaín nkehe chrókjuít'a, kjánchó chrókujtoáhyá ninkehó nkehe chrók'uètuanna.

¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchekit'itjáyán yóí tíha. A ntá k'ónahya tí cuerpo kuènteni kixin chrókjuasixínni

jie. Náhí. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni.

¹⁴ Méxra Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kixin jnkojnko cuerpo kuèntará mé it'ò tí cuerpo kuènte Cristo? ¿Á chrókjuít'a janhan kixin it'ò tí cuerpo kuènte Cristo chrók'óna it'ò cuerpo kuènte ijnko chojni chjin ch'íyehé nchónhya chojni ntoa? Méxra kjá náhí.

¹⁶ ¿Á noahyará kixin tió ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín chrók'óna sín jnkokqá cuerpo? Kixin ntáchro xroon itén Dios kixin: “Yóí sín la ts'óna sín jnkokqá chojni.”*

¹⁷ A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokqá.

¹⁸ Méxra chrókjuítòhéra chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín.

¹⁹ ¿Á noahyará kixin jnkojnko cuerpo kuèntará mé éxí ijnko njnko itjen Nchakuen Dios kjuanjón ch'án k'uayéhé, la ko chontará tí Nchakuen ch'án tjóá? Jahará la jehya ìnché tí cuerpo kuèntará

²⁰ kixin jahará la tjete k'uénaxínra Dios. Méxra chjeéxinra kjuasáyé Dios tí cuerpo kuèntará la ko tí nchakónra kixin yóí la kuènte Dios.

7

Chenka ch'án tí sín tsíkótehe kixin nkexrí chrók'uejó sín

¹ A ntá jie tsjataha tí nkehe tsíkjinra kjuanchankinara, na mé ntáxrxan kixin chaxín chrókójina kixin tí chojni ntoa chrókuakjahya ichjién.

² Kjánchó tí xikaha imá tjinkaon sín tsochóna sín itsjé chojni chjin tsjasinko sín jie, la íchá jina jnkojnko chojni ntoa chróchóna jnkojnko ichjién kuènte la ko jnkojnko chojni chjin chróchóna jnkojnko xii kuènte.

³ Tí chojni ntoa la ko tí chojni chjin chrókjuinchexiteyéhé sín kíchó sín.

⁴ Tí chojni chjin jehya ìnché tí cuerpo kuènte tjan, na mé kuènte xii tjan. Ntá kjaxin xikaha tí chojni ntoa la jehya ìnché tí cuerpo kuènte ch'án, na mé kuènte ichjién ch'án.

⁵ Chrókjuincheniéhyará kichuára, jehí jnkokqá chrókjuenkayáxinra yóíra kixin tsochontehéra iso yaon kixin ntá kaín asánra chrónixjehéra Dios. Ntá tsjixin ntá chrókchjinehéra kichuára inaá kixin chrókjuítóéhyará kixin ch'ín Tsochren chrókjuacha chrókjuachroera ch'án chrókjuásinra jie.

⁶ Kaín tíhi tjonkara kixin tsonohara kixin síin kjuachaxin xikaha na kjánchó jehya kixin xikaha tétuanhanra.

⁷ A ntá janhan ntáxrxan kixin chrókójina kixin kaín rá chojni ntoara chrókóyohara éxí tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxá tóteehya la ko tí chojni tsikók'án na ntátjan sín kixin chrókójina kixin xikahó chrók'uejó sín chrókóteehya sín éxí tí janhan xikaha.

* 6:16 Génesis 2.24

9 Kjánchó tí chrókjuachahya sín tí tjak'e asén kíchó sín, naxa chrókjuasin sín jie, ntá íchá jína chrókótehe sín kixin jehya jína kixin jnkochríxín chrókjuak'ó asén sín.

10 A ntá jahará ó tsíkjixin tsíkótahará, la tétuanhanrá tíhi: a ntá jehya kixin kjuachaxin kuéntana tétuanxínrá. Náhi. Kjuachaxin kuente Ìnchéni mé tétuanxínrá kixin tí chojni chjin chrókjuákehya xii.

11 A ntá tí chrókjuákehē ijnko chojni chjin tí xii, ntá xikahó chrókuitohe tjan jehó tjan la ko chrókójína chrókóyóxin, chrókjuinhin tí kjuanínkaon kixin tí kjuákehē kíchó sín. Kjaxin xikaha tí chojni ntoa la chrókjuákehya tí ichjién.

12 A ntá tí nkehe tétuanhan tí í so sín jaí la kuéntana janhvàn, jehya kuente Ìnchéni, kixin tí tjen ijnko ch'ín kíchó ni chóna ch'án ichjién ch'án tinkáchónkihya Ìnchéni, na kjónté naxa tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan.

13 La ko tí tjen ijnko tjan kíchó ni chóna xii tjan tinkáchónkihya Ìnchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án.

14 Kixin tí xii tjan tinkáchónkihya Ìnchéni ntá jie ó kótjóá ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kixin tí xii tjan mé tinkáchónki Dios. A ntá tí xikahya, la tí xjeen sín chrókótuáhya, na ntá jie la mé ó kótjóá tí xjeen sín.

15 A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehē kíchó sín, la ája nohe sín tjákehē kíchó sín, kixin Dios tjinkaon kixin kjuaxróxin chrók'uejorá.

16 Jahará chojni chjinrá, ñkexrí chrókónohará kixin nkexrí chrókuaá xiará? La ko jahará chojni ntoará, ñkexrí chrókónohará kixin nkexrí chrókuaá ichjiánrá?

17 A ntá jnkojnko chojni chrók'uejó sín éxi tsíkjanjon Ìnchéni kjuachaxin tsík'áyehe sín, la ko éxi tí k'uejó sín tió k'uíyehē sín Dios, kjánchó chrókuitoehya sín tí jehe ch'án. Mé xikaha tétuanhan kaín tí njnko.

18 Tí chrók'uíyehē Dios ijnko ch'ín chóna xroye, ntá xikahó chrókuitohe ch'án. A ntá tí chrók'uíyehē Dios ijnko ch'ín chónahya tí xroye a, ntá kjónté chrókuaaha ch'án tí xroye a.

19 Na mé tjetuanhya á chóna chojni tí xroye o á chónahya chojni tí xroye. Na mé tí nkehe tjetuan kixin chrókjuinchexiteyéheni tí nkehe k'uetuan Dios.

20 Chrók'uejóni jnkojnkoní éxi k'uejóni tí k'uíyehēni Dios.

21 A ntá tió Dios k'uíyaha jaha, kjónté jaha ijnko chojni ch'exón xra, ntá chrókóakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuaákjá tíha.

22 Kixin tí nkexro kjuích'exón xra tió k'uíyehē Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uituenhya tió k'uíyehē Ìnchéni la mé jie mé ch'ehe ch'án xra Cristo.

23 Dios imá tjete k'ueanaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna Ìnchárá.

24 Méxra kíchó ni, éxi k'uejorá tió k'uíyahará Dios kixin tsinkáchónkirá ch'án, la xikahó naxa chrók'uejorá jie kixin chontará Ìnchéni tsjinkítsa.

25 A ntá tí chojni naxa tóteehya sin na mé janhan chontahya nkehe kuente Ìnchéni chrókuétuaghanán. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kixin kuikonóana Ìnchéni.

26 Mé xikaha tónna kixin chrókójína kixin jnkojnko chojni chrókuítóhe sín éxi tjejó sín chrókóteehya sín, kixin ijie la kjuaxróxinhya tjejóni.

27 A ntá tí chontará ichjiánrá ntá chrókjuakeéhyará tjan. A ntá tí chontahyará ichjiánrá ntá íchá jína chrókjuéyáhyará.

28 Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsikótehe la tsochónta sín kjuaxikaon, mé xikaha janhan chrókjuínkítsa sín kixin chróchóntahya sín kjuaxikaon.

29 Mé xikaha tjétjonkará kichó ni kixin tsjéhya yaon naxa t'itjáyan tsokjan Ìnchéni. Mé xikaha tí chojni ntoa chóna ichjién sín, la antsí tjeoan saoxín chrórxaxinkaon sín Ìnchéni, la ntá chr'éxin chrótjuéhe sín ichjién sín.

30 A ntá tí sín tsjánka la chrók'uejó sín éxi chrótsjánkahya sín. La ko tí sín chéhe la chrók'uejó sín éxi chéhya sín. La ko tí sín t'ena nkehe la chrók'uejó sín éxi chóntahya sín tí nkehe tsík'ena sín.

31 La ko tí sín kjuacha nkehe siín chjasintajni la chrók'uejó sín éxi ninkehó chróchóntahya sín, kixin kaín nkehe t'ikonni chjasintajni ntihi mé tjoka tsjeje.

32 Tjínkakonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuente Ìnchéni chrókjuinchexiteyéhe ch'án tí nkehe tóxrjnhin Ìnchéni.

33 A ntá tí ch'ín tsikótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án.

34 Ókjé tjenkayáxin tí tjan tsikótehe la ko tí tjan tsikóteehya kixin tí tjan tsikóteehya la antsí má tóxakonhen tjan tí xra kuente Ìnchéni kixin tjinkaon tjan kixin Dios sinchetjóá tí cuerpo kuente tjan la ko tí asén tjan. A ntá tí tjan tsikótehe mé tóxakonhen tjan tí nkehe siín chjasintajni kixin xikaha sinchechéhe tjan xii tjan.

35 Tjétjonkará tihí kixin tjínkavan kixin jína chrók'uejorá, jehya kixin xikaha chrókuétuaghanánrá. Náhi. Tjínkavan kixin kjuasáya chrók'uejorá jnkojína la jehó Ìnchéni chrókjuich'eherá xra.

36 A ntá jnkojínrá tjenkayáxinrá kixin chrókójína chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsoetehe tjan na mé jehya jie.

37 A ntá jnkojínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha.

38 Mé xikaha tí ttohérá xjaanrá chjin kixin tsoetehe tjan la ó nchoxon. La ko kjaxin tí tjínkakonhya tjan kixin chrókótohe tjan na mé antsí jína tíha.

39 Tí tjan tsikótehe mé k'uítuénxín tjan kjuachaxin tí ley kixin tsjak'eko tjan tí xii tí naxa tjechón ch'án. A ntá tí chrók'uen ch'án ntá tsochónta tjan kjuachaxin tsoetehe tjan ínaa tí nkexro tsoxrjnhin tjan, kjánchó jehó ijnko nkexro tinkáchónki Ìnchéni mé chrókótehe tjan.

40 Kjánchó antsí chrókóchéhe tjan tí jehó tjan chrókuitóhe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuente Nchakuen Dios.

8

Tí nkehe ine sín tjokehë sín tí nkehe tsíkjanoya

¹ A ntá jie tsoxrjanka kuènte ti ko its'en tjokehë sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kixin tí chrók'uitjani má ntá chrókóhneni má. Antsí tjetooan chrótjuèheni kichó ni kixin xíkaha antsí chrókuinkáchónkini Ìnchéni.

² Tí jnkojín nkexro ntáchro kixin nohe ch'án, na mé chaxínhya tíha la naxa t'itjáyán tí nkehe chrókónohe ch'án.

³ A ntá jnkojín nkexro tsojtjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehë sín tí nkehe tsíkjanoya, la ó noheni jína kixin tí nkehe tsíkjanoya la t'etuánhya ninkehó ntilhi chjasintajni, la ko ó noheni kixin jnkokoá Dios tjen.

⁵ A ntá síin nkehe nchek'in sín díos nkaya nkajní la ko chjasintajni na, kjánchó tí xíkaha la kjá chrók'uixin itsjé díos la ko itsjé ìnché sín.

⁶ A ntá jeheni chótani jnkokoá Dios na mé It'èni tíha, la jehe ch'án mé kjuich'éna ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe síin la kjuich'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuènnen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehë chojni tí nkehe tsíkjanoya na mé tjenkayáxin sín kixin ó tsík'áyéhe ijnko díos, kixin naxa noehya sín má, ntá ntáchro sín kixin ó kuámá sín tí jie kuènte tí nkehe tsíkjanoya.

⁸ Ó noheni chaxín kixin jehya kixin chrókóxrjínhin Dios tí jeheni kixin tí nkehe jína chrókjóneni. Náhi. Jehya kixin chrók'uejóxinni jína kixin tí nkehe chrókjóneni na ko tí nkehe chrókjónehyani.

⁹ Méxra tjtóéhyará kixin tí kjuachaxin chontará sinterá kaín xín nkehe mé xíkaha chrókjuachroe ijnko chojni kichó ni naxa noehya jína tinkáchónki Ìnchéni ntá tíha chrókjuasixín sín jie.

¹⁰ A ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko njnko nkehe tsíkjanoya, ntá tí chojni kichó ni naxa noehya jína ntá chrók'uikon sín xíkaha ntá kjaxin jehe sín tsojtjinkaon sín sine sín tí nkehe tsíkjokehë chojni ijnko díos chaxínhya.

¹¹ A ntá jahará ó nohará jína ntá xíkaha tjejoch'erá itsará sijnchek'itjáyánrá tí kichó ni naxa noehya jína tinkáchónki Ìnchéni kixin Cristo k'uenyákonhen tí jehe ch'án kjaxin.

¹² Méxra tí xíkaha chrókjuich'erá la chrókjuásinhínrá jie tí sín kichó ni naxa tinkáchónkihya sín Ìnchéni jína, na mé xíkaha kjaxin chrókjuásinrá jie chrókuitekákuenhyará Cristo.

¹³ Méxra tí xíkaha chrókjuasixín jie ijnko kichó ni kixin tí nkehe chrókjóneni, ntá íchá jína chrókjónehyani nto inaá kixin xíkaha ntá chrókjuichroexín tí sín kichó ni ntá chrókjuasixín sín jie.

9

Tí kjuachaxin chóna ijnko apóstol

1 Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjeýá Ìnchéni kixin janhan k'uíkuān ch'án. Jahará mé tjákoxinrá tí xra kjuít'a kuēnte Ìnchéni.

2 Iso sín ntáchro sín kixin tjátsanhyana sín kixin ijnko apóstol tsíkjeýá Ìnchéni. Ntá jahará kaín rá mé chrókuátsanrá tí janhan kixin tí kuítekaonrá kuinkachónkirá Ìnchéni mé xíkaha tjákoxinrá kixin chaxín janhan tsíkjeýána ch'án.

3 Méxra janhan jína chrókuátaha tí sín xritjontana, chróntáxrjan kixin:

4 Janhan chonta kaín kjuachaxin chrók'uayáha nkehe chrókjoné la ko chrók'uia.

5 Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxi chóna tí í so sín tsíkjeýá Ìnchéni, la ko tí sín kichó Ìnchéni, la ko éxi chóna ch'ín Pedro.

6 ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítoheni tí xra sich'exinni tjani?

7 ¿Nkexro ch'e xra soldado ntá chjchakoēn ch'án ó chrókuicháxinhin? Nkexro k'uēnkā nta to uva ntá kjonehya ch'án to? ¿La ko nkexro t'ayakonhen kolélo ntá k'uíhya tí tsjen t'énhen sín va?

8 Ntáchrohyará kixin janhvān kjuenkayáxian tíha kixin kjaxin xroon tsíkjin ch'ín Moisés xíkaha nixja.

9 Méxra kjaxin ntáchro tí xroon tsíkjin ch'ín Moisés ósé kixin: "Chrókuéjójyáhyará kampoza ir'va koxinta tí tsinkátja va noatrigo tíó tsónkéhe sín noa."* Tíha mé t'axrjéxín kixin jehya koxinta ó tóxakonhen Dios.

10 Náhí. Tóxakonhen ch'án kixin tí jeheni. Méxra xíkaha nixja tí xroon kixin chrók'uejójinni jína. A ntá tí nkexro kjuínchentá nche la ko tí nkexro tsónkéhe noa, yóí sín la chróchónhen sín chrók'uáyéhe sín tí nkehe k'óna.

11 A ntá tí k'uēnkāni tí itén Dios asánrá, la kjá chróchóntani kjuachaxin chrókuanchaharáni ichrén nkehe t'ichjánxinhinni.

12 A ntá tí xíkaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uáyéheni nkehe.

Kjonté chóntani kjuachaxin xíkaha la kjuanchahyani nkehe, kjonté kánhyó náxrjón k'uéjóni kixin tjinkakonhyani chrókuanchiani nkehe chrók'uichjánxinhinni kixin ách'e xíkaha ntá chrók'uinkákonhen tí itén Cristo chrókuakoni.

13 Jahará ó nohará kixin tí sín ch'e xra kùente njnko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntóe tí ko t'óyánxin sín ntíha.

14 Méxra xíkaha kjaxin k'uētoan Ìnchéni kixin tí sín ch'e tí xra ó chrónka sín tí tan tsaáxinni na mé tí xra a chrók'uaxrjenixin tí nkehe chrókjóné sín.

15 Kjonté janhan síin kjuachaxin xíkaha chrókjuít'a, la xíkaha kjuít'a la ko kjaxin xíkaha ikjian tí xroon i kixin jahará chróchjinará ichrén nkehe. Náhí. Kjonté chrók'uēnixān kjinta chrókuancháhyará nkehe kixin tjínkakonhya kixin ninkexró chrókuakitsjena tí kjuachéhe chonta.

16 Jehya kixin chrokujuintahnke chrókuakua tí tan tsaáxinni. Náhí. Janhan na ó jehí sít'a tí xra a. Nòa tí janhan tí chrókuákohya tí tan jína chrókuáxin chojni.

* 9:9 Deuteronomio 25.4

¹⁷ A ntá tí janhván tjínkavan chrókjuakua la xikahó chrókjuacha janhan. A ntá tí tjákua itén Dios kixin xikaha kuítuanna ntá xikahó ntaxiteyá tí xra chjina Dios.

¹⁸ ¿A ntá nkehe chrókjuacha janhan? Tíha mé chrókjuacha janhan kixin chrókchána má kixin chrókjuakua tí itan tsaáxinni la ninkehó chrókjuánchàhya chrókjuacha la ntá tí xikaha la chrókuákjaáhya tí kjuachaxin tí chrókjuakua.

¹⁹ Méxra kohya nkexro t'etuanna. Kjánchó ó jehí chrókjuít'ahá kaín xín chojni xra kixin xikaha antsí tsjé chojni chrókjuacha janhan kixin chrókuitekaon sín Cristo.

²⁰ Ti tjèn tí siín tí sín judío ntayóha éxí jehe sín xikaha janhan kixin xikaha chrókjuacha jnkojín sín chrókuitekaon sín. Na mé t'axrjexín kixin tí chrókjuacha iso tí sín nchexiteyèhe tí ley k'uetqan ch'in Moisés, la t'ichjánxin kixin kjaxin janhan chrókjuíntaxiteyá tí ley kjónté janhan la xikahya t'etuanna tí ley.

²¹ A ntá tí chrókjuacha jnkojín tí sín nchexiteyèhya tí nkehe k'uetqan ch'in Moisés la ntayóha éxí tí jehe sín xikaha janhan kjaxin, kjónté chaxin t'etuanna tí nkehe k'uetqan Dios méxra ntaxiteyá tí nkehe k'uetqan Cristo.

²² Tió tjèn tí siín tí sín tienxínhya jína, ntá kjaxin janhan t'óna éxí tí jehe sín kixin xikaha chrókjuacha jnkojín tí jehe sín chrókuitekaon sín. Méxra ntayóha éxí kaín xín chojni xikaha janhan kixin xikaha chrókjuacha janhan kixin chrókuaa iso tí jehe sín.

²³ Mé xikaha kaín tíha tjét'a kixin chrókuinhin sín tí tan chrókuaáxin sín la ko kjaxinna antsí má chrókjuíntayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsitonhen nkehe. A ntá jahará xikaha chrókuinkará kixin chrók'uayéherá tí nkehe chrókjuítonhanrá.

²⁵ Tí sín tinkáko kichó sín na mé jína t'ayakonhen sín asén sín, títohe sín kaín xín nkehe chrókjuich'ehe sín dañó kixin tjinkaon sín chrókjuacha sín, chrók'uayéhe sín kjónté ijnko corona tsík'óna kayoa ó tjoka tsqxámá. Kjánchó jeheni ch'eni xra kuènte Ìnchéni kixin ntá ts'áyèhèni ijnko nkehe chónhya tsqxámá.

²⁶ A ntá janhan jehya éxí ijnko chojni t'ikonhya chrókuinka. Jehya éxí xrinto ó chrókjuánjonkian.

²⁷ Náhi. Janhan tjánjonkian tí cuerpo kuèntana, tétuñhan kixin jína chrókjuinchexiteyàna kixin tóxakonna kixin chrókjuásian ichrén jje ntá janhan chrókjuachahya kjónté senó kjuákqahá itsjé chojni.

10

Tí nkehe t'etqan ch'án kuènte tí nkehe tsíkjangya

¹ Tjínkavan janhan kixin chrókónohará kichó ní kixin tí sín k'uaxrjenixinni ósé, kaín sín k'uixinkánkí sín chrínkí tí tjuj, la ko kaín sín k'uátòye sín Ntayaon Kjátse,

² la ko kaín sín k'uéchrèhe sín ch'in Moisés éxí yóhe chrókuikite sín kixin jnkokoá k'uejó sín tí tjen tí tjuj la ko tí ntayaon la ko kjuínchexiteyèhe sín ch'án kixin jehe ch'án k'uék'etqan ch'án.

³ La ko kaín sín kjóne sín jnkokón nkehe kujxin nkaya nkajní

⁴ la ko kaín sín ik'ui sín jnkokón nkehe kjuañjon Dios kixin ik'ui sín ntá k'uaxrjexín ijnko tjo kjuíncheyaon Dios, na mé tí tjo a la mé t'axrjexín kixin Cristo tíha.

⁵ Kjánchó itsjé tí jehe sín kjuínchechèhya sín Dios, méxra kóninkaon ch'án la tí nteje ó k'uénxin tí sín a.

⁶ Kaínxin tíha kónhen kíxin chrórxaxinkakonxínni jeheni, chróntáchrohya asénni chrókjuich'eni tí nkehe jínahya éxi kjuích'e tí jehe sín.

⁷ Méxra chrókuinkachónkihyará jahará nkehe tsíkjanoya éxi k'uékinkáchónki iso tí jehe sín, éxi ntácho tí xroon itén Dios tsíkjin sín ósé kíxin: “Kaín sín k'uéjótjxin sín kjóne sín la ko ik'ui sín, ntá kjuixin la k'uínkatjen sín la ité sín”.*

⁸ Méxra chrókjuasinkohyani jie chojni chjin ókjé éxi kjuích'e iso jehe sín ntá ik'uén sín, ventitres mil sín, jnkokoá yaon.†

⁹ Kjaxin chrókjuinchekóninkakonhyani Ìnchéni éxi kjuích'e sín ntá ik'uén sín kíxin kjónehe sín konche,‡

¹⁰ la ko chrók'uántaxíenhyani Dios éxi k'uántaxínhin tí jehe sín ntá tí ángel kuènte kjuach'én mé kui k'óyán sín.§

¹¹ Kaín tíha kónhen tí sín k'uaxrjenixinni ósé kíxin chrókónoexínni la ko k'óna xroon chrónka xíkaha kíxin nchexraxinkaonni tí jeheni tjejóni jie kíxin í séhya tsjixixín tsjeje chjasintajni.

¹² A ntá tí nkexro ntácho kíxin ntoá tjen na chrókóxakonhen kíxin chrókjuichroehya.

¹³ Jahará naxa k'uatsínkahyará ninkehó nkehe tí chrókjuachahya chojni chrókónhen. Méxra jahará chrórxáinkáonrá Dios kíxin jehe ch'án chrókuítqehya ch'án tí jahará kíxin chrók'uatsínkará nkehe imá xra chrókjuachahyará. Méxra tí itsi ichrén nkehe tsonhanrá la Dios tsjinkítsará ch'án kíxin chrókjuachará chrók'uatsínkará tí nkehe chrókónhanrá.

¹⁴ Méxra tjuahará jahará kíchó ni, la ntá ntáxrjan kíxin chrókuítqohérá tí nkehe tsíkjanoya.

¹⁵ Nixjahará jahará kíxin jahará chojni ó tienxín. Méxra jahóra chrokJuenkayáxinrá kíxin á jína tí nkehe ntáxrjan.

¹⁶ Tí tjanchiani kjuasáya kíxin tí nkehe it'ini na mé kaín ni jnkokoá tjakoxínni tí ijníé Cristo ó k'uítji. La ko tió tochrít'oni tí niotjā ineni, na mé kaín ni jnkokoá tjakoxínni tí cuerpo kuènte Cristo.

¹⁷ Kjónté nchónhyani jeheni la kaín ni na jnkokoá niotjā ineni kíxin kaín ni jnkokoá k'ónani cuerpo kuènte Cristo.

¹⁸ Chrókónohará nkexrí ch'e tí sín chjasin Israel, na mé ine sín tí ko tsíkjoqehé sín Dios ntá xíkaha tjakoxin sín kíxin xíkaha tinkáchónki sín.

¹⁹ Ntáxrjanhya kíxin tí nkehe tsíkjanoya la chóna kjuachaxin, la ko ntáxrjanhya kíxin tí nto tsíkjoqehé sín tí nkehe tsíkjanoya la antsí chóna kjuachaxin.

²⁰ Náhí. Ntáxrjan kíxin tí nkehe tjanjon tí sín chónhya Dios na mé tjokqehé sín tí nchakuen tí jínahya la jehya Dios tjokqehé sín tíha. Méxra janhan tjínkakonhya kíxin xíkaha chrókjuich'erá jahará chrórxáinkáonrá tí nchakuen tí jínahya.

²¹ Tí its'ini tí nkehe xraxinkakonxínni ijníé Ìnchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrók'uini. Tí sineni tí nkehe xraxinkakonxínni tí cuerpo kuènte Ìnchéni ntá kjaxin tí chrókjóneni tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrókjóneni tí nkehe.

* 10:7 Éxodo 32.6 † 10:8 Números 25.6-9 ‡ 10:9 Números 21.5-6 § 10:10 Números 16.41-49

²² ¿A jína chrókjuinchekóninkaonni Ìnchéni ní? ¿Á jeheni antsí chóntani kjuachaxin la ntá jehe ch'án la náhi ní?

Chóntani kaín kjuachaxin kaín xín nkehe na kjónté antsí tjetooan tsotjuèheni kichó ni

²³ Siín kjuachaxin ichrén nkehe chrókjuich'eni. Kjánchó jehya kixin kaín nkehe la jína. Siín kjuachaxin ichrén nkehe chrókjuich'eni na kjánchó kénhya nkehe chrókjuinkitsa chrókónoheni tí nkehe kuènte Dios.

²⁴ Chrókjuéyáhyará tí nkehe chrók'uejóxinnrá jína jahórá. Náhi. Kjaxin chrókjuéyará tí nkehe chrók'uejóxin jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin tí xikaha ntá ntoáhya chrókjuenkayáxinrá,

²⁶ kixin kuènté chjasintajni la kaín xín nkehe siín la kuènte Ìnchéni.

²⁷ A ntá jnkójín chojni tinkáchónkihya Ìnchéni chrók'uíyahará sín kixin chrókjóntekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó.

²⁸ Kjánchó tí chróntácho jnkójín sín kixin tí nto la ó tsikjokehe sín ijnko nkehe tsikjanoya, ichro sín, ntá tí xikaha la chrókjóntehyará jahará, chrókóxakonhanrá kixin ntoáhya chrókjuenkayáxin tí nkexro chrónka xikaha.

²⁹ Méxra ntáxrjan tíhi kixin tjínkakhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankínará kixin nkekuènte chrókóxakonhanrá nkehe chrókjuenkayáxin ókjé chojni kixin tí kjuachaxin chontará.

³⁰ Tí tjáncháha Dios kjuasáya kixin tí nkehe inè, ¿ntá nkekuènte kixin chrókjontana chojni kixin kuènte kjonè?

³¹ Tí chrókjónterá nkehe la ko chrók'uirá nkehe la ko ichrén xra chrókjuich'erá la chrókjuákoxinrá kixin Dios kjuínkitsará.

³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni nínkoje Dios.

³³ Janhan mé tjéyá kixin kaín xín xra tjet'a chrókóxrjinhjin kaín xín chojni, na mé jehya kixin tjéyá kixin janhvàn chrókjuak'é jína. Náhi. Kjaxin tjínkavan kixin chrókuaáxin í so chojni.

11

¹ Chrókjuákoxinrá jahará éxi kjuákoxian janhan kixin janhan mé kjuákoxian éxi kjuákoxin Cristo.

Jína chrók'uejé tí chojni chjin tió tójkotsé chojni

² Kichóni, chàna kixin xráxin xráxinkáonrá tí janhan la ko nchexiteyéherá tí nkehe kjuákohará.

³ A ntá tjínkavan kixin chrókiénxinrá kixin Cristo t'etuenhen jnkójnko chojni ntoa, la ko kjaxin xikaha jnkójnko chojni ntoa mé t'etuenhen tí ichjién, la ko kjaxin xikaha Dios mé t'etuenhen Cristo.

⁴ A ntá tí jnkójín chojni ntoa xrasixín kachjinke ch'án tí tjenixjehé ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjákoxin ch'án kixin chóntehya ch'án kjuasáyé tí Ìnchéni t'etuenhen ch'án.

⁵ A ntá ijnko chojni chjin tjóhín kja tjan tí tjenixjehé tjan Dios la o tjóhín kja tjan tí tjechronka tjan iten Dios, mé xikaha tjákoxin tjan kixin chóntehya tjan kjuasáyé tí xii tjan. Mé tóyóhé éxi tsikjín tjan xikaha.

⁶ A ntá tí chojni chjin tjinkakonhya kixin chrók'uiáxin kja tjan nkehe mé chrókjin tjan. Kjánchó tí chrókósuehe tjan chrókjin tjan, ntá chrók'uiáxin kja tjan tóte tió tójkotsérá.

⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxi retratogé Dios la ko t'inkaséyanxin ch'án tí kjuachaxin kuente Dios. A ntá tí chojni chjin mé t'inkaséyanxin tjan tí kjuachaxin kuente tí xii tjan.

⁸ Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhi. Tí chojni chjin mé k'uaxrjeníxin tí chojni ntoa.

⁹ Chaxín k'ónahya tí chojni ntoa kixin jehó tsjak'e ch'án. Náhi. Tí chojni chjin mé k'óna kixin tsjak'ekotoxin ch'án.

¹⁰ Ntá t'ichjánxin kixin tí chojni chjin ts'iaáxin kja sín tóte chrókjuakoxin sín kixin t'ítuenhen sín kixin xikaha ts'ikon tí sín ángel.

¹¹ Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa.

¹² Kixin chaxín tí chojni chjin na tí chojni ntoa k'uaxrjeníxin. A ntá jie tí chojni chjin na mé t'axrjeníxin tí chojni ntoa. A ntá kaín ni k'uaxrjeníxinni Dios.

¹³ Jahará nkechorá, ¿á ó nchoxon kixin ijnko chojni chjin tjóchin kja tjan chrónixjehe tjan Dios?

¹⁴ Jahóra chrókónohará kixin chrókósuehe tí chojni ntoa chóna kaxihi kjinjin.

¹⁵ A ntá tí chojni chjin chóna kaxihi kjinjin la mé ntoá tíha kixin ó kuituexin tjan kixin tsochóna tjan kaxihi tjan kjinjin kixin tsotjóchinhya kja tjan.

¹⁶ A ntá tí tjen jnkójin nkexro titekakonhya tíha xikaha ntá chrókónohará kixin jeheni la ko kaín xín tí sín ninkoe Dios la xikahó kuenhenni.

Ntoáhya kjóne sín tí niotja xraxinkakonxin sín Ìnchéni

¹⁷ Méxra tí nkehe tjékjian la mé ijnko nkehe tóxrjinnahya tjejoch'erá. Tió tójkotsérá ntiha la ijnko nkehe jina chrókjuich'erá. A ntá náhi la ijnko nkehe jínahya tjejoch'erá.

¹⁸ Na mé saoxín na mé ntáchro sín kixin tió tójkotsérá la jnkokoáhya tjenkayáxinrá. Ntáxrjan kixin ách'e chaxín xikaha tjejorá.

¹⁹ ¿Xá t'ichjánxin kixin chrók'uaxrjentará kixin chrókónoexinni kixin nkexro chaxin tinkáchónki Ìnchéni la ko nkexro tí náhi?

²⁰ Méxra tí xikaha jnkokoáhya tjenkayáxinrá ntá tió tójkotsérá chrókjónterá niotja la chaxínhya xraxinkákonxinrá Ìnchéni tí xikaha.

²¹ Kixin tió sinterá la senó isorá tjejonterá tí nkehe tsikjasánkoará, la isorá la kjónté naxa t'énxinrá kjinta, la í sorá la tsikókoanrá.

²² ¿Á chontahyará nchia ntoará? Ntahó chrókjöntexinrá la ko chrók'uíxinrá nkehe. Mé xikaha chontahyará kjuasáyé tí ninkoe Dios la ko nchesuehéra tí sín nòa chónahya ninkehó. ¿Nkehe tsontáxrjan? ¿Á tsontáxrjan kixin jina tjejoch'erá? Kjá náhi. Jehya jina tjejoch'erá.

Jina chróxraxinkakonxinni Ìnchéni (Mt. 26.26-29; Mr. 14.22-25; Lc. 22.14-20)

²³ Kixin Ìnchéni mé chjina ch'án tí nkehe kjuákoahará: kixin tí tie tsikóxi ch'án na mé jehe ch'án kuákja ch'án tí niotja

24 ntá kjuixin kjuanchia ch'án kjuasáya ntá kóchrít'ò ch'án tí nioṭṭja ntá ntáchro ch'án kixin: “Tíhi mé nṭona xránjon its'en kixin jína ts'ejóxin tí jahará. Méxra xikaha s̄ich'erá kixin tsoxraxinkákonxínrá tí janhan”, ichro ch'án.

25 La ko kjaxin xikaha tió kjuixin kjóne sín ntá kuákja ch'án tí vaso la ntáchro ch'án kixin: “Tíhi mé tjakoxin kixin chaxin tsoxiteyá ijnko nkehe nixin kuente Dios kixin ts'ítji jnina. Tió its'irá tíhi mé tsoxraxinkákonxínrá tí janhan”, mé chro ch'án.

26 Kixin tí interá tí nioṭṭja la it'irá tí inté to uva mé xikaha tjeotjájokoxinrá kixin xikaha k'uénxin Ìnchéni. Mé xikaha tsjákokoxinrá tsjixrakájia yaon tsokjan ch'án.

Ntoá chrókjóneni tí nioṭṭja kuente Ìnchéni

27 A ntá jnkojin nkexro chjini chrókjóne sín tí nioṭṭja la ko chrók'ui sín tí inté to uva xraxinkakoxinni Ìnchéni, mé xikaha chrókjuasin sín jie chrókjuikosáyehya sín tí cuerpo la ko tí ijnié Ìnchéni.

28 Méxra jnkojnkonni chrókjuenkayáxinni senó kixin á chóntahyani jie na ntá chrókjóneni tí nioṭṭja la ko chrók'uini tí inté to uva.

29 A ntá tí xikaha chjini chrókjóneni la ko chjini chrók'uini la chaxínhya chróxraxinkakoxinni tí cuerpo kuente Ìnchéni la mé tí xikaha chrókjuich'eni la chrókjuasótexinni tíha.

30 Mé xikaha itsjérá níhará la ko itsjérá tsan̄kahyará la ko jnkojinrá k'uénrá.

31 A ntá tí chrókjuatsõanni nkexrí tjen asénni jeheni ntá Ìnchéni t'ichjánxienhya chrókjuinchekjásóteni ch'án.

32 A ntá kjónté chrókjuinchekjásóteni Ìnchéni ntá chrók'uitjani chrókjuinchejitéhēni ch'án, ntá chrókjuasótehyani éxi tsjasóte tí í so chojni chjasintajni.

33 Méxra kichó ni, tió tójkotsérá sinterá la chróchonhénrá chrókui tí í so sín ntá chrókjóntekoará sín jnkokõá.

34 A ntá tí nkexro ik'uén kjinta la íchá jína senó chrókjónexin nkehe nṭoe ó kixin ntá chrókjuinchekjásótehyará Dios kixin xikaha ntoáhya tójkotsérá. A ntá tí í so nkehe la tsjásiyóxian janhan tió tsjasántjahará.

12

Nchakuen Dios mé chjéhe kjuachaxin jnkojnko chojni

1 Kichóni, tjínkavan kixin tsonohará jína kixin nkexrí siín tí kjuachaxin tjanjon Nchakuen Dios t'áyéhe jnkojnko chojni.

2 Jahará ó nohará jína kixin tió naxā kuinkachónkehyará Ìnchéni na mé kuinkachréhérá tí nkehe tsíkjanoya nixjahya.

3 Méxra chrókónohará kixin nijnko nkexro nixjajin kjuachaxin Nchakuen Dios tsjacha ts'ántaxinh̄n Jesús, la ko nijnko nkexro tsjacha tsontáchro sín kixin Jesús mé Ìnché sín tí nixjajinhya sín tí kjuachaxin Nchakuen Dios.

4 A ntá nchónhya xrā kuente kjuachaxin Nchakuen Dios siín la kjánchó jnkokõá Nchakuen Dios mé tjetjanjon.

5 La ko siín nchónhya nkexrí sich'ehe ni xrā Ìnchéni, kjánchó Ìnchéni la ójnkó nkexro tíha.

6 La ko nchónhya nkehe t'axrjexin tí xrā ch'e jnkojnko chojni la kjánchó jnkokõá Dios tjetjanjon tí kjuachaxin ch'exinni xrā kaín ni.

⁷ Jnkojnko chojni mé kujtonhen kixin chrókjuakoxin kjuachaxin kuente Nchakuen Dios kixin xikaha chrókjuinkitsa kichó.

⁸ Iso chojni mé ts'áyéhe kjuachaxin tsonixja sín kjuaxrexinkaon jina kixin tjinkitsa Nchakuen Dios, la ko í so chojni ts'áyéhe kjuachaxin tsochronka ijnko nkehe kuente Dios noehya tí í so sín kixin Nchakuen Dios mé tjinkitsa sín tsonixja sín.

⁹ La ko í so chojni mé ts'áyéhe kjuachaxin antsí tsinkáchónki Dios kixin Nchakuen Dios mé tjinkitsa. La ko í so chojni mé ts'áyéhe kjuachaxin sinchekitohe chojni jina.

¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsqanxin á kjuachaxin kuente Nchakuen Dios o á kjuachaxin kuente ijnko nchakuen jínahya chronkaxin ijnko chojni, la ko í so chojni mé ts'áyéhe kjuachaxin kixin ijnko nkiva ókjé naxa k'uitjahya sín tsonixjxin sín ijnko nkehe kuente Dios, la ko í so chojni mé ts'áyéhe kjuachaxin tsochronkaxin nkexrí t'axrjexin tí nkehe ókjé nkiva tsíchronka tí í jnko chojni.

¹¹ Kjánchó kaín tíha jnkokoá Nchakuen Dios mé tjinkitsa, na mé k'uáyéhe jnkojnko chojni jnkojnko kjuachaxin éxi tjinkaon tí Nchakuen Dios nkerí xra chrókjuich'e sín.

Káinni k'ónani jnkokoá cuerpo kuente Cristo

¹² Cristo la éxi yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjonté nchónhya parte chóna tí cuerpo la tí cuerpo la ójnkó. Mé xikaha Inchéni Cristo la ójnkó tí jehe ch'án.

¹³ Káinni kjonté chojni judío la kjonté chojni jehya judío, la kjonté chojni ch'exón xra, la kjonté chojni t'ítuenhya, kaín ni na mé jnkokoáxón Nchakuen Dios kuítexinni, na kaín ni k'ónani jnkokoá cuerpo kuente Cristo, na mé éxi jnkokoá nkehe ik'uúni kaín ni na mé k'uáyéheni tí jnkokoá Nchakuen Dios.

¹⁴ Kixin tí cuerpo kuèteni la jehya jnkokoá parte chóna. Náhi. Itsjé parte chóna tí cuerpo.

¹⁵ Tí chróntácho tí toteni kixin: “Jehya itja tí jeheni na mé jehya jeheni kuente tí cuerpo”, na mé chaxínhya tíha kixin ó jehe cuerpo kuente.

¹⁶ Kjaxin tí chróntácho ijnko ntatsjoni kixin: “Jehya ikon tí jeheni na mé jehya jeheni kuente tí cuerpo a”, na mé chaxínhya tíha kixin ó jehe cuerpo kuente.

¹⁷ Tí chaxín kuenté cuerpo kuèteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuèteni chrók'óna ntatsjoni, ¿ntá nkexrí chrókókaxraxéheni?

¹⁸ A ntá Dios kjuanjon ch'án kjuachaxin nkexrí ch'e xra jnkojnko nkehe kuente cuerpo kuèteni kixin jehe ch'án nkexrí tjinkaon ch'án cóxrjínjin ch'án.

¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a?

²⁰ Kjánchó jie nchónhya parte chóna tí cuerpo kuèteni la ó jnkokoá tíha.

²¹ Tí ikonni la mé xitjahya tsontáche tí tjani kixin: “T'ichjánxjenhyani tí jaha”, la ko kjaxin tí kjani xitjahya tsontáche tí toteni kixin: “T'ichjánxjinnahya tí jaha.”

²² Náhi. Tí nkehe kuente tí cuerpo tónhenni kixin tjetuanhya na mé kjonté antsí má t'ichjánxin

²³ La ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakonhenni kixin tsonoxínhya.

²⁴ A ntá tí nkehe náxrjón na mé t'ichjánxienhya ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókuikosáyeheyani jeheni

²⁵ Kixin ninkehó xitjahya chróxikeyehe tí cuerpo kixin kaín tí nkehe la jnkokón tjinkítsa kichó.

²⁶ Tió tsikónihi ijnko parte kuènte tí cuerpo la kaín tí í so parte la kjaxin tjeté; la ko tió tjikosáyehe sín ijnko parte la kuènté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkora mé ijnko parte kuènte tí cuerpo kuènte ch'án.

²⁸ Méxra Dios kjueyá ch'án chojni sich'ehe ch'án xra kuènte njnko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko nixin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so kjojni chjéhe ch'án kjuachaxin antsí tjinkítsa kichó, la ko kjaxin kjueyá ch'án í so chojni chjéhe ch'án kjuachaxin ts'etóan xra kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjaxin sín í jnko nkíva.

²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan,

³⁰ la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkíva ókjé, la ko kénhya chojni chóna kjuachaxin tsochronkaxin sín nkexri t'axrxénin tí nkehe chrónka tí sín nixjaxin ijnko nkíva ókjé. Chaxin kjá náhi.

³¹ Méxra tjéyará tí kjuachaxin antsí jína chrótjáhará Dios. Ntá jie tsjákohará ijnko ntía antsí jína chrók'uejorá.

13

Chrótjuèheni kichó ni

¹ Tí chróníjia nkívee chojni ó la ko kjaxin chróníjia éxi nixja tí sín ángel, ntá naxa chrótjuahya kichó ni la ó chónkó tíha la mé éxi chrókóyóna chica tsjánka ó la ko éxi ijnko chica platillo nchevékjan sín ó, kixin ninkehó són chóntahya.

² La ko tí chróníjia itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónóna kaín nkehe, la ko antsí chrókuinkachónkia Dios ntá chrókuacha chróntátjan ijnko jna sáchrókjui ókjé, kjónté tí xikaha ntá naxa chrótjuahya kichó ni, ntá ninkehó sinkíhya tí janhan.

³ Tí chrókujintakitonhan tí sín nòa kaín nkehe chonta, la ko tí chrókuánjuan kjuachaxin kixin chróchena kuènténa, kjónté tí xikaha ntá naxa chrótjuahya kichó ni la ntá ninkehó sinkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjinqxíenhyani, la ko sinchehnkehyani, la ko tsohnkehyani,

⁵ la ko ch'ehyani ninkehó nkehe náxrxjónhya, la ko tjeyáhyani nkehe kuènteni ó, la ko tsonínkakonhyani tjoka, la ko tsochóntahyani kjuanínkaon isé,

⁶ la ko kjaxin tsochéhhyani tió í jnko chojni tjasin jie. Náhí. Chrókóchéheni tió ijnko nkehe jína sítóhnen.

⁷ Tí tjuèheni kíchó ni la kjónté kaín nkehe chrókjuasótexínni la chrókuitekaonni kixin jína sín la ko naxa chrok'uejóchónhenni chrókónínkakonhyani.

⁸ Tí tjuèheni kíchó ni la jnkochrínin tsjak'e ts'itjáyanyha. A ntá itsi ijnko yaon í t'ichjánxínhya tsochrónka chojni itén Dios, la ko tsokehya kjuachaxin tsonixjaxin chojni ókjé nkíva, la ko tsokehya kjuachaxin tsoñohe chojni má.

⁹ Naxa t'itjáyan tí nkehe chrókónoheni la ko naxa t'itjáyan tí nkehe chróchronkaxínni.

¹⁰ A ntá tió tsoñohe ni kaín xín nkehe ntá tí nkehe ntoáhya k'uénoheni la mé ts'itjáyan.

¹¹ Tió naxa chánjan janhan k'uénixja éxi chánjan la ko k'uékjenkayáxian éxi chánjan. Ntá kóntetona ntá kuitohá tí nkehe kuènte chánjan.

¹² Méxra éxi ijnko xrosentá t'ikonxínhyani jína jie, ntá tsi ijnko yaon chr'éxin ntá ts'ikonxínni jína kaín nkehe. Ijie naxa t'itjáyan tí nkehe chrókónóna; ntá tsi ijnko yaon tsoñóna jína kaín xín nkehe éxi xíkaha kjaxin Dios chóxin ch'án tí janhan.

¹³ Méxra, iní nkehe tjejó jnkochrínin, la mé ts'ejó chojni tsinkáchónki Dios, la ko ts'ejó chojni tsochónnen sín, la ko ts'ejó chojni tsojtjuèhe kíchó. A ntá iní nkehe síin, la kjánchó antsí má t'ichjánxín tsojtjuèheni kíchó ni.

14

Tí nixjaxin chojni ókjé nkíva

¹ Chrókóxakonhanrá kixin chrótjuèhéra kichuará la ko kjaxin chrókjuéyará kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios.

² Méxra, tí nkexro nixjaxin ijnko nkíva ókjé mé nixjehe sín Dios ó la ntá chojni la náhi, kixin kohya ninkexró tienxín tí nkehe nixja sín la mé nchakuen sín ó mé chronkaxin sín ijnko nkehe kuènte Dios noehya tí í so sín.

³ A ntá tí nkexro chronkaxin ijnko nkíva tienxín tí í so sín ijnko nkehe kuènte Dios mé nixjehe chojni ntá xíkaha tjinkítsa tí í so sín kixin antsí chrók'uitja sín nkehe kuènte Dios la ko chrókóchéhe sín.

⁴ A ntá tí nkexro nixjaxin ijnko nkíva ókjé la mé tjinkítsa jehó ch'án antsí tsoñohe tí kjuachaxin kuènte Dios. A ntá tí nkexro chronkaxin ijnko nkehe kjuínchenohe Dios mé tsjinkítsa tí sín kuènte njnko kixin antsí chrók'uitja sín nkehe kuènte Dios.

⁵ Tjínkavan kixin kaín rá chróchontará kjuachaxin chrónixjaxinrá ijnko nkíva ókjé. Kjánchó antsí tjetoo chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetoo chrónixjaxinrá ókjé nkíva tí noahyará tsochronkaxinrá nkexrí t'axrxjénin tí nkehe chróchronkará kixin chrókuinhin kaín tí sín tinkáchónki Ínchéni kixin antsí chrók'uitja sín nkehe kuènte Dios.

⁶ A ntá kíchó ni, tí chrókjuasántsajahará chrónixjaáxinrá ijnko nkíva ókjé la ó chónkó tíha. Íchá jína chrónixjaáxinrá ijnko nkíva tiénxinrá chróxrjankaxián ijnko nkehe kjuínchenóna Dios la chróxrjankaxián ijnko nkehe kuènte Dios

naxa noahyará, la chróxrjankaxián ijnko nkehe tjinkaon Dios chrókónohará, la chrókjuákoáxinrá ókjé nkehe n̄ixin.

⁷ Kíxin k̄jāxin tí ison flauta la ko tí isón arpa, tí jnkokónhya chróntáchro jnkójnko són, ntá chrókjuachahyani chrókjuatsqanni nkehe tí ntáchro tí són a.

⁸ La ko éxi yóhé tí siín guerra, tjanjonko kíchó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókjuikjanjonko kíchó sín.

⁹ K̄jāxin x̄ikaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchrorá? Mé x̄ikaha tjejonixjará éxi chjéhe x̄rinto ó.

¹⁰ Chaxín siín itsjé nkíva chjasintajni la ko kaín nkíva la siín chojni tienxín sín.

¹¹ Kjánchó tí chrókianxínhya janhan tí nkehe tsontáchro ijnko nkexro, ntá tí nkexro a ts'ikon tí janhan éxi ijnko nkexro tsík̄jix̄in ókjé la ko k̄jāxin janhan ts'íkuan tí jehe ch'án éxi ijnko nkexro tsík̄jix̄in ókjé.

¹² Méxra jahará imá tjinkáonrá chrók'uayéherá ijnko x̄ra kuènte Nchakuen Dios, ntá chrókójina chrókjuéyará tí x̄ra chrókjuinkítsa tí í so sín kuènte n̄inko k̄ixin antsí chrók'uitja sín ijnko nkehe kuènte Dios.

¹³ Méxra tí nkexro nixjāx̄in ijnko nkíva ókjé la chrókjuanchehe Dios k̄ixin chrókjuinkítsa chróchronkaxín ch'án nkexrí t'axrxjén tí tan a.

¹⁴ Kíxin tí tsonixjāx̄ian Dios ijnko nkíva ókjé, ntá tí nchakuenná ó mé tjenixjehé Dios, la ntá tí kjuaxrexinkaon kuèntana la ókjé tjen.

¹⁵ A ntá tí x̄ikaha, ¿nkehe chrókjuít'a? Íchá jina chrónixjāx̄ian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan.

¹⁶ Kíxin tí tsochjeéxinrá kjuasáya Dios nchakuanrá ó ntá tjejótinhin í so chojni, ¿ntá nkexrí k̄ixin tí sín naxa kienxínhya sín tí nkehe nixjehérá Dios chróntáchro sín “Amén, ó nchoxon”?

¹⁷ Kjónté imá náxrjón tí chrókjuancheherá Dios kjuasáya la ntá chrókienxínhya tí sín tjejótinhin, ntá chrokjuinkítsahya k̄ixin chrók'uitja sín nkehe kuènte Dios.

¹⁸ Tjánháha Dios kjuasáya k̄ixin antsí chonta janhan kjuachaxin tsonixjāxian ókjé nkíva, la ntá jahará la kánhyó nixjará x̄ikaha.

¹⁹ Kjánchó tió tójnkotsé chojni kíchó ni la mé ntáxrjan k̄ixin antsí tjínkavan chrónixjā janhan kjónté in'ó palabra ó tienxín sín k̄ixin x̄ikaha chrókjuákuaxian sín, la ntá kánhyó chrókójina kjónté ite mil palabra chrónixjāxian ijnko nkíva ókjé tienxínhya chojni.

²⁰ Kíchóni, chrókjuenkayáxinhayará éxi chánjan. Kjánchó chrók'uejorá éxi chánjan naxa noehya nkehe jínahya. A ntá chrókjuenkayáxinrá éxi chojni nteto.

²¹ Tí xroon tsíkjin sín ósé nkexrí k'uetqan Dios mé ntáchro k̄ixin: “Janhan tsonixjāxian ókjé nkíva la ko itén chojni ókjé k̄ixin tsinhin tí nación Israel na kjónté tsitekakonhya sín, x̄ikaha ichro Ìnchéni.”*

²² A ntá tí kjuachaxin tsonixjāx̄in chojni ókjé nkíva mé xránjon k̄ixin chrókjuakox̄in chojni chrókuinhin tí sín tinkáchónkihya Ìnchéni, jehya k̄ixin t'ichjānx̄in chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon k̄ixin

* 14:21 Isaías 28.11-12

chrókjuakoxin chojni chrókuinhin tí sín tinkáchónki Ìnchéni, jehya kixin chrókuinhin tí sin tinkáchónkihya Ìnchéni.

²³ A ntá tió tójnkotsérá kaín rá tinkáchónkirá Ìnchéni, a ntá kaín rá chrónixjaxinrá ókjé nkíva, ntá tí chrók'uixenhen nchia ijnko chojni naxa kuénhya sín xíkaha, o chrók'uixenhen nchia ijnko chojni naxa tinkáchónkihya Ìnchéni ntá chrókuinhin sín xíkaha la kjá tsonáchro sín kixin ó k'uixikjánrá.

²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnchéni, o chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chróxraxinkaon sín tí jié chóna sín ntá chrókuítche sín kaín jié chóna sín.

²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsonáchro sín kixin chaxín tjejókoará Dios.

Ntoa chrókjuich'eni kaín xín nkehe tió tójnkotséni

²⁶ A ntá kichó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuàkorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkíva ókjé, la ko isorá chróchronkaxinrá nkexrí t'axrxéxin tí nkehe nixjaxin tí í so sín ókjé nkíva. Kjánchó kaín tíha tsonhen kixin tí sín kuénte njnko chrók'uitja sín nkehe kuénte Dios.

²⁷ A ntá tí chrónixjaxin sín ijnko nkíva ókjé na mé yaá o iy'á chojni chrónixja sín la ko chrók'uixinkí chojni tsonixja, la ko t'ichjánxin kixin jnkojín nkexro nohe tsochronkaxin nkexrí t'axrxéxin tí nkehe nixja sín.

²⁸ A ntá tí kohya ninkexro tí njnko ntaha tsjacha tsochronkaxin nkexrí t'axrxéxin tí nkehe chrónixja sín, ntá chrónixjaxinhya sín ókjé nkíva tí tjejótójnksé sín, na mé chrónixjehé sín asén sín ó la ko chrónixjehé sín Dios ó.

²⁹ Tjánjonrá kjuachaxin kixin tsonixja yaá o y'á chojni k'uáyéhe sín kjuachaxin tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxin sín á ó nchóxon tí nkehe kuínhin sín.

³⁰ A ntá tí xrínghya chrókjuinchenohe Dios ijnko nkehe ijnko nkexro tjetjaxin ntá chróchronka ch'án tíha. A ntá tí nkexro senó kjuankixin chrónka nkehe la chróchónhen ch'án chrónixjahya ch'án.

³¹ Ó nchóxon jnkojnkorá chróchronkará nkehe tjáhará Dios kixin xíkaha kaín rá chrók'uitjará la ko chrókócháhará.

³² A ntá tí nkexro k'uáyéhe kjuachaxin tsochronka nkehe kjuínchenohe Dios kjaxin t'ichjánxin chróchónhen tsochronkaxin í jnko nkexro.

³³ Kixin Dios tjanjon tí kjuaxróxin, a ntá tjinkakonhya ch'án kixin yóxinhya chrók'uejóni.

 Tió tójnkotsé chojni kichó ni tinkáchónki Ìnchéni

³⁴ chrónixjahya tí chojni chjin jnkosiné servicio. Kohya kjuachaxin xíkaha, na mé chrókjuinchexiteyéhe sín tí sín ntoa éxi t'etqan tí ley kuénte Dios.

³⁵ Tí tjinkaon sín tsonohe sín nkehe na mé chrókjuanchankíhi sín xii sín tió tjiji sín ntqé sín. Náxrxónhya chrónixja ijnko chojni chjin nkehe jnkosiné servicio.

³⁶ Chrókónohará kixin tí itén Dios xránkixixinhya tí tjejorá la ko jehya jahorá k'uayéhérá tíha.

³⁷ A ntá tí tjen jnkojín nkexro tjenkayáxin kixin nixja itén Dios o tjenkayáxin kixin tí Nchakuen Dios tjinkitsa tí jehe ch'án ntá chrókónohe ch'án kixin tí nkehe tjékjian mé ijnko nkehe tsík'etoan Ìnchéni.

³⁸ A ntá tí nkexro titekakonhya tíhi na ntá jahará chrókuitekákúenhyará ch'án kjaxin.

³⁹ Méxra kichó ni, chrókjuéyará kixin chrók'uayéhérá kjuachaxin chróhronkará nkehe kjuínchenohará Dios la ko chrókuítoghérá tsonixjaxin chojni ókjé nkàva.

⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kichó ni, tjínkavan chróxraxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína.

² Kjaxin tí nkehe kjuákohará mé kuaáxinrá, tí tjejóhyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Saoxín, kjuákohará tí nkehe k'uayáha kixin Cristo k'uenyákonhen ijíeni, na mé xíkaha kjuínchexiteyá ch'án tí nkehe ntáchro tí xroon itén Dios

⁴ la ko tsíkjavá sín ch'án la ko tsíxechón ch'án tí nixin yaon éxí ntáchro tí xroon itén Dios.

⁵ Ntá k'uíkon ch'ín Pedro tí jehe ch'án, ntá chr'éxin ínaá tí teyó sín k'uék'ajiko ch'án k'uíkon sín tí jehe ch'án.

⁶ A ntá chr'éxin chjina quinientos chojni kichó ni jnkokoá k'uéjé sín k'uíkon sín ch'án. A ntá jie itsjé tí sín a naxa tjejó sín, a ntá jnkojín sín na ó tsík'en sín.

⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol ínaá.

⁸ A ntá kjuixixín janhan k'uikuán Ìnchéni éxí ijnko xjan naxa xetjahya yaon chrókokjíhi.

⁹ Kjánchó janhan kánhyó tjejoan la mé tóyóehya tí í so sín tsíkjeýá Ìnchéni la ko tósuána chrók'óna ijnko nkexro ch'ehe xra Ìnchéni kixin janhan mé k'uénínkakhonhan tí sín nínkoe Dios.

¹⁰ Kjonté jínahya kjuít'a la kjuasáyé Dios la ko kjuachaxin kuénte ch'án mé kjuítóxinhin tí kjuenkayáxian, na mé chónkóhya kuíkonóña ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhi. Dios kjuínkítsana ch'án kjuít'a xra.

¹¹ Kjánchó tjetuanhya á janhan o á jehe sín kjuakoni, kixin xíkaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuénte ntáchrórá jnkojínrá kixin tsoxechónhya chojni tsík'en?

¹³ Tí chrókóchaxín tí nkehe ntáchrórá kixin tsoxechónhya chojni tsík'en, ntá kjaxin chróxechónhya Cristo.

¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkílya la ko chónkó tí nkehe kuítekáonrá.

¹⁵ A ntá tí chaxínhya xíkaha tsíkónhen, la jeheni la ijnko chojni ntoáhya chrónka kuénte Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en

16 kixin tí chróxechónhya tí chojni tsík'en, ntá kjaxin Cristo chróxechónhya ch'án.

17 A ntá tí Cristo chróxechónhya ch'án ntá chrókóchónkó tí kuítekaónrá tí jehe ch'án kixin naxa chrókjuinhyá tí ijjára.

18 La ko tí chrókóchaxín tíha ntá chrók'uitjáyán tí sín kuítekaon Cristo ik'uén sín.

19 Méxra tí chrókuinkáchónkini Cristo kixin chrókuinkitsa ch'án tí jeheni chjasintajni ntiyhó, ntá kohya chojni chrókóyóhe tí jeheni, imá chrókóndéni chrók'uejóni kaín ni.

20 Kjánchó náhi, la chaxín ó xechón Cristo. Jehe ch'án éxi tí nkehe tsík'óna saoxín kixin jehe ch'án saoxín xechón ch'án.

21 Méxra jnkokoá chojni ntoa kjuankixin kjuasin jig, ntá kjuankixin k'uén kaín xín chojni chjasintajni, la ko kjaxin jnkokoá chojni ntoa xechón, ntá xikaha tsoxechón kaín chojni tsík'en.

22 Kixin tí jig kjuasin ch'in Adán ntá kaín xín chojni sit'enxín sín. A ntá Cristo la kaín ni tsochóntaxinni kjuachón.

23 Jnkojnkoní éxi tsohenni tocar, na mé saoxín xechón Cristo, a ntá chr'éxin tí tsokjan ch'án ntá tsoxechónni kaín ni kuítekaonni tí jehe ch'án.

24 A ntá ó tsi yaon tsjixixín ntá sinchek'itjáyán Cristo kaín xín nkehe t'etqan la ko kaín xín kjuachaxin ókjé, ntá tsjanjon ch'án tí xra t'etqan kixin ts'áyéhe It'é ch'án Dios.

25 Na mé t'ichjánxin ts'etqan Cristo tsjixrakája tí yaon tsjachahya tí sín nínkakonhen ch'án.

26 A ntá tí nkehe tsjixixín ts'itjáyán la mé tí kjuach'éñ.

27 A ntá Dios kjuanjon kjuachaxin kixin kaín nkehe síñ mé chrók'uetuenhen Cristo.* Kjánchó tíó xikaha ntáchro tí xroon itén Dios tsíkjin sín ósé kixin kaín xín nkehe mé ts'etuenhen ch'án, ntá ó noheni jína kixin jehya kixin Dios la chrók'uituenhen ch'án inaá. Náhi. Jehe ch'án mé chjéhe Xjeen ch'án kaín kjuachaxin ts'etuenhen ch'án kaín xín nkehe.

28 A ntá tíó tsjixin tsjacha Cristo ts'etuenhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuenhen ch'án kaín xín nkehe.

29 A ntá í jnko nkehe, la iso sín tikiteyákonhen tí sín tsík'en. ¿Nkekuènte xikaha ch'e sín tí titekakonhya sín kixin tí sín tsík'en tsoxechón sín inaá?

30 A ntá tí xikaha, ¿nkekuènte kixin kaín yaon kjuaxróxinhyá tjejóni nínkakonhenni chojni?

31 A ntá kichó ni, kaín yaon síñ kjuachakon chrók'uèn janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo.

32 Kjónté kónínkakonna chojni chjasin Éfeso éxi iko jiehe la kjónté kjuak'é ntiha, ¿la ntá nkehe chrókjuacha tí janhan tí chrókóchaxínhyá chróxechón chojni tsík'en? Tí xikaha la ó nchoxon tí nkehe ntáchro tí sín titekakonhya Ìnchéni kixin chrókjóné sín la ko chrók'ui sín kixin ijie la o ntóye chrók'uen sín.

33 Chrókuítóéhyará chrokuít'áyahará sín. Éxi ntáchro sín kixin: "Tí chrók'uejókotoxinni chojni jínahya ntá chrók'uitjáyán tí nkehe jína tjenkayáxinni."

34 Chrókanrá ntja jína ntoá la chrókuásinhyará jig. Méxra isorá naxa chonhyará Dios. Na mé ntáxrjan tíhi kixin chrókósuàhará.

* 15:27 Salmo 8.6

Nkexrí tsoxechón tí sín tsík'en

³⁵ Kjá jnkojínrá tsjanchankínará kixin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochóna sín?”

³⁶ Lontirá tjanchankínará xikaha. Tí noatje t'enkanı nonte t'ichjánxin its'en ts'itjáyán kixin tsjak'echón tí nkehe ts'ayan.

³⁷ Tí nkehe t'enkanı la jehya tí ka a. Náhi. Tí nkehe t'enkanı la noatrigo o í jnko tje.

³⁸ Kjánchó Dios kjuanjon kjuachaxin kixin jnkojnko nta ts'óna éxí tjinkaon ch'án, la ko jnkojnko nta tsochóna tje kuènte.

³⁹ A ntá jehya kaín tí cuerpo la jnkokon. Náhi. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte koche.

⁴⁰ Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe.

⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko.

⁴² Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyánhya.

⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chónthaha kjuachaxin, la ntá tí nkehe tsoxechón la ijnko nkehe tsochóna kjuachaxin.

⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochóna kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochóna kjuachaxin kuènte Nchakuen Dios.

⁴⁵ A ntá éxí ntáchro tí xroon itén Dios kixin: “Tí chojni ntoa k'óna saoxín mé ch'ín Adán tíha mé k'uáyéhe ch'án kjuachón ó.”† A ntá tí ó kjuixixin ikui í jnko ch'ín éxí yóhe Adán, kjánchó jehe ch'án mé chóna ch'án nchakuen tjanjon kjuachón.

⁴⁶ Kjánchó jehya saoxín k'óna tí cuerpo antsí chóna kjuachaxin kuènte Nchakuen Dios. Náhi. Saoxín k'óna cuerpo kuènte chojni chjasintajni ó, la ntá chr'éxin k'óna cuerpo antsí chóna kjuachaxin kuènte Nchakuen Dios.

⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kujxin ch'án.

⁴⁸ Tí cuerpo siín chjasintajni mé yóhe tí cuerpo k'uéchóna tí nkexro tsík'óna nche. A ntá tí cuerpo siín nkaya nkajní mé yóhe tí cuerpo chóna tí nkexro kujxin nkaya nkajní.

⁴⁹ Éxí senó tóyóhēni tí nkexro k'óna nche, ntá xikaha chr'éxin tsoyóhēni tí nkexro kujxin nkaya nkajní.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhe tí nkehe tsjeje.

⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani.

† 15:45 Génesis 2.7

⁵² **A** ntá xrínahya titàya tjejóni ntá éxí chróchr'áton konni la ko chrókuakitjenkñi konni xíkaha tió tsjixixín tsinhinni tsontáχρο trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani.

⁵³ **A** ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en.

⁵⁴ **A** ntá tió tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xíkaha na ntá tsoxiteyá éxí nixja tí xroon itén Dios ntáχρο kixin: "Tsjachahya tí kjuach'én la mé tsjacha tí kjuachón."[‡]

⁵⁵ "Jaha kjuach'én, çkjá tí kjuachaxin kuènta kixin chrók'oyáni?"[§] Jaha kjuach'én, çkjá tí kjuachaxin kuènta kixin chrók'oyáni?"[§]

⁵⁶ Tí jie tjasinni mé kujxin tí ts'enni. **A** ntá tí ley k'ueṭṭan ósé antsí k'uixixín jie.

⁵⁷ **A** ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

⁵⁸ **A** ntá jahará kichó ni, imá tjuahará. Chrókuitoéhyará tinkachónkirá Ìnchéni. Jnkochríxin chrókjuich'ehérá Ìnchéni xṛa antsí jína kixin ó nohará jahará kixin tí xṛa ch'eheheni Ìnchéni jehya chónkó tíha.

16

Tí ofrenda tjenájín sín tsochr'énnen sín tí sín tjejó chjasin Jerusalén

¹ **A** ntá tí chichaon tjenájínrá kixin tsjínkĩtsará tí sín kichó ni tinkáchónki Ìnchéni na mé chrókjuich'erá éxí kuétuanhan tí sín nĩnko estado Galacia.

² Jnkojnko domingo jnkojnkorá chrókuakitsjentehérá nkerí síká chichaon kjuachará tí semana kjuich'erá xṛa kixin t'ichjánxinhya chrókjuasánjia janhan ntá chrókjuénájínrá chichaon.

³ **A** ntá tió tsjasán janhan tsuetuanhan tí sín tsjeyará kixin sátsji sín chjasin Jerusalén, na ntá tsokjian xroon tsjikoxín sín tí chichaon tsikjénájínrá tsjikaán tí sín kichó ni ntiha.

⁴ **A** ntá tí chrókójina kjaxin janhan sáchrókjuiyá, a ntá sáchrókjuikian tí jehé sín kjaxin.

Tjenkayáxin ch'in Pablo nkexrí sátsji ch'án

⁵ Tí sátsjia la t'ichjánxin ts'atsínka janhan estado Macedonia ntá chr'éxin tsjasán ntiha chjasin Corinto.

⁶ Ach'e ntahó chrókuítõna chrók'uatinkajia nchakuen kin. **A** ntá jahará chrókjuínkĩtsará tí janhan tió sátsjia ókjé chr'éxin.

⁷ Méxṛa tjínkãkonhya chrók'uatínkoá chrótsjahará ó. Náhi. Tjínkãvan chrókuítõna iso yaon tí tjejorá ntiha tí Ìnchéni chrókjuanjõn kjuachaxin.

⁸ Kjánchó tsitõna chjasin Éfeso tsjixrakájia yaon Pentecostés,

⁹ kixin ntihi antsí chonta kjuachaxin chrókjuít'a xṛa kuènte Ìnchéni la ko jína chrókõnhen tí xṛa kjónté nchónhya chojni nínkakonna.

¹⁰ **A** ntá tí tsjiji ch'in Timoteo ntiha la antsí jína chrónixjehérá ch'án kixin kjuaxróxin chrók'uejokoará ch'án kixin jehé ch'án kjaxin ch'ehe Ìnchéni xṛa éxí janhan.

¹¹ Kaín tí jahará chróchonteherá ch'án kjuasáya. Tjínkĩtsará ch'án kixin jína itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² A ntá tí kichó ni Apolos la imá xrjanóahā ch'án kixin kjaxin chrókjuijiko ch'án tí í so kichó ni, kjánchó tjinkakonhya ch'án jie. Chr'éxin tsjiji ch'án tió ts'ixranka.

Kjuixixin nixja ch'in Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuĩtoéhyará tí tinkachónkirá Ìnchéni.

¹⁴ Kaín nkehe chrókjui'ch'erá la koí chrótjuèhérá kichuárá.

¹⁵ Na ntá kichó ni, ó nohará kixin tí sín kjéhya ch'in Estéfanos saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xra a tjínkĩtsa sín tí sín kichó ni tinkáchónki Ìnchéni.

¹⁶ Tjínkavan kixin chrókjui'nchexiteyéhérá tí sín tjínkĩtsa éxí tí jehe sín la ko kaín tí sín ch'e xra.

¹⁷ Chāna kixin ó kui ch'in Estéfanos la ko ch'in Fortunato la ko ch'in Acaico, kixin jahará kjónté tjejohyará.

¹⁸ A ntá jehe sín kjuínchechéhe sín asenná éxí kjuínchecháhará sín. Chróchonteherá kjuasáyé chojni xikaha.

¹⁹ Tí sín tójnkotsé estado Asia xraxinkaon sín tí jahará. Kjaxin ch'in Aquila la ko tjan Priscila la ko tí sín tójnkotsé ntqe sín ima xraxinkaon sín tí jahará kixin tinkachónkirá Ìnchéni.

²⁰ Kaín tí sín kichó ni ntihi xraxinkaon sín tí jahará. Nixjehérá kichuárá kaín rá tsehérá tja kichuárá jnkójina.

²¹ Janhan Pablo xráxinkavan tí jahará ikjian xroon chr'anhánrá la tjaná kjinxian tí letra í.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

²³ A ntá kjuasáyé Ìnchéni Jesucristo mé sintayaonrá ch'án.

²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énhen ch'án tí n̄nko chjasin Corinto

¹ Janhan Pablo mé kjueyána Dios kixin s̄it'aha Ìnchéni Jesucristo x̄ra, la ko kichó ni Timoteo ikjinni tí xroon i chr'ánhanráni tí jahará n̄nko Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya.

² Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehe It'eni mé t̄ikonóeheni ch'án la ko xráxin nchechéheni ch'án.

⁴ Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxi yóhe jehe ch'án kjuínchechéhe ch'án tí jeheni.

⁵ Mé x̄ikaha tjejótjasóteni éxi yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án.

⁶ Tjejótjasóteni kixin tí jahará chrókócháxinrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxi tjasóteni jeheni.

⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhe Dios tí jeheni kaín ni.

⁸ Kichóni, tjinkaonni kixin chrókónohará kixin nkexrí imá kjuasóteni tí k'uejóni tí estado Asia. Imá náxrjónhya kjuasóteni la chrókjuachahyani, la k'uitjáyenhenni tí tjenkayáxinni kixin chrók'uaxrjexinni ntiha n̄axa chrók'uejóhónni.

⁹ Ó kónoheni kixin chrók'uenxinni ntiha. Mé x̄ikaha kónhenni kixin chrókónoexinni kixin tí jehóni la chrókjuachahyani tíha. Náhí. Chrókuinkáchónkini Dios, mé tí nkexro nchexechón chojni tsík'en.

¹⁰ Jehe Dios mé kjuínchekaáni ch'án la ko n̄axa sinchekaáni ch'án kixin tí nchónhya nkehe chrók'uenxinni. Méxra ó noheni kixin chaxín jehe ch'án sinchekaáni ch'án

¹¹ Tí tjínk̄itsaráni tjancheherá Dios kixin tsjink̄itsani ch'án. A ntá tí tsjé chojni chrókjuanchehe Dios kixin tsjink̄itsani ch'án ntá chr'éxin itsjé chojni tsjanchehe sín ch'án kjuasáyé kixin x̄ikaha jehe ch'án kjuínk̄itsani ch'án.

Nkekuente sákuilha ch'ín Pablo tí chjasin Corinto

¹² Chéheni kixin noheni kixin ntoá k'uejóni ntihi chjasintajni kjuích'iyehyani chojni, mé x̄ikaha k'uejókoaráni. Ntá jehya kjuachaxin kuènteni kjuachaxinni x̄ikaha. Náhí. Kjuachaxin kuènte Dios mé kjuínk̄itsani kixin x̄ikaha k'uejóni.

¹³ Tió chr'ánhanráni xroon, kjinhyani nkehe chrókiénxinhyará. Náhí. Jehó tí nkehe chrókjuínchekeuáxinrá chrókiénxinrá. Tjéçonhan kixin chrókiénxinrá jína.

14 A ntá ó tinkakiénxinrá ntsí kixin tió tsokjan Ìnchéni Jesús tsocháhará kixin xikaha kjuakoharáni jeheni la ko kjaxin tsochéheni kixin jahará kuítekaónrá.

15 Mé xikaha kjuenkayáxian kixin saoxín chrókjuasántsahará tí jahará kixin chrókócháhará kixin yáya chrókjuasántsahará.

16 Kjuenkayáxian janhan chrókjuasántsahará saoxín tió sáchrókjuia estado Macedonia la ko chrókjuasántsahará ínaá tió chrókjanxian ntiha. Mé xikaha chrójuinkitsarána tió sáchrókjuiyá janhan estado Judea.

17 ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya?

18 Méxra tjetsjehe Dios kixin xikahya kjuáteheni tí jahará kixin chrókjuijini la ko chrókjuijihyani.

19 Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuakoxian janhan tí k'uéjóni ntiha, mé xikahya k'uéchronka ch'án, kjuich'iyahya ch'án ninkehó. Náhí. Kaín nkehe tjakoni kuènte Cristo la chaxín tíha.

20 Kixin kaín nkehe tsíchronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni “Amén, ó nchoxon” kixin tí kjuachaxin kuènte Cristo Jesús.

21 A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehe ch'án mé kjueyáni ch'án.

22 Kjaxin jehe ch'án tsikjinchekani ch'án xroye, na mé kjuanjon ch'án Nchakuen ch'án tsochóna asénni senó kixin tsoñoexínni kixin chaxín ts'áyéheni nkehe chr'éxin.

23 A ntá tí naxa kjuasánhya janhan chjasánrá Corinto éxi kjuenkayáxian la tjetsjehe Dios kixin tjínkakhonya kixin chrókóxakonhanrá tí chrókuéntuáhára tí jahará ínaá.

24 Jehya kixin chrókuétuaghánrá kixin nkexrí chrókuinkáchónkirá Ìnchéni kixin ó nõna kixin ntoá tinkáchónkirá ch'án. Ó jehí tjinkaonni chrókuinkitsaráni kixin qntsí má chrókócháhará.

2

1 Mé xikaha kjuenkayáxian kixin chrókjuasánhya janhan ntiha ínaá tí naxa xrásinrá kjuanínkaon.

2 A ntá tí naxa chrókujintak'ávára, ¿a ntá nkexro chrókuinchehána ínaá tí chrókuinchehánahará jahará kixin janhan kjujintak'ávára?

3 Mé xikaha ikjian tí xroon chr'anhánrá senó kixin tjínkakhonya chrókjuasán chrókuinchekóxakonnará ínaá. Náhí. Jahará chrókuinchehánará. Méxra ó nõna kixin tí chrókóchána janhan ntá chrókócháhará kaín rá.

4 Kjánchó tió ikjian tí xroon a chr'anhánrá senó la imá kóxakonhen asenná tsjanika kjaxin. Kjánchó jehya kixin ikjian tí xroon a chr'anhánrá kixin chrókujintak'ávára. Náhí. Ikjian tí xroon chr'anhánrá kixin chrókónoaxínrá kixin imá tjuahará tí jahará.

Ch'ín Pablo chrókuinchek'itjáyenhen ch'án tí jje kjuasin tí nkexro a

5 A ntá tí nkexro kjuínchexakonna la jehya janhvàn kóxakonna. Náhí. Kaínrá kóxakonhanrá. Kjánchó tjínkakhonya tjetóxin tsoántáxrjan tíha.

⁶ Na mé itsjé tí jahará nixjehérá ch'án kóyakoterá ch'án kíxin chrókjuasinhya ch'án jie xikaha la táhó la ó tjen.

⁷ Ntá jie chrók'uitjáyanhanrá tí jie kjuasin ch'án, chrókjuínkĩtsará ch'án, kíxin tí náhi la ts'itjáyanxín ch'án tí kjuanchenihi.

⁸ Méxra xrxjanóahará kíxin chrókjuákoxinrá inaá kíxin chaxín tjuèhérá ch'án.

⁹ Mé xikaha senó ikjian xroon chr'anhánrá kuènte tí kjuanínkaon chontará kíxin tsonoxian á chrókjuínchexiteyánará kaín nkehe chrókuétuanhánrá.

¹⁰ A ntá tí sijnchek'itjáyenhenrá ijnko chojni ichrén jie kjuasin ch'án ntá janhan kjaxian sintak'itjáyanhan ch'án tí jie kjuasin ch'án. Méxra tí chaxín k'ué ichrén jie chrókjuintak'itjáyanhan ijnko chojni la ó kjuixin kjuintak'itjáyanhan ch'án tí jie á kíxin chrók'uejorá jnkojína. Kjaxin xikaha tjetsjehe Cristo,

¹¹ Kíxin ntá tí ch'ín Tsochren na tsjachahya ch'án tsjachroe ch'án tí jeheni, kíxin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

¹² A ntá tío kjuasán tí chjasin Troas chrókjuákua tí tan jína kuènte Cristo la antsí xránjon kjuachaxin kíxin chrókónhen xra kuènte Ìnchéni.

¹³ Kjánchó náxrjónhya tjen asenná kíxin k'uitjahya tí kíchó ni Tito. Ntá tuénxín níxjaha tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochóna sín kjuachaxin kuènte Cristo

¹⁴ Kjuasáyé Dios kíxin xráxín jehe ch'án tjinkĩtsani ch'án ntá tjachani kíxin chónhani tí kjuachaxin kuènte Cristo Jesús. Ntá kaín nketí sáchrókjuini mé tjákoxiníni tí tan kuènte ch'án éxi ijnko nkehe xraxé náxrjón chrókóxrjínhin kaín xín chojni.

¹⁵ Kaínni la éxi yóhe tí xraxé náxrjón kuènte chjincó chrókjuanjon Cristo chrók'uáyéhe Dios kíxin tíha mé chrókónoexín tí sín tsaá la ko kjaxin chrókónoexín tí sín ts'itjáyan.

¹⁶ Tí sín ts'itjáyan mé tókaxaxéhe sín éxi ts'enxín sín tí xraxé a. A ntá tí sín tsaá mé tóxrjínhin sín kíxin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha?

¹⁷ A ntá jeheni mé xrinchekjilhyani nkexrí nixja itén Dios éxi ch'e nchónhya chojni chrókjuacha sín chichaon. Náhi. Kaín asénni tjakoni itén Dios kíxin kjueyáni ch'án sich'ehehni Cristo xra, la ko tjetsjehe ch'án tí xra tjejóh'eni.

3

Tí pacto nixin

¹ A ntá xikaha ntáchroni, ¿á tjenkayáxinrá kíxin kjuankíxinni tsochronkani inaá kíxin jína tí jeheni, o á t'ichjánxín kíxin chrókjuujikoni xroon kíxin tsonoxínrá kíxin jína tjakoni? ¿Xá t'ichjánxín kíxin chrókjuanchaharáni ijnko xroon tsochronka kíxin jína tjakoni? ¿Xá t'ichjánxín kíxin chrókjuanchaharáni ijnko xroon tsochronka kíxin jína tí jeheni éxi ch'e í so sín?

² Náhi. T'ichjánxienhyani nijnko xroon kíxin jahará mé éxi yóhe ijnko xroon tsíkjiníni xrikoni chróchóxin la ko chrókjuínchekuáxin kaín xín chojni tsonoxín sín kíxin jeheni mé ch'ehehni Cristo xra.

³ T'íkon sín noxín kíxin tí jahará mé éxi yóhe ijnko xroon tsíkjin Ìnchéni Cristo xrikoni nchekuáxin chojni. Kjánchó jehya ntahni tsíkjinxín ch'án. Náhi.

Kjuanjon ch'án Nchakuen ch'án tjechón chontará la kjaxin jehya xrotabla tsíkjin ch'án. Náhí. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjinkitsani Cristo.

⁵ Jehya kixin ó jehí chróchóntani kjuachaxin kixin chrókjuich'eni xra. Náhí. Kaín tí xra ch'eni na Dios tjetjanjon kjuachaxin.

⁶ Jehé ch'án mé kjuanjon ch'án kjuachaxin kixin chrókjuich'ehe ni ch'án xra tsochenkani chojni tí tan nixin kui. Tíha jehya ijnko nkehe tsíkjin chojni chrókjuinchexiteyéhe ni. Náhí. Tíha mé kjuachaxin kjuanjon Nchakuen Dios kixin sinchexiteyéhe ni ch'án. Kixin tí ley ntácho kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákini tsjehe ikon ch'án.* Kjánchó tí t'inkaséyan kjuankixin ó tinkák'anka. Méxra tí xikaha tí ley tjanjon kjuach'én mé kuikao ijnko t'inkaséyan imá náxrjón.

⁸ ¿á chrókójehya kixin antsí má t'inkaséyan kuikao tí tan nixin kujxin kjuachaxin Nchakuen Dios?

⁹ Méxra xikaha tí ley k'uéchónta kjuachaxin jié kjónté ntácho kixin its'en chojni, a ntá antsí má jína tí tan chrónka Dios kixin tsotjuáxin tí jie chóntani.

¹⁰ Méxra tí kjuachaxin k'uéchónta tí ley k'uék'etqan ósé la ninkehó tóyójehya tí kjuachaxin jié tjen jie.

¹¹ A ntá tí k'uéchónta kjuachaxin tí nkehe séhyó ntá tinkákjeje, a ntá antsí má chónta kjuachaxin tí nkehe tsjak'e jnkochríxín.

¹² Mé xikaha tí nkehe tsjejehya tjejóchónhenni ntá chrakonhyani chronkaxíni kaín tíha.

¹³ Ch'ehyani éxí kjuich'e ch'ín Moisés k'uikjèxin ch'án ka ikon ch'án kixin tsoñoehya tí sín israelita kixin ó tinkákjeje tí t'inkaséyan chónta ch'án.

¹⁴ Kjánchó jehe sín naxa kienxínhya sín la ko naxa xikaha tjejó sín ijie tió nchekuáxin sín tí nkehe k'uítuenhen sín ósé kixin tí ka naxa t'inkákonhen tí chrókiexín sín kixin naxa kjuinhya tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a.

¹⁵ A ntá kjónté jie tió nchekuáxin sín tí xroon tsíkjin ch'ín Moisés la tjejó sín éxí naxa t'inkákonhen tí ka a kixin tienxínhya sín.

¹⁶ A ntá tió ijnko chojni tsjankixin tsinkáchónki Inchéni ntá tí ka t'inkákonhen la tsjin.

¹⁷ A ntá Inchéni mé Nchakuen Dios tíha. A ntá tí tjen Nchakuen kuénte Inchéni Dios la ntiha kohya nkehe ts'inkákonhen.

¹⁸ A ntá jeheni kaín ni kohya nkehe t'inkákonhen ikonni la mé tjejóni éxí xrosenta tjákini tí kjuachaxin kuénte Inchéni, na mé tinkák'ixitoxín tí kjuaxrexinkaon kuénténi kixin antsí chrókóyóhe ni éxí tí jehe ch'án kixin antsí tsochóntani tí kjuachaxin kuénte ch'án, kixin Inchéni, na tí Nchakuen a, mé xikaha ch'e xra.

4

¹ Méxra xikaha chrókóxrjéhyani chrókjuich'eni tí xra kjuanjon Dios kixin jehe ch'án kuikonójehe ni ch'án.

² Ó kuítóheni kaín nkehe imó la ko kaín nkehe chrókósuèxinni, la ko ch'iyehyani kichó ni, la ko tjitoxíenhyani itén Dios. Náhí. Jehí tí nkehe ntoá

* 3:7 Éxodo 34.29-35

chrónkani. A ntá xikaha chrókónoexín kaín xín chojni kixin ntoá tjeióni éxi tjinkaon Dios.

³ A ntá jeheni mé tjakoni tí itan tsaáxinni, kjánchó iso sín kjónté xikaha tinhin sín mé tienxínhya sín kixin xráxín jehe sín la ts'it'jáyán sín.

⁴ A ntá jehe sín kuítekakonhya sín, a ntá tí dios kuènte chjasintajni mé kjuínchek'ikonhya sín kixin chrókiénxínhya sín, kixin ntá chrók'uikonhya sín tí t'inkaséyan kuènte tí tan kuènte Cristo, mé tí nkexro chóna kjuachaxin, a ntá jehe ch'án la mé yóhe éxi tsjehe Dios.

⁵ Tió tjakoni na mé jehya tjakoni kixin jeheni chrókuítekáonrá. Náhí. Chronkaxínni kixin chrókuítekáonrá Jesucristo mé Ìnchéni la ko chrónkani kixin jeheni mé t'aharáni xra tsjinkitsani tí jahará kixin tjuahará Jesús.

⁶ Na mé jehe Dios k'uetqan kixin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asénni kixin chrókjuachani chrókónoheni nkexrí tjen tí kjuachaxin jié kuènte Dios t'inkaséyanxín Ìnchéni Jesucristo.

Nkexrí chrók'uejóni kixin tinkáchónkini Ìnchéni

⁷ A ntá tí cuerpo kuènteni la yóhe ijnko chí tsík'óna nchetje tjinká nkehe tjete, mé xikaha ts'ikon sín kixin tí kjuachaxin jié chóntani la kuixín tí tjen Dios kixin jehya kuènteni tíha.

⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títoqehyani tinkáchónkini ch'án.

⁹ Kjónté chónkíhi sín tí jeheni kjánchó Dios la kuítqehya ch'án tí jeheni. Kjónté k'uekonni kjuítsínkani kjánchó kjuínchek'it'jáyanyani sín.

¹⁰ Kjónté nketí sátjini xráxín chrók'uenxínni éxi k'uénxin Ìnchéni Jesús, kixin xikaha tjáqoxínni tí kjuachón chóna ch'án.

¹¹ Méxra jeheni naxa tjejóhónni la xráxín síin kjuaxikaon kixin chrók'uenxínni kixin tinkáchónkini Jesús kixin kjaxin xikaha chrókjuáqoxínni tí kjuachón chóna ch'án kjónté chrók'uen tí cuerpo chóntani.

¹² Kjónté xikaha chrók'uenxínni, a ntá jahará tsochontará kjuachón.

¹³ Éxi ntáchro tí xroon itén Dios tsíkjin sín ósé kixin: “Kuíteqavan ntá xikaha xrjanka.”* A ntá kjaxin jeheni kuítekaonni ntá xikaha chrónkani.

¹⁴ A ntá ó noheni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios.

¹⁵ Kaín tíha kónhen kixin jahará jína chrók'uejoxínni. La ko kjaxin xikaha nchónhyará chrók'uayéherá tí kjuasáyé Dios, ntá antsí tsjé chojni ts'ejóni tsjancheheni Dios kjuasáyé kixin tí kjuachaxin jié chóna ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuènténi.

¹⁷ A ntá tí nkehe tjasótéxínni tí tjejóni ntihi jie mé tíha la tjoka ts'atsínka la ts'áyéxinni ijnko nkehe imá jié la ko í tsjejehya tíha.

¹⁸ Ntá chrókomáhyani tí nkehe síin chjasintajni ntihiyó. Náhí. Chrókjueyáni tí nkehe naxa t'ikonhyéni kixin tí nkehe t'ikonxínni ikonni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

* 4:13 Salmo 116.10

5

¹ **A** ntá ó noheni kixín tió tsjeje tí cuerpo chóntani na mé yóhe éxí ijnko nchia tjoka tsjeje, a ntá Dios mé kjuích'éna jnkojnko nchia nixin ts'itjáyanhya jnkochríxín nkaya nkajní kixín jehya tja chojni kjuích'énaxín tíha.

² Tí **na**xá chóntani cuerpoéni ntihi la náxrjónhya tjejóni tjinkaonni tí ókjé cuerpo tsochóntani nkaya nkajní

³ kixín táha ts'inkáyani éxí ijnko ka, ntá xitjahya chrókótjóchinni.

⁴ Tí **na**xá tjejóchónxinni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuítøkoni tí cuerpoéni ntaxin, na mé tjinkaonni kixín tí cuerpoéni ntaxin chrókónixín ó. Ntá chrók'uitjáyan tí chrók'uenxínni la ntá chrókuakjani tí kjuachón nixin.

⁵ Dios mé kjuenkayáxin ch'án kixín xikaha sincheqitonhenni ch'án ntá kjuíncheqitonhenni ch'án tí Nchakuen ch'án kixín ntá chrókónoexínni kixín chaxín ts'áyéheñi ní nkehe tsjanjon ch'án.

⁶ Mé xikaha xráxín ó noheni kixín tí **na**xá tjejóni ntihi **na**xá chóntani cuerpoéni ntá **na**xá tjejókohyani Ìnchéni.

⁷ **A** ntá jeheni tjejóni tinkáchónkini ch'án kjónté t'ikonhyani ch'án.

⁸ Kjánchó jeheni na imá chéheñi tjinkaonni chrókuítøhenni tí cuerpoéni chóntani jie kixín sáchrókjuíni tí tjen Ìnchéni, chrók'uejókoni ch'án ntiha.

⁹ Méxra xikaha tjinkaonni chrókjuinchechéheñi Ìnchéni kjónté **na**xá chróchóntani cuerpoéni ntihi la o í chróchóntahyani, la **na**xá chrókuinkáchónkini ch'án.

¹⁰ Kixín kaín ní t'ichjánxin tsochjinehenni Cristo tí tjen ch'án t'etøan ch'án kixín nkehe ts'áyéheñi jnkojnkonni kixín nkerí xra kjuích'eni á jína o náhi tí **na**xá k'uéchóntani cuerpoéni ntihi chjasintajni.

Tí tan tjanjon kjuaxróxin

¹¹ Méxra xikaha noheni chróchrakøhenni tí kjuachaxin jie kuente Ìnchéni ntá tókakøhenni tjakøhenni chojni kixín chrókuinkáchónki sín ch'án. Ó nohe Dios kixín nkexrí tjejóni la ko tjinkaonni kixín kjaxinrá chrókónohará.

¹² Jehya kixín chrótjonkará inaá kixín jína ch'eni xra. Náhi. Jehí ntáchroni kixín síin nkehe chrókóchàxinrá kixín tí jeheni ntoá chrónkani kixín chrókónohará nkexrí chrókjuátøherá tí sín imá nchehnke sín kixín imá náxrjón nixja sín a ntá xraxinkakonhyani sín tí jie chóna asén sín.

¹³ **A** ntá tí lóconi na mé tíha kixín tjinkaonni chrókjuich'eheni Dios xra. **A** ntá tí jehya lóco tí jeheni la mé jehí tjinkaonni chrókjuinkítsani tí jahará.

¹⁴ Kixín Cristo la imá tjuèhe kaín xín chojni ntá t'etuenhenni ch'án kixín ó noheni jína kixín jehó ch'án k'uenyákonhenni ch'án ní ijíeni kaín ní kixín éxí kjaxinni ik'uénni kaín ní kixín jehe ch'án k'uenyákonhenni ch'án.

¹⁵ Mé xikaha Cristo mé k'uenyákonhen ch'án kaín ní. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuénteni chrókjuinchexiteyéheñi. Náhi. Chrókjuinchexiteyéheñi ch'án kixín k'uenyákonhenni ch'án la ko xechón ch'án inaá kixín tsaáxinni ch'án.

¹⁶ **A** ntá jie jeheni tjenkayáxinhyani éxí tjenkayáxin chojni chjasintajni ó. Kjánchó senó k'uéchóxinni Cristo kixín nkexrí kjuák'e ch'án chjasintajni ó, a ntá jie la xikahya t'ikonni ch'án.

¹⁷ Méxra tí nkexro tinkáchónki Cristo mé k'óna ijnko chojni nixin. **A** ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

¹⁸ Kaín tíha mé tí xṛa kjuích'e Dios. Jehe ch'án mé kjuanjon ch'án kjuaxróxin kíxin jína chrók'uejókoni ch'án kíxin k'uenyákonhenni Cristo. Ntá jie jeheni k'uáyéheni tí xṛa tsochénkani í so chojni kíxin kjuaxróxin chrók'uejóko sín ch'án.

¹⁹ A ntá ó noheni kíxin Dios ichr'án Cristo k'uenyákonhenni ch'án, ntá xikaha Dios tjinkaon kíxin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chóna chojni, a ntá jeheni k'uáyéheni tí xṛa tsjakoni itén ch'án.

²⁰ Ntá jeheni kjuachaxin kuente Cristo chronkaxínni kíxin Dios chrónoaxínrâ ch'án tí jeheni. Mé xikaha tí kjuachaxin kuente Cristo chrónoaxínrâni kíxin kjuaxróxin chrók'uejokoarâ Dios.

²¹ A ntá Cristo la ninkehó jie kjuasinhya ch'án, ntá ijiéni k'uénxin ch'án. Kjánchó Dios k'uíkon kíxin éxí tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6

¹ Ntá kaín ni jnkokoá ch'eheni Dios xṛa, ntá chrónoaharáni kíxin chrók'uitóéhyarâ tí kjuasáyé Dios kjuakuaxínrâ ch'án.

² Kíxin ntáchro xroon itén Dios kíxin:

A ntá tí yaon kóxrjínhjin Dios kuínhin ch'án tí nkehe chronòa chojni;

Tí yaon tsaáxin chojni mé kjuínkítsa ch'án tí jehe sín.*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

³ Ch'ehyani ninkehó nkehe jínahya kíxin ntá chrók'uaúntaxínhjin sín tí xṛa tjejóch'eni.

⁴ Náhi. Kaín nkehe ch'eni tjakoaxínni kíxin ch'eheni Dios xṛa. Na mé tjachani tónínkakonyani kjónté nchónhya nkehe tjasótéxínni, la kjónté ichrén nkehe t'ichjánxínhinni, la kjónté ichrén kjuaxikaon sín.

⁵ Na mé k'uékoni, la k'uéjóchjinani, la nchónhya k'uíxite chojni kóninkakonhenni sín, la ko tí xṛa kjuích'eni la imá xṛa. Kjaxin k'uájuahyani la ko kjónehyani.

⁶ Tjakoaxínni kíxin tjóá tjenkayáxinni, la ko tjakoaxínni kíxin ó noheni tí nkehe chaxín, la ko tjakoaxínni kíxin tónínkakonyani, la ko tjakoaxínni kíxin ch'eni tí jína. La ko chóntani Nchakuen Dios, la ko kaín asénni tjuèheni kichó ní,

⁷ la ko chrónkani tí tan ntoá kuente Dios, la ko tjakoaxínni kíxin chóntani tí kjuachaxin kuente ch'án. Ntoá tjejóni ntá xikaha tsjachani ntá kohya nkehe tsonhenni.

⁸ Iso sín náxrjón nixjehe sín tí jeheni la ko iso sín náxrjónhya nixjeheni sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'íkon sín tí jeheni éxí chojni ch'ia la ko iso sín ntáchro sín kíxin jeheni chojni ntoá chrónka.

⁹ Iso sín ntáchro sín kíxin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín.

¹⁰ T'aváni la kjónté xraxinkaonni kíxin lnchéni t'ayakonhenni la chéheni. Éxí nòani jeheni na kjónté chénkani itsje chojni tí itén Dios tsaáxin sín éxí chróchjéheni sín ijnko nkehe imá tjete xikaha. Éxí chóntahyani ninkehó nkehe la kjónté la kaín nkehe chóntani.

* 6:2 Isaias 49.8

¹¹ Kíchóni tjejorá chjasin Corinto, ntoá chrónkani nixjahaaráni la ninkehó t'ayahyaráni la mé kaín asénni tjuahará.

¹² Jehya jeheni chrók'uitjáyán kixin chrótjuahará. Náhi. Jahorá t'itjáyán kixin chrótjuèhérá tí jeheni.

¹³ Janhan xrxjanóhára éxi ijnko it'é xjan chrónóghé tí xjeen ch'án kixin kjaxinrá kaín asánrá chrótjuèhérá tí jeheni éxi tjuèheni tí jahará.

Jeheni mé éxi ninkqe Dios tjechón

¹⁴ Chrók'uitohyará tí sín tinkáchónkihya Ìnchéni kixin tíha mé éxi yóhé ijnko yunta, jnkokónhya koxinta. ¿La ko nkexrí chrókóyóhé ijnko chojni ó kótjóa la ko ijnko chojni naxa náhi? ¿La ko nkexrí chrókóyóhé tí t'inkáséyan la ko tí sítié?

¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kichó ijnko chojni tinkáchónki Cristo la ko ijnko chojni tinkáchónkihya.

¹⁶ Xitjahya chrók'uito tí ninkqe Dios la ko tí nkehe tsíkjangya. Kixin jeheni mé tí ninkqe Dios tjechón, kixin jehe ch'án tsíntáchro ch'án kixin:

Ntaha tsjak'é la ko xritjak'é tí tjejó tí jehe sín,
a ntá janhan mé ts'óna Dios kuènte sín
la ko jehe sín mé ts'óna chjasin kuèntana.†

¹⁷ Méxra xikaha kjaxin ntáchro Ìnchéni kixin:
T'axrjekjanxínrá tí jehe sín na ókjé tjejorá;
tsehyará tí nkehe tjuáhya.

A ntá janhan mé ts'ayáha tí jahará.‡

¹⁸ Ntá janhan mé ts'óna It'ará,
a ntá jahará ts'ónará xjanna ntoa la ko xjanna chjin,
ichro Ìnchéni Dios chóna kaín kjuachaxin.§

7

¹ Mé xixaha kichó ni, tí nkehe i mé tsíntáchro Dios tsjanjon ch'án. Méxra t'ichjánxin kixin tjóá chrók'uejóni, chrókuítgheni kaín nkehe chrókjuinchekjita tí cuérpóeni la ko tí asénni. Ntá chrókóxakonhenni chróchrakonhenni Dios la t'ichjánxin chrókjuancheheni ch'án chrókjuinchetjóa ni ch'án kixin jehó ch'án chrókuinkáchónkini.

Tí sín Corinto kjuitoxinhin sín ntje sín

² Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jje chóntehyani ninkexró, la ko kjuich'tiyehyani ninkexró.

³ Jehya ntáchroni tíhi kixin chrókuékará jje. Náhi. Ó nohará kixin ósé chrónkani kixin kaín asénni tjuèheni tí jahará kixin jnkokoá chrók'uejóni la ko jnkokoá chrók'uenni.

⁴ Janhan la imá tjikosáyahará tí jahará la ko imá chàna kixin jína tjejorá. Kjonté kaín nkexrí tjejótjasóteni na imá chàna.

⁵ A ntá tió kjujini estado Macedonia la xitjahya chrók'ok'éheni kixin nkuixín síin chojni nínkakonhenni la ko kóxakonhen asénni.

⁶ Kjánchó Dios na mé tí nkexro nchechéhé asén kaín tí sín tsíkóxrxjé mé kjuinchechéhé ch'án asénni kixin ó kjuíji ch'in Títo.

⁷ Ntá jehya kixin tí kjuíji ch'án ó chrókóchéxinni. Náhí. Chéheni kixin jahará kjuinchechéhéra ch'án. Chrónka ch'án kixin imá tjínkáonrá chrók'uikonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuanhanrá. Mé kujnhan kaín tíha ntá antsí má kóchéna.

⁸ Kjuíntak'ávára kixin tí xroon kjian chr'anhánrá la kjónté la ntá jie í tóxakonahya. Na mé senó kóxakonna ntá k'uikuon kixin tí xroon kjuíntaxakonhanrá kjánchó kánhyó isé tíha.

⁹ Ntá jie chána, kjánchó jehya kixin tí nkehe kjuíntak'ávára. Náhí. Chána kixin tí kjuat'áva a ntá ikjanrá kuinkachónkirá Dios. Kjuachará kjónté tí kjuat'áva ntá kjanrá kuinkachónkirá Dios la kóxrjnhin ch'án. Méxra xikaha jeheni la ninkehó nkehe jínahya kjuít'aharáni.

¹⁰ A ntá tí kjuat'áva kjuacha chojni ntá sinchechéhe sín Dios kixin kjuítóxinhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuítogehya tí nkehe kuénte chjasintajni mé t'áva sín kixin táhó ts'énxín sín.

¹¹ A ntá jahará kjuachará k'uátsínkará tí kjuat'áva éxi kóxrjnhin Dios, a ntá jie kónohará kixin jina tjeorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuincheckónínkaonrá la ko kjaxin kjuinchechrakonrá. Ntá chr'éxin ntá tjínkáonrá chrók'uikonrá tí janhan. Ntá kjuincheckjasóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsíkónhen.

¹² A ntá tí nkehe kjian la jehya kixin kjuenkayáxian janhan kuénte tí ch'in kjuasin jie, la ko jehya kixin kjuenkayáxian janhan kuénte tí ch'in k'uává ó. Náhí. Íchá jina kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetóanni.

¹³ Mé xikaha kjuich'erá ntá kóchéheni.

Kjánchó antsí má kóchéheni kixin k'uikonni kixin kóchéhe ch'in Tito kixin jahará kaín rá kjuínkítsará kixin kjuaxróxin kjuák'e ch'án ntiha.

¹⁴ Janhan k'uétjanka tí ch'in Tito kixin chána kixin tí jahará la jehya kjuach'ia tíha la kósuánahya. Náhí. Kaín nkehe k'uétjonkará la chaxín la ko kjaxin kaín nkehe k'uéntátjan ch'in Tito la chaxín kixin chéheni kixin kuítekáonrá.

¹⁵ A ntá jie antsí tjuahará ch'án kixin xráxinkaon ch'án kixin nkexrí jina kuítekáonrá la ko nkexrí imá kjuíkosáyehérá ch'án kjuánjonrá kjuachaxin kuítoghe ch'án ntiha.

¹⁶ Ntá imá chána kixin ó nòna kixin jahará sjnchexiteyànará.

8

Antsí má chrókjuínkítsa sín kichó sín

¹ Ntá jie kichó ni, tjínkaonni chrókónohará kixin nkexrí tí sín tinkáchónki Ínchéni tójnoktsé sín estado Macedonia kjuákoxin sín nkexrí tí kjuasáyé Dios.

² Kjónté nchónhya nkehe tsíkónhen sín la kjónté la kóchéhe sín; la ko kjónté nòna sín la antsí má kjuínkítsa sín tí sín í so éxi chojni chóna itsjé chichaon xikaha kjuích'e sín.

³ Chaxín k'uikuon kixin kjuanjón sín éxi tí nkehe chóna sín la ko antsí má xíkjanjón sín inaá kixin xikaha kjuenkayáxin sín.

⁴ Nchónhya chrónóhehe sín tí jeheni kixin chrókjuanjónni kjuachaxin kixin chrókjuínkítsa sín tí sín kichó ni tinkáchónki Dios.

⁵ Na mé *antsí* má kjuanjon sín la *xikahya* kjuenkayáxinni kixin *xikaha* chrókJuanjon sín, na mé senó kuinkáchónki sín Ìnchéni, ntá kjuixin ntá kjuínchexiteyéhe sín tí jeheni éxi tóxrjínhin Dios.

⁶ Méxra chrónóhehni tí ch'ín Tito kixin chrókJuenájín ch'án chichaon tí tójkotsérá ntiha éxi kjuankixin ch'án senó.

⁷ A ntá jahará la tjákoxinrá jína kixin *antsí* tinkachónkirá Ìnchéni, la ko *antsí* k'uitjará chrónkaxinrá itén Dios, la ko *antsí* k'uitjará nkehe kuènte Dios, la ko *antsí* chontará kjuachéhe, la ko *antsí* tjuèhérá tí jeheni. Méxra *xikaha* *antsí* chrókJuákoxinrá tí xra jína chrókJuínkĩtsará tí sín kíchó ni.

⁸ Jehya ntáxrjan tíhi kixin chrókuétuanhanrá *xikaha*. Náhí. Jehí tjínkavan chrókónohará nkexrí jína kjuich'e tí í so sín kixin kjaxinrá chrókJuákoxinrá kixin tjuèhérá kichuára.

⁹ Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónòa ch'án kixin imá tjuèhe ch'án tí jahará kixin tí kónòaxin ch'án mé jahará kórkóxinrá.

¹⁰ Méxra tsotjonkará tí nkehe tjenkayáxian janhan kuènte tí xra i kixin jahará tí nánò k'uátsínka kjuankixinrá kjuínkĩtsará kjuánjonrá nkehe, la mé jehya kixin ó jehí kjuínkĩtsará sín. Náhí. Kjaxin imá kócháhará kixin kjuínkĩtsará sín.

¹¹ A ntá jie chrókJuintaxín chrókJuánjonrá éxi tí chrókJuachará chrókJuánjonrá éxi xrankixín tsíkateherá tsjínkĩtsará tsjánjonrá nkehe.

¹² Mé *xikaha* tí chaxín tjinkaon jnkójín chojni chrókJuanjon sín nkehe, ntá tsóxrjínhin Dios tí tjanjon sín tí nkehe chónnta sín. Dios la tjanchahya ch'án tí nkehe chónntahya chojni.

¹³ Jehya kixin *xikaha* tí í so sín chrók'uejó sín jína kixin tí nkehe kjuínkĩtsará sín la ntá jahará chrók'uitjayan nkehe t'ichjánxinhanrá. Náhí.

¹⁴ Chrókójína chrókóyóhe chróchontará nkehe jnkokón. A ntá jie jahará chontará tí nkehe chónntahya tí í so sín. A ntá í jnko yaon jehe sín tsochónnta sín tí nkehe tsochontahyará. ChrókJuínkĩtsará tí sín chónntahya kixin chróchontará nkehe jnkokón.

¹⁵ Éxi ntáchro xroon itén Dios kixin: “Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjèhya na mé kjónté tsjèhya la kjuacha tí nkehe kuicháxinhin kjuenájín sín.”*

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxi tóxakonna kixin tí jahará.

¹⁷ Ntá kóxrjínhin ch'án tí nkehe k'uetuènhenni ch'án, la ntá kjaxin jehe ch'án kóxakonhen ch'án kixin á jína tjejórá, ntá jehe ch'án tjinkaon ch'án chrókJuujitsjehe ch'án tí jahará.

¹⁸ Kjaxin k'uetòanni sátsjikotoxin tí ch'ín Tito í jnko kíchó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xra jína tjech'e ch'án tjako ch'án tí tan tsaáxinni.

¹⁹ La ko kjaxin tí sín kaín tí njnko ntihi kjueyá sín tí nkexro kíchó ni kixin sátsjikotoxin ch'án tí jeheni tí xra sátsjikoni tí chichaon tsjikéhhenni tí sín nòa. Na mé tí xra ch'eni kixin *xikaha* tsjikosáyeheni Ìnchéni la ko *xikaha* tjákoxinni kixin tjinkaonni chrókJuínkĩtsani sín.

* 8:15 Éxodo 16.18

²⁰ Tjinkaonni kixin tsokohya nkexro chrók'uántaxínhinni kixin tí chichaon xrenájín kjuújikoni.

²¹ Méxra tjinkaonni chrókjuich'eni tí nkehe ntoá, jehya jehó tí nkehe chrókoxrjínhín Inchéni. Náhlí. Kjaxin tjinkaonni kixin chrók'uikon chojni kixin jína tjejóch'eni.

²² La ko kjaxin k'uętuęhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuákoxin ch'án kixin chéhe ch'án chrókjuinkitsa ch'án kixin itsjé xra kjuich'e ch'án. A ntá jie antsí má chrókjuich'e ch'án xra kixin chóxin ch'án tí jahará.

²³ A ntá jnkojín sín tsjanchankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjinkitsa ch'án tí janhan kixin xikaha tjinkitsa ch'án tí jahará. A ntá tí tsjanchankí sín kixin nkehe tí xra ch'e tí í so kichó ni ntá chenkará sín kixin tí sín kaín njnko k'uętoan sín kixin sátsji sín ntiha kixin mé xikaha tsjikosáyehe sín Cristo.

²⁴ Méxra chrókjuákoxinrá kixin chaxín tjeđerá kichuára kixin tsonohe tí sín kichó ni í so njnko la ko kjaxin tsonohe sín kixin chaxín chéhegi kixin tí jahará.

9

Tí chichaon xrenájín tsjinkitsa tí sín kichó ni

¹ A ntá tí xrenájín chichaon kixin tsjinkitsará tí sín kichó ni tinkáchónki Inchéni, la t'ichjánxienhya tsokjian xroon tsochr'anhánrá

² kixin xráxin kónna kixin jahará tjinkáonrá chrókjuinkitsará, na mé xikaha chána la tjanka tí sín tjejó estado Macedonia kixin jahará chojni estado Acaya desde tí nánó k'uátsínka xráxin tjejorá tjinkáonrá chrókjuinkitsará. A ntá antsí tsjé sín estado Macedonia tjinkaon sín chrókjuinkitsa sín kixin jahará xikaha kjuákoxinrá nkexrí tjinkáonrá chrókjuinkitsará.

³ A ntá ich'an tí sín kichó ni kixin tjínkavan kixin tsontáchrohya sín kixin chaxínhya tí nkehe jína ntátjan sín senó. Mé xikaha jahará chrókóyaxínhanrá chrókjuinkitsará tí sín kichó ni éxi ntátjan sín senó.

⁴ Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonrá ntá chrókósuęhegi tí jeheni kixin imá chóxinni kichó ni la ko kjá chrókósuáhará kjaxinrá.

⁵ Méxra xikaha tóna kixin t'ichjánxin tsontátjan tí sín kichó ni kixin sátsji sín tsitónxin sín ntjá tsjijitsjehe sín tí jahará senó tsjinkitsa sín kixin tsjenájínrá tí chichaon tsintáchrórá senó kixin chrókjuánjonrá. A ntá chrókóyaxínhanrá kixin chrókjuánjonrá tí chichaon éxi ijnko nkehe chaxín tjinkáonrá chrókjuánjonrá la jehya éxi ijnko nkehe chrókjuanchaharáni afuerza.

⁶ Xráxinkáonrá kixin tí nkexro k'uęnká tsjéhya na mé tsjéhya tsotjá. A ntá tí nkexro k'uęnká itsjé mé tsotjá itsjé.

⁷ Méxra jnkojnko chojni chrókjuanjón tí nkehe kjuenkayáxixín sín asén sín. Na mé tjinkakonhya Dios kixin kénhya asénni chróchjéhegi ch'án nkehe, kixin Dios mé tjehe ch'án tí nkexro chéhe tjanjon nkehe.

⁸ A ntá Dios chóna kaín kjuachaxin jie ntá tsotjáhará ch'án kaín nkehe t'ichjánxinhanrá kixin tsochontará nkehe tsóchjđerá í so chojni chóntahya kixin xikaha sích'erá kaín xra jína.

⁹ Éxi ntáchro tí xroon itén Dios kixin:

Tí nkexro t'ókikayehe ch'án itsjé nkehe nchekitonhen ch'án tí sín nòa

na mé nunca tsjejhya tí xra jína ch'e ch'án.*

10 Dios mé tjanjon noatje kixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinchek'ánkí ch'án tí nkehe ts'ènkara la ko jehe ch'án sinchek'ánkí ch'án tí xra jína tjejoch'erá.

11 A ntá tsochontará kaín nkehe tjehe kixin ntá antsí tsjachará tsjínkĩtsará tí í so sín kichó ni. A ntá xikaha tsjijikenhenni sín tí nkehe tsochjehérá tí sín kichó ni ntá tsjanchehe sín Dios kjuasáya.

12 Kixin xikaha chrókjuínkĩtsará tí sín kichó ni na jehya kixin chrók'uáyéhe sín tí nkehe t'ichjánxinhin sín ó, la mé kjaxin chróchjéhe sín Dios kjuasáya.

13 Mé xikaha tsjanchehe sín Dios kjuasáya kixin tí nkehe kjuánjonrá kjuákoxinrá kixin nchexitéyéhérá tí tan kuente Cristo. Kjaxin tsjikosáyehe sín Dios kixin tí í so nkehe kjuánjonrá k'uáyéhe sín la ko tí nkehe k'uáyéhe í so chojni.

14 La ko jehe sín tsjanchehe sín Dios kixin tsjinkĩtsa ch'án tí jahará kixin jehe sín tjuahará sín kixin t'ikon sín kixin tjákoxinrá kixin tí kjuasáyé Dios chontará.

15 Tjancheheni Dios kjuasáya kixin kjuínchekĩtonhenni ch'án ijnko nkehe imá jie tsaáxinni la tsjachahyani tsochronkaxinni kaín tíha.

10

Kjuachaxin chóna ch'in Pablo kixin tsík'óna ch'án apóstol

1 Janhan Pablo tió xrjanóahará nkehe la jnkojína xrjanóahará la mé tjákoxian éxi toxrjínhin Cristo. Ntáchrórá kixin tió tjèn tí tjejorá ntiha la tósuàna, a ntá tí kjin tjèn la imá jièna, ichrorá.

2 Méxra xrjanóahará kixin tí tsjasántsahará tjínkakonhya kixin chrókjuínchekóninkáonráni kixin ntá tsonínkakonhánrá jnkojínrá kixin tsékaráni jie kixin ixria éxi chojni chjasintajni ó, tsixrorá. A ntá xra ó tsjasán tsjentuáha tí jehe sín.

3 Chaxín tjejóni éxi chojni ó, na kjánchó tió tjanjonni la tjanjonhyani éxi tjanjon chojni chjasintajni.

4 Kixin tí nkehe xraáni tjanjonxinni jehya nkehe kuente chjasintajni. Náhí. Táha la kjuachaxin kuente Dios la tíha mé tsjacha sinchek'itjáyan kaín kjuachaxin kuente tí Jínahya.

5 Na mé tsjachani sinchek'itjáyanni tí nkehe ntoáhya tjenkayáxin chojni la ko kaín nkehe nchehnkexín sín t'inkákonhen kixin chrókóchóxin chojni Dios. A ntá kjuachaxin kuente Cristo tjákohehi kaín chojni kixin ntá tsítóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án

6 la ko tjejóchónhenni sinchekjasóteni kaín tí sín ntiha naxa tjinkakonhya sín chrókjuínchexiteyá sín tí tsjixin tsonoheni kixin á chaxín tsjachará sinchexiteyará jína.

7 A ntá jahará tékaráni jie kixin tí nkehe t'ikonrá ó. A ntá tí nkexro tjenkayáxin kixin chaxín ch'ehe Cristo xra la mé kjaxin chrókjuátsoan kixin kjaxinni jeheni la ch'ehehi Cristo xra.

8 A ntá tí chrókjuíntahnkena ntsí kixin tí kjuachaxin chonta janhan ntá chrókósuánahya kixin Inchéni kjuanjon tí kjuachaxin kixin chrókjuínkĩtsa tí jahará kixin antsí chrók'uitjará kuente Dios, la mé jehya kixin chrókjuíntak'itjáyanrá.

* 9:9 Salmo 112.9

⁹ Tjinkakonhya kixin chrókjuintachrakonxínrá tí xroon chr'anhánrá.

¹⁰ Kixin ntáchro sín kixin ixra la ko jiehe tí nkehe ikjian janhan, a ntá tí chrókjuak'é ntiha la jienahya la ko kánhyó chonta janhan kjuachaxin tí nixja janhan.

¹¹ Kjánchó tí nkexro xikaha ntáchro chrókónohe ch'án kixin jnkokón nixja janhan éxí nixja tí xroon tsíkjan kjónté ikjín tjèn la ko kjónté tí chrók'uejóni ntiha.

¹² Tjinkakonhyani chrókjuenkayáxinni kixin chrókóyóhèni tí í so sín ntáchro sín kixin jína tí jehe sín. Jehe sín mé lontj sín kixin ncheyóhè sín asén sín í so chojni.

¹³ A ntá jeheni la chrókjuinchehnkexínhyani ijnko xra jehya xra kuènteni. Dios mé kjuako nketí sich'eni xra la kuanjon ch'án kjuachaxin kixin kjujini kjuich'eni xra tí tjejorá chjasin Corinto.

¹⁴ Jehya kixin chróchóntahyani kjuachaxin chrók'uetuanhanráni. Tí chaxín jehya jeheni saxín kjujini tí tjejorá ntá xikaha chróchóntahyani kjuachaxin. Ntá náhí, kixin jeheni saxín kjujini ntiha kjuakoharáni itan kuènte Cristo.

¹⁵ Chrókjuinchehnkexínhyani ijnko xra kjuich'e ókjé chojni éxí xra chrókjuich'eni jeheni. Náhí. Tjinkaonni kixin antsí chrók'uitjará tsinkachónkirá Ìnchéni ntá xikaha la antsí chrókjuinkitsani tí jahará kixin jehó tí xra k'uáyéhèni tjejóch'eni.

¹⁶ Kjaxin tjinkaonni chrókjuakoni tí itén Ìnchéni chrókuaáxin chojni í so chjasin sáchrókjuini la ko kjaxin chrókjuinchehnkexínhyani tí xra chrókjuich'e ókjé chojni.

¹⁷ A ntá jnkójín sín tjinkaon sín chrókjuinchehnke sín ntá jehó chróntáchro sín kixin kjuachaxin Ìnchéni mé chóna sín.*

¹⁸ Kixin tóxrjienhya Dios ijnko nkexro jehó chróntáchro kixin jína ch'án. Náhí. Ìnchéni mé tsontáchro ch'án nkexro chaxín jína.

11

Ch'ín Pablo la ko tí sín chaxínhya apóstol

¹ Tjinkavan chrókuinhínrá ntsí tí lontjina. ¿Á chrókjuachará chrókuinhínrá nkehe tsontáxrjan?

² Janhan tjinkakonhya kixin í jnko nkexro chrókuinkachónkirá. Kjaxin xikaha tjinkakonhya Dios. Ó ikjuá Cristo kixin chrókuakja ch'án tí jahará. Tjinkavan chrókjuánjuan tí jahará chrókuakja tí jehe ch'án éxí yóhè ijnko tjan tjarisoá chrókótehe jnkokoá xii.

³ Tóxakonna kixin éxí tí konche tí kjuach'ia xriko ntá kjuich'iyehè tjan Eva, ntá xikaha kjaxinrá jahará tsjtohérá sit'ayahará ókjé chojni ntá tsjtohérá tí nkexrí kaín asánrá tinkachónkirá Cristo.

⁴ A ntá jahará cháhará tjánjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxí tí chronkaxinni jeheni, la ko kjaxin cháhará k'uayéhérá ókjé nchakuen jehya tí Nchakuen Dios k'uayéhérá sao, la ko cháhará chrókuitekáonrá ijnko nkehe ókjé chrókuaáxinrá jehya éxí tí nkehe kuítekáonrá senó.

⁵ Ó nóna kixin chaxínhya ninkehó sínkíhyana janhan, a ntá antsí sínkí tí sín chréhérá jahará, ichrorá.

* 10:17 Jeremías 9.24

⁶ Kjënté kánhyó náxrxjón níxja janhan la jehya kixin kánhyó chrókónona chrókjuákua. A ntá tjákoáxinrá jahará tíhi kixin kaín nkehe t'a.

⁷ ¿Á ntoáhya kjuít'a janhan xrxjankaxián tí tan tsaáxinni kixin ninkehó kjuáncháhya chrókjuacha la ko éxi ijnko chojni nóè kjuak'é janhan kixin tjínkavan chrókjuínkítasará chrók'uitjará?

⁸ Tí sín í so níngo kjuínkítasana sín kjuanjon sín chichaon k'uayáha kixin tsjak'é tsjákohará jahará.

⁹ Tí kjuak'é tí tjejorá jahará la kjónté t'itjáyan nkehe la ninxeró kjuáncháhya nkehe. Jehó tí sín kichó ni kjuixín estado Macedonia kjuikao sín tí nkehe t'ichjánxinna. Méxra tjínkakonhya kixin chrótjahará xra tí jahará la ko xikaha naxa jtét'a jie.

¹⁰ Xikaha chaxín choxian tí tan chaxín ntoá kuènte Cristo, a ntá kohya ninxeró nkuixín estado Acaya tsjacha tsakitsjena tí kjuachéhe chonta.

¹¹ ¿Nkeuènte xikaha ntáxrjan? ¿Á xikaha ntáxrjan kixin tjuahyará tí jahará ní? Náhi. Dios la ó nohe kixin imá tjuahará.

¹² Kjánchó ó jehí tsjintaxín xikaha sít'a kixin tjínkakonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjákua la ko tí nkehe tjako sín.

¹³ Kjánchó jehe sín ijnko apóstol chaxínhya mé ch'ia sín ncheyóhó sín éxi chojni kjueyá Cristo.

¹⁴ Jehya ijnko kjuachakon tíha kixin kjaxin ch'ín Tsochren kjaxin xikaha ncheyóhe ch'án éxi ijnko ángel kuènte tí t'inkaséyan.

¹⁵ Méxra xikaha kjaxin kuènnen tí sín ch'ehe tí Jínahya xra mé ncheyóhe sín tí sín jína. Ntá tsjixixín mé tsjasótexín sín tí xra jínahya kjuíuch'e sín.

Kjuasóte ch'ín Pablo kixin apóstol tí jehe ch'án

¹⁶ Ntáxrjan inaá kixin nijnkorá chrókjuenkayáxinrá kixin lócona. Kjánchó tí xikaha tjenkayáxinrá la tjtóherá tsonixja janhan éxi lócona kixin kjaxinna jína chrókjuíntahnke ntsí.

¹⁷ Tí xikaha ntahnkexián la jehya kjuachaxin kuènte Ìnchéni ntáxrjanxian tíha. Náhi. Jehí éxi ijnko chojni lóco níxja.

¹⁸ A ntá nchónhya chojni síin nchehnkexín sín tí nkehe nohe sín a ntá jie la kjaxin janhan sjntahnke.

¹⁹ Kixin jahará ntáchrórá kixin imá nohará ntá cháhará tjejó tí sín lóco.

²⁰ Kixin tjánjonrá kjuachaxin t'etuanhanrá sín la nchexiteyéhérá sín la ko takitsjahará sín tí nkehe chontará la ko ch'éna asén sín éxi inché sín tí jahará, la ntá kjoníehyará sín la ko tjate sín nkaya ikonrá.

²¹ Kjónté chrókósuána tsontáxrjan kixin jeheni la kánhyó jiehe k'uetuanhanráni.

Kjánchó tí nkehe nchehnkexín sín la janhan ntahnkexián kjaxinna, kjónté ntáxrjan tíhi éxi ijnko chojni lóco.

²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjenixín sín ch'ín Abraham? Kjaxin janhan k'uaxrjenixian ch'án.

²³ Ch'ehe sín Cristo xra kjánchó janhan la antsí má la jehe sín la kénhyó, kjónté ntáxrjan tíhi éxi ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntóechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uixín kjuaxikaon kixin chrók'uén.

²⁴ In'ó veces tí sín judío kjuatena sín la ko treinta y nueve tí kjuatjoté.

²⁵ Níya kjuatexínna sín inta la ko í jnko vez kjuak'e sín xro. Níya k'uániánki ntabárcō ntā ntā ijnko yaon la ko ijnko tie tjénkataván ntayaon.

²⁶ K'uájia má, k'uíkuan kjuaxikaon chrók'uénxian tí ntario la ko chrók'óyánna tí xíchee la ko chrók'óyánna tí sín chjasenná la ko tí sín tsíkijixín ókjé. K'uíkuan kjuaxikaon tí chjasín jié la ko tí nteje la ko tí ntayaon la ko chrók'óyánna tí sín chaxínhya tinkáchónki Inchéni.

²⁷ Kóxrjéna kixin tí xra kjuít'a la ko itsjé nkehe náxrxónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntā la ko itsjé yaon kjónghya ninkehó la ko kókinna la ko chontahya kaná.

²⁸ Kjónté kaín tíha la ko í so nkehe kónna la mé jnkojnko yaon imá tóxakonna kixin kaín tí sín tójnkotsé sín kaín tí njnko.

²⁹ ¿Á tjen jnkojínra níhará? A ntá tí xikaha la koína éxí nna. ¿Á tjen jnkojínra kjuásinra jie? A ntá tí xikaha la kjaxin tóxakonna.

³⁰ Tí chrókjuíntahnkexian nkehe la mé tjínkavan kixin jehó chrókjuákoxian kixin kánhyó jiéna.

³¹ Dios, It'é Inchéni Jesucristo, na mé tí nkexro chrórxaxinkaonni jnkochríxín mé ó nohe ch'án kixin chaxín tí nkehe ntáxrjan.

³² Ntá tí kjuak'é chjasin Damasco la mé tí ch'ín gobernador kjuích'ehe ch'ín rey Aretas xra mé k'uetuénhen ch'án tí sín soldado kixin tsochónhen sín tí ntója tí chjasin kixin chrótséna sín chrókjuak'échjina.

³³ Kjánchó siín nkexro k'uínkajinxinna ijnko ntaxra ijnko ventana tí tjat'ō k'uantatjen chjasin la mé xikaha kuaána, tséhyana sín.*

12

Tí nkehe k'uíkōn ch'ín Pablo

¹ Ninkehó tsjachahya tí nkehe tsoxrjanka kuéntana ó. Íchá jína tsoxrjanka tí nkehe k'uíkuan la ko tí nkehe kjuínchenóna Inchéni.

² Choxian ijnko nkexro tinkáchónki Cristo. A ntá k'uátsínka catorce nánó sátsíkji ch'án tí nixin nkajní. Nonahya á sátsíkji ko ch'án cuerpo kuénte ch'án o asén ch'án ó. Jehó Dios mé nohe.

³ Méxra ó nóna kixin xikaha sátsíkji ch'án la ntá nonahya á koí cuerpo kuénte ch'án o asén ch'án ó. Jehó Dios mé nohe.

⁴ A ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka.

⁵ Jína chrókjuíntahnkexián kixin xikaha kónhen tí nkexro a. A ntá tí chrókjuíntahnkexián kixin kjuachaxin kuéntana la jehya jína tíha. Íchá jína chrókjuákoxian kixin janhán la chontahya kjuachaxin.

⁶ Tí chrókjuíntahnkexián tí nkehe kónna la chrókólócohyana kixin chaxín tí nkehe chróxrjanka. Kjánchó xikahya t'a kixin tjínkakhonhya kixin xikaha chrókjuenkayáxin chojni kixin antsí jína janhan. Náhi. Tjínkavan kixin tí xra t'ikon sín la ko tí nkehe tinhin sín mé chrókjuenkayáxixín sín kixin á jína tí janhan, tsixro sín.

⁷ Méxra chrókjuíntahnkexinhyana ntá xikaha xránjon kjuachaxin kixin chrók'uayáha ijnko kjuatjoté éxí ijnko ch'í kuikjiaté cuerpo kuéntana mé ijnko nkehe tsík'etuénhen ch'ín Tsochren ikuí kjuínchekjoténa.

* 11:33 Hechos 9.23-25

⁸ Iní veces xrjanóhə Īnchéni kixin chrókjuatsen ch'an tí kjuatjoté chonta.

⁹ Kjánchó ntáchro Īnchéni kixin jehó tí kjuachaxiэн ch'an chrókjuachaxiэн janhan. Kixin tí kjuachaxiэн ch'an antsí tsjakoexín chojni fuértehya. Méxra ntá chàna kixin fuértehyana kixin ntá xikaha tsjakoxiэн tí kjuachaxin kuэnte Cristo.

¹⁰ Méxra chàna kjónté fuértehyana la ko kjónté t'antaxina sín la ko kjónté t'ichjánxinna nkehe la ko kjónté chónkina sín chrók'óyánna sín la ko kjónté síin kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

Tóxakonhen ch'in Pablo kixin tí sín tjejó ninko chjasin Corinto

¹¹ ¿Á lócona kixin xikaha xrjanka? Kjánchó jahará kuitekákonhyará ntá xikaha xrjanka. Jahará chróchronkará xikaha kixin jina janhan. Jehya kixin kánhyó sínkina la ntá tí sín chréhérá la antsí sínkí sín. Náhí. Kjónté janhan la chaxín ninkehó sínkihyana.

¹² Kjuásian itsjé kjuaxroan jie la jina kjuak'é kóninkakonhya kjuákoxiэн kixin chaxín janhan ijnko nkexro tsikjeyá Īnchéni.

¹³ ¿Xá k'uúkuən tí jahará éxi kánhyó sínkirá a ntá tí í so ninko la antsí sínkí sín kixin tí kjuasán janhan la ninkehó xra tjaáhyará? A ntá tí xikaha ntoáhya kjuít'a la tóninkákonhyará.

¹⁴ A ntá ijie ó yaxinna tí nixin vez chrókjuasántsjahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéyá janhan la mé jahará kixin jahará éxi yóhe xjanna t'ikuən. Méxra tí sín it'é xjan chrókjuenájín sín chichaon chrók'uayakuenxín sín xjeen sín. Jehya xra kuэnte tí xjan chrókjuenájín xjan chichaon chrók'uayakuenxín sín tí it'é xjan.

¹⁵ Tóxakonnahya kjónté chrókjuintakjeje kaín nkehe chonta janhan o kjónté chrók'uénxiэн kixin tí jahará la jina chrók'uejorá. A ntá janhan imá tjuahará la kjánchó éxi tona janhan kixin jahará kánhyó tjuéherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrórá kixin kjuít'ayahará, ichrorá.

¹⁷ ¿Xá kjuít'ayahará kixin jnkojín sín ichr'an kjuíjtsjehe sín tí jahará?

¹⁸ Kjuáncháha tí ch'in Tito kixin tsjijtsjehe ch'an tí jahará la ko kjaxin kuétuəňňan tí í jnko kichó ni sátsjikotoxiэн ch'an. ¿Á kjuít'ayahará ch'in Tito ní? ¿Á chaxínhya jina k'uejóni yóini ntihá kixin jnkokón Nchəkuen Dios chóntani?

¹⁹ ¿Á tjenkayáxinrá kixin xikaha kjuátəheni kixin chóntani jie ní? Kjánchó xikahya. Dios tjetsjehe kixin nixjani éxi chojni tinkáchónki Cristo. Kichóni tjuahará la kaín tíha ntáxrjan kixin tjínkəvan kixin antsí chrókuinkachónkirá Īnchéni.

²⁰ Tóxakonna kixin tió tsjasántsjahará la tsəxrjinnahya nkexri tjejorá la ko kjaxinrá tsəxrjíanhyará tí nkehe tsontáxrjan. Tóxakonna kixin naxə ts'ixin kjuanínkaon la ko naxə ts'ixin kjuachjinoxínhin la ko tsənkínkəkhénrə kichuárá la ko chrókuétəanrə jahórá la ko naxə tsinkachónkirá kjuach'ia la ko naxə ts'ántaxínhínrə kichuárá la ko naxə chontará kjuahnke la ko jnkokoáhya tsjenkayáxinrá.

²¹ Tóxakonna kixin tió tsjasántsjahará inaá la tí Dios kuəntəna mé sinchesuàna tí tjejorá la ntá imá tsətsjanka kixin itsjérá tsíkjasinrá jie tí ósé la naxə tjuéhyará tí nkehe tjuáhya ch'erá la ko naxə tjuéhyará chontará chojni chjin ókjé tjásinkoará jie la ko tjuéhyará kaín tí í so nkehe jínahya k'uekjich'erá ósé.

13

Nhexraxinkaon ch'án sín la ko tsjixixín nixja ch'án

¹ A ntá jie la níyaxín tsjasántsahará. A ntá tí kaín nkehe tjinkáonrá tsonóna la mé chróchrónka yaá o iy'á chojni tsík'ikonxín kon sín tí nkehe tsíkónhen.

² Nixjahá tí sín tsíkjasín jie ósé, la ko nixjahará kaín rá kixin kjónté ikjín tjén la inaá nixjahará éxí nixjá tí kjuak'é k'uejóni tí iyó kjuasántsahará kixin tió tsjasán inaá la í tsikonóhaya tí sín kjuasin jie.

³ Jahará tjinkáonrá tsinhínrá á chaxín nixjaxián kjuachaxin kuènte Cristo. Jehya kixin Cristo tsjachahya tsjakoxín ch'án tí kjuachaxián ch'án tí tjejorá ntiha. Náhí. Chaxín tjakoxín ch'án tí kjuachaxin chóna ch'án tí tjejorá ntiha.

⁴ Chaxín tí k'uénxin ch'án tí ntacruz la mé éxí chónahya ch'án kjuachaxin. Kjánchó ijie tjechónxin ch'án tí kjuachaxin kuènte Dios. Kjaxinni jeheni éxí kjuak'e ch'án k'uéchónahyani kjuachaxin la ntá ijie tinkáchónkini tí jehe ch'án la tjejóchónxinni tí kjuachaxin kuènte Dios kixin jina tsjinkítsani tí jahará.

⁵ Jahará chrókjuenkayáxinrá á nchoxon tjejorá, á kaín asánrá tinkachónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxín tinkachónkirá o náhí.

⁶ Kjaxín tjinkávan chrókónohará kixin jeheni la jehya chojni chaxínhya tinkáchónki Ìnchéni.

⁷ Nixjeheni Dios kixin chrókuítgehya ch'án tí jahará kixin ninkehó nkehe jínahya chrókjuich'erá. Jehya kixin chrókjuakoxinni kixin jina tí jeheni. Náhí. Jehí tjinkaonni kixin jahará chrókjuich'erá nkehe jina. Ántosénni kjónté tsóntáchro sín kixin chónani jie.

⁸ Ninkehó nkehe chrókjuich'eni kixin chrókjuinчек'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín.

⁹ Méxra chrókóchéheni tí t'ichjánxinhya imá chrók'uejtoanni, tí chaxín jina chrók'uejorá. Ntá naxa tsonixjeheni Dios kixin chrókjuixraká chrók'uejorá ntoá.

¹⁰ Mé xikaha ikjian tíhi senó naxa tsjasántsaháyará ntiha kixin ntá tió tsjasán la ts'ichjánxinhya naxa sìnchekóninkáonrána tsoníxjaxián tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuintak'itjáyannrá. Náhí. Kjuanjon ch'án tíha kixin jahará ántsí chrókuinkachónkirá Ìnchéni.

¹¹ Na ntá kichó ni, chrókócháhará. Tjéyará kixin jina chrók'uejorá. Chrókjuinchechéhérá kichuára la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án.

¹² Nixjehérá kichuára jnkojina la tsehérá tja kichuára.

¹³ A ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkítsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí nínko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjueyána la ko jehya chojni ichr'ánna. Náhí. Kjueyána Jesucristo la ko It'éni Dios, mé tí nkexro kjuínchexechón Jesús.

² Janhan la ko kaín tí sín kíchó ni tjejókoni ntihi ikjinni tí xroon ts'áyéhe tí nínko sín estado Galacia.

³ Tjancheheni It'éni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéherá tí kjuaxróxin kuènte ch'án.

⁴ Jesucristo mé k'uenyákonhen ch'án ijíeni ntá kuaáxinni la mé ijie tsjachahya tí nkehe jínahya sín chjasintajni tsjachroeni mé xíkaha tjínkaon It'éni Dios.

⁵ Tjáncháha Dios kjuasáya jnkochríxin mé xíkaha tsoxiteyá. Amén.

Kohya íjnko tan tsaáxinni

⁶ Janhan tóxakonna kíxin jahará imá tjoka tinkakìtohéra Dios kjueyará kjuasáyé Cristo. Jahará la tjoka ó kjuankíxinrá chréhéra ókjé tan chrókuaáxinrá.

⁷ A ntá chaxínhya xíkaha. Kohya íjnko tan tsaáxinni. Jehí iso chojni tjínkaon nchexakonhanrá la ko tjínkaon sín chrókjuítóxinhin sín tí tan chrókuaáxinni kuènte Cristo.

⁸ A ntá tí jnkojín nkexro chrókjuakohará ókjé tan chrókuaáxinrá yóehya tí nkehe ó kjuakoni la tí xíkaha la Dios mé sinchekjasóte tí sín kíxin xíkaha sich'e sín, kjónté á janhan o ijnko ángel chrókjuixin nkaya nkajní.

⁹ Senó xrjanka la inaá tsoxrjanka kíxin jnkojín nkexro chrókjuako ijnko tan ókjé tsaáxinrá yóehya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kíxin chrókóxrjínhin chojni tí xra t'a. Náhí. Tjínkavan kíxin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijnko nkexro ch'ehe xra Cristo.

Ch'ín Pablo k'óna ijnko chojni tjako itén Dios

¹¹ Jahará kíchó ni chrókónohará kíxin tí tan tjákua tsaáxinni mé jehya ijnko nkehe kjuenkayáxin chojni ó.

¹² Jehya chojni chjina tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhínra nkexri k'uékjak'é tió naxa k'uéchráha tí sín judío. Ó nohará kíxin k'uéchonkíha tí sín tinkáchónki Ìnchéni la ko tjínkavan chrókjuíntak'itjáyán sín.*

¹⁴ Tí naxa k'uék'ájikian tí sín judío la antsí má k'uénóna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekavan tí nkehe k'uék'etóan tí sín tsík'axrjenixinni.

¹⁵ Kjánchó Dios kjueyána kjónté naxa tókjínahya la kjuasáyé ch'án kjueyána ch'án kíxin xíkaha kóxrjínhin ch'án.

* 1:13 Hechos 8.3; 22.4-5; 26.9-11

16 Kjuínchenòna ch'án nkexrí tjen tí Xjeen ch'án kixin tsjákoḡa tí sín jehya judío tí tan tsaáxinni. Tió kjueyána Dios la ninkexró kjuakonaḡa.

17 La ko kjaxin kjuitsjáḡa janhan tí sín tsík'óna apóstol siín chjasin Jerusalén. Náhi. Janhván tuénxin sákjuia chjasin Arabia, a ntá chr'éxin ikjan tí chjasin Damasco.

18 Á ntá iní nánó chr'éxin na ntá sákjuiyá chjasin Jerusalén kixin tsochoxian ch'in Pedro la ntá ntiha mé kjuák'ekian ch'án quince yaon.

19 Kjánchó k'uikonaḡa tí í so sín apóstol. Jehó k'uikuḡan ch'in Jacobo kichó Ìnchéni.

20 Ó tjetsjehe Dios kixin tí nkehe ikjian la mé chaxín tíha.

21 A ntá chr'éxin ntá sákjuia nó estado Siria la ko Cilicia.

22 A ntá tí sín kichó ni tinkáchónki Cristo tjejó estado Judea la naḡa tjatsoanhyana sín.

23 A ntá ó kuínhón sín kixin tí nkexro k'uéchréḡe sín chrók'óyan sín la ntá ije mé tjako tí tan chrókjuinček'itjáyan ch'án.

24 A ntá ije tjanchia sín kjuasáya kixin janhan ó tinkachónkia Ìnchéni.

2

Tí iso sín kjueyá Jesús k'uáyéḡe sín ch'in Pablo

1 La ntá catorce nánó chr'éxin ntá sákjuiyá chjasin Jerusalén inaá la sákjuikian ch'in Bernabé la ko kjaxin ch'in Tito.

2 Sákjuiyá ntiha kixin Dios kjuínchenòna kixin sáchrókjuiyá. Ntiha chjasin Jerusalén la kójnkotsékoni tí sín t'etsoan nínko ntiha la ntá xrjankaxián nkexrí tí tan tsaáxinni tjákoḡa tí sín jehya judío. Mé xikaha kjuít'a kixin janhan tjínkavan jnkokoá chrókjuenkayáxinni kixin ntá tí xrá kjuít'a la jehya chrókóchónkó.

3 A ntá kjónté tí ch'in Tito kjuák'ekian ch'án la jehe ch'án mé griego ch'án la k'uetuḡanḡa sín kixin chrókua ch'án xroye.

4 Á ntá iso tí sín kichó ni chaxínḡa tinkáchónki Ìnchéni k'uéjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuente Cristo chóna kjuachaxin. A ntá jehe sín tjinkaon sín kixin chrókjuincheḡiteyéhéni inaá tí nkehe k'uék'etsoan tí ley.

5 A ntá tahyani kuente nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

6 A ntá tí sín kónoxín t'etsoan kjuakonaḡa sín ninkehó. A ntá jeheni la tahyani kuente á chojni t'etsoan o náhi kixin Dios la jnkokón t'ikon ch'án kaín chojni.

7 A ntá kjuátsoan sín kixin Dios ó chjina tí xrá tjákoḡa tí sín jehya judío tí tan jina éxi yóḡe tsíchjéhe Dios xrá ch'in Pedro tjakoḡe ch'án tí sín judío.

8 Tí Dios tsík'etuenhen ch'in Pedro ts'óna apóstol tsjákoḡe ch'án tí sín judío la ko kjaxin tsík'etuanḡa ch'án ts'óna apóstol tsjákoḡa tí sín jehya judío.

9 Méxra ch'in Jacobo la ko ch'in Pedro la ko ch'in Juan, mé tí sín t'etsoan kuente nínko, mé kjuátsoan sín kixin Dios tsíkjanjon tí kjuachaxin. Ntá kóchéḡe sín kixin jnkokón ch'eni xrá la itsé sín tjani la ko itsé sín itja ch'in Bernabé. Ntá kjuenkayáxinkoni sín kixin jeheni la tsjákoḡeheni tí sín jehya judío la jehe sín nachrohe tsjákoḡe sín tí sín judío.

10 Jehó k'uetsoan sín kixin tsoxraxinkaonni la ko tsotjuéhéni tí sín nòla la xráxin tóxakonhenni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquía

11 **A** ntá tió kjuíji ch'ín Pedro chjasin Antioquía la kjuentuáha ch'án kixin ntoáhya kjuích'e ch'án.

12 Senó k'uékjineko ch'án iso chojni kjónté jehya sín judío. Ntá ikui iso sín kuixin tí tjen ch'ín Jacobo. **A** ntá kjuankíxin k'uaxrjenta ch'án la kuítóhe kjónkohya ch'án tí sín jehya judío a. Xíkaha kjuích'e ch'án kixin chrakonhen tí sín kui kixin tí sín neko ch'án na_xa tsikahya sín xroye.

13 Tí iso sín kichó ni judío kjaxin kuitekakonhen sín tí ch'ín Pedro kjónté ntoáhya kjuenkayáxin ch'án. Kjaxin ch'ín Bernabé la kjuacha kjuachroe sín ch'án kixin tí nkehe ntoáhya kjuích'e sín.

14 **A** ntá tió k'uíkuan kixin tí nkehe kjuakoxin sín la tóyóghya tí chrónka tí tan jína tsaáxinni tjako sín la ntá níxjahá tí ch'ín Pedro nkayakon kaín tí sín tsikójkotsé. Ntáxrjan kixin: "Jaha mé ijnko chojni judío la kjónté itjen éxi jehya ijnko chojni judío. ¿**A** ntá kuénte tétuēnhén tí sín jehya judío kixin chrók'uejío sín éxi chrókóyóhe tí sín judío?"

Tí sín judío la ko tí sín jehya judío la jnkokón tsaá sín kixin chónka sín fe

15 Jeheni la k'uaxrjeníxinni chojni judío desde tí kokjéxinni la jeheni na chóntahyani jiē éxi tí í so chojni chónhya Dios.

16 Kjónté xíkaha la ó noheni kixin tsotjuáxinhya ijíe chojni tí nkehe tsík'etoan ch'ín Moisés. Jehó tí sín tinkáchónki Jesucristo mé tsotjóá ijíe sín. Méxra kjaxinni tinkáchónkini Jesucristo kixin tjínkaonni sinchetjóá ch'án ijíeni kixin titekaonni ch'án. Méxra ninkexró tsjachahya tsotjuáxin ijíe sín kixin chrókjuinchexiteyéhe sín tí nkehe t'etoan tí ley.

17 Tí tjínkaonni tinkáchónkini Cristo kixin tsotjuáxin ijíeni, a ntá jeheni kjaxin xraxinkaonni kixin ó kjuasinni jiē. **A** ntá í jehya Cristo k'uetoan kixin chrókjuasinni jiē. Kjá chaxín náhi.

18 Tí kuítóheni tí ley la ntá na_xa chrókjanni chrókuinkáchónkini tí ley inaá la tíha la ó jiē kuènteni tíha.

19 **A** ntá tí ley la kjuanchia jiē k'uénxian. **A** ntá ijie la tjéchuān kixin tinkáchónkia Dios.

20 Janhan la ó tsík'en kixin ó k'uénkian Cristo. **A** ntá ijie la janhya tjéchuān. Cristo mé tjéchónxin tí janhan. La ntá jie la tjéchonxian tí cuerpo chonta kixin tinkáchónkia tí Xjeen Dios kixin jehe ch'án la tjuāna ch'án la k'uenyákonhenni ch'án.

21 Tjínkaonhya tsjanoá tí kjuasáyé Dios. Tí chrókótjuáxin ijíe chojni tí ley tsík'etoan ch'ín Moisés, a ntá ó chónkó ik'uén Cristo tí xíkaha.

3

Tí ley o tí fe

1 Jahará kichó ni gálatas imá lontírá. ¿Nkexro kjuít'ayahará? Kixin tí nkehe kjuákoará mé kuinhírá kixin Cristo k'uénxín tí ntacruz k'uenyákonhenni ch'án.

2 Jnkokoá nkehe tjínkavan chrókjuateherá. ¿Á k'uayèxínrá Nchakuen Dios kixin kuitekáonrá tí nkehe tsík'etoan ch'ín Moisés ó á k'uayèxínrá Nchakuen Dios kixin kuitekáonrá tí tan chrónkani kuinhírá?

3 Imá lontírá jahará. Tí kjuankíxixínrá la kuitekáonrá kjuachaxiēn Nchakuen Dios. **A** ntá jie la tjínkáonrá jahórá sijnchekjintaxínrá tí xra.

4 ¿Á chónkó kaín tí nkehe tsík'atsínkará? Kjá chrókjuinkitsa chrókjuich'e xra tíha. Jehya chónkó tí nkehe kjuasótiaxínrá.

5 ¿Nkekuénté kjuanjon Dios tí Nchakuen ch'án la ko kjuasin ch'án kjuaxroan k'uikonrá? Jehya k'uayéxínrá tíha kíxin kuítekaónrá tí nkehe tsík'etqan tí ley. Náhí. K'uayéxínrá tí nkehe kíxin kuinkachónkirá tí tan kuinhínrá.

6 Ch'ín Abraham kuítekaon tí nkehe k'uetqan Dios ntá Dios k'uikon kíxin jína ch'án.

7 Méxra chrókónohará jahará kíxin tí sín chaxín tikíníxin sín ch'ín Abraham a mé tí sín a chaxín tinkáchónki Dios.

8 Tí xroon itén Dios mé chrónka kíxin tí sín jehya judío mé sinchetjóá Dios ijíe sín kíxin tsinkáchónki sín ch'án. Mé xíkaha Dios mé chénka ch'ín Abraham óse tí tan jína, ntáchro ch'án kíxin: “Ijnko nkexro ts'axrjeníxin tí jaha mé tsoyaonxín kaín nació.”*

9 Mé xíkaha kjaxin kaín sín tinkáchónki Dios mé tsoyaon sín jnkokón éxi kóyaon ch'ín Abraham kíxin kuítekaon ch'án.

10 Kaín sín jehó tinkáchónki tí nkehe tsík'etqan ch'ín Moisés la tsjasóte sín kíxin ntáchro xroon itén Dios kíxin: “Tsjasóte kaín tí sín tsjachahya sinchexiteyéhe tí nkehe tsík'etqan tí xroon chóna ley.”†

11 Ntá ó ntoá ntáchro kíxin kohya nkexro tsotjuáxin ijíe sín tí tsitekaon sín tí ley. Xroon itén Dios ntáchro kíxin: “Tí nkexro tsikótjóá la tjejóchónxin sín kíxin tinkáchónki sín Dios.”‡

12 Ntá tí chrókuinkáchónkini tí ley tsík'etqan ch'ín Moisés la chrókuinkáchónkihiani Cristo. Ntáchro xroon itén Dios kíxin: “Tí nkexro sinchexiteyá tí ley la táhó chrók'uejóchónxin sín.”§

13 A ntá Cristo kjuatsen ch'án kaín tí chrókjuasótexinni tí ley. Tí náhi la chrókjuasóteni kíxin chrókjuachahyani sinchexiteyéheni tí ley. Jehé ch'án kjuenka ch'án tí ijíeni kíxin k'uenyákonhenni ch'án. Ntáchro xroon itén Dios kíxin: “Kaín tí chojni chóna jie ts'ejótjian sín ijnko nta ntá its'en la mé xíkaha k'uáyéhe sín tí kjuanínkaon kuénte Dios.”* Mé xíkaha k'uikon sín tí ch'ín Jesús.

14 Mé xíkaha kónhen kíxin ntá tí nkehe chénka Dios tí ch'ín Abraham senó mé ts'áyéhe tí sín jehya judío kíxin kjuachaxién Cristo Jesús. Ntá xíkaha kaín ni ts'áyéheni tí Nchakuen Dios kíxin tinkáchónkini ch'án mé xíkaha tsintáchro ch'án.

Tí ley la ko tí nkehe kjuanjon Dios

15 Kichóni, tíhi mé sintayóaxian kuénte chojni ó. Tió ijnko chojni ch'éna ijnko xroon tsochóna firma kuénte sín la ntá xitjahya ts'óxíka í jnko nkexro la xitjahya í jnko nkexro sich'éna í so nkehe.

16 A ntá Dios mé tsíkjo ch'án tí ch'ín Abraham kíxin tsjanjon ch'án nkehe ts'áyéhe tí nkexro ts'axrjeníxin ch'án. Tí xroon itén Dios ntáchrohya kíxin kaín nkexro ts'axrjeníxin ch'ín Abraham chrók'uíyéhe tíha. Náhí. Ntáchro kíxin ts'áyéhe jnkokoá nkexro ts'axrjeníxin ch'án la mé Cristo tíha.†

17 Méxra xrxánka tíhi. Dios chénka tí ch'ín Abraham ijnko nkehe chaxín la tsoxiteyá tíha kíxin éxi yóhe ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uéchónka ch'ín Moisés. La ntá kjónté xíkaha la xitjahya tsoxíka tí nkehe tsíchónka Dios o tsontáchro chojni kíxin tjetoanhya tí nkehe tsintáchro ch'án.‡

* 3:8 Génesis 12.3 † 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 * 3:13 Deuteronomio 21.23 † 3:16 Génesis 12.7 ‡ 3:17 Éxodo 12.40

¹⁸ Tí chrókjuanjon Dios nkehe kixin chrókjuinchexiteyáni tí nkehe k'uetōan tí ley la ntá tí nkehe tsintácho Dios senó mé chróxiteyáhya. A ntá Dios mé tsíchénka ch'ín Abraham kixin sinchekitonhen ch'ín Abraham ti nkehe kjuasáyé ch'án.

¹⁹ ¿A ntá xikaha la nkehe tsonhen tí ley tsík'etōan ch'ín Moisés? Chr'éxin kjuanjon Dios tí ley kixin tsonoxinni nkehe tí jie tjasinni. K'uetōan Dios sinchexiteyéhe chojni tí nkehe tsík'etōan ch'ín Moisés tsijia tí nkexro ts'axrjeníxin ch'ín Abraham, mé tí nkexro kjueyá Dios kixin xikaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án.

²⁰ A ntá tí nixjehe Dios tí ch'ín Abraham la jehó ch'án la ko jehó Dios la méxra t'ichjánxinha í jnko nkexro.

Tí xra kuènte tí ley

²¹ ¿A ntá á chrók'uaxrjéxin kixin tí ley tsík'etōan ch'ín Moisés chrókjuanjonko tí nkehe tsjanjon Dios? Kjá náhí. Tí chrók'uixin ijnko ley chrókjuanjon kjuachón la ntá chrókótjuáxin ijieni tí chrókuitekaonni tí nkehe t'etōan tí ley.

²² A ntá tsintácho xroon itén Dios kixin tí jie mé t'etuenhen kaín xín chojni kixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchronka Dios.

²³ A ntá tí naxa kuihya Cristo la ntá tí ley la k'uetuenhen kaín ni la k'uejóchónhenni kixin chrókónoxín tí nkehe chrókuinkáchónkini.

²⁴ Tí ley la éxi ijnko maestro kuènte chánjan k'uetōan. A ntá jie ikui Cristo la jehe ch'án mé kótjuáxinni ch'án kixin titekaonni ch'án.

²⁵ A ntá ijie ó titekaonni Cristo la í nchexiteyéhyaní kaín tí nkehe t'etōan tí ley.

²⁶ A ntá jahará ó k'onará xjeen Dios kixin ó tinkáchónkirá Jesucristo.

²⁷ Kaínra kuíkitiáxínra kjuachaxién Cristo mé xikaha jehe ch'án kótjuáxínra ch'án.

²⁸ A ntá jehya tjetoan á chojni judío o á chojni jehya judío o á chojni ch'exón xra o á chojni t'etōan o á chojni ntoa o á chojni chjin. Kaínni la ó k'onani jnkokoá kixin tinkáchónkini Cristo.

²⁹ A ntá tí tinkáchónkini Cristo chaxín la ntá tí xikaha ó chaxín tsík'axrjeníxinni ch'ín Abraham la ts'áyéhení tí nkehe tsíchronka Dios.

4

¹ Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuitōeko tí nkehe kuènte tí it'é la jehe ch'án la tóyohó ijnko nkexro ch'exón xra kixin tí jehe la xitjahya t'etōan xra kjónté chaxín kuènte ch'án kaín tí nkehe a.

² Siín nkexro t'ayakonhen ch'án la t'etōan tí xra kuènte ch'án tsjixrakájia tí yaon tsintácho tí it'é.

³ Mé xikaha kónhen tí jeheni. Kixin tí naxa k'uechánjanni la kuítekaonni kaín tí nkehe kuènte chjasintajni.

⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxin ch'án ijnko chojni chjin. La kjuínchexiteyá ch'án kaín tí nkehe tsík'etōan tí ley kuènte Moisés.

⁵ Ikui ch'án xikaha kixin tsaáxinni ch'án kjónté senó k'uek'etuenhenni tí ley. A ntá jie la chrók'uáyéhe Dios tí jeheni éxi xjeen ch'án.

⁶ **A** ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochónta asenni la tí Nchakuen ch'án mé t'èyaxín: "It'èni jaha mé kuèntá tí jeheni."

⁷ Méxra xikaha jahará la jehya ijnko nkexro ch'exón xra. Náhí. Jahará mé xjeen Dios. Jahará mé xjeen ch'án la jehe ch'án tjinkaon sinchekitonhanrá tí nkehe kuènte ch'án kixin tinkachónkirá Cristo.

Ch'in Pablo tóxakonhen ch'án kixin tí sín tinkáchónki Ìnchéni

⁸ Ósé la jahará k'uéchonhyará Dios la kjuinchexiteyéhérá tí dios chaxínhya.

⁹ **A** ntá ijie la ó choxínrá Dios, o íchá jina chróntáchroni kixin Dios la ó chóxin ch'án tí jahará. **A** ntá jehya jina kixin naxa chrókuinkachónkirá inaá tí nkehe chóntahya kjuachaxin la ko tí nkehe chónkó kixin tí xikaha naxa chrókjuinchexiteyéhérá tí nkehe tinkáchónki chojni.

¹⁰ **A** ntá jahará la tjásinrá kia ichrén tí yaon la ko tí nitjó la ko tí yaon kia tí nánó.

¹¹ Imá tóxakonna kixin á chónkó tí xra kjuít'a kjuákohará.

¹² Kíchóni, xrjanóghará kixin chrókóyóghará éxí tí janhan kixin janhan mé tóyóhè éxí k'uejorá senó kixin t'etuénhyani tí ley. Janhan la tékahyará ninkehó jie.

¹³ Ó nohará kixin tió saoxín kjuákohará tí tan tsaáxinni la k'uétsankahyana kixin k'uénina k'uéchonta ijnko chin k'uékjínchekjoténa.

¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. **A** ntá jahará la jina kjuánjonrá kjuachaxin kjuak'é ntiha. Éxí chrók'uayéhérá ijnko ángel kuènte Dios o éxí chrók'uayéhérá jehe Ìnchéni Jesucristo mé xikaha kjuak'é jina ntiha.

¹⁵ ¿Nkehe kónhen tí kjuachéhé k'uéchontará? Kixin ntáxrjan kixin jina tí jahará kixin tjinkáonrá kjónté ikonrá chrókuakítsjerá chróchjinará tí janhan.

¹⁶ **A** ntá ijie la, ¿á ninkákõnnará jehó kixin kuinhínrá tí nkehe ntoá xrjanca?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuítoghérá tí jeheni kixin ntá tjinkaon sín kixin jahará chróchréhérá tí jehe sín.

¹⁸ Jina chrókótjinkáonrá tí í so sín kjánchó ntoá chrókjuenkayáxinrá kixin jehya tí chrókjuak'é tí tjejorá ó chrókuítekáonrá jina.

¹⁹ T'íkõnni tí jahará éxí xjeenni. Ijie la imá kjuíncheníhi asenná kixin tóxakonna tí jahará. Éxí yóhè ijnko iné xjan tsjoté tjan tió sinchekokjílhi tjan xjeen tjan mé xikaha janhan la naxa tsjasótèna kixin tjínkavan kixin Cristo chrókjuinchetjótá tí jahará.

²⁰ Chrókójina ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóèxín ch'in Pablo tí tjan Agar la ko tí tjan Sara

²¹ **A** ntá jie chonkará nkehe. Jahará naxa tjinkáonrá chrókjuinchexiteyéhérá tí ley tsik'etqan ch'in Moisés la ¿á kuiénhyará nkehe chro tí ley?

²² Ntáchro kixin ch'in Abraham mé chónka ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuenhya.*

* 4:22 Génesis 16.15; 21.2

²³ Tí xjeen tjan ch'exón xṙa kokjíhi ch'án éxí tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kixin tsoxiteyá tí nkehe tsintáχρο Dios.

²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsik'etóan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxí chojni ch'exón xṙa tí jehe sín kixin t'ítuenhen sín.

²⁵ Mé xíkaha tí tjan Agar mé tóyóexín tí jna Sinaí nacióon Arabia la tíha tóyóexín tí chjasin Jerusalén kixin tí chjasin la ko tí sín tjejó ntíha la mé t'ítuenhen sín la ko kaín xjeen sín.

²⁶ A ntá tí chjasin Jerusalén itjen nkaya nkajíní la mé t'ítuenhya. Náhi. Mé jeheni la kuènteni tíha.

²⁷ Ntáχρο xroon itén Dios kixin:

Jaha chojni chjin chontahya chánjan kjónté chrokócháha.

Jaha k'uíkonhya ninkehó kjuatjoté kixin kjuinchekokjéhya xjan la kjónté chrokócháha.

Tí tjan kuítínkehe na mé nchónhya ñnté tjan ts'ikon tjan,

a ntá tí tjan kjuák'eko xii tjan la kánhyó ts'ikon.†

²⁸ Kichóni jeheni la éxí yóhèni ch'ín Isaac kixin kaín ni la xjeen Dios kixin xíkaha tsintáχρο ch'án.

²⁹ A ntá éxí senó tí xjan kokjíhi éxí tokjíhi chojni ó la jehe ch'án k'uéchónkíhi ch'án tí xjan kokjéxín kjuachaxién Nchakuen Dios. Mé xíkaha kjaxin sítonhen jie.

³⁰ A ntá ntáχρο tí xroon itén Dios kixin: “Tétuènhén tí tjan ch'exón xṙa sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsitónhen tí xjeen tí tjan t'ítuenhya.”‡

³¹ Méxṙa kichó ni, kaín ni la jehya xjeen ijnko tjan ch'exón xṙa. Náhi. Jeheni mé xjeen tí tjan t'ítuenhya.

5

Jína chrók'uejorá kixin kuaáxinrá

¹ Cristo mé kuaáxinni la ntá ó tí ley la t'etuehyani. Méxṙa jína chrók'uayakonhénra tí nkehe kuaáxinrá la í chrókjanhyará chrók'ónará chojni t'ítuenhen inaá.

² Tinhínra, janhan Pablo mé ntáxrjan kixin tí chrókuará tí xroye a ntá ó chónkó chrókuinkachónkirá Cristo.

³ Tjinkávan tsoxrjanka inaá kixin tí jnkójín nkexro itsa tí xroye la jehe ch'án mé t'ichjánxin sinchexiteyèhe ch'án kaín tí ley tsikjin ch'ín Moisés.

⁴ A nta jahará la xritjéyará tsotjuáxin ijjárá kixin sinchexiteyéhérá tí ley la ntá ó kuítóhérá Cristo la ko ó kuítóhérá tí kjuasáyé Dios tjuahará.

⁵ A ntá jeheni la tinkáchónkini Cristo la chóntani Nchakuen Dios la ntá tjejóchónhenni kixin tsjintaxín tsotjóá ijjéni.

⁶ Jeheni mé tinkáchónkini Jesucristo la ntá kánhyó tje-toan tí xroye. Antsí tje-toan chrókuinkáchónkini Ìnchéni la ntá tí tinkáchónkini Ìnchéni la chrótjuèhèni kichó ni.

⁷ Jahará la jína kjuankáxinrá tinkachónkirá Ìnchéni. ¿A ntá nkexro k'uetóan kixin chrókuítóhérá tí nkehe chaxín?

⁸ Jehya nkehe kuènte Dios tí tjejoch'erá méhe. Méxṙa jehe ch'án la kjueyará ch'án.

⁹ Ntáchro sín kixin tí ch'o t'óna niotja tsjiko intsíkoá tí xroan nchek'ánki niotja, a ntá ts'ánki kaín tí ch'o.

¹⁰ A ntá janhan tinkachónkia Ìnchéni la ko ó òna kixin jahará kjaxin tinkachónkirá ch'án la kjá í chrókjuenkayáxinhyará í jnko nkehe. A ntá Dios mé sínchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

¹¹ Kichóni, tí naḡa chrókuétoan chrókua chojni xroye la ntá tí sín judío chrókónínkakkonahya sín. Tí xikaha la chrók'uantaxiēnhya sín tí tan jina chrónka nkexri k'uenxín Cristo tí ntacruz.

¹² Méxra tí sín ntaxakonhanrá la t'etōan sín itsará xroye la íchá jina naá chrók'uaúsínkó chrókóchrít'o sín kaín.

¹³ Jahará kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhi. Chrókjuinkitsani kichó ni la ko chrótjuēheni kichó ni.

¹⁴ Mé xikaha tí ley mé t'axrjexín kixin: “Chrótjuēhérá kichuára éxi tjuēxinrá asánrá.”*

¹⁵ A ntá tí chrókjóntehérá kichuára la ko chrókjónterá kichuára la ntá chrókóxakonhanrá kixin tí xikaha la chrókjuinçek'itjáyanrá kichuára.

Tí jie chrókjuasin chojni la ko tí nkehe t'etōan Nchakuen Dios

¹⁶ A ntá ntáxrjan kixin chrók'uejorá éxi tjinkaon Nchakuen Dios, a ntá chrókjuéyáhyará tí nkehe jínahya chrókjuenkayáxinrá.

¹⁷ A ntá tí nkehe jínahya tjenkayáxinrá la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kichó. Méxra jahará la xitjahya ch'erá tí nkehe tjinkáonrá chrókjujch'erá.

¹⁸ A ntá tí Nchakuen Dios tjetjinkitsará, a ntá jehya tí ley t'etuanhanrá jie.

¹⁹ Xrahya ts'ikonna tí jie tjasin chojni jínahya tjenkayáxin. Mé tíha la tí sín tjasinko jie chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin,

²⁰ la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni nínkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjinkaon jehó tsochóna itsjé nkehe, la ko tí chojni tjinkaon ts'axrjenta, la ko tí chojni t'óxika kichó,

²¹ la ko tí chojni chjinoxínhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóḡe xikaha. Na mé éxi yóḡe senó mé k'uétjonkará la ko ijie la xikaha tjetjonkará inaá kixin tí nkexro xikaha tinkákjasin jie mé xitjahya ts'áyéḡe sín tí kjuachaxin kuēnté Dios.

²² A ntá tíó chótani Nchakuen Dios ntá tsojtjuēheni kichó ni, la ko tsochéheni, la ko kjuaxróxin ts'ejóni, la ko tsochónhenni tsonínkakkonhyani, la ko jnkójina ts'ejókoni kichó ni, la ko nchexitéyáni jnkójina.

²³ La ko tsohnkehyaní, la ko tsetuēnhenni asénni kixin tsjasinhyani jie. Kohya nijnko ley chrókjuinçekjasóteni kixin tí jina chrók'uejóni xikaha.

²⁴ Mé tí chojni tinkáchónki Jesucristo la kaín jie k'uéchóna sín la ko tí jínahya k'uékjenkayáxin sín la ó kjuenka Ìnchéni kjuák'enkání ch'án ntacruz.

²⁵ A ntá tí tjejókoni Nchakuen Dios t'ichjánxin tsítóheni kixin Nchakuen Dios ts'etuenhenni.

* 5:14 Levítico 19.18

²⁶ Méxra chrókjuinchehnkehanyi la ko chrókjuachaxinhyani kíchó ni la ko chrókóchjinoxíenhyani.

6

Tjínkĩtsará kichuárá

¹ Kíchóni, a ntá tí chrók'uikonrá jnkojín nkexo kjuasin ichrén jie a ntá tí jahará tí chaxín chontará Nchakuen Dios la chrókjuéntuéhérá sín la chrókjuínkĩtsará sín. A ntá jnkojína chrónixjehérá sín, a ntá jahará la chrókóxakonhanrá kixin xikahya chrókónhanrá chrókjuásinrá jie kjaxin.

² Tsjínkĩtsará kichuárá kixin jóhya tsamárá tí nkehe ye. Kixin tí xikaha la ó chrókjuinchexiteyáni tí nkehe t'etqan Cristo.

³ Ntá jnkojín nkexo ntáchro kixin imá tjetoan tí jehe ch'án la chaxínhya tíha la jehó ch'iyehé asén.

⁴ Jnkojnko chojni chrórxaxinkaon á nchoxon tjenkayáxin la chrókónohe kixin ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni.

⁵ Kixin jnkojnko chojni yámá tí jie kuènte.

⁶ Tí nkexo xrakohe tí tan jína la chrókjuinkĩtsa sín chrókjuanjon sín nkehe chrók'uáyéhe tí nkexo tjako.

⁷ Sich'iyéhyará asánrá. Kohya ninkexró tsjacha tsjanoá Dios. Tí nkehe ts'enká chojni la mé xikahó tsojtá.

⁸ Tí t'enká chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexo ts'enká tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochrínxín ts'áyéhe sín.

⁹ Mé xikaha chrókóxrjéhyani chrókjuich'eni kaín nkehe jína kixin tí tsoxrjéhyani la ntá chaxín tsjixraká tí yaon tsjachani ts'áyéheni tí nkehe jína.

¹⁰ Méxra xikaha xráxín chrókjuich'eni nkehe jína la antsí t'ichjánxin chrókjuinkĩtsani tí sín kíchó ni tinkáchónki Ìnchéni.

Ch'in Pablo nchexraxinkaon tí sín ntiha la ko kjuixixín nixja ch'án

¹¹ Tsjehérá kixin imá ihyé tí letra tjékjinxian tjaná.

¹² Tí sín tjinkaon ts'etuānhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuènte Cristo.

¹³ Kjónté tí sín tsíka xroye la nchexiteyáhya sín kaín tí nkehe t'etqan tí ley. A ntá tjinkaon sín kixin chrókuará xroye kixin ntá kjaxin sín tsohnke sín kixin tsoñachro sín kixin jahará kjaxinrá tjinkáonrá tsochontará xroye tí cuerpo kuèntará.

¹⁴ A ntá janhan mé tóxrjínahya sintahnke ninkehó. Íchá jína chróntáxrjan kixin Cristo k'uenyákonhenni. A ntá xikaha k'uenxín Cristo tí ntacruz la ntá tí nkehe k'uék'etqan kuènte chjasintajni la kjaxin k'uitjáyán la ko janhan kjaxin kujtohá tí nkehe kuènte chjasintajni.

¹⁵ La ntá ninkehó sínkíhya á tsíka chojni xroye o náhi. Tí nkehe sínkí la chrók'ónani ijnko chojni nixín.

¹⁶ A ntá tí sín ts'áyéhe kjuaxróxin kixin kujkonóehe Dios tí jehe sín la mé kaín tí sín kuítekaon tí nkehe t'etqan ch'án mé kaín tí sín chaxín tsík'óna xjeen ch'án.

¹⁷ A ntá ijie la tǵnkakonhya kǵxin chrók'uekana jie ninkexró. Janhan mé chaxín chonta tí tsǵkatsǵenxín tsǵchrít'ǵ cuerpo kuéntana kǵxin kjuasótexinna kǵxin kjuít'aha xrǵ Inchéni Jesús.

¹⁸ Kǵchóni tjáncháha Inchéni Jesucristo kǵxin kjuasáyé ch'án chrókjuincheyaon ch'án kaín rá. Mé xǵkaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí nínko chjasin Éfeso

¹ Janhan Pablo tsíkjeýána Jesucristo kixin xíkaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejórá chjasin Éfeso tinkachónkirá Dios la ko títékáonrá Cristo Jesús.

² Tjétjáncháha It'eni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xíkaha jehe ch'án mé kjuíncheyaonni ch'án kixin kaín nkehe jína tixín nkaya nkajní kjuanjón ch'án.

⁴ Dios mé kjueyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jié kjuatsenhenni ch'án.

⁵ Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xíkaha tsíkjenkayáxin ch'án kixin xíkaha kóxrjínhjin ch'án.

⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án.

⁷ Imá tjuèhe Dios tí jeheni la xíkaha kuaáxinni ijñié tí Xjeen ch'án k'uitji la xíkaha tsjixín kaín ijjéni.

⁸ Dios kjuakoxin ch'án kixin imá tjuèheni ch'án. Kjuanjón ch'án kaín kjuachaxin kixin chrókuienxinni jína la ko kjuanjón ch'án kjuaxrexinkaon jína.

⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjínhjin ch'án tsoxiteyá.

¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjón kjuachaxin kixin Jesucristo ts'etuñhen ch'án kaín xín nkehe siín nkaya nkajní la ko chjasintajni.

¹¹ Dios kjueyáni kixin chrókuinkáchónkini Cristo la ntá xíkaha chrók'uáyéheni tí nkehe tsík'áyéhe ch'án. Kaín tíha la mé xíkaha tsoñhen éxí tóxrjínhjin Dios.

¹² Mé xíkaha kjuích'e ch'án kixin ntá jeheni kuítekaonni Cristo saoxín chrók'uejóni chrókjuancheheni kjuasáya Dios kixin tí kjuachaxin jié chóna ch'án.

¹³ A ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xíkaha ó xiteyá tí nkehe tsintáchro ch'án.

¹⁴ Tí Nchakuen Dios kuítõhenni mé kjuínchenoexinni Dios kixin tsakjani kaín nkehe tsjanjón ch'án tió tsaáxin kaín ni tinkáchónkini ch'án. Ntá xíkaha kaín ni tsjancheheni kjuasáyé ch'án kixin tí kjuachaxin jié chóna ch'án.

Ch'in Pablo kjuanchehe Dios kixin qantsí chrókónohe tí sín tinkáchónki Ìnchéni

¹⁵ Méxra ó kuñhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios.

¹⁶ Ntá janhan nunca t̄tuahya nixjahā Dios tjánchāhā kjuasáya kixin ó tinkachónkirá ch'án.

¹⁷ Tjénixjahā Dios, mé jehe ch'án mé ichr'án Ìnchéni Jesucristo, mé It'éni imá tjeotan la tjetjánhāhā ch'án kixin tsojtáhará ch'án kjuaxrexinkaon jina kuènte Nchakuen ch'án kixin ntá antsí chrókuiénxinrá jina tí nkehe kuènte ch'án kixin ntá antsí má chróchoxínrá ch'án.

¹⁸ Kjaxin tjetjánhāhā Dios kixin tsjink̄tsa ch'án tsjanjon ch'án ijnko kjuaxrexinkaon jina kixin ntá tsonohará ts'ejochonhénrá kixin x̄ikaha kjuexyará ch'án. La ko tsonohará kixin imá tjeotan tí nkehe sinchek̄tonhenni ch'án kixin jeheni mé tinkáchónkini ch'án.

¹⁹ La ko kjaxin tjetjánhāhā Dios tsjink̄tsará ch'án tsonohará kixin tí kjuachaxin kuènte ch'án mé ijnko nkehe imá jié noehyani nketi kjuèxín. Tí kjuachaxièn ch'án mé nchexraxinkaon tí sín tinkáchónki ch'án. Jnkokón tí kjuachaxin chótani la ko tí kjuachaxin imá jié kjuakox̄in ch'án

²⁰ tió kjuínchexechón ch'án Cristo. Ntá Cristo sákjuí kjuák'etjax̄in ch'án tja chjina tí It'é ch'án itjen nkaya nkajni.

²¹ Mé x̄ikaha kjuanjon Dios kjuachaxin kixin Cristo ts'etuēnhen ch'án kaín xín gobierno la ko kaín tí sín t'etōan. Ijie tjet'etuēnhen ch'án kaín xín nkehe siín chjasintajni la ko chr'èxin ts'etōan ch'án kjaxin.

²² Cristo k'uáyéhe ch'án kjuachaxin ts'etuēnhen kaín xín nkehe siín. Jehe ch'án mé ts'etuēnhen kaín tí sín k'óna ninkoé ch'án.

²³ Tí ninko mé éxi tí cuerpo kuènte ch'án la jehó ch'án mé t'etuēnhen ch'án. Jehó ch'án mé kuènte ch'án kaín xín nkehe siín.

2

Kuaáxinni kjuachaxièn Dios

¹ La ntá ijie Dios mé kjuínchek̄tonhanrá tí kjuachón jnkochr̄ixín kixin tinkachónkirá Cristo. Senó la jahará la éxi tsík'enrá kixin tí jínahya k'uék̄jich'erá la ko tí jie k'uék̄jasinrá.

² Mé x̄ikaha k'uéchrehérá éxi sítónhen chjasintajni. K'uék̄jinchexiteyéhérá éxi tóxrjín̄hin tí nchakuen jínahya t'etuēnhen tí xr̄into la ko t'etuēnhen kaín xín tí chojni titekakuenhya Dios.

³ Kaínni x̄ikaha k'uék'ejóni tí ósé a nax̄a kjuínchexiteyéhēni tí nkehe ntáchro asēnni la ko kjuínchexiteyáni tí kjuaxrexinkaon jínahya k'uéchóntani. A ntá tí nax̄a x̄ikahó chrók̄juich'eni la Dios imá chrók̄juinchek̄jasóteni éxi tsjasóte tí í so sín.

⁴ A ntá Dios mé imá kuikonóhēni ch'án la ko imá tjuèhēni ch'án.

⁵ La ntá kjuanjon ch'án tí kjuachón éxi chóna Cristo. Jeheni la éxi chojni tsík'en k'uék'ejóni x̄ikaha kixin tí jie k'uék̄jasinni. A ntá jie kjuasáyé Dios tsaáxinrá ch'án.

⁶ Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajni.

⁷ Mé x̄ikaha kjuích'e ch'án kjuakox̄in ch'án la nax̄a tjetjakox̄in ch'án kixin tjuèhēni ch'án la ko kjuínk̄tsani ch'án kixin tinkáchónkini Cristo Jesús.

⁸ Kjuasáyé Dios kixin kuaáxinrá ch'án kixin tinkachónkirá ch'án kixin táha la jehya jahóra k'uitjará tíha. Náhí. Táha la mé kjuasáyé Dios kixin tjáhará ch'án.

⁹ Kixin jehya ichrén nkehe jina kjuích'eni kixin chrók̄juinchehnkex̄inni.

10 Dios mé kjuích'éna tí jeheni ntá chr'éxin kjuínkĩtsa ch'án kixin tsinkáchónkini Cristo Jesús, kixin ntá chrókjuich'eni tí xrá jina kixin xikaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

11 Méxra jahará la jehya chojni judíora. Mé tí sín judío ntak'inrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuènte sín, mé nchek'in sín asén sín tí chojni chónta xroye.

12 Xráxinkáonrá kixin tí senó la k'úechonhyará Cristo. Jahará la jehya kuènte tí nación Israel la xikaha k'úechonhyará tí nkehe tsík'etqan Dios la ko tí nkehe tsintáchro ch'án tsjanjon ch'án. Mé xikaha k'úék'ejorá la k'úechonhyará Dios la k'úechoénhyará kixin chrókuaará.

13 La ntá ijie la ó tinkachónkirá Cristo Jesús. Jahará tí ósé imá ikjín k'úék'ejorá. La ntá jie la ó kóchjineherá ch'án kixin k'uenyákonhánrá ch'án, k'úitji ijnié ch'án.

14 Jehé Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokóá chrókjuenkayáxin sín kixin k'óna éxi jnkokóá chjasin. Cristo k'óxika ch'án tí kjuanínkaon éxi ijnko tjat'ó k'uínkákohen.

15 Jehé ch'án kjuasóte ch'án, la kjuatsen ch'án tí ley. Tí iyó chjasin k'uejó kjuích'éna ch'án jnkokóá chjasin nixin kixin tinkáchónki sín ch'án. Mé xikaha kjuanjon ch'án kjuaxróxin.

16 Mé xikaha k'uenyákonhenni ch'án k'uenxín ch'án tí ntacruz la kjuakjiin ch'án tí kjuanínkaon k'úék'ixin tí iyó chjasin k'úékjanjon sín kixin ntá kjuaxróxin ts'ejóko sín Dios la kaín sín jnkokóá k'óna éxi jnkokóá cuerpo kuènte ch'án.

17 Cristo mé ikui la kjuakohe ch'án kaín chojni tí tan jina kixin kjuaxróxin ts'ejóni kaín ni, mé tí jahará kjónté k'úék'ejorá ikjín tí tjen Dios la ko kjaxin tí sín chjinaxón k'uejó.

18 A ntá kjuachaxin kuènte Cristo la kaín ni kjónté jeheni o í so chojni mé tsoghjineheni It'eni Dios kixin jnkokóá k'uáyéheni Nchakuen ch'án.

19 A ntá jahará la í tóyoghayará chojni tsíkjiixin ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án.

20 Jahará la mé tsík'ónará ijnko nchia tjat'ó jíé k'óna chrítaón tí xro k'uejo tí sín kjueya Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xro imá t'etqan kuènte tí tjat'ó a.

21 Tí xrankixixín mé Cristo la chrítaón k'óna kuenté nchia la tinkák'ánki tí nchia kixin jina tsjak'e, ntá tsixraká kixin ts'óna ijnko njnko tjóá kuènte Inchéni.

22 Mé xikaha jahará tinkachónkirá Cristo la tsojnkotsérá kaín rá ts'óna éxi ijnko nchia kuènte Dios la ntaha tsjak'exenhen tí Nchakuen ch'án.

3

Ch'in Pablo k'uáyéhe ch'án tí xrá tsjakohe ch'án tí sín jehya judío tí tan jina

1 Mé xikaha janhan Pablo mé tjechjinxixín tí tjákua itén Cristo Jesús kixin jina ts'ejorá kjónté jehya chojni judío tí jahará.

2 Chrókónohará kixin kjuasáyé Dios kjuanjon ch'án tí xrá k'uayáha kixin tsjakoará.

³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xíkaha ikjian ijnko xroon kánhyó tsjé nixja k'uayéherá.

⁴ Tíó sijnchekuáxinrá tíha ntá tsoñoohará kíxin ó nóna tí nkehe kuènte Cristo ninkexró k'uénoehya.

⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xra la ko tí sín chrónka itén ch'án.

⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kíxin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxi ts'áyéhe tí sín judío. La ntá jnkokóá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

⁷ Janhan k'uékítekakonhya, a ntá jie kjuasáyé Dios kjuanjon ch'án tí xra i sít'a kíxin tsjákua tí itén ch'án kíxin tí kjuachaxin kuènte ch'án.

⁸ Janhan mé kánhyó tjetooan kíxin janhan la imá intsína la kaín tí í so sín tsíkjinchetjóá Dios la antsí tjetooan sín. Kjonté la Dios mé kjuínchekitonna tí xra imá tjetooan kíxin tsotjanka tí sín jehya sín judío tí tan jína nkexrí imá tjetooan tí nkehe kuènte Cristo.

⁹ La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kíxin nijnko nkexro k'uénoehya tíha. Mé jehe ch'án mé kjuích'éna ch'án kaín xín nkehe.

¹⁰ Mé xíkaha kónhen kíxin ntá tí sín kuènte njnko tsjakuexin sín kaín xín tí sín t'etooan nkaya nkajní kíxin tsoñohe sín kíxin xíkaha kaín nkehe jína tsíkjenkayáxin Dios.

¹¹ Kaín tíha kjuích'e Dios éxi tsíkjenkayáxin ch'án ntá Ìnchéni Jesucristo la ó kjuínchexiteyá tíha.

¹² Kjuasáyé Cristo ntá ó chóntani kjuachaxin tsoghjineheni Dios kíxin tinkáchónkini ch'án.

¹³ Méxra xrajanóghará kíxin chrókuítóéhyará chrókuinkachónkirá ch'án kjonté tjetjasótena kíxin kaín tíha kónhen kíxin jahará chrók'uejoxinrá jína.

Cristo imá tjuèheni

¹⁴ Méxra xíkaha tjak'éxian tóch'ian nkayakon It'é Ìnchéni Jesucristo.

¹⁵ Mé tsík'áyéhe ihnjé Dios kaín xín chojni tinkáchónki ch'án mé tí sín siín nkaya nkajní la ko tí sín siín chjasintajni.

¹⁶ Tjánháha It'éni kíxin tsjanjon kjuachaxin kuènte ch'án ts'ayéherá kjuachaxièn Nchakuen ch'án

¹⁷ Kíxin Cristo chróhónta asánrá kíxin tinkachónkirá ch'án la ntá ntoá chrók'uejorá éxi ijnko nta tsíkji nuèe njnka la chrótjuèherá kíchuará.

¹⁸ Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kjinxin la ko njnkaxín la ko ntetoxín kíxin nkexrí tjuèheni Cristo.

¹⁹ Tjánháha Dios kíxin antsí chrókónoohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxínni kaín tíha. A ntá tí jehe ch'án chrókjuinkitsani ch'án la antsí chrókuiénxinni tí kjuachaxin kuènte ch'án.

²⁰ Ijie la chjéheni kjuasáya Dios kíxin jehe ch'án chóna kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkítsa tí jeheni.

²¹ Kjuasáyé Dios itjen jnkochríxín kíxin Cristo Jesús kjuínchekaá ch'án tí njnko, mé xíkaha ó xiteyá jnkochríxín. Amén.

4

Jína chrók'uejókoni kíchó ni ḱxin chóntani Nchąkuen Dios

¹ Janhan mé t'jéchjinaxián tí xrą kuènte Ìnchéni. Méxrą xrjanóahará ḱxin jína chrók'uejorá ḱxin xíkaha Dios tsíkjeýá tí jahará.

² Méxrą chrókjuinchehnkehyará la ko chrókójahyará la ko chrókójínarą chrókónikákonhyará la ko chrótjuèhérá kichuárá.

³ Méxrą jína chrók'uejokoará kichuárá ḱxin chrókjuinkįtsa Nchąkuen Dios kjuaxróxin chrók'uejorá la ko jnkokoá chrókjuenkayáxinrá.

⁴ Itjen jnkokoá cuerpo la ko itjen jnkokoá Nchąkuen Dios la ko Dios k'uíyehę kaín ni ḱxin jnkokoá nkehe ts'ejóchónhenni.

⁵ Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni.

⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

⁷ Jnkojnkonni k'uáyeheni kjuachaxin sich'ezeni Dios xrą ḱxin xíkaha kjuanjon Cristo.

⁸ Méxrą xíkaha nįxa xroon itén Dios ḱxin:

“Jehe ch'án sákjuí ch'án nkaya nkajní la ko sákjuiko ch'án tí sín t'jéjóchjina, la ntá kjuíncheķitónhen ch'án chojni jnkojnko kjuachaxin kuènte ch'án.”*

⁹ ¿Ntá nkexrí t'axrxjín ḱxin sákjuí ch'án? Tíhi mé t'axrxjín ḱxin jehe ch'án mé senó k'uínkajnxin ch'án nkaya nkajní la kjuák'e ch'án chjasintajni.

¹⁰ Jehe ch'án mé k'uínkajnxin ntiha mé ntá jie sákįkį ch'án tí nkajní imá noi. La ntá tjet'etuenhen ch'án kaín xín nkehe.

¹¹ Jehe ch'án mé kjuíncheķitónhen ch'án ijnko kjuachaxin jnkojnko chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án.

¹² Mé xíkaha tí xrą k'uáyehę tí sín kjueyá ch'án ḱxin sich'ehe sín ch'án xrą ḱxin ntá ts'ánkí tí sín k'óna tí cuerpo kuènte Cristo.

¹³ Ntá xíkaha kaín ni jnkokoá tsinkáchónkini tí Xjeen Dios la ko tsochóxinni ch'án jína ḱxin ntá xíkaha ts'ónani chojni ntoá nchexiteýá la ko chrókónoheni éxí nkexrí tjinkaon Cristo.

¹⁴ Méxrą chrók'ónahyani éxí xjan ntsínsí. Tí xjanntsí la xrahya tsjinkí kjuaxrexinkaon éxí ijnko nkehe sákjuiko xrįnto xíkaha ḱxin sich'iyehę sín chojni ijnko nkehe nįxin la xrahya titekaon sín. Tí chojni ch'ia tjinkaon sín tsjachroeni sín í jnko ntą ntoáhya ḱxin chrok'uitjáyenhenni Cristo ntá chrókjuasinni jie.

¹⁵ A ntá íchá jína chrónixjani tí nkehe chaxín ntoá la kaín asénni chrótjuèhenni kíchó ni ntá xíkaha chrókónoheni ḱxin xíkaha tjinkaon Cristo. Jehe ch'án mé tí kja t'etuenhen tí cuerpo kuènte ch'án.

¹⁶ A ntá kjuachaxién Cristo kuenté tí cuerpo, tí ch'e xrą jnkokón la tjinkįtsa kuenté. Ntá jnkojnkonni jína ch'eni xrą la mé xíkaha ts'ánkí tí xrą kuènte ch'án la mé jína chrótjuèhenni kíchó ni.

Tí kjuachaxin nįxin kuènte Cristo

* 4:8 Salmo 68.18

17 Tíhi mé ntáxrjan la ko tétuānhanrá kjuachaxiēn ihnié Ìnchéni. Ijie la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha.

18 Tí nkehe tjenkayáxin sín la sitié la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios.

19 Ó tsíkjinchek'itjáyan sín tí kjuaxrexinkaon kuēnte sín la í tósuèhya sín chrókjuasin sín jie. Imá tóxrjínhin sín chrókjuich'e sín kaín nkehe jínhya.

20 A ntá jahará xikahya xrakohará tí nkehe kjuako Cristo,

21 tí chaxín kuinhínrá kuēnte ch'án la ko tsíxrakohará tí nkehe chaxín ntoá kuēnte ch'án.

22 Méxrā títōhérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínhya naxā t'ayahará.

23 Jahará t'ichjánxin kixin chrókónxin tí kjuaxrexinkaon kuēntará la ko tí nchakuanrá.

24 Méxrā chrókuákjárá tí kjuaxrexinkaon nixin kjuich'éna Dios xikaha tjinkaon ch'án la ntá chrókjuákoxinrá ijnko ntia jina ntoá.

25 Méxrā chrókuítōhérá tí kjuach'ia. Méxrā jnkojnkorá chrónixjehérá kichuára ntoá kixin kaín ni tsík'ónani jnkokoá cuerpo.

26 Tí chrókóninkáonrá la chrókjuásinhyará jie la chrókóninkáonhyará kuēnté yaon.

27 Chrókuítōéhyará kixin Tsochren chrókjuít'ayahará.

28 Tí jnkojínrá kuērá la títōhérá kjuachee. Íchá jina kixin itjárá chrókjuich'exínrá xrā kixin tsochontará chichaon sijnchekítōnhénrá jnkojín nkexro t'ichjánxinhin.

29 Nixjahyará tí nkehe náxrjónhya. Nixjará ijnko tan jina kixin tsjinkitsará ts'ánki kjuaxrexinkaon kuēnte kichuára la xikaha tsjinkitsará tí sín tjejótinhin.

30 Nchek'aváhyará tí Nchakuen Dios kixin tíha mé k'uayéxinrá éxí ijnko xroye kixin tsoñoaxínrá kixin jahará mé tinkachónkirá Dios la ko tsochónhénrá tí yaon itsi ch'án ntá tsjintaxín tsaára.

31 Títōhérá tí kjuanínkaon chontará la ko títōhérá tí nkehe ntoáhya tjenkayáxinrá la ko títōhérá tí kjuanqton la ko kaín nkehe jínhya.

32 A ntá chrókójínará chrókjuikonóghérá kichuára. Sijnchek'itjáyehénrá ijje kichuára kixin Dios kjuatsen tí jie chontará kixin tinkachónkirá Cristo.

5

Jina chrók'uejō tí sín k'óna xjeen Dios

1 Jahará ó k'óna xjeen Dios la tjuahará ch'án. Méxrā chrókóxakonhanrá chrókjuákoxinrá éxí kjuákoxin tí jehe ch'án.

2 Chrótjuéhérá kichuára éxí Cristo tjuèhe tí jeheni kixin jehe ch'án la k'uenyákonhenni ch'án, éxí yóhe ijnko kolélo xikaha kjokehē sín Dios la kóchéhe Dios k'uáyéhe ch'án tí xraxé náxrjón.

3 Ntá jahará mé tsík'ónará chojni kuēnte Dios la ntá chrónixjahyará kuēnte í jnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará.

4 Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuēnte Cristo tíha. Íchá jina antsí má chrókjuancheherá Dios kjuasáya.

⁵ Ó nohará kixin tí nkexro tjasinko jię í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchóna sín la mé tíha ó yóhę tí nkexro tinkáchónki nkehe tsikjanoya xikaha. Mé tí nkexro xikaha ch'e mé tsjachahya ts'ixenhen tí tjet'etqan Cristo la ko Dios.

⁶ Méxra tjanjonhyará kjuachaxin sit'ayahará ninkexró chrónka tí nkehe chónkó. Méxra xikaha ntá itsi tí kjuanínkaon kuente Dios la tsjasóte tí sín titekakuenhya sín tí jehe ch'án.

⁷ Méxra chrók'uítohyará tí sín xikaha ch'e.

⁸ Senó la k'uék'ájirá ntja sítie. A ntá ijie ó k'ónará chojni kuente Ìnchéni la ó xritjeorá tí ntja t'inkaséyan kuente ch'án. Méxra tjenkayáxinrá jína éxi tí sín xritjeó tí ntja t'inkaséyan.

⁹ Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá.

¹⁰ Tóxakonhanrá chrókjuich'erá tí nkehe tóxrjínhjin Ìnchéni.

¹¹ Tankiéhyará tí sín ch'e xra náxrjónhya mé tí sín a ch'e xra tí sítie. Íchá jína tsjákoxinrá tí xra tí itjen tí t'inkaséyan.

¹² Chrókósuéhęni chrónixjani kuente tí nkehe imó ch'e tí sín jínahya.

¹³ Tí t'inkaséyan mé tsoxoxíxin kaín xín nkehe la mé tí xrohi ts'ikonxínni jína kaín nkehe.

¹⁴ Mé xikaha ntáchro xikihi:

T'aya jaha tjéchrian t'inkatjénxian tí síin tí sín tsík'en.
Cristo mé tjetjoka xrohi.

¹⁵ Méxra imá chrókóxakonhanrá jnkojína chrók'uejorá. Jehya éxi tí sín noehya chrók'uejorá. Náhi. Chrók'uejorá éxi ijnko chojni nohe má.

¹⁶ Chrókóxakonhanrá chrókjuich'erá xra tí jie kixin itsi ijnko yaon jínahya xitjahya sich'erá xra.

¹⁷ Chrókólontjhyará. Chrókóxakonhanrá chrókuiénxinrá tí nkehe tóxrjínhjin Ìnchéni.

¹⁸ Chrókókoanhyará kixin tíha mé chrók'uitjáyanxinrá. Íchá jína chrókjuánjonrá kjuachaxin chrók'uetuanhanrá Nchakuen Dios.

¹⁹ Chrónixjéxinrá kichuárá tí salmo la ko tí himno la ko chrótsjerá la xikaha kaín asánrá chrókjuanchehérá kjuasáyé Ìnchéni.

²⁰ Jnkochríxin chjehérá kjuasáya It'eni Dios kixin kaín nkehe kjuanjon ch'án la ko chrókjuanchaxínrá kjuasáya kjuachaxiэн ihnié Ìnchéni Jesucristo.

Jína chrók'uejókoni tí sín kjéhyani kixin tinkáchónkini Ìnchéni

²¹ Titekákóhénrá kichuárá kixin ó tinkáchónkirá Ìnchéni.

²² Tí chojni chjin chrókjuinchexiteyéhe xii sín éxi nchexiteyéhe sín Ìnchéni.

²³ Tí chojni ntoa chóna kjuachaxin ts'etuenhen ichjién éxi Cristo mé ikja t'etuenhen tí nínko. Kjaxin jehe ch'án kjuínchekaá ch'án tí nínko, mé tí cuérpóe ch'án.

²⁴ Méxra éxi tí nínko nchexiteyéhe Cristo mé xikaha kjaxin tí chojni chjin chrókjuinchexiteyéhe tí xii.

²⁵ Tí chojni ntoa chrótjuèhe tí ichjién kixin éxi Cristo la tjuèhe tí nínko la k'uenyákonhen ch'án.

²⁶ Mé xikaha kjuich'e Cristo kixin sinchetjóá ch'án tí nínko mé kjuínchetjuáxin ch'án tí ntá kuikitéxin sín kjuachaxiэн itén ch'án.

²⁷ Ntá tsjanjon ch'án tí jeheni éxi ijnko nínko imá jína chóntahya jię la ko chóntahya ninkehó nkehe náxrjónhya, mé ijnko nínko tjóá la ko ntoá.

²⁸ Mé xikaha tí chojni ntoa chrótjuèhe tí ichjién sín éxí tjuèxín ch'án cuérpøé ch'án. Tí nkexro tjuèhe ichjién mé kjaxin tjuèhe asén ch'án.

²⁹ Kohya ninkexró nínkakonhen tí cuerpo kuènte. Kaín chojni la ine sín la t'ayakonhen sín cuérpøé sín la mé xikaha Cristo t'ayakonhen tí nínko.

³⁰ Kaínni mé k'ónani cuerpo kuènte ch'án. Jeheni mé ntøe ch'án la ko huésøé ch'án.

³¹ Ntáchro kixin: “Méxra ijnko chojni ntoa mé tsítøhe it'é la ko ìné kixin tsakja ichjién la yóí sín mé ts'óna éxí jnkokøá chojni.”*

³² Tíhi mé ijnko nkehe imá jíé tienxínhya ninkexró. Mé janhan xrxanka kuènte Cristo la tíha mé nínkøé ch'án.

³³ Méxra kjaxin tjéxrxanka kixin chojni ntoa t'ichjánxin tsotjuèhe ichjién sín éxí tjuèxín asén sín la tí chojni chjin chróchøntehe sín kjuasáya tí xìi sín.

6

¹ Jahará chánjanrá la t'ichjánxin sìnchexiteyéhérá it'ará la ko ìnará kixin tjuèherá Ìnchéni kixin tí xikaha mé jína.

² Tí nkehe saoxín tsík'ítuenhenni kixin chrókuitekaonni ntá chrókjuanjon Dios nkehe mé tíhi: “Chrókjuikosáyehérá it'ará la ko ìnará

³ kixin mé náxrxón chrók'uejorá la isé chrók'uejorá ntihi chjasintajni.”*

⁴ Jahará it'é xjan la chrókjuinçekónínkakonhyará tí xjaanrá. Íchá jína kixin sìnçek'ánkíxinrá xjaanrá ijnko kjuaxrexinkaon jína kixin ts'ánkíxin xjan tsínkáchónki xjan Ìnchéni.

⁵ Jahará chojni ch'e xra mé chrókuitekákønhénrá tí lámøará ntihi chjasintajni la chróchontehérá sín kjuasáya. Sích'eherá sín xra éxí ch'eherá xra Ìnchéni Cristo.

⁶ Chrókjuich'erá xra jína la jehya kixin tí tjejó sín tjejótsjehe sín kixin ntá xikahó ntá jína chrók'uejoxínrá. Náhi. Éxí ch'eherá xra Cristo kaín asánrá sích'erá xra kixin mé xikaha tóxrxínhin Dios.

⁷ Kaín asánrá chrókjuich'erá xra éxí ch'eherá xra Ìnchéni la jehya éxí chojni ó chrókjuich'eherá xra.

⁸ Ó nohará kixin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kixin nkexrí tí xra jína kjuích'e sín.

⁹ Tí jahará chojni lamó mé jnkojína chrókuétuènhénrá tí sín t'ahará xra la séchrókónínkákønhénrá sín. Xráxinkáonrá kixin jahará la ko jehe sín mé jnkokón chrókjuinçexiteyéhérá Ìnchéni itjen nkaya nkajní kixin kaín chojni la jnkokón t'íkon ch'án.

Tí nkehe tjinkítsa t'ayakonhen tí sín tinkáchónki Ìnchéni

¹⁰ A ntá jie kíchó ni, nchefuérte asánrá kixin tjejókoni Ìnchéni la tjetøan tí kjuachaxin kuènte ch'án.

¹¹ Chrókuaáxinrá kaín tí kjuachaxin tsjanjon Dios kixin ntá xikaha jína chrók'uejorá la chrókjuít'ayahará Tsochren.

¹² Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nçhakuen tí jínahya síin chjasintajni. Tíha mé tjinkaon chrók'uejøan tí chjasintajni sítié.

* 5:31 Génesis 2.24 * 6:3 Éxodo 20.12; Deuteronomio 5.16

¹³ Méxra chrókuákjárá kaín tí kjuachaxin kjuanjon Dios kixin ntá chrókjuachará tí itsi tí yaon jínahya ntá tí xíkaha chrókjuich'erá la chr'éxin la jína chrók'uejorá.

¹⁴ Nchefuéerte asánrú. Jína chrók'uejorá. Chrókuítekáoñrú tí itan chaxín kixin tí nkehe ntoá mé chrók'uayakonhanrá.

¹⁵ Méxra listo chrók'uejorá sátsjichronkará tí tan tjanjon kjuaxróxin.

¹⁶ La antsí tjetóan chrókuinkachónkirá Ìnchéni. Tíha mé chrok'uinkákonhen tí chica flecha tsochr'án Tsochren.

¹⁷ Tí chrókuááxinrá la táha éxi yóhē ijnko chica casco t'ayakonhen ikja chojni la tí itén Dios la éxi yóhē ijnko chica espada mé tjanjon Nchakuen Dios.

¹⁸ La ko kjaxin chrókuítóéhyará chrónixjehérá Dios la jnkochrín chrókjuanchehérá ch'án kaín nkehe t'ichjánxinhanrá la chrokjuanchatóxixínrá Nchakuen ch'án. Chrók'uejotsjehérá la chrókjuanchiará kixin tsjinkítsa Dios kaín tí sín tinkáchónki ch'án.

¹⁹ Chrónóehérá ch'án kixin kjaxin janhan tsjinkítsana ch'án tsjanjon ch'án tí tan t'ichjánxin tsonixja janhan kixin ntá janhan antsí jína chrónixja kixin ntá tsinhin sín tí nkehe ninkexró k'uénoehya kixin nkexrí tjen tí itén ch'án tsaáxin chojni.

²⁰ Dios mé ichr'ánna tsoxrjanka tí itén ch'án, mé xíkaha tjéchinaxián ijje. Nixjehérá ch'án kixin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkexro imá tjuèheni la ko xráxin ch'ehe xra Ìnchéni mé tsochenkará ch'án tí jahará nkexrí tjen la ko nkexrí tí xra tjet'a.

²² Mé xíkaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xíkaha chrókócháhará.

²³ Tjánháha It'éni Dios la Ìnchéni Jesucristo kixin tsochjéhe ch'án kaín kíchó ni kjuaxróxin kixin tsotjuèhe kíchó sín la ko tsinkáchónki sín ch'án.

²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí sín sín chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'ezeni xra Jesucristo, mé ikjinni tí xroon i chr'anhánrá kaín tí jahará kichó ni tinkachónkirá Cristo Jesús tjejorá chjasin Filipos la ko tí sín t'etōan kuente nínko ntiha.

² Tjanchiani kixin It'eni Dios la ko Inchéni Jesucristo kjuasáyé ch'án imá chrókjuincheyanórá ch'án la ko chrók'uayéhérá kjuaxróxin.

Ch'ín Pablo tjechrónóhehe ch'án Dios kixin tí sín tinkáchónki Jesús ntiha

³ A ntá tió xráxinkavan tí jahará la imá tjaḥa Dios kjuasáya

⁴ la ko nixjaḥa Dios la imá chàna tjáncháḥa ch'án kixin tsjinkĩtsa ch'án kaín tí jahará.

⁵ Jahará la kjuínkĩtsará tió kjuàkua tí tan jina tí saoxín kuinhínrá itén Dios la naḥa tjejotjinkĩtsará ijie.

⁶ Ó nòna chaxín kixin xikaha Dios ó kjuankixin ch'án ch'e ch'án xra jina kixin kuítekáonrá mé xikaha naḥa tsjintaxín sich'e ch'án tsjixrakája tí yaon tsokjan Jesucristo.

⁷ Jina kixin tjenkayáxian kuente kaín tí jahará. Méxra xikaha imá tjuahára. Jahará la ko janhan la jnkokón kjuachaxin k'uáyéheñi la kjónté janhan tjechjina o itjén tí tjejó tí sín t'etōan tjejrxanka kixin jina tí tan tsaáxinni.

⁸ Dios la ó nohe kixin imá tjínkavan chrók'uikuān kaín tí jahará kixin éxi tjuáxinrá Cristo.

⁹ Tjáncháḥa Dios kixin tsjinkĩtsa ch'án tí jahará kixin antsí má chrórtjuèhérá ch'án la ko chrók'uánkí tí kjuaxrexinkaon kuéntará kixin antsí chrókuiéxinrá kaín nkehe.

¹⁰ La ntá chrókónohará chrókuákjára tí nkehe jina. A ntá tí xikaha chrókjuich'erá la jina tjóá chrók'uejorá la ko kohya nkehe chrókjuanchia jie tió tsokjan Jesucristo.

¹¹ Méxra jahará chrókjuich'erá xra jina éxi ijnko nkehe jina chrók'óna kixin kjuasáyé Jesucristo la ntá xikaha la chrókjuikosáyehérá Dios.

A ntá janhan la tjechōnxian Cristo

¹² Kichóni tjínkavan tsonohará kixin tí nkehe kjuasótexinna la kjuínkĩtsa kixin kuínhin chojni tí itén Dios tsaáxinni.

¹³ Kaínxín tí chojni siín palacio la ko kaín tí í so sín mé nohe sín kixin tjechjinaxián kixin tinkachónkia Jesucristo.

¹⁴ A ntá tí tjechjina la itsjé tí sín kichó ni antsí má kóxrjínhin sín tjako sín itén Inchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinqóxinhin sín kixin tjinkaon sín chrókjuachaxinna sín. A ntá í so sín tjako itén ch'án kixin tjinkaon sín jina chrókjuinkĩtsana sín.

¹⁶ Kjánchó iso sín tjinkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjinkaon sín chrók'uekana sín antsí má jie kixin naḥa tjechjina.

17 La í so sín nixja sín kuènte Cristo kixin tjuèhe sín ch'án la ko tjuana sín la ó nohe sín kixin ntihi tjén kixin tsoxrjanka tí itan tsaáxinni.

18 Kjánchó ántosenná kjónté á chaxín kaín asén sín tjako sín o náhí, la imá chàna kixin chrónka sín tí tan jína kuènte Cristo la ántsí má chéhe asenná.

19 Ó nòna janhan kixin kjónté kaín nkehe tsonna la kjónté xíkaha la tsaáxinna kixin kjuasáyará jahará tjejonixjehérá Dios la ko tí Nchakuen Jesu-cristo mé tjetjinkitsana.

20 Jína tjechonhan kixin Dios la tsitqehya tí janhan kixin ichrén nkehe jínahya chrókóna. Tjínkavan tsochonta kjuachaxin kixin jína tsonixja kaín asenná nkayakon chojni. Ntá xíkaha senó la xíkaha ijie tió ts'ikon chojni tí janhan la tsonoexín sín kixin Cristo imá chóna kjuachaxin kjónté á naxa tjechuan o á ó tik'ena.

21 Kixin janhan na Cristo tjechonxian la ntá kjónté ts'énxian xíkaha la mé chrókuácha.

22 A ntá tí naxa tsjak'é naxa tjechuan ntá naxa jína sít'aha Ìnchéni xra. Nonahya nkehe tí chrókuákjaá, á chrók'uén o á chrókuak'échuan.

23 Imá xra chrókuenkayáxian chrókuákjaá tí yaá nkehe. Janhan na tí chrók'uén la chrókuak'ékian Cristo. A ntá janhan la ntáxrjan kixin íchá jína tíha.

24 Kjánchó t'ichjánxin naxa chrókuak'é kixin naxa chrókuínkítsa tí jahará.

25 Méxra ó nòna kixin naxa tsitona tí tjejorá kixin chrókuínkítsa tí jahará kixin ntá ántsí chrókónohará la chrókócháhará kixin jína chrókuinkachónkirá Ìnchéni.

26 Ntá tió tsjasán janhan ts'ejóni inaá la imá tsocháhará la tsjanchehérá kjuasáyé Jesucristo.

27 A ntá jahará chrókuákoxinrá chrók'uejorá jína éxí ntáchro tí tan kjuákoxin Ìnchéni Cristo. Mé xíkaha tí tsjasántsahará o náhí la tjínkavan chrókujinhan kixin naxa imá tinkachónkirá Cristo la ko jnkokoá tjenkayáxinrá la ko jnkokoá tjejoch'erá xra tjàkorá tí itan jína tsaáxinni.

28 Chrókuítóéhyará kixin tí sín nínkakonhanrá chrókuintachakonrá sín. Tí xíkaha chróchrakonhyará la chrókónoexín sín kixin ts'itjáyan sín, a ntá chrókónoxín kixin jahará mé chaxín tsaará. Tíha mé Dios tsjinkitsará.

29 Ó kujtonhanrá tí kjuachaxin kixin tsinkachónkirá Jesucristo la ko kjaxin kujtonhanrá kjuachaxin tsjasótiaxinrá kixin jahará mé tinkachónkirá ch'án.

30 Jahará la ko janhan jnkokón ch'eni xra. Jahará ó k'uikonrá senó nkexrí kujit'a xra la ó kuinhínrá ijie kixin naxa tjet'a xra kjónté nínkakonna sín.

2

Kuítóhe Jesús tí kjuachaxin chrók'uetqan ch'án ntá ijie imá tjeotan ch'án

1 Tí chaxín tí Cristo nchexraxinkaonrá la tí chaxín Cristo tjuàhará ch'án nchecháhará ch'án la tí chaxín tí Nchakuen ch'án xrikoárá la tí chaxín nohará kixin tikonóahará ch'án

2 la nchechànará kixin jnkokoá chrók'uejokoará kichuára la ko jnkokoá chrótjuèhérá kichuára la ko jnkokoá chrókuenkayáxin nchakuanrá la ko jnkokoá xra chrókujich'erá.

3 Chrókuenkayáxinhyará chrókuétoanrá la ko chrókuinchehnkehyará. Náhí. Chrók'ónará chojni t'etqanhya. Chrók'uikonrá éxí ántsí tjeotan tí í so sín, a ntá kánhyó tjeotan tí jahará.

⁴ Ninkexró chrókjueyá tí nkehe kuènte jehó. Náhi. Chrókjueyárá tí nkehe chrókjuiñkĩtsa tí í so chojni.

⁵ Jahará chrókjuenkayáxinrá éxi kjuenkayáxin Cristo Jesús.

⁶ Jehé ch'án chón̄ta ch'án kaín kjuachaxin kuènte Dios la kjónté xikaha la tjinkakonhya ch'án chrókjuiñcheyóhē ch'án éxi Dios.

⁷ A ntá kuítōhe ch'án ntáha tí kjuachaxin k'uéchón̄ta ch'án la k'óna ch'án ijnko chojni ntoa chjasintajni la ko kjuich'e ch'án xṛa.

⁸ La éxi ijnko chojni k'ueṭoanhya kjuák'e ch'án la kjuínchexiteyéhe ch'án Dios kaín asén ch'án kixin ik'uén ch'án, mé k'uénxin ch'án tí ntacruz.

⁹ Méxṛa Dios imá kjuikosáyehe tí jehé ch'án la ko kjuínchek'in ch'án ijnko ihñié imá tjetōan.

¹⁰ Kixin ntá tsinhin kaín chojni tí ihñié Jesús ntá ts'ejóxin toch'in sín, mé tí sín sín nkaya nkajni la ko tí sín sín chjasintajni la ko tí chojni sín chrínki nche.

¹¹ La ko kaín xín chojni tsochrónka sín kixin Jesucristo mé Ìnché sín mé xikaha tsjikosáyehe sín It'eni Dios.

Tí sín tinkáchónki Cristo tóyóhē éxi xrohi t'inkaséyanxín chjasintajni

¹² Jahará kichó ni imá tjuahará la xṛaxín kjuínchexiteyànará tí k'uék'ejóni. A ntá ijie la chrókjuiñchexiteyànará kjónté ikjín tjén. Chrókuítōéhyará tí nkehe tsjanjon kjuachón la chrók'uayakonhénra jnkójina

¹³ Kixin Dios ntaxraxinkaonrá s'ich'erá tí nkehe jina tjinkaon ch'án.

¹⁴ Kaín xṛa ch'erá la chrókóninkákuénhyará kichuárá la ko chrókjóntahyará kichuárá

¹⁵ Kixin tsokohya ninkexró tsontácho kixin jahará la chontará jje. Kixin jahará la mé tí xjeen Dios chróchontahyará jje, la tjejorá tí sín tí sín jínahya tjasin jje. Na ntá jahará chrók'uinkaséyanxín tí jehé sín éxi tí konotsé t'inkaséyanxín tí chjasintajni sitié.

¹⁶ Méxṛa jahará chrók'uayakonhénra jina tí tan tjanjon kjuachón. Tí xikaha chrókjuiñchexiteyárá jnkójina ntá tió tsi Cristo tschéhē asenná kixin xikaha xṛa tjejoch'erá kixin ntá tson̄na kixin jehya ó chónkó kjuak'ékjit'a xṛa.

¹⁷ Kjónté chrók'uénxiān la éxi nkehe chrókjuanchatóxiñrá Dios chrók'uikonrá tí janhan. Mé xikaha chrókjuintaxín tí nkehe chróchjehérá ch'án kixin tinkachónkirá ch'án, la ntá mé janhan mé tschàna la ko tjínkavan kixin kaín rá xikaha chrók'uayéhérá kjuachéhē.

¹⁸ Méxṛa chrókócháhará jahará kjaxin la chrók'uayéhérá éxi tí kjuachéhē chonta.

Ch'ín Timoteo la ko ch'ín Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'ín Timoteo tsjijitsjehé ch'án tí jahará kixin ntá tschàna tsinhan nkexrí tjejorá.

²⁰ Kohya í jnko nkexro chrókjuenkayáxin éxi tí janhan la ko chrókóxakonhen kixin jahará chrók'uejorá jina.

²¹ Kaín tí í so sín tjejá sín tí nkehe tóxrjinhin sín ó la jehya tí nkehe tóxrjinhin Jesucristo.

²² A ntá jahará ó nohará kixin ch'ín Timoteo ó kjuakoxin ch'án kixin jina asén ch'án kixin jehé ch'án kjuit'akian ch'án xṛa kjuakoni tí tan jina. Éxi ijnko xjanna xikaha kjuínkĩtsana ch'án.

²³ Mé xikaha tjínkavan tsochr'an ch'án tsjijtsjehe ch'án tí jahará tió tsonona nkexrí tsji tí xrá kuèntana.

²⁴ La ko kjaxin chonhan kixin Ìnchéni tsjinkitsana kixin tjoka tsjasán kjaxinna.

²⁵ A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehe ch'án mé jnkokoá ch'ekoni ch'án xrá kjónté nínkakhenni chojni. Jahará k'uechr'anrá ch'án ntíhi kixin jehe ch'án tsjinkitsana ch'án kaín nkehe tjínkavan.

²⁶ Imá tóxakonhen ch'án tsjijtsjehe ch'án tí jahará kixin ó nohe ch'án kixin tsíkinhínrá kixin k'uéníhi ch'án.

²⁷ Chaxín k'uéníhi ch'án ó mero chrók'uen ch'án, a ntá Dios kuikonóhehé tí jehe ch'án kjánchó Jehya jehó ch'án, kjaxin kuikonóga Dios tí janhan kixin kánhyó chrók'uavá.

²⁸ Méxra tjínkavan tsochr'an ch'án kixin ó nóna kixin tsócháhará ts'ikonrá ch'án inaá la ko xikaha janhan í kánhyó chrók'uavá.

²⁹ Imá chrókócháhará chrókjuiji ch'án kixin jehe ch'án mé ijnko kichó ni tinkáchónki Ìnchéni la ko chrókjuikosáyehérá ch'án éxí chrókjuikosáyehérá kaín tí í so sín éxí jehe ch'án.

³⁰ Jehe ch'án ó mero chrók'uenxín ch'án tí ch'ehe ch'án xrá Cristo. Mé síin kjuaxikaon chrók'uenxín ch'án kixin jehe ch'án kjuínkitsana ch'án kixin jahará xitjahya ts'inkará tsjínkitsará tí janhan.

3

Tí nkehe chaxín sínki

¹ A ntá ijie, kichó ni, chrókócháhará kixin jahará la kuènte Ìnchéni. A ntá tí janhan la xrahya tsokjatée tsokjian tí nkehe ó kjian kixin tíha la chrókjuinkitsa tí jahará.

² Chróchontará cuidado ti sín ch'e jínahya éxí konjá la tóchrít'ó sín cuérpoé sín.

³ A ntá tí chojni chaxín chóna xroye la mé tí jeheni kixin jeheni chaxín xraxinkakonxínni Dios kjuachaxién Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpoéni chrókóchrínjinni.

⁴ A ntá janhan kjaxin jína chróntáxrjan kixin chrókóchrít'ó tí cuérpoé chojni. Ninkexró antsí chróchóna kjuachaxín kixin chrókuitekaon tí nkehe a.

⁵ Janhan mé tsíkana xroye tí k'uéchonta ijní yaon la ko janhan mé tikínixian tí sín israelita la tsík'axrjeníxinna tí sín tsík'axrjeníxín ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxí tinkáchónki tí sín fariseo.

⁶ A ntá imá k'uénínkakhonhan k'uéchonkíha tí sín tinkáchónki Jesús la ko imá kjuíntaxiteyáha tí ley la kohya ninkexró tsontácho kixin chaxínhya tíha.

⁷ Ntá kaín tíha la tí ósé k'uékjenkayáxian janhan kixin sínki tíha, a ntá ijie la tinkáchónkia Cristo la ntá tí nkehe k'uékóxrjínna k'uékjít'a la ntá jie la ninkehó sínkíhya.

⁸ La kjaxin kaín xín nkehe t'íkuən éxí chónkó tíha kixin antsí má tjetoan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuíntak'itjáyan kixin ijie ó tinkáchónkia Cristo la kaín xín tí nkehe k'uéchonta la t'íkuən éxí chjínínó ó kixin ntá xikaha jína chrókjuak'ékian Cristo.

⁹ Chrókóchàna kixin jnkokoá chrók'uejókoni ch'án. Tjéyáhya kixin tí ley chrókjuinixin ijieni tí chrókjuinchexiteyéheni. Náhí. Tinkachónkia Cristo la tsaáxinni kixin Dios la tsjakjin tí ijieni kixin tinkáchónkini ch'án.

¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tió xechón ch'án la ko tjínkavan tsjasótexinna éxi kjuasóte ch'án la ko kjónte chrók'uéna éxi k'uénxin ch'án

¹¹ Kixin ntá tjínkavan tsjácha tsoxechónna inaá.

Ch'in Pablo tjinkaon chrókjuacha ch'án

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'án senó xikaha.

¹³ Kíchóni, ntáxrjanhya kixin janhván kjuácha tíha. Náhí. Janhan mé ts'itjáyanna kaín xín tí nkehe ó kuitóhe senó la t'ichjánxin kaín asenná tjíchráha tí nkehe naxa t'itjáyan tsjácha.

¹⁴ Kixin xikaha ntá chrókjuácha chrók'uayáha kaín tí nkehe jina tsjanjon Dios. Jehe ch'án la sinchexiteyá kaín tíha kixin tinkachónkia Jesucristo.

¹⁵ Kaínni tí tinkáchónkini Jesús kaín asenni la méxra xikaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha.

¹⁶ A ntá t'ichjánxin chrók'uejóni éxi tí nkehe ó kjuachani.

¹⁷ Kíchóni, chrók'uejorá éxi kjuak'é janhan la ko chrótsjehérá nkexrí tjejó tí í so chojni tjejóch'e éxi kjuakoni kixin xikaha kjuakoharáni tí jahará.

¹⁸ Nchónhya xrjankaxián senó la ntá xrjanka inaá la imá tsjanka kixin siín nchónhya sín tjejó sín éxi nínkakonhen sín tí Cristo k'uénxin ntacruz.

¹⁹ Tí sín a mé ts'itjáyan sín. Tí dios kuènte sín la mé tí nkehe ntáchro asén sín ó la ko tjinkaon sín chrókjuinchekhexin sín tí nkehe chrókósuèxin sín. Jehó tjenkayáxin sín tí nkehe siín chjasintajni ó.

²⁰ A ntá jeheni kaín ni la mé chojni kuènte nkajní la tjejóchónhenni kixin ts'inkajinxin nkaya nkajní tí nkexro tsaáxinni, mé Ìnchéni Jesucristo.

²¹ Ntá jehe ch'án mé tsjínki ch'án tí cuerpo náxrjónhya chóntani kixin ntá tí cuerpo chóntani tsoyóhe éxi tí cuerpo náxrjón chónta ch'án. Tíha mé tsoxiteyá kjuachaxián ch'án jié kixin ó chónta ch'án kjuachaxin ts'etuenhen ch'án kaín xín nkehe.

4

Jnkochríxin chrókócháhará kixin tinkachónkirá Ìnchéni

¹ Jahará kichó ni imá tjuahará la ko imá tjínkavan chrókjuasántsjahará tí jahará kixin jahará imá nchechànará kixin jahará mé éxi ijnko nkehe ó kjuácha. Méxra jina chrók'uejorá chrókuinkachónkirá Ìnchéni kixin tjuahará kichó ni.

² Xrjanóaha tjan Evodia la ko tjan Síntique kixin jnkokoá chrókjuenkayáxin sín kixin jehe sín la jnkokoá kichó sín kixin tinkáchónki sín Ìnchéni.

³ Jaha la jina k'uéjóni kjuích'eni xra, méxra xrjanóaha tjínkítsa tí sín chjin kichó ni kixin jnkokoá chrókjuenkayáxin sín. Jehe sín kjaxin kjuích'e sín xra tió kjuakoni tí tan jina tsaáxinni. Koí tí ch'in Clemente la ko í so sín kjuích'ekoni xra. Tí ihnjé sín la ó ts'ínixín ts'ínixín ihnjé chojni tsaá.

⁴ Nchechéhérá asánrá jnkochríxin kixin tjejókoará Ìnchéni. Inaá kjatēe xrjanka nchechéhérá asánrá.

5 Kaín chojni chrókónohe kixin jahará la chojni jínará. Chrórxáinkáonrá kixin í séhya tsokjan Ìnchéni.

6 Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxínhanrá la kjaxin chrókjuancheherá ch'án kjuasáya.

7 A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuénte ch'án kixin imá ijíé tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

8 Méxra tsjixixín tétuanhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xikaha tjenkayáxinrá kaín xín tí nkehe náxrjón la ko tí nkehe tóxrjínjin Dios.

9 Chrókjuich'erá kaín tí nkehe kjuákohará la ko tí nkehe kuínhínrá xrjanka la ko tí nkehe kuétuanhánrá la ko tí nkehe k'uíkonrá kjuít'a, mé kaín tíha chrókjuínchexiteyará la ntá tí Dios tjanjon kjuaxróxin mé ts'ejókoar ch'án.

Tí ofrenda kjuanjon tí sín filipenses tsjinkítsa sín tí ch'ín Pablo

10 Ìnchéni imá nchechána kixin jahará xráinkáonrá tí janhan ínaá. Ntáxrjanhya kixin tsík'itjáyanhanrá tí janhan kixin jahará xitjahya k'uékjínkítsará tí janhan.

11 Jehya kixin ntáxrjan tíha kixin imá t'ichjánxínna kixin janhan na ó kuánna kjuaxróxin tjén kjónté tí nkehe chonta ó.

12 Janhan ó kuánna tjén kjónté nóana la ko kjaxin ó kuánna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántoséna.

13 Kaín xra tsjácha sít'a kixin Cristo tsjinkítsana.

14 Kjánchó jahará jína kjuich'erá kixin kjuínkítsará kjuánjonrá nkehe t'ichjánxínna.

15 Tió sákjuíxian estado Macedonia la kjuankíxian kjuákua tí tan tsaáxinni ínaá la jahóra tí nínko chjasin Filipos ichr'anrá chichaon k'uayáha kixin cháhará kjuákohará itén Dios.

16 Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuínkítsará tí nkehe k'uichjánxínna ntiha.

17 La Jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará ántsí má chrókjuich'erá tí nkehe tjinkaon Dios kixin ntá ántsí chrókjuachará.

18 Ó k'uayáha kaín nkehe tsíkjánjonrá la ántsí itsjé chonta. Ó k'uayáha tí nkehe tsích'r'anrá mé tí nkehe kuíkao ch'ín Epafrodito, la kaín tíha la ó tsjácha. Tíha la éxí yóhe ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjínjin ch'án.

19 Tí Dios kuéntana mé tsotjáhará kaín xín nkehe naxa t'itjáyan tsákjára kixin chónata ch'án kaín xín nkehe imá náxrjón tjete la tsjanjon ch'án kixin jahará la tinkáchónkirá Cristo Jesús.

20 Kjuasáyé It'éni Dios jnkochrín. Mé xikaha tsoxiteyá. Amén.

Tsjixixín nixja ch'ín Pablo

21 Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjahará sín.

²² Kǵaxin kaín tí sín tinkáchónki Dios la ko tí sín ch'ehe xra tí ch'ín t'etǵan romano mé nixjahará sín.

²³ Tǵáncháǵa kǵixin Ìnchéni Jesucristo mé chrókjuintayaonrá ch'án kaín rá. Amén. Ó tǵen.

Tí xroon tsíkjin ch'ín Pablo chr'énhen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjeýána Jesucristo t'ahá ch'án xṛá kixin xíkaha tjinkaon Dios, la ko kichó ni Timoteo

² mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tjejorá chjasin Colosas. Kjuasáyé It'eni Dios chrókjuintayaonrá kixin kjuaxróxin chrók'uejorá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochríchín tjancheheni kjuasáya Dios la ko tjanchiani kixin chrókjuinkítsa ch'án tí jahará mé jehe ch'án It'é Ìnchéni Jesucristo.

⁴ Ó kuínhinni kixin jína tinkáchónkirá Ìnchéni Jesucristo la ko tjuèhéra kaín tí sín ó tsíkjinchetjóá Dios.

⁵ Mé xíkaha tjejochonhénra kixin ts'ayéhéra tí nkehe chóna Dios tjen nkaya nkajní. Jahará la xíkaha tjejochonhénra kixin tjejotinhénra tí tan chaxín kuènte Dios tsaáxinni.

⁶ Tí tan i mé kuínhin chojni la itsjé sín tinkáki tekaon sín la tinkák'ánki tí kjuachaxin kuènte Dios kuènte chjasintajni. Mé xíkaha kónhen tió kuinhénra la ko kuítekáonrá kixin chaxín tjuahará Dios.

⁷ Tíhi mé kjuakohará kichó ni Epafras. Jehe ch'án la jnkokoá kjuích'ekoni ch'án xṛá kixin jehe ch'án la jína ch'ehe ch'án xṛá Cristo kixin xíkaha tjinkítsa ch'án tí jahará.

⁸ Jehe ch'án mé kui ch'án ntihi chrónka ch'án nkexrí tjuèhéra kichuára kixin Nchakuen Dios tjinkítsa tí jahará.

⁹ Méxṛá xíkaha tí yaon tió kuínhinni nkexrí tjejorá la títoehyani tjancheheni Dios kixin tsjinkítsa tí jahará kixin tsonohará jína nkexrí tóxrjínhin ch'án la ko tjanchiani kixin tsjanjon ch'án kjuachaxin kixin tsiénxinrá kaín nkehe kuènte ch'án.

¹⁰ Tjancheheni ch'án kixin jína chrók'uejorá kixin tinkáchónkirá Ìnchéni la ko chrókuítóéhyará chrókjuích'erá éxi tóxrjínhin tí jehe ch'án. Ntá jína chrókjuachará chrókjuích'erá xṛá kuènte ch'án la ntá chrókónohará jína nkexrí tjen Dios.

¹¹ Tjanchiani kixin jehe ch'án chrókjuinkítsa kixin chrók'uejorá fuerte kixin tí kjuachaxin jié kuènte ch'án kixin ntá chrókjuachará la kjónte ichrén nkehe chrókónhanrá la chrókóninkákonhyará.

¹² La ko chrókócháhará chróchjehéra kjuasáya It'eni Dios kixin kjuanjon ch'án kjuachaxin kixin ts'áyéheni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án.

¹³ Jehe ch'án mé kuakitsjekjanxínni ch'án tí sítié la ntá kjuanjon ch'án kjuachaxin ts'ejóni tí t'etqan tí Xjeen ch'án, tjuèhe ch'án.

¹⁴ Jehe ch'án kjuínchekaáni ch'án kixin k'uenyákonhenni ch'án la tí ijnié ch'án mé kjuenká ch'án tí ijíeni.

Kjuaxróxin ts'ejókoni Dios kixin k'uenyákonhenni Cristo

15 Éxí tsjehe Cristo mé xíkaha tsjehe Dios kjónté xitjahya t'ikonni tí jehe ch'án. Cristo la ó xráxín tjen tí naxá t'ónahya ninkehó.

16 Kjuachaxién tí jehe ch'án kjuích'énaxín Dios kaín tí nkehe síin nkajní la ko chjasintajni la ko kaín tí nkehe naxá t'ikonhyani la ko tí nkehe ó t'ikonni. Kjaxin kaín tí sín ángel t'etōan la ko chóna kjuachaxin la mé jehe ch'án kjuích'éna ch'án kixin sich'ehe sín ch'án xra.

17 Cristo la ó xráxín tjen kjónté naxá t'ónahya ninkehó la jehe ch'án t'ayakonhen ch'án kaín nkehe síin kixin tí kjuachaxin kuènte ch'án.

18 La kjaxin jehe Cristo mé tí kja t'etuenhen tí cuerpo mé tíha mé tí nínko. Jehe ch'án senó xechón ch'án kixin jehe ch'án mé ts'etuenhen ch'án kaín nkehe síin.

19 Dios tjinkaon chróchjéhe ch'án tí Xjeen ch'án kjuachaxin éxí tí kjuachaxin chóna tí jehe ch'án.

20 Kjaxin tjinkaon Dios kixin kjuachaxién Cristo chrók'uixin kjuaxróxin nkuíxín mé chjasintajni la ko nkaya nkajní. Mé xíkaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

21 Jahará la ósé ikjín k'uék'ejorá la k'uéninkákonhénrá Dios kixin tí nkehe jínahya k'uékjich'erá. A ntá jie la kjuaxróxin tjejoará Dios

22 kixin k'uenyákonhánrá Cristo, kjuasóte tí cuérpóe ch'án. Mé xíkaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahyará ninkehó jie.

23 Méxra xíkaha chrókuítóéhyará chrókuinkachónkirá Inchéni la ko chrókuítóéhyará tí nkehe tjejochónhénrá kixin ó kuínhínrá tí tan tsáaxinni. Tí tan í mé ó chrónka chojni kuénté chjasintajni la ko janhan Pablo kjaxin tjínkítsa xrxanka xíkaha.

Ch'ín Pablo ch'e ch'án xra kuènte nínko

24 Méxra ijie la tjasótexinna kixin tí jahará la chána kixin xíkaha mé tsjintaxín tjasóte janhan kixin tí nkehe t'itjáyán tí naxá chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpóe ch'án.

25 Mé xíkaha Dios kjueyána kixin sít'a xra kuènte nínko kixin xíkaha tí xra k'uetuanna ch'án kixin ntá jína chrók'uejoxínrá tí jahará kixin chrókjuintaxín chrórxjankaxián tí itan kuènte Dios.

26 Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án.

27 Dios tjinkaon chrókjuinchenohe tí jehe sín tí nkehe tjemá nárxjón tjehe ts'áyéhe tí sín jehya judío ijie. Tí nkehe k'uénoehya chojni la mé Cristo tjejóoará la jehe ch'án mé tjanjon kjuachaxin ts'ejochónhénrá ts'ayéhérá tí kjuachaxin jíe kuènte ch'án.

28 Jeheni mé chronkaxínni nkehe kuènte Cristo la nchexraxinkaonni kaín chojni la ko tjakóheni sín kixin chrókuiénxín sín jína. Ntá jnkójnko sín chrók'uánki kjuaxrexinkaon kuènte sín kixin tinkáchónki sín ch'án.

29 Méxra xíkaha tí xra it'a la kaín asenná it'a xra tí kjuachaxién chjína Cristo.

2

1 Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxá t'ikonhya tí janhan.

2 Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuéhe sín kichó sín. Mé xíkaha chrók'uánki

kjuaxrexinkaon kuènte sín chrókuienxín sín jína kixin ntá chrókónohe sín tí nkehe ninkexró k'uénoehya kuènte It'èni Dios, mé Cristo tíha.

³ Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe.

⁴ Kaín tíha xrjanka kixin ntá ninkexró chrókjuít'ayahyará tí jahará kixin tí náxrjón chrónixja sín ó.

⁵ Kjóté tjenhya tí cuerpo kuèntana tí tjejorá la ntá nchakuenná la mé tjen ntiha kixin xráxinkavan tí jahará la chàna kixin t'íkuan kixin jína tjejorá naxa tinkachónkirá Cristo.

⁶ Méxra xíkaha kuinkachónkirá Ìnchéni Jesucristo la mé xíkaha jnkokoá chrókjuenkayáxinkoará tí jehe ch'án.

⁷ Éxi ijnko nta tsíkji nuèè ninka mé xíkaha chrókuinkachónkirá tí jehe ch'án éxi kjuakohará ch'án la ko chrókjuanchehéra Dios kjuasáya jnkochríxín.

Cristo tjanjon ijnko ntia nixin

⁸ Chrókjuítóéhyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxi tjinkaon Cristo. Náhi. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya sín chjasintajni.

⁹ Kaínxín kjuachaxin chóna Dios mé chóna Cristo kjóté k'óna ch'án chojni.

¹⁰ La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuenhen ch'án kaín nkehe sín la ko t'etuenhen ch'án kaín nchakuen t'etoan.

¹¹ Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jnko xroye k'uayéhéra kjánchó jehya tí xroye kuènte tí cuerpo. Náhi. Kjuakjiin ch'án tí jie k'uékóxrjínhanrá la kjuíntakaára ch'án, mé tíha mé tí xroye kjuanjon Cristo.

¹² Tí kuikiterá jahará mé xíkaha éxi xravákoára Cristo. Ntá ó xechón tí jehe ch'án la kjaxinrá xechónrá kixin ó kuítekáonrá tí kjuachaxin kuènte Dios kixin Cristo la ó xechón ch'án inaá.

¹³ Jahará ósé la éxi tsík'en asánrá k'uék'ejorá kixin tí jie k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxi xechónrá kixin Cristo kjuatsen tí jie chontará.

¹⁴ Mé Dios kjuatsen ch'án kaín tí nkehe tsík'etoan ch'án ósé kjuachahyani nchexiteyáni la ko kjuatsen ch'án kaín tí jie k'uéchóntani kixin Cristo kjuák'enkáni ch'án tí nta Cruz la xíkaha kjuatsenxin ch'án tíha.

¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchónta tí nchakuen jínahya kixin jehe ch'án kjuínchesuèhe ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe sín nkaya nkajni

¹⁶ Méxra ninkexró chrókjontahyará kixin tí nkehe chrókjónterá o tí nkehe chrók'uirá o á tjíkosáyehéra tí yaon kia o tí nitjó nixin o tí yaon t'ok'éheni.

¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha.

¹⁸ Méxra chrókjuítóéhyará kixin ninkexró chróntáchro sín kixin ts'itjáyanrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxi kotáchrién sín t'íkonxín sín la nchehnke sín kixin tí nkehe t'axrjenixin kja sín ó.

19 **A** ntá jehe sín la chaxínhya tinkáchónki sín Cristo kixin jehe ch'án mé tí kja t'etueñhen kaín ni la jehe ch'án mé ch'éna ch'án jnkokoá cuerpo kuente ch'án kaín ni la nchek'ánkí ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

20 **A** ntá jahará la ó k'uénkoará Cristo la kuitohérá tí nkehe k'uék'etöan kuente chjasintajni ó. ¿**A** ntá nkekuenté naxa tjejorá éxí tí chojni síin chjasintajni chrókjuinchehiteyará tí nkehe t'etöan sín?

21 Mé xikaha t'etöan sín kixin jahará chrótsehyará tíha la chrókjóntehyará tí nkehe la chrókuákjahyará nkehe.

22 Kaín tí nkehe ntáchro sín mé nixja kuente tí nkehe tsjeje lá tíha mé t'axrjeníxin ikja chojni ó.

23 Chaxín kixin jehe sín ntáchro sín kixin jina xikaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpóe sín, kjánchó kaín tí nkehe ch'e sín xikaha la chónkó kixin tjinkitsahya kixin chrókuítöhe sín tí nkehe ntoáhya tjenkayáxin sín.

3

1 **A** ntá tí jahará la ó tsíxechónkoará Cristo. Méxra chrókjuéyará tí nkehe síin nkaya nkajní kixin Cristo la ntíha tjetjaxín ch'án tí tja chjina Dios.

2 Chrókjuenkayáxinrá tí nkehe síin nkaya nkajní. Chrókjuenkayáxinhyará tí nkehe síin chjasintajni.

3 Kixin jahará la ó ik'uenrá la ntá ijie la Cristo la ko Dios chónthehe tí kjuachón kuentará.

4 Jehe Cristo mé chontaxínrá kjuachón jahará la tió tsokjan tí jehe ch'án ntá kjaxínrá ts'ejókoará ch'án ntá ts'íkonrá tí kjuachaxin jíe kuente ch'án.

Tí ntia ntaxin la ko tí ntia nixin

5 **A** ntá chrókuitohérá kaín tí jie tjenkayáxinrá chjasintajni. Ninkexró chrókjuasinko jie chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kjaxin chróköxrjienhya sín chróchónta sín itsjé nkehe kixin tíha mé yóhe tí chróxraxinkaon sín tí nkehe tsíkjanöya.

6 Méxra tí nkexro titekakonhya tí nkehe t'etöan Dios la tsónínkakonhen Dios tí jehe sín la sinchekjasóte sín ch'án.

7 Mé xikaha k'uékjich'erá jahará tí ósé.

8 Méxra ijie chrókuítöhérá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kichuárá la ko tí nkehe jínahya t'axrjénir'vará.

9 Chrókjuich'iyéhyará kichuárá kixin ósé xikaha k'uékjich'erá a ntá jie la ó chrókuítöhérá kaín tí nkehe ntaxin k'uékjich'erá.

10 **A** ntá jie la ó tsík'ónará ijnko chojni nixin. Dios tinkánchetjórará ch'án kixin ts'ónará éxí tí jehe ch'án kixin jehe ch'án kjuich'éna ch'án tí jahará. Mé xikaha chrókjuixraká chróchoxínrá tí jehe ch'án jina.

11 Jehya tjetöan á chojni judío o náhí o á chojni tsíka xroye o náhí o á chojni tsíkjixin kjín o náhí o á chojni noehya o á chojni ch'exón xra o á chojni t'etöan. Tí nkehe tjetöan la tinkáchónkini Cristo la jehó ch'án t'etueñhen kaín nkehe.

12 Dios la tjeuehe ch'án tí jahará la tsíkjeýará ch'án kixin tsinkachónkirá ch'án. **A** ntá jahará la ó k'ónará ijnko chojni nixin la chrókuikonóghérá kichuárá la jina chrók'uejorá la ko chrókjuinchehnkehýará la ko chróköjiahýará la ko chrókönínkákonhyará.

¹³ Chrókóninkákuénhyará kíchuará la chrók'uitjáyahanhá ichrén jié kjuasinhanhá í jnko chojni kixin Cristo la k'uitjáyenhen ch'án tí jié kjuásínrá la kjaxin jahará la xikaha chrókjuich'erá.

¹⁴ Mé xikaha chrótuèhérá kíchuará la jnkokoá chrókjuenkayáxinrá.

¹⁵ Tí kjuaxróxin kuènte Cristo mé chrók'uetuènenhen asánrá kixin xikaha kjuenkayáxin Dios k'uíyáhará ch'án kixin chrók'ónará jnkokoá cuerpo kuènte ch'án mé xikaha chrókjuancheherá ch'án kjuasáya.

¹⁶ Tí tan kuènte Cristo jnkochrixin chróchóna asánrá. Mé xikaha chrókjuákohérá kíchuará la chrókjuinchechéhérá kíchuará kaín kjuaxrexinkaon jina. Chrótsjerá salmo la ko himno la ko canto kuènte Dios la chrókjuancheherá Dios kjuasáya kaín asánrá.

¹⁷ Kaín xra chrókjuich'erá la ko tí nkehe chróntáchrórá la kaín táha chrókjuanchaxínrá ihnié Ìnchéni Jesús la chrókjuanchehérá kjuasáya It'éni Dios kjuachaxién Jesucristo.

Jnkojina chrók'uejóko kichó tí sín tinkáchónki Cristo

¹⁸ Jahará chojni chjin la chrókjuinchesiteyéhérá tí xiyará kixin mé t'ichjánxin xikaha chrókjuich'erá kixin tinkáchónkirá Ìnchéni.

¹⁹ Jahará chojni ntoa la chrótuèhérá tí ichjiánrá la chrókóninkákuénhyará tí jehe tjan.

²⁰ Jahará chánjanrá la chrókjuinchesiteyéhérá it'ará la ko ìnará kaín nkehe chrók'uetqan sín kixin xikaha mé tóxrjínhin Ìnchéni.

²¹ Jahará it'é xjan la chrókjuinchesekónínkakonhyará tí xjaanrá kixin tí xikaha la chrókjuinchesek'áváhyará tí jehe xjan.

²² Jahará chojni ch'exón xra chrókjuinchesiteyéhérá tí lámóará ntihi chjasintajni. Jehya kixin tí tjejótsjehe sín ó chrókjuich'erá xra kixin ntá jina chrók'uejoxínrá. Náhi. Kaín asánrá chrókjuich'erá xra kixin ó nohará kixin xikaha ch'eherá Ìnchéni xra.

²³ Kaín nkehe chrókjuich'erá la kaín asánrá chrókjuich'erá xra éxi chrókjuich'eherá xra Ìnchéni la jehya kixin éxi chojni ó chrókjuich'eherá xra.

²⁴ Ó nohará kixin Ìnchéni la sintakitonhanhá tí nkehe chóna ch'án kixin jahará ch'eherá Cristo xra la jehe ch'án mé chaxín Ìnchéni.

²⁵ A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tikonóehya ninkexró ch'e tí nkehe jínahya.

4

¹ Méxra jahará lámorá la jina chrónixjehérá tí sín t'ahará xra. Chróxráinkáonrá kixin kjaxinrá jahará chontará ijnko Dios tjan nkaya nkajni.

² Chrókuítóéhyará nixjehérá Dios la ko chrókjuanchehérá ch'án kjuasáya.

³ Kjaxin tjanchehérá ch'án tsjinkitsa tí jeheni kixin tsjanjon Ìnchéni kjuachaxin chrókuinhin chojni tsochrónkaxinni tí itén Cristo. Tí xra k'uénoehya ninkexró mé tjechjinaxián je.

⁴ Tsjanchehérá Dios kixin tsjinkitsa ch'án tí janhan kixin chrókiqanxián jina chrókjuákua éxi tjinkaon Dios.

⁵ A ntá jahará la jina chrókjuákohérá itén Dios tí sín naxra tinkáchónkihya Ìnchéni kixin kánhyó tiempo siín kixin tsjàkorá.

6 Chrónixjehérá sín jnkojína kíxin chrókóxrjínħin sín la chrókónohará chrókjuátęherá nkexrí tsixro jnkojnko chojni.

Kjuixin nixja ch'ín Pablo

7 Kíchóni Tíquico, mé ijnko nkexro jína tjinkĩtsa tí janhan ch'ehe ĩnchéni xřa, mé tsjiji ch'án tsochrónka ch'án nkexrí tjén janhan.

8 Méxřa kuétuanħan ch'án tsjiji ch'án tí tjejerá kíxin tsoňohará kíxin nkexrí tjejóni kíxin chrókócháhará.

9 Jehé ch'án la ko křaxin ch'ín Onésimo mé tjuèheni kíchó ni la ko jehe ch'án mé křaxin jína ch'e ch'án xřa, la mé tsjijitsjehe sín tí jahará. Jehé ch'ín Onésimo mé sín chjasánřa. Jehé sín mé tsochrónka sín kíxin nkehe sítónhen tí tjejóni ntihi.

10 Ch'ín Aristarco mé jnkokóá tjechjinakian ch'án ntęechiso mé nixjahará ch'án la ko křaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénřa tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína.

11 Křaxin nixjahará ch'ín Jesús, křaxin tĩkĩtęxín sín ch'án Justo. Jehó tí sín a mé sín judío tinkáchónki Cristo, a ntá ijie tjinkĩtsa sín tí xřa tjet'a la chrónkaxin sín nkehe kuente tí kjuachaxin kuente Dios. La tí sín a mé imá kjuinchechána sín tí janhan.

12 Ch'ín Epafras nixjahará ch'án. Mé jehe ch'án ch'ehe ch'án xřa Cristo la jehe ch'án mé sín chjasánřa. Jehé ch'án jnkochríxin chrónóęęę ch'án Dios tjinkaon ch'án kíxin kaín asánřa chrókuinkachónkirá Dios éxi tjinkaon ch'án.

13 Ó nõna kíxin ch'ín Epafras la tóxakonhen ch'án kíxin tí jahará la ko tí sín tjejó tí chjasin Laodicea la ko Hierápolis.

14 Ch'ín Lucas, mé tí ch'ín ch'e xřoan, la křaxin nixjahará ch'án la ko křaxin ch'ín Demas nixjahará ch'án.

15 Nixjehérá tí sín kíchó ni tjejó chjasin Laodicea la křaxin nixjehérá tjan Ninfas la ko tí sín tójnksé ntęę tjan.

16 Tíó tsjixin sįnchekuáxinřá tí xroon tsíkjihi tí tjejerá ntiha la ichř'anřá xroon sátsji sįnchekuáxin tí sín tjejó nįnko chjasin Laodicea la ko křaxin sįnchekuáxinřá tí xroon tsíkjihihi tí jehe sín tíó tsjiji tí xroon tí tjejerá.

17 Křaxin chęnkará ch'ín Arquipo kíxin chrókjuincheiteyá ch'án jína tí xřa tsíkjanjon ĩnchéni sich'e ch'án.

18 Janhan Pablo tjaná křinxian tí palabra nixjahará. Jahará chróxráxinkáonřa kíxin janhan la tjechjina la Dios mé chrókjuintayaonřa. Amén. Ó tjen.

Xroon saoxín ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nínko chjasin Tesalónica kixin jnkokóá tinkáchónkini It'eni Dios la ko Ìnchéni Jesucristo. Kjuasáyé It'eni Dios la ko Ìchéni chrók'uejorá.

Tí sín ókjé chjasin mé kjuíncheyóhé sín tí sín Tesalónica

² Jnkoyaxón chjeheni Dios kjuasáya la ko t'ákjénxinni tí jahará kaín rá kixin jehe ch'án mé chrókuinkitsa ch'án tí jahará.

³ Tió nixjeheni It'eni Dios xraxinkaonni kixin kaín asánrá kuítékáonrá Ìnchéni, a ntá tjejoch'erá xrá la ko imá tjuèhérá kichuárá ntá jnkokóá tjejochonhénrá tsokjan Ìnchéni Jesucristo.

⁴ Kíchóni jahará, imá tjuahará Dios la ó noheni kixin jehe ch'án tsíkjeýará ch'án tí jahará.

⁵ Na mé xíkaha tió kjuíjini chjasánrá kjuákoḥaráni tí tan jína nixin tsaáxinni chrónkani na jehya iténi ó. Náhí. Kjaxin kjuachaxién Nchakuen Dios kjuákoḥxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jína kixin nkexrí k'uéjóni tí tjejorá kixin xíkaha chrók'uejorá chrókuákoḥxinná.

⁶ Mé xíkaha kjuíncheyóhérá tí jeheni la ko kjuíncheyóhérá tí Ìnchéni Jesucristo. A ntá tió kuínhínrá tí itén Dios ntá kaín asánrá kuínkachónkirá Ìnchéni la ko kócháhará kixin tí Nchakuen Dios mé t'etueñhen asánrá kjónté nchónhya nkehe k'uatsínkará.

⁷ Mé xíkaha kjuákuexinná kaín tí sín tinkáchónki Ìnchéni ntiha estado Macedonia la ko tí sín estado Acaya.

⁸ Jahará kjuákoḥxinná tí itén Dios la jehya jehó estado Macedonia la ko tí estado Acaya kjuákoḥxinná. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya í jnko nkehe naxá chróchronkani,

⁹ kixin ijíe jehe sín mé tjejóchronka sín kixin nkexrí kjuíjini chjasánrá a ntá kaín rá kjuánjonrá kjuachaxin k'uéjóni la ko kuítékáonrá tí itén Dios kjuákoḥaráni la ntá kuítóhérá kaín tí nkehe tsíkjanoya kixin ntá kjuankixinná kuínkachónkirá Dios tjechón chaxín.

¹⁰ La ko kjaxin tjejóchronka sín kixin jahará tjejochonhénrá tsokjanxin nkaya nkajní tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókuasótéxinhyani tí nkehe jínahya chrókuasótéxinni itsi.

2

Tí xrá tsíkjih'e ch'ín Pablo tí chjasin Tesalónica

¹ Kónohará kaín rá kichó ni kixin jehya chónkó kjuíjini chjasánrá.

2 Ó kónohará kixin senó tí sín chjasin Filipos k'uékjinchekjasóteni sín la ko k'uék'ántaxínhinni sín. Kjánchó Dios mé kjuínkítsa ntá chrakonhyani kjuakoharáni tí tan tsaáxinni kuènte Dios kjónté imá k'uéninkakonhenni sín.

3 Kónohará kixin jehya ntoáhya kjuakoharáni la ko jehya ijnko nkehe náxrxjónhya kjuakoni la ko kjuít'ayahyaráni ninkehó.

4 Náhí. Dios mé kjueyá ch'án tí jeheni kixin chrókjuakoni tí tan tsaáxinni, mé xikaha ntoá tjakoni. Jehya kixin chojni ó nchechéheni. Náhí. Nchechéheni Dios tí nkexro nohe nkehe tónhen asénni.

5 Ó nohará kixin kjuích'iyaxínhyani itan imá náxrxjón kixin xikaha chrókuakitsjexínni chichaon chrókjuachani. Náhí. Dios la ó nohe ch'án kixin xikaha kjuích'eni.

6 Tjeyáhyani kixin chojni chrókjuikosáyeheni sín la á jahará la ó í so chojni. Náhí, xikaha ch'eni, kjónté chóntani kjuachaxin chrók'uetuanhanráni kixin chrókjuánjonrá nkehe chrók'uáyéheni kixin jeheni ch'ehe ni xra Cristo.

7 Jnkojína k'uénixjaharáni k'uék'ejóni. Éxí yóhe ijnko iné xjan t'àyakonhen xjeen kixin ts'ánki xjan mé xikaha jeheni k'uáyakonhanráni tí jahará.

8 Imá tjuáhará ntá jehya jehó tí itén Dios chrókjuakoharáni. Náhí. Kjónté chrók'uenxínni tí tjakoharáni kixin xikaha imá tjuáhará.

9 Kíchóni, chrórxaxinkáonrá kixin tió k'uéjóni chjasánrá la mé nchónhya xra kjuích'eni nchakotjin la ko tie ntá kjuachani chichaon k'uénaxínni nkehe sineni kixin tjinkakonhyani kixin chrótjáharáni xra chrókjuánjonrá nkehe chrókjoneni nchakrohe k'uéjóni nihi kjuakoharáni itén Dios.

10 Jahará la ó nohará la ko ó nohe Dios kixin chaxín jína k'uéjókóaráni jahará chojni tinkáchónki Ìnchéni. Nijnko nkexro ts'ekahyani jje kixin ichrén nkehe jínahya chrókjuích'eni.

11 Jahará ó nohará kixin kjuakoharáni la ko kjuínchechéheni tí jahará jnkojnkórá éxí ch'e ijnko it'é xjan tjuéhe xjeen ch'án.

12 La ko k'uetuanhanráni kixin jína chrók'uejorá éxí tjinkaon Dios chrók'uejó tí sín tinkáchónki ch'án kixin jehe ch'án ó k'uíyáhará ch'án kixin chrók'uáyéherá tí kjuachaxin kuènte ch'án.

13 Méxra jnkochríxín tjancheheni Dios kjuasáya kixin tió kuínhínrá tí tan jína kuènte ch'án kjuakoharáni na ntá kjuátsoanrá kixin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxitóxin ntiará.

14 Mé xikaha jahará kíchó ni kjuasótiará kónínkakonhanrá tí sín chjasánrá éxí yóhe kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankixin kuinkáchónki sín Ìnchéni ntá tí sín judío chjasén sín mé kjuankixin sín kónínkakonhen sín chrók'óyán sín.

15 A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuích'e sín la kónínkakonhen sín kaín chojni. A ntá Dios la kóxrjienhya ch'án kixin xikaha kjuích'e sín.

16 A ntá tjinkaonni kixin chrókjuakoheni tí sín jehya judío tí tan jína chrókuááxin sín a ntá tí sín judío tjinkakonhya sín chrókjuakoni. Na mé xikaha imá nchek'ánki sín tí jje kuènte sín. A ntá xikaha kjuích'e sín ntá Dios sínchekjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án inaá tí sín chjasin Tesalónica

17 Kíchóni, tió kuítõhenni tí jahará a ntá kjónté ókjé k'uéjóni la k'uéxraxinkaonni kaín asénni tí jahará la ko imá tjinkaonni chrókjuijitsjeheni tí jahará inaá.

18 Na mé xíkaha janhan Pablo itsjé veces mé tjínkavan chrókjuasántsjahá tí jahará, a ntá tí ch'ín Tsochren mé k'uínkakõnna ntá xitjahya tsjasán.

19 ¿Nkehe tsonhen tí xrá tjejóch'eni tjejóchõenxinni la ko nkekuènte tjejóchéheni? Jahará mé tsochëxinni tió tsi Ìnchéni Jesucristo kixin kuítekáonrá ch'án.

20 Méxrá jahará mé kóchëxinni kixin kuítekáonrá.

3

1 Ntá imá kóxakonhenni. Ntá kjuenkayáxinni kixin chrókójina jehóni chrókuítõhenni chjasin Atenas

2 Na ntá ichr'ánni tí kíchó ni Timoteo a tsjijitsjehe ch'án tí jahará kixin kjaxin ixrá kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén Ìnchéni la ko sinchechéhe ch'án asánrá

3 Kixin tsqrxjéhya asánrá má kixin tí kjuaxróxinhya tjejó'tsínkará. Kixin xíkaha ó nohará kixin t'ichjánxìn tsjasótéxinni tí xrá kuènte Ìnchéni.

4 Naxá k'uéjóni jnkokoá ntiha la ó tjonkará kixin kaín ni kjuaxróxinhya tsonhenni tsjasóteni. A ntá jie la ó nohará kixin chaxín xíkaha kónhen.

5 Méxrá imá kóxakonna ntá ichr'an kíchó ni Timoteo kjuijitsjehe ch'án nkexrí tjejórá, á naxá tinkachónkirá Ìnchéni o ách'e ch'ín Tsochren chrókjuachroerá chrókuítõhérá tí ntje Ìnchéni a ntá chrókóchónkó kaín tí xrá kjuich'eni kjuakoharáni.

6 Na ntá ó kjanxìn ch'ín Timoteo chjasánrá Tesalónica chrónka ch'án kixin jina tjejórá naxá tinkachónkirá Ìnchéni, la ko naxá tjejórá tjuèhérá kichuára la ko chrónka ch'án kixin xraxinkáonrá tí jeheni tjínkáonrá chrókjuijitsjeheni tí jahará. Kjaxin jeheni xíkaha tjinkaonni chrók'uikonni tí jahará.

7 Mé xíkaha kíchó ni tjejó'tsínkani kjuaxróxinhya ntihi na ntá kjónté kóchéhe asénni kuínhinni kixin kaín asánrá naxá tinkachónkirá Ìnchéni.

8 A ntá kuínhinni xíkaha kixin jina tjejórá naxá tinkachónkirá Ìnchéni Jesús a ntá antsí kóchéheni.

9 Ntá imá tsjancheheni Dios kjuasáya kixin xíkaha imá chéhe asénni kixin tí jahará tinkachónkirá ch'án.

10 Tie la ko nchakotjìn chronõeheni Dios kixin tsjanjon ch'án kjuachaxin tsjijitsjeheni tí jahará inaá kixin naxá t'itjáyan iso nkehe chrókjuakoharáni naxá chrók'uítjára nkexrí jina chrókuinkachónkirá Ìnchéni.

11 Tjejó'tjancheheni T'èni Dios la ko Ìnchéni Jesucristo kixin chrókjuinkitsani ch'án chrókjuijitsjeheni tí jahará

12 la ko tjancheheni Ìnchéni kixin chrókjuinkitsa ch'án tí jahará kixin antsí má chrótjuèhérá kichuára la ko chrótjuèhérá kaín xín chojni éxi yóhe tjuàhará.

13 Tjancheheni ch'án kixin sintaxraxinkaonrá ch'án kixin kaín asánrá chrókuítekáonrá ch'án kixin ntá tsochóntahya asánrá ninkehó jie nkayakon It'èni Dios tió tsokjan Ìnchéni Jesús tsíkao ch'án kaín tí sín ó tsíkótjóá.

4

Nkexrí tóxrjnhñ Dios chrók'uejóni

1 Jahará kichó ni chronóaharáni la ko ntaxraxinkaonráni tí kjuachaxin ihñié Ìnchéni Jesús kixin jína chrók'uejorá tinkachónkirá Ìnchéni éxí tjejoch'erá jie kixin éxí kjuakoharáni. Mé xikaha jína sinchechéhérá Dios.

2 Ó nohará tí nkehe kjuakuaxinráni kjuachaxin kuènte Ìnchéni Jesús.

3 Tí nkehe tjinkaon Dios kixin jína tjóá chrók'uejorá la ko chrókjuásinkoahyará jie í jnko chojni chjin ókjé.

4 Jnkojnkorá chrókónohará chróchontará jnkojnko ichjiánrá la ko jína chrók'uejorá chrótjuèhérá kichuárá.

5 Jehya kixin chrókjuakérá asánrá tí nkehe jínahya chrókjuich'erá éxí ch'e tí chojni chónhya Dios.

6 Nijnkorá chrókjuich'iyehérá ichjién kichuárá xikaha kixin Ìnchéni mé imá sinchekjasóte ch'án tí chojni xikaha sich'e mé xikaha kjuíntaxraxinkaonráni senó.

7 Dios mé k'uíyeheni ch'án kixin jína chrók'uejóni, jehya kixin naxa chrókjuasinni jie.

8 A ntá tí sín chóntheya kjuasáyé tí nkehe tjakoni na mé jehya kixin chóntheya sín kjuasáyé chojni. Náhí. Chóntheya sín kjuasáyé Dios, tí nkexro kjuanjon tí Nchakuen chóntani.

9 A ntá tí tjuèhérá kichuárá la í t'ichjánxinhya naxa chrókjinni tsochronkani kixin nkexrí chrótjuèhérá kichuárá kixin jehe Dios mé tjetjakohará ch'án nkexrí chrótjuèhérá kichuárá.

10 Xráxín xikaha tjejoch'erá tjuèhérá kaín tí sín kichó ni tjejó estado Macedonia. Kjánchó chronóaharáni kichó ni kixin antsí má chrótjuèhérá kichuárá.

11 Tóxakonhanrá kixin kjuaxróxin chrók'uejorá. Jnkojnkorá nohará nketí xra chrókjuich'exínrá tjárá éxí k'ueŧuñhanrání.

12 Na mé xikaha chrók'uikon tí sín chónhya Dios ntá chróchóntahará sín kjuasáya la ko chrók'uitjáyanhya ninkehó nkehe chrókuicháxinhanrá.

Itsi Ìnchéni Jesús

13 Kichóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankamará sín chrókóyóahyará tí sín tinkáchónkihya sín Ìnchéni naxa chónhya sín kixin chróxechón sín inaá.

14 Kuítekaonni kixin ik'uén Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

15 Méxra chénkani ti jahará tí nkehe kjuako Ìnchéni kixin tí naxa tjejóchónni tió tsi ch'án na kjónté naxa tsitónxinhyani ntia, naxa tsochónhenni tí sín tsík'en.

16 Jehe Ìnchéni mé ts'inkajinxin ch'án nkaya nkajní la ko itsen tsonixja ch'án kixin tí kjuachaxin jie kuènte ch'án la ko ts'eya tí ángel t'etqan la ko tsontáchro tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín.

17 A ntá chr'éxin kaín xínni tjejóchónni la ko kaín xín tí sín tsíxechón mé jnkokoqa tsochrinni kixin tí kjuachaxin jie kuènte Ìnchéni. A ntá xrikjan tjuí tsoxetani ch'án. Mé xikaha ts'ejókoni ch'án jnkochríxín.

18 Méxra xikaha chrókjuínchexéxínrá kichuárá tí tan í kixin xikaha tsonhen tió tsokjan Ìnchéni.

5

¹ **A** ntá tí yaon tsonhen tíhi kichó ni t'ichjánxínhya naxa tsokjinni í jnko nkehe tsinhínrá.

² Jahará ó nohará jína kixin titàya itsi tí yaon tsokjan Ìnchéni éxí yóhē chrókui jnko xíchēe tí tie a.

³ Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrinahya titàya itsi tí kjuaxikaon jié la ko kjuachrakon mé ts'itjáyanxín tí kjuachón chróchónnta sín éxí yóhē ijnko tjan tjejá xrinahya titàya tsjankíxin ts'óntáki tjan kixin sinchekokjíhi tjan xjeen tjan na mé jehe tjan xitjahya tsontácho tjan “Náhi”, mé xíkaha jehe sín chónthaha sín nkerí tsaáxin sín.

⁴ Ntá jahará kichó ni sítiéhya tjejorá ntá chróchrakonhyará tí yaon itsi Ìnchéni. Tí náhi chróchrakonrá éxí chrókui jnko xíchēe chrókjuintachrakonrá.

⁵ Ntá jie kaín rá mé tjejorá tí ntia t'inkáséyan. Jeheni la jehya tjejóni tí ntia sítié a.

⁶ Méxra xíkaha chrók'uejójuahyani éxí tjejójua tí sín í so na mé chrók'uejótsheni chrókjuenkayáxiní jína.

⁷ **A** ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a.

⁸ **A** ntá jeheni na tjejóni tí ntia t'inkáséyan t'ichjánxín kixin jína chrók'uejóni chrókjuasinhyani jié. Chrókuinkáchónkini Ìnchéni la ko chrótjuéhēni ch'án. Ntá jeheni na Ìnchéni ts'ayakonhēni ch'án tsaáxiní ch'án éxí tí ch'ín soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejóchónhēni itsi Ìnchéni tsaáxiní ch'án na mé éxí tí ch'ín soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án.

⁹ Kjueyáhya Dios tí jeheni kixin chrókjuinchechjasóteni ch'án. Náhi. Kjueyá ch'án tí jeheni kixin chrókuaáxiní Ìnchéni Jesucristo.

¹⁰ Jehe Jesucristo mé k'uenyákonhēni ch'án kixin chrók'uejókoni ch'án jnkochríxín kjónté naxa tjejóchónni o kjónté ó tsík'enni tió tsokjan ch'án.

¹¹ Méxra xíkaha chrókjuinchechéhérá kichuárá la ko chrókjuínkĩtsará kichuárá kixin jína chrók'uejó sín éxí xráxín tjejoch'erá.

Ch'ín Pablo mé nhexraxinkaon ch'án tí sín tinkáchónki Cristo

¹² Kichóni chronoàharáni kixin chróchontehérá kjuasáyé tí sín tjejóch'e sín xra kuènte Dios ntiha tjejótjitaón sín ntia chrónka sín itén Ìnchéni.

¹³ Na mé chróchontehérá sín kjuasáya la ko chrótjuéhérá sín má kixin tí xra tjejóch'e sín. **A** ntá jahará kaín rá jnkojína chrók'uejokoará kichuárá.

¹⁴ Méxra tétuanhanráni kichó ni kixin chrókjuéntuéhérá tí sín tjinkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuínkĩtsará tí sín naxa noehya sín jína la ko chrókóninkákauénhyará ninkexró.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejotjenkayáxinrá.

¹⁶ Méxra nchechéhérá asánrá jnkochríxín.

¹⁷ Chrókjuítóehyará chrónixjehérá Dios jnkochríxín.

¹⁸ Kjónté ichrén nkehe chrókónhanrá la chróchjehérá Dios kjuasáya kixin xikaha mé tjinkaon ch'án chrókjuákoxinrá kixin tinkachónkirá Ìnchéni Cristo Jesús.

¹⁹ T'ók'ankahará tí xrohi t'inkáséyanxín Nchakuen Dios.

²⁰ Chonteherá kjuasáyé nkehe tjako tí sín kíchó ni chronkaxín sín kjuachaxin kuènte Nchakuen Dios.

²¹ Chrótsjehérá jína tí nkehe tjejóch'e sín. A ntá tí jína na chrókuítekáonrá.

²² Chrókuítóhéra kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'àyakonhen ch'án nchakuanrá la ko asánrá la ko cuerpo kuéntará kixin tsochóntahya ninkehó jìe tió tsi Ìnchéni Jesucristo.

²⁴ Dios tí nkekro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehé ch'án sín la ko tjanchehe ch'án Dios kixin chrókuincheyaon tí jehe sín

²⁵ Kíchóni chrónóehérá Dios kixin tsjinkitsani ch'án kaín ni.

²⁶ La ko nixjehérá kaín xín tí sín kíchó ni ntiha tsehérá tja sín.

²⁷ T'etoanxínni tí kjuachaxin kuènte Ìnchéni kixin nchekuáxinrá tí xroon chr'anhánrá tshinhi kaín xín tí sín kíchó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni n̄nko chjasin Tesalónica kixin jnkokoqá tinkáchónkini It'éni Dios la ko Ìnchéni Jesucristo.

² Kjuasáyé It'éni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoxén ch'án tí ijíé chojni tió tsokjan Ìnchéni Cristo

³ Kichóni chrókjuancheheni Dios kjuasáya jnkochŕixín kixin tí jahará. Na mé jína x̄ikaha chrókjuich'eni kixin tinkák'ánkí tí tinkáchónkirá Ìnchéni Jesús la ko tinkák'ánkí tí tjuèhérá kichuárá tjejorá ntiha.

⁴ Ntá chéheni chenkaní tí sín kichó ni kaín tí n̄nko Dios kixin naḡa tjákoḡinrá kixin naḡa tinkáchónkirá Ìnchéni kjónté síin chojni nínkakonhanrá la ko kjónté t'atsínkará itsjé kjuaxróxinhya.

⁵ Tiha mé tjákoḡinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra x̄ikaha tjejtjasótéxinrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie.

⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnchéni Jesús ts'inkajinx̄in ch'án nkaya nkajní ts̄ikao ch'án kaín tí sín ángel t'et̄oan kuènte ch'án na mé ts̄ikao ch'án xrohi nene.

⁸ Mé x̄ikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína kuènte Ìnchéni Jesucristo chrókuaáxin sín.

⁹ A ntá tí sín kuítekakonhya mé tsjasóte sín jnkochŕixín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'et̄oanxín ch'án.

¹⁰ X̄ikaha t̄onhen tí yaon itsi Ìnchéni tsjikosáyehe ch'án kaín x̄in tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuènte ch'án. Mé x̄ikaha kjaxinrá jahará kixin ó kuítekáonrá tí nkehe kjuak̄oḡaráni.

¹¹ Mé x̄ikaha jnkochŕixín tjancheheni Dios kixin jína chrók'uejorá éxi tjinkaon ch'án chrók'uejó tí sín kjuéyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuink̄itsará ch'án kixin chrókjuachará ch'erá kaín tí x̄ra jína tjinkáonrá chrókjuich'erá kixin tinkáchónkirá ch'án.

¹² Mé x̄ikaha kaín x̄inrá tsjikosáyehérá tí ihñié Ìnchéni Jesucristo la ko jehe ch'án mé kjaxin tsjikosáyahará ch'án kixin tinkáchónkirá ch'án. Mé x̄ikaha kjuasáyé Dios la ko Ìnchéni Jesucristo kixin kuikonóḡeheni ch'án.

2

Tsoxoxín ijnko ch'ín jínahya

¹ Kichóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra x̄ikaha chrónóḡaráni

² Kíxin chrókjuítóxínhyará tjoka tí nkehe chrókjuenkayáxinrá, la ko ní chróchrakonhyará tí chróntácho jnkojín nkexro tónohe sín kíxin ó kjuixraká tí yaon itsi Ìnchéni, la ko chróchrakonhyará xíkaha chrókuínhínrá chróchronka ijnko chojni tjako, la ko chróchrakonhyará tí tsochronka sín kíxin ó k'uáyéhe sín ijnko xroon éxí jeheni tsíkjanjonni chrónka kíxin xíkaha tsohnen.

³ Títóéhyará kíxin jnkojín nkexro chrókjuít'ayahará xíkaha. Naxa tsihya tí yaon ntá senó itsjé chojni tsoínkakonhen sín Dios, la ko tsoñoxín ijnko ch'ín jínahya chóna jje, na ntá tíha mé tsjasóte jnkochríxín.

⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxín ch'án nkaxenhen tí njnkoje Dios kíxin jehe ch'án mé sich'éna asén ch'án éxí Dios tí jehe ch'án.

⁵ ¿Á xráinkákonhyará kíxin xíkaha k'uéxrjanka senó tí naxa k'uéjóni jnkokoá?

⁶ Ntá jahará ó nohará nkehe tí kjuachaxin naxa chónthehe kíxin naxa tjexrakáhya tí yaon tsoñoxín tí ch'ín jínahya.

⁷ Ntá jie imó ch'e xra tí kjuachaxin jínahya. Kjonté naxa t'itjáyán kíxin sáchrókjuí tí nkexro chónthehe.

⁸ A ntá tí ch'ín jínahya tsoñoxín ch'án. Ntá tió tsi Ìnchéni Jesús ntá tí itén ch'án ts'axrxén ir'va ch'án ó mé ts'enxín tí jínahya a kíxin mé xíkaha sinchek'itjáyánxín ch'án tí jínahya tí kjuachaxin jie tsjkaó ch'án.

⁹ Méxra tí ch'ín jínahya mé tsjkaó ch'án tí kjuachaxin kuénte ch'ín Tsochren la mé xíkaha tsochóna ch'án kjuachaxin jie tsjakoñín ch'án sich'iyaxín ch'án tsjasín ch'án kjuaxroan ntoáhya.

¹⁰ Mé xíkaha kaín nkehe jínahya sich'iyexín ch'án tí sín xráxín ts'itjáyán sín kíxin chrohya sín chrókuitekaon sín tí tan chaxín ntoá chrókuaáxín sín.

¹¹ Méxra tsítóhe Dios tí jehe sín kíxin tsitekaon sín kaín nkehe chaxínhya

¹² Kíxin ntá tsjasóte kaín tí sín kuítekakonhya sín tí tan chaxín chrókuaáxín sín na mé antsí kóxrjínhín sín chrókjuasín sín jie tsjasótéxín sín.

Dios mé kjueya tí jehe sín kíxin chrókuaá sín

¹³ Ntá jeheni chrókjuancheheni Dios kjuasáya jnkochríxín kíxin jahará kichó ni chojni tjuahará Ìnchéni kíxin tí tsíkjeýá Dios tí jahará kíxin senó chrókuaáxinrá tí Nchakuen ch'án tsoñjuáxinrá la ko tí itén ch'án chaxín ntoá kuítekaónrá.

¹⁴ Méxra xíkaha k'uíyahará Dios kíxin chrókuaáxinrá tí itén ch'án tjakoni kíxin ntá tsjachará ts'ikonrá tí kjuachaxin jie kuénte Ìnchéni Jesucristo.

¹⁵ Mé xíkaha kichó ni, jína chrók'uejorá chrók'uitjáyánhyará tí nkehe kjuakoharáni tió k'uéjóni jnkokoá la ko tí nkehe chrónka tí xroon ikjinni k'uayéhérá.

¹⁶ Ntá Ìnchéni Jesucristo la ko It'éni Dios na mé tí nkexro kjuasáyé ch'án tjuéhe ch'án tí jeheni la ko nchechéhe ch'án asénni jnkochríxín la ko kjuasáyé ch'án tjejóchónhenni itsi Ìnchéni

¹⁷ na mé sinchechéhe ch'án asánrá la ko tsjanjon ch'án kjuachaxin kíxin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjéherá Dios kíxin tsjinkítsa kaín ni

¹ Méxra kjuixixín chrónóaharáni kíchó ni kixin chrókjuanchehérá Dios kixin chrókjuinkĩtsa ch'án tí jeheni kixin tjoka sáchrókjuikjakoni itén Ìnchéni nkuixín kixin ntá tsinhin chojni la tsjikosáyehe sín ch'án éxí yóhë kuítekáonrá jahará.

² Kjaxin nixjehérá Dios kixin chrókjuinkĩtsani ch'án kixin kohya nkehe chrókónhenni tí síin chojni jínahya nínkakónhenni kixin kénhya sín tinkáchónki Ìnchéni.

³ Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkĩtsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá.

⁴ Ó noheni kixin Ìnchéni la tsjinkĩtsa ch'án tí jahará kixin naxa sich'erá xra éxí k'uetuñhanráni.

⁵ Ìnchéni tsjinkĩtsará ch'án tsonohará kixin Dios la tjuahará ch'án la ko tsjinkĩtsará ch'án kixin chrókóninkákonhyará éxí kónínkakonhya Cristo.

T'ichjánxin chrókjuich'eni xra

⁶ Kíchóni t'etoanxínni tí kjuachaxin ihnié Ìnchéni Jesucristo kixin chrók'uaxrjekjanxínrá tí sín kíchó ni tjinkakonhya sich'e xra la ko xrihya sín éxí kjuakoqharáni.

⁷ Ó nohará kixin nkexrí chrók'uejorá chrókjuakoqxinrá éxí k'uejó tí jeheni kixin tí k'uejókoaráni la jehya kixin kjuích'ehyani xra.

⁸ Jehya kixin kjóneni niqtjé jnkojín nkexro ntá chrókjuenkañyani. Náhí. Kóxakónhenni nchaqotjin la ko tie kjuích'eni xra kixin ninkehó chóntjāxinhanyi tí jahará kixin chrókjuánjonrá tí nkehe chrókjóneni. Náhí.

⁹ Kjónté chóntani kjuachaxin chrókjuanchaharáni kixin chrókjuinkĩtsará tí jeheni kjánchó jeheni na kjuích'eni xra kjuakoqxinni kixin xikaha jahará chrókjuích'erá xra.

¹⁰ Kixin tí naxa k'uejóni jnkokoá ntiha k'uetoanni kixin: Tí nkexro tjinkakonhya ch'e xra la kjaxin chrókjonehya.

¹¹ Ó kuínhinni kixin tjejorá jnkojínrá ninkehó xra ch'ehyará a ntá kjuach'ia ó xrikoará.

¹² A ntá tí kjuachaxién Ìnchéni Jesucristo t'etoanxínni la ko chrónóexinni tí sín a kixin chrókóninkakonhya sín chrókjuích'e sín xra kixin chrókjuacha sín chichaon chrók'uite tí nkehe chrókjone sín.

¹³ Ntá jahará kíchó ni, chrókóxrjéhyará chrókjuích'erá tí nkehe jína.

¹⁴ A ntá tí tjen jnkojín nkexro titekakonhya tí nkehe t'etoanxínni tí xroon i la tsjehérá jína nkexro tíha la ntá chrók'uitoahyará ch'án la ntá chrókósuèhe ch'án.

¹⁵ Kjánchó jehya kixin chrókjuánjonkoará ch'án. Náhí. Chrókjuínchexraxinkáonrá ch'án jnkojína éxí ijnko chojni kíchó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochríxin kjónté ichrén nkehe chrók'uatsínkará. Jehé ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xikaha chrókjuátsanxínrá tí letra kaín carta tsíkjan.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexo nchekaá chojni. La ko kjaxin k'uetuanna Ìnchéni Jesucristo tí nkexo tjejóchónhenni itsi.

² Ikjian tí xroon chr'anhan jaha Timoteo. T'íkuañ éxí xjanna tí jaha kixin jaha tinkachónkia Cristo Jesús. Kjuasáyé It'èni Dios la ko Ìnchéni Jesucristo chrókjuintayavan ch'án la ko chrókuiikonóaha ch'án kixin kjuaxróxin tsjak'e jaha.

Chrókjuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxí xrjannóaha tió sákjuia estado Macedonia la mé jaha chrókuitoaha tí chjasin Éfeso la ntaha chrókuetuñhén iso tí sín ntiha kixin chrókjuakohya sín tí nkehe ntoáhya.

⁴ La ko chrókuetuñhén sín kixin chrókuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kañ tíha la í tsjinkítsahya kixin sinchexiteyéheni Dios kixin tinkáchónkini ch'án.

⁵ Tí nkehe tjinkaonni la chrótjuèheni kichó ni kañ ni kixin ó kótjóá asénni la ko ó noheni kixin jina tjenkayáxinni la ko kañ asénni tinkáchónkini Cristo.

⁶ Iso sín la kjuíchròe sín kixin itjo tí nkehe chónkó.

⁷ Tjinkaon sín chrók'óna sín maestro chrókjuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jina tí chrokjuakoni éxí tjinkaon Dios.

⁹ Ó noheni kixin tí sín tjasinhya jié t'ichjánxienhya sín tí ley tsík'etqan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jié la ko tí sín chóntahya kjuasáyé Dios la ko tí sín t'óyán it'é la ko iné sín la ko kañ tí sín tjáya.

¹⁰ La ko tí sín tjasinko jié ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kañ tí sín ch'e tí nkehe jínahya la nínkakonhen tí nkehe jína tjakoni.

¹¹ Tí nkehe tjakoni mé chaxín tí tan jina sinchekaá chojni la tí Dios tjetooan mé k'uetuanna kixin tsjàkua tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo kixin imá kjuínkítsana ch'án la ko k'uikon ch'án kixin jina sít'aha ch'án xra ntá chjina ch'án tí xra i.

¹³ Mé xikaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkihá sín la ko chrók'oyán sín. Kjónté la Dios imá kuikonóhe ch'án tí janhan kixin ó nohe ch'án kixin k'uékinkachónkihya janhan tí jehe ch'án la ko k'uéonahya nkehe tí xra k'uékjit'a.

14 Méxra Ìnchéni antsí má kjuíncheyaonna kixin ntá kjuanjon ch'án kjuachaxin kixin tsinkachónkia ch'án la ko tsotjuaha ch'án. Mé xikaha kaín ni chóntani tí kjuachaxin tinkáchónkini Cristo Jesús.

15 Tíhi mé chaxín la kaín ni chrókuitekaonni. Ikui Jesucristo chjasintajni kixin sincheakaá ch'án tí sín kjuasin jie. Ntá janhan mé antsí má kjuásian jie.

16 Kjóté xikaha kjuít'a la Dios antsí má kuikonóna ch'án tí janhan kixin xikaha kjuakoxin Jesucristo kixin kóninkakonhya ch'án. Mé xikaha tsjákuaxian kaín nkexro tsitekaon tí jehe ch'án kixin tsochóna sín kjuachón jnkochrírín.

17 Ntá jnkochrírín tsochónteheni kjuasáyé tí Rey t'etoan. Jehe ch'án mé ijnko nkexro xráxín tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

18 Timoteo, éxí xjanna t'ikuán tí jaha, la kaín tí xra i tjaha kixin tsjanjonkoa tí jínahya la tsjacha kixin tinkachónkia jína Ìnchéni la ko tjenkayáxian tí nkehe jína. Mé xikaha sinchexiteyá tí nkehe kuínhín senó kixin tí sín kichó ni chrónkaxín ihnjé Dios.

19 Í so sín la kjuenkayáxinhya sín tí jína ntá kjuíchròe sín kuítghe sín tí nkehe tinkáchónki sín.

20 Mé xikaha kónhen ch'ín Himeneo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xikaha ts'itja sín kixin í ts'ántaxíenhya sín Dios.

2

Nkexrí chrónixjeheni Dios

1 A ntá saxín la xrjanóaha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkítsa ch'án kaín xín chojni.

2 Chrókjuanchia sín kixin Dios imá chrókjuinkítsa ch'án kaín tí sín t'etoan la ko tí sín gobierno kixin ntá kjuaxróxin ts'ejóni la ko sinchexiteyéhéni Dios la ko ntoá ts'ejóni.

3 Xikaha mé imá jína la tóxrjínhjn Dios, mé tí nkexro tsaáxinni.

4 Jehe ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsonohe chojni tí nkehe chaxín ntoá.

5 Mé itjen jnkokoáxón Dios la ko itjen jnkokoáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasintajni.

6 Jehe Jesucristo mé k'uenyákonhenni kaín xínni, kjuenkayákonhen ch'án ijjení kixin tsaáxinni ch'án. Táha mé xiteyá tí tsintáchro Dios ósé kixin xikaha tsonhen ch'án.

7 Méxra tí xra mé kjueyána Dios kixin tsjíkákohá tí sín jehya judío kixin tsinkáchónki sín Jesucristo la ko tsonohe sín tí nkehe chaxín. Janhan mé tinkachónkia Cristo la xrjanka tí nkehe chaxín mé t'ayahya.

8 Méxra tjínkavan kixin kaín tí sín ntoa mé chrónixjehé sín Dios la chrókjuaya sín tja sín la chrókótjójá ásén sín la ko chrókóninkakonhya sín la ko chrókjuéhya sín kjuanínkaon.

9 A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxíhi sín nkehe tjete xroxrjò náxrjón la ko chrók'uitsahya sín ika imá tjete.

10 Íchá jína kixin tí chojni chjin chrókjuich'e sín tí xra jína éxí chrókjuich'e kaín tí sín tsíkjinchetjójá Dios.

11 Tí chojni chjin t'ichjǎnxin chrókuinhin sín itén Dios la chrónixjahya sín la ko chrók'uetǒanhya sín.

12 A ntá janhan tjǎnjonhya kjuachaxin kixin chojni chjin chrókjuako tí nchónhya chojni sín la ko tjǎnjonhya kjuachaxin chrók'uetǒenhen sín chojni ntoa. Jehe sín la tání sín chrók'uejó sín

13 kixin saoxín la Dios kjuích'éna ch'án tí ch'in Adán la ntá chr'éxin kjuích'éna ch'án tjan Eva.

14 A ntá ch'in Adán la ninkexró kjuích'iyehya ch'án. Náhí. Tí tjachjin mé tsíkitekakonhen tjan tí nkexro tsíkjich'iyehya tjan ntá xíkaha xránkixixin k'uixin jie.

15 A ntá tí chojni chjin la kjónté xíkaha kjuích'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejó tí sín t'etuenhen tí nínko

1 Ijnko nkehe chaxín tjonka. Tí nkexro tjinkaon sich'e xra kuènte nínko mé imá jína xra tjinkaon ch'án.

2 Tí ch'in chrók'uetǒan mé ntoá chrókjuak'e ch'án kixin kohya nkexro chrók'ueka ch'án jie la ko kjaxin chróchónta ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchónta ch'án kjuasáyé ch'án la ko kjaxin jína chrónixjehé ch'án tí nkexro tjiji ntǒe la ko kjaxin chrókónohe ch'án tí nkehe chrókjuako ch'án.

3 La ko kjaxin chrókókoanhya ch'án la ko chrókjuehya ch'án kjuanínkaon la ko kjaxin chrókóxrjienhya ch'án kixin chrókjuacha ch'án nchónhya chichaon. A ntá chrókójiehya ch'án la ko kjuaxróxin chrókjuak'e ch'án la ko chrókóxrjienhya ch'án chróchónta ch'án itsjé chichaon.

4 Jehe ch'án mé kjaxin jína chrók'uetǒenhen ch'án tí sín tjejó ntǒe ch'án la ko chrókjuentuéhe ch'án xjeen ch'án kixin tsitekaon xjan la tsjikosáyehe xjan it'é xjan.

5 Tí tsjachahya ch'án ts'etǒenhen ch'án tí sín tjejó ntǒe ch'án la ¿ntá nkexrí chrók'uetǒan ch'án tí nínko kuènte Dios?

6 Íchá jína kixin jehya ijnko nkexro na ntá k'uixenhen chrókjuako kixin tí nkexro na ntá k'uixenhen la imá chrókjuinchehnke ch'án la ntá chrókjuasin ch'án jie éxi kjuasin ch'in Tsochren ijie senó.

7 Kjaxin t'ichjǎnxin kixin kaín xín tí sín naxa tinkáchónkihya Ìnchéni mé tsochónta sín kjuasáyé tí ch'in t'etǒan a. Tí náhi la ts'eka sín ch'án jie ntá tí xíkaha la ch'in Tsochren tsjacha tsjachróe tí ch'in a ntá tsjasin ch'án jie.

Nkexrí chrók'uejó tí sín tsjinkítsa tí xra kuènte nínko

8 Kjaxin tí sín diácono ch'e xra kuènte nínko la kjaxin ntoá chrók'uejó sín kixin chróchóntehya sín kjuasáyé chojni. Kjaxin t'ichjǎnxin kixin chrókjuinchehixitáyá sín tí nkehe ntáchro sín la ko chrókókoanhya sín la ko kjaxin chróchóntiaxinhya sín itsjé chichaon chrókjuacha sín.

9 T'ichjǎnxin chrókónohe sín jína tí nkehe tinkáchónki sín kixin jehe sín chrórxaxinkaon sín á nchoxon tí xra ch'e sín.

10 Saoxín chrótsjehe kaín chojni á ninkehó jie chóntahya tí nkexro la ntá tí chaxín jína jehe ch'án la ninkehó jie chóntahya ch'án ntá jína ts'ixenhen ch'án tí xra kuènte nínko.

¹¹ La ko kjaxin tí chojni chjin mé chrók'uejò sín jína kixin chróchóna sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejò sín la ko chrókjuinchexiteyá sín kaín nkehe.

¹² Tí sín diácono la mé chróchóna sín jnkokoá ichjién sín la jína chrók'uetuenhen sín xjeen sín la ko jína chrók'uetqan sín ntoe sín.

¹³ T'ichjánxin ijnko xra jína sich'e sín kixin ntá tsjacha sín ts'áyéhe sín ijnko nkehe jína tsjanjon inchéni la ko kjaxin tsqsuèhya sín tsochrónka sín nkexri tinkáchónki sín Cristo Jesús.

Dios mé kjuínchenoheni tí nkehe k'uékiexínhyani

¹⁴ Tjínkavan tjoka chrókjuasántsjaha tí jaha kjánchó senó tsokjian tí xroon i.

¹⁵ A ntá tí tsoxrjenna isé ntá kjónté tsonoha nkexri chrók'uejò tí sín naxa kjéhya Dios mé tí sín t'óna njnkoé Dios tjechón. Jeheni kaín ni mé tjejót'ayakonhenni tí tan chaxín ntoá.

¹⁶ Ninkexró chróntáchrohya kixin chaxínhya tí nkehe tinkáchónkini mé ijnko nkehe imá jié tíha la ninkexró k'uénoehya tí senó a.

Dios mé ikui k'óna chojni;

ikui ch'án kjuakoxin ch'án kjuachaxién Nchakuen Dios chóna ch'án kixin jína tí jehe ch'án.

La ntá tí sín ángel mé k'uíkon sín ch'án

la kuenté chjasintajni mé ó kuínhin sín nkehe chrónka ch'án

ntá itsjé sín kuítekaon sín ch'án.

Ntá Dios k'uáyéhe tí jehe ch'án nkaya nkajní.

4

Tí sín kuítqhe tinkáchónkihya Cristo

¹ A ntá ntáchro Nchakuen Dios kixin tí chjina tsjeje chjasintajni mé iso sín mé tsítqhe sín í tsinkáchónkihya sín Inchéni la ntá tsitekaon sín nchakuen tí jínahya sich'iyehé sín la ko tsitekaon sín tí nkehe tjako tí sín demonio.

² Mé tsinhin sín tí nkehe tjako tí chojni tjuáhya la ch'ia sín. Kjónté imá tsjasin sín jje la í tsqsuèhya sín kixin éxí tsíchján tí tjenkayáxixín sín la í tjenkayáxínhya sín jína.

³ Jehe sín mé tjinkakonhya sín kixin chrókótehe chojni la ko kjaxin tjinkakonhya sín kixin chrókjóneni nto. A ntá jeheni ó noheni kixin Dios mé kjuích'éna ch'án kaín xín nkehe ineni la tjinkaon ch'án kixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni.

⁴ Méxra kaín xín tí nkehe kjuích'éna Dios la jína la kohya nkehe chróntáchroni kixin jehya jína sineni. Chrókjuancheheni Dios kjuasáya la ntá jína chrókjóneni

⁵ kixin tió tsoxrxinkaooni itén Dios la tsonixjeheni ch'án la ntá sincheyaon ch'án tí nkehe sineni.

Ijnko chojni jína ch'ehe xra Jesucristo

⁶ Jaha tjákohé tí sín kíchó ni kaín tí nkehe i la ntá xikaha imá jína sich'ehé xra Jesucristo la ko antsí tsjinkítsa ch'án ts'ánki kjuaxrexinkaon kuéntá tí tinkáchónkia tí tan kuènté ch'án la ko naxa tjákua tí nkehe jína ó xrákqha.

⁷ Jaha mé tahya kuenté tí cuento chónkó la ko tí nkehe ntoáhya tinkáchónki iso sín. A ntá jaha la chrókuítqéhya chrókuinkáchónkia Dios.

⁸ Tí chojni tsítan la jína tíha kjánchó antsí má tjeotan chrórxaxinkaonni Dios. Tíha la tsjinkĩtsa kixin jína xritjejóni ijie la ko kjaxin tsjinkĩtsa kixin ts'áyeheni kjuachón jnkochrín tió tsokjan Ìnchéni.

⁹ Kaín tíhi mé chaxín la kaín chojni chrókuitekaon.

¹⁰ Mé xikaha kjónté t'ántaxinhjinni chojni la jína ch'eni tí xrá i kixin tinkáchónkini Dios tjechón. Jehe ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'ichjánxin tsétoan la ko tsjàkua.

¹² Jaha chrókuítogéhya kixin chrokjuanoá sín kjónté naxá ntasoyá. Chrókuáqexián tí sín tinkáchónki Ìnchéni nkexrí chrónixja sín la ko nkexrí ntoá chrók'uejó sín la ko nkexrí chrótjuéhe sín Dios la ko nkexrí chrókuitekaon sín Ìnchéni la ko nkexrí tjóá chrók'uejó sín.

¹³ Nachrohe tsjasán la jaha sìnchekuáxian tí xroon itén Dios kixin tsinhin kaín sín la ko sìnchexraxinkávan kaín tí sín kichó ni la ko tjákohé sín.

¹⁴ Sìnchek'itjáyanyha tí kjuachaxién Dios k'uayéhé tió tí sín t'etóan kuènte ninko kjuachaxién Dios k'uejotja tja sín chrítaón ikjá.

¹⁵ Chrókóxakonhan chrókjuínchexiteyá kaín tíha kixin kaín chojni tsotsjehe sín kixin jína noha.

¹⁶ Chrókjuenkayáxian jína tí nkehe tjákua kixin jína chrókjuak'e jaha, chrókjuínchexiteyá kaín nkehe la ntá tí xikaha s'ich'e la tsaá jaha la ko tí sín tjejótinhin tjákua la tsaá sín kjaxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó táda. Náhi íchá jína chrónixjehé sín jnkójina éxi chrónixjehé it'á. La kjaxin tí sín ntasoá chrónixjehé sín éxi chrónixjehé kíchuá mero.

² A ntá tí sín ó nána la mé chrónixjehé sín éxi chrónixjehé iná xikaha. Kjaxin tí sín tjarisoá mé jnkójina chrónixjehé sín éxi chrónixjehé kíchuá mero la kjaxin chróchóntehé sín kjuasáya.

³ La ko kjaxin chrókjuínkĩtsa tí síchjin tsíkók'án la ko nchekjtonhén sín nkehe sine sín tí chaxín kohya nkexro tsjinkĩtsa sín.

⁴ A ntá tí chojni chjin tsíkók'án chóna xjeen o chóna ìnté, a ntá tí jehe sín mé chrók'uitja sín chrókjuinkĩtsa sín kixin sine tí sín kjéhya sín. Tíha mé chrókjuenkaxin sín tí it'é, iné sín kixin kjuínchek'ánkí sín, kixin xikaha mé jína tóxrjnhin Dios.

⁵ Tí tjan chaxín tsíkók'án na jehó tjan tjan tjan mé jehó Dios tinkáchónki tjan la imá chrónóehé tjan Dios tie la ko nchakotjin.

⁶ A ntá tí sín tsíkók'án ixri sín tjasin sín jje la kjónté tjejóchón sín la éxi tsík'en sín xikaha tjejó sín.

⁷ Tétuènhén tí sín kixin sìnchexiteyá sín kaín tíha kixin tsókohya nkexro tsjanchia jje.

⁸ A ntá tí nkexro tóxakuenhya kixin tí sín naxá kjéhya la ko kjaxin tóxakuenhya kixin tí sín tjejó ntøe ch'án mé xikahó tjáqoxin kixin ninkehó tinkáchónkihya ch'án Dios. Mé xikaha antsí chóna ch'án jje a ntá tí sín tinkáchónkihya Ìnchéni la kénhyó.

⁹ Tí ts'ínixín ihnié tí sín tsíkók'án la chrók'uinixín jehó tí sín chóna sesenta nánó la ko tí sín k'uéchóna sín jnkokqá xi.

¹⁰ Kjaxin chrókjuakoxin tjan kixin jina ch'e tjan xra la ko chrókjuakoxin tjan kixin jina kjuinckek'ánki xjeen tjan la ko kjaxin jina nixjehe tjan tí nkexro tjiji ntqe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuinkitsa tjan tí sín níhi la ko í so xra jina kjuich'e tjan.

¹¹ A ntá chrók'ueénixínhya ihnié tí sín tsikók'án naxa tsjéhya nánó chóna kixin tsonáchro asén sín kixin í jnko chojni ntoa tsotéhe sín inaá la ntá tsítóhe sín ixra kuénte Cristo.

¹² Ntá xikaha tsjasin sín jie kixin sinchexiteyáhya sín tí nkehe tsintáchro sín.

¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jina tí xikaha chrónixja sín.

¹⁴ Méxra tí sín tsikók'án naxa tjarisoá sín la íchá jina chrókótehe sín chróchóna sín xjeen sín la ko chrók'uàyakonhen sín ntqe sín. A ntá tí xikaha la tí sín nínkakonhan la chrókjontahya sín tí jaha.

¹⁵ A ntá iso tí sín tsikók'án ó kuítóhe sín tinkáchónki sín Ìnchéni kixin ch'ín Tsochren tsikjachròe sín.

¹⁶ A ntá jnkojín chojni tinkáchónki Cristo ts'ikon sín kixin tsikók'án tí síchjin kjéhya sín ntá t'ichjánxin tsjinkitsa sín kixin sine tí sín a kixin tsochóntiahya sín tí nínko tsjinkitsa. Méxra jehó tí sín chaxín tsikók'án chóntahya ninkexró tsjinkitsa mé chrókjuinkitsa tí nínko.

¹⁷ Tí nkexro jina t'etqan xra kuénte nínko la jehé sín chrókjuacha sín la ko kjaxin antsí chrókjuikosáyehe chojni tí sín chaxín xra ó tjejóchronkaxín sín la ko tjako sín.

¹⁸ Kixin xroon itén Dios mé ntáchro kixin: “Chrók'uejójyáhyará kamposa ir'va tí koxinta tjejóch'e xra”, la ko kjaxin ntáchro kixin: “Tí sín ch'e xra la síin kjuachaxin chrókjuacha sín.”*

¹⁹ Chrókuahya kuénté jnkojín nkexro tsjikao kjuach'ia t'eka jie tí nkexro t'etqan xra kuénte nínko. T'ichjánxin tsonoxín yaá o iy'á sín tsochrónka kixin chaxín chóna jie tí nkexro a.

²⁰ Chrókjuéntuéhé tí sín tjasin jie nkayakon kaín sín kixin ntá tsinhin tí í so sín kixin tsochrakon sín, í tsjasinhya sín jie.

²¹ Tétuanxian kjuachaxién Dios la ko Ìnchéni Jesucristo la ko tí sín ángel kjueyá ch'án kixin jnkokón tsjéntuéhé kaín chojni la ko jnkokón tétuénhén sín kaín tí nkehe xrxanka.

²² Chrókjuéyáhya chjini jnkojín sín kixin ts'etqan sín xra kuénté nínko kixin tí chróchóna sín jie la kjaxin jaha chrókuamá tí jie. A ntá jaha chrókuitohé kaín nkehe jínahya.

²³ Jaha la jnkoyaxón tóniha tjeté tsaa. Jehya ìnta ó chrók'uaia. Kjaxin intsi xranvino chrók'uaia ntá chrókuitqaxián jina.

²⁴ Tí ijje jnkojín chojni la t'ikonni noxín tí naxa kuítóexínhya ijje sín. A ntá í so sín nóxinhya tjasin sín jie kjánchó tíó tsjixixín la tsonoxín tí jie tjasin sín.

²⁵ Mé xikaha kjaxin ó t'ikonni kixin iso chojni imá ch'e sín tí xra jina. A ntá í so sín kjónté t'ikonhyani la xitjahya tsjak'emá sín tí nkehe jina ch'e sín.

* **5:18** Deuteronomio 25.4, Mateo 10.10; Lucas 10.7

6

1 Tí sín ch'exín xṛa mé t'ichjánxin tsochóntehe sín kjuasáya tí lamo kuènte sín, kixin ntá tí í so sín la ts'ántaxiñhya sín ihñié Dios la ko ts'ántaxiñhya sín tí nkehe tjakoni.

2 A ntá tí sín ch'exín xṛa la chónṭa sín lámogé sín tinkáchónki Cristo la mé chrókuítogehya sín tsjikosáyehe sín tí lamo kixin jnkokoá kichó sín. La mé antsí jína chrókuinkjitsa sín kixin ó nohe sín kixin tjinkjitsa sín ijnko nkexro tinkáchónki Cristo la chrótjuèhe sín kichó sín. Jaha mé tjákehé sín kaín tíha.

Tí nkehe tinkáchónkini tsochèxinni

3 Iso sín tjako tí nkehe jehó sín tjenkayáxin sín la tóyogehya tí nkehe jína kjuako Ìnchéni Jesucristo la ko jehya tí nkehe tinkáchónkini.

4 Ó jehí nchehnke sín la nínkehó noehya sín. Tí ntoáhya nixja sín la tíha mé éxí ijnko chin chónṭa sín la tíha mé tjixin tí kjuachjinóxínhin la ko tjanjonko kichó sín la ko t'ántaxínhin sín kichó sín la ko chónṭehya sín kichó sín kjuasáya.

5 Mé tí sín la náxrjónhya tjenkayáxin sín la jnkochrín tjanjonko kichó sín la noehya sín tí nkehe chaxín. Mé tjenkayáxin sín kixin tinkáchónki sín Ìnchéni kixin xíkaha chrókjuacha sín nchónhya chichaon, ichro sín. Jaha la chrókuítoghé tí sín xíkaha ch'e.

6 Tí tinkáchónkini Ìnchéni la ijnko nkehe imá tjetoan la ko tjete tíha a ntá kjuaxróxin chrók'uejóni kjónté tí nkehe chóntani ó.

7 A ntá tí kokjhini la ninkehó kuikohyani tí kuini chjasintajni la kjaxin tió ts'enni la ninkehó nkehe xitjahya sátsjikoni.

8 A ntá tí chóntani nkehe sineni la ko chóntani ikéni la kjónté táhó la chróchéheni.

9 A ntá tí sín tjinkaon sín imá chrókóríko sín mé tí sín a mé tsjichròe sín la lontj sín kixin xíkaha tjenkayáxin sín, la mé ts'itjáyanxín sín tíha.

10 Tí imá tjuèheni chichaon la tíha mé nuèé kaín nkehe jínahya. Jnkójn chojni imá tjinkaon sín tsochónṭa sín chichaon ntá tsjichròe sín tsítoghe sín tsínkáchónki Ìnchéni la tíha mé imá sinchekjasótexín sín asén sín.

Jína tí nkehe tinkáchónkini

11 Jaha mé tinkáchónké Dios la tjtoghé kaín tí nkehe i. Chrókjuak'e ntoá la ko kaín asán chrórxáinkávan Dios la ko chrókuinkachónkia ch'án la ko chrótjuéhé kichua la ko chrókónínkákonhya tjoka la ko chrókjuínchehnkehya asán.

12 Tjanjonkoa kaín nkehe jehya tí jína la ko kaín asán tinkáchónkia Ìnchéni kixin ntá chrókjuacha chrók'uayéhé tí kjuachón jnkochrín kixin mé xíkaha k'uíyaha Dios tí jaha. Jaha la ó tsíchronka kixin tinkáchónkia Ìnchéni la ó kuínhin la ko k'uíkon nchónhya chojni.

13 Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé téuanhan

14 kixin sinchexiteyá kaín tí nkehe t'etogán Dios kixin í chrókjuínkíhya tí nkehe chrókuinkachónkia la ntá tsokohya ninkexró ts'eka jie tió tsjixrakája tí yaon tsokjan Ìnchéni Jesucristo.

15 Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chónṭa ch'án kjuachaxin ts'etogán ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Ìnché kaín chojni.

¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsochjina tí tjen ch'án. Nínkexró k'uíkonhya tí jehe ch'án la ko nínkexró xitjahya ts'ikon tí jehe ch'án. Tsjikosáyehe ni ch'án kixin jehe ch'án chónhta ch'án kjuachaxin ts'etqan jnkochrixin. Amén.

¹⁷ Tí sín chónhta itsjé nkehe chjasintajni mé tétuénhén sín kixin sinchehnkehya sín la ko tétuénhén sín kixin tsochónhtaxínhya sín tí nkehe chónhta sín kixin jnkochrixinhya tsochónhta sín tíha. Íchá jina chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xíkaha tjinkaon ch'án tsochéheni.

¹⁸ Tétuénhén sín kixin chrókjuich'e sín tí nkehe jina kixin tí chaxín chrókóríko sín la chrókjuinkítsa sín kíchó sín la chrók'óxikeyehe sín tí nkehe chónhta sín.

¹⁹ Mé xíkaha chrókjuacha sín tí nkehe tjete kixin chr'éxin la jina chrók'uejó sín kixin chrókjuacha chróchónhta sín tí kjuachón jnkochrixin.

Kjuixixin k'uítuenhen ch'ín Timoteo

²⁰ Jaha Timoteo t'ayakonhén tí xra la tiénhya tí nkehe ntoáhya nixja chojni. Ntáchro sín kixin imá nohe sín kjánchó chaxínhya tíha.

²¹ Iso sín ó xíkaha ntáchro sín kixin imá nohe sín la ntá kjuíchròe sín í tinkáchónkihya sin Ìnchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo mé kjueyána Jesucristo t'ahá ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochóna chojni kjuachón jnkochrínín tí tsinkáchónki sín Jesucristo.

² Ikjian tí xroon i chr'anhan jaha kichó ni Timoteo. T'íkuan éxi xjanna tí jaha mé imá tjuaha. Kjuasáyé It'eni Dios la ko Inchéni Jesucristo chrókjuintayavan ch'án la ko chrókuiikonðaha ch'án la ko chrótjáha ch'án kjuaxróxin.

Chróchrónka ch'án kixin tinkáchónki ch'án Jesucristo

³ Xráxinkavan tí jaha tió níxjaha Dios nchakotjin la ko tie la ko tjétjáncháha kjuasáyé Dios kixin imá tinkachónkia ch'án. Jehe ch'án mé t'ahá xra kaín asenná éxi xikaha mé k'uékjich'e tí sín tsik'axrjenixinna.

⁴ Xráxinkavan jnkochrínín nkexrí tsjanka la tjínkavan kixin chrótsjaha tí jaha inaá kixin tsochéhe asenná.

⁵ Ó nòna kixin kaín asán tinkachónkia Jesucristo. Kjaxin náchrja tjan Loida la ko iná tjan Eunice mé saoxín kuinkáchónki sín Inchéni Jesús la ntá ó nòna kixin kjá kjaxin jaha xikaha tinkachónkia ch'án.

⁶ A ntá ijie ntaxráxinkávan kixin chrók'uitjáyanhya tí kjuachaxién Dios kjuanjón ch'án k'uayéhé tió kjuaké tjaná chrítaón tí jaha.

⁷ Dios la kjuanjónhya Nchakuen ch'án kixin tsochrakonni. Náhí. Kjuanjón ch'án tí Nchakuen ch'án kixin tsochóntani kjuachaxin la ko jina tsotjuèheni ch'án la ko jina tsjenkayáxinni.

⁸ Chrókósuàhya chróchrónka kixin tinkachónkia Inchéni la ko kjaxin chrókósuàhya chróchrónka kixin janhan t'échjínaxián tí xrjanka itén ch'án. Kjónté la íchá jina chrókjuasótexián tí tjákua tí tan tsaáxinni kixin tí kjuachaxin kuènte Dios ó k'uayéhé.

⁹ Jehe Dios mé kuaáxinni la ko kjueyá ch'án tí jeheni kixin jina chrók'uejóni. La jehya tí xra jina kjuích'eni ntá chrókuaáxinni. Náhí. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxa xrankixíxínhya chjasintajni mé tsikjenkayáxin ch'án tíha kixin jehe ch'án mé imá tjuèheni ch'án.

¹⁰ Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyan ch'án tí kjuachaxin k'uéchóna tí kjuach'én kixin kjuacha ch'án xechón ch'án inaá. Chronkaxín itén ch'án nkexrí tsaáxinni ntá ó kónoexínni kixin tí kjuachón kjuakoxin ch'án mé xitjahya ts'itjáyan.

¹¹ Dios mé k'uetuanna sátsjixrjanka itén ch'án la ko kjueyána ch'án tsjákoha tí sín jehya sín judío tí tan jina.

¹² Mé xikaha tjétjasótexinna kaín tí nkehe i la kjónté tósuànahya kixin ó choxian jina tí nkexro tinkachónkia. Mé ó nòna kixin chóna ch'án kjuachaxin ts'ayakonhenni ch'án tsjixrakájia tí yaon tsokjan ch'án. Méxra janhan tjaha ch'án asenná kixin ts'ayakonhen ch'án.

¹³ T'itjáyanhya tjákua kaín nkehe jína ó kjuákqoha. Naxa títékávan la ko tjuèhé kichuárá kixin tinkachónkia Cristo Jesús.

¹⁴ Kjuachaxiën tí Nchakuen Dios chóntani jnkojnkoní mé t'ayakonhén jína tí tan tjákua kjuíntakítanhan Dios k'uayéhé.

¹⁵ Jaha mé ó noha kixin kaín tí sín estado Asia mé jehe sín kuítqona sín la ko kjaxin tí ch'ín Figelo la ko ch'ín Hermógenes.

¹⁶ Tjáncháha Inchéni kixin imá tsikonóqehé ch'án tí sín tjejó ntqé tí ch'ín Onesíforo kixin jehe ch'án mé imá kjuínkítsana ch'án la ko kósuèhya ch'án ikui ch'án kjónté tjéqhina.

¹⁷ Tí nantá kjuíji ch'án chjasin Roma ntá kuítqehya ch'án kjueyána ch'án hasta k'uitjana.

¹⁸ Tjáncháha Inchéni kixin tí yaon itsi ch'án ntá chrókukonóqehé ch'án tí ch'ín a kixin jaha ó noha jína kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóqxin ch'ín Pablo kixin jeheni éxi yóqe ijnko soldado jína kuente Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjón ch'án kixin tsjinkítsa kixin tinkáchónkini ch'án.

² Tí nkehe kuínhín kjuákua nkayakon nchónhya chojni mé xikaha chjehé tí xrá tí sín jína choxian jína ch'e xrá kixin ntá jehe sín mé xikaha chrókjuáqohé sín í so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jína kuente Jesucristo.

⁴ Kohya nijnko soldado jína ch'e xrá chrók'uixenhen ókjé xrá kixin t'ichjánxin jnkojínxón xrá sich'e ch'án kixin éxi tjinkaon tí nkexro t'etqenhen ch'án.

⁵ Mé xikaha éxi yóqe ijnko nkexro tsotsítán. Ntá tsjachahya ts'áyéqehé ch'án nijnko nkehe tí sinchexiteyèhya ch'án tí sín t'etqan.

⁶ La éxi yóqe ijnko nkexro ch'e xrá nonte ntá chóna ch'án kjuachaxin saoxín tsakja ch'án tí nkehe ts'óna.

⁷ Chrórxaxinkávan jína kaín tí nkehe xrjanka la ñchéni mé tsjinkítsa tsiénxian kaín nkehe.

⁸ Xráxinkávan kixin Jesucristo la ó xechón ch'án. Jehe ch'án mé k'uaxrjenixin ch'án ch'ín rey David. Tíha mé tí tan jína tsaáxinni tjetjákua.

⁹ Tí tan tjéxrjanka mé tjasótexinna. Tíha mé tjéchrontetoxinna cadena éxi ijnko chojni tsíkjàya la kjónté tí itén Dios la jehya tjechrontetoxín cadena.

¹⁰ Méxrá kjónté nchónhya t'atsínka tí janhan la ntaxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochríxín kixin tinkáchónki sín Jesucristo.

¹¹ Tíhi mé chaxin:

Tí jehe ch'án k'uénxinni ch'án a ntá chr'éxín ts'ejókoni ch'án.

¹² La tí tsjasótexinni tí jehe ch'án la ntá kjaxin ts'áyéqeni kjuachaxin kuente ch'án ts'etqanni.

A ntá tí chrókjuinchemáni tí jehe ch'án na ntá kjaxin ch'án la xikaha sich'e ch'án.

¹³ Kjónté nchexiteyèhyani ch'án la jehe ch'án tjenchexiteyá ch'án kixin Dios la xitjahya sich'ia ch'án.

Chrókuich'eni tí xra jína

14 Nchexraxinkávan sín kaín tí nkehe i. Dios tjetsjehe tétuēnhén sín kixin chrókuítōhe sín tí nixja sín tjanjōnxin sín kixin ó chónkó tíha la ninkehó sínkíhya. Tí xíkaha ch'e sín la sinchek'itjāyan sín tí sín tjejótinhin.

15 Sīch'e xra jína kixin tsoxrjínhin Dios tí xra tjech'e a. Ntoá chrókuākua tí tan jína chaxín kixin ntá chrók'uechjānxinha chrókōsuāha.

16 La tītōhé tí nkehe nāxrjōnhya la ko chónkó nixja iso sín kixin tí sín nixja xíkaha la āntsí tsinkák'ánkí tí nkehe jínahya nixja sín.

17 Tí nkehe jehya jína tjako sín mé éxí yōhē ijnko itōn sóa sítinkáchr'enka. Mé xíkaha tjako tí ch'ín Himeneo la ko ch'ín Fileto.

18 Jehé sín mé ó kjuixin kuítōhe sín tí ntjā ntoá la ntáchrō sín kixin ó kjuixin k'uátsínka tí tsoxechón chojni. Ntá xíkaha ch'iyehé sín tí í so sín la tsjitōxinhin sín tí nkehe tinkáchónki sín.

19 Kjānchó tí sín tinkáchónki Dios éxí yōhē tí xro xrankixixín tjt'ō xitjahya tsoxíka la chóntha éxí ijnko sello tí itén Dios ntáchrō kixin: “Ínchéni mé tjatsoan ch'án tí chojni kuènté ch'án”,* la kjāxin ntáchrō kixin: “Kaín tí sín tinkáchónki Cristo mé t'ichjānxin chrókuítōhe sín kaín nkehe jínahya,” mé xíkaha ichro itén Dios.

20 Ijnko nchia jíé kuènté tí sín rico la síin vaso tsík'óna chica oro la ko vaso tsík'óna chica plata. La kjāxin síin nkehe tsík'óna ntachiso la ko nkehe tsík'óna nchetje. Iso la xra ó tsík'óna kuènté tí xra tjetōan la í so la tsík'óna kuènté tí xra tjetuanhya.

21 A ntá ijnko chojni chrókuítōhe kaín jíē chrókóyōhē éxí ijnko vaso tjóá jína kixin chrókuicháxinhin Ínchéni. A ntá tí nkexro xíkaha chrókuich'ehya tí nkehe jínahya kixin chrókuicháxinhin Ínchéni tí xra jína.

22 Tītōhé kaín tí nkehe jehya tí jína tóxrjínhin í so tí sín ntasoá a. Chrókjuak'e tí ntjā ntoá la ko kaín asán chrókjuinkachónkia Cristo la ko chrótjuéhé kaín chojni la ko kjuaxróxin chrók'uejokoa kaín sín. Mé xíkaha chrók'uejó kaín xín tí sín kótjóa asén mé kaín tí sín tinkáchónki Ínchéni.

23 Jaha chrókuaHYA kuènté tí sín lōntj tjenkayáxinHYA jína kixin jaha ó noha kixin xrahya chrókjuanjōnko kichó sín.

24 A ntá ninkexro ch'ehe xra Ínchéni chrókjuanjōnko kichó sín kixin jína chrókjuinkitsa kichó sín. Chrókónohe sín kaín nkehe jína chrókjuako sín la ko chrókónínkakuenHYA sín kichó sín.

25 Kaín asén sín jnkōjina chrónixjehē sín tí sín titekakonHYA kixin chróchónhen sín kixin Dios chrókjuinkitsa tí sín a chrók'uíxinkí tí ntoáHYA tjenkayáxin sín kixin ntá chrókónohe sín tí nkehe chaxín ntoá chrókjuich'e sín

26 kixin t'ichjānxin chrókónohe sín nkexrí chrókuaáxin sín kixin ch'ín Tsochren tjinkaon chrókjuich'iyehé sín ntá chrókjuasin sín jíē.

3*Nkexrí ts'ejó tí chojni chjasintajni tí yaon tsjixixín*

1 T'ichjānxin chrókónoha kixin tí yaon tsjixixín ntá itsi tí yaon kjuaxróxinHYA ts'ejó chojni.

2 Tí sín chjasintajni tsinkáchónkiHYA Ínchéni mé imá chrók'uetōan sín jehó la ko imá tsoxrjínhin sín chichaon la ko sinchehnke sín la ko imá ts'ántaxínhin sín

* 2:19 Números 16.5; Juan 10.14

Dios. Sinchexiteyèhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó dios.

³ Tsojtuèhya sín kichó sín la ko tsikonóèhya kichó sín la ko tsjonta sín kichó sín la ko ninkexró tsochrakuenhya sín la ántosén sín tsjasin sín jie, la ko imá tsojjehe sín la ko imá tsonínkakohenen sín kaín nkehe jína.

⁴ Jehé sín mé sinchekji kichó sín la ko tsjenkayáxinhya sín jína la ko sinchehnke sín. Tsojinkaon sín tsjeyá sín tí nkehe ntáchro asén sín ó a ntá tsjeyáhya sín Dios.

⁵ Jehé sín la éxí chojni tinkáchónki Dios xikaha ts'ejó sín. Kjánchó chaxínhya. Tsincháónkihya sín tí kjuachaxin kuente Dios chaxín ntoá.

Méxra jaha la chrókuankíehya tí chojni ch'e xikaha.

⁶ Iso tí sín a mé ixri sín t'ixenhen ntqé ókjé chojni la ch'iyehé sín tí chojni chjin lontj tjasin jie la nchexiteyéhe sín kaín tí ntáchro asén sín.

⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá.

⁸ A ntá éxí yóhe tí sín k'uékjinchexroan mé ch'in Janes la ko ch'in Jambres mé k'uénínkakohenen sín ch'in Moisés mé xikaha tí sín tjako ijie nínkakohenen sín tí nkehe chaxín ntoá. Imá jínahya tí kjuaxrexinkaon kuente sín la ko titekakonhya sín tí nkehe chaxín tinkáchónkini.

⁹ Kjánchó tsjachahya sín sich'ia sín isé kixin kaín chojni tsonohe kixin tí sín a mé lontj sín kixin éxí xikaha tsikónhen tí yaá sín k'uékónínkakohenen ch'in Moisés.

Tí nkehe kjuixixín k'uetuènen ch'in Pablo tí ch'in Timoteo

¹⁰ A ntá jaha mé ó kuitekávan tí nkehe kjuakua. Ó noha nkexrí kjuak'é janhan la ko ó noha tí xra kjuít'a janhan. Ó noha nkexrí tinkachónkia Ìnchéni la ko noha kixin tjokahya kónínkavan la ko noha nkexrí tjuahá chojni. Ó noha kixin kjónté kónínkaon chojni la kjuitoahya tí xra a

¹¹ kjónté chónkina sín la ko kjuasótana. Ó noha nkehe kónna tí chjasin Antioquia la ko Iconio la ko Listra. Chrók'óyánna sín la kjuínchekjuasótana sín kjánchó Ìnchéni mé kjuínkítsana kjónté kaín tí nkehe chrókónna.

¹² Kaínxín tí sín tjinkaon tjóá chrók'u'ejó sín nchexiteyéhe Cristo Jesús la t'ichjánxin tsjasóte sín.

¹³ A ntá tí sín jínahya la ko tí sín ixri ch'ia sín mé ts'óna sín antsí jínahya. Jehé sín xrich'ia sín la ch'iaxin sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'uitjá la ko tí nkehe ó kuitekávan. Jaha la ó noha tí nkexro kjuakóha.

¹⁵ Jaha la desde xjanntsia k'uitjá nkexrí nixja xroon itén Dios la tíha mé tónoexinni kixin Cristo Jesús tsaáxinni kixin tinkáchónkini ch'án.

¹⁶ Ntá kuenté xroon Biblia kjuachaxién Nchakuen Dios kjuínkítsa tí nkexro ikjin la tíha mé jína tsoxrácuèxinni tí nkehe chaxín la ko tíha mé jína tsjentuèheni la ko tsjinkítsani tsonoheni nkexrí chrók'uejóni ntoá

¹⁷ kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

4

¹ Kjuachaxién Dios la ko Ìnchéni Jesucristo, tí nkexro itsi éxí ijnko rey la sinchekítqexín ijje kaín chojni tjejóhón la ko tí chojni tsík'en,

² mé tétuñhan chrókjuakua itén Dios kaín asán kjónté á chrókuinhin sín o náhi. Nixjehé sín jnkojina kixin tsitekaon sín la ko tjéntuéhé sín jnkojina. Chrókóninkákonhya chrókjuákohe sín.

³ Itsi ijnko yaon ntá tsotjinkakonhya sín tsinhin sín tí nkehe jina. A ntá sinchexiteyéhe sín tí nkehe ntáchro asén sín ó. Tsjeýá sín nchónhya maestro tsjakohe sín jehó tí nkehe tóxrjínhin sín chrókuinhin sín.

⁴ Méxra tsitöhe sín tí nkehe chaxín ntoá la ntá itsa sín kuénté kaín nkehe chaxínhya.

⁵ Méxra jaha jina chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókjuákohe chojni itén Dios tsaáxinni mé xikaha sinchexiteýá jina tí xra chonta.

⁶ Ntá janhan ó kjuixraká tí hora tsjasóténa la ko ó kjuixraká tí hora its'én.

⁷ Ó kjuánjonkian jina kaín tí nkehe jínahya la ko ó kjuixinna tí xra kuéntana la ko kuítóahya jina kuinkachónkia Ìnchéni.

⁸ A ntá ijie la tí nkehe tsjónna mé tjechónhen kixin jina kjuak'é ntihi. Tíha mé tsjanjon Ìnchéni tí yaon itsi ch'án. Jehe ch'án mé ijnko juez jina. Jehya kixin janhván tsákjaá tí nkehe tsjanjon ch'án. Náhi, kjaxin kaín tí nkexro kuítekaon sin ch'án la ko chéhe sín tjejóchónhen sín tió tsi ch'án.

Ch'in Pablo k'uetöan tsjijitsjehe sín ch'án

⁹ Jaha chrókóxakonhan tjoka chrók'uinkatsjehé tí janhan

¹⁰ kixin ch'in Demas la kuítóhe ch'án tí janhan kixin imá kóxrjínhin ch'án tí nkehe kuénte chjasintajni. Sátsíkji ch'án chjasin Tesalónica. Ch'in Crescente mé sátsíkji ch'án chjasin Galacia a ntá ch'in Tito sátsíkji ch'án chjasin Dalma-cia.

¹¹ Jehó ch'in Lucas naça tjékian ch'án. Tjijkéýá ch'in Marcos la tsjikuana ch'án ntihi kixin jehe ch'án mé jina tsjinkjtsa ch'án tí xra chonta ntihi.

¹² A ntá ch'in Tíquico mé kuétuñhan ch'án sátsji ch'án chjasin Éfeso.

¹³ Tió ts'inka ts'inkakuana tí ka t'itsate kuítóha chjasin Troas ntóé ch'in Carpo la ko kjaxin ts'inkakuana tí libro kuéntana la ko koí tí tjóé iko tsik'óna xroon.

¹⁴ Tí ch'in Alejandro tí ch'in ch'e xra chica mé nchónhya nkehe jínahya kjuich'ena ch'án. Kjánchó Ìnchéni mé tsjenkehe ch'án kaín nkehe kjuich'e ch'án.

¹⁵ Jaha mé tóxakonhan kixin tí jehe ch'án kixin imá nínkakonhen ch'án tí nkehe tjakoni.

¹⁶ A ntá tí saoxín k'uèya tí síxree tí kjuia tí tjejó sín la ninkexró kjuinkjtsahyana. Kaín sín me kuítöna sín janhván. Kjónté xikaha la tjáncháha Dios kixin chrókuaaha ch'án kuéntá kixin xikaha kjuich'e sín.

¹⁷ Kjánchó Ìnchéni mé chaxín kjuínkjsana ch'án la kjuanjon ch'án kjuachaxin kixin tsjachana naça jina tsjakua itén ch'án. Ntá kuínhin kaín tí sín jehya judío. A ntá Ìnchéni kjuínkjsana kixin kjóneyhana koxra.

¹⁸ Ìnchéni mé tsjinkjtsana kixin naça tsónnahya kaín nkehe jínahya. Jehe ch'án mé ts'ayakonna ch'án ts'ixañhan tí tjet'etöan ch'án nkaya nkajni. Kjuasáyé ch'án kixin xikaha jnkochríxín tsoxiteýá. Amén.

Ch'in Pablo kjuixixín nixja ch'án

¹⁹ Jaha nixjehé tí tjan Prisca la ko ch'in Aquila la ko nixjehé tí sín siín ntóé ch'in Onesiforo.

²⁰ Kuítōhe ch'ín Erasto chjasin Corinto. A ntá ch'ín Trófimo kuítōhe chjasin Mileto kixin kónihi ch'án.

²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kíchó ni ntihi nixjaha sín jnkojína.

²² Inchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí ch'ín Tito

Ch'ín Pablo nixjehe tí ch'ín Tito

¹ Janhan Pablo mé t'aha xra Dios la ko tsíkjeýána Jesucristo kixin tsjákoḥa tí í so sín tsíkjeýá Dios kjaxin kixin ts'itja sín tsonohe sín kixin nkexrí chrókuinkáchónki sín tí nkehe chaxín.

² Ntá ts'ejóchónhen sín tsochónta sín kjuachón jnkochríxín. Dios la xitjahya sich'ia la kaín tí nkehe tsíchronka ch'án ósé tí naxa k'onahya chjasintajni la mé xíkaha tsonhen.

³ Ntá tí yaon tsintácho Dios la mé jie ó xiteýá la ntá kónoxín tí tan kuènte ch'án. A ntá Dios tí nkexro tsaáxinni mé k'uetōan kixin sít'aha ch'án xra tsjákuwa itén ch'án.

⁴ Ikjian tí xroon i chr'anhan jaha Tito. T'íkuan éxí chaxín xjanna tí jaha kixin yóini tinkáchónkini Jesús. Kjuasáyé It'eni Dios la ko Jesucristo tí nkexro tsaáxinni, chrókuinjantayavan la ko chrókuikonóḥa ch'án la ko chrótjáha ch'án kjuaxróxin.

Tí xra sich'e tí ch'ín Tito chjasin Creta

⁵ Kujtoḥa jaha tí isla Creta kixin jaha chrókuétuēnhén tí sín siín ntiha kixin nkexrí chrók'uejó sín la ko chrókónoxín nkexro ts'etōan kuènte jnkojnko nínko jnkojnko chjasin éxí tí kuétuānhan jaha.

⁶ T'ichjánxin kixin tí nkexro ts'etōan xra kuènte nínko la jína chrókjuak'e kixin kohya nkexro chrók'ueka jie, la ko chróchónta jnkokoá ichjién la ko tí xjeen sín chrókuinkáchónki Ínchéni kixin tsókohya nkexro chrókjuanchia jie kixin jehya tí jína tjejóch'e sín, la ko kjaxin chrókójiēhya sín.

⁷ Mé xíkaha tí nkexro ts'áyēhe tí xra ts'etōan xra kuènte nínko mé ts'etōan nkexrí tsonhen xra kuènte Dios la ntá t'ichjánxin ijnko nkexro tsjenkayáxin jína, chrókjuasinhya jie. La chrókjuinchehnkehya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjeýá kjuanínkaon la ko chrókóxrjēnhya sín chrókjuich'ia sín ntá chrókjuacha sín chichaon.

⁸ Kjaxin jína chrókjuak'e ch'án kixin tí tsjiji ijnko nkexro ntōe ch'án chrókjuanjōn ch'án kjuachaxin chrókjuak'e tí nkexro a. La ko jína chrókjuak'e ch'án la ko jína chrókjuenkayáxin ch'án kixin ijnko nkexro ó tsíkjinchetjóá Dios la ko chróchónta ch'án kjuasáyé ch'án.

⁹ Kjaxin t'ichjánxin chrókuítóehya ch'án tí tan jína xrákoḥe ch'án kixin ntá jína tsjákoḥe ch'án í so chojni tí nkehe ntoá la kjónté nkexro tjinkakonhya tsinhin la jína chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxí lōnti sín mé xíkaha ch'iyēhe sín chojni.

¹¹ Tí sín a la chrók'úkjehēni ir'va sín kixin tjachróe sín nchónhya chojni kixin tjako sín tí nkehe jehya jína kixin chrókjuich'ia sín chrókjuacha sín nchónhya chichaon.

¹² Ijnko ch'ín kuènte chjasin Creta la mé tsíchronka ch'án nkexrí tjejó tí sín chjasén ch'án. Ntácho ch'án kixin: “Kaín tí chojni chjaséni mé imá ch'ia sín

la ko imá jìehé sìn la ko imá kóchjinka sìn la ko séhe sìn”, mé xìkaha chrónka ch'án.

¹³ Tí nkehé tsíchrónka ch'án mé chaxín ntoá. Méxra antsí fuerte chrójuéntuéhé sìn kixin ntá jína chrók'uejó sìn chrórxaxinkaon sìn Dios.

¹⁴ Nìxjehé sìn kixin chrókuahya sìn kuènté kaín tí nkehe tsík'axrjeníxin kja tí sìn judío tjako la ko chrókuitekakonhya sìn tí nkehe t'etòan tí sìn nìnkakonhen tí nkehe chaxín.

¹⁵ Tí sìn chaxín tjóá kjuaxrexinkaon kuènte sìn ntá kaín nkehe ch'e sìn la jína. A ntá tí nkexro titekakonhya la tjuáhya kjuaxrexinkaon kuènte la kohya nìnkehó nkehe jína tí kjuaxrexinkaon kuènte sìn la kaín nkehe tjenkayáxin sìn mé tjuáhya.

¹⁶ Ntáchro sìn kixin chóxin sìn Dios a ntá tí t'ìkonnì nkexrí ch'e sìn ó noexínnì kixin chaxínhya tíha la ch'ia sìn. Jehé sìn mé ntoáhya tjenkayáxin sìn la ko jìehé sìn la ko titekakonhya sìn. A ntá tí xìkaha ch'e sìn la, ¿nkexrí chrókjuich'e sìn tí xra jína?

2

Chrókuako ch'ín Tito tí tan chaxín

¹ A ntá jaha chrókjuàkua éxì tí chrónka tí tan jína chaxín.

² Tjáhohé tí sìn ó táda kixin chrókókoanhya sìn la ko jína chrók'uejó sìn la ko chróhónta sìn kjuasáyé sìn la ko chróhónta sìn ijnko kjuaxrexinkaon jína la ko jína chrókuinkáchónki sìn tí nkehe chaxín la ko chrótjuèhe sìn kíchó sìn la ko chrókónínkakonhya sìn kjónté tsjasóte sìn.

³ A ntá kjaxin xìkaha tí sìn ó nána la kjaxin jína chrók'uejó sìn la kjaxin chrókjuinchekuáxinhya sìn chrókuinkáchónki sìn kjuach'ia la ko kjaxin chrókókoanhya sìn. Chrókjuàkoxin sìn ijnko kjuaxrexinkaon jína

⁴ kixin xìkaha chrókjuàkuèxin sìn tí chojni chjin tjarisoá a kixin chrótjuèhe sìn xii sìn la ko chrótjuèhe sìn xjeen sìn

⁵ la ko chrókjuich'e sìn xra jína la ko ntoá chrókjuenkayáxin sìn la ko jína chrók'uàyakonhen sìn nchia ntóé sìn la ko chrókójína sìn la ko chrókuitekakonhen sìn xii sìn. Tí xìkaha chrókjuich'e sìn chrókjuinchexiteyá sìn la kohya nkexro chrók'uántaxínhìn tí itén Dios tinkáchónkìni.

⁶ Kjaxin xìkaha chrókjuinchexraxinkávan tí sìn ntasoá kixin jína chrók'uejó sìn chróhónta sìn kjuasáyé sìn.

⁷ Jaha mé chrókjuákoéxian sìn kaín nkehe jína la ko chrókjuákohé sìn kixin ntoá chrók'uejó sìn.

⁸ Jaha la chrónixja tí nkehe jína kixin kohya nkexró chrók'uántaxín la ntá xìkaha chrókósuèhé tí sìn nínkaon la ntá kohya nkehe jínahya chróntáchro sìn kuènté tí jeheni.

⁹ Tétuènhén tí sìn xrich'exón xra kixin chrókjuinchexiteyèhé sìn tí lamo kuènté sìn la ko chrókójína sìn la ko chrónixjankjèhya sìn tí nkexro ch'ehe sìn xra

¹⁰ la ko kjaxin chrókueéhya sìn kixin jehya ijnko chojni chëé tí jehé sìn. Ntá kaín chojni chrók'uikon sìn kixin tjàkoxin sìn kixin náxrjón tí itén Dios chrókuaáxinni.

¹¹ Kixin Dios mé kjuàkoxin ch'án kixin nkexrí tjuèheni ch'án kixin jehé ch'án mé tsaáxin kaín chojni.

¹² Kjuasáyé Dios mé tjakoheni ch'án kixin chrókuítoheni kaín nkehe jie la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios.

¹³ Kjaxin chrók'uejóni jína kixin chrókóchéhēni chrók'uejóchónhēni tí yaon kjuachaxiēn Dios jie itsi Dios la ko Jesucristo tí nkexro tsaáxinni.

¹⁴ A ntá jehe ch'án mé k'uenyákonhēni ch'án kixin tjinkaon ch'án tsaáxinni ch'án kixin tsotjuáxin kaín jie chóntani kixin ntá jeheni mé ts'ónani ijnko chojni sich'ehe ch'án xra la ko tsoxrjínhinni sich'eni kaín xra jína tjinkaon ch'án.

¹⁵ Tíhi mé chrókjuákua la ko chrókjuinchehexraxinkávan sín la ko chrókuétuēnhén sín kjuachaxiēn Dios. Chrókuítóehya kixin ninkexró chrókókjoniēhya tí nkehe tjákua jaha.

3

Jína chrók'uejó tí sín tinkáchónki Cristo

¹ Chrókjuinchehexraxinkávan sín kixin sinchexiteyéhe sín tí gobierno la ko tsitekaon sín ichrén xra ts'etoan tí síxreé kixin chrókjuich'e sín kaín xra jína ts'etoan tí sín a.

² La ko chrók'uántaxiēnhya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuákoqxín sín kixin jehya ijnko chojni nchehnke la chrókjuikosáyēhe sín kaín chojni.

³ Jeheni kjaxin ósé k'uélontjini la ko k'uékitekakonhyani Dios. Chjini k'uék'ajini la k'uékóxrjínhinni kaín nkehe jínahya. La ko jehya jína k'uék'ejóni la ko k'uéchóntani kjuachjinoxínhin la ko k'uéchjinoxiēnhēni í so chojni.

⁴ A ntá tí Dios tsaáxinni mé kjuakuexinni ch'án kixin jína ch'án la ko tjuēhe ch'án kaín chojni.

⁵ Jehē ch'án kuaáxinni ch'án la jehya kixin ichrén xra jína chrókjuich'ehe ni ch'án. Náhi, ó jehí kuikonóehēni ch'án la ntá kjuínchekaáni ch'án la ko kjuínchetjóáni ch'án. Ntá kokjihiní nixin kixin tí Nchakuen ch'án la mé k'uáyēxinni kjuachón nixin.

⁶ Kjuasáyé Jesucristo tí nkexro tsaáxinni ntá kjuínchekitōnhēni Dios Nchakuen ch'án kixin tsochóntani kjuachaxin kuènté ch'án.

⁷ A ntá xikaha kjuasáyé ch'án kjuínchetjóáni ch'án kixin ntá tjejóchónhēni tí kjuachón jnkochrixin tsjanjon ch'án.

⁸ Kaín tíha mé chaxín. Tjínkavan kixin jaha chrókuétōan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkitsa kaín chojni.

⁹ A ntá jaha mé tjtōhé tí sín tjachaxin kichó sín lontjín sín la ko tjtōhé tí nkehe tinkáchónki sín kuènte tí sín tsík'axrjenixin sín la ko tjtōhé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰ Jnkójín nkexro tjinkaon tsjixrónkáxin tí tójnkotsé njnko ntiha la nixjehé ch'án jnkójína senó la ko yóxin inaá ntá tí titekakonhya ch'án ntá tjtōhé sátsji ch'án

¹¹ Kixin ó noha kixin tí chojni xikaha a mé ntoáhya tjenkayáxin sín kixin jehó sín nchek'ánkí sín ijje sín.

Tí nkehe k'uetōan ch'ín Pablo

¹² Tí tsétuānhan ch'ín Artemas la ko ch'ín Tíquico kixin tsjji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsinkajia tí nchakuen kin.

¹³ Jína chrókjuinkitsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanhya tí t'ichjánxinhin sín.

¹⁴ Ntá tí sín í so chrók'uitja sín nkexrí sich'e sín tí xra jína la ko chrókjuinkitsa sín kichó sín ichrén nkehe t'ichjánxinhin sín kixin chrókjuakoxin sín kixin jína tjejó sín.

Ó kjuixixín nixja ch'ín Pablo

¹⁵ Kaín tí nkexro tjékjan janhan ntihi nixjaha sín jnkojína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyonrá ch'án kaín rá. Amén. Ó tjen.

Tí xroon chr'énhen ch'ín Pablo tí ch'ín Filemón

Ch'ín Pablo nixjehę ch'ín Filemón

¹ Janhan Pablo tjéçhjinaxián tí xra kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuąha kixin jnkokón tjejóç'eni xra kuènte Dios.

² Kjaxin chrókuinhin kaín tí sín tinkáchónki Ìnchéni tójnkotsé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxi tí jeheni.

³ Kjuasáyé It'eni Dios la ko Ìnchéni Jesucristo chrókjuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xráxin tjáncháha kjuasáyé Dios tí xráxinkavan tí jaha tí nixjahą Dios

⁵ kixin ó kujnhan kixin imá tinkáchónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios.

⁶ Tjáncháha Dios kixin tsjinkitsa ch'án tí sín kuítekaon tió kjuáqohé sín kixin ntá tsienxin sín jına nkexri kaín tí nkehe chótani kixin kjuíncheyaonni Cristo Jesús.

⁷ Imá chàna kixin ó nòna kixin jaha kichó ni imá tjuèhé tí sín kichuá ntiha la ko imá kjuínchechéhé ásén tí sín tinkáchónki Ìnchéni.

Ch'ín Pablo chrónóğhe tí ch'ín Filemón kixin tsikonóğhe ch'án tí ch'ín Onésimo

⁸ Janhan na kjueyána Jesucristo t'ahą ch'án xra méxra chonta kjuachaxin tsétuąnhan jaha tí nkehe chrókjuich'e.

⁹ A ntá íchá jına jehó xrjannóaha tsítekavan kixin jaha tjuèhé tí janhan. Janhan Pablo mé ó tádana la ko tjéçhjinaxián tí xra kuènte Jesucristo.

¹⁰ Méxra xrjannóaha tsjinkitsa tí ch'ín Onésimo. Jehé ch'án mé t'íkuan éxi xjanna kixin kjuankixin ch'án tsinkáchónki ch'án Jesucristo tí tjéçhjinakian ch'án ntihi.

¹¹ A ntá tí ósé ch'ín Onésimo mé kjuít'ahya xra jına. A ntá ijie ó nòna kixin imá jına sit'aha ch'án xra tí jaha la ko jına sich'ena ch'án xra kjaxin.

¹² Ntá ijie tsétuąnhan ch'án tsjiji ch'án tí tjen jaha ínaá. Chrótjuèhé ch'án éxi chrótjuèhé tí janhan.

¹³ Janhan tjínkavan chrókuítónakian ch'án ntihi kixin chrókjuinkitsana ch'án chrínki tí chrókjuak'e jaha kixin tjéçhjinaxián tí itén Jesucristo.

¹⁴ Kjánchó tjínkakonhya tsjáncháha xikaha tí tjínkákonhya jaha. Jehya kixin jaha chrókjuínkitsani kixin chrókuétuąnhan xikaha. Náhi. Jehí tjinkaonni éxi jaha tóxrjínhan chrókjuich'e.

¹⁵ Tí ch'ín Onésimo kuítóha ch'án iso yaon a ntá jie la tsochonta ch'án jnkochrín.

¹⁶ Ijie la jehya éxi ijnko chojni tsík'ína chrók'uikuan ch'án. Náhi. Ntá jie la éxi ijnko nkexro ch'e xra antsi jına mé éxi ijnko kichua chrótjuèhé ch'án. Janhan na tjuąha ch'án kjánchó tí jaha la antsi má chrótjuèhé ch'án. Jehya éxi chojni ó chrók'uikuan ch'án. Náhi. Chrók'uikuan ch'án éxi ijnko kichua kuènte Ìnchéni.

¹⁷ Méxra tí chaxín t'íkuan tí janhan éxi kichó ni jnkokoá tinkáchónkini Ìnchéni ntá chrók'uayéhé ch'án éxi chrók'uayéhé tí janhan.

18 A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha.

19 Janhan Pablo mé tjaná kjinxián tí xroon i na mé janhan tsjénkaha tíha. A ntá janhan tjínkakonhya chrókjuíntaxraxinkávan tí jaha kixin kaín tí nkehe tjasikána tí janhan kixin kjuákohá jaha.

20 Méxra kichó ni tsotsenkávan síh'e tí nkehe tjáncháha chaxín tinkachónkia Ìnchéni. Mé xikaha sínchechéhé asenná kixin jaha mé kichó ni tinkachónki Cristo.

21 Méxra ikjian tí xroon i chr'anhan kixin ó òna kixin jaha la sínchexiteyá tíha la ko ó òna kixin jaha la síh'e antsí má que tí nkehe tjáncháha jaha.

22 Kjaxin tjáncháha kixin tjéyá ijnko nchia tsjak'é. Tjéchonhan kixin jahará la nixjehérá Dios la ntá Dios chrókjuanjon kjuachaxin kixin chrókjuasántsjahará.

Kjuixixín nixja ch'ín Pablo

23 Kjaxin ch'ín Epafras mé nixjahará ch'án jnkojína. Jehe ch'án mé tjéchinakian ch'án jnkokoá tí ntóéchiso ntihi kixin kjaxin tinkáchónki ch'án Cristo Jesús.

24 Ch'ín Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkojína. Jehe sín mé tjínkítsana sín tí xra.

25 Tjéjtáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsík'axrjenixinni nchónhya veces kixin nchónhya nkexrí chrókiexín sín, nixjaxin ch'án tí sín k'uéchrónka tí itén ch'án.

² A ntá jie tió tsjixixín Dios nixjaxin ch'án tí Xjeen ch'án, na mé Dios kjuich'éna ch'án kaín xín nkehe síin kixin kjuachaxién tí Xjeen ch'án, mé tí nkexro k'uáyéhe kaín xín nkehe.

³ Jehé ch'án mé t'inkaséyanxín ch'án tí kjuachaxin kuénte Dios, la ko jehe ch'án mé kjaxin éxi tsjehe Dios xikaha tsjehe tí jehe ch'án. Jehé ch'án t'aykonhen ch'án kaín xín nkehe síin kixin tí kjuachaxin jie chóna tí tan nixja ch'án. A ntá kjuixin kjuínchetjóá ch'án tí jie chónani, ntá sákjui ch'án kjuák'etjaxin ch'án tí tja chjina It'é ch'án tí tjen ch'án t'etoan ch'án nkaya nkajní.

Tí Xjeen Dios imá t'etoan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuñhen tí sín ángel, kixin tsík'áyéhe ch'án tí kjuachaxin kuénte It'é ch'án, a ntá imá t'etoan ch'án, a ntá tí jehe sín la náhi.

⁵ Méxra Dios ntáchehya nijnko ángel kixin:

Jaha mé Xjanna,

janhan mé kjuít'ána tí jaha ijie.

la ko kjaxin ntáchrohya Dios kuénte nijnko ángel kixin:

Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokoá Xjeen Dios chjasintajni, ntá ntácho Dios kixin:

Kaín tí sín ángel kuénte Dios chrókjuikosáyehe tí jehe ch'án.†

⁷ A ntá ntácho Dios kuénte tí sín ángel kixin:

Tí sín ángel ch'éna ch'án éxi xrjnto kixin nchakuen sín ó,

la ko tí sín ch'ehe ch'án xra la ch'éna ch'án éxi xrohinene.‡

⁸ A ntá ntáche ch'án tí Xjeen ch'án kixin:

Tí trono kuéntá itjen jnkochrín, jaha Dios,

la mé jaha mé ijnko nkexro t'etoan jina.

⁹ Jaha tóxrjínhan tí nkehe jina, a ntá ninkákonhén tí nkehe jínahya.

Mé xikaha tí Dios tsíkjejá jaha, la Dios kuéntá kjuíntacháha má,

a ntá tí í so sín k'uájikoa la kánhyó.§

¹⁰ Kjaxin ntácho kixin:

Jaha Inchéni, tí xrankixixín kjuich'éna chjasintajni,

la ko jaha kjuich'éna nkajní.

¹¹ Táha mé ts'itjáyan, a ntá jaha la tsjak'e jnkochrín.

Kaín tíha tsontaxín éxi iké chojni,

¹² éxi ijnko iké chojni xikaha tsoxrát'o,

ts'ixinkí éxi ijnko iké chojni.

A ntá jaha la ts'ixitóxinhya jnkochrín tsjak'e,

* 1:5 Salmo 2.7; 2 Samuel 7.14; 1 Crónicas 17.13 † 1:6 Deuteronomio 32.43 ‡ 1:7 Salmo 104.4

§ 1:9 1.8-9 Salmo 45.6-7

a ntá tí kjuachón chonta jaha la nunca tsjejehya.*

¹³ Dios la ntáchehya nijnko tí sín ángel kuènte ch'án kixin chrók'uejó sín tja ch'án chjina ntahó chrók'uetōan sín, tsjixinjian kaín xín tí sín nínkakonhen sín la chrókjuachahya sín chrók'uetōan sín.†

¹⁴ Kaín tí sín ángel mé nchakuen sín ó mé ch'ehe Dios xra mé k'uítuenhen sín tsjinkĩtsa tí sín ts'áyehē kjuachaxin tsaá sín.

2

Chrókjoniehyani tí nkehe tsaáxinni

¹ Mé xikaha chrókjuenkayáxinni jína tí nkehe ó kuínhinni kixin chrókuitōehyani tí ntja ó kuákjani.

² A ntá tí tan tsíchronka tí sín ángel ósé la mé tsíkónoxín kixin chaxín tíha. A ntá tí sín kuítেকakonhya sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín.

³ ¿Xá nkexrí chrókuaáni tí chrókuaahyani kuentá tí nkehe jie chrókuaáxinni? Jhe Ìnchéni tsíchronka ch'án saoxín nkexrí chrókuaáxinni, a ntá chr'éxín tí sín tsíkinhin mé kjuakohe sín tí jeheni.

⁴ Méxra Dios kjuakoqxín ch'án kjuaxroan jie la ko kjuachaxin jie kixin chaxín tíha, la ko noexínni kaín tí kjuachaxién Nchakuen ch'án tsík'áyehēni éxí tjinkaon ch'án tsjanjon ch'án.

Jesucristo k'óna ch'án chojni

⁵ Dios la tsíchjéhya tí sín ángel kjuachaxin kixin chrók'uetōan chjasintajni chr'éxín éxí tí jie tjejónixjani.

⁶ Náhi. Éxí nixja xroon itén Dios chronkaxín kixin:

¿Xá nkexéhe tí chojni a, jaha It'éni Dios, kixin imá xráxinkávan tí jhe ch'án?

¿Xá nkexro tíha kixin imá tóxakonhan kixin tí jhe ch'án?

⁷ Jaha tsíkjich'éna ch'án éxí ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin, a ntá jie la imá kjuikosáyehé ch'án;

⁸ la jaha tsíchjehé ch'án kjuachaxin kixin kaín nkehe ts'etuenhen ch'án.*

Mé xikaha ntáchro tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuitōehya ninkehó nkehe chrókuitekakuenhya ch'án. Kjánchó naxa t'ikonhyani kixin á kaín nkehe titekakonhen ch'án.

⁹ Kjánchó ó noheni kixin Jesús la tsíkjich'éna Dios éxí chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuéhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyehē ch'án kjuachaxin náxrjón la ko Dios tjikosáyehé tí jhe ch'án kixin tí kjuasóte ch'án, ik'uén ch'án.

¹⁰ Kaín nkehe siín la kuènte Dios la ko tjejó kixin tí kjuachaxin kuènte tí jhe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjen ch'án tí t'inkaséyan. Méxra Dios kjuanjón Ìnchéni Jesucristo kixin tsjasóte ch'án kixin ntá jína kjuakoqxín ch'án kixin ntá jhe ch'án tsaáxinni ch'án.

¹¹ Kaín tí sín tsíkótjóa la ko tí nkexro kjuínchetjóa na mé chóna jnkokoá It'é. Méxra tí Xjeen Dios tósuehya ch'án tsontáchro ch'án kixin kichó ch'án tí jhe sín.

¹² Éxí ntáchro tí xroon itén Dios kixin:

* 1:12 1.10–12 Salmo 102.25–27 † 1:13 Salmo 110.1 * 2:8 2.6–8 Salmo 8.4–6

Tsochénkani tí sín kíchó ni kixin nkexro tí jaha, tsjikosáyahani tsotsjeni himno tí tójnksótsékoni tí sín kíchó ni.†

13 Kjaxin ntáchro kixin:

Janhan títékavan Dios.‡

La ko kjaxin ntáchro inaá kixin:

Ntíhi tjékian tí xjeen Dios tsíkjanjon ch'án tsík'ayáha.§

14 A ntá tí xjeen chojni mé jnkokoá kíchó la k'óna nto la ko ijnj; la kjaxin ch'ín Jesús xikaha tsík'óna ch'án nto la ko ijnj kixin jína its'en ch'án kixin jína sinchek'itjáyan ch'án tí nkexro chóna kjuachaxin t'óyan chojni, na mé t'axrjéxín kixin diablo tíha,

15 mé xikaha chrókjuinchekaá ch'án kaín tí sín chrakõnhen sín tí kjuach'en, tjeó sín éxi t'ítuenhen sín kaín yaon tjeó sín.

16 Kjaxin kuihya ch'án kixin chrókjuinkitsa ch'án tí sín ángel. Náhi. Ikui ch'án kixin tsjinkitsa ch'án tí sín tsík'axrjeníxin ch'ín Abraham.

17 A ntá t'ichjánxin chrókóyohé ch'án éxi tí sín kíchó ch'án kixin jína chrók'óna ch'án nchat'á t'etõan kuènte Dios la chrókuiikonóeheni ch'án, ntá jína tsjatsen ch'án ijje kaín chojni kixin k'uenyákonhenni ch'án.

18 Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí Jínahya kixin chrókjuasinhya sín jie.

3

Antsí tjeotan ch'ín Jesús, a ntá ch'ín Moisés la kánhyó

1 A ntá kíchó ni, jahará la tsikótjóará, la mé Dios tsík'iyahará ch'án kixin ts'ónará xjeen ch'án, a ntá chrórxaxinkáonrá jína Cristo Jesús na mé jehe ch'án mé tí apóstol la ko tí nchat'á t'etõan kuènte tí nkehe tinkáchónkini.

2 Tí ch'ín Jesús jína kuítekakõnhen ch'án Dios, mé tí nkexro tsíkjeýá ch'án sich'ehe ch'án xra, éxi kjaxin ch'ín Moisés jína kjuich'e ch'án xra k'uáyakonhen ch'án ntõe Dios.

3 Dios antsí kjuikosáyehe tí ch'ín Jesús, a ntá ch'ín Moisés la kénhyó, éxi antsí tjikosáyehe sín tí nkexro kjuich'èna ijnko nchia, a ntá tí nchia la kénhyó tjikosáyehe sín.

4 Jnkojnko nchia k'óna kixin síin nkexro kjuich'èna, kjánchó Dios mé kjuich'èna kaín nkehe síin.

5 Ch'ín Moisés jína kjuich'e ch'án xra k'uáyakonhen ch'án tí nchia kuènte Dios. Tí xra kjuich'e ch'án mé k'uénixja ch'án kuènte tí nkehe tsontáchro Dios chr'éxin.

6 A ntá Cristo la mé Xjeen Dios tí jehe ch'án, ntá kjuínchexiteýá ch'án jína la t'ayakonhen ch'án tí nchia kuènte Dios, la tíha mé jeheni, kixin tí tsitõehyani ch'án la naxa tsinkáchónkini ch'án ntá tsochéhèni kixin tí nkehe tjejóchónhenni.

Ts'ok'éhèni tí tjen Dios

7 Mé xikaha éxi ntáchro Nchakuen Dios nixja xroon itén Dios kixin:

A ntá jie tí chrókuinhínra tí nkehe ntáchro Dios,

8 chrókjuich'ehyará éxi kjuich'e tí sín ósé kuítekakõnhya sín Dios tí yaon kjuich'ehe sín prueba Dios tí nteje.

9 A ntá ntaha tí sín tsík'axrjeníxinrá ósé kjuich'èna sín prueba,

kjonté cuarenta nánó k'uikon sín tí xr̄a kjuít'a.

¹⁰ Méxr̄a kónínkakonhan tí chojni a, ntáxr̄jan kixin: “Xr̄áxin xrichoe asén sín, tjinkakonhya sín tsochóxin sín ntjaná.”

¹¹ Méxr̄a kónínkakonhan tí jehe sín, ntátjan sín

kixin chaxín tsoxiteyá kixin ts'ixenhya sín ts'ok'éhe sín tí tjén janhan.*

¹² Kíchóni, chrókóxakonhanrá kixin chrókókohya nijnko tí jahará chróchontará asánrá jínahya chrókuītoherá Dios tjechón chrókuítekákuenhyará tí jehe ch'án.

¹³ Chrókjuinchechéherá kichuárá jnkojnko yaon naxa tjen tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójiáhará.

¹⁴ A ntá tí chrók'uejóni jnkojína hasta tsjixixín éxi kuinkáchónkini tí xrankixixín, ntá síin kjuachaxin ts'ejókoni Cristo.

¹⁵ Mé x̄ikaha ntáchro kixin:

A ntá jie tí chrókuinhínrá jahará tí nkehe ntáchro Dios, chrókjuich'ehyará éxi kjuich'e tí sín ósé kuítekakonhya sín Dios.†

¹⁶ ¿A ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsikakitsjexín ch'ín Moisés tí nación Egipto?

¹⁷ ¿A ntá nkexro tí kónínkakonhen Dios tí cuarenta nánó? ¿Á jehya tí sín kjuasin jie k'uénxin nteje?

¹⁸ ¿A ntá nkexro ntáche Dios kixin chaxín tsoxiteyá kixin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya?

¹⁹ A ntá ó noheni kixin kjuachahya sín k'uixenhen sín kixin kuítekakonhya sín.

4

¹ Méxr̄a, tsintáchro Dios kixin tsjanjon ch'án kjuachaxin ts'ixenhenni ts'ok'éheni tí tjen ch'án, a ntá tóxakonheni kixin ách'e jnkojín tí jahará chrókjuachahyará chrók'uixenhenrá ntiha.

² Kixin kjaxin jeheni kuínhini itén ch'án tsaáxinni éxi kuínhin tí jehe sín, kjánchó tí jehe sín la ninkehó kjuínkítsahya sín tí tan jína kuínhin sín, kixin kjónté kuínhin sín tí tan na kuítekakonhya sín.

³ A ntá jeheni kuítekaonni, ntá ts'ixenhenni ts'ok'éheni ntaha, éxi tsintáchro Dios kixin:

Méxr̄a kónínkakonhan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjén janhan.*

Kixin Dios la tió kjuixinhin ch'án xr̄a kjuich'éna ch'án chjasintajni ntá kjuák'e ch'án k'ok'éhe ch'án.

⁴ Mé x̄ikaha í jnko nketí nixja tí xroon itén Dios chrónka kuente tí yaon yātox̄in ntáchro kixin:

Kjuixinhin Dios kaín xr̄a ntá kjuák'e ch'án k'ok'éhe ch'án tí yaon yātox̄in.†

⁵ A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjayan jnkojín chojni chrók'uixenhen sín chrók'ok'éhe sín.

A ntá tí sín s̄ox̄in kuínhin tí tan chrókuaáxin sín la k'uixenhya sín kixin kuítekakonhya sín tí tan a.

* 3:11 3.7-11 Salmo 95.7-11 † 3:15 Salmo 95.7-8 * 4:3 Salmo 95.11 † 4:4 Génesis 2.2 ‡ 4:5 Salmo 95.11

7 Méxra Dios tsíkjeýá ch'án í jnko yaon, mé tí yaon jie, a ntá chr'exín nixjaxín ch'án tí nkehe tsíchronka ch'ín David éxí ntáchro tí xroon itén Dios kixin: A ntá jie tí tsinhínrá tí nkehe ntáchro Dios, chrókujnchexiteýará.[§]

8 Kixin tí chrókjuanjon ch'ín Josué kjuachaxin kixin chrók'ok'éhe tí sín israelita,* ntá Dios la í chrónixjahya ch'án kuénte í jnko yaon.

9 A ntá naxa tjechónhen tí ts'ok'éhe tí sín tinkáchónki Dios;

10 kixin tí nkexro ts'ixenhen ts'ok'éhe tí tjen Dios tsíkjixinhin ch'án tí xra kuénte ch'án éxí yóhe kjaxin Dios kjuixinhin ch'án tí xra kuénte ch'án ntá kjuák'e ch'án k'ok'éhe ch'án.

11 T'ichjánxin kixin kaín asénni chrókjuéyáni nkexrí chrók'uixenhenni chrók'ok'éheni, kixin chrókóyóghyani éxí tí sín kuítekakonhya.

12 Kixin tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí njnka asén chojni la ko nchakuen chojni hasta tí nkaya asén chojni. Tíha mé nchexraxinkaon chojni kaín nkehe tjenkayáxin sín la ko kaín nkehe ntáchro asén sín.

13 Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kixin kaín nkehe la noxín siín t'ikon tí nkexro ts'áyéhe kuéntá.

Jesús mé tí nchat'á imá tjeoan

14 Jesús tí Xjeen Dios mé tí nchat'á tjeoan kuénténi mé k'uixenhen tí tjen Dios la méxra chrókuítóehyani tí tinkáchónkini tí jehe ch'án.

15 Méxra jehe ch'án mé tí nchat'á tjeoan kuénténi mé tsjinkítsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxí sítónhen tí jeheni, kjánchó jehe ch'án la ninkehó jie kjuasinhya ch'án kjónté xikaha kónhen ch'án.

16 Méxra kaín asénni chrókóchjineheni Dios tí tjen ch'án t'etóan ch'án kixin chrókuikónógheni ch'án la ko chrókjuinkítsa ch'án tí jeheni tí nkehe chrók'uichjánxinhini.

5

1 Kaín nchat'á t'etóan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjáyaxín tí jie kuénte chojni.

2 Kjaxin tí nchat'á a la fuértehya kixin chojni ó, a ntá chrókóninkakuenhya ch'án tí sín noehya la ko tí sín tsíkjichroe.

3 Kjaxin jehe ch'án, kixin fuértehya ch'án t'ichjánxin tsjanjon ch'án iko its'en kixin tí jie chóna ch'án jehe ch'án éxí tjanjon ch'án nkehe kuénte tí í so chojni chóna jie.

4 Ninkexró xitjahya jehó sich'éna asén nchat'á t'etóan. Náhí. Jehó tí sín tsíkjeýá Dios tsík'áyéhe tí xra éxí tsík'áyéhe ch'ín Aarón.

5 Mé xikaha Cristo, kjuich'énahya ch'án jehó ch'án asén ch'án nchat'á t'etóan. Náhí. Dios mé kjuikosáyehe ch'án mé tsíkjanjon tí xra éxí tsintáchro kixin:

Jaha mé xjanna;

Janhan mé kjuít'ána ijie.*

6 Kjaxin í jnko nketí nixja xroon itén Dios ntáchro kixin: Jaha mé ijnko nchat'á tsjak'e jnkochrín,

§ 4:7 Salmo 95.7-8 * 4:8 Josué 22.4 * 5:5 Salmo 2.7

éxi yóhē k'uéjkak'e ch'ín Melquisedec.†

⁷ Tió kjuák'e Cristo ntihi chjasintajni imá tsjánka ch'án la ko itsen chrónóhē ch'án Dios, kixin Dios chóna kjuachaxin chrókjuinchekaá ch'án kixin chrók'uenhya ch'án; la Dios la kuínhin kixin xíkaha kuítekaon ch'án.

⁸ Méxra Cristo, kjónté Xjeen Dios, la kuítekaon ch'án kjuínchexiteyá ch'án kjónté tí kjuasote ch'án.

⁹ Mé kjuínchexiteyá ch'án, ntá kjuacha ch'án k'óna ch'án tí nkekro sinchekaá jnkochrixin kaín tí chojni sinchexiteyéhē tí jehe ch'án.

¹⁰ A ntá Dios mé tsíkjih'éna ch'án nchát'á t'etōan éxi yóhē kjuák'e ch'ín Melquisedec.

Jehya jína chrókuítóheni tí tinkáchónkini Ìnchéni

¹¹ Chóntani nchónhya nkehe chróchrónkani kuènte tíha, kjánchó imá xra chróchrónkaxíni tíha kixin tiénxinhyará jahará.

¹² Ntá k'uátsinka nchónhya tiempo, a ntá ó jína chrók'ónará maestro, ntá náhi kixin naxa t'ichjánxinhanrá nkekro chrókjuakohará inaá tí nkehe xrahya kuènte itén Dios. Éxi xík'ónará lōntirá, t'ichjánxin chrók'uirá tsjen inaá kixin xitjahya sinterá nkehe cha.

¹³ A ntá tí sín it'i tsjen ó, na mé yóhē chánjan takí tsjachahya sín tsjeyá sín nkekxi chrók'uejó sín jína.

¹⁴ Á ntá tí nkehe cha mé ine tí chojni nteto kixin ó nohe sín ti nkehe jína la ko tí nkehe jínahya.

6

¹ Naxa chrókjueyáni kixin jína chrókjuenkayáxinni éxi chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankixixín kuènte Cristo. Náhi. T'ichjánxinhya naxa chrókjuakoharáni kixin chrókuítóhérá tí jie k'uéjkásinrá chrók'uéxinrá, la ko nkekxi chrókuinkachónkirá Dios,

² la ko nkekxi chrókuikite chojni, la ko nkekxi ts'ejotja tjará chrítaón tí sín tinkáchónki Cristo, la ko nkekxi tsoxechón chojni tsík'en, la ko nkekxi chrókuítóexín ijie chojni.

³ A ntá tí Dios chrókjuanjōn kjuachaxin la chrókjuakoni í so nkehe.

⁴ A ntá tí sín ó tsík'áyéhē sín tí xrohi, la ko ó tsjexín sín tí nkehe kjuanjōn Dios, la ko tsík'áyéhē sín tí Nchakuen Dios,

⁵ la ko kóxrjínhin sín tí nkehe jína kuènte itén Dios, la ko kónohe sín nkekxi tí kjuachaxin tsochóna tí chjasintajni chr'éxin,

⁶ a ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín inaá, kixin tí xíkaha la éxi chrókjuak'enkani sín ntacruz tí Xjeen Dios inaá la ko chrókjuanoá sín ch'án nkayakon nchónhya chojni.

⁷ Éxi nonte jnkōjnko vez t'aniá chrin la tsjatan la ts'óna jína, a ntá kjuacha tí sín kjuich'e xra kixin Dios kjuíncheyaon ntiha.

⁸ A ntá tí t'óna ntach'i la ko kach'i la ninkehó sínkíhya la tsoínínkakōnhen Dios, la tí tsjixixín mé tsoche.

Tí nkehe tjejóhónhenni mé tjinkitsa kixin jína ts'ejóni

⁹ Kjónté nixjani xíkaha, kichó ni, ó noheni kixin chaxín jína tjejorá k'uitjará tí ntja tsaáxinrá.

† 5:6 Salmo 110.4

¹⁰ Kíxin Dios la jína, la ts'itjáyenhya ch'án tí xra jína tjejoch'erá kíxin tjuèherá kichuárá, mé xíkaha kjuákoxinrá kíxin kjuínkĩsará tí kichuárá tinkáchónki Cristo la naḡa tjejótjinkĩsará sín xíkaha.

¹¹ Tjinkaonni kíxin jnkojnkorá chrókjuákoxinrá hasta tsjixixin kíxin chon-tará kjuachéhe chrókjuínkĩsará kichuárá kíxin chaxín ts'ayéhérá tí nkehe tjejochonhénra.

¹² Tjinkakonhyani kíxin chrókjanrá chrókósáhará. Náhi. Tjinkaonni kíxin chrókjuákoxinrá éxi tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsíntáchro Dios kíxin tsjanjon ch'án.

¹³ A ntá Dios, tió tsíntáchro ch'án kíxin tsjanjon ch'án nkehe ts'áyéhe tí ch'ín Abraham la jehó Dios k'uákjenxin asén kíxin kohya nkexro antsí tjeoan chrók'uákjenxin ch'án.

¹⁴ Ntáchro ch'án kíxin chaxín sincheyao ch'án tí ch'ín Abraham la ko nchónhya chojni ts'axrjenixin tí jehe ch'án.*

¹⁵ Ch'ín Abraham kjuák'echónhen ch'án isé kíxin ts'áyéhe ch'án tí nkehe tsíntáchro Dios.

¹⁶ A ntá tió t'ákjenxin chojni ijnko nkexro la mé t'ákjenxin sín ijnko nkexro antsí tjeoan, a ntá jehó sín la náhi. A ntá ts'ákjenxin sín tí xíkaha kíxin ijnko nkehe tsoxiteyá, a ntá kohya nkexro tsontáchro ninkehó.

¹⁷ Méxra Dios k'uákjenxin ch'án asén ch'án tsíntáchro ch'án kíxin chaxín tsoxiteyá, kíxin tjinkaon ch'án chrókjuákoxin ch'án noxín kíxin chrókónohe tí sín ts'áyéhe tí nkehe tsjanjon ch'án kíxin sinchexiteyá ch'án tí nkehe tsíntáchro ch'án la í tsjitóxiyenhya ch'án ninkehó tíha.

¹⁸ Mé xíkaha siín yaá nkehe xitjahya ts'ixitóxin, kíxin Dios la xitjahya sich'ia; kíxin tíha Dios nchenoexínni kíxin chaxín tsoxiteyá, la mé jeheni kjuancheheni ch'án kíxin chrók'uayakonhenni ch'án la ko tjejóchónhenni tí nkehe tsjanjon ch'án.

¹⁹ Tí tjejóchónhenni xíkaha la jína ts'ejó asénni éxi yóhe tí ntabárcq chón-ta gancho tjechrúexin kíxin kohya nketí sátsji. Méxra xíkaha kjáxin tí nkehe tjejóchónhenni la sátsíkji hasta nóton tí ka cortina tjen nkaxenhen njnko tjen nkaya nkajní,

²⁰ tí senó k'uixenhen Jesús kuakitjehe ch'án ijnko ntja ts'ixenxínni. Mé xíkaha jehe ch'án k'óna ch'án nchat'á t'etqan jnkochríxin éxi yóhe kjuák'e tí ch'ín Melquisedec.

7

Ch'ín Jesús mé nchat'á éxi yóhe k'uékjak'e ch'ín Melquisedec

¹ Tí ch'ín Melquisedec mé k'ué rey kuènte chjasin Salem la ko nchat'á kuènte Dios tjen nkaya nkajní. A ntá tió ch'ín Abraham kjanxin ch'án tí tsíkjkjanjonko ch'án tí í so sín rey, kjuacha ch'án, ntá ch'ín Melquisedec kjuixinhin ch'án ntja ikui ch'ín Abraham, ntá jehe ch'ín Melquisedec kjuíncheyao ch'án tí ch'ín Abraham.

² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjacha ch'án tí tsíkjkjanjonko ch'án tí sín rey.* A ntá ihnié ch'ín Melquisedec mé t'axrjéxin saoxín kíxin “ijnko rey jína”; a ntá jehe ch'án k'ué rey kuènte chjasin Salem, tíha mé t'axrjéxin kíxin “kjuaxróxin”, la mé xíkaha jehe ch'án mé “ijnko rey tjanjon kjuaxróxin”.

* 6:14 Génesis 22.16-17 * 7:2 7.1-2 Génesis 14.17-20

³ A ntá ch'ín Melquisedec la noehya sín nkexro it'é ch'án la ko nkexro iné ch'án la ko nkexro tsík'axrjeníxin ch'án; la ko noehya sin nkesá tsíkokjhi ch'án la ko nkesá tsík'en ch'án. Mé xíkaha tóyóhē tí Xjeen Dios kixin jehe ch'án mé ijnko nchat'á jnkochríxín.

⁴ A ntá jie, tsjehérá kixin imá t'etóan tí ch'ín Melquisedec kixin tí ch'ín Abraham k'uaxrjeníxinni, la tsíchjéhe ch'án tí ch'ín Melquisedec diezmo tí nkehe tsíkjača ch'án tí tsíkjanjonko ch'an tí sín rey.

⁵ Éxí nixja ley tsík'etóan ch'ín Moisés, kixin tí sín nchat'á tsík'axrjeníxin tí ch'ín Leví chóna sín kjuachaxin tsjanchehe sín kaín xín chojni diezmo kjónté naxá kjéhya sín, tsík'axrjeníxin sín tí ch'ín Abraham éxí tí jehe sín.

⁶ A ntá ch'ín Melquisedec, kjónté tsík'axrjeníxinhya ch'án tí ch'ín Leví, na mé kjuich'ehe ch'án cobra tí ch'ín Abraham, mé tí ch'ín tsík'áyéhē tí nkehe tsintácho Dios. Mé xíkaha tí ch'ín Melquisedec tsíkjincheyaon ch'án tí ch'ín Abraham.

⁷ Kohya nkexro tsontácho kixin chaxínhya kixin tí nkexro ncheyaon la antsi má t'etóan, a ntá tí nkexro tsíkóyaon la t'etóanhya. Náhi.

⁸ A ntá tí tjejóni, tí sín t'áyéhē tí diezmo la mé chojni ts'en ó. Kjánchó ntácho tí xroon itén Dios kixin tí ch'ín Melquisedec mé ijnko chojni naxá tsík'enhya, la naxá tjechón.

⁹ Mé t'axrjéxín kixin ch'ín Leví la ko kaín xín tí sín nchat'á tsík'axrjeníxin ch'án, mé tí sín t'áyéhē sín diezmo jie, la mé kjaxin jehe sín tsíkjenkehe sín diezmo tí ch'ín Melquisedec tió tsíkjenká ch'ín Abraham,

¹⁰ kixin naxá tjiko cuerpo kuènte ch'án tí sín ts'axrjeníxin ch'án, naxá kokjéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhē sín tí ley kixin tí sín nchat'á levita, mé tsík'axrjeníxin sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naxá chrókónoxín í jnko nchat'á í chrókóyóehya éxí tí ch'ín Aarón. A ntá kjuachahya sín xíkaha ntá t'ichjánxín chrókónoxín ijnko nchat'á chrókóyóhē éxí tí ch'ín Melquisedec.

¹² A ntá tí chrók'uixinkí tí nchat'á la kjaxin chrók'uixinkí tí ley.

¹³ A ntá tí xroon itén Dios chrónka tíhi kuènte Ìnchéni. A ntá jehe ch'án la tsík'axrjeníxin ch'án í jnko nkexro kuènte Israel la kohya ninxeró tsík'óna nchat'á tsík'axrjeníxin tí sín a.

¹⁴ Kixin ó noxín kixin Ìnchéni tsík'axrjeníxin ch'án tí ch'ín Judá, a ntá ch'ín Moisés la chrónkahya ch'án ninkehó kuènte tí sín ts'axrjeníxin tí ch'ín a tió nixja ch'án kuènte tí sín nchat'á.

¹⁵ A ntá tíhi la antsi má kónoxín kixin tí nchat'á nixin la tóyóhē éxí ch'ín Melquisedec

¹⁶ kixin tió k'óna ch'án nchat'á la jehya kixin xíkaha chrók'uetoan ijnko ley kixin nkexro chrók'uaxrjeníxin ch'án. Náhi. Ó jehí k'óna ch'án nchat'á kixin tí kjuachaxin chóna ch'án la xitjahya ts'itjayan.

¹⁷ Kixin nixja Dios kixin nkexrí tjen tí jehe ch'án, ntácho kixin:

Jaha mé ijnko nchat'á tsjak'e jnkochríxín,

éxí yóhē k'uékjak'e ch'ín Melquisedec.†

¹⁸ Méxra tí nkehe k'uék'etóan senó mé ch'ehya xra jie kixin kánhyó kjuachaxin k'uéchóna la ko kjuachahya,

19 kixin tí nkehe k'uętoan ch'in Moisés kjuachahya kjuinchetjóá ninkehó nkehe. A ntá jie chóntani ijnko nkehe antsi jina tjejóchónhenni kixin tíha mé antsi jina tsochjinexínni Dios.

20 A ntá tió ntácho Dios tíha la tsík'ákjenxin ch'án asén ch'án jehó ch'án.

21 La ntá tí í so nchat'á, tió tsíkónoxín sín, tsík'ákjenxinhya Dios asén ch'án. A ntá tió tsíkónoxín tí nchat'á í la Dios tsík'ákjenxin ch'án asén ch'án. A ntá ntácho xroon itén Dios kixin: Inchéni tsík'ákjenxin asén ch'án

a ntá ts'ixitóxinhya tí nkehe tsintácho ch'án:

“Jaha mé ijnko nchat'á tsjak'e jnkochrixin

éxí yóhę k'uékjak'e ch'in Melquisedec.”[‡]

22 Méxra ch'in Jesús ntácho kixin tí pacto t'ętoan ch'án la antsi má jina, a ntá tí pacto senó la náhi.

23 Ntá k'uúxin nchónhya sín nchat'á, kjánchó nkák'en sín, ntá xitjahya naxa chrókjuich'e sín tí xra a.

24 A ntá ch'in Jesús la ts'enhya ch'án la t'ichjánxinhya kixin í jnko nkebro chrókuakja tí xra kuente ch'án chrók'óna nchat'á.

25 Méxra jehe ch'án tsjacha sincheakaá ch'án jnkochrixin tí sín tsochjinehe Dios kixin tinkáchónki sín tí jehe ch'án kixin itjen ch'án jnkochrixin chrónóhę ch'án Dios kixin chrókjuincheakaáni ch'án.

26 Mé xikaha Jesús mé tí nchat'á t'ętoan t'ichjánxinhinni; jehe ch'án mé ijnko nkebro tjóá, chóntahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní.

27 Ntá tóyóhęya tí í so nchat'á t'ętoan, kixin t'ichjánxin ts'óyán sín iko tsjanjon sín tsochjehe sín Dios kaín yaon, saoxín kixin tí jie kuente sín, a ntá chr'ęxin kixin tí jie chóna tí í so chojni. A ntá ch'in Jesús jnkokoxón vez kjuanjon asén ch'án ik'uén ch'án.

28 Tí ley k'uék'ętoan ch'in Moisés t'ętoan kixin chojni naxa chóna jie chrók'óna nchat'á, a ntá Dios tsík'ákjenxin asén ch'án tió kjuixin k'óna tí ley, ntácho ch'án kixin tí Xjeen ch'án mé ts'óna nchat'á t'ętoan kixin jina kjuincheteyá ch'án jnkochrixin.

8

Ch'in Jesús nixjxin ch'án ijnko pacto nixin

1 Tí nkehe antsi má tjeoan chrónkani la mé tíhi kixin tí nchat'á kuenteni mé t'ętoan ch'án, la ko tjetjxin ch'án nkaya nkajní, nó chjina tí trono t'ętoaxín Dios,

2 k'óna ch'án nchat'á tí njnko chaxín tsíkjich'éna Inchéni, la jehya chojni tsíkjich'éna tíha.

3 Kaín nchat'á t'ętoan tsík'áyehę xra kixin tsjanjon nkehe la ko iko its'en. Méxra Jesucristo t'ichjánxin kixin tsjanjon ch'án ichrén nkehe.

4 Tí chrókjuak'e ch'án chjasintajni, chrók'ónahya ch'án nchat'á kixin naxa siín nchat'á tjanjon nkehe k'uętoan tí ley tsík'áyehę ch'in Moisés.

5 A ntá tí sín nchat'á k'uékjanjon nkehe tóyóhó tí nkehe siín nkaya nkajní. Noheni kixin tóyóhó kixin tió ch'in Moisés chrókjuich'éna ch'án njnko la ntáche Dios tí jehe ch'án kixin: “Tjenkayáxian jina, a ntá s'ich'éna jaha éxí tí nkehe kjuákuáxian chritaón jna.”*

⁶ A ntá tí nchát'á t'etōan kuènteni tjech'e ch'án xrā antsí jína kixin jehe ch'án mé tí nkexro nixjāxín tí pacto nixin tsintáchro Dios chrónka tí nkehe jína tsonhen chr'éxin.

⁷ A ntá tí pacto tsík'etōan saoxín la tí chróxiteyá jína, la t'ichjānxīnhyā chrók'óna yóxin pacto.

⁸ A ntá Dios k'uikon kixin kjuínchexiteyáhya tí sín a, éxí ntáchro xroon itén Dios kixin:

Ntáchro Ìnchéni kixin: Itsi ijnko yaon

mé tsjānjuan ijnko pacto nixin tsochónta tí sín nación Israel la ko tí sín chjasin Judá.

⁹ Jehya xikaha tí pacto kuétuānhan tí sín tsík'axrjeníxinrá ósé,

tí yaon kjuínkītsa sín k'uaxrjexín sín tí nación Egipto;

kjānchó kjuínchexiteyáhya sín tí pacto kuétuānhan sín,

méxrā kujtoha sín, ichro Ìnchéni.

¹⁰ Tí pacto tsétuānhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráxinkavan asén sín tí ley tsétōan,

a ntá tí kjuaxrexinkaon kuènte sín tsokjian tí nkehe tsétuānhan sín.

A ntá janhan ts'óna Dios kuènte sín,

a ntá jehe sín mé ts'óna chjasin kuèntana.

¹¹ Ts'ichjānxīnhyā naxā tsjakohe kichó sín

kixin chróchóxin sín Ìnchéni,

kixin kaín sín tsochóxinna sín,

kjonté chojni imá ntsínsí la ko chojni imá hyé.

¹² Sintak'itjāyan tí nkehe jínahya kjuích'e sín

la ko í tsoxráxinkakonhyā inaá tí jie chóna sín.†

¹³ Xikaha nixja Dios kuènte tí pacto nixin ts'etōan ch'án kixin tsikóntaxin tí pacto saoxín k'uetōan ch'án, tíha mé tinkákóntaxin la ko tinkákjeje, na í séhya ts'itjāyan.

9

Tí nínko chjasintajni la ko tí nínko nkaya nkajni

¹ A ntá tí pacto saoxín t'etōan nkexrí chróxrxinkaooni Dios, kixin tí nínko ntihyó chjasintajni.

² A ntá tí nínko k'uéjak'e mé tí cuarto saoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejókjen tí niotja k'uéxrxinkakonxín sín Dios.

³ Nóton tí yóxin ka cortina kjuák'e tí cuarto k'uekjinchek'in sín tí Cuarto Antsí Tjóá.

⁴ Ntiha k'uéjak'e tí altar tsík'óna chica oro k'uéjakaxín sín tí chjincō la ko k'uéjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uéjak'e ijnko nchésen tsík'óna chica oro k'uék'inka maná k'óna niotja, la ko kjāxín k'uéjak'e tí nta k'uékjixín ch'in Aarón kjuankíxín k'uayan nta ntahte, la ko kjāxín ntiha kjuák'e tí xro chóna tí tan k'uetōan Dios.

⁵ Chriáón tí ntacajón k'uék'ejó yaá ángel tsíkjanoya tsíkjentoá kanenee chriáón tí kjuák'e tí kjuachaxin kuènte Dios; ntaha k'uékjīnxín tí jie k'uéchóna chojni. A ntá ijie la t'ichjānxīnhyā naxā tsonixjani kuènte tíha.

† 8:12 8.8-12 Jeremías 31.31-34

6 **A** ntá xikaha k'u'éjó tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuènte nínko kixin tí xra ch'e sín kuènte nínko.

7 **A** ntá tí yóxin cuarto jehó tí nchat'á t'etoan t'ixenhen ch'án jnkokoá vez jnkojko nánó; a ntá tí t'ixenhen ch'án t'ichjánxin ts'ixenko ch'án ijníé iko tsochjéhe ch'án Dios tsotjuáxin ijíé ch'án la ko ijíé tí i so chojni.

8 **A** ntá tí Nchakuen Dios nchenoxínni tíhi kixin nachrohe k'uékjich'e xra tí cuarto saoxín la naxa tjexrankehya kixin chrók'uixenhenni tí Cuarto Antsí Tjóá.

9 Kaín tíha tjakoxín ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyan sín xitjahya nchenoexín sín kixin á chaxín kótjóá tí jie k'uéchóna sín kixin xikaha k'uéxaxinkaon sín Dios.

10 **A** ntá tíha jehó t'etoan kuènte tí nkehe chrókjóné sín la ko tí nkehe chrók'ui sín la ko tí chrók'ónti sín kixin chrókótjuáxin ijíé sín, kaín tíha mé k'uítuenhen sín kuènte cuerpo ó la jehó k'uéchóna kjuachaxin tí naxa kjuinkíhya Dios nkexrí chróxaxinkaon sín ch'án.

11 **A** ntá ó kui Cristo, jehe ch'án mé nchat'á t'etoan kuènte tí nkehe antsí jína itsi. **A** ntá tí nínko ch'e ch'án xra la antsí jína la ko antsí ntoá, la jehya chojni tsíkjich'éna tíha kixin jehya chjasintajni ntíhi tjen.

12 **Tió** k'uixenhen Cristo tí Cuarto Tjóá, la jehya kixin chrókjuanjon ch'án ijníé koténtsó la ko ijníé koxintáxjan. Náhi. Ijníé ch'án kjuanjon ch'án; mé xikaha k'uixenhen ch'án jnkokoá vez ntiha mé xikaha kjuenka ch'án kixin chrókuaáxinni jnkochríxin.

13 **A** ntá tí ijníé koxinta la ko ijníé koténtsó la ko tí nteso kuènte tí koxintáxjan tsíchexín tí altar tikítexín tí sín tjuáhya la mé tíha chóna kjuachaxin tsotjuáxin tí chrítaón ó.

14 **A** ntá tí xikaha, la kjá antsí má chóna kjuachaxin tí ijníé Cristo. Kixin tí kjuachaxin Nchakuen Dios tjen jnkochríxin, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chónahya ch'án. **A** ntá ijníé ch'án nchetjóá tí nkehe kjuích'eni senó chrók'uenxínni kixin ntá jie la jína chrókjuich'eheni xra Dios tjechón.

15 **Méxra** Jesucristo nixjaxín ch'án tí pacto nixin k'uetoan Dios. Kixin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuenhenni senó; kixin tí sín k'uíyehé Dios la jína chrók'uáyéhe sín tí nkehe tsjejehya kixin jehe ch'án xikaha tsintáchro ch'án tsjanjon ch'án.

16 **A** ntá tí siín ijnko nkehe tsintáchro ijnko chojni kjuák'e na ntá ik'uén la t'ichjánxin tsnoxín kixin chaxín tsík'en tí nkexro tsíkjich'éna.

17 **A** ntá tí nkehe tsintáchro ch'án la sínkíhya tí naxa tjechón tí nkexro tsíkjich'éna; jehó tíó chrók'uen ch'án mé sínkí.

18 **Méxra** tí pacto xrankíxixín tsík'etoan Dios kjuankíxin kjuích'e xra kixin k'uítji ijní.

19 **Ch'ín** Moisés tsíchronka ch'án kaín nkehe tsík'etoan tí ley kuínhin kaín tí chojni; a ntá chr'éxin kuákja ch'án ichjoén kolélo kjátse la koí ntarama hisopo, ntá kjuínchekjatjaxín ch'án ijníé koxintáxjan la ko ijníé koténtsó tsíkjiko ínta, ntá kuíkjanjin ch'án tí libro chóna ley la ko kuíkjanjin ch'án káin tí chojni.

20 **A** ntá ntáchro ch'án kixin: "Tí jni i tsoxiteyáxin tí pacto k'uetoan Dios chrókjuínchexiteyéhérá jahará."*

21 **Tí** ch'ín Moisés kjaxín kuíkjanjin ch'án jni tí nínko la ko kaín nkehe t'ichjánxin tí nkaxenhen nínko.

* 9:20 9.19-20 Éxodo 24.6-8

²² Kíxin xíkaha ntáchro tí ley káin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uíxikjanjinhya jni.

Tí ik'uén Cristo mé tsjinxín ijieni

²³ Méxra t'ichjánxin káin ik'uén iko kótjuáxin tí nkehe a, táha mé tóyóhó tí nkehe síin nkaya nkajni; a ntá tí nkehe chaxín kuènte nkaya nkajni t'ichjánxin ijnko nkehe antsí jina chrók'uen.

²⁴ A ntá Cristo k'uixenhya tí njnko tsíkjich'éanaxin chojni tja, táha mé ijnko nkehe tóyóhó tí njnko chaxín. Náhi. Jehe ch'án mé k'uixenhen ch'án tí nkaya nkajni, a ntá jie mé tjen ch'án tí tjen Dios nixjxin ch'án kaín ni.

²⁵ A ntá jehe ch'án la jehya jnkoyaxón k'uixenhen ch'án ntiha k'uenyákonhenni ch'án. Náhi. A ntá tí nchat'a t'etqan t'ixenhen tí Cuarto Tjóá jnkojnko nánó káin tsjanjon ch'án ijnié ko ó.

²⁶ A ntá tí xíkaha chrókónhen Cristo la t'ichjánxin káin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez káin tsjinxín ijieni.

²⁷ Mé xíkaha kaín ni its'enni jnkokoá vez, a ntá chr'éxin tsitoxén ijieni.

²⁸ Mé xíkaha kjaxin Cristo jnkokoá vez ik'uén ch'án káin tsjinxín ijie nchónhya chojni. A ntá chr'éxin itsi ch'án inaá, jehya káin naxa tsjatsen ch'án ijie chojni. Náhi. Sinchekaá ch'án tí chojni ó tsíkótjóá tjejóchónhen itsi ch'án.

10

¹ A ntá tí ley k'uetqanxin ch'in Moisés la tóyóhó tí nkehe jina tsi la jehya tí nkehe chrókuaáxinni. Méxra tí ley kjuachahya kjuínchetjóá tí sín kóchjinehe Dios kjuanjón sín iko its'en jnkojnko nánó.

² A ntá tí chrókjuacha tí ley chrókjuinchetjóá ijie sín, ntá chrókjuenkayáxinhya sín káin naxa chróchóna sín jie, la chrókuítóhe sín, í chrókjuanjónhya sín iko its'en.

³ A ntá xíkaha ich'e sín t'óyán sín ko, la jnkojnko nánó xraxinkakonxin sín tí jie tsíkjasin sín

⁴ káin ijnié koxinta la ko ijnié kotentso xitjahya tsjinxín ijie chojni.

⁵ A ntá tió Cristo kui chjasintajni ntáche ch'án Dios káin:

Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhi.

Jaha tsíkjich'éna ijnko cuerpo káin tsochonta janhan.

⁶ Jaha tóxrjánhya iko tsichján la ko tí í so nkehe chrókjuanjónni chrókjuakjinxian ijie.

⁷ A ntá ntátjan ch'án káin: “A ntá ijie la ntihi tjén janhan káin sjntaxiteyá tí nkehe tóxrjínhan jaha Dios,

éxi nixja xroon chrónka nkexrí chrókjuít'a.”*

⁸ Senó ntáchro káin Dios tjinkakonhya la ko tóxrjénhya ch'án iko its'en chrókjuanjónni la ko ninkehó nkehe chrókjuanjónni chrókjuinxín ijieni kjónté tí ley k'uetqan káin xíkaha chrókónhen.

⁹ A ntá chr'éxin tsintáchro káin: “A ntá k'uinka janhan káin sjntaxiteyá tí nkehe tóxrjínhan jaha Dios,” ichro ch'án. Mé xíkaha kjuatsen ch'án tí ko k'uék'óyán sín ósé, a ntá jehe ch'án kjuanjón ch'án ijnko nkehe njxin.

* 10:7 10.5-7 Salmo 40.6-8

¹⁰ Dios kjuínchetjuáxinni kixin Jesucristo kjuínchexiteyá éxí tóxrjínhjn Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrín.

¹¹ A ntá kaín ncha't'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjinxín ijíe chojni.

¹² A ntá Jesucristo mé jnkokoá vez k'uenyákonhenni ch'án kixin tsotjuáxin ijíeni la tíha mé sich'e xra jnkochrín. A ntá kjuixin ntá sákjuj ch'án kjuák'etjaxín ch'án nó tí tja chjina kuènte Dios.

¹³ A ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'etöan sín.

¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsikótjóá.

¹⁵ A ntá tí Nchakuen Dios nchenoheni tíhi kixin senó tsintáχρο kixin:

¹⁶ Tí pacto tsotjahá tí jehe sín tió ts'atsínka tí yaon a, ichro Ìnchéni; Síntráxinkavan asén sín tí ley tsétöan, a ntá tí kjuaxrexinkaon kuènte sín tsokjian tí nkehe tjínkavan.†

¹⁷ Kjaxin ntáχρο kixin:

Í tsoxráxinkakonhya inaá tí ijíe sín la ko tí nkehe jínahya kjuích'e sín.‡

¹⁸ Mé xikaha tí ó kótjóá ijíeni la t'ichjánxinhya í so nkehe chrókjuanjoni chrókótjuáxin tí ijíeni.

Méxra t'ichjánxjn tsqchjineheni Dios

¹⁹ Kichóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijíe Jesucristo,

²⁰ chréheni tí ntja nixin mé tí ntja tjechón kuakitjehe ch'án nóton tí ka cortina, tíha mé tí cuerpo kuènte ch'án.

²¹ Jesús mé tí ncha't'á tjetöan kuènteni t'etöan tí ntöe Dios.

²² Méxra xikaha chrókóchjineheni Dios kaín asénni chrókuinkáchónkini ch'án chaxín kixin jehe ch'án tsíkjinchetjóá ch'án asénni kixin chrókjuenkayáxinhyani kixin naxa chóntani jie kixin tí cuerpo kuènteni kótjuáxin tí ntá jehó.§

²³ Chrókuítöehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsintáχρο ch'án.

²⁴ Chrókjueyáni nkexrí chrókjuinkitsani kichó ni kixin chrótjuèheni kichó ni la chrókjuich'eni tí nkehe jína.

²⁵ Chrókuítöehyani chrókójnkoktséni, chrókóyöehyani éxí tí sín í tójnkoktséhya sín. Náhí. Chrókjuinchehéheni kichó ni antsí má jie kixin ó noheni kixin í séhya tsokjan Ìnchéni.

²⁶ A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani.

²⁷ A ntá jehó itjen tí kjuachrakon jie tsitöexín jie la ko tí xrohi tjeche ts'itjáyanxín tí sín nínkakonhen Dios.

²⁸ A ntá tí tjen jnkójn nkexro titekakonhya tí ley k'uetöanxín ch'ín Moisés, la tsönoxín yaá o y'á tí sín tsík'ikon tí jie tsíkjasín sín, tíha mé ts'enxín sín la kohya nkexro tsíkonóehé tí jehe sín.

²⁹ ¿Á tjenkayáxinhya antsí má chrókjuasóte tí sín kuítekakuenhya tí Xjeen Dios la ko chónthya sín kjuasáya tí ijníe ch'án la ko t'ántaxínhjn sín tí

Nchakuen Dios tjuèheni? Kíxin tí jni chrónkaxín káxin ts'etqanxín tí pacto la ko tí jni k'uújmáxinni.

³⁰ Noheni káxin tsíntáchro Ìnchéni káxin: “Janhan mé tóna tocar sintakitoaxián ijje chojni la ko janhan tsjénkahá sín.”* Kjaxin tsíntáchro káxin: “Ìnchéni sinchekitogexín ijje tí sín tinkáchónki ch'án.”†

³¹ Méxra kjuachrakon jie chrók'uanótjenyáni tí tja Dios tjechón.

³² A ntá chróxráxínkáonrá jahará tí nkehe tsíkónhen ósé káxin tió jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá.

³³ A ntá jnkójín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkítsa tí sín tsík'ekon.

³⁴ A ntá jahará kujikonóghérá tí sín tjejóchjina ntogechiso, a ntá jahará kóninkákonhyará kjónté k'uaxrjahará kaín nkehe chontará, káxin ó nohará káxin nkaya nkajni chontará nkehe antsí jina chónhya tsjeje.

³⁵ Chrókuítógherá tí nkehe tinkáchónkirá káxin ó nohará káxin tíha mé ts'ayéxinrá nkehe chr'éxin.

³⁶ Kjaxin jahará t'ichjánxín chrók'uejochonhénrá chrókóninkákonhyará kjónté ichrén nkehe chrókónhanrá, káxin sjch'era tí nkehe tjinkaon Dios, káxin xikaha chrók'uayéhérá tí nkehe tsíntáchro tí jehe ch'án.

³⁷ Káxin xikaha ntáchro xroon itén Dios káxin:

Kánhyó sé

itsi tí nkexro tsi, í sinchexrjenhya.

³⁸ Tí sín kótjóá asén mé tjejóchónxin sín káxin tinkáchónki sín Dios; a ntá tí sín tsitoghe tí janhan la í tsoghánahya tí xikaha ch'e sín.‡

³⁹ Kjánchó jeheni jehya xikaha chrókuítógheni chrókuinkáchónkihyani tí jehe ch'án káxin ntá chrókjuasinni jie chrók'uitjáyánxinni. Náhí. Tinkáchónkini ch'án la tíha chrókuaáxinni.

11

Tí fe

¹ Tí fe chóntani la mé noexínni chaxín káxin tsoxiteyá ts'áyéheni tí nkehe tjejóchónhenni, la ko noexínni chaxín káxin kjónté ijnko nkehe t'ikonhyani la chaxín tjen.

² Tí sín tsík'axrjeníxinni ósé la kóxrjínhin Dios káxin k'uéchóna sín fe.

³ Tí fe mé noexínni káxin Dios tsíkjich'éna kaín nkehe tí kjuachaxin tí nixja ch'án la ko noexínni káxin tí nkehe t'ikonni mé tsík'óna tí nkehe t'ikonhyani.

⁴ A ntá tí fe k'uéchóna ch'ín Abel mé k'óyán ch'án ijnko kolélo chjéhe ch'án Dios. Tíha ijnko nkehe antsí jina kjuanjón ch'án, a ntá tí nkehe tsíkjanjón ch'ín Caín la náhí. Méxra Dios kóxrjínhin tí nkehe kjuanjón ch'ín Abel ntá ntáchro Dios káxin jina tí ch'ín a. Kjónté ó tsík'en ch'ín Abel la tí nkehe tsíkjich'e ch'án naxa tjákoqxín káxin jina tí fe k'uéchóna ch'án.*

⁵ A ntá tí fe k'uéchóna ch'ín Enoc la Dios sátsíkijiko tí jehe ch'án la k'uénhya ch'án, a ntá k'uitjahya sín ch'án káxin Dios sátsíkijiko. Naxa sákjuíhyia ch'án la xráxín kóxrjínhin Dios nkexrí k'uékjak'e ch'án.†

* 10:30 Deuteronomio 32.35-36 † 10:30 Deuteronomio 32.35-36 ‡ 10:38 10.37-38 Habacuc 2.3-4

* 11:4 Génesis 4.3-10 † 11:5 Génesis 5.21-24

⁶ **A** ntá tí chróchóntahyani fe la xitjahya chrókjuinchechéheni Dios, kixin t'ichjánxin kixin tí sín chrókóchjinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ **A** ntá tí fe k'uéchónta ch'in Noé tí Dios chénka tí jehe ch'án tí nkehe naxa k'uikonhya ch'án tsonhen, la kuítekaon ch'án kjuích'éna ch'án ntabárcō kixin tsááxin ch'án la ko tí sín naxa kjéhya ch'án. Tí fe k'uéchónta ch'án kjuakoxín kixin tí í so chojni chjasintajni la jínahya sín tsjasóte sín. **A** ntá kóxrjínhin Dios tí jehe ch'án kixin kuítekaon ch'án la tí xrā kjuích'e ch'án mé kuaáxin ch'án.†

⁸ **A** ntá tí fe k'uéchónta ch'in Abraham tí k'uíyehē Dios tí jehe ch'án la kuítekaon ch'án sákjui ch'án tí nonte tsjanjon Dios ts'áyehē ch'án, ntá k'uaxrjéxin ch'án chjasén ch'án kjónté noehya ch'án nketí nó sátsji ch'án.‡

⁹ **A** ntá tí fe k'uéchónta ch'án k'uékjak'e ch'án tí nonte chrókjuanjon Dios, éxi jehya nontēe ch'án tíha. Kjuák'e ch'án nchia tsík'óna ka, la ko kjaxin xikaha k'uéchónta ch'in Isaac la ko ch'in Jacob la ko kjaxin jehe sín tsík'áyehē sín tí nkehe tsintácho Dios.*

¹⁰ **A** ntá ch'in Abraham k'uékjak'echónhen ch'án tí chjasin tsíkjich'éna Dios ts'itjáyanhya.

¹¹ **A** ntá tí fe k'uéchónta tjan Sara kjónté ó nána tjan, k'uáyehē tjan kjuachaxin sich'éna tjan ijnko xjan; a ntá kjuích'éna tjan ijnko xjan kixin kuítekaon tjan kixin Dios sinchexiteyá tí nkehe tsintácho ch'án.†

¹² Kjaxin xikaha ch'in Abraham, kjónté ó mero chrók'uen ch'án kixin ó táda ch'án, la k'uaxrjeníxin ch'án nchónhya chojni éxi konotsé síin nkajní o éxi nchesen síin chrínta ntayaon, xitjahya ts'ekini.‡

¹³ **A** ntá kaín tí chojni a ik'uén sín k'uáyèhya sín tí nkehe tsintácho Dios kixin chrók'uáyehē sín, a ntá k'uéchónta sín fe, la kjónté ikjín k'uíkon sín la ko kuítekaon sín kóchéhe sín. Mé xikaha k'uéchrónka sín kixin tí chjasintajni jehya chjasén sín.

¹⁴ Mé xikaha k'uénixja sín la tienxínni jína kixin naxā xritjeyá sín nketí chrók'óna chjasén sín.

¹⁵ **A** ntá tí chrórxaxinkaon sín tí chjasin tsík'axrjéxin sín ntá jína chrókjan sín ntilha inaá.

¹⁶ Kjánchó tjinkaon sín ijnko chjasin antsí má jína, tíha mé chjasin nkaya nkajní. Méxrā Dios la tósuèhya ch'án kixin chrókjuinchech'in sín ch'án tí Dios kuente tí jehe sín, kixin ó tjechónhen tí chjasin ts'áyehē tí jehe sín.

¹⁷ **A** ntá fe k'uéchónta ch'in Abraham kixin Dios kjuích'e prueba tí jehe ch'án kjuanchia tí xjeen ch'án Isaac, a ntá kjuíkao ch'án chrók'óyán ch'án, chrókjuanjon ch'án. Tjechónhen ch'án chrókjuanjon ch'án kjónté jnkokqáxón xjeen ch'án tsíkjanjon Dios‡ tsintácho kixin:

¹⁸ “Tí ch'in Isaac ts'axrjeníxin nchónhya xjan.”*

¹⁹ **A** ntá ch'in Abraham kjuátsoan ch'án kixin Dios imá chóna kjuachaxin, la kjónté chojni tsík'en na nchexechón ch'án, la éxi yóhe chrók'uen tí xjeen ch'in Abraham ntá chrók'uáyehē ch'án inaá.

²⁰ **A** ntá tí fe k'uéchónta ch'in Isaac kjuíncheyaoon ch'án tí xjeen ch'án ch'in Jacob la ko Esaú, kixin jína ts'ejó sín.†

‡ **11:7** Génesis 6.13–22 § **11:8** Génesis 12.1–5 * **11:9** Génesis 35.27 † **11:11** Génesis 18.11–14;

21.2 ‡ **11:12** Génesis 22.17 § **11:17** Génesis 22.1–14 * **11:18** Génesis 21.12 † **11:20** Génesis 27.27–29,39–40

21 **A** ntá tí fe k'uéchonta ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójixín ch'án nixjehe ch'án Dios.‡

22 **A** ntá tí fe k'uéchonta ch'ín José tió chjina its'en ch'án tsintáchro ch'án kixin tí sín israelita la chr'éxin ts'axrjexín sín chjasin Egipto, tsík'etöan ch'án kixin tió sátsji sín la sátsjiko sín tí huesgé ch'án.Š

23 **A** ntá tí fe k'uéchonta it'é la ko iné ch'ín Moisés tió kokjíhi ch'án kjuak'ema sín ch'án iní nitjó kixin tsík'ikon sín kixin ijnko xjan ntoa náxrjón tsjehe ch'án, la ko chrakuenhya sin tí nkehe tsík'etöan tí ch'ín rey kixin chrók'óyán sín xjan.*

24 **A** ntá tí fe k'uéchonta ch'ín Moisés tió kónteto ch'án la chrohya ch'án its'in ch'án xjeen tí tjan xjeen ch'ín rey Egipto.†

25 **Náhi.** Kjueya ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jie. Náhi.

26 **Kjuenkayáxin** ch'án kixin antsí tjetöan chrókjuasótexín ch'án tí tinkáchónki ch'án tí Cristo itsi chr'éxin, a ntá kánhyó tjetöan chróchonta ch'án kain nkehe tje te síin chjasin Egipto. **Kjuenkayáxin** ch'án kixin chrók'uáyéhe ch'án tí nkehe chrókjuanjon Dios.

27 **A** ntá tí fe k'uéchonta ch'ín Moisés sákjuixín sín tí chjasin Egipto,‡ chrakonhya ch'án kjónté kónínkaon tí ch'ín rey, a ntá kuitöehya ch'án tí tinkáchónki ch'án Dios kixin éxi t'ikon ch'án tí Dios ninkexró t'ikonhya.

28 **A** ntá tí fe k'uéchonta ch'ín Moisés kjuasin ch'án tí kia pascua, k'uetoan ch'án kixin chrókuijkanjin sín jñi tí puerta, kixin tí ángel t'óyán chojni chrókjuincheniehya nijnko tí xjan saö kuente tí sín Israel.Š

29 **A** ntá tí fe k'uéchonta tí sín israelita k'uátöye sín tí Ntayaon Kjátse kixin k'óna nche xámá, a ntá tió tí sín Egipto tjinkaon sín chróchréhe sín xikaha la kjancho kjuínhin sín tí nta a.*

30 **A** ntá tí fe k'uéchonta tí sín israelita la xítjen tí tjat'o t'inkákuènxín tí chjasin Jericó, tió kjuixín k'uántatjen sín yato yaon tí chjasin a.†

31 **A** ntá tí fe k'uéchonta tí tjan Rahab, na mé ijnko tjan k'uéchonta nchónhya chojni ntoa, ntá k'uénkohya tjan kain tí sín jiehe kuitekakonhya, kixin tsíkjanjon tjan kjuachaxín kixin kjuaxróxin tsíkitohe ntöe tjan tí sín israelita kjuijitsaya sín tí chjasin Jericó.‡

32 ¿Nkehe **naxa** chróntáxrjan? **Sintak'itjáyán** tiempo **naxa** chrónixja kuente ch'ín Gedeón, la ko ch'ín Barac, la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta.

33 **Kixin** tí fe k'uéchonta tí jehe sín kjuacha sín k'uetoan sín jína ókjé chjasin, la ko jína kjuínchekitöexín sín ijie chojni, la ko k'uáyéhe sín tí nkehe tsintáchro Dios kixin tsjanjon ch'án, la ko k'uikjehe sín ir'va koxra,

34 la ko k'uanka tí xrohi chróhexín sín, la ko kjuachahya tí espada chrók'uènxín sín. **A** ntá tí sín chrakon la kófuerte sín, k'óna sín chojni tsehe kjuacha sín jjuánjonko sín tí sín soldado tsíkixín ókjé.

35 **Kjaxín** k'uék'ixín chojni chjin k'uáyéhe inaá tí chojni tsík'en kuente sín tsixechón inaá.

‡ 11:21 Génesis 47.31–48.20 Š 11:22 Génesis 50.24–25 * 11:23 Éxodo 1.2; 2.2 † 11:24 Éxodo 2.10–12 ‡ 11:27 Éxodo 2.15 Š 11:28 Éxodo 12.21–30 * 11:29 Éxodo 14.21–31 † 11:30 Josué 6.12–21 ‡ 11:31 Josué 2.1–21

A ntá í so sín la kjuasote sín k'uénxin sín kixin kjuínchemáhya sín kixin kuinkáchónki sín Dios kixin ó nohe sín kixin tsoxechón sín antsí jína inaá.

³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín.

³⁷ Í so sín la ixrə k'uénxin sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uénxin sín espada, la í so sín k'uék'aji sín tsík'inkáya sín tjoə kolélo la ko tjoə koténtso, nòa sín, kjuasóte sín, kjuaxróxinhya la náxrjónhya k'uéjósín.

³⁸ A ntá tí sín chjasín ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjuí sín nteje, la ko jnə, la ko tjo sixrja la ko tøyə.

³⁹ Kaín tí sín a kónhen sín prueba kixin á chaxín chóna sín fe la kjónté xikaha k'uáyéhya sín tí nkehe tsintáchro Dios kixin tsjanjon ch'án

⁴⁰ Kixin Dios kjuenkayáxin ch'án ijnko nkehe antsí jína kixin jehó jnkokoə chrók'uáyekoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakoxin sín tí fe k'uéchóna sín, la ntá chrókuítóhenni ntáha kaín tí nkehe t'inkákonhen, la ko tí jie chrókjuachroeni, a ntá chrókjuich'eni jína tí xra chóntani la ntá chrókjuachani antsí má chrókónoheni.

² Jehó Jesús chrókuinkáchónkini kixin jehe ch'án kjuanjon tí fe chóntani kixin jína kjuakoxin ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuehya ch'án tí nkehe kónhen ch'án ik'uén ch'án, kixin nohe ch'án kixin tsjixin tsjasóte ch'án ntá náxrjón tsjak'e ch'án la ko tsochéhe ch'án kixin tsjak'etjaxin ch'án tí tja chjina tí trono kuente Dios.

³ Méxra chrókjuenkayáxinrá jahará nkexrí kjuakoxin ch'án Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án.

⁴ A ntá jahará naxa k'uénxinhyará tí tjanjonkoará tí jie.

⁵ ¿Á k'uitjáyanharrá tí jahará tí nkehe ntaxraxinkaonrá Dios kixin éxi xjeen ch'án t'ikon ch'án tí jahará? Éxi ntáchro xroon itén Dios kixin:

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kixin Ìnchéni mé tjentuéhe tí sín tjuèhe ch'án la ko nchekjasóte kaín tí sín ts'áyehə ch'án ts'óna xjeen ch'án.*

⁷ Chrókuítekáonrá tí nkehe t'etəon Dios kixin Dios t'ikon kixin éxi xjeen ch'án tí jahará. ¿Á siín ijnko it'é xjan chrokjuentuéhya tí xjeen?

⁸ A ntá tí chrókjuentuáhyará Dios tí jahará éxi tjentuéhe ch'án kaín tí xjeen ch'án, ntá jahará kjá jehya xjeen ch'án chaxín.

⁹ A ntá tí naxa k'uéchánjanni, na mé it'éni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuínchexiteyéheni It'éni tjen nkaya nkajní kixin chróchóntaxínni kjuachón.

¹⁰ It'éni ntihi chjasintajni kjuentuéheni ch'án kjónté kánhyó sé éxi nkexrí kóxrjínhñ ch'án; a ntá It'éni Dios tjentuéheni ch'án kixin jnkojína chrók'uejóni, kixin chrók'ónani tjóá kixin jehe ch'án la tjóá ch'án.

* 12:6 Job 5.17; Provérbios 3.11-12

11 Chaxín ninkehó xikaha chrókjuinçekjasóte Dios tí jeheni chrókóxrjnhinni tí nantá chrókónhenni kixin tí kjuatjoté. A ntá xikaha ts'itjaxinni tí kjuaxróxin éxi ijnko nkehe náxrjón kjuachani.

Tí sín tjanoá tí kjuasáyé Dios

12 Méxra tjsójirá tí tjará tsíkóxrjé la ko tóch'inrá chóntahya fuerza,

13 la ko chrókjuéyará tí ntja ntoá. A ntá tí totará níhi xitjahya tjixinrá chrókuitqhe jína la ko chrókóniehya inaá.

14 Chrókóxakonhanrá kixin kjuaxróxin chrók'uejorá kaín rá, jnkojína tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni.

15 Chrókóxakonhanrá kixin nijnkorá chrókuitqéhyará tí kjuasáyé Dios la ko nijnkorá chrók'ónahyará éxi ijnko nuèe ka tsjá chóna veneno chrókóniéxin tí í so chojni.

16 Nijnko tí jahará chrókjuásinkoará jie ijnko chojni chjin ókjé, la ko chrókjoniéhyará tí nkehe tjóá éxi kjuích'e ch'in Esaú, kixin jnkokoá comida kjuínčekjixín ch'an tí nkehe chróchóna ch'an kixin xjan saó jehe ch'an.†

17 Jahará ó nohará kixin chr'éxin, tió tjinkaon ch'an kixin chrókjuincheyaon it'é ch'an tí jehe ch'an la í xitjahya tsoyaon ch'an kixin kohya nkexri chrók'uíxitóxin tí nkehe tsíkjih'e ch'an kjónté imá chrótsjánka ch'an.‡

18 A ntá jahará la jehya kóchjinará éxi kóchjina tí sín israelita tí jna jína chrótsé sín tí síchr'ákjen xrohi, tí tjen tí sítíe t'inkaséyanhya la ko tí chjéhe xrinto.

19 Na ni tsíkíenhyará tí tsintáchro trompeta, la ko tí itén Dios nixja. A ntá tí sín tsíkinhin tí tan a na mé chronòa sín kixin í chrónixjahya ch'an inaá.§

20 mé xikaha ichro sín kixin tsjachahya sín sinchexiteyá sín tí nkehe k'uetqan ch'an kixin “Tí nkexro tsínkátja tí jna mé its'en, la ixro la o chica lanza chrók'óyánxin sín, la kjónté ijnko ko tsínkátja va tí jna la chrók'uen.”*

21 Ijnko kjuachrakon jie tí nkehe k'uíkon sín la kjónté ch'in Moisés tsintáchro ch'an kixin: “Kjaxin síxránkana chrakonna.”†

22 A ntá jahará tsíkóchjineherá tí jna Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel

23 tsíkójnkotsé sín kixin tsochjéhe sín kjuasáyá Dios, la ko tí sín tsíkójnkotsé sín tsík'óna sín xjeen Dios saoxín ts'ínixín ihnjé sín nkaya nkajní. Jahará tsíkóchjineherá Dios, jehe ch'an mé Juez sinčekitqexín ch'an ijjié kaín chojni, la ko tsíkóchjineherá tí nchakuen chojni jína ó tsíkijnchetjóá Dios,

24 la ko tsíkóchjineherá ch'in Jesús, jehe ch'an mé nixjaxín ch'an tí pacto nixin kixin tí ijnié ch'an k'uítji kjuínchetjuáxinni ch'an. A ntá antsí jína chrónkaxín tí ijnié ch'an, a ntá kánhyó tí ijnié ch'in Abel.

25 Chrókóxakonhanrá chrókútekekákonhérrá tí nkexro tjenixja. Kixin tí sín kjuanoá Dios tió kjuínchexraxinkaon ch'an tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kujxin nkaya nkajní.

26 A ntá tí itén Dios tí yaon a kjuínčekinkí nonte. A ntá jie tsintáchro ch'an kixin: “A ntá inaá jehya nonte ó sintakinkíá. Náhi. Kjaxin nkajní sintakinkíá”,‡

† 12:16 Génesis 25.29–34 ‡ 12:17 Génesis 27.30–40 § 12:19 Éxodo 19.16–22, 20.18–21 * 12:20 Éxodo 19.12–13 † 12:21 Deuteronomio 9.19 ‡ 12:26 Hageo 2.6

²⁷ **A** ntá tí tsintáchro ch'án kixin “ínaá” mé t'axrjexín kixin tsjakjlin ch'án tí nkehe jina tsinkí, **a** ntá tsítóhe ch'án tí nkehe xitjahya tsinkí.

²⁸ **A** ntá tí ts'áyéhēni tí kjuachaxin kjuanjon Dios la xitjahya ts'ixinkí tíha. Méxra chróchjēhēni Dios kjuasáya chrórxaxinkaonni ch'án chróchrakonhēni ch'án

²⁹ kixin tí Dios kuènteni mé éxí ijnko xrohi tsjacha sinchek'itjáyan kaín nkehe. [§]

13

Nkexrí chrók'uejóni kixin chrókóchéhe Dios

¹ Méxra chrókuítóéhyará chrórtjuèherá kichuárá.

² Chrók'uitjáyanhyará chrókuáñonrá kjuachaxin chrókuítóhe ntóará tí sín tsík'ixín kjín. Mé xíkaha kjuích'e iso sín la kjónté ángel tsík'áyéhe sín la kónoehya sín.*

³ Xráxinkáonrá tí sín tjejóchjina éxí kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxí kjaxin tí jahará xíkaha chrókonhanrá kjaxin.

⁴ Káinrá chróchonteherá kjuasáya tí kótehe chojni. **A** ntá jahará tsíkótáhará la jina chrók'uejokoará kichuárá chrórtjuèherá kichuárá. **A** ntá tí sín tjinkaon tsochónta chojni chjin ókjé la Dios sinchekjasóte sín kixin xíkaha ich'e sín.

⁵ Kénhyó má chrókórxjínhanrá itsjé chichaon. Chrókócháhará kjónté tí kánhyó tsjé chontará; kixin tsintáchro Dios kixin: “Janhan na tsítóahya tí jahará la ko ts'itjáyanahya tí jahará.”†

⁶ Mé xíkaha chrakonhyani tsontáchroni kixin:

Ínchéni mé tjinkítsani,

méxra chróchrakonhyani kjónté ichrén nkehe chrókjuich'ehe ni chojni.‡

⁷ Chrórxáxinkáonrá tí sín kjuínkítsa tí jahará kjuakohará sín itén Dios, chrókjuenkayáxinrá nkexrí k'uejó sín ntá xíkaha chrókóyóhárá sín éxí tí fe k'uéchónta sín.

⁸ Jesucristo mé itjen ch'án ijna la ko ijie la ko jnkochrín.

⁹ Chrókuítóéhyará chrókjuakohará chojni ijnko nkehe ókjé chrókuinkachónkirá. Íchá jina tí asánrá chrók'uáyéhe fuerza kixin Dios tjuahará la jehya tjetoan chrókjuinchexitexyéhe ni nkehe t'etqan nkehe sineni. Mé xíkaha tí sín kjuích'e xíkaha kjuinchexitexyé tí nkehe k'uituenhen sín nkexrí chrókjóné sín la ninkehó kjuínkítsahya tíha.

¹⁰ **A** ntá jeheni chóntani í jnko altar kixin k'uenyákonhēni Cristo la ntiha kohya kjuachaxin chrókjónexín tí nchat'á kjuích'e xra nkaxenhen njnko ósé.

¹¹ **A** ntá tí nchat'á t'etqan judío kjuíko sín tí ijnjé ko nkaxenhen tí Cuarto Antsí Tjóá kixin tí nkehe la tsjatsen tí ijjié sín. **A** ntá tí cuérpoé tí ko kjuakaxín sín ikon tí chjasin k'uejó sín.

¹² Kjaxin Ínchéni Jesús kjuasóte ch'án k'uénxin ch'án ikon chjasin kixin tsotjúaxin kaín ijjié chojni tí ijnjé ch'án.

¹³ Tsochréhēni Ínchéni Jesús éxí k'uénxin ch'án ikon chjasin kjónté tsjasóteni éxí kjuasóte tí jehe ch'án kjuikosáyehya sín tí jehe ch'án.

¹⁴ **A** ntá ntihi chjasintajni chóntahyani njnko chjaséni chrók'uitjáyanhya; **a** ntá xritjeyáni tí chjasin itsi chr'éxin.

§ 12:29 Deuteronomio 4.24 * 13:2 Génesis 18.1–8, 19.1–3 † 13:5 Deuteronomio 31.6 ‡ 13:6 Salmo 118.6

15 Méxra chrókuítqehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchéhe sín Dios. Yóhe xíkaha chrókjuanjonni kixin ir'vani ó chrókjuikosáyexínni ch'án.

16 Chrók'uitjáyanhará chrókjuich'erá xra jína la ko chrókjuínkĩsará kichuárá. Tí xíkaha chrókjuich'erá la imá tóxrjnhin Dios.

17 Chrókuítekákákonhénrú tí sín tjáqohará chrókjuínchexiteyéhérá tí jehe sín. Jehe sín mé t'ayakonhen sín asánrú kixin jehe sín la ó nohe sín kixin tsjanjon sín kuentá tí tjen Dios. Tsjínkĩsará sín kixin tsochéhe sín sich'e sín xra la tsonínkakhya sín. A ntá tí chrókjuínchek'ávárá sín, ntá ninkehó tsjachahya sín tsjínkĩtsa sín tí jahará.

18 Nixjéhérá Dios kixin tí jeheni kaín ni, kixin chaxín jína kjuenkayáxinni la ko tjinkaonni kixin jína chrók'uejóni.

19 Tjánchíá xra ó kixin chrónixjéhérá Dios kixin chrókjuanjon ch'án kjuachaxin kixin tjoka chrókjan janhan chrók'uejóni.

Tjanchia ch'án kixin chrókóyaon sín

20 Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetoan t'ayakonhen tí kolélo, la tí ijnjé ch'án mé tsoxiteyáxin tí pacto sich'e xra jnkochrín,

21 jehe Dios mé tsjínkĩtsa tí jahará kixin jína chrók'uejorá la ko kaín xra jína chrókjuich'erá kixin xíkaha tjinkaon ch'án; kixin jehe ch'án t'etueñhenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xíkaha chjéheni Cristo kjuasáya jnkochrín. Amén.

22 Kíchóni, xrjanóghará kixin tóninkákonhyará kixin tí palabra xrjanka sintaxrínkáonrú. Méxra ikjian tí xroon kjónté kánhyó tsjé nixja ts'ayéhérá.

23 Chrókónohará kixin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsahará tí jahará.

24 Nixjéhérá jnkojína kaín tí sín tjítaón ntjía tjako la ko kaín tí sín kíchó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

25 Dios sintayaonrú ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyehé kaín tí sín tsíxikayehé

1 Janhan Santiago mé t'ahá xra Dios la ko Ìnchéni Jesucristo nixjaha kaín tí sín tsík'axrjeníxin tí teyó xjeen ch'ín Israel tsíxikayehé sátsíkji kuente chjasintajni.

Dios mé tsjanjon tí kjuaxrexinkaon jína

2 Jahará kichó ni, chrókócháhará kjónté chrók'uats'ínkará ichrén nkehe náxrjónhya.

3 Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará.

4 Chrókónohará kixin tí chrókóninkákonhyará la tíha mé ijnko xra jína chaxín kixin ntá jahará ijnko chojni chaxín kjuacha titekaon la í t'itjáyannya ninkehó.

5 Tí jnkojín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehé ch'án mé xráxin tsjanjon ch'án kaín nkehe ts'áyehé tí chojni tjanchia la tsónínkakonhya ch'án.

6 Tió chrókjuancheherá Dios nkehe la kénxin asánrá chrókjuanchiará la chrókjónhya asánrá ninkehó. A ntá tí chojni tjo asén la éxi ntayaon tjiko xrinto ijnko lado la í jnko lado.

7 A ntá tí xikaha itjo asén sín la chróntáchrohya sín kixin chrók'uáyehé sín ichrén nkehe chrókjuanjón Ìnchéni.

8 A ntá tí nkexro xikaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

9 Tí kichó ni tinkáchónki Cristo la kjónté nòda chóntahya itsjé nkehe chjasintajni la kjónté xikaha chrókóchéhé kixin tí tinkáchónki ch'án Ìnchéni la antsí má sínkí tíha.

10 A ntá tí nkexro rico kjónté chrók'uitjáyan tí nkehe chóntha la antsí chrókóchéhé kixin tinkáchónki ch'án Ìnchéni, kixin tí nkehe chóntha ch'án la kánhyó sínkí la ts'itjáyan éxi itsjo tsík'óna ka.

11 Tió tsjiton yaon la tsqsóa imá la tí ka tsqxámá la ko tí tsjo la ts'ánótjen la tí náxrjón tsjehe la tsjeje. Mé xikaha tsónhen tí ch'ín rico, ts'itjáyan ntá tsítóhe ch'án tí xra k'uéchóntha.

Tí nkehe tsónhen chojni

12 Náxrjón tí nkexro tsjacha ts'atsínka tí nkehe náxrjónhya tsónhen. A ntá tí tsjacha ch'án ts'atsínka kaín tí nkehe náxrjónhya tsónhen ntá ts'áyehé ch'án tí corona kuente kjuachón kixin Dios tsíntáchro ch'án kixin tíha mé tsochjéhe ch'án tí sín tjuéhe ch'án.

13 A ntá jnkojínrá tí chróntáchro asánrá chrókjuich'erá ichrén nkehe jínahya, la chróntáchrohyará kixin Dios tsíkjanjon kjuachaxín xikaha sich'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetqan ch'án kixin ninkexró chrókjuich'e ijnko nkehe jínahya.

14 A ntá jnkojín chojni tí ó jehó tjenkayáxixin asén tí jínahya la mé xikaha tsjachroe, tsjasín sín jje.

15 Mé xikaha tí nkehe jínahya tjenkayáxin chojni mé tjixín tí jje. La mé xikaha ts'ánkí tí jje la ntá tíha ts'énxín chojni.

¹⁶ Kichóni, chrókjuich'iyéhyará asánrá.

¹⁷ Kaín nkehe jína ntoá t'áyeheni mé tixín nkajní tí tjen Dios tí nkexro kjuich'éna kaín tí xrohi kuénte nkajní. Jehe ch'án mé Dios jnkochrixín la jehe ch'án mé xitjahya ts'ixitóxín.

¹⁸ Jehe ch'án kjuanjon ch'án kjuachón k'uáyeheni kixin tí tan ntoá nixja ch'án, kixin éxí tí nkehe senó tsík'óna, mé xikaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chrórxáinkáonrá tíhi jahará kichó ni. Kaínrá chrók'uejorá chrókuinhínra jína la tjokahya chrónixjará kixin tjokahya chrókóninkáonrá.

²⁰ A ntá tí chojni tjoka tónínkaon la ch'ehya tí xra jína éxí tóxrjínhin Dios.

²¹ Méxra títóherá tí nkehe tjuáhya la ko tí nkehe jínahya kjuachjínqxínhin síin nkuixín la chrókjuinchehnkehyará, chrók'uayéherá tí itén Dios chrók'uinka nkaya asánrá. Tí tan a mé chóna kjuachaxin kixin chrókuaáxinrá.

²² Jehya kixin chrókuinhónrá; jahará chrókjuich'erá éxí tí nkehe tjako tí tan a. A ntá tí náhi la jahorá ch'iyehérá asánrá.

²³ A ntá tí chojni tsinhón tí tan la ntá sinchexiteyáhya la éxí ijnko chojni tsjexín xrosentá tí kon ó.

²⁴ A ntá tí k'uikon tí kon la sátsji la tuénxín k'uitjáyenhen nkexrí tsjehe.

²⁵ A ntá tí nkexro k'uitjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkexé t'etqan tíha la ntá náxrjón tsjak'e kixin kjuinchehiteyá ch'án.

²⁶ A ntá jnkojín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'iyehé asén la ninkehó sínkíhya tí nkehe tinkáchónki ch'án.

²⁷ A ntá tí nkexro tinkáchónki Dios chaxín jína la ko tjasinhya jje nkayakon It'éni Dios la mé tíhi: mé chrókjuinkítsa tí chojni nóe la ko tí chojni k'án chónthahya nkehe sine sín o níhi sín, la ko chrókjuasinhya tí jje jínahya síin chjasintajni.

2

Jnkokón chrókjuikosáyehé kichó ni

¹ Kichóni, jahará tinkáchónkirá Ìnchéni Jesucristo imá tjetoan la t'ichjánxin chrókjuikosáyehérá kaín chojni jnkokón.

² Éxí ijnko chojni rico chrók'uixenhen tí tójnkotsérá la chóna koch'aninko oro la ko chóna iké náxrjón, a ntá ntiha kjaxin chrók'uixenhen ijnko chojni nóa chóna iké ntaxin.

³ A ntá tí chrókjuikosáyehérá tí chojni t'itsa ka jína la tsontácherá ch'án kixin: “Ntíhi antsí jína tjak'e.” A ntá tí chojni nóa tsontácherá ch'án kixin: “Jaha la tjak'éxian totá ntiha o tjak'e nonte ó.”

⁴ Mé xikaha la jnkokónhya tjikosáyehérá kichuárá la tí nkehe jínahya tjenkayáxinrá.

⁵ Kichóni tjuahará, tsinhínra tíhi: Dios tsíkjeýá tí sín nóa ntihi chjasintajni kixin antsí má tsinkáchónki sín tí jehe ch'án kixin ts'áyéhe sín tí kjuachaxin kuénte ch'án éxí tsintáchro ch'án tsochjéhe ch'án tí sín tjuéhe ch'án.

⁶ A ntá jahará mé tjikosáyehyará tí sín nóa. A ntá tí sín rico mé tjikosáyehérá. ¿Á jehya tí sín rico tjanchia sín jje sájtiko sín tí jahará nkayakon tí sín t'etqan ní?

7 ¿La á jehya jehe sín t'ántaxínhìn sín tí ihnjé Cristo tjikosáyeheni?

8 A ntá jahará la jína tjejoch'erá tí nchexiteyará éxí t'etóan tí ley éxí nixja tí xroon itén Dios kixin: “Chrótjuèherá kichuárá éxí tjuèxína asánrá”.

9 A ntá tí jnkokónhya tjikosáyehyará chojni la ntá xikaha la tjásinrá jië la nchexiteyéhýará éxí tí nixja tí ley kuènte Dios.

10 A ntá ijnko nkexro titekaon kaín tí ley la ntá kjuínchexiteyáhya jnkokoá tí nkehe tjeotan la mé tí xikaha la kjuínchexiteyéhýa kaín tí nkehe t'etóan tí ley.

11 Ntá Dios tsintáchro kixin: “Chrókuákjahýará í jnko chojni chjin ókjé”, la kjaxin tsintáchro ch'án kixin: “T'oyánhyará kichuárá.” A ntá tí nkexro kuákjahya í jnko chojni chjin ókjé kjánchó kjuàya la kjuínchexiteyéhýa tí nkehe t'etóan tí ley.

12 A ntá jahará chrónixjará la ko chrókjuínchexiteyará kixin chrókjuanchiahya jië tí ley sinchekaáni.

13 A ntá tí nkexro kuikonóhýa í jnko chojni la kjaxin tsikonóhýa Dios tí jehe. A ntá tí nkexro kuikonóhë kichó la mé xikaha tsjacha tsaáxin ch'án tí yaon tsjixixín tsitóexín jië.

Tí fe ch'ehya xra la tsík'en

14 Kichóni, ¿nkehe tsqnhen ntáchrórá kixin chontará fe a ntá ninkehó nkehe jína tjákoxinhyará? ¿Á ntáchrórá kixin xikahó chrokuaáxinrá?

15 Éxí ijnko kichó ni ntoa o kichó ni chjin chóntahya iké o chóntahya nkehe sine sín t'ichjánxinhìn sín jnkójín yaon.

16 Ntá jnkójín tí jahará tsontácherá sín kixin: “Sátjia jnkójina la ko ts'itsa ká la ko sinte jina.” A ntá tí kjuánjonhyará tí nkehe t'ichjánxinhìn tí cuerpoé sín la sínkíhya tí nkehe ntáchrórá.

17 La mé xikaha tónhen tí fe la tí tjákoxinhyará ninkehó nkehe jína kjuich'erá la éxí nkehe tsík'en tí ntáchrórá.

18 A ntá jnkójín chojni tsontáchro kixin: “Jaha chonta fe a ntá janhan it'a tí xra jina.” Tí xikaha la jaha tjákoxian tí fe kjónté kohya xra la janhan tsjákoxian tí fe la ko tí xra jina tjét'a.

19 Jaha titekávan kixin jnkokoá Dios itjen la chaxín jína xikaha, kjánchó kjaxin tí jínahya titekaon tíha la ko síxránká chrakon.

20 T'ónahýará lontj. Jahará la nohará kixin tí fe ch'ehya xra la chónkó tíha.

21 Dios kóxrjinhìn tí nkehe chrókjuich'e ch'in Abraham, tí nkexro k'uaxrjenixinni ósé, tíó chrók'óyán ch'án tí xjeen ch'án Isaac la chrókjuanjon ch'án chrók'uáyéhë Dios.

22 Chrókónohará kixin tí fe k'úechónta ch'in Abraham la kjuákoxin ch'án tí xra kjuich'e ch'án la ntá xikaha kjuákoxin ch'án kixin antsí má kuínkáchónki ch'án Dios.

23 Mé xikaha xiteyá éxí ntáchro xroon itén Dios kixin: “Abraham kuítekaon Dios la ntá Dios ntáchro kixin jina ch'án”, la ntá Dios kjuínchek'in ch'án amigo kuènte ch'án.

24 Chrókónohará jahará kixin Dios la t'áyéhë ch'án chojni la nchetjóá ch'án kixin tí xra jina ch'e sín la jehya kixin jehó chrókuínkáchónki sín ch'án.

25 Mé kjaxin xikaha kónhen tí tjan Rahab, tí tjan k'uechónta nchónhya chojni ntoa. Jhehe tjan kjuanjon tjan kjuachaxin kuítqhe ntqë tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntja, a ntá Dios la kóxrjinhìn tí nkehe kjuich'e tjan.

²⁶ Éxí tí cuerpoé chojni chóntahya nchakuen la tsík'en la kjaxin xikaha tí fe la tsík'en tí ninkehó tjakoxinhya tí nkehe jína chrókjuich'e sín.

3

Tí kjuachaxin chóna nejen chojni

¹ Kíchóni, chrók'ónahya tí jahará nchónhya maestro kixin tí ntoáhya chrókjuàkorá la tíha mé chrókjuasótiaxínrá imá.

² Kaínni chóntani jie, a ntá tí nkexro ninkehó jie ntáchrohya la ijnko chojni jína tíha la ó tsjacha ch'án ts'etuenhen ch'án kuenté tí cuerpo kuènte ch'án.

³ Éxí tí kokate tsochóna chica freno tí ir'va va kixin tsitekaon va la sátsjiko tí inché va la tsjacha ch'án ts'etuenhen kuenté tí cuerpo kuènte va.

⁴ Tjenkayáxínrá kjaxin nkexrí tjejó tí ntabarco kjónté imá jie la tsjacha tí xrinto chjéhe tjan sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án.

⁵ Mé xikaha tí ir'va chojni. Kjónté ijnko nkehe imá ntsí kuènte tí cuerpo kjánchó nchónhya nkehe jínahya ntáchro éxí ijnko xrohi ntsí la tsjacha tsochéxin kuenté ijnko jna jie.

⁶ Mé xikaha tí ir'vani la éxí ijnko xrohi kixin nchónhya jie t'axrjexín la éxí ijnko veneno ncheníhi cuerpo mé xikaha mé tsjasixín kuenté cuerpoé chojni jie. La tí kjuachaxin kuènte ir'vani la mé tjixin tí infierno la tíha mé tjixin tí ts'itjáyanxínni.

⁷ Tí chojni la tsjacha sinchesáncho kaín ko jiehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va.

⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxí ijnko nkehe chóna nchónhya veneno ts'enxín chojni.

⁹ Tí ir'vani la kjaxin tjikosáyexinni It'éni Dios la tíha kjaxin t'ántaxíenxinni chojni tsíkjich'éna Dios éxí tsjehe tí jehe ch'án.

¹⁰ Kjaxin tí ir'vani t'axrjexín tí nkehe itsjeni kuènte Dios la kjaxin tíha t'ántaxíenxinni. Kíchóni, xikahya chrókjuich'erá.

¹¹ Jnkokoá tòye xitjahya ts'axrje nta xé la ko kjaxin nta tsjá.

¹² Kíchóni, zá jína tí nta higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje nta xíjnta la ko ntiha kjaxin chrók'uaxrje nta xé.

Tí kjuaxrexinkaon jína

¹³ Tí tjen jnkójín nkexro tí tjejórá nohe jína la ko tienxín la chrókjuakoxín ch'án jnkójína la ko chrókjuinchehnkexínhya ch'án tí nkehe imá nohe ch'án.

¹⁴ A ntá tí jahará chóna kjuachjínnoxínhin asánrá la tjínkáonrá jahorá chrókúetoanrá. A ntá tí xikaha la chrókjuinchehnkexínhyará tí nkehe nohará kixin tí xikaha la ch'iyará la tjínkákonhyará chróchronkará tí nkehe chaxín ntoá.

¹⁵ A ntá tí xikaha sinchehnkerá la jehya tí kjuaxrexinkaon kujxin tí tjen Dios. Tí xikaha la kjuachaxin kuènte chojni chjasintajni ó la ko kuènte ch'ín Tsohren.

¹⁶ A ntá tí xikaha síin kjuachjínnoxínhin la ko tjinkaon chojni jehó chrók'uetoan la ntá xitjahya tsønhen xra yóxin kixin xikaha síin nkehe jínahya.

17 **A** ntá tí síin kjuaxrexinkaon jína tsíkixin tí tjen Dios la saoxín tjejó chojni jína la ko kjaxin kjuaxróxin tjejó sín la ko náxrjón tjejó sín la ko jnkójina nixjehe kichó sín la ko kjaxin tikonóhehe kichó sín la ko tí xrá jína tjejóch'e sín la tí nkehe ntoá nixja sín.

18 Tí nkexro tjejá tí kjuaxróxin xikaha chrók'ueñka sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

1 ¿Nketí tjiixin tí guerra la ko tí kjuanínkaon tjanjonkoaxínrá kichuárá? Táha la mé jahorá t'axrjénixínrá kaín tí kjuanínkaon a.

2 Jahará tjinkáonrá tsochontará ichrén nkehe ntá chontahyará ntá tónínkáonrá t'oyánrá kichuárá. Tóchjinoxínhanrá kixin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjinkáonrá kixin tjanchehyará Dios.

3 La tí tjanchiará la ts'ayéhyará kixin ntoáhya kjuanchiará kixin tjinkáonrá chrókuicháxinhanrá ó la chrókjuinchehnkexínrá.

4 Jahará chojni titekakonhya Dios. ¿Á noahyará tí jahará kixin tí imá tsotjuèhérá chjasintajni la ntá tsoninkákonhérrá Dios? **A** ntá tí jnkójínrá tjinkáonrá tsotjuèhérá chjasintajni la tsokjanrá tsoninkákonhérrá Dios.

5 ¿Á tjenkayáxinrá kixin tí nkehe ntáchro xroon itén Dios la á chónkó? Ntáchro xikíhi: "Tí Nchakuen Dios kjuanjon ch'án k'uayéhérrá la tjuahará ch'án la tsonínkaon tí tsitohérrá ch'án." Mé xikaha ichro Dios.

6 Kixin Dios la imá tjinkítsani ch'án, méxra ntáchro xroon itén Dios kixin: "Dios la nínkakonhen tí chojni nchehnke a ntá tjinkítsa ch'án tí chojni nchehnkehya."*

7 Méxra chrókjuinchehnkehýará. Íchá jína chrókuítekáonrá Dios la chrókjuánjonhyará kjuachaxin tí jínahya chrók'uetuanhanrá ntá chrók'uikon tí jínahya kixin chrók'uetuanhya ntá sáchrókjui.

8 Chróköchjineherá Dios, la tí jehe ch'án kjaxin tsochjinahará ch'án. Jahará chojni chóna jje la chrókjonemará tjárá. Chrókjuinchetjóárá asánrá kixin chrótjuèhérrá Dios la kánhyó chrótjuèhérrá chjasintajni.

9 Chrók'uavará la ko chrótsjankará. Chrókjuínkirá tí tjanorá la chrótsjankará la chrókjuínki tí cháhará la chrók'uavará.

10 Chrókjuinchehnkehýará chróxráxinkáonrá Ìnchéni a ntá jehe ch'án chrókjuínkítsa ch'án antsí chrókónohará.

Chrók'uántaxíenhyani kichó ni

11 Kichóni, chrók'uántaxíenhyani kichuárá. **A** ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jje tí ley. **A** ntá tí t'eka ch'án jje tí ley la mé t'óna juez chrínki chrókuitekaon tí ley.

12 Kixin jnkokoá nkexro kjuanjon tí ley la tí nkexro a mé tí juez la jehe ch'án sinchekaá ch'án chojni la ko sinchekjasóte ch'án chojni. ¿**A** ntá nkexro tí jaha kixin chrókjuanchéhé jje tí kichuá?

Í noehyani nkehe tsonhen ntóye

* 4:6 Proverbios 3.34

¹³ **A** ntá jie jahará chrókuinhínra tíhi kixin tsintáchorá kixin: “Ijie **o** ntóye sáchrokuini ijnko chjasin la ntíha chrók'uejóni ijnko nánó chrókjuinçekjini nkehe chrókjuachani chichaon.”

¹⁴ **A** ntá jahará noahyará nkehe tsonhen ntóye kixin tí tjejóchónni la éxi ijnko tjuj nonte ts'ikonni **a** ntá tuénxín ts'itjáyan.

¹⁵ Íchá jína chróntáchorá kixin: “Tí tjinkaon Ìnchéni la **naxa** chrók'uejóchónni la chrókjuich'eni tíhi **o** tíha.”

¹⁶ **A** ntá jahará tí nixjará la imá ihnkerá la kaín tí kjuahnke la mé jínahya.

¹⁷ **A** ntá tí nkexro nohe chrókjuich'e tí nkehe jína la ntá ch'ehya **xikaha** la mé **antsí** tjasin jie.

5

Tí nkehe chrókuinhin tí sín rico

¹ Jahará rícorá chrókuinhínra tíhi. Chrótsjankará la ko chrók'uíyatorá kixin tí nkehe tsonhanrá tsjasótiará.

² Tí nkehe rícoxínra la ó tsíkótje la ko tí ka chontará la ó tsík'in kué.

³ Tí oro la ko tí plata chontará ó tsíkóchjisen. Tíha mé **tjakoqxin** kixin nkexrí tsonhen ntoará tsoche. ¿Nkehe tsonhen kjuásintonrá nkehe kixin ó tsi tí yaon tsjixixín?

⁴ **A** ntá tí nkehe chrókjuacha tí sín kjuít'ahará **xra** la kjuénkehyará sín la ntá tjanchia sín jie tí jahará la t'èya sín, ntá Ìnchéni imá t'etqan mé kuínhin kixin **xikaha** ichro tí sín kjuích'e **xra**.

⁵ **A** ntá ntíhi chjasintajni la náxrjón tjejorá la kaín nkehe tóxrjínhanrá ch'erá la éxi iko imá jína ine la tsíkótsanká la ntá itsji yaon ntá its'en la mé **xikaha** tsonhanrá.

⁶ Kixin jahará la kjuinçekjasóterá la k'oyánra chojni ninkehó jie chóntahya kjónté kohya nkehe kjuít'ahará sín.

Chrókóninkakonhyani chróchónhenni la chrónixjeheni Dios

⁷ Méxra kichó ni, chrókóninkákonhyará chróchonhénra tsokjanjian Ìnchéni. Éxi tí ch'in ch'e **xra** nontje chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna.

⁸ Mé **xikaha** jahará la kjaxin chrókóninkákonhyará chróchonhénra chrókóxrjéhyará kixin tí yaon itsi Ìnchéni la ó chjina tsi.

⁹ Kichóni, chrókóninkákuenhyará kichuára kixin ntá chrókjuanchahya Dios jie tí jahará kixin Dios la mé tí juez la ó tjen ch'án tí ntója puerta.

¹⁰ Kichóni, chrókuankíhíra éxi tí sín k'uéchrónka itén Dios k'uéchrónkaxín sín kjuachaxin ihnié Ìnchéni. Jehé sín kjónté kjuasóte sín la kóninkakonhya sín.

¹¹ **A** ntá jeheni ntáchroni kixin kóchéhe tí sín a kjónté kjuasóte sín la kjuacha sín. Jahará la ó kuinhínra kixin nkexrí kónhen ch'in Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la **kuikonóhe** ch'án tí ch'in a.

¹² **A** ntá kichó ni, chrókuakjénxínhyará ihnié Dios tjen nkaya nkajni la ko ni chjasintajni la nijnko nkexro chrók'uakjénxínhyará. Tí chróntáchorá chaxín la chaxín la tí náhi la náhi kixin Dios la chrókjuinçekjasótiahará.

¹³ **A** ntá jnkójn tí jahará náxrjónhya tjejorá la chrónixjehéra Dios, **a** ntá jnkójnra náxrjón tjejorá la chrótsjerá kuente Dios.

¹⁴ **A** ntá tí jnkojín nkexro níhi la chrók'uíyehē sín tí sín táda t'etōan kuènte n̄nko ḱixin ntá chrónixjehē sín Dios ḱixin tí s̄inníhi la ko chróchjéhe sín aceite tí sín a kjuachaxín ihñié Ìnchéni.

¹⁵ Chrónixjehérá Dios kaín asánrá ḱixin tí s̄inníhi chrókuítóhe jína la ntá Ìnchéni chrókuinkítsa sín, a ntá ichrén jiē kjuasin sín la jehe ch'án sinchek'itjáyan tíha.

¹⁶ Méxra chróchenkará ḱichuárá tí jiē chontará la ko chrónixjehérá Dios ḱixin chrókuítóhará jína. Tí nixjehē Dios ijnko chojni jína tinkáchónki Ìnchéni la chóna nchónhya kjuachaxín tíha.

¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án ḱixin ts'aniáhya chrin la ntá k'uániáhya chrin chjasintajni iní nánó ko t'ō.

¹⁸ **A** ntá chr'éx̄in kjuanchehe ch'án Dios ḱixin ts'aniá chrin la ntá k'uániá chrin inaá chjasintajni la jína k'óna tí nkehe k'uenkā sín.

¹⁹ Kíchóni, tí jnkojín chojni chrókjuichroe chrókuítóhe tí nkehe ntoá la í jnko nkexro chrókuinkítsa ḱixin chrókjan tí nkexro a

²⁰ la chrókónohará tí jahará ḱixin jnkojín chojni tjinkítsa ijnko nkexro chóna jiē tsokjanxin tí nt̄ia jínahya k'uék'aji ch'án la ntá ó kjuinkítsa ḱixin tsaáxin asén tí ch'ín a ḱixin ts'itjáyanhya ch'án la ntá chrók'uitjáyan tí nchónhya jiē k'uéchóna ch'án. Ó t̄jen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énnen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahá ch'án xra mé ikjian tí xroon chr'anhánrá jahará sátsíkjirá ókjé chjasin tjejórá, mé tjejórá estado Ponto, la ko Galacia, la ko Capadocia, la ko Asia, la ko Bitinia.

² Kjueyará It'éni Dios kixin jehe ch'án tsikjenkayáxin ch'án ósé xikaha. Kótjuáxinrá Nchakuen ch'án kixin chrókuítekáonrá ch'án la ko kótjuáxinrá ijnié Jesucristo. Kjuasáyé ch'án chrókuuintayaonrá ch'án kixin antsí chrókuákjárá tí kjuaxróxin kuénte ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kuikonógheni ch'án kixin éxi kokjéxinni nixin kixin xechón Jesucristo. Mé xikaha tjejóchónhenni sinchekaáni ch'án.

⁴ Mé xikaha ts'ayéhérá jahará tí nkehe tsjanjon Dios chóna ch'án nkaya nkajni mé ijnko nkehe chónhya ts'itjáyán, la ko chónhya tsokjita, la ko chónhya tsqxamá.

⁵ Dios mé t'ayakuanxínrá ch'án tí kjuachaxin kuénte ch'án kixin jahará tinkachónkirá ch'án kixin ntá tsjacha tsaará éxi tsíkjenkayáxin ch'án ósé mé tjinkaon ch'án kixin chrókuaará tí tsjixixin tsjeje chjasintajni.

⁶ Méxra xikaha chrókócháhará kjónté ichrén nkehe chrókónhanrá iso yaon kixin jehí t'ichjánxin xikaha itsjé nkehe chrókónhanrá.

⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxi yóhe chica oro xikaha t'ichjánxin ts'atsínka tí siin xrohi tsotsjéxin sín á chaxín jina kohya nkehe tsqnen. A ntá antsí má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsqnhanrá kixin tsontáchro Dios kixin jina kjuachará ntá ts'ayéhérá kjuachaxin tió tsi Jesucristo.

⁸ Jahará tjuéhérá Jesucristo kjónté k'uíkonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jie kohya nkehe sincheyógheni kixin imá náxrjón tíha.

⁹ Mé xikaha k'uitjará nkexrí tsaáxin asánrá. Tíha mé tí nkehe tjejochónhénrá tinkachónkirá.

¹⁰ Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxin sín tí nkehe kjuasáyé Dios chrókjuanjon ch'án chrók'uayéhérá tí jahará.

¹¹ Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'ayéhe ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkesá tsqnen tí nkehe chrónkaxin Nchakuan Ìnchéni.

¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uéjó sín. Náhi. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxin tí sín kjuakqohará kixin tí kjuachaxin Nchakuen Dios kuixin

nkaya nkajni mé kjuínkítsa tí jehe sín. Kjaxin tí sín ángel tjinkaon sín chrók'uinkon sín nkexrí tíha.

Dios k'uíyehé ch'án tí jeheni kixin tjóá chrók'uejóni

¹³ Méxra chrókjuenkayáxinrá jína nkehe chrókjuich'erá kixin chrók'uejorá jnkójina. Kaín asánrá chrók'uejochonhénrá kixin tí nkehe sintakítõnhanrá Dios tíó tsi Ìnchéni Jesucristo.

¹⁴ Éxi ijnko xjan titekaon mé xíkaha jnkójina chrók'uejorá jahará, chrókjuenkayáxinhyará éxi k'uékjenkayáxinrá senó naxa k'uéchonhyará Dios.

¹⁵ Náhi. Jnkójina tjóá chrók'uejorá kixin Dios k'uíyahará la mé jína ch'án la ko tjóá ch'án.

¹⁶ Kixin ntácho xroon itén Dios kixin: "Jahará chrók'uejorá tjóá kixin janhan na mé ijnko nkexro tjóá."*

¹⁷ Tí ntáchorá jahará kixin It'ará mé Dios la ko ó nohará kixin jehe ch'án sinchekitoexín ch'án ijje jnkójnko chojni, kixin t'íkon kixin jnkokón sínkí jnkójnko chojni, a ntá jahará chróxráxinkáonrá ch'án jnkochrínín tí naxa tjejochónrá ntíhi chjasintajni.

¹⁸ Dios mé kjuíntakaará ch'án kixin chrók'uejohyará éxi k'uék'ejó tí sín tsík'axrjeníxinrá. Jahará ó nohará jína kixin tí nkehe k'uínáxinrá tsaáxinrá jehya ijnko nkehe chrókjueje éxi chica oro o chica plata.

¹⁹ Náhi. Ná mé k'uínáxinrá ijnjé Jesucristo imá tjete. Jehe ch'án mé k'óyan sín la k'uáyehé Dios éxi ijnko kolélo ninkehó xéhya va.

²⁰ Kixin Cristo mé ósé tsíkónoxín ch'án tí naxa k'ónahya chjasintajni. Kjánchó jehya tuénxín kónhen tíha hasta tí chr'éxin ntá kónoxín ch'án kixin jína chrók'uejoxínrá tí jahará.

²¹ Ntá xíkaha kónhen Cristo a ntá jie jahará la kuítekáonrá Dios, mé tí nkexro kjuínchexechón Cristo la ko kjuikosáyehe ch'án. Mé xíkaha jahará tinkachónkirá Dios la ko tjejochonhénrá sintakaará ch'án.

²² A ntá jie ó kuítekáonrá tí tan chaxín ntoá kixin tjinkítsará Nchakuèn Dios. Tíha mé kótjuáxin asánrá kixin ntá tsotjuèhérá kíchuára. Mé xíkaha chrótjuèhérá kíchuára kaín asánrá.

²³ Méxra jahará kokjíhará níxin, jehya kixin naxa chrók'uaxrjeníxinrá it'ará chjasintajni ntíhó ts'itjayan. Náhi. Kokjíaixinrá itén Dios itjen jnkochrínín.

²⁴ Kixin ntácho xroon itén Dios kixin:
Kaín chojni chjasintajni tóyóhé kayoa ó,
a ntá tí kjuachaxin chóna la tóyóhé itsjo t'óna kayoa.
Tí ka la tsqxámá a ntá tí tsjo la ts'anótjen

²⁵ a ntá tí tan kuènte Ìnchéni la tsjak'e jnkochrínín.†
Tí tan í mé tsaáxinni la kuinhínrá tí jahará.

2

¹ Méxra tjtóhérá kaín nkehe jínahya, la ko kaín kjuach'ia, la ko tí ntoáhya tjenkayáxinrá, la ko tí kjuachjínqxínhin, la ko tí xrikoará kaín xín kjuach'ia.

² Chrók'uejorá éxi chánjan na ntá tsíkokjíhi la itsjen ó chrók'ui, mé xíkaha jahará chrókjuéyará itén Dios, tíha mé chrókónohará la chrók'uánkixin kjuaxrexinkaon kuéntará kixin chrókuaáxinrá,

³ tí chaxín kjuátsõanrá kixin Ìnchéni la jína.

* 1:16 Levítico 11.44 † 1:25 1.24-25 Isaías 40.6-8

Cristo mé tí xro tjechón

⁴ Chrókóchjineherá Ìnchéni, mé jehe ch'án me éxí tí xro tjechón. A ntá tí chojni la kuítekakonhya tí xro a, a ntá Dios la kjueyá ch'án tí xro a imá tjete sínkí.

⁵ Mé xíkaha Dios kjuich'énará tí jahará éxí xro tjechón la Dios chrókjuich'éna ch'án tí jahará jnkokoá nínko kuénte ch'án, la mé ts'ónará ncha'tá tsíkjinchetjóá Dios, a ntá chrókjehérá ch'án tí nkehe tóxrjnhjín ch'án kixin tinkachónkirá Jesucristo.

⁶ Mé xíkaha kjaxin xroon itén Dios ntáchro kixin: Tsjaké chjasin Jerusalén ijnko xro t'etóan ts'óna nchia, ijnko xro tsíkónoxín imá tjete sínkí

a ntá tí sín tsitekaon tí jehe ch'án mé tsosuehya sín.*

⁷ A ntá jahará títekaónrá tí xro kixin imá tjete. A ntá tí sín kuítekakonhya, la mé tsoxiteyá éxí ntáchro xroon itén Dios kixin:

Tí xro náxrjónhya kuítóenta tí sín ch'éna tja't'o, mé ijie mé k'óna tí xro tjetóan.†

⁸ La ko kjaxin tsoxiteyá tí nkehe ntáchro xroon itén Dios kixin:

Tí xro mé tsóténkixín sín la mé tíha ijnko tjo tsjtsínkaxín sín.‡

Kjánchó jehe sín kóténkixín sín tí xro kixin kuítekakonhya sín tí itén Dios mé xráxín tsíkítóenxín sín xíkaha tsonhen sín.

Tí sín tinkáchónki Dios

⁹ A ntá jahará tsík'axrjenixínrá tí sín tsíkjeýá Dios la ko tsík'ónará ncha'tá ch'eherá xra tí rey, la ko tsík'ónará ijnko nación tjóá, la ko tsík'ónará ijnko chjasin kuénte Dios kixin ntá tsochronkará tí xra náxrjón kuénte Dios. K'uíyáhará ch'án kixin ts'axrjéxínrá tí sítié ntá ts'ixenhénrá tí síin xrohi náxrjón t'inkaséyan kuénte ch'án.

¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uékjikonóahyará. A ntá jie la kuíkonóahará Dios.

Chrók'uejóni ch'ehe ni xra Dios

¹¹ Kíchóni, xrjanóahará tí jahará kixin éxí chojni tsíkjixín ókjé chrók'uejorá ntihi chjasintajni chrókjuánjonhyará kjuachaxin chrókóxrjnhjín asánrá tí nkehe síin chjasintajni, mé tí nkehe tjanjonko asánrá.

¹² Jína chrók'uejorá tí síin tí sín chónhya Dios kixin kjónté t'ántaxínhanrá sín éxí chojni jínahya chóntha jie tí jahará, ichro sín, la ntá tí chrók'uikon sín kixin jína tjeoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Ìnchéni chrókjuínchexiteyéhérá kaín tí sín t'etóan kuénte chjasintajni, á tí ch'ín rey kixin imá t'etóan ch'án,

¹⁴ o á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jína.

¹⁵ Dios tjinkaon kixin jína chrók'uejorá kixin tí sín noehya la ko tí sín lontj la kohya jie ts'ekará sín tí jahará.

¹⁶ Chrók'uejorá éxí chojni t'ítuenhya, a ntá tí kjuachaxin chontará jehya kixin chróchontaxínrá kjuachaxin kixin chrókjuich'erá tí jínahya. Náhi. Chrókjuákoxínrá éxí chojni ch'ehe Dios xra.

* 2:6 Isías 28.16 † 2:7 Salmo 118.22 ‡ 2:8 Isías 8.14

17 Chrókjuikosáyehérá kain chojni. Chrórtjuèhérá tí sín kichó ni, la ko chróchonteherá Dios kjuasáya, la ko chrókjuikosáyehérá tí ch'ín gobierno t'etōan.

Tóyoēxin éxí tí nkehe kjuasótéxín Cristo

18 Jahará chojni ch'exón xra, chrókjuinchehiteyéhérá tí lámōará, chróchonteherá kjuasáyé sín, kjónté tí sín jína la o tí sín jínahya.

19 Tíha mé ijnko nkehe jína chrókjuákoxínrá kjónté chrókjuasótiaxínrá ijnko nkehe jínahya kixin xikaha mé chrókjuinchehiteyéhérá Dios.

20 A ntá tí tjejoch'erá ichrén nkehe jínahya, ntá ncheejasótiaxínrá sín la çnkehe tsonhen kixin chrókóninkákonhyará? A ntá tí chrókjuasótiaxínrá ijnko nkehe jína la ntá chrókjuachará chrókóninkákonhyará, la tíha mé tóxrjínhjn Dios.

21 Méxra xikaha k'uíyahará Dios kixin Cristo kjuasótéyakónhánrá. Tíha mé kjuakoçin ch'án kixin mé xikaha chrókjuich'erá.

22 Kixin Cristo la ninkehó jie kjuasinhya ch'án la ko ninkexró kjuich'iyehya ch'án,

23 la ko ninkehó kjuatēehya ch'án tió k'uántaxínhjn sín ch'án; a ntá tió kjuincheejasóte sín ch'án la ninkehó k'ókjanxínhya ch'án. Náhi. Jehé ch'án kjuanchia ch'án kixin Dios ts'ayakonhen tí jehe ch'án kixin Dios mé ntoa nchekitōexín ijje chojni.

24 Cristo mé kuamá ch'án tí ijje ní kixin tí cuérpōe ch'án kjuák'enkáni ntacruz kixin éxí tsík'enni k'uék'ejóni kixin tí jie k'uéchóntani, a ntá jie chrók'uejóni jnkójína. Kixin Cristo kjuasóte ch'án, chrít'o ch'án kixin jahará chrókuitoaxínrá jína.

25 A ntá jahará k'uék'ejorá éxí kolélo tsikjichroe. A ntá jie k'uitjará tí nkexro ts'ayakonhen asánrá.

3

Nkexrí chrók'uejō tí sín tsíkótehe

1 Kjaxin jahará chojni chjin ó tsikótahará chrókuitekákónhénrá tí xiyará, kixin kjaxin jnkójín tí sín titekakonhya itén Dios chrókuitekaon sín kixin jína tjen tí tjachjín, kjónté t'ichjánxínhya chróchrónka tjan kixin jína tjen tjan,

2 kixin chrók'uikon sín xikaha kixin jína tjen tí tjachjín chóna kjuasáyé tjan.

3 Chrókjuinchehnkexinhýará nkehe náxrjón chróchontará la ko tí nkehe náxrjón chróchóna kaxihará la ko nkehe náxrjón tsík'óna chica oro la ko tí ikará imá náxrjón.

4 Náhi. Chrókjuinchejínará asánrá, kixin tí nkehe náxrjón chrók'uitjáyánhya na mé tí asén chojni tójehya la ko náxrjón. Tíha mé imá sínkí nkayakon Dios.

5 A ntá tí osé xikaha k'uékjenkayáxin tí chojni chjin jína. Jehé sín mé kuinkáchónki sín Dios la ko kjuinchehiteyéhé sín xii sín.

6 Mé xikaha kjuich'e tjan Sara kjuinchehiteyéhé tjan tí ch'ín Abraham, mé kjaxin ntáchro tjan kixin inché tjan tí jehe ch'án. A ntá tí jahará tí xjeen tí jehe tjan la chrókjuinchehiteyará jína la ko ninkehó kjuachrakon chróchontahýará.

7 Kjaxin jahará chojni ntoará tsikótahará chróchonteherá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjahará Dios tí kjuachón. Xikaha chrókjuich'erá ntá tió chrónixjehérá Dios la kohya nkehe chrók'uinkákonhēn.

Tí sín tjasótéxín sín kixin jína kjuich'e sín

8 Méxra, jnkokoá chrókjuenkayáxinrá kaín rá chrókjuikonóehérá kichuárá, chrótjuèhérá kichuárá. Jnkójina chrónixjehérá kichuárá la chrókjuinchehnkehyará asánrá.

9 Tí ichrén nkehe jínahya chrókjuít'ahará sín la jahará la xikahya chrókjuich'ehérá sín. Tí chrók'uántaxínhanrá sín la jahará chrók'uantaxiènyhará sín. Náhí. Íchá jína chrókjuancheherá Dios kixin chrókjuincheyaoon ch'án sín kixin Dios la k'uíyahará ch'án kixin chrók'uayéherá kjuachaxin kuènte ch'án.

10 Kixin:

Tí nkexro tjinkaon tsotjuèhe asén kixin jína chrókjuak'e kaín yaon

la chrónixjahya ch'án ninkehó nkehe jínahya

la ko ninkehó kjuach'ia chrók'uaxrjexínhya ir'va ch'án.

11 Tí nkexro la chrókuítqhe tí nkehe jínahya la íchá jína chrókjuich'e tí nkehe jína,

la ko íchá jína chrókjuéyá ch'án kjuaxróxin chrókjuak'e ch'án.

12 Kixin Ìnchéni t'ayakonhen tí nkexro jína

la ko tinhin ch'án tí nixjehé sín ch'án,

a ntá tí sín ch'e tí jínahya la tjinkitsahya ch'án.*

13 ¿Xá nkexro chrókjuít'ahará nkehe jínahya tí jahará tjejoch'erá nkehe jína?

14 Kjónté chrókjuasótexínrá tí nkehe jína tjejoch'erá kjónté la chrókocháhará chróchrakuenhyará ninkexró la ko chróchrakonhyará.

15 Náhí. Íchá jína chrókjuíkosáyehérá Cristo nkaya asánrá kixin Ìnchárá. Chrók'uejorá listo chrókjuátèherá tí nkehe chrókjuanchankíhará kaín chojni kixin nkexrí tinkachónkirá Ìnchéni, la chrókjuinchehnkehyará la kjuasáya chrókjuátèherá.

16 Chróchontará ijnko kjuaxrexinkaon jína kixin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuèhe sín kixin tí nkehe ntáchro sín la ntoáhya.

17 Íchá jína chrókjuasótiaxinrá kixin tí jína tjejoch'erá tí xikaha tjinkaon Dios, a ntá chrókósuàhará chrókjuasótiaxinrá tí ichrén jie chrókjuich'erá.

18 Kixin Cristo kjuasóte ch'án la ko k'uénxin ch'án tí jie kuènteni, ónaá k'uén ch'án kixin para jnkochrixin. Jehé ch'án la jína ch'án la kjuasóteyákonhenni ch'án kjónté jínahyani, kixin ntá jína sáchrókjuíkoni ch'án tí tjen Dios. A ntá ik'uén ch'án éxi chojni, a ntá Nchakuen ch'án la k'uénhya mé xechón inaá,

19 kixin tí Nchakuen ch'án sákjuikjakohé tí nchakuen tí sín tsík'en tjejóchjina.

20 Tí sín a mé kuítekakonyha sín tí ósé tió kjuák'e ch'ín Noé na mé Dios la kóninkakonyha ch'án kjuák'echónhen ch'án nachrohe sí'tóna tí arca, na mé ijnikoá chojni kuítekaon sín mé kuaá sín tí kujtee sín nta.

21 Tí nta a mé tóyohé tí tikítexín chojni ijie kixin tí xikaha tsonhenni la tsaáxinni ijie. A ntá tí tikite chojni la jehya kixin tsotjuáxin tí cuerpo. Náhí. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ìnchéni Jesucristo,

22 mé tí nkexro sátsíkji nkaya nkajní itjen ch'án itja chjina Dios. A ntá jehé ch'án la mé t'etuenhen tí sín ángel la ko tí sín t'etqan.

* 3:12 3.10-12 Salmo 34.12-16

4

Chrókjuich'eheni Dios xra éxi tí kjuachaxin kjuanjon ch'an

¹ Méxra éxi Cristo kjuasóte tí cuérpóe ch'an ntá kjaxinrá kjónté xikaha chrókjuasóterá chrókóxakuanhyará kixin tí nkexro kjuasóte tí cuérpóe la ó kuítóhe tí jie.

² A ntá tí naxa chrók'uejochónrá intsí la chrók'uejorá éxi tóxrjínhjin Dios. Jehya éxi k'uékóxrjínhanrá.

³ A ntá tí óse nchónhya nkehe k'uékjich'erá éxi ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jie k'uéchontará ókjé chojni chjin la ko k'uékókoanrá la k'uekjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjangya.

⁴ A ntá ijie la jahará t'itohyará tí sín a kixin tí jínahya ch'e sín. Méxra xikaha t'ántaxínhanrá sín.

⁵ A ntá tí jehe sín tsjanjon sín kuentá tsochénka sín tí nkexro tjechónhen sinchekitóexín ijie tí sín tjejóchón la ko tí sín tsik'en.

⁶ Méxra kjónté tí sín tsík'en tsíxrákóhe sín tí itén Dios kixin tí nchakuen sín chrók'uejé éxi tjinkaon Dios kjónté naxa k'uéjé sín ntihi chjasintajni la kuítóexín tí ijie sín éxi tsitóexín ijie kaín chojni.

⁷ Ó kuichjina tsjeje chjasintajni a ntá xikaha chrók'uejorá jnkójina la ko chrók'uejotsjehérá chrónixjehérá Dios.

⁸ Tí nkehe imá tjeaton kixin antsí chrótjuèhérá kichuárá. A ntá tí tjuèhérá kichuárá la mé tíha chrók'uitjáyanxin tí nchónhya jie chonteherá kichuárá.

⁹ Chrókjuánjonrá kjuachaxin chrókuitóhe jnkójín kichuárá ntóará chrókóninkákuénhyará nijnko tí jehe sín.

¹⁰ Jnkójnkorá nkehe tí xra tjáhará Dios k'uayéhérá chrókjuínkítsará kichuárá. Xikaha jina chrókjuákoxinrá tí kjuasáyé ch'an tjáhará ch'an kixin nchónhya xra k'uayéhérá.

¹¹ Tí jnkójínrá tjinkáonrá chrónixjará ichrén nkehe la chrónixjará éxi nixja itén Dios. Tí jnkójínrá tjinkáonrá chrókjuínkítsará la chrókjuákoxinrá tí kjuachaxin tjáhará Dios. Kaín tí xra chrókjuich'erá chrókjuanchehérá Dios kjuasáya kixin kjuasáyé Jesucristo tinkachónkirá tí jehe ch'an. Kixin jehe ch'an la kaín tí kjuachaxin síin la kuènte ch'an jnkochríxín. Mé xikaha chaxín. Amén.

Íchá jina chrókjuasótéxinni kixin tí tinkachónkini Cristo

¹² Kichóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xikaha tsonhanrá. Chróntáchrohyará kixin ókjé nkehe tjasótiaxinrá.

¹³ Náhi. Íchá jina chrókócháhará kixin xikaha chrókjuasóterá éxi kjuasótéxín Cristo, kixin kjaxinrá tsocháhará imá tió ts'ikonrá tí kjuachaxin tsíkao Ínchéni tí itsi ch'an.

¹⁴ Chrokócháhará tí t'ántaxínhanrá sín kixin tinkachónkirá Cristo kixin tí Nchakuen Dios chóna kjuachaxin t'ayakonhanrá. Jehé sín t'ántaxínhjin sín ch'an, a ntá jahará tjíkosáyehérá ch'an.

¹⁵ A ntá tí jnkójínrá tjetotjasóterá chrókójehya kixin ichrén nkehe chrókjuich'erá chrókjuáyará o chrókuejá o ichrén nkehe jínahya chrókjuich'erá o chrókjatérá kjuanínkaon kuènte ókjé chojni.

¹⁶ Náhi. A ntá jnkójínrá chrókjuasótiaxinrá kixin tinkachónkirá Cristo la chrókósuáhyará. Náhi. Chrókjuanchehérá Dios kjuasáya kixin xikaha kónhanrá.

¹⁷ Ntá jie ó kui tí tsitöexín ijje chojni mé xránkíxixín tí sín tsík'óna xjeen Dios. A ntá tí xíkaha tsitöexín ijje tí jeheni xránkíxixín, a ntá íchá tí ó tsjixixín tí sín titekakonhya tí itén Dios.

¹⁸ Íchá tí sín jína la ko xíkaha tsonhen sín ntá tsaá sín a ntá íchá tí sín jínahya chóna jie kjá antsí tsjasóte sín.*

¹⁹ A ntá tí nkexro tjasóte éxi tjinkaon Dios la kjónté xíkaha la naxa chrókjuich'e sín nkehe jína la ko chrókjuanjón sín asén sín chrók'uayakonhen Dios mé tí nkexro kjuich'éna sín la mé jehe ch'án xráxín jína ch'án.

5

Tí k'uítuenhen tí sín t'etöan kuènte njnko

¹ Tjínkavan tétuanhan tí chojni t'etöan kuènte tí njnko tjeorá ntiha kíxín kjáxín janhan tétöan kuènte njnko éxi tí jehe sín, a ntá janhan mé k'uikuán kíxín nkexrí kjuasóte Cristo, la ko kjáxín janhan mé tsochonta kjuachaxín kuènte Dios éxi tsochóna tí jehe sín tió itsi Inchéni chr'éxín.

² Jahará chrók'uayakonhénrú tí kolélo kuènte Dios ntiha kíxín xíkaha tí xra k'uayéhérá. Jnkójína chrókjuínkítsará sín éxi tjinkaon Dios la jehya kíxín ijnko chojni chrók'uetuanhanrú chrókjuich'erá xra, la ko kjáxín jehya kíxín imá chrókórxjínhanrú chichaon. Náhi. Kaín asánrú chrókjuich'erá xra jína.

³ Jehya jahará kuèntará tí jehe sín kíxín chjini chrókuétueñhénrú sín. Náhi. Jnkójína chrókjuákoéxínrú tí jehe sín.

⁴ A ntá tió tsi tí Pastor chaxín t'etöan ntá jahará ts'ayéhérá ijnko corona náxrjón tsjehéhya.

⁵ Kjáxín jahará ntasoárá chrókjuínchexiteyéhérá tí sín t'etöan kuènte njnko. Kaínrú chrókjuínchexiteyéhérá kíchuárá chrókjuínchehnkehyará kíxín: Dios la tsonínkakonhen tí sín nchehnke, a ntá tí sín nchehnkehya mé tsjinkítsa ch'án.*

⁶ Méxra chrókjuínchehnkehyará, chrókjuínchexiteyéhérá Dios kíxín jehe ch'án imá ts'etöan ch'án kíxín tsjixraká tí yaon mé jehe ch'án tsotjáhará ch'án kjuachaxín kíxín tsétöanrú.

⁷ Chróchjehérá Dios kaín tí kjuaxrexinkaon chontará kíxín kjáxín jehe ch'án tóxakonhen ch'án tí jahará.

⁸ Chrókóxakonhanrú jína chrók'uejorá. A ntá ijje ixri tí nkexro nínkakonhanrú mé tí ch'ín Tsochren éxi ijnko koxra tsjánka va xritjeyá va nkehe sine va.

⁹ Tjánjonhyará kjuachaxín kíxín jehe ch'án chrókjuacha ch'án chrókjuachroerá ch'án, kíxín ó nohará kíxín kaín tí sín kíchuárá nkuixín chjasintajni xíkaha tjejtjasóte sín kíxín tinkáchónki sín Inchéni.

¹⁰ Kjánchó kánhyó sé tsjasótiará, a ntá Dios antsí tsjinkítsará ch'án kíxín tsjachará ts'ejorá jína. A ntá jehe Dios a mé tjuahará ch'án la k'uíyahará ch'án kíxín ts'ejokoará ch'án jnkokoá tí tjen Jesucristo chóna kjuachaxín jnkochrixin.

¹¹ Jehe ch'án tsjancheheni ch'án kjuasáya kíxín chóna ch'án kjuachaxín ts'etöan ch'án jnkochrixin. Amén.

Kjuixixín nixja ch'ín Pedro

¹² Ch'ín Silvano mé t'ikuán ijnko kíchó ni jína mé kjuínkítsa ikjinni tí xroon kjónté kánhyó tsje nixja, la ntaxraxinkáonrú kíxín kjuíntayaonrú Dios

* 4:18 Proverbios 11.31 * 5:5 Proverbios 3.34

ntá xikaha kjuakoxin ch'án kixin chaxín tjuahará ch'án. Méxra xikaha jína chrók'uejorá kixin tjuahará ch'án.

¹³ Tí ninko tjen Babilonia mé tsíkjejá Dios éxí tsíkjejá ch'án tí jahará nixjohará sín la ko kjaxin nixjohará ch'ín Marcos, mé éxí xjanna t'íkuan tí jehe ch'án.

¹⁴ Nixjehérá kichuára jnkojína. Kjuaxróxin chrók'uejorá tinkachónkirá Jesucristo. Amén.

Xroon yóxin tsíkjin ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'ahá xrá Jesucristo. Ikjian tí xroon ts'ayéhérá jahará ó tinkáchónkirá Ìnchéni éxí tinkáchónkini jeheni kixin Dios la ko Jesucristo tí nkexro sinchekaáni na mé jína ch'án.

² Sintayaonrá Dios la ko antsí ts'ayéhérá kjuaxróxin kixin ó nohará nkexrí tjen Dios la ko Ìnchéni Jesús.

Jína chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jína chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrá imá jié kjuich'e ch'án.

⁴ Mé xíkaha kjuanjon ch'án kaín xín tí nkehe a, táha la mé imá jié la ko imá tje te sínkí. Mé xíkaha kjuakoxin ch'án kixin chrók'uayéhérá kjuachaxin chrók'uejorá éxí tjinkaon ch'án la ko chrókuítqhérá tí nkehe jínahya kixin chrók'uitjáyanxínhyará tí nkehe k'uékjenkayáxinrá siín chjasintajni.

⁵ A ntá jahará tinkáchónkirá Ìnchéni la kjaxin chrókjuéyará kixin chrók'uejorá jnkójina; a ntá tí jína tjejorá ntá chrókjuachará antsí chróknohará;

⁶ a ntá tí kónohará ntá chrókjuachará chrókjenkayáxinrá jína; a ntá tí tjenkayáxinrá jína ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios;

⁷ a ntá tí chaxín xráxinkáonrá Dios ntá chrókjuachará chrótjuéhérá kichuára; a ntá tí tjuéhérá kichuára ntá chrókjuachará chrótjuéhérá kaín chojni.

⁸ A ntá xíkaha tjejoch'erá tinkák'ánki tí kjuaxrexinkaon kuéntará, ntá jehya kixin chónkó kuinkáchónkirá Ìnchéni Jesucristo.

⁹ A ntá tí nkexro ch'ehya xíkaha la mé éxí ijnko chojni t'ikonhya o ijnko chojni t'ikonhya jína, kixin ó k'uitjáyenhen kixin Ìnchéni ó kjuixin kjuínchetjóa tí jié k'uéchóna ósé.

¹⁰ Méxra xíkaha kichó ni jnkójina chrók'uejorá kixin ntá tsonohará jína kixin Dios tsíkjayará tí jahará la ko tsík'íyáhará ch'án kixin xíkaha jína chrókjenkayáxinrá, a ntá xitjahya chrókjuichroerá.

¹¹ A ntá xíkaha chrókuítekáonrá ntá tsotjáhará Dios kjuachaxin ts'ixenhenrá tí tjen Ìnchéni Jesucristo t'etqan ch'án jnkochrixin. Jehe ch'án mé tí nkexro kjuínchekaáni.

¹² Méxra titoahya ntaxráxinkáonrá kaín tí nkehe i, kjónté ó nohará tí nkehe ntoá kjuákoahará.

¹³ Ntaxrjan kixin jína tí naxa tjen chrókjuíntaxráxinkáonrá kaín tí nkehe a

¹⁴ kixin Ìnchéni Jesucristo kjuínchenóna kixin í séhya its'én janhan.

¹⁵ Na mé kaín tíha tjét'a kixin tió its'én, ntá jahará tsoxráxinkáonrá jnkochrixin kaín tí nkehe kjuít'a.

Tí sín k'uíkon tí kjuachaxin kuénte Cristo

¹⁶ Tí nkehe kjuákoaharáni kuénte tí kjuachaxin kuénte Ìnchéni Jesucristo la ko nkexrí itsi ch'án na mé jehya ijnko cuento kjuich'ena chojni

chrókjuich'iyaxín. Náhi. Ikonna k'uikónxínconi Ìnchéni la ko tí kjuachaxin kuènte ch'án.

¹⁷ K'uikonna tíha tíó It'eni Dios kjuikosáyehe ch'án tí Xjeen ch'án, la ntá kuínhinni nixja Dios tjeen nkaya nkajní ntáchro ch'án kixin: “Tíhi mé xjanna tjuahá ch'án. Imá chàna kixin nchexiteyá ch'án éxi tjínkavan janhan,” ichro Dios.

¹⁸ Mé kuínhinni itén Dios kujxin nkaya nkajní kixin xikaha ntáchro tíó k'uejókoni Ìnchéni chrítaón tí jna tjóá.

¹⁹ Mé xikaha k'uechrónka tí sín tsíkjin itén Dios ósé ntá noexínni kixin chaxín tsoxiteyá. A ntá jahará chrók'uejorá chrókuinhínrá jina nkehe k'uéntáchro sín kixin tí tan mé éxi ijnko xrohi t'inkaséyanxín tí sítie tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xikaha ts'inkaséyanxín nkaya asánrá.

²⁰ A ntá tjetoan chrókónohará tíhi: kixin ninkehó xroon itén Dios tsík'óna jehó chojni chrókjuacha chrókiénxín.

²¹ Náhi. Tí sín k'uechrónka itén Dios la nixjahya sín tí nkehe jehó sín chrókjuenkayáxin sín. Náhi. Tsíkjinchetjójá Dios tí jehe sín, a ntá Nchakuen Dios kjuínkítsa k'uénixja sín itén Dios.

2

Tí sín tjako kjuach'ia (Judas 4-13)

¹ Kjaxin k'uék'ixín tí sín ntoáhya k'uechrónka itén Dios tí chjasin Israel, mé kjaxin xikaha tí jie ts'ixín maestro sit'ayahará. Jehe sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xikaha sinchemá sín tí Ìnchéni chrókuaáxinni. Tíha mé tsjixin tsjasótexín tí jehe sín.

² Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxíénxín chojni tí ntja ntoá kuènte Ìnchéni.

³ Tsoxrjínjin sín tsochóna sín nchónhya chichaon, ntá tsjanchiaxínrá sín chichaon tí nkehe ntoáhya tsjakohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

⁴ Dios la kjónté tí sín ángel kjuasin jie la kujkonóehya ch'án sín la k'uetjoan ch'án kixin sátsji sín tsjasóte sín sátsjik'ikjehe sín tí sítie na tjejóchjina sín tsjixrakájia tí tsitpexín ijie sín.

⁵ La ko kjaxin kujkonóehya Dios tí sín k'uejó chjasintajni ósé ntá ichr'án ch'án ntá kujtee tí sín jínahya, a ntá Dios kjuínchekaá jehó tí ch'ín Noé, na mé tí nkexro kjuako tí tan jina la ko kjuínchekaá ch'án tí yato sín ó.*

⁶ Kjaxin Dios kjuínchek'itjáyan tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxín kixin xikaha tsonhen sín.†

⁷ Kjánchó Dios kjuínchekaá ch'án tí ch'ín Lot kixin ijnko chojni jina tí jehe ch'án la ko imá kóxakonhen ch'án tí k'uikon ch'án tí jie kjuasin tí sín jínahya.

⁸ Tí ch'ín Lot mé jina asén ch'án mé k'uekjak'e ch'án tí siín tí sín jínahya ntá kaín yaon kóxakonhen asén ch'án k'uikon ch'án la ko kuínhin ch'án tí nkehe jínahya k'uekjich'e sín.‡

* 2:5 Génesis 6.1-7.24; 8.18 † 2:6 Génesis 19.24 ‡ 2:8 2.7-8 Génesis 19.1-16, 29

⁹ A ntá Ìnchéni na sinchekaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsitqoxín ijíe chojni.

¹⁰ Dios antsí sinchekjasóte ch'án tí sín nchexiteyéhé tí nkehe jínahya ntáchro asén sín a ntá nchexiteyèhya sín tí nkehe t'etqan Ìnchéni. Titekakonhya sín la ko chrakonhya sín chrók'uántaxínhjin sín tí sín ángel chóna kjuachaxin.

¹¹ A ntá tí sín ángel imá tsehé sín la ko imá chóna sín kjuachaxin la kjónté tjinkakonhya ts'ántaxínhjin tí sín a nkayakon Ìnchéni.

¹² A ntá tí chojni a la éxí yóhé iko tjenkayáxinhya ninkehó la nchexiteyéhé tí nkehe ntáchro asén, la kokjíhi kixin ts'óyán kichó ó. T'ántaxínhjin sín tí nkehe tienxinhya sín, mé xíkaha its'en sín éxí its'en tí ko a.

¹³ Tíha mé tsjasótexín sín kixin jehe sín kjuínchekjasóte í so chojni. Xrácín tóxrjínhjin sín ich'e sín tí nkehe ntáchro asén sín. Ijnko kjuatósuehé kixin tjejótaxín sín ntekoará sín tí kia chontará la kjónté tí xíkaha la naxa tjasin sín jie.

¹⁴ Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótexín sín.

¹⁵ Kuítqhe sín tí ntja ntoá ntá chréhe sín ntja kuènte ch'ín Balaam xjeen ch'ín Beor, kixin kóxrjínhjin ch'án chrókjuacha ch'án nchónhya chichaon tí nkehe jínahya chrókjuich'e ch'án.

¹⁶ A ntá t'ichjánxin tsjasóte ch'án kixin tí jie kjuasin ch'án. A ntá ijnko kolócho chjin xitjahya nixja la xrínahya nixja itén chojni la kjuentuéhe tí ch'ín Balaam kixin tí jie chóna ch'án ntá kuítqhe ch'án tí nkehe jínahya chrókjuich'e ch'án.^S

¹⁷ Tí chojni tjako mé éxí yóhé tóye tjíahya ntá la ko éxí tjuj tjakáko xríntó ó; ó kjuixin k'uituenhen sín sátsji sín tí imá sítié tsjasóte sín jnkochrín.

¹⁸ Kaín nkehe jínahya nixja sín, a ntá tí jie tjasin sín tóxrjínhjin sín chojni chjin ókjé ntá tjachroexín sín tí sín na ntá tjínkaon chrókuitqhe sín tí jie.

¹⁹ Chrónka sín kixin kaín nkehe jínahya la jína, kixin jehe sín nchexiteyéhé sín tí nkehe jínahya ntoáhya; kixin jnkojnko chojni mé nchexiteyéhé tí nkehe kjuacha k'uetuēnhen sín.

²⁰ A ntá tí nkexro ó chóxin Ìnchéni Jesucristo tsaáxinni mé kuítqhe sín tí nkehe chrók'uitjáyanxín sín kuènte chjasintajni. A ntá chr'éxin tí chrókuakja sín ntja jínahya inaá tí chrókjuacha tí jínahya chrókjuachroe sín, a ntá antsí má jínahya chrókónhen tí jehe sín.

²¹ Ichá jína chrókónoehya sín tí ntja jína. A ntá jehya jína tí ó nohe sín ntá tsítqhe sín tí nkehe k'uetqan Dios kuínhin sín.

²² A ntá tí jehe sín kjuínchexiteyá sín éxí ntáchro tí proverbio kixin: “Tí konja t'ókjan ntá xíkjan xíkjine inaá,* la ko tí cochíno na ntá tsík'ónti tjóá ntá xíkjan kjánkí tí nchet'q kjíta.”

3

Tió tsi Ìnchéni

¹ Kichóni tjuahará tíhi la xroon yóxin ikjian ts'ayéherá. Yóí tí xroon a ntáxráxinkáonrá kixin jína chrókjuenkayáxinrá.

² Chróxráxinkáonrá tí nkehe tsíchronka tí sín k'uéchronka itén Dios ósé la ko tí nkehe k'uetqan Ìnchéni, mé tí nkexro tsaáxinni, kjuakqohará tí sín kjueyá ch'án.

³ Tjetoan chrókónohará tíhi kixin tí yaon tsjixixín la itsi chojni tsjanoá tí tan jína kuènte Ìnchéni, la sinchexiteyéhe sín kaín nkehe jínahya ntáchro asén sín.

⁴ Tsjanchankí sín nkehe kónhen tí nkehe tsintáchro Cristo kixin tsokjan ch'án, kixin desde ik'uén tí sín tsík'axrjenixinni k'uéjío ósé la xikahó naxa sítonhen éxi tió k'óna chjasintajni.

⁵ Tí sín a titekakonhya sín kixin ósé k'uénixja Dios ntá k'óna nkajní la ko chjasintajni na mé kjuin tí ntá ntá kuitohe nonte xamá.

⁶ A ntá tí ntá k'uitjáyanxín chjasintajni inaá.

⁷ A ntá tí nkajní la ko tí chjasintajni naxa tjejó jie tjejóchónhen tsoche kixin xikaha k'ueñoan Dios kixin xrohi tsochexín tí yaon tsjixixín tsitoxén ijie chojni la ko kaín tí sín jínahya tsjasóte sín.

⁸ A ntá kichó ni, chrók'uitjáyanhyará kixin Ìnchéni tí ijnko yaon t'ikon ch'án éxi mil nánó la ko mil nánó t'ikon ch'án éxi ijnko yaon ó.*

⁹ Ntá Ìnchéni í séhya sinchexiteyá ch'án tí nkehe tsintáchro ch'án la jehya éxi tjenkayáxin í so chojni kixin ó má sé tjejóchónhen sín. Náhi. Jehí tjechónhen ch'án kixin ninkexró chrók'uitjáyanhya kixin tjinkaon ch'án kixin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxi xíchéhe itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe síin.

¹¹ A ntá tí xikaha kaín nkehe ts'itjáyan, a ntá jahará la jína chrók'uejorá chróxráxinkáonrá Dios.

¹² Chrók'uejochonhénrá tí yaon itsi Dios chrókóxakonhanrá chrókjuich'erá xra kixin ntá tjoka chrókui Ìnchéni. A ntá tí yaon tsjixixín mé ts'itjáyan nkajní tsoche, la ko kaín nkehe tsóxika ts'itjáyan kixin imá tsosóa.

¹³ A ntá jeheni tjejóchónhenni nkajní nixín la ko chjasintajni nixín éxi tsintáchro Dios kixin tsjanjon ch'án. A ntá ntíha la mé imá náxrjón la ko kjuaxróxin ts'ixín tí chojni jína.

¹⁴ Méxra xikaha kichó ni, nachrohe tjejochonhénrá kixin itsi tí yaon tsonhen xikaha la kaín asánrá chrókjuéyará jnkojína chrók'uejorá kixin ts'ikon Dios kixin kjuaxróxin tjejorá chontahyará jie.

¹⁵ Chrókónohará kixin naxa tjechónhen Ìnchéni, tjokahya itsi ch'án kixin í so chojni naxa chrókuitekaon sín ch'án. Kjaxín xikaha tsíkjin tí kichó ni Pablo tí xroon chr'ánhanrá ch'án éxi tí kjuachaxién Dios tsík'áyéhe ch'án chrónka xikaha.

¹⁶ Jnkojnko tí xroon tsíkjin ch'án nixja xikaha la imá xra chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrjexín tí nixja tí xroon tsíkjin ch'án la ko kjaxín ntoáhya tjako sín í so nkehe nixja xroon itén Dios. Ntá xikaha jehó sín tjejá sín nkehe ts'itjáyanxín sín.

¹⁷ Méxra kichó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xriko tí sín jínahya ntá chrókuítóhérá tí nkehe jína ntoá tinkachónkirá.

¹⁸ Íchá jína antsí má chróchoxínrá Ìnchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxra tsjikosáyeheni ch'án ijie la ko jnkochríxín. Amén. Ó tjen.

* 3:8 Salmo 90.4

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéherá kixin tsonohará kuènte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uikoxín konni. Kixin tí nkexro mé k'uikonni la ko tí nkexro kuákóxin tjani, mé tí nkexro nixja tí tan tsjanjon kjuachón.

² Kjuakoxin ch'án nkexri kjuák'e ch'án, a ntá kaín tí jeheni k'uikonni ch'án, mé xikaha chrónkaxínni nkexri kjuák'e ch'án; a ntá tjakuexinni tí jahará nkexri tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni.

³ Chrónkaxínni tí nkehe k'uikonni la ko tí nkehe kuínhinni, kixin kjaxinrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'éni Dios la ko tí Xjeen ch'án Jesucristo.

⁴ Mé xikaha ikjinni tí nkehe i, kixin chrókujuintaxín chrókócháhará la ko chrókóchéni.

Dios mé tí xrohi

⁵ Tí tan i mé Inchéni Jesucristo kjuakohe tí jeheni, a ntá jie tjakoharáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án.

⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítié, na mé xikaha ch'iani kixin ch'ehyani tí nkehe ntáchroni.

⁷ A ntá tí xritjeóni tí t'inkaséyan kixin tí Dios mé jehe ch'án tí t'inkaséyan, na mé xikaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'íjmáxin kaín jie chóntani.

⁸ Tí chróntáchroni kixin ninkehó jie chóntahyani, mé xikaha la jehóni ch'iyeheni asénni, a ntá tí nkehe chaxín la chóntahyani.

⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jina ch'án la ts'itjáyenhen ch'án kaín jie chóntani la ko sinchetjóáni ch'án kixin kaín tí nkehe jínahya kjuich'eni.

¹⁰ A ntá tí tsontáchroni kixin kjuasinhyani ninkehó jie, la éxí chróntáchroni kixin Dios la ch'ia ch'án, a ntá tí xikaha tsixroni la chaxínhya tsík'áyéhe ni tí tan kuènte ch'án.

2

Cristo mé tsonixjayákonhenni ch'án

¹ Kichóni, éxí xjanna t'íkuan tí jahará, a ntá tjékjian tí xroon ts'ayéherá tsochrónka kixin chrókuásinhýará jie. A ntá tí jnkójinrá chrókjuásinrá jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jina.

² Jesucristo mé k'uenyákonhenni ch'án kixin tí jie chóntani; a ntá jehya ijieni ó. Náhí. Ijje kaín chojni síin chjasintajni.

³ Tí tsitekaonni tí nkehe k'uetqan Dios ntá tsonoexínni chaxín kixin chóxinni ch'án.

⁴ A ntá jnkójin nkexro ntáchro kixin chóxin Dios, a ntá titekakonhya tí nkehe tsík'etqan Dios, la mé ch'ia la noehya tí nkehe chaxín.

⁵ A ntá tí nkexro titekaon tí nkehe tsík'etqan Dios la chaxín tjuèhe Dios; mé xikaha noheni kixin chaxín jnkokoá tjejókoni ch'án.

6 Tí nkexro ntáchro kixin chaxín tinkáchónki Dios chrókjuak'e éxi kjuák'e Jesucristo.

Tí mandamiento nixin

7 Kíchóni, méxra t' nkehe tjékjian jehya ijnko nkehe nixin tsík'etōan Dios. Náhi. Tíha mé tí nkehe k'uayéherá tí xrankixixín, mé tí mandamiento ósé tjen, mé tí nkehe ó tsikinínra.

8 Kjánchó tí nkehe ikjian mé yóhe ijnko nkehe nixin, éxi kjuakoxin Cristo mé xikaha tjakoxinni, kixin tí sitié la tinkák'itjayan kixin ijie la ó t'inkaséyanxín tí xrohi chaxín.

9 A ntá tí nkexro tsontáchro kixin ixri tí t'inkaséyan, a ntá naxa nínkakonhen kichó, na mé tí xikaha naxa itjen tí sitié a.

10 A ntá tí nkexro tjuéhe kichó mé tjen tí t'inkaséyan, a ntá xikaha jina tjen, chóntahya jie la chrókjuachruéhya ch'án ninkexró kixin chrókjuasin sín jie inaá.

11 A ntá tí nkexro nínkakonhen kichó mé tjejó sín la ko ixri sín tí sitié a la ko noehya sín nketí nó sátsji sín kixin tí sitié la kjuich'ena ntakótán sín.

12 Éxi xjanna t'ikuan tí jahará, la méxra tjékjian tí xroon ts'ayéherá kixin tsonohará kixin kjuachaxin ihnjé Dios kjuínchetjuáxinrá tí ijjará kixin k'uenyákonhenni Inchéni Jesucristo.

13 Jahará it'é xjan, ikjian tí xroon ts'ayéherá jahará kixin choxínra tí nkexro tjen tí xrankixixín. A ntá jahará ntasoírá kjaxin ikjian tí xroon ts'ayéherá jahará kixin kjuachará kixin kjuachahya tí Jínahya chrók'uetuñhanrá.

Ikjian tí xroon ts'ayéherá jahará chánjanrá, kixin choxínra It'eni.

14 A ntá jahará it'é xjan ikjian tí xroon ts'ayéherá kixin ó choxínra tí nkexro itjen tí xrankixixín tí naxa t'ónahya chjasintajni. Ikjian tí xroon ts'ayéherá jahará ntasoírá, kixin naxa fuérterá, la ko k'uayéherá tí itén Dios, la ko kjuachará kixin kjuachahya Tsochren chrók'uetuñhanrá.

15 Chrójtjuéhyará tí chjasintajni la ko ni tí nkehe siín chjasintajni. A ntá tí chojni tjuéhe tí chjasintajni, na mé chaxínhya tjuéhe sín It'eni Dios.

16 Kixin ninkehó tí nkehe chrókjuanjon chjasintajni chrókjuixín tí tjen It'eni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni kixin itsjé nkehe chróchóntani.

17 A ntá tí chjasintajni sitinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínjin Dios mé ts'ejó sín jnkochrixin.

Tí nkehe chaxín la ko tí nkehe kjuach'ia

18 Éxi xjanna t'ikuan tí jahará, la chrókónohará kixin ó kuichjina tí yaon tsjixixín. Jahará ó kuínhínra kixin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kixin ó kuichjina tí yaon tsjixixín.

19 Jhe sín tsík'axrjekjanxín sín tí tjejóni; kjánchó chaxínhya kuinkáchónki sín éxi tinkáchónkini. Náhi. Tí chaxin chrókuinkáchónki sín éxi tinkáchónkini la chrók'uaxrjekjanxínhya sín tí tjejóni, naxa chrók'uejókoni sín jnkokoá. A ntá xikaha kónhen k'uaxrjekjan sín kixin tsonoxín kixin kuinkáchónkihya sín éxi tinkáchónkini.

20 A ntá jahará la Cristo tsíkjanjon Nchakuen ch'án tsík'ayéherá kaín rá, ntá jie tiénxinrá intsi kuénte ch'án.

21 Ikjian tí xroon ts'ayéherá kixin ó nohará tí nkehe chaxín, jehya kixin chrókónoahyará; jahará la ó nohará kixin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kixin Jesús la jehya tí Cristo. Tí nkexro a mé nínkakonhen Cristo, mé titekakonhya It'éni Dios la ko tí Xjeen ch'án.

²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kixin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínrá tí xrankíxixín la chrórxáinkáonrá jnkochrín. A ntá xíkaha tí chrórxáinkáonrá jnkochrín tí nkehe tsíkinhínrá tí xrankíxixín, la kjaxin xíkaha jnkokoá chrókuinkachónkirá tí Xjeen Dios la ko tí It'é ch'án.

²⁵ Kixin Jesucristo tsintáchro ch'án kixin tsjanjon ch'án tí kjuachón jnkochrín.

²⁶ Méxra xíkaha tjékjan tí xroon i ts'ayéhérá kixin chrókónohará kuènte tí sín tjinkaon chrókjuit'ayahará.

²⁷ Kjánchó jahará la ó chontará Nchakuen Dios tsítjáhará Jesucristo, a ntá xíkaha la i t'ichjánxinhya kixin ókjé nkexro chrókuakohará, kixin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxi kjuako tí Nchakuen ch'án.

²⁸ A ntá jie éxi xjanna t'íkuan tí jahará, chrókuítóéhyará chrókuinkachónkirá Cristo, kixin tió tsi ch'án la antsí chróchoxínrá ch'án la ko chrókósuàhyará chrókóchjinará tió tsi ch'án,

²⁹ kixin ó nohará kixin Jesucristo la jína ch'án. A ntá chrókónohará kixin kaín nkexro jína la xjeen Dios tíha.

3

Tí sín xjeen Dios

¹ Chrókónohará kixin It'éni Dios, imá tjuèhe tí jeheni kixin nchek'in ch'án xjeen ch'án tí jeheni, la mé chaxín jeheni tíha. Mé xíkaha tí sín chjasintajni chónhya sín tí jeheni kixin jehe sín la xráxin chónhya sín Dios.

² Mé xíkaha kichó ni, ó tsík'ónani xjeen Dios, a ntá naxa tjákoxinhya ch'án nkehe tsonhenni tí tsjixixín. Kjánchó ó noheni kixin tió itsi Inchéni Jesucristo la ts'ónani éxi tí jehe ch'án, kixin ts'ikonni kixin nkexrí tjen tí jehe ch'án.

³ A ntá kaín nkexro tjejóchónhen tí tsi ch'án la chrókuítóhe sín ijjé sín kixin tsotjóá sín kixin jehe ch'án la tjóá ch'án.

⁴ Kixin kaín tí nkexro tjasin jie mé jínahya ch'e sín, kixin tió tjasin chojni jie la mé xíkaha kuítekakonhya sín tí ley a.

⁵ Jahará ó nohará kixin Jesucristo kui chjasintajni kixin tsjatsen ch'án tí ijjéni, a ntá jehe ch'án la ninkehó jie chóntahya ch'án.

⁶ Mé xíkaha kaín tí sín chaxín tinkáchónki tí jehe ch'án la mé tjasinhya sín jie; a ntá káin tí sín tinkákjasin jie la tsík'ikonhya sín ch'án la ko xráxin chónhya sín ch'án.

⁷ Éxi xjanna t'íkuan tí jahará; méxra chrókuítóéhyará kixin ninxeró chrókjuit'ayahará; a ntá tí nkexro ch'e nkehe jína la jína ch'án, kixin Inchéni la jína ch'án.

⁸ A ntá tí nkexro xritjasin jie la mé kuènte tí Jínahya; kixin tí Jínahya mé kjuankixin kjuasin jie desde tí xrankíxixín k'óna chjasintajni. Méxra tí Xjeen Dios mé kui chjasintajni kixin sinchek'itjáyán ch'án kaín tí xra kjuich'e tí Jínahya.

⁹ Nijnko tí chojni tsík'axrjeníxin Dios naxa chrónkákjasin jie, kíxin ó chóna tí kjuachón kjuanjon Dios; la í xitjahya naxa chrókjuasin jie kíxin ó tsík'óna xjeen Dios.

¹⁰ Mé xíkaha tónoxín kíxin nkexro tí xjeen Dios la ko nkexro tí xjeen tí Jínahya, kíxin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kichó ni

¹¹ Méxra tí tan tsíkinhínra tí xrankíxixín mé tíhi, kíxin chrótjuèheni kichó ni.

¹² Chrókjuich'ehyani éxi kjuich'e ch'ín Caín, kíxin jehe ch'án mé kuente tí Jínahya, kíxin k'óyán ch'án tí kichó ch'án. ¿Nkekuente kíxin k'óyán ch'án? Kíxin tí ch'ín Caín la tí nkehe jínahya kjuich'e ch'án, a ntá tí kichó ch'án la kjuich'e ch'án tí nkehe jína.

¹³ Kichóni, chróchrakonhyará tí nínkakonhanrá tí sín síin chjasintajni.

¹⁴ A ntá noheni kíxin k'uatsínkani tí kjuach'én, a ntá kjuachón, mé noexínni tíhi kíxin tjuèheni kichó ni. Tí nkexro tjuèhya kichó la éxi tsík'en sín xíkaha xritrejó sín.

¹⁵ Kaín tí nkexro imá nínkakonhen kichó na mé chojni tjàya tíha, la ko ó nohará kíxin ijnko chojni tjàya la xitjahya tsochóna kjuachón jnkochrín.

¹⁶ Ó noheni kíxin nkexro tí tjuèheni, kíxin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni.

¹⁷ A ntá tí tjen ijnko nkexro rico t'íkon kíxin ijnko tí kichó ch'án t'ichjánxinhin nkehe, a ntá tí tsjinkítsahya tí kichó, ¿a ntá nkexrí chrótjuèhe ch'án Dios kaín asén ch'án?

¹⁸ Éxi xjanna t'íkuan tí jahará, méxra chrótjuèxínhyani tí kichó ni tí tan náxrjón chrónixjani ó. Náhi. Chrókjuakoxínni tí nkehe jína chrókjuich'eni.

Jína tsochjineheni tí tjen Dios

¹⁹ Tíha mé noexínni kíxin chaxín ntoá tjejóni, a ntá chrókónoheni kíxin chaxín tjejóni éxi tjinkaon Dios.

²⁰ A ntá tí tjoni asénni kíxin chónatani ichrén jie, a ntá Dios la imá nohe ch'án la nohe ch'án kaín nkehe tónhen asénni.

²¹ Mé xíkaha kichó ni, tí tjoehya asénni kíxin naxa ichrén nkehe jínahya tjenkayáxinni, a ntá antsí jína tsochjineheni tí tjen Dios,

²² a ntá jehe ch'án tsjanjon ch'án kaín nkehe tsjancheheni ch'án, kíxin nchexiteyéheni tí nkehe k'uetqan ch'án la ko ch'eni tí nkehe tóxrjínhin ch'án.

²³ Tí nkehe tsík'etqan ch'án la mé tíhi kíxin chrókuitekaonni tí Xjeen ch'án Jesucristo, la ko chrótjuèheni kichó ni éxi k'uetqan ch'án.

²⁴ Tí nkexro nchexiteyéhe tí nkehe k'uetqan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kíxin jehe ch'án tjejókoni ch'án kíxin tí Nchakuen ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

¹ Kichóni, chrókuitekákonhyará kaín tí sín ntácho sín kíxin Nchakuen Dios mé nixjaxín tí jehe sín. Náhi. Chrótsjehérá tí nkehe ch'e sín kíxin chrókónohará kíxin á chaxín chóna sín Nchakuen Dios o náhi, kíxin tí chjasintajni la ixri nchónhya chojni ch'ia, ntácho sín kíxin nixja sín tí itén Dios.

² **A** ntá xikaha mé chrókoanoaxínrá kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxi chojni mé chóna sín Nchakuen Dios.

³ **A** ntá tí nkexro titekakonhya kixin xikaha tsíki Jesús, na chóntahya sín Nchakuen Dios. Náhí. Chóna sín tí nchakuen tí nkexro nínkakohen Cristo. Jahará ó kuínhínrá kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxi xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetóan, kixin tí nkexro tjejókoará la imá t'etóan, a ntá tí nkexro t'etóan chjasintajni la kánhyó t'etóan.

⁵ Kixin jehe sín la kuente chjasintajni ó, méxra nixja sín tí nkehe kuente chjasintajni ó. **A** ntá tí chojni kuente chjasintajni ó mé tjejótinhin sín.

⁶ **A** ntá jeheni mé xjeen Dios. **A** ntá tí sín chóxin Dios mé tjejótinhin sín tí nkehe tjakoni. **A** ntá tí nkexro chónhya Dios mé tjinkakonhya sín chrókuinhin sín tí nkehe tjakoni. **A** ntá tíha mé tjatsoanxínni nkexro chóna tí Nchakuen tí nkexro chaxín la ko nkexro chóna tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kíchó ni, kixin tí tjuèheni kíchó ni mé tixín tí tjen Dios. Kaín nkexro tjuèhe kíchó mé xjeen Dios, la ko chóxin Dios.

⁸ **A** ntá tí nkexro tjuèhya kíchó na mé chónhya Dios kixin Dios la xráxin tjuèhe chojni.

⁹ Dios la ó kjuakoxín ch'án kixin tjuèhe tí jeheni kixin tsíchr'án ch'án tí jnkokóá Xjeen ch'án chjasintajni kixin tsochóntaxínni kjuachón tí jehe ch'án.

¹⁰ **A** ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhí. Jehe ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xikaha Dios tjuèhe tí jeheni, a ntá kjaxínni jeheni xikaha chrótjuèheni kíchó ni.

¹² **A** ntá Dios la ninxeró k'uíkonyha. Kjánchó tí chrótjuèheni kíchó ni la Dios ts'ejókoni ch'án, a ntá tsjinkítsa ch'án kixin chaxín tsotjuèheni kíchó ni.

¹³ Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani.

¹⁴ Jeheni mé k'uíkonxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni síin chjasintajni.

¹⁵ **A** ntá jnkójín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xikaha mé noexínni la ko titekaonni kixin Dios la tjuèhe tí jeheni. Dios mé xráxin tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín.

¹⁷ Mé xikaha chaxín chrótjuèheni Dios kixin ntá chróchrakonhyani tí yaon tsitóexín ijiéni kixin ó noheni kixin Jesucristo la tjuèheni ch'án la ko jeheni la kjaxín tjuèheni tí jehe ch'án.

¹⁸ Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakítsje tí kjuachrakon. **A** ntá chojni chrakon mé chaxín tsjasóte. **A** ntá jnkójín chojni chrakon la mé chaxínhya tjuèhe Dios.

¹⁹ **A** ntá jeheni la tjuèheni Dios kixin jehe ch'án senó tjuèhe ch'an tí jeheni.

²⁰ **A** ntá jnkójín nkexro ntáchro kixin jehe mé tjuèhe Dios, a ntá tuénxín nínkakohen kíchó mé kjuach'ia xriko. Tí tjuèhya ch'án tí kíchó chóxin ch'án, la kjaxín xitjahya tsotjuèhe Dios kixin tsík'ikonhya ch'án Dios.

²¹ Tíhi mé tsík'etōan Jesucristo kíxin tí nkexro tjuèhe Dios la mé kjaxin chrójtjuèhe kichó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kíxin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a.

² A ntá tí tjuèheni Dios la ko nchexiteyáni tí nkehe t'etōan ch'án, a ntá noheni kíxin kjaxin tjuèheni tí sín tsík'óna xjeen Dios.

³ Tí tjuèheni Dios la t'ichjánxin kíxin chrókuitekaonni tí nkehe k'uetōan ch'án, kíxin tí nkehe t'etōan ch'án la jehya ijnko nkehe imá xra

⁴ kíxin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Inchéni la mé tsjachaxinni la tsjachahya tí chjasintajni.

⁵ A ntá tí sín tinkáchónki kíxin Jesús mé tí Xjeen Dios mé tsjachahya tí chjasintajni ts'etuenhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxin tí inta la ko tí jni. La jehya kíxin jehó tí inta kjuakoxin ch'án. Náhi. Kjaxin inta la ko ijni kjuakoxin ch'án. A ntá tí Nchakuen Dios mé chrónkaxín tíha, kíxin tí Nchakuen Dios la chaxín ntoá.

⁷ Siín iní nkexro chrónkaxín nkaya nkajni: ijnko la It'éni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha.

⁸ A ntá siín iní tí nkehe chrónkaxín ntíhi chjasintajni, mé tí Nchakuen Dios, la ko tí inta la ko tí jni; a ntá tí iní mé jnkokón chrónka.

⁹ ¿A chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjeotan kíxin táha la Dios tsíchrónkaxín kíxin nkexrí tjen tí Xjeen ch'án.

¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kíxin Dios la ch'ia ch'án kíxin kuitekakonhya sín tí nkehe tsíntáchro Dios kíxin nkexrí tjen Xjeen ch'án.

¹¹ Tí nkehe tsíchrónka Dios mé tíhi kíxin tsjanjon ch'án kjuachón jnkochrín, a ntá tí kjuachón mé chóna tí Xjeen ch'án.

¹² A ntá tí nkexro chóna tí Xjeen Dios mé kjaxin chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kíxin jahará ó titekáonrá tí Xjeen Dios, kíxin mé tsoñoaxínrá kíxin chaxín chontará kjuachón jnkochrín.

¹⁴ Tíhi mé chóxixinni Dios kíxin noheni kíxin ichrén nkehe tsjancheheni ch'án éxi tjinkaon ch'án la jehe ch'án la tsinhin ch'án.

¹⁵ A ntá tí xikaha ó noheni kíxin Dios tjetinhin tí nkehe nixjeheni ch'án, a ntá kjaxin ó noheni kíxin ó chóntani tí nkehe kjuancheheni ch'án.

¹⁶ A ntá jnkójínrá ts'ikonrá ijnko kíchuará tjasin jie, a ntá tí jehya ijnko jie chrók'uenxín ch'án, la chrókjuanchehéra Dios kíxin chrókjuinchexraxinkaon ch'án kíxin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrijan kíxin íchá jína chrókjuanchehyará Dios kíxin chrókjuinkitsa tí ch'in a.

¹⁷ Kaín nkehe jínahya la ijie tíha. Kjánchó siín jie ts'enxínhya chojni.

¹⁸ Ó noheni kixin tí nkexro tinkáchónki It'éni Dios tjasinhya sín jie, kixin tí Xjeen Dios tjinkitsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kixin Dios t'ayakonhen tí jeheni, a ntá tí Jínahya chóna kjuachaxin t'etuenhen kuenté chjasintajni.

²⁰ Ó noheni kjaxin kixin Xjeen Dios kui, la ko kjuínkitsa ch'án tí jeheni kixin chrókónoheni nkexrí tjen Dios chaxín. A ntá tjejókoni jnkokóá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxíni ch'án kjuachón jnkochrixín.

²¹ Éxí xjanna t'íkuañ tí jahará, la títóherá tí dios tsíkjanoya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjeýá Dios tójnkotsé sín ntiha, la mé chaxín tjuahá sín: a ntá jehya janhván, la kjaxin kaín tí sín chóxin tí tan chaxín.

² Tjuahará tí jahará kixin tí tan chaxín ó chónta asenni, tíha mé ts'ejókoni jnkochrín.

³ It'éni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókuiakonóahará ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chàna k'uikuán kixin isorá tjejórá títekáonrá tí nkehe chaxín, éxí tsík'etoan It'éni Dios.

⁵ A ntá jie jahará kichó ni, xrjanóahará kixin chrótjuéhérá kichuára. Méxra xíkaha tjékjan tí xroon i, la jehya ijnko nkehe nixin tsík'etoan Dios. Náhi. Tíha la mé tí nkehe tsík'áyéheni tí kjuák'e Ìnchéni Jesucristo.

⁶ A ntá tí tjuéheni kichó ni la mé tíhi kixin chrók'uejóni éxí tsík'etoan Dios; a ntá tí nkehe tsík'etoan Dios la mé ó tsíkinhínrá jahará tí senó kixin chrótjuéheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xíkaha mé ixri xrich'ia la ko nínkakonhen Cristo.

⁸ Chróóxakonhanrá kixin chrók'uitjáyanyha tí xra kjuich'erá kixin naxa chrók'uayéhérá tí nkehe tsjintaxín ts'ayéhérá.

⁹ A ntá tí síin ijnko nkexro kuitóhe tí nkehe kjuako Cristo ntá kjuichroe la mé chóntahya sín Dios; a ntá tí nkexro títoehya tí nkehe kjuako Cristo mé chónta sín It'éni Dios la ko tí Xjeen ch'án.

¹⁰ A ntá jnkójin sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuitóhe tí sín a ntóará la ko ni chrónixjeéhyará sín jnkóina.

¹¹ A ntá tí nkexro tsonixjehe tsontáchro kixin: “¿Á jina k'uinka?” na mé éxí tóxrjnhin sín tí nkehe jínahya ich'e tí sín a.

Tí tan tsjixixín

¹² Chonta nchónhya nkehe chrókuinhínrá jahará, kjánchó tjínkakonhya chrókjan xroon ó. Náhi. Tjínkavan kixin tjoka chrókjuasántsahará tí jahará tsonixjahará kixin chrókjuintaxín chrókóchéheni.

¹³ Tí sín kichuára tójnkotsé kuente nínko ntihi, mé tí sín kjaxin tsíkjeýá Dios, mé nixjahará sín. Amén. Ó tjen.

Tí nixin xroon tsíkjin ch'ín Juan

¹ Janhan mé tí nkeexo t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuaha.

² Kíchóni, tjáncháha Dios kixin éxi jaha jína tjen tinkachónkia Ìnchéni la jína chrók'uaxrje kaín xrā ch'e la ko jína chrókjuak'e jaha.

³ Imá kóchána tió kui iso tí sín kíchó ni chrónka sín kixin jína tjáqoxian tí tan chaxín.

⁴ Kohya ijnko nkehe antsí má nchechána éxi tió kuñhan kixin tí sín t'íkuān éxi xjanna tjejóititekaon sín tí tan chaxín

⁵ Kíchóni, chaxín jína tjech'e xrā tjínkítsa tí sín kíchó ni la ko antsí tjínkítsa tí sín tsíkjin ókjé chjasin.

⁶ A ntá tí tsíkóinkotsé tí sín kíchó ni la tsíchrónka sín kixin nkexi tjuéhé tí jehe sín. Jaha chrókjuinkítsa tí nkehe t'ichjánxinhin sín tí sátsji sín. Xíkaha mé tóxrjinhin Dios.

⁷ Tió sákjuí sín kjuankixin sín chrónka sín itén Ìnchéni la chrohya sín chrók'uáyéhe sín ninkehó nkehe kuente tí sín chónhya Dios.

⁸ Méxra tí jeheni t'ichjánxin chrókjuinkítsani tí jehe sín kixin tsjacha sín tsochrónkaxin sín tí tan chaxín ntoá.

Ntoáhya kjuako ch'ín Diótréfes

⁹ Janhan ikjian ijnko xroon k'uáyéhe tí sín tóinkotsé ntiha. Kjánchó ch'ín Diótréfes kuitekakonhya ch'án tí nkehe k'uētuenhenni ch'án kixin tjinkaon ch'án chrók'uētoan ch'án jehó ch'án.

¹⁰ Méxra xíkaha tí sátsjia ntiha tsonixjaha ch'án kixin tí kjuach'ia ntáchro ch'án t'ántaxínhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanon kjuachaxin la t'ētoan ch'án kixin tsjanjonhya sín kjuachaxin la ko t'ētoan ch'án kixin tsochjinahya sín tí tóinkotsé tí chojni.

¹¹ Kíchóni chrókjuáqoxinhya tí nkehe jínahya. Íchá jína chrókjuáqoxian tí nkehe jína. Tí nkeexo ich'e nkehe jína na mé kuente Dios. A ntá tí nkeexo ich'e nkehe jínahya la mé tsík'ikonhya sín Dios.

Jína tjáqoxin tí ch'ín Demetrio

¹² Kaín sín ntáchro sín kixin jína tjáqoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixín nixja ch'án

¹³ Janhan chonta nchónhya nkehe tson táxrjan, kjánchó tjínkakonhya tsokjian ó

¹⁴ kixin tjínkavan tjoka ts'íkuān tí jaha, a ntá tsjoni.

¹⁵ Kjuaxróxin chrókjuak'e jaha. Kaín nkeexo choxian ntihi nixjaha sín. Tétuanhan nixjehé jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'ahá xra Jesucristo, la şana mé Jacobo la mé ikjian tí xroon í ts'áyéhe tí sín tsíkjeýá It'éni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín.

² Imá kujkonóahará ch'án ntá ts'ayéherá kjuaxróxin kixin tjuahará ch'án.

Tí sín ntoáhya tjako

(2 Pedro 2.1-17)

³ Kíchóni, imá tjínkavan tsokjian tí xroon ts'ayéherá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayéherá tsoxrjanóaxínrá kixin jina chrókiénxinrá nkehe chrókuáteherá kixin nkexrí tinkachónkirá Inchéni kixin tí fe la mé ónaá tsík'áyéhé tí sín tsíkjinchetjóá Dios.

⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuénte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etóan, la ko titekakonhya sín Inchéni Jesucristo.

⁵ Jahará kjónté ó nohará la jehí tjínkavan şintaxráxinkáonrá inaá kixin Inchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjáyán ch'án tí sín kuítekakonhya sín tí jehe ch'án.*

⁶ Kjaxin tí sín ángel kuítekakonhya sín tí k'uetoan Dios ntá kuitohe sín tí kjuachaxin tsíkjanjon Dios tsík'áyéhe sín la ko kuitohe sín tí k'uék'ejó sín jina, a ntá jie Dios k'uetoan ch'án kixin ts'ejóchjina sín tí sítíe la ts'ejóchónhen sín tsijia tí yaon tsitoexín ijie sín.

⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoa sín. Tíha mé chrórxaxinkakonxín kaín chojni kixin nkexrí tşonhen tí sín titekakonhya tsjasótexín sín tí xrohi jnkochríxín ts'ankahya.

⁸ Méxra kjaxin tí chojni a kotáchrién sín tsík'ikonxín kixin ó nchóxon chrókjuasinko sín jie chojni chjin ókjé la ko chrókuítekakonhya sín tí kjuachaxién Inchéni la ko chrók'uántaxínhin sín tí sín ángel chóna kjuachaxin t'etóan.

⁹ A ntá tí ch'ín arcángel Miguel kjuánjonko ch'án tí ch'ín Tsohren la ko ikjo sín kjuánjonxin sín nkehe tşonhen tí cuerpo kuénte ch'ín Moisés.† A ntá jehe ch'án kjónté xikaha la kjuínchekjasótehya ch'án tí ch'ín Tsohren. Jehó ntáche ch'án kixin: "Inchéni mé tsjentuáha tí jaha."

¹⁰ A ntá tí chojni i t'ántaxínhin sín tí nkehe tienxínhya sín la tjenkayáxin sín éxi ko tienxínhya nchexiteyéhe tí nkehe ntáchro asén, mé xikaha tí nkehe jínahya kjuích'e sín ts'itjáyánxin.

¹¹ ¡Nòa tí jehe sín! Chréhe sín éxi kjuích'e ch'ín Caín.‡ Tjinkaon sín chrókjuacha sín chichaon ntá ntoáhya kjuích'e sín éxi kjuích'e Balaam, la ko its'en sín éxi ik'uén ch'ín Coré kixin kuítekakonhya sín.Š*

¹² Ijnko kjuatósuehe kixin tjejóyákanxin sín tí siín kia náxrjón chontará, kixin tjejóne sín la ko tjejót'í sín chéhe sín la kjónté xikaha la ninkehó

* 1:5 Éxodo 12.51 Números 14.29-30 † 1:9 Deuteronomio 34.6 ‡ 1:11 Génesis 4.3-8 § 1:11

Números 31.16 * 1:11 Números 16.1-3

kjuasáya chóntahya sín. Tjejó sín éxí tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxí tjuj chóntahya ntá tjakáko xrinto; la ko éxí ijnko nta t'ónahya to tí nitjó chrók'óna to, éxí yáya tsík'en tsík'axrjenkixin nuéé.

¹³ Jehe sín na mé éxí ntayaoan jiehe síxróji lóxrjo ó chóntahya ntá jína mé xíkaha chónkó tí nkehe ch'e sín mé ijnko kjuatósuehe tíha; la ko éxí konotsé kjuichroe sákjuí ókjé; a ntá tjechónhen sátsji sín tsjasóte sín sítié jnkochrín.

¹⁴ A ntá kjuák'e ch'ín Adán, a ntá yatoxin chr'éxin kui ch'ín Enoc nixjaxin kjuachaxién Dios ntáchro ch'án kixin k'uúikon ch'án itjen Ìnchéni kuikao nchónhya mil tí sín ángel kuènte ch'án,

¹⁵ kixin sinchekitoxén ch'án ijje kaín tí sín jínahya kixin kaín tí jínahya kjuich'e sín la ko kaín nkehe k'uénixja tí sín jínahya k'uántaxínhín sín tí jehe ch'án.

¹⁶ Xráxin tóxrjénhya sín nkehe sítonhen la ko ixri sín tjonta kíchó sín. Jehó xritjeyá sín tí nkehe tóxrjínhín sín tjenkayáxin sín. Ihnke sín nixja sín la ko itjo sín jina chojni kixin ntá tí sín a chrókuinkitsa jehe sín.

Nchexraxinkaon ch'án tí sín tinkáchónki Cristo

¹⁷ A ntá jahará kíchó ní, xráxinkáonrá kixin tí sín tsíkjeýá Ìnchéni Jesucristo

¹⁸ ntáchro sín kixin tí yaoon tsjixixín tsjejexin chjasintajni ts'ixin chojni tsitekakonhya sín ts'ántaxínhín sín tí nkehe tjinkaon Dios la ko tsotjinkaon sín sinchexiteyehé sín tí nkehe jínahya ntáchro asén sín ó.

¹⁹ Tí sín a mé tjinkaon ts'óxika tí sín jnkokqá tjejótojnkotsé kixin naxa tóxrjínhín sín sich'e sín nkehe síin chjasintajni kixin chóntahya sín Nchakuen Dios.

²⁰ A ntá jahará kíchó ní tjuahará, antsí jína chrók'uejorá tinkachónkirá Ìnchéni. Chrónixjeexínrá Dios tí kjuachaxin kuènte Nchakuen ch'án.

²¹ Jína chrók'uejorá kixin tjuahará Dios ts'ejochonhénrá tí yaoon tsokjan Ìnchéni Jesucristo kixin kjuasáyé ch'án tsotjáhará ch'án kjuachón jnkochrín.

²² Chrókuiikonóghérá tí sín naxa tienxínhya.

²³ Jnkójín sín chrókjuinchekaará chrókuakitsjekjanxínrá sín chríkjan xrohi, la ko chrókuikonóghérá í so sín kjánchó chróchontará cuidado tí jehe sín kixin kjónté ti iké sín kjaxin chóna jie.

Tjanchia ch'án kjuasáya

²⁴⁻²⁵ Jnkokqá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jie la ko tió tsjjini tí tjen ch'án la ninkehó jie chróchóntahyani, imá tsochéhēni tí tjen ch'án ntiha. Kjuasáyé Dios imá chóna ch'án kjuachaxin t'etqan ch'án la ko kjuinchekaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

118

Kaín tí nkehe i mé chénka Dios Jesucristo kixin jehe ch'án tsochenka tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuénte ch'án kixin nkexrí chrókonohe tí ch'ín Juan ch'ehe ch'án xra.

² A ntá jehe ch'án mé k'uituenhen ch'án ntá chrónkaxín tí nkehe chaxín tsintácho Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxin Dios.

³ Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato n̄nko

⁴ Janhan Juan ikjian tí xroon tsochr'anhan tí yato n̄nko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá la ko kjaxin tí yato Nchakuen ch'án tjejó tí trono t'etoxánin ch'án mé tjanjon kjuaxróxin.

⁵ La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankixín zechón kjónté tsík'en kixin tjetoxan ch'án kixin t'etuenhen ch'án kjónté kaín tí sín rey la ko tí sín t'etoxan síin chjasintajni. Jehe ch'án mé tjuèheni ch'án la ko tí ijnié ch'án mé k'uíjmáxinni kaín tí jie chóntani.

⁶ Jehe ch'án mé tsíkjanjon kjuachaxin tsík'ónani nchat'á kixin sich'ehehi xra It'éni Dios. Tí kjuachaxin kuénte ch'án me ts'etoxan jnkochríxin. Mé xikaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuj. Kaín chojni ts'ikon ch'án la ko kjaxin tí sín k'uékónínkakonhen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin síin chjasintajni tsotsjánka sín tíó ts'ikon sín tí jehe ch'án. Mé xikaha tsonhen. Amén.

⁸ Janhan mé tí xrankixixin la ko tí tsjixixin éxi tí letra xrankixixin A la tsjixixin Zeta. Mé xikaha ichro Ìnchéni Dios, tí nkexro imá t'etoxan. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá.

Ch'ín Juan tsík'ikon ch'án kixin Cristo chónka kjuachaxin

⁹ Janhan Juan mé ijnko kichó tí jahará mé tjékian Jesús la ko tí kjuachaxin kuénte Dios chonta la mé jahará la ko jeheni jnkokón tjejójtjasóteni la jehe ch'án tjinkitsani kixin tsjachani. Kjuakua itén Dios éxi chrónka Jesucristo la mé tíha kjuak'échjinaxián tí isla it'in Patmos.

¹⁰ A ntá ijnko yaon xraxinkakonxinni Ìnchéni la ikui kjuachaxin Nchakuen Dios tí tjeñ tí janhan la kuínhan kixin nóton tí janhan ijnko nkexro nixja imá isen éxi itén ijnko trompeta.

¹¹ Mé ntácho ch'án kixin:

—Janhan mé tí xrankixixin la ko tí tsjixixin éxi tí letra xrankixixin A la tsjixixin Zeta. Mé tsokjian jaha ijnko xroon kaín tí nkehe k'uíkuan kixin tsochr'enhén tí yato n̄nko tjejó tí estado Asia na mé tí n̄nko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjáá tsjahá kixin nkexro itén tí tjenixjana ntá xringhaya k'uikuan yato candelero tsík'óna chica oro.

¹³ A ntá chríkjan tí yato candelero k'uikuan ijnko nkexro éxi yóhe Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsikóyóhe toté ch'án la ko mé chóna ijnko cinta jehó oro tjenkáni ntakuin ch'án.

¹⁴ Tí kaxihí ch'án la tjóá éxi kaxree kolélo tjóá o éxi chrinta tsjehe la ko tí ikon ch'án la éxi xrohi nene tsjehe.

¹⁵ Ntá tí toté ch'án la éxi chica sine tjákini na ntá tsík'axrjexín tja. A ntá tí itén ch'án la itsen éxi tóvéntó nchónhaya ntario.

¹⁶ A ntá tí tja ch'án chjina mé chóna yato konotsé. A ntá tí ir'va ch'án k'uaxrjexín chica espada iyo, yánjin taté. A ntá imá tjákini tsjehe ikon ch'án la éxi yaon t'inkaséyanxín imá.

¹⁷ A ntá tí k'uikuan xikaha la kjuáchr'ítsinka toté ch'án éxi tsík'enna. A ntá jehe ch'án kjuak'etja tja ch'án chjina chritaón tí janhan ntá nixjana ch'án ntáchro ch'án kixin:

—Chrakonhaya jaha. Janhan mé tí xrankixixín la ko tí tsjixixín.

¹⁸ Janhan tí nkexro tjechón. Ik'uén, a ntá ijie la tjéchuán inaá la itjén jnkochríxín. Amén. Janhan chonta llave kuènte chojni its'en la ko kuènte tí síin tí sín tsík'en.

¹⁹ Méxra ikjian jaha tí nkehe k'uikuan mé tí nkehe síin ijie la ko tí nkehe tsonhen chr'éxin.

²⁰ Ninkexró k'uékienxínhaya nkexrí t'axrjexín tí yato konotsé k'uikuan chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kixin tí yato ángel t'ayakonhen tí yato njnko la ko tí yato candelero k'uikuan me kjaxín t'axrjexín tí yato njnko.

2

Tí tan k'uáyéhe tí yato njnko: Tí tan k'uáyéhe tí sín chjasin Éfeso

¹ Tsokjian tí nkehe ts'áyéhe tí ángel t'ayakonhen tí njnko Éfeso: “Xikaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xikihí:

² Janhan nóna kaín tí xra ch'erá la ko nóna kixin tóxrjanhyará tí sín jínahya. Janhan la ó nóna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín.

³ Nchónhaya kjuasótíará la kjónté chonhérrá kónínkákonhyará la imá kjuich'erá xra kixin tinkachónkirá njna la ko nunca kóxrjéhyará.

⁴ Kjánchó tjánchíá ijnko jie tí jahará kixin tinkachónkihyará éxi kjuankixixínrá k'uétjuanará.

⁵ Méxra chrórxáinkáonrá kixin ó kujtóhérrá tí k'uétjuanará la ntá chrókjúinkirá tí nkehe tjenkayáxinrá la ko chrókjúich'erá xra éxi tí kjuankixixínrá. A ntá tí náhi, la tjoka tsjasán la tsjakiyan tí candelero tí tjejorá tí nunca tsjínkihyará tí nkehe jínahya tjenkayáxinrá la tí tsokjanhyará tsoxráinkáonrá Dios.

⁶ Kjánchó chrókónohará kixin tóxrjina tí nkehe tjejoch'erá kixin tóxrjanhyará tí xra ch'e tí sín nicolaítas kixin kjaxín janhan nínkákonhan tí nkehe ch'e sín.

⁷ Tí nkexro tjinkanon chrókuinhin la chrókuinhin sín tí nkehe nixjehe Nchakun Dios tí njnko ntáchro kixin: Tí sín tsjacha sinchexitetyána sín la tsotjahá sín kjuachaxín sine sín tí to t'óna tí nta tjanjon kjuachón itjen tí tjen Dios.”

Tí tan k'úáyéhe tí sín chjasin Esmirna

⁸ 'Ikjian tí nkehe ts'áyéhe tí ángel t'ayakonhen tí nínko Esmirna: "Xíkaha ichro tí nkexro xrankíxín la tsjixín, mé tí nkexro ik'uén la ntá jie tjechón:

⁹ Janhan la ó nòna kaín nkehe tjejoch'erá. Ó nòna kixin nkexrí tjejtótsátíarà la ko ó nòna kixin nòará kjánchó Jehya. Náhi. Jehé sín mé tójkotsé sín tí nínkoé tí Jínahya.

¹⁰ Kjánchó chrakonhyará kjónté tsjasótíarà. Tí ch'ín Tsochren tsochr'ánxanhanrà ntóechiso jnkójin tí jahará kixin tsotsjexín nkexrí tí jahará ntá t'ichjánxin tsjasótíarà iso yaon. Kjánchó chrókuítóéhyará Dios kjónté chrók'uenrà ntá janhan tsotjáhará tí kjuachón chr'éxin.

¹¹ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko: Tí nkexro tsjacha sinchexiteyàna sín la í tsjasótehya, la tí yóxin its'en chojni la í ts'enhya tí jehé sín."

Tí tan k'úáyéhe tí sín chjasin Pérgamo

¹² 'Tsokjian tí nkehe ts'áyéhe tí ángel t'ayakonhen tí nínko Pérgamo: "Mé xíkaha ichro tí nkexro chóna chica espada yánjin taté:

¹³ Janhan ó nòna kaín nkehe tjejoch'erá la ko ó nòna nketí tjejorá kixin tí tjejorá la t'etóan ch'ín Satanás la kjónté la jína kuinkachónkirá tí janhan. Jahará kuitoéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyàna jína. Jehé sín tsík'óyáxin sín ch'án tí tjejorá ntiha kixin ntaha t'etóan ch'ín Satanás.

¹⁴ Kjánchó janhan tjánchíá ijnko jie tí jahará kixin iso nkehe ntoáhya ch'erá. Siín ntiha chjasin Pérgamo tí tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuénhen ch'án tí ch'ín Balac kixin tí sín israelita chrókjuasin sín jie chrókjóné sín tí nkehe tsíkjokehe sín tí nkehe tsíkjanoya la ko chróchóna sín chojni chjin ókjé chrókjuasinko sín jie.

¹⁵ Kjaxin xíkaha tí tjejorá la siín iso sín tjinkakonhya sín tsítóhe sín tí nkehe tjako tí sín nicolaítas. Janhan mé tjinkakonhya tí sín a.

¹⁶ Méxra chrókjanrà chrókuinkachónkirá Dios. A ntá tí náhi, la tjoka tsjasán tí tjejorá la tsjánjonkianxian sín tí espada t'axrxén ir'va.

¹⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntácho kixin: Tí nkexro tsjacha sinchexiteyàna sín la tsotjáha sín kjuachaxin chrókjóné sín maná tjechónhen la ko tsotjáha sín ijnko xro tjóá la tí xro la ts'ínixín ihnié sín nixin chónhya ninkexró. Jehó tí nkexro ts'áyéhe mé tsonohe."

Tí tan k'úáyéhe tí sín chjasin Tiatira

¹⁸ 'Tsokjian tí nkehe ts'áyéhe tí ángel t'ayakonhen tí nínko chjasin Tiatira: "Mé xíkaha chro tí Xjeen Dios, tí nkexro ikon éxi yóhe xrohi nene sít'axrxén la ko toté éxi chica sine tjákin tsjehe.

¹⁹ Janhan ó nòna kaín tí nkehe tjejoch'erá la ko ó nòna kixin tjuanará la ko tinkachónkirá tí janhan la ko ó nòna tí xra tjejoch'erá la ko ó nòna kixin tjejochonhénrà tóninkákonhyará. La ko ó nòna kixin ántsí tjejoch'erá xra ije ntá tí kjuankíxíniná la kénhyó.

²⁰ Kjánchó tjánchíá ijnko jie tí jahará kixin tjánjonrà kjuachaxin tjako tí tjan Jezabel. Kjaxin ntácho tjan kixin nixja tjan itén Dios kjánchó ch'iyehé tjan tí sín ch'ena xra kixin kjaxin sín chrókjuasinko sín jie chojni chjin ókjé la ko chrókjóné sín tí nkehe tsík'óyán sín tsíkjokehe sín tí nkehe tsíkjanoya.

21 **A** ntá janhan ó kuítóhə tjan intsí kixin chrókuinkí tjan tí tjenkayáxin tjan kjánchó tjinkakonhya tjan sich'e tjan xíkaha la tjinkakonhya tjan chrókuítóhe tjan tí jie tjasinko tjan chojni ntoa.

22 **A** ntá jie tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítóehya sín tí nkehe tjinkaon tjan sich'e tjan.

23 **A** ntá janhan ts'oyán tí xjeen tí jehe tjan. Ntá kaín tí nínko tsonoxín sín kixin janhan choxian nkehe tónhen asén kaín chojni. **A** ntá jnkojnko tí jahará la tsjénkahará nkexrí tí xra kjuich'erá.

24 **A** ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuénte ch'ín Tsochren la xíkahó la í tsétuanhyará í jnko xra.

25 **A** ntá jahará la tí nkehe ó chontará la t'ayakonhénrá hasta tsokjan janhan.

26 **A** ntá tí sín tsjacha sinchexiteyána sín la ko xíkaha sich'e sín hasta tsjixixín kixin janhan tjínkavan xíkaha chrókuich'e sín na mé janhan tsjánjuan kjuachaxin ts'etuenhen sín kaín nación.

27 Na mé xíkaha T'aná mé chjina kjuachaxin tsétəan la kjaxin xíkaha jehe sín mé ts'etuenhen sín tí nación yóhe chróchóna sín ijnko chica vara kixin chróchjéhe sín tí chj chrók'ókuen tí chj tsík'óna nchetje.

28 Me kjaxin tsotjahə sín tí konotsé tí tji nchítjen.

29 **A** ntá tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko."

3

Tí tan k'uáyéhe tí sín chjasin Sardis

1 'Tsokjian tí nkehe ts'áyéhe tí ángel t'ayakonhen tí nínko chjasin Sardis: "Xíkaha ichro tí nkexro chóna yato Nchakuen kuénte Dios la ko chóna tí yato konotsé: Janhan nóna kaín nkehe ch'erá, ó nóna kixin éxí tsík'en tí xra ch'erá kjónté nchehnerá kixin tjejochónrá.

2 T'àyará. Naxə t'ayakonhénrá kjónté í tsjéhya tí nkehe kuítóhe kixin kjaxin tíha mero its'en. Ó k'uikuən kixin tí xra ch'erá la t'ikon tí Dios kuéntəna kixin ntoáhya.

3 Chrórxáinkáonrá tí nkehe tsíxrahohará la ko tíha chrókuich'erá la chrókjanrá chrórxáinkáonrá Dios. **A** ntá tí naxə tjejochrinrá la titəya tsjasán éxí ijnko síchee la tsonohayará nkesá tíha.

4 Kjánchó naxə síin iso chojni ntaha chjasin Sardis naxə kjuínchekjitəhya sín iké sín la jehe sín la ts'ájikjan sín kixin chóna sín ka tjóá kixin jehe sín la jina sín.

5 Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxíkahya ihnjé sín chóna tí libro ts'ínixín ihnjé tí sín tsaá la ko tsochoxian sín nkayakon T'aná la ko nkayakon tí sín ángel kuénte ch'an.

6 Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko."

Tí tan k'uáyéhe tí sín chjasin Filadelfia

7 'Tsokjian tí nkehe ts'áyéhe tí ángel t'ayakonhen tí nínko chjasin Filadelfia: "Xíkaha ichro tí nkexro tjóá la ko chaxín mé tí nkexro chóna llave kuénte

ch'ín rey David. A ntá tí tsakitjehe ch'án puerta la ninkexró tsjachahya ts'ikjéhe, a ntá tí ts'ikjéhe ch'án puerta la ninkexró tsjachahya tsakitjehe.

⁸ Janhan ó nõna kaín nkehe tjeoch'erá. Kjuaké tí tjejorá ijnko puerta xitjehe la ninkexró xitjahya ts'ikjéhe. Kjónté intsikoá kjuachaxin chontará la jahará kjuinchesteyará tí nkehe kjuakua la ko kjuinchemáhyará tí janhan.

⁹ Tí sín tsíkiteakon Satanás la ntáχρο sín kíxin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínki totará la ntá tsonhe sín kíxin chaxín janhan tjuahará.

¹⁰ Ó kuítekáonrá tí nkehe kuétuanhanrá la jína tjejorá la mé xíkaha janhan ts'ayakonhanrá tí ichrén nkehe tsonhanrá tió tsi tí nkehe tsonhen kuenté chjasintajni kíxin ó jehí xíkaha tsonhen kaín chojni tjejó chjasintajni.

¹¹ Janhan mé tjoka ts'inka. Méxra t'ayakonhénrá tí nkehe chontará kíxin ninkexró chrókuakitsjahará tí nkehe ó kjuachará.

¹² Tí nkexro tsjacha sinchesteyána la ts'óna sín columna kuente nínko kuente Dios kuéntana la nunca xitjahya sátsjixin sín ntiha. La janhan tsokjian ihnié tí Dios kuéntana tsjiko sín la ko tsokjian ihnié chjasén Dios kuéntana mé tí Jerusalén nixin tsixin nkajni tí tjen Dios kuéntana. Kjaxin tsokjian nina nixin tsochóna sín.

¹³ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko."

Tí tan k'uáyéhe tí sín chjasin Laodicea

¹⁴ Tsokjian tí nkehe ts'áyéhe tí ángel t'ayakonhen tí nínko chjasin Laodicea: "Xíkaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuich'énaxín Dios kaín nkehe.

¹⁵ Ó nõna kaín nkehe tjeoch'erá. Ó nõna kíxin jahará la ní jehya kinrá o sóará. Chróóchaxín chrókókinrá o chróóchaxín chrókósóará.

¹⁶ A ntá jahará la yásorá la jehya ikinrá la jehya sóará. A ntá ijie ir'va ó tsíkja tí jahará la ts'itjia.

¹⁷ Ntáχrorá kíxin jahará rícorá la imá jína tjejorá la ko ninkehó t'itjáyanhya tí tjejorá, ichrorá. Kjánchó chontahyará kjuachéhe la ko jehya jína tjejorá la ko nõará la ko ntakótánrá la ko tjóchínrá.

¹⁸ Méxra ijie ntáxraxinkáonrá janhan sintakjihará tí nkehe oro náxrjón ts'ík'axrxén tja kíxin ntá chaxín ts'ónará rico. La ko janhan sintakjihará ika tjóá kíxin ts'ínkayará ntá tsjinhanrá kjuatósuehe kíxin í tjóchínhyará. La ko janhan tsjánjuan xroan kolirio tsjiankí ikonrá kíxin ts'ikonrá.

¹⁹ Janhan mé tsjentuáha kaín tí sín tjuaha. Méxra íchá jína chrókjan sín chrókuinkáchónki sín Dios.

²⁰ Tsjehérá janhan itjén ntója puerta, jtét'eya. A ntá jnkojín nkexro chrókuinhin tí tanná ntá chrókuakitjehe tí puerta ntá chrók'uixanhan ntøe sín la chrókjónekian sín la ko jehe sín la ko janhan.

²¹ A ntá tí sín chrókjuacha chrókjuinchesteyána la tsjánjuan kjuachaxin ts'ejójian sín tí tétøanxian ntiha la éxi xíkaha janhan kjuacha ntá T'aná kjuanjøn kjuachaxin tjékian ch'án tí tjen ch'án t'etøan ch'án ntiha.

²² Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko."

4

1 Ntá chr'éxin janhan k'uíkuan ijnko puerta tjexrankehe nkaya nkajní. Ntá kuinhan ijnko itén nkexro éxi trompeta mé tí nkexro nixjana tí xrankixín, ntá jehe ch'án nixjana ch'án, ntáchro ch'án kixin:

—T'it'ótjen ntihi ntá tsjáqoha kaín nkehe tsonhen chr'éxin.

2 Ntá tuénxin ikui tí kjuachaxin kuente Nchakuen Dios k'uayáha ntá k'uíkuan tí trono itjen nkaya nkajní ntá ntiha tjetjaxin ijnko nkexro.

3 A ntá tí ch'in tjetjaxin tí trono mé tjákini tsjehe éxi ixro jaspe o ixro cornalina. A ntá jnkotañjen tí trono itjen ijnko konchecha tjákini tsjehe éxi ijnko xro esmeralda.

4 A ntá kjaxin jnkotañjen tí trono k'uíkuan í so veinticuatro trono kjaxin tjetjotjaxin veinticuatro sín táda, iké sín la tjóá la ko tjejóya kja sín corona tsík'óna chica oro.

5 A ntá tí trono kuente Dios la ntiha sí'taxrjexín tí sítjónkixin la ko sítjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios.

6 A ntá nkayakon tí trono la kjaxin itjen ijnko ntayaon éxi xroxro tsjehe.

A ntá tí jnkosiné la ko jnkotañjen tí trono tjejó noó nkexro tjejóchón chóna nchónhya ikon nkayakon la ko nóton.

7 A ntá tí nkexro tjechón k'uíkuan saoxín mé éxi koxra tsjehe. A ntá tí nkexro yóxin tóyóhe éxi koxinta, a ntá tí nkexro níxin tsjehe éxi chojni. A ntá tí noóxin la éxi kotjuanhnko xritjaká tsjehe.

8 A ntá jnkojnko tí noó nkexro tjejóchón chóna injon kanenee sín la chóna nchónhya ikon nóton la ko nkaxenhen, la nchakotjin la ko tie títoehya sín ntáchro sín kixin:

Santo, santo, santo,

İnchéni Dios, jaha chonta kaín kjuachaxin,

jaha xráxin tjen la ko itjen ijie la ko jaha ts'inka inaá.

9 A ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehe sín ch'án chjehe sín kjuasáyé tí nkexro tjetjaxin tí trono mé tí nkexro tjechón jnkochrín.

10 La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehe sín tí jehe ch'án kixin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kixin:

11 İnchéni Dios kuèteni, jaha la imá jina la t'ayéhé kjuasáya kixin tjikosáyahani tí jaha kixin tí kjuachaxin chonta;

kixin jaha kjuich'éna kaín nkehe síin kixin jaha kóxrjínhan xikaha k'óna.

5

Tí libro la ko tí Kolélo

1 A ntá tí tja chjina tí nkexro tjetjaxin tí trono, k'uíkuan ijnko libro mé tsíkjin sín nkaxenhen la ko nóton la ko mé tsíkjèxin yato sello.

2 La k'uíkuan ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jina chrókuacha chrókuakitjehe tí libro la ko chrókóchrítón tí sello chóna?

3 La ninkexró ní nkajní o ní chjasintajni o ní chrínki nonte tsjachahya tsakitjehe tí libro la ní komáhya sín.

⁴ **A** ntá janhan la imá tsjanka kixin **naxa** tónoxínhya ninkexró chrókjuacha chrókuakitjehé tí libro o chrókjuinchekuáxin tí libro o chrókomá nkehe tí ntáχρο tí libro.

⁵ Ntá ijnko tí sín táda ntá nixjana ntáχρο kixin:

—Tsjankahya, tsjehé ntihi tí Koxra k'uaxrjenixin Judá la ko tsík'axrjenixin rey David. Mé kjuacha la ó tsjacha tsakitjehé tí libro la ko tsóchrítōn tí yato sello —ichro ch'án.

⁶ **A** ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uikuān tjejin toté ijnko Kolélo tsjehé éxi tsík'óyān sín mé chóna yato ntéhé la ko yato ikon. **A** ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni.

⁷ **A** ntá tí Kolélo a kuákja tí libro itjen tja chjina tí nkexro tjetjāxin tí trono.

⁸ **A** ntá tió k'uáyéhé ch'án tí libro la ntá tí noó sín tjejóchón la ko tí veinticuatro tí sín táda k'uéjōxin toch'in sín nkayakon tí Kolélo. **A** ntá kaín tí jehé sín chóna sín ison arpa la ko xraá sín ihnti tsík'óna chica oro tsíkaón chjincō. Tíha mé oración nixjehé Dios kaín tí sín tsíkjinchetjóá ch'án.

⁹ Itsje sín nkehe nixin ntáχρο kixin:

Jaha mé ijnko nkexro jina kjuacha kuákja tí libro la ko kóchrítuan tí sello; kixin tsík'óyān sín tí jaha la ko tí ijniá k'uēnaxian tí jeheni ts'áyéhé Dios, mé ts'áyéhé ch'án kenxín chojni kjónté nkexrí tsjehé sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsíkjin'énani reyes la ko ncha't'á sich'eheni xra Dios kuēnteni, la ko jaha tsíkjánjuan kjuachaxin ts'ētōanni chjasintajni.

Mé xikaha ichro sín.

¹¹ Ntá tuénxín k'uikuān la ko kuinhan itén nchónhya sín ángel tjejó sín jnkotatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehé sín.

¹² Itsen nixja sín ntáχρο sín kixin:

Tí Kolélo tsík'óyān sín,

tíha mé kjuacha k'uáyéhé kjuachaxin ts'ētōan la ko k'uáyéhé tí nkehe tje te kuēnté Dios,

la ko tí kjuaxrexinkaon jina la ko kjuachaxin sich'e xra

la ko mé xikaha tjikosáyeheni ch'án.

¹³ Kjāxin kuinhan kixin kaín nkehe kjuích'éna Dios siín nkajni la ko chjasintajni la ko tí nkehe siín chrínkí nonte la ko kaín nkehe siín ntāyaon la kaín tíha mé ntáχρο kixin:

Chjéheni kjuasáya tí nkexro tjetjāxin tí trono la ko tí Kolélo

kixin chóna kjuachaxin jnkochrín.

¹⁴ **A** ntá tí noó sín tjejóchón ntáχρο sín kixin:

—Xikaha tsonhen. Amén.

La ko tí veinticuatro tí sín táda k'uejōxin toch'in sín la chjéhe sín kjuasáyé tí nkexro tjechón jnkochrín.

6

Tí yato sello

¹ **A** ntá k'uikuān kixin tí Kolélo kóchrítōn tí xránkixixín tí yato sello ntá kuinhan ijnko tí noó tí noó tí sín tjejóchón nixja ch'án éxi kjónta, la ntáχρο ch'án kixin:

—Xrákiá tsjehé.

² Ntá k'uikuan ijnko kokate tjóá. A ntá tí nkexro tjejen tí kokate chóna ch'án ijnko arco tí tja ch'án la tsík'áyéhe ch'án ijnko corona. Jehé ch'án mé kjuacha ch'án la naxa xikjacha ch'án inaá.

³ A ntá tí Kolélo kóchrítón tí yóxin sello ntá kuñhan tí nkexro yóxin tjechón ntáchro kixin: —Xrákiá tsjehé.

⁴ Ntá sákui í jnko kokate kjátse. A ntá tí ch'ín tjejen k'uáyéhe ch'án kjuachaxin tsjakjín tí kjuaxróxin siín chjasintajni kixin ntá chojni mé ts'óyán kichó sín kixin jehé ch'án mé tsík'áyéhe ch'án ijnko espada ijié.

⁵ A ntá tí Kolélo kóchrítón tí níxin sello la ntá kuñhan nixja tí níxin nkexro tjechón ntáchro kixin:

—Xrákiá tsjehé.

Ntá k'uikuan ijnko kokate tié. A ntá tí nkexro tjejen tí kokate chóna itja ch'án ijnko básula.

⁶ La ntá kuñhan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókjuinçek'itjáyannya tí aceite la ko tí vino. (Tíha mé t'axrxjín tsokjinta.)

⁷ A ntá tí Kolélo kóchrítón tí noóxin sello ntá kuñhan tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uikuan ijnko kokate sine. A ntá tí ch'ín tjejen va a mé it'in ch'án Muerte. A ntá nóton tí jehé ch'án la ikui nkehe tóyóhe tí tjejó tí sín tsík'en. Jehé ch'án k'uáyéhe kjuachaxin ts'etóan ch'án noóxin parte chjasintajni kixin ntá ts'óyán kichó sín la tsokjinta la ko ts'enxín sín ichin la ko kaín ko jjehe siín chjasintajni mé tsjáya va.

⁹ A ntá tí Kolélo kóchrítón tí n'óxin sello ntá k'uikuan chrínki tí altar tí asén tí sín tsík'enxín tí tan kuente Dios tsíchrónka sín.

¹⁰ Ntáchro sín itsen kixin:

—Jaha mé Inchéni tjóá jina la jaha mé sijnchexiteyá tí nkehe tsintáchrúa, ¿la nkesá sijnchekitóexián ijié tí sín siín chjasintajni tsík'óyán tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uítuenhen sín naxa ts'ok'éhe sín í so yaon tsoxetajia tí número tí kichó sín ch'ehe xra Cristo naxa ts'enxín sín éxi k'uén tí jehé sín.

¹² A ntá tí Kolélo kóchrítón tí injonxin sello ntá xrinahya imá kuínki nonte. A ntá tí yaon la kótié éxi ika tjiko chojni tsík'en. A ntá nitjó k'óna kjátse éxi jni.

¹³ A ntá konotsé sít'ánótjenxin nkajni sítjitsínka nonte éxi yóhe tí inta t'óna to higo la sixénjin tí to yoa tió tsjixraya tí nta kixin tí imá fuerte chjehe xrinto.

¹⁴ A ntá nkajni k'uitjayan éxi ijnko xroon tsíxreya. Ntá kaín jna la ko tí nonte ntsínsi siín jnkosiné ntayaon sákjuí ókjé.

¹⁵ A ntá kaín tí sín reyes siín chjasintajni la kjaxin tí sín t'etóan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uixenhen sín tjo siín nteje ts'ejómáxin sín.

¹⁶ Ntáche sín tí jna la ko tí tjo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etóan tjetjaxin trono la ko chrókjuasótehyani tí kjuachrakon jié tsjanjon tí Kolélo.

¹⁷ Kixin ó kui tí yaon imá jié kuente kjuachrakon la, ¿xá nkexro chrókjuacha chrók'uejó ntíha?

7

Tí sín israelita chóna sello

¹ **A** ntá chr'éxin k'uikuán noó sín ángel tjejóxin toté sín la jnkojnko sín tjejó sín tí chrínta chjasintajni chónthehe sín tí noó xrínto kixin tsochjéhya xrínto chjini chrítaón chjasintajni la ko ní chrítaón ntayaon la ko nijnko tí nta yoa.

² Kjaxin k'uikuán í jnko ángel kjuixín nó tjitoxin yaon la chóna sello kuènte Dios tjechón. Ntá tí ángel mé k'uíyehé ch'án itsen tí noó ángel tsík'áyéhe kjuachaxin sincheníhi nonte la ko ntayaon.

³ Ntáchro ch'án kixin:

—Náhi, sincheníehya nonte la ko ntayaon la ko kjaxin tí nta la náhi tí naxa tsikahya sello totjen tí sín ch'ehe xra Dios kuènteni.

⁴ Kujnhan tí número tí sín tsíka sello la me ciento cuarenta y cuatro mil kain tí sín tsík'axrjeníxin tí sín israelita.

⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad

⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés

⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Levi la ko teyó mil tí sín tsíka sello tsík'axrjeníxin sín Isacar

⁸ la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrjeníxin sín José la ko teyó mil tí sín tsíka sello tsík'axrjeníxin sín Benjamín.

Sín nchónhya chojni chóna ka tjóá

⁹ Ntá kjuixín tíha ntá k'uikuán nchónhya chojni kaín xín nación la ko kaín xín nkexrí tsjehe sín la ko kaín xín nkíva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín.

¹⁰ Kaín sín itsen nixja sín ntáchro sín kixin:

Dios kuènteni mé kjuínchekaáni.

Jehe ch'án mé tjetjaxín tí trono tí tjen tí Kolélo kjuínchekaáni.

¹¹ Kaín tí sín ángel tjejóxin toté sín jnkontatjen tí trono la ko jnkontatjen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios.

¹² Ntáchro sín kixin:

Amén. Kjuíncheyaonni Dios la tsochjéheni Dios kjuasáya kixin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kixin tjinkítsani ch'án jnkochrín.

Amén.

¹³ **A** ntá ijnko tí sín táda kjuanchankìna, ntáchro kixin:

—**A** ntá tí sín tjejóya ika tjóá la, ¿xá nkexro tíha? la ko ¿xá nketí tsíkjixín sín?

¹⁴ Ntá janhan ntáxrjan kixin:

—Ìnchéni, jaha ó noha. Ntá jehe ch'án ntáchro ch'án kixin:

—Tí sín i tsíkjixín sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótuáxin ijníé tí Kolélo.

¹⁵ Méxra xikaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen nínko kuènte ch'án. A ntá tí nkexro tjetjaxin chrítaón tí trono mé t'ayakonhen ch'án sín.

¹⁶ A ntá tí sín a mé ts'enixnhyá sín kjinta la ko ts'enixnhyá sín inta la ko tsochjánxinhya sín yaon la ko ni sóa kohya nkehe sich'ehe sín.

¹⁷ Kíxin tí Kolélo tjen jnkosiné tí trono mé t'ayakonhen ch'án tí jehe sín éxi iko kuènte ch'án la ko sátjiko ch'án tí tjá ntá tjanjon kjuachón la Dios mé sinchexamá kaín tí ntakon tí jehe sín.

8

Tí yatoxin sello la ko tí ihnti oro

¹ A ntá tí Kolélo kóchrítõn tí yatoxin sello kuènte tí libro la ntá kohya ninkehó ruido nkajní chjina it'õ hora.

² Ntá tuénxín k'uikuån yato ángel tjejóxin toté nkayakon Dios la jnkojnko sín k'uáyéhe sín jnkojnko trompeta.

³ Ntá chr'éxin ikui í jnko ángel xraá ihnti tsik'óna chica oro la kjuák'exín toté nkayakon tí altar. K'uáyéhe ch'án nchónhya chjincõ tsjak'e ch'án kíxin sátsjiko tí oración kuènte kaín tí sín tsíkjinchetjóá Dios kíxin tsjak'e chrítaón tí altar oro nkayakon tí trono.

⁴ A ntá tí ihnchi kuènte chjincõ chríinxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios.

⁵ A ntá tí ch'ín ángel kuákja ch'án tí ihnti kjuínchekaón ch'án xrinta kuènte xrohi kuènte tí altar la ik'ue ch'án chjasintajni. La ntá kjónta la ko nchónhya ruido la ko sitjónkíxín la ko kuínkí nonte.

Tí trompeta

⁶ A ntá tí yato ángel mé chóna sín jnkojnko trompeta ó yaxínhin sín kíxin ts'ánoa sín.

⁷ A ntá tí ángel saoxín k'uánoa trompeta ntá k'uáníá toni la ko xrohi tsínkíkjan jni mé xikaha ikui chrítaón chjasintajni. A ntá iche níxin parte nonte la ko níxin parte tí nta la ko kaín tí kayoa siín.

⁸ A ntá tí yóxin ángel k'uánoa trompeta la ijnko nkehe yóhe tsjehe éxi ijnko jna jíe tjeche la sákjuí kjuíankí ntayaon la ntá níxin parte tí ntayaon la k'óna jni.

⁹ A ntá tí níxin parte kaín tí nkehe siín tí ntayaon la ik'uén la ko níxin parte kaín tí ntabárcõ la xika.

¹⁰ A ntá tí níxin ángel k'uánoa trompeta la ntá xrínahya k'uánótjen ijnko konotsé jíe k'uánótjensexín nkajní mé tjeche éxi ijnko xrohi jíe. K'uánótjen chrítaón níxin parte ntarío la ko tí sit'axrje ntá.

¹¹ Tí konotsé mé it'in Itsjá la tsíkjiankí níxin parte tí ntá ntá kótsjá tí ntá la nchónhya chojni ik'uén kíxin tí ntá xikaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko níxin parte tí yaon la ko níxin parte tí nitjó la ko níxin parte tí konotsé. Méxra tí níxin parte kuitõhe sitié la í kohya t'inkaséyan tí níxin parte tí nchakotjin la ko tí tie.

¹³ Ntá tuénxín k'uikuån la ko kuínhan ijnko ángel tjetjaká jnkosiné nkajní t'èya ch'án itsen, ntáchro ch'án kíxin:

—Nõa tí sín tjejó chjasintajni tió tsontáchro tí trompeta ts'ánoa tí iní ángel ínaá.

9

1 **A** ntá tí n'óxin ángel k'uánoa trompeta la k'uíquān ijnko konotsé tsík'ánótjēnxīn nkajni chrítaón chjasintajni ntá k'uáyéhe tí llave kuēnte tí tōye ninka.

2 **A** ntá tuénxīn xitjehe tí tōye nīnka ntá ntiha chrīnxīn nchónhya ihnchi kuēnte tja ntá tí t'inkaséyanxīn yaon la ko tí xrīnto k'uixīn tié kixīn tí ihnchi kuēnte tí tōye.

3 **A** ntá tí ihnchi mé k'uaxrjexīn kochjōa xritjaká chrítaón chjasintajni. **A** ntá tí kochjōa k'uáyéhe kjuachaxīn éxí tí chóna konchjā siín chjasintajni.

4 K'uítuenhen va kixīn sincheníehya va tí kayoa siín chjasintajni la ko ninkehó nkehe yoa la ko ninkehó ntayoa. Jehó chojni chónahya sello kuēnte Dios tí totjen mé sincheníhi va.

5 Kjánchó k'uáyèhya va kjuachaxīn ts'óyán chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxí chojni tsikjinehe konchjā.

6 **A** ntá tí yaon a tsotjinkaon chojni chrók'uen sīn la ntá xitjahya its'en sīn. Kjóté tjinkaon sīn chrók'uen sīn la tí muerte sátsíkji ókjé.

7 **A** ntá tí kochjōá éxí kokate tsjehe, listo tjen sátsjikjanjon va. **A** ntá tí ikja va itjen nkehe tóyóhe ijnko corona tsík'óna oro la ko tí kàrè la tóyóhe éxí kàrè chojni.

8 **A** ntá tí kaxree va tsjehe tóyóhe éxí kaxīhi chojni chjin, a ntá tí neno va la tóyóhe neno koxra.

9 **A** ntá tí cuérpé la tjekjanjin nkehe tsík'óna chica kixīn kohya nkehe tsonhen va. **A** ntá ruido kuēnte kanenge la éxí nchónhya carro tinkánkákjen kokate tió xritinká tí siín kjuanínkaon.

10 **A** ntá tí ntané va mé tsjiate chojni la éxí ntané konchjā, la tíha mé tsochóna kjuachaxīn sincheníhi chojni hasta in'ó nitjó.

11 **A** ntá tí kochjōá mé chóna ijnko nkexro t'etōan mé ijnko ángel kuēnte tí tōye ninka. Tí ángel mé nkiva hebreo mé it'in Abadón la nkiva griego la mé Apolión mé t'axrjexīn kixīn táha mé sinchek'itjāyan nkehe.

12 Mé xīkaha kónhen tí kjuachrakon xrankixīn. **A** ntá naxa t'itjāyan yaá inaá.

13 **A** ntá tí injonxīn ángel k'uánoa trompeta la kujnhan ijnko itén nkexro k'uaxrjexīn tí tjejó tí noó ntèe kuēnte tí altar oro tí tjen Dios.

14 **A** ntá tí itén tí nkexro ntáche tí injonxīn ángel chóna trompeta kixīn:

—Tjasintankehé tí noó ángel kuēnte tí jínahya tjejóchroé chjinaxón tí ntario jíe it'in Eufates.

15 Ntá xīkaha xintankehe tí noó sīn ángel kixīn ts'óyán sīn tí níxin parte chojni. Mé xīkaha yaxínhin sīn sátsji sīn tí hora la tí yaon la tí nitjó la tí nánó.

16 Ntá kujnhan tí número tí soldado la ko tí kokate la doscientos millones.

17 Mé xīkaha xrínahya k'uíquān tí kokate. **A** ntá tí sīn tjejókjen kokate la tí ntakuin sīn chóna nkehe tsík'óna chica kjátse la azul la sine. **A** ntá tí kokate la ikja la éxí kja koxra la tí ir'va la k'uaxrjexīn xrohi la ko ihnchi la ko azufre.

18 **A** ntá níxin parte chojni tsík'enxīn tí iní klase tí chin tsík'axrjexīn ir'va kokate mé xrohi la ihnchi la azufre.

19 Tí kjuachaxīn chóna tí kokate la k'uaxrjexīn ir'va va la ko tí ntané va. **A** ntá ntané la éxí konche tsjehe la tí kja va mé sincheníhi chojni.

20 **A** ntá tí í so chojni kuítōhe k'uénxinhya tí chin a la kjóté kjuinkíhya sīn tí nkehe tjenkayáxin sīn la kuítōehya sīn tinkáchónki sīn nchakuen jínahya la ko

tí nkehe tsíkjangya chica oro la ko chica plata la ko chica bronce la ko ixro la ko inta, mé tí nkehe t'ikönhya la ko tienhya la ko tjihya.

²¹ La kjónté xíkaha la kuítqehya sín tí nkehe jínahya ch'e la ko tí chrók'óyán kíchó la ko tí nchekjiko kíchó la ko tí chóna sín chojni chjin ókjé la ko tí tjinkaon sín chrókueé.

10

Ijnko ángel la ko tí librito ntsí

¹ Ntá k'uíkuan í jnko ángel imá chonta kjuachaxin k'uúinkajinxin nkajní tjenkakjan ch'án tjuí la ko ijnko konchecha chrítaón tí ikja ch'án. A ntá tí kàré ch'án imá tjákiní tsjehe éxí yaon, a ntá tí toté la éxí xrohi síchr'ákjen.

² Tjexraá ch'án ijnko libro ntsí tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche.

³ Ntá xrínahya k'uèya ch'án itsen éxí ijnko koxra tsjánka va tí tónínkaon va mé xíkaha k'uèya la yato kjóna kjuátéyá tí itén ch'án.

⁴ Ntá kjuixin ntáchro tí yato kjóna la chrókjian ntá kuñhan ijnko itén nkexro nkaya nkajní ntáchro kíxin:

—Chróchronkahya tí nkehe ntáchro tí yato kjóna la ko ni chrókjinhya tíha.

⁵ Ntá tuénxín tí ángel k'uíkuan ijnko toté tjekjen ntayaon la ijnko toté tjekjen nche ntá kjuaya tja chjina nó nkajní.

⁶ Ntá kjuasin ch'án testigo tí nkexro tjen jnkochríxín mé tí nkexro a mé kjuich'éna nkajní la ko chjasintajni la ko ntayaon la ko kaín xín nkehe síin la ntáchro ch'án kíxin:

—Í séhya má naxa tsoxrjen

⁷ ntá tsjixraká tí yaon tí yatoxin ángel ts'ánoa trompeta ntá tsoxiteyá tí nkehe jehó Dios nohe kíxin xíkaha tsíchénka ch'án tí sín k'uékjich'ehe ch'án xra ósé k'uéchrónka sín itén ch'án.

⁸ A ntá tí itén nkexro kuñhan k'uaxrxéxín nkaya nkajní ntá xínixjana ínaá ntáchro kíxin:

—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuia kjuáncháha tí ángel tí libro ntsí ntá jehe ch'án ntáchro ch'án kíxin:

—Tákjá la inte. A ntá tí ir'va la tsóxé éxí tsjen kjánchó tí tsqa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxí tsjen ntá chr'éxin la kótsjá nkaya tsena.

¹¹ Ntá tuénxín k'uètuanna ch'án kíxin:

—Ínaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijnko ntavara éxí tji tsjehe tsjáchroaxián ntá ntáchro ch'án kíxin:

—T'áyá tjáchroa nkaxenhen njnko kuènte Dios la ko tí altar la tékia nkekjaín nkexro tjejó ntiha tinkáchónki Dios.

² Kjánchó tí ntasin itjen ntója njnko la tjáchroahya kíxin táha ó tsík'áyéhe tí sín tsíkjinín kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó.

³ **A** ntá mé janhan tsochr'an iyó testigo kuèntana tsonixjajinna mil do-scientos sesenta yaon. Tí iké sín la ika tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuènte chjasintajni.

⁵ **A** ntá tí jnkojín sín tjinkaon sich'ehe sín dañó la jehe sín la xrohi ts'axrjéxín ir'va sín la tsoche kaín tí sín nínkakonhen sín la mé xíkaha its'en kaín tí sín tjinkaon sich'ehe sín dañó tí jehe sín.

⁶ **A** ntá tí testigo i chóna kjuachaxin ts'ikjehe nkaya nkajní kixin í ts'aniáhya chrin tí tsonixja sín kuènte Dios la ko kjaxin chóna sín kjuachaxin tsontáche sín tí ntá kixin ts'óna jni la ko sinchekjasótéxín sín chojni chjasintajni nchónhya clase chin nchónhya veces éxí tí tjinkaon sín.

⁷ **A** ntá tí kjuixinhin sín tí xrá ntá tí ko jiehe ts'axrjéxín tí tòye njinka mé tsjanxíxín tsjanjonko tí jehe sín ntá tsjacha va ts'óyán va tí jehe sín.

⁸ **A** ntá tí cuérpé sín tsitphe sítsínka tí calle kuènte chjasin jié tí tsíkjak'enkani sín Ìnchéni ntacruz mé tí chjasin mé kjaxin nchek'in sín Sodoma la ko Egipto.

⁹ **A** ntá iní yaon ko t'ò la kaín chojni itsjé chjasin la ko kaín nkexrí tsjehe sín la ko nchónhya nkíva la ko nchónhya nación ts'íkon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a.

¹⁰ **A** ntá tí sín tjejó chjasintajni tsöchéhe sín kixin xíkaha tsík'en tí sín a la antsí má tsöchéhe sín la tsochr'án sín nchónhya nkehe nchekjtonhen kíchó sín kixin xíkaha ik'uén tí yaá sín k'uéchrónka itén Dios kixin jehe sín kjuaxróxinhya k'uék'íxín sín tí chjasintajni tí k'uék'ejó tí sín a.

¹¹ **A** ntá chr'éxín ó k'uátsínka iní yaon ko t'ò la ntá Dios kjuínchexéchón tí iyó tí sín a inaá la k'uáya sín inaá la ntá kaín chojni k'uíkon la imá chrakon sín.

¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chriyan xrákiá antsí ntíhi.

Ntá chrínxín sín nkajní ijnko tjuj. **A** ntá kaín tí sín nínkakonhen sín la k'uíkon sín kixin xíkaha kónhen sákjuj tí iyó sín a.

¹³ Ntá tuénxín mé kuínki nonte la ntá ijnko ite parte chjasin ntiha la k'uitjáyán la yato mil chojni tsík'en kixin tí kuínki nonte. **A** ntá kaín tí sín xéhe imá chrakon sín la kjuankíxín sín tinkáchónki sín Dios la tjanchia sín kjuasáya.

¹⁴ Mé xíkaha kónhen tí yóxin kjuaxikaon la ntá tuénxín itsi tí nixin kjuachrakon inaá.

Tí yatoxin trompeta

¹⁵ **A** ntá tí yatoxin ángel k'uánoa trompeta ntá kuínhin sín ijnko tan nkajní itsen ntáchro kixin:

A ntá tí sín k'uáyéhe kjuachaxin kuènte chjasintajni la ó kjaxin nchexiteyéhe sín

Ìnchéni Jesucristo

kixin jehe Jesucristo mé ts'etoan ch'án jnkochrín.

¹⁶ **A** ntá tí veinticuatro tí sín táda tjejótjaxin sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios.

¹⁷ Ntáchro sín kixin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxin tjen la ko jaha ts'ínka inaá.

Kixin jaha k'uayéhe kjuachaxin jié kixin xráxin tétóan.

¹⁸ **A** ntá kaín tí naci6n k6nínkaon,
 a ntá ó kui tí yaon jaha sìnchekjasóte sìn
 la ko kjàxin jaha sìnchekit6exián ijíe tí sìn tsík'én
 la ko tsjénkehé tí sìn kjuít'aha xra chrónkaxín itán
 la ko tí sìn ó kjuínchetjóá la ko tí sìn kjuikosáyehe tí ihniá,
 mé tí chojni nt6to la ko tí sìn chánjan ntsíntí.
 Jaha tjoka sìnchek'itjáyán tí sìn chrókjuínchek'itjáyán chjasintajni.

¹⁹ **A** ntá xitjehe tí nínk6e Dios tjen nkaya nkajni, a tí nkaxenhen k6noxín
 tí caja tjinká tí nkehe tsík'et6oan Dios. **A** ntá sítj6nkíxín la ko nch6nhya ruido
 sítjonta la ko kuínkí nonte la ko imá tsanká k'uániá toni.

12

Tí chojni chjin la ko tí drag6n

¹ **A** ntá k6noxín nkajni ijnko kjuaxroan jíe mé ijnko chojni chjin iké tjákini
 éxi yaon tsjehe la chrínkí toté tjan itjen nitjó. **A** ntá tí kja tjan tjenkáya ijnko
 corona ch6nta teyó konotsé.

² **A** ntá tí chojni chjin a mé tjejá tjan la t'èya tjan kíxín tjt6té tjan kíxín
 sìnchekokjíhi tjan xjeen tjan.

³ Kjàxin k6noxín íjnko kjuaxroan nkajni mé ijnko drag6n kjátse ch6nta yato
 kja la ite ntéé la jnkojnko corona jnkojnko kja. [Tí drag6n mé ijnko kots'aja
 jíe.]

⁴ Tí ntané mé nkánkákjen níxín parte konotsé kuente nkajni la ik'ue chríta6n
 chjasintajni. **A** ntá tí drag6n kjuák'e chók'èxín tí tjen tí chojni chjin mero
 tsokjíhi xjeen kíxín tjinkaon tjoka chrókj6ne tí xjan tsokjíhi.

⁵ **A** ntá tí xjan kjuínchekokjíhi tjan mé xjan ntoa kíxín jehe ch'án mé
 ts'etuenhen ch'án kaín naci6n la tsoch6nta ch'án ijnko vara chica ts'et6oanxín
 ch'án. Ntá tí xjeen tjan la mé Dios sákjuiko tí tjen ch'án t'et6oan ch'án.

⁶ **A** ntá tí chojni chjin la kuínká tjan sákjuí tjan nteje kíxín tsíkjinchey6xín
 Dios nketí sátsji tjan kíxín ntaha tsoxranjon nkehe sine tjan mil dos cientos
 sesenta yaon.

⁷ Ntá chr'éxín xrínahya k'uúxín kjuánínkaon jíe nkajni la mé tí arcángel
 Miguel la ko tí í so ángel xriko ch'án mé kjuánjonko sìn tí drag6n, la tí drag6n
 la ko tí ángel kuente mé kjuánjon sìn.

⁸ Kjánch6 kjuachahya tí drag6n la kohya lugar kuente nkaya nkajni.

⁹ Mé xíkaha kuakitsjexín sìn tí drag6n nkajni. Jehe mé tí konche ósé ikjí mé
 nchek'in sìn diablo la ko Satanás. Jehe mé k'uékjich'iyehé tí chojni kuenté
 chjasintajni. Jehe la ko tí sìn ángel kuente k'uaxrjexín ntíha la kjuitsínka
 chjasintajni.

¹⁰ Ntá kujnhan itén ijnko nkexro nkaya nkajni itsen nixja ntáchro kíxín:

—Ó kui tí tsaáxinni tí kjuachaxi6n tí Dios kuenténi la ko tí kjuachaxín t'et6oan
 Cristo kíxín ó k'uaxrjexín nkajni tí nkexro t'eka jíe tí kíchó ní mé kjuanchia jíe
 nchakotjin la ko tie nkayakon Dios kuenténi.

¹¹ Tí sìn kíchó ní la kjuacha sìn kuaáxín sìn kíxín tí ijnjé tí Kolélo k'uítji la
 ko kíxín jehe sìn chrónkaxín sìn tí tan tsík'áyehé sìn la chrakonhya sìn kj6nté
 chrók'u6nxín sìn.

¹² **A** ntá jie la t6cháhará kaín rá tjejorá nkajni. Ntá n6a tí sìn tjejó chjasintajni
 la ko ntayaon kíxín k'uínkajin tí ch'in diablo la imá nínkaon ch'án kíxín ó nohe
 ch'án kíxín í kánhyó sé tsjak'e ch'án.

13 Ntá tí ch'ín dragón ó nohe kixin k'uánótjexin nkajní ikui chjasintajni ntá sákjuichréhe tí chojni chjin chóna tí xjan ntoa kixin chrókjuinchek'itjáyan tjan.

14 Kjánchó tí chojni chjin k'uáyéhe yaá kanenee kuente kotjuanhnko ijie kixin jina tsjaká tjan sátsji nteje kixin ntá ikjín tsitohe tí konche. Sátsji tjan kixin ntiha tsoxranjon nkehe sine tjan iní nánó ko t'ò.

15 A ntá tí konche mé k'uaxrjexin ntá ir'va kixin ts'óna ijnko ntarío kixin tjinkaon va chrók'uátjoáko tí tjan a tí ntá a.

16 A ntá tí nonte kjuínkítsa tí tjan a kixin xitjehe ir'va nonte la kaín tí ntá k'uaxrjexin ir'va tí konche la ntahó sákjuí k'uixenhen.

17 A ntá tí dragón la imá kóninkakonhen tí tjan a ná imá kóninkaon kjuánjonko tí í so sín naxá kjéhya tí tjan a kixin naxá titekaon sín tí nkehe tsik'etqan Dios la naxá tinkáchónki sín tí nkehe tsíchrónka Jesucristo.

13

Tí yaá bestia

1 Tí kjuak'é chrínta ntayáon ntá ntaha k'uíkuqan chríinxín ijnko bestia chóna yato kja la ko ite ntéé chojni t'ántaxínhin Dios.

2 Tí bestia k'uíkuqan mé tóyóhe kotigre la chóna toté éxí toté ko oso la ko tí ir'va la éxí ir'va koxra. Tí dragón kjuanjon kjuachaxin imá ts'etqan tí bestia a.

3 A ntá ijnko kja tí bestia chóna ijnko tsíchrít'ò jíé chóna chrók'uénxín ntá tsíkitohe jina ntá kuenté chjasintajni la chrakon chojni ntá chréhe sín tí bestia.

4 Kjuikosáyehe sín tí dragón kixin jehe kjuanjon tí kjuachaxin k'uáyéhe tí bestia ntá kjaxin kjuikosáyehe sín tí bestia la ntácho sín kixin:

— ¿Xá nkexro chrókóyóhe tí bestia la xá nkexro chrókjuacha chrókjuanjonko tí jehe?

5 Kjaxin tí bestia k'uáyéhe kjuachaxin tsontácho kixin chóna kjuachaxin má la ts'ántaxínhin Dios la tsochóna kjuachaxin cuarenta y dos nitjó.

6 Ntá mé xikaha kjuích'e k'uántaxínhin Dios la ko k'uántaxínhin ihnié Dios la ko k'uántaxínhin tí njnko tjen nkaya nkajní la ko kaín tí sín tjejó ntiha.

7 Kjaxin tsík'áyéhe kjuachaxin tsjanjonko tí sín tinkáchonki Dios hasta tsjacha ts'etuenhen tí sín ntá k'uáyéhe kjuachaxin ts'etuenhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación.

8 A ntá tí bestia mé kaín xín chojni sín chjasintajni mé tsjikosáyehe sín tí bestia. Tí chojni a mé ts'inixínhya ihnié tíó k'óna chjasintajni, mé ts'inixínhya ihnié sín tí libro ts'inixín ihnié tí sín tsaá. Tí xroon a mé chóna tí Kolélo tsik'óyán sín.

9 La jnkojín nkexro tjinkaon chrókuinhin la chrókuinhin tíhi.

10 Tí nkexro sátsjiko tsjik'ikjehe í so chojni la kjaxin ch'án ts'ikjehe ch'án la tí nkexro tsjayaxin espada la kjaxin espada ts'enxín. A ntá tí nkexro tinkáchónki Dios la t'ichjánxin tsoninkakonhya la ko tsochóna fe.

11 A ntá chr'éxin k'uíkuqan í jnko bestia k'uaxrjexin nonte, chóna yaá ntéé éxí tsjehe ntéé coronta la mé nixja éxí nixja tí dragón.

12 Tí bestia la chóna kaín xín kjuachaxin éxí k'uéchóna tí bestia saoxín tí k'ué la t'etuenhen tí sín sín chjasintajni kixin tinkáchónki sín tí bestia saoxín mé tí bestia tsíchrít'ò kja ntá tsíkitohe jina.

13 Kjaxin kjuasin kjuaxroan jíé hasta xrohi k'uánótjexin nkajní ikui nonte ntá nchónhya chojni k'uíkonxín kon sín kixin xikaha kónhen.

¹⁴ Mé xíkaha tí bestia tsík'áyéhe kjuachaxin kjuasin kjuaxroan tí tjen tí bestia saoxín la kjuích'iyehé nchónhya chojni síin chjasintajni. La ntá k'uetuenhen tí sín síin chjasintajni sich'éna sín ijnko nkehe tsíkjanoya éxi yóhe tsjehe tí bestia tsíchrít'oxin espada la kjónté xíkaha naşa kjuák'echón.

¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsíkjanoya tóyóhe tí bestia saoxín kixin ntá tí nkehe tsíkjanoya la jina tsonixja la ko jina ts'etqan its'en kaín nkexro tinkáchónkihya tí jehe.

¹⁶ Kjaxin ts'etqan kixin kaín chojni tsochóna marca, á chojni hyé o chojni ntsínsí, la á chojni rico, la á chojni nòa la á chojni ch'exón xra la ko chojni náhi, mé kaín sín tsochóna sín marca, á tja sín chjina o totjen sín.

¹⁷ Ntá ninkexró xitjahya ts'ena la ko ninkexró xitjahya sinchekji tí chóntahya sín marca o ihnié tí bestia o chóntahya sín número kuente ihnié tí bestia.

¹⁸ T'ichjánxin chrókiénxínrá tíhi. Tí nkexro tienxín la chróconohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uíkuan tí Kolélo tjaxín toté chrítaón tí jna Jerusalén. Jehe ch'án tjeko ch'án ciento cuarenta y cuatro mil chojni ts'ínixín totjen sín ihnié tí Kolélo la ko ihnié It'é ch'án.

² Ntá tuénxín kujnhan ijnko itén nkexro kujxin nkaya nkajni mé ijnko ruido éxi nchónhya ntario la ruido éxi sitjonta itsen la éxi ijnko ruido nchónhya chojni it'in sín isón arpa.

³ Itsje sín nkehe nixin nkayakon tí trono la ko nkayakon tí noó nkexro tjejóhón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsikaá k'uék'ejó chjasintajni.

⁴ Tí sín a mé k'uéchóntahya sín itsje chojni chjin la tjóá sín la chréhe sín tí Kolélo kjónté nketi k'uáji. Tí sín a mé kuaá sín tí k'uék'ixín chojni k'uékjasin jie la ko tí sín a mé éxi ijnko ofrenda xrankixín k'uáyéhe Dios la ko tí Kolélo kjaxin.

⁵ Kónoxínhya ninkehó kjuach'ia k'uaxrjexínhya ir'va sín. La tí sín la ninkehó jie chóntahya sín tí tjejó sín nkayakon tí trono kuente Dios.

Tí nkehe chrónka tí iní ángel

⁶ A ntá k'uíkuan i jnko ángel tjetjaká jnkosiné nkajni chrónka tí tan tsaáxinni jnkochrixín tsinhin tí sín síin chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin.

⁷ Ntá t'eya itsen ntáchro kixin:

—Chróchrakonrá la chrórxáinkáonrá Dios la chróchjehérá ch'án kjuasáya kixin ó kjuixraká tí yaon sinchekitqexín ch'án ijjé chojni. Tjikosáyehérá ch'án kixin jehe ch'án kjuích'éna ch'án nkajni la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixin kjuítsínka, ó kjuixin kjuítsínka tí chjasin jie Babilonia. Mé ntiha kujxin tí vino kókuaxnín sín kaín nación ntá kjuasin sín jie chóna sín chojni chjin ókjé.

⁹ Ntá xíki tí nixin ángel nixja itsen, ntáchro kixin:

—Jnkójín sín tsjikosáyehe sín tí bestia la ko tí nkehe tsíkjangya kuènte o tsítóhe sín tsochóna tí marca tí totjen sín o tí tja sín,

¹⁰ mé t'ichjánxín its'i sín tí vino tsjasótexín sín kuixín tí tjen Dios kixin xikaha tjechónhen tí kjuanínkaon kuènte Dios ntá ntiha tsjasótexín sín tí xrohí la ko azufre mé xikaha tsonhen tí sín a ts'ikon tí sín ángel kuènte Dios la ko tí Kolélo.

¹¹ Tí ihnchi kuènte xrohí sítjasótexín sín síchrín jnkochrín la tí sín a kuinkáchónki tí bestia la ko tí nkehe tsíkjangya kuènte o chóna sín ihnjé kuènte.

¹² A ntá tí sín tinkáchónki Dios la kuítekaon sín tí nkehe k'uetqan ch'án la ko naxá jína tinkáchónki sín Jesús mé t'ichjánxín chrókuítqehya sín titekaon sín ch'án.

¹³ Ntá kuínhan itén ijnko nkexro kuixín nkajní ntáchro kixin:

—Ikjian tíhi: “Náxrjón tjejó tí nkexro kjónté its'en sín ijie o chr'éxín kixin tinkáchónki sín Ìnchéni.” Kjá jína, ichro Nchakuen Dios, kixin tí jehe sín ts'ok'éhe sín kixin ó kjuich'e sín xra la tí xra kjuich'e sín mé kjuacha sín.

Tí nkehe tsík'óna chjasintajni

¹⁴ Ntá xrinahya k'uikuan ijnko tjuí tjóá la chrítaón tí tjuí tjetjaxín ijnko nkexro éxí yóhé tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjetxraá ch'án.

¹⁵ A ntá nkaxenhen njnko mé k'uaxrjexín í jnko ángel itsen nixja ch'án nixjehe ch'án tí nkexro tjetjaxín chrítaón tjuí ntáchro ch'án kixin:

—Tjankíxian tətexian chica hoz kixin ó kjuixraká tí yaon tsotjá tí nkehe síin chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxín tí nkexro tjetjaxín chrítaón tjuí ntá kjuínchek'átsínka ch'án chica hoz kuénté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí njnko tjen nkaya nkajní la kjaxín sákjuíko ch'án ijnko chica hoz imá taté.

¹⁸ Ntá sákjuíxín í jnko ángel tí tjen altar la chóna ch'án kjuachaxín kuènte xrohí la itsen k'uíyehé ch'án tí nkexro chóna tí chica hoz imá taté la ntáchro ch'án kixin:

—Tjankíxian tətexian tí chica hoz taté la tjankíxian itja tí racimos to uva tsík'óna chjasintajni kixin ó tsíchjé to —ichro ch'án.

¹⁹ A ntá tí ángel kjuínchek'átsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí tjat'o ts'ényaxín sín to. Tíha mé t'axrjexín kixin xikaha Dios sinchekjasóte chojni.

²⁰ A ntá tí to uva tsík'ényaxín sín tjat'o tí ikon chjasin a ntá tí tjat'o a mé k'uaxrjexín nchónhya jni noixín éxí tí freno tjinká ir'va kokaṭe la trescientos kilómetro kjínxín sátsíkji tí jni a.

15

Tí yato tí ángel la ko tí chín tsjixixín

¹ Ntá k'uikuan tí nkajní í jnko kjuaxroan jíé mé ijnko kjuachrakon: mé tí yato sín ángel kuíkao tí yato chín tsjixixín tsoníexín chojni. Tíha mé tí kjuanínkaon kuènte Dios tsjixixín.

² Kjaxín k'uikuan ijnko nkehe tóyóhé ijnko ntayaon tsík'óna éxí xrosentá tsínkíkjan xrohí. La tí sín tsíkjacha kixin kuinkáchónkihya sín tí bestia la ko tí nkehe tsíkjangya kuènte la ko kuáhya sín tí número kuènte ihnjé tí bestia mé

tjejóxin toté sín chjinaxón ntayaon tsík'óna éxí xrosentá la ko chóna sín isón arpa tsíkjanjon Dios tsík'áyéhe sín.

³ Itsje sín isón k'uétsje ch'ín Moisés, tí nkexro kjuích'ehe xra Dios la ko isón kuènte tí Kolélo la mé ntáchro kíxin:

Imá ijíe tí kjuaxroan kuéntá kíxin kaín nkehe tsíkjich'éna.

Jaha Ìnchéni Dios kaín kjuachaxin chonta.

Ntoá la ko chaxín tí ntja kuéntá.

Jaha mé ijnko Rey t'etōan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kíxin jaha mé ijnko nkexro jína tjóá?

Kuenté chjasintajni tsjikosáyehe sín tí jaha

kíxin k'uikon sín tí xra tsíkjich'e la jína tíha.

⁵ Kjuixin tíha la k'uikuān nkajní tjexrankehe tí nínko la ko tí cuarto tjóá t'inkachjina tí nkehe tsík'etōan Dios.

⁶ A ntá tí nínko a k'uaxrjéxín yato ángel kuikao yato chin. Tí iké sín la ika tje te tjóá tjáki. A ntá tí cinta chóna ntakuin sín mé jehó oro.

⁷ A ntá ijnko tí noó tí nkexro tjejóchón mé kjuanjon ijnko copa k'uáyéhe jnkojnko tí yato ángel mé copa tsík'óna chica oro tsikaón tí nkehe tsjasótéxín chojni kuixín tí tjen Dios tí nkexro tjechón jnkochríxín.

⁸ A ntá tí nkaxenhen nínko la tsikaón ihnchi kuixín tí kjuachaxin jíe kuènte Dios la nijnko nkexro xitjahya ts'ixenhen ntiha tsjixinjian ts'átsínka tí yato tí chin kuikao tí yato ángel.

16

Tí copa tjínká nkehe tsjasótéxín chojni

¹ Ntá kujnhan ijnko itén ijnko nkexro imá itsen k'uaxrjéxín nkaxenhen nínko, ntáche tí yato sín ángel kíxin:

—Sátjia tikíkjanjian chrítaón chjasintajni tí nkehe tjía tí yato copa la táha mé tsjasótéxín chojni kuixín tí tjen Dios —ichro ch'án.

² A ntá tí ángel saoxín sákjuik'itji tí nkehe tjía tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanoya kuènte tí bestia mé tsík'ayan sín tosóa, imá tjetéhe sín.

³ A ntá tí yóxin ángel sákjuik'itji tí nkehe tjía copa chrítaón ntayaon. A ntá tí ntayaon la k'óna jni éxí ijníe ijnko chojni tsík'óyán kichó la kaín ko sínkáki ntayaon ik'uén.

⁴ A ntá tí níxin ángel sákjuik'itji tí nkehe tjía copa chrítaón ntario la ko chrítaón tí ntá sit'axrje tōye, la ntá tí ntá k'óna jni.

⁵ Ntá tuénxín kujnhan nixja tí ángel kuènte ntá ntáchro kíxin:

—Jaha mé ijnko nkexro jína kíxin kjuínchekitoexián ijíe chojni. Ìchéni jaha ijnko Dios jína, óse tjen la ko naxa tjen ijie

⁶ Kíxin jehé sín k'óyán tí sín tinkáchónki tí jaha la ko tí sín tsíchrónka itan la ntá jaha Ìnchéni chjehé sín ijni its'i sín kíxin mé xikaha sitjasóte tí jehé sín.

⁷ Kjaxín kujnhan nó altar ijnko nkexro ntácho kíxin:

—Chaxín Ìnchéni Dios, jaha mé chonta kaín kjuachaxin la ntoá jína kjuínchekitoexián tí ijie a.

⁸ A ntá tí noóxin ángel sákjuik'itji tí nkehe tjía copa chrítaón yaon, a ntá tí yaon antsí k'uáyéhe kjuachaxin tsosóa kíxin tsochjánxin chojni tí sóa kuènte.

⁹ **A** ntá kaín chojni chjánxin tí imá sóa kuènte yaon la k'uántaxínhìn sín ihñié Dios mé jehe ch'án mé tí nkeexo chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ **A** ntá tí in'óxin ángel sákjuik'itji tí nkehe tjía copa chrítaón tí trono t'etóanxín tí bestia. **A** ntá kaín tí k'uéchóna kjuachaxin k'uék'etóan tí bestia la k'uúxin tié. **A** ntá tí chojni a la netja nejen sín kixin tjetóhe sín.

¹¹ La kjónté xíkaha la kjuinkíhya sín tí nkehe jínahya ch'e sín. Náhi. Íchá má k'uántaxínhìn sín Dios tjen nkaya nkajní kixin tjetóhe sín kixin xíkaha kónhen sín.

¹² **A** ntá tí injonxín ángel sákjuik'itji tí nkehe tjía copa chrítaón ijnko ntario jié it'in Eufates. **A** ntá tí ntario la kjuixié kixin jina tsakitjehe sín ijnko ntia tsjixín tí sín rey tsjixín nó tjtóxin yaon.

¹³ **A** ntá k'uikuán kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxi korána tsjehe.

¹⁴ Tíha mé nchakuen tí jínahya kjuasixín sín kjuaxroan. **A** ntá sákjuikjinchekójkotsé kaín rey síin chjasintajni kixin tsjanjon sín ijnko yaon jié kuènte Dios chóna kaín kjuachaxin.

¹⁵ "Tsjehé, janhan titàya ts'inké éxi ijnko xíchee. Chéhe tí nkeexo tjejótsjehe la t'ayakonhen tí iké kixin ts'itjáyanhya kixin chrók'uajihya sín tjóchin sín la chrókósuèhya sín kixin chrókónoxín kixin tjóchin sín."

¹⁶ **A** ntá tsojnkotsé tí sín rey tí nonte it'in Armagedón nkíva Hebreo.

¹⁷ **A** ntá tí ángel yatóxin sákjuik'itji nkehe tjía copa chrítaón tí xrinto ntá nkaxenhen njnko nkaya nkajní k'uaxrjexín ijnko itén chojni itsen nixja mé kujxin tí tjen tí trono la ntáchro kixin:

—Ó kjuixin kónhen tíha.

¹⁸ **A** ntá sítjónkixin la ko ruido sítjonta la ntá imá kuínki nonte fuerte. La desde tí kjuankixin k'uúxin chojni chjasintajni la xíkaha kónhen kuínki nonte a ntá jie antsí fuerte kuínki nonte.

¹⁹ **A** ntá tí chjasin jié xitjehe nonte la iní k'óna, chjenca. La koí kaín chjasin síin chjasintajni tsik'oya. **A** ntá Dios xraxinkaon kixin chrókjuínchekjasóte tí sín síin tí chjasin jié Babilonia la k'uetoan ch'án its'i sín tí vino tsjasótéxín sín kixin mé xíkaha kónínkaon ch'án.

²⁰ **A** ntá kaín tí nonte sinkátaón ntayaon k'uánianki ntá la ko tí jnā k'uitjayan.

²¹ **A** nta nkajní k'uánójtjexín toni ijié xratja chojni mé cuarenta kilo yexín jnkojnko toni. **A** ntá chojni na antsí má k'uántaxínhìn sín Dios kixin tí xíkaha kónhen sín xratja sín toni la imá kjoté sín.

17

Tsjasóte tí tjan jínahya

¹ **A** ntá ikui ijnko tí yatóxin ángel chóna tí yato copa la ntáchro ch'án kixin: —Xrákiá tsjáqoha nkexrí tsjasóte tí chojni chjin tjasin jié tjetjaxín tjan chrítaón tí nchónhya ntá.

² Tí sín rey t'etóan chjasintajni kjuasinko tjan jie la ko tí chojni síin chjasintajni kókuaxín sín tí vino a mé kjaxin kjuasixín sín jie.

³ **A** ntá tuénxín Nchakuen Dios sákjuikian nteje ntá k'uikuán ijnko chojni chjin tjetjaxín chrítaón ijnko bestia kjátse la kuenté tí ko a la síma ihñié náxrjónhya tsík'ántaxiexín sín Dios la chóna yato kja la ko ite ntéé.

⁴ **A** ntá jehe tjan chónṭa tjan iké tjan morado la ko kjátse la teyá tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jje.

⁵ Tí totjen tjan ts'ínixín ijnko ihnjé kohya nkexro tienxín. “Tíha mé tí chjasin jie Babilonia, mé iné tí chojni chjin tjasin jie la ko kain chojni jínahya ch'e síin chjasintajni.”

⁶ Ntá kónóna kixin tí tjan a la tsékanxin tí injné tí sín tinkáchónki Dios la ko tí injné tí sín tsík'enxín tí chrónka sín kixin tinkáchónki sín Jesús. Ntá k'uikuān xikaha imá chrakonna.

⁷ **A** ntá ijnko ángel ntáchro ch'án kixin:

—¿Nkekuénté chrakuan? Ntá ijie sīntanoha tí nkehe tienxínhya chojni kuénte tí tjan a la ko kuénte tí bestia tjeijken tjan chónṭa yato kja la ko ite ntéé.

⁸ Tí bestia k'uikuān jaha kjuák'e ósé la ijie tjechónhya kjánchó senó tsochrīinxín tí tōyē njnka ntá chr'éxin ts'itjáyān. **A** ntá tí sín síin chjasintajni ts'ínixínhya ihnjé sín tí libro ts'ínixín ihnjé chojni tsaá desde k'óna chjasintajni, la mé jehe sín tsochrakon sín tió ts'ikon sín tí bestia kjuák'e ósé la tsík'en la ntá ijie xikjan inaá.

⁹ Tí jnkójín nkexro chrókiexín la mé tí yato kja la t'axrjexín yato jnā tjeijken tí chojni a.

¹⁰ **A** ntá tí kja kjaxín t'axrjexín yato rey la ntá in'ó tí sín rey la í t'etuanhya sín ijie la ijnko tí jehe sín t'etōan ijie la í jnko naxā tjihya. **A** ntá tió tsji tí yatoxin la í kánhyó sé ts'etōan.

¹¹ **A** ntá tí bestia kjuák'e senó la ijie tjechónhya mé tí jnixin rey la jehe ch'án kuénte tí yato rey la chr'éxin la ts'itjáyān.

¹² **A** ntá tí ite ntéé tsík'ikuan mé ite rey naxā t'etuanhya. **A** ntá ijie la ts'áyéhe sín kjuachaxin ts'etōanko tí bestia kjánchó kánhyó sé.

¹³ Tí ite tí rey la jnkokoá tsjenkayáxin sín la tsjanjon sín kjuachaxin kuénte sín kixin ts'etōan tí bestia.

¹⁴ Tsjanjonko sín tí Kolélo a ntá tí Kolélo la tsjacha ts'etōan kixin jehe ch'án mé Inché kain chojni la ko jehe ch'án mé tí Rey ts'etuenhen kain rey la ko tí sín tjejóko ch'án mé tsík'íyehé Dios la tsíkjeýá ch'án sín la jína nchexiteýá sín.

¹⁵ Kjaxín ntáchro tí ch'ín ángel kixin:

—Tí ntā k'uikuān la chrítaón tjetjaxín tí chojni chjin tjasin jie la mé t'axrjexín kixin nchónhya chjasin la ko nchónhya chojni la ko nchónhya nación la ko nchónhya nkiva.

¹⁶ **A** ntá tí bestia k'uikuān la ko tí ite ntéé la tíha mé tsonínkakonhen tí tjan tjasin jie la tsitōhe tjan tjóhín tjan la sine tí bestia tí nto chónṭa cuérpōé tjan la ko tsoche tí huésōé tjan.

¹⁷ Dios tsík'etuenhen asén sín kixin xikaha sich'e sín éxí tjinkaon ch'án kixin jnkokoá tsjenkayáxin sín la ko tsjanjon sín kjuachaxin kuénte tí sín rey kixin ts'etōan tí bestia tsoxiteýája tí nkehe tsintáchro Dios.

¹⁸ **A** ntá tí chojni chjin k'uikuān la táha mé tí chjasin jie t'etōan tí sín rey t'etōan chjasintajni.

18

Kjuútsínka chjasin Babilonia

¹ Ntá chr'éxin k'uikuān í jnko ángel k'uínkajinxín nkajni chónṭa nchónhya kjuachaxin ntá chjasintajni antsi k'uínkaséyanni tí tjákini tsjehe ch'án.

² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jié Babilonia. Ntá tí jínahya ó kjuacha k'uíxhen t'etóan ntiha la ntiha sín kaín xín clase nchakuen jínahya la ko sín káké ko xritjaká tjuáhya la ko jínahya.

³ A ntá kaín xín nació kókuaxín tí vino kjuínchekji tjan ntá kjuasinko tjan sín jié la ko tí sín rey t'etóan chjasintajni kjaxin kjuasinko tjan jié. La tí sín nchekji nkehe chjasintajni kóríkoxín sín kixin k'uena tjan nchónhya nkehe.

⁴ Ntá kujnhan í jnko itén nkexro kujxin nkaya nkajní ntáchro kixin:

—T'axrjéxinrá tí chjasin ntiha kixin tí jahará tinkachónkirá tí janhan kixin chrók'uícahyará tí jjié sín la ko chrókjuasótexínhyará tí nkehe tsonhen sín.

⁵ Kixin tí nchónhya jié tinkák'ánkí hasta kjuixraká nkajní la Dios ó nohe tí jié chóna sín.

⁶ Ch'eherá tjan éxí tí jehe tjan kjuích'ehe tjan í so chojni kixin xikaha tsjasótexin tjan. Chrókjuenkehérá tjan iyó veces éxí tí tsikjich'éna tjan ik'ui í so chojni.

⁷ Antsí chrókjuasóte tjan tóyóhé tí nkehe kjuích'e tjan kixin kjuínchehnke tjan la ko k'uéchóna tjan kaín nkehe tóxrjínjin tjan. Jehe tjan ntáche asén tjan kixin: “Ntíhi tjetjaxian éxí ijnko reina. Jehya ik'ána kixin chrókjuasóténa.”

⁸ Mé xikaha kjaxin jnkokoá yaon itsí tí kjuaxikaon tsonhen tjan mé its'en tjan la ko tsjasótexin tjan kjinta la tsoche tjan kixin Ínchéni imá chóna kjuachaxin la jehe ch'an sinchekjasóte ch'an tjan.

⁹ A ntá tí sín rey sín chjasintajni tsíkjasinko sín tjan jié la ko nchónhya nkehe kjuínchexenko sín tjan la mé tsotsjánka sín la ts'èya sín tió ts'ikon sín ts'aya ihnchi tió tsoche tjan.

¹⁰ Ntá jehe sín tsítóhe sín ikjín kixin chrakon sín kixin xikaha tsjasóte tjan la tsontáchro sín kixin:

—Nòa tí jaha chjasin jié Babilonia, chjasin imá t'etóan kixin titàya kjuasótia.

¹¹ Tí sín xrinchekji nkehe la kjaxin tsjánka sín, t'èya sín kixin xikaha kónhen tí chjasin ntiha kixin kohya nkexro ts'engehe sín tí nkehe sinchekji sín.

¹² Kjuínchekji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjátse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixro chica la ko ixro mármol.

¹³ Kjaxin xrinchekji sín canela la ko xroan xraxé náxrjón la ko chjincó la ko xroan mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokate la ko carreta la ko chojni ch'exón xra kjaxin kjuínchekji sín.

¹⁴ Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'uitjayan kain nkehe náxrjón tjete k'uéchonta.

¹⁵ Tí sín k'uékjinchekji tí nkehe la kóricó sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'èya sín

¹⁶ la tsontáchro sín kixin:

—Nòa tí chjasin jié. Éxí ijnko chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla.

¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etóan tí ntabárcó la ko tí sín tsík'ixenhen tí ntabárcó la ko tí sín ch'e xra chrítaón ntayaon kuitóhe sín ikjín

¹⁸ la tió k'uíkon sín tí ihnchi síche tí chjasin ntiha la k'óyako sín kixin:

—ǵXá nkexéhe í jnko chjasin chrókóyóhe tí chjasin jié í?

¹⁹ La tǵíkjanjin kja sín nche la tsǵánka sín t'èya sín kǵixin:

—Nòà tí chjasin jié. Kóricó tí sín k'uéchónta ntabárcó chrítaón ntáyaon kǵixin tí chjasin í la ntá jnkorató koá kjuixin k'uitǵayan tí nkehe chóna sín.

²⁰ A ntá jahará tjeorá nkajní tócháhará kǵixin xǵikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kain rá kuinkachónkirá tí jehe ch'án kǵixin Dios kjuínchekjasóte tí chjasin a kǵixin tí jié kjuasin sín kjuínchekjasótiará sín tí jahará.

²¹ A ntá ijnko ch'ín ángel chóna kjuachaxin kjuatsen ijnko xro éxí ijnko xro jié kuènte molino la k'uenkí ch'án ntáyaon la ntá ntáchro ch'án kǵixin:

—Mé xǵikaha tsonhen tí chjasin Babilonia, tí chjasin jié la nunca ts'íkonhya chojni chr'éxin.

²² Nunca tsienhya sín música kuènte isón arpa la ko flauta la ko trompeta tí ntá la ko ninkehró xitjahya sich'e ninkehó xra ntiha la ko kǵaxin tsienhya sín ninkehó tóvéntó xro molino.

²³ Í ts'inkaséyanxínhya xrohi kuènte ninkehó lámpara la kǵaxin í tsienhya sín ts'ixin kia tsotehe chojni ntiha. Tí sín k'uékjinchekji nkehe ntiha la imá k'uék'etǵan kuènte chjasintajni la tí sín k'uékjich'iyehé tí sín síin chjasintajni la k'uékjich'e sín jínahya, k'uédkjinchexroǵan sín.

²⁴ A ntá tí chjasin jié ntiha tsíkónoxín ijnjé tí sín tsík'en k'uéchronka itén Dios la ko tí sín tinkáchónki tí jehe ch'án la ko kain tí sín tsík'enxin chjasintajni.

19

¹ Ntá chr'éxin ntá kuínhan itén nchónhya nkexro tjejó nkaya nkajní itsen nixja, ntáchro sín kǵixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án tí jeheni la imá chóna kjuachaxin Dios kuènteni.

² Kǵixin jehe ch'án ntoá kjuínchekjasóte ch'án tí tjan kjuasin nchónhya jié kǵixin jehe tjan kjuachroe tjan chojni síin chjasintajni kǵixin tí nkehe jínahya k'uékjich'e tjan.

Dios kjuínchekjasóte tjan kǵixin k'óyán tjan tí sín k'uékjich'ehe ch'án xra.

³ La ntá kǵaxin ínaá xíntáchro kǵixin:

—¡Aleluya! Kjuasáyé Dios kǵixin tí ihnchi síchexín tí jehe tjan tsítǵehya chrin hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toh'in sín hasta káxin kja sín nonte kjuikosáyéhe sín Dios tí nkexro tjetǵaxín tí trono la ntáchro sín kǵixin:

—¡Amén! ¡Aleluya! ¡Kjuasáyé Dios!

⁵ Ntá xrínahya kuínhin sín itén ijnko nkexro tjen nó trono ntáchro kǵixin:

Chjehérá kjuasáya tí Dios kuènteni kain rá ch'ehérá ch'án xra

la kuítekákonhénrá ch'án,

mé kain tí jahará kǵjónte chánjan ntsínsí o chojni ntǵeto.

Tí kia tsotehe tí Kolélo

⁶ Kǵaxin kuínhan nkehe éxí itén nchónhya chojni éxí nchónhya ntárió sítóvéntó la ko imá itsen sítjonta la ntáchro kǵixin:

¡Aleluya! Kjuasáyé Ìnchéni ó kjuankǵixin t'etǵan Ìnchéni Dios kuènteni chóna kain kjuachaxin.

⁷ Chrókóchéhēni la chrókjuikosáyeheni Dios

kǵixin ó kjuixraká tí yǵon ts'ixin kia kuènte Kolélo.

La tí tjan tsotehe la tsikóyaxínhin tjechónhen,

⁸ mé tsík'áyéhe kjuachaxin tsík'itsa ka lino náxrjón tjóá tjákini.

À ntá tí ka lino náxrjón a mé t'axrjexín kixin tí jina k'uéjó tí sín tinkáchónki Dios.

⁹ Ntá tí ch'ín ángel k'uetóan ch'án kixin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsotehe tí Kolélo.”

À ntá ntácho ch'án ínaá kixin:

—Tí palabra a mé chaxín ntoá nixja Dios.

¹⁰ Ntá kjuak'éxian toçh'ian toté tí ángel kixin chrókjuikosáyaha ch'án, kjánchó jehe ch'án ntácho ch'án kixin:

—Xikahya chrokjuich'e kixin janhan kjaxian t'aha xra Dios éxi tí jaha la ko éxi tí sín kichúa kuitóehya kúitekaon tí tan jina chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uikuán kixin nkajni tjebrankehe la ntaha kónoxin ijnko kokate tjóá la ko tí nkexro tjejkjen va mé it'ín jina la ko Chaxín kixin ntoá kjuínchekitóexín ch'án ijje chojni la ko ntoá kjuánjonko ch'án chojni.

¹² À ntá tí ikon ch'án mé tjákini éxi xrohi nene xikaha tsjehe. À ntá tí kja ch'án la chóna nchónhya corona la ko ts'ínixín ijnko ihnié ijnko nkexro la jehó ch'án mé nohe ch'án tíha.

¹³ Tjenkáya ch'án ijnko ka tsík'ixikjanjin jni ntá ihnié ch'án mé Itan Kuènte Dios.

¹⁴ Chréhe tí sín soldado kuènte nkajni. Iké sín mé ka lino náxrjón tjóá la tjejójkjen sín kokate tjóá.

¹⁵ Ir'va tí jehe ch'án k'uaxrjexín espada imá taté kixin táha mé tsjik'óyánxin ch'án tí sín siín kaín nación la ko ts'etóanxín ch'án ijnko chica vara. Jehe ch'án mé sinchekitóexín ch'án ijje sín éxi t'énxin sín to uva toté sín mé xikaha ts'etuenhen ch'án kixin its'i sín vino tsjasótexín sín kixin mé xikaha tsixín tí kjuanínkaon kuènte Dios chóna kaín kjuachaxin.

¹⁶ Iké ch'án mé ts'ínixín kixin jehe ch'án me Rey t'etuenhen kaín rey la ko jehe ch'án mé Inché kain chojni.

¹⁷ Ntá tuénxin k'uikuán ijnko ángel tjejin toté tí tjen yaon la k'uéyato ch'án itsen k'uéyatohe ch'án tí ko xritjaká, ntácho ch'án kixin:

—Xrákirá tójkotsérá ntihi kixin Dios tsjanjon nkehe sinterá ijje.

¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jiehe la ko ntøe kokate la ko cuerpo kuènte tí sín tsíkjiták'á va la ko cuerpo kuènte kaín chojni libre o chojni ch'exón xra la chojni hyé o chojni ntsínsi.

¹⁹ K'uikuán tí bestia la ko tí sín reyes t'etóan chjasintajni la ko tí soldado kuènte sín, tsikójkotsé sín tsjanjonko sín tí nkexro tjejkjen kokate la ko koí tí sín soldado kuènte ch'án.

²⁰ À ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xikaha kjuích'e tí nkexro ntoáhya kjuako, kjuích'iyehé ch'án tí sín tsíkítóhe tsíka marca kuènte tí bestia la ko kjuikosáyehé sín tí nkehe tsíkjangya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuenhen sín sátsji tí siín xrohi tsoche tjejóchónxinhín sín tsochéxin azufre.

²¹ A ntá tí í so sín la ts'énxín tí espada k'uaxrjéxín tí ir'va tí nkexro tjekjen tí kokaṭe tjóá la kaín ko xritjaká ts'ixín tí síin tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrinahya k'uikuan ijnko ángel k'uínkajinxín nkajní tjexraá llave kuènte tí tòye ninka la ko ijnko cadena jié tjexraá ch'án.

² A ntá tí ángel a itsé tí dragón mé tí konche ósé kjí mé tíha tí ch'ín diablo la ko Satanás la kjuak'echroé ch'án ijnko mil nánó.

³ Ich'án ch'án sákjuí tòye ninka ntá k'uikjehe ch'án la ko kjuak'e ch'án ijnko sello chrítaón puerta kíxín ntá tí dragón chrókjuich'iyehya tí chojni síin kaín nacióon hasta chrók'uatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uikuan tí trono la ko tí sín tjejótxajín tsík'áyéhe sín kjuachaxín sinchekitoxén ijíé chojni. Kjaxín k'uikuan asén chojni tsíchínjin kja kíxín kuítekaon sín Jesús la ko tsíchónkaxín sín itén Dios. Jehe sín la kuínkáchónkihya sín tí bestia la ko tí nkehe tsíkjanoya kuènte la ko kuítóehya sín ikuá sín marca tí totjen sín o tí itja sín. Mé k'uikuan kíxín tsíxechón sín la ko ts'etoanko sín Cristo ijnko mil nánó.

⁵ Ntá í so chojni tsík'en la naxa xechónhya hasta ts'atsínkajia tí mil nánó. Tíha mé xrankíxín tsoxechón chojni.

⁶ Naxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chóntahya ninkehó kjuachaxín naxa xikaha chrókónhen sín. Jehe sín mé ncha'tá kuènte Dios la ko kuènte Cristo la ts'etoanko sín ch'án tí mil nánó.

⁷ A ntá ts'atsínka tí mil nánó ntá ch'ín Satanás tsoxintankehe tí kjíchroé.

⁸ La sátsjikjich'iyehé tí chojni síin kuenté chjasintajni la ko sátsjikjich'iyehé tí chjasín Gog la ko Magog. La tsojnkotsé sín kíxín tsjanjon sín la ko tí soldado kuènte tí jehe sín. Nchónhya sín tsojnkotsé ntiha éxí tí nchesen síin ntayaon.

⁹ Mé xikaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasín jié tjuéhe ch'án. A ntá xrohi tsixín nkajní kíxín tsochexín tí sín jínahya ts'itjáyanxín sín.

¹⁰ A ntá tí diablo tsíkjich'iyehé tí jehe sín kjaxín sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochríxín.

Tsitoxén ijíé chojni tí tjen tí trono jié tjóá

¹¹ Ntá k'uikuan ijnko trono jié tjóá la ko tí nkexro tjetjaxín nó ntiha. A ntá tí tjen ch'án ntiha la ó k'uitjáyankoá nonte la ko nkajní la í kónoxínhya ínaá tí nonte.

¹² Ntá k'uikuan tí sín tsík'en; chojni hyé la ko chojni ntsínsí tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihnié tí sín tsaá. Ntiha tsitoxén ijíé chojni tsík'en éxí nixja tí í so libro nkehe tí xra kjuích'e sín ts'ínixín ntiha.

¹³ Tí sín tsík'énxín ntayaon la ntiha xrakuaxín sín la tí sín sátsíkji tí síin chojni tsík'en la ntiha xrakuaxín sín kaín sín tsochjina sín tsitoxén ijíé jnkojnko sín kíxín nkexrí tí xra kjuích'e sín.

¹⁴ Ntá tí kjuachaxín kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha.

¹⁵ La ko ntaha sátsji tí chojni ts'ínixínhya ihñié sín tí libro ts'ínixín ihñié chojni tsaá.

21

Nkajní nixin la ko nonte nixin

¹ Ntá k'uúkuān ijnko nkajní nixin la ko ijnko nonte nixin kixin tí nkajní saoxin la ko tí nonte saoxin tsík'itjáyan la ko kjaxin kohya ntayaon.

² Janhan Juan k'uúkuān tí chjasin jié tjóá. Táha mé tí Jerusalén nixin k'uúnkajinxin nkajní kuixin tí tjen Dios la kuente tsikóyóxin éxi ijnko chojni chjin tsotehe tsík'itsa kixin tsákja tí xíi.

³ Ntá kuñhan ijnko itén ijnko nkexro itsen kuixin nkajní ntácho kixin:

—Dios itjen tí siín chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuente sín.

⁴ Jehe ch'án mé sinchexamá kaín ntakon sín la í tsokohya nkexro its'en la tsokohya nkexro tsotsjánka la ko ts'aváhya sín la ko tsokohya kjuatjoté kixin kaín tí nkehe k'uékónhen ósé la ó kjuixin k'uátsínka.

⁵ A ntá tí nkexro tjetjaxin tí trono ntácho ch'án kixin:

—Janhan mé t'ána kaín nkehe nixin.

Kjaxin ntácho ch'án kixin:

—Ikjian tíha kixin tíha mé palabra chaxín la chrókuítekávān kaín tíha.

⁶ Ntá chr'exin chrónka ch'án kixin:

—Kaín nkehe la ó kjuixin tsík'óna. Janhan la tí xrankixixín la ko tí tsjixixín éxi tí letra xrankixixín A la ko tsjixixín Zeta. Tí nkexro t'enxin ntá la janhan tsotjahá sín tí ntá its'i sín mé tí ntá tjanjon kjuachón la ninkehó ts'ixinkíehya sín tíha.

⁷ Tí nkexro tsjacha tsítohehya tí janhan la ts'áyéhe sín kaín tí nkehe tsotjahá sín. La janhan mé ts'óna Dios kuente sín, a ntá jehe sín mé xjanna ts'íkaān tí jehe sín.

⁸ A ntá tí chojni chrakon la chojni titekakonhya la tí sín chjinoxínhin la ko tí chojni ts'óyán kichó la ko tí chojni tsákja chojni chjin ókjé la ko tí chojni xrinchexroān la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí siín xrohi tsochexin sín azufre tió itsi tí yóxin muerte.

Tí Jerusalén nixin

⁹ Ntá ikui ijnko tí yatoxin ángel chóna tí yatoxin copa tsíkaón tí yatoxin chin tsjixixín tsjasótexin chojni. Ntá ntácho ch'án kixin:

—Xrákia tsjákōha tí tjan tsotehe tí Kolélo.

¹⁰ Ntá k'uúkuān ijnko nkehe kjuakoxin Nchakuen Dios la ntá tí ángel sákjuúkian ijnko jnā jié la ko noi la kjuakōna ch'án tí chjasin jié tjóá mé tí Jerusalén ts'inkajinxin nkajní tsíkixin tí tjen Dios.

¹¹ A ntá tí chjasin a mé tjákinixin kjuachaxin kuente Dios. A ntá tjákiní éxi ijnko xro imá náxrxjón tjete éxi xro jaspe éxi xrosentā tsjehe.

¹² A ntá jnkotatjen tí chjasin chóna tjat'o noi la chóna teyó puerta la jnkojnko ángel jnkojnko puerta tjejónta la ihñié tí teyó tí sín tsík'axrjenixin sín Israel ts'ínixín jnkojnko puerta.

¹³ La iní puerta la nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur.

14 Tí tjat'ò tsík'antatjen tí chjasin chóna teyó xro chóntaxín fuerza tí tjat'ò la jnkojnko ihñié tí teyó tí sín k'uájiko tí Kolélo a mé ts'ínixín jnkojnko tí xro a.

15 A ntá tí ángel tjenixjana chóna ijnko nta vara oro, éxí tji tsjehe, tsja-choaxín tí chjasin la tí puerta kuènte chjasin la ko tí tjat'ò t'inkákuènxin.

16 Tí chjasin la cuadrada la tí kjinjinxín jnkokón la ko tonxín la jnkokón. A ntá tí ángel kjuachoxín tí chjasin tí nta vara éxí tji tsjehe tsíkjachoxa ch'án tí chjasin mé chóna dos mil doscientos kilómetro tí kjinjinxín la ko tí ntetoxín la ko tí tonxín la jnkokón.

17 Ntá tsíkjachoxa ch'án tí tjat'ò tsíkintajin tí chjasin a la chóna sesenta y cuarto metro kixin éxí tjachroa chojni chjasintajni mé xíkaha kjuachoxa tí ángel.

18 Tí tjat'ò tsík'antatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosentá tjóá.

19 Tí xro tsík'óna xrankixín tsík'antatjen tí tjat'ò la nchónhya xro chjini náxrjón tsínkíjan. A ntá tí xro xrankixín la jaspe, a ntá tí xro yóxin la zafiro, la tí xro nixin la ágata, a ntá tí noóxin la esmeralda.

20 A ntá tí n'óxin xro la xro mármol la tí injonxín la cornalina, la tí yatoxín la crisólito, a ntá tí jnixin la berilo, la tí xro naxín la topacio, la tí texín la crisoprasa. A ntá tí tejncoxín la jacinto, a ntá tí teyóxin la amatista.

21 A ntá tí teyó puerta mé tejó perla la jnkojnko puerta tsík'óna jnkokoá perla. A ntá tí ntia jié kuènte chjasin la tsík'óna jehó chica oro éxí xrosentá tsjehe.

22 Ntaha la k'uikónhya ninkehó nínko tí chjasin a, kixin Inchéni Dios chóna kain xín kjuachaxín la jehe ch'án la ko tí Kolélo mé tí nínko ntiha.

23 Tí chjasin a mé t'ichjánxinhya yaon la ko ni nitjó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuènte.

24 A ntá tí chojni kuènte kain nación tsíkaá la ts'ikonxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín.

25 A ntá tí puerta kuènte chjasin la tsíkèhya tí nchakotjin la ntaha la tsokohya ts'ixín tie.

26 Ntaha sátsjiko kain xín nación tí nkehe náxrjón k'uéchóna sín chjasintajni.

27 A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin o chojni ch'ia. Jehó ts'ixenhen tí sín ts'ínixín ihñié tí libro ts'ínixín ihñié tí sín tsaá, mé tí libro chóna tí Kolélo.

22

1 A ntá tí ángel kjuákona ijnko ntario tjóá, a ntá tí ntá a mé tjanjon kjuachón. Táha mé t'ikonxíni éxí xrosentá la mé k'uaxrxén tí trono kuènte Dios la ko tí Kolélo.

2 A ntá jnkosiné tí calle tjetoan kuènte tí chjasin a la ko nanánko tí ntario ntiha itjen tí inta tjanjon kjuachón mé t'óna to teyó veces jnkojnko nánó kixin t'óna to jnkojnko nitjó. Tí ka kuènte tí nta la xroan tsitoxén jina tí nación síin ntiha.

3 La mé ntiha tsokohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án.

4 Ts'ikon sín tí kàré Dios la ko tsochóna sín ihñié ch'án tí totjen sín.

5 Ntiha la tsokohya ts'ixin tie la tí sín siín ntiha la t'ichjánxienhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxín sín ntiha la ko tsochónta sín kjuachaxin kuènte Dios jnkochrixin.

Tí itsi Ìnchéni la kánhyó sé

6 A ntá tí ángel mé nixjana ch'án ntáchro kixin:

—Tí itan a mé chaxín la chrókuítekákonzén tí tan a. La ko Ìnchéni mé tí Dios nchexraxinkaon tí sín nixja kjuachaxin ihné ch'án mé ichr'án ch'án tí ángel kuènte ch'án kixin tsjakuexin ch'án tí sín ch'ehe ch'án xra, tí nkehe tjoka tsonhen.

7 —Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

8 Janhan Juan, kuinhan la ko k'uikuán tíha. A ntá chr'éxin kjuixin kuinhan la ko k'uikuán tíha ntá kjuak'éxian toch'ian chrínkí toté tí ángel kixin xikaha kjuakona la ntá chrókjuíkosáyaha ch'án.

9 A ntá jehe ch'án ntáchro ch'án kixin:

—Xikaha s'ich'e kixin janhan kjaxin t'aha xra Dios éxi tí jaha xikaha la ko éxi tí sín kichuá mé tí sín nixja itén Dios la ko kaín tí sín tjinkaon chrókuítekaon nkexri nixja tí libro i. Mé jehó Dios chrókjuíkosáyehé.

10 Kjaxin k'uetuanna ch'án kixin:

—Chrókjuak'echjinahya tí nkehe jahvá kuinhín kuènte Dios éxi nixja tí libro i kixin ó kuichjina tí yaon tsoxiteyá.

11 A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjínjin Dios la naḡa chrókjuich'e xikaha la ko tí nkexro tsíkjinchetjóá Dios la naḡa jina chrók'uejó sín chrókuítekaon sín tí jehe ch'án.

12 —Chaxín tjoka ts'inka janhan la ts'inkakian tí nkehe tsotjahará jnkoinkorá kixin nkexri tí xra chuich'erá.

13 Janhan mé tí xrankixixin la ko tí tsjixixin la janhan mé tí saoxín la ko tí tsjixixin éxi tí letra xrankixixin A la tsjixixin Zeta.

14 Náxrjón ts'ejó tí nkexro tsíkjen iké kixin tsochónta sín kjuachaxin tsochjinehe sín tí nta tjanjon kjuachón kixin jina ts'ixenxín sín tí puerta kuènte chjasin.

15 A ntá ntója tsitōhe tí chojni jínahya kuítekakonzehya la ko tí chojni nchexroan la ko tí sín chóntha nchónhya chojni chjin la ko tí chojni tjaya la ko tí chojni tinkáchónki tí nkehe tsíkjangya la ko tí chojni tóxrjínjin xrich'ia.

16 —Janhan Jesús mé ichr'an tí ángel kuèntana kixin tsochénta kaín nínko kaín tíha. Janhan mé k'uaxrjenixian tí rey David la ko janhan tí konotsé itji tí chjina t'inkáséyan.

17 Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enixín ntá tjinkaon ntá la chrók'ui tí ntá tjanjon kjuachón la ninkehó ts'ixinkíhya tíha.

18 Kaín nkexro tjejótinhin itén Dios ts'ínixín tí libro i la chrókónohe sín tíha: Jnkójin sín chrókjuich'éna í so nkehe chrónixja la Dios mé antsí sinchekjasóte tí jehe sín tsoníhi sín éxi nixja tí libro i.

¹⁹ A ntá jnkojìn nkexro tsjatsen jnkojín palabra chóna tí libro i la Dios tsjatsen tí nkehe chrók'úáyéhe sín chóna tí libro ts'ínixín ihnié tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

²⁰ A ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Ìnchéni Jesús!

²¹ Ìnchéni Jesucristo mé sincheyaonrá kaín rá. Amén.